


Yus Papí: Shuarjai
Yus Yamaram Chicham
Najanamu



New Testament in Shuar (EC:jiv:Shuar)

Yus Papí: Shuarjai Yus Yamaram Chicham Najanamu

New Testament in Shuar (EC:jiv:Shuar)

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Shuar

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

fb10d1f0-e2d5-5d8e-8a74-10846708c857

Contents

MATEU	1
MÁRKUS	38
RÚKAS	61
JUAN	100
TÚRAMU	127
RÚMANAM	164
1 KURINTIUNAM	179
2 KURINTIUNAM	194
KARASEANAM	204
IPISIUNAM	210
JIRIPIUSNUM	215
KURUSENAM	219
1 TISARÚNIKIANAM	223
2 TISARÚNIKIANAM	227
1 TIMIUTÉUN	229
2 TIMIUTÉUN	233
TITIUN	236
JIRIMIÚÑKAN	238
ISRAERNUM	239
SÁNTIAK	250
1 PÍTIUR	254
2 PÍTIUR	259
1 JUAN	262
2 JUAN	266
3 JUAN	267
JÚTAS	268
APUKARÍPSIS	270

Yúsán Shiir Chichamen MATEU aarmia nu

Jesukrístu weatrí
(Rúkas 3.23-38)

¹ Jesukrístu weatrí ju ániawai. Tura ashí nankaamas ti uunt weat Tawitcha Apraámsha ániawai. ² Apraáma uchirí Isak. Tura Isaka uchirí Jakup. Jakupa uchirísha Jutá ni yachijjái. ³ Tura Jutá uchirín Páresan tura Sarancha Tamar jurermiayi. Páresa uchirísha Esrum, nuna uchirísha Aram. ⁴ Nuna uchirísha Aminiatáp. Nuna uchirísha Nasun. Nuna uchirísha Sarmun. ⁵ Sarmunka uchiríncha Púusan Raap jurermiayi. Puusa uchirín Uwitian Ruut jurermiayi. Uwitia uchirísha Isaí. ⁶ Nuna uchirísha uunt akupin Tawit. Uunt akupin Tawitia uchiríncha Sarumúnkan Patsepa jurermiayi. Patsepasha emka Uríasa nuweeyayi.

⁷ Sarumúnka uchirí Rupuam. Nuna uchirísha Apías. Nuna uchirísha Asa. ⁸ Asa uchirísha Jusapát. Nuna uchirísha Juram. Nuna uchirí Usías. ⁹ Usías uchirí Jutam. Nuna uchirí Akas. Nuna uchirí Esekías. ¹⁰ Esekías uchirí Manasés. Nuna uchirí Amun. Nuna uchirí Jusías. ¹¹ Jusías uchirí Jekunías ni yachí armia nujái. Nuí Papirúnianmayá shuar Israer shuaran mesetjái nupetkar Papirúnia nunkanam achirar júkiarmiayi.

¹² Nu ukunmanka Jekunías uchirí Saratiár akiiniamiayi. Tura nuna uchirí Surupapír. ¹³ Surupapíra uchirí Awiut. Nuna uchirí Iriakím. Nuna uchirí Asur. ¹⁴ Asura uchirí Satuk. Nuna uchirí Akim. Nuna uchirí Eriut. ¹⁵ Eriuta uchirí Ereasár. Nuna uchirí Matan. Nuna uchirí Jakup. ¹⁶ Jakupa uchirí Jusé Marí áishriya nu. Marisha Jesusan jurermiayi. Nu Jesuska shuaran uwemtikiartin asa Kristu tu anaikiamuiti.

¹⁷ Tuma asamtai Apraámnumiá Tawitnium Jesusa weatrí katurse (14) ániawai. Tawitni-umiásha Papirúnianam júkimiunma nujsha katurse weat ániawai. Papirúnianam júkimiun-mayásha Kristunam ataksha katurse ániawai.

Jesukrístu akiiniamu
(Rúkas 2.1-7)

¹⁸ Jesukrístu akiiniamu júnis ámiayi. Ni nukurí Marí Jusejái anajmanairuyayi. Tura tsaniatsajín Yusa Wakaní ajaprumtikiamiayi. ¹⁹ Ajaprukmetaisha Jusé Marin iniatsaatsuk nin ajapatniun enentáimpramiayi. Tura ti péñker asa aya iniaiatniun wakerimiayi aents nékainiatsajín. ²⁰ Nuna tu enentáimia pujái, mesekranam Yusa suntarí tari chicharuk timiayi “Juséa, ame weatrum Tawitchakait. Tuma asam Marijjái nuatnaikiatin ashamkaip. Uchin jurertatna nuka Yusa Wakaníniuiti. ²¹ Uchin áishmankan takustatui tura nuna naarí *JESUS* anaikiattame. Ashí ni shuarín ni tunaariya uwemtikiartin asa Jesus anaikiatniuiti” timiayi.

²² Yus ni etserniurjjíjái yaunchu timia nu uminkiatí tusa nu túrunamiayi. Juna áamtikramiayi:

²³ “Nuwa natsa ajapruktatui tura uchin takustatui. Nuna náarísha Emanuér anainiaktatui.” Tu áarmaiti.

Emanuérsha nu chichamnum “Yus iijjái pujuwiti” tawai.

²⁴ Jusesha mesekranmayá shintiar Yusa suntarí timia núnisañ Marin nuatkamiayi.

²⁵ Tura uchin júreatsajín tsaninchamiayi. Tura jurermatai uchin Jesus anaikiamiayi.

2

Ti neka apach Jesusan eqakarmiania nu

¹ Jutía nunkanam Piriñ pépru ana nuj Jesus akiiniamiayi. Nujsa nú nunka akupniurí Irutisauyayi. Akiiniamtai ti neka apach nantu tátainmaaniya Jerusaréñ péprunam táarmiai. ² Taar inintruniak “¿Israer shuara úunt akupniurí tui akiiniat? tiarmiayi. Nantu tátainmaani pujaati ni yaarí wáinkiamji. Tura tikishmatratái túsar winiaji” tiarmiayi.

³ Irutis nuna antuk nusháa enentáimpramiayi. Tuma asamtai ashí Jerusaréñnumiá shuarsha antukar nusháa enentáimpramiayi. ⁴ Irutis nuikia ashí Israer-patri uuntrincha tura yaunchu akupkamun jintinniuncha untsukarmiai. Tura Kristu akiiniatniurín in-intrusmiayi. ⁵ Tutai chichainiak “Jutía nunkanam Piriñ pépru ana nuj akiiniatniuiti, tiarmiayi. Yaunchu Yúsna etserin tu áaruuti:

⁶ “Jutía nunkanam, Piriñ pépru, ishitiápchich ana nuyá nekas uunt akupin winittiwai. Nii ashí Israer shuaran, Wíi shuar áarmatai, péñker wáinkiatitawai,” tawai Yus.” Tu tiarmiayi.

⁷ Nuna tuíniakui Irutis ti neka apachin úusan, urutía yaa emka wáinkiamarum tusa ani-asarmiayi. ⁸ Nuyá Pirinnum akupeak “Nuj werum uchi pénger inintrusrum wáinkiatarum. Tura wáinkiarum ujatkatatum. Wisha werin tikishmátuutaj” tímiayi.

⁹⁻¹⁰ Tutai ti neka apach wearmiayi. Tura yaa, yajaya wáinkiarmania nu, tuke eem wémiayi. Tura yaan wáinkiar ti wararsarmiayi. Tura nú yaa uchi pujumia nuí ejeniarmiayi. ¹¹ Jeá wayawar uchincha ni nukurj Marijjai wáinkiarmaniayi. Tura uchin tikishmatrarmiayi. Nuyá ni kajuntríyan kurincha, mirá kunkuinniasha, chíkich kunkuinniasha súsarmaniayi. ¹² Nuyá mesekranam Yus “Irutisajni weerap” tutai chíkich jintianam wakеткиarmiayi.

Ejiptunam pisaamu

¹³ Ti neka apach waketrantai Yusa suntari mesekranam Jusen ujakmiayi. “Nantakim uchi ni nukurjjai Ejiptu nunkanam jukim nuí pujustá. Irutis uchin máataj tusa eaktatui. Tura ukunam ankanat ajasmatai ujaktajme” tímiayi.

¹⁴ Tutai Jusé kurat shintiar nú káshik uchincha nukurjjai Ejiptunmaya Israer nunkanam waketkimiayi. ¹⁵ Irutis jáatsajni nuí pujusarmiayi. Ejiptunam pujusmatai Yus yaunchu timia nu uminkiamiayi. Iis, Yúsnan etserin aak tímiayi:

“Ejiptunmayan winia Uchirun untsukmajai.”
Tu áarmiayi.

Irutis uchin máawarat tusa akupkamu

¹⁶ Irutissha ti neka apach nin ananaka yaja waketran nekáa ti kajekmiayi. Ti kajek ashí áishmanchin Pirinnumsha tura yantamach pujuarmia nunasha maawaarat tusa akupkamiayi. Ti neka apach ujakmia nuna enentáimias ashí jimiara uwin takakun tura nú uchichin máawarat tusa akupkamiayi. ¹⁷ Nuka Yusnan etserin Jeremías aarmia nu uminkiamiayi. Juna áarmiayi:

¹⁸ “Ramá nunkanam ti úutaniak uur ajainiawai. Raker ti uutu asa atsankrachminiaiti ni uchirí jákarmatai.” Tu áarmiayi.

¹⁹ Tura Irutis jakantai Yusa suntari mesekranam Jusen ujakmiayi. ²⁰ “Uchin máataj tiarmia nuka jákarai. Yamaikia ataksha uchi ni nukurjjai jukim Israer nunkanam waketkítia” tímiayi. ²¹ Tutai Jusé nantaki uchincha nukurjjai jukin Ejiptunmaya Israer nunkanam waketkimiayi. ²² Túrasha Irutisa uchirí Arkiráu Jutía nunkanam uunt akupin ajasun nekáa nuí wétinian aránkamiayi. Mesekranmasha ujakma asa nuí pujutsuk Kariréa nunkanam wémiayi. ²³ Nuí jeá Nasaréti péprunam pujusmiayi. “Nasarénumiá átatui” Yusnan etserin yaunchu tu etserkamu nujai uminkiamiayi.

3

Imiakratin Juan atsamunam etserkamiania nu (Márkus 1.1-8; Rúkas 3.1-9, 15-17; Juan 1.19-28)

¹ Nuyá imiakratin Juan Jutía nunkanam aents atsamunam etserki támiayi. ² “Enentáim yapajáatarum. Tsawant ishichik ajasai Yus juí akupin ajastin.” Tu etserkamiayi.

³ Nú Juan kan yaunchu Yúsnan etserin Isayas juna áarmiayi:

“Shuar atsamunam aents untsumui. Untsumuk “Atumí enentái Uunta jintí iwiarturatum tura naka awajsatarum” tawai.” Tu áarmiayi.

⁴ Nuyá Juansha kamiyu ure najantramun entsauyayi. Emenmamkesha nuapeyayi. Tura yutai-titikriátsnasha chinjjai yúuyayi. ⁵ Tura Jerusaréni péprunmaya shuarsha tura ashí Jutía nunkanmaya shuarsha Jurtan entsanam matsamiarmia nú shuarsha mash Juánkan tariarmiayi ni chíchamem anturkatai tusar. ⁶ Tura ni tunaarjin paant etserkarmatai Juan Jurtan entsanam imianiarmiayi.

⁷ Juansha Pariséuncha Satuséuncha imiatti tusa wininia wániak tímiayi “Napia áaniutirmincha, ¿ya atumniasha ti asutniátniunmaya uwempratniuncha ujatmakmarum? tímiayi. Asutiátni tsawant ishichik ajasai. ⁸ Tuma asamtai enentáim yapajáamuitkiunpia pénger wekaamurmjjai paant iniakmatarum. ⁹ Atumsha “Iikia Apraám weeitji” tu enentáimutamasairap. Nujai uwemprashatrum. Yus wakerakka ju kayan Apraáman tiranki najankainti, tímiayi. ¹⁰ Numi ajaktinia áintsan kampuwarin jacha atuttsamuiti. Tura numi pénger nereatsna nuka tsupikia jinium apeamu ártatui. ¹¹ Wikia aya entsajain imiajrumé atumi enentái yapajáawakrumin. Antsu winia ukurui winiana nuka pénger awajtamstaj tusa imiantinia áanis tura jia áanis Yusa Wakanin enketrampratarme. Wjjai nankaamantu asamtai wikia tsuntsumpruan ni sapatrinkisha atitrachminiaitjai. ¹² Aruusa nerejai túruinia áintsan átatui. Awajtiutairin achikiuiti tura nujai saepen awajitiawai. Tura neren pénger ikiustatui, antsu saepenka jinium apeattawai. Nu jisha tuke kajinchaiti.” Tu tímiayi Juan.

Juan Jesusan imiainiu amia nu

(*Márkus 1.9-11; Rúkas 3.21-22*)

¹³ Nuyá Jesus Kariréa nunkanmaya winis Jurtañ entsanam támiayi Juan imiatti tusa. ¹⁴ Juansha emka nakitiak Jesusan tímiayi “Ame winia imiatminiatme. Túrutamniaiatimesha çurukamtai winia tarutnium?” tímiayi.

¹⁵ Tura Jesus tímiayi “Ántsañ asati yamaikia. Núnisrik ashí Yus akupkamu umirkatniuitji.” Tutai Juan iniaisamiayi. ¹⁶ Tura Jesus imiani entsaya jíinkímtai nayaimpⁱ uranmiayi. Tura Yusa Wakanj yámpitsa ántsañ Jesusan tarimiayi. Niisha wáinkíamiayi. ¹⁷ Túramtai nayaimpinmaya Yus chichaak “Juka winia Uchiruiti. Ti aneamuiti. Ti shiir enentáimtjai” tímiayi.

4

Uunt iwianch Jesusan anankataj tímiania nu

(*Márkus 1.12-13; Rúkas 4.1-13*)

¹ Nu túrunamtai Yusa Wakanj Jesusan iwianchjai nekapmamtiksatts aents atsamunam jukimiayi. ² Nuñ kuarenta (40) tsawant, káshisha tsawajsha yurumtsuk pujak tsukarmiayi. ³ Nuñ uunt iwianch Jesusan nekapsataj tusa tarí tímiayi “Nekas Yusa Uchirínkiunkma ju kaya apatak najanata.”

⁴ Tutai Jesus tímiayi “Yus-Papinium áarmaiti: “Aents aya apatukujain iwiaaku pujuschamniati. Antsu Yus táman enentáimtuiniak nekas iwiaaku pujusartatui” tawai” tímiayi.

⁵ Tutai uunt iwianch Jerusaréñ péprunam juki Yusa Uunt Jee cháikín iwiak ⁶ tímiayi “Nekas Yusa Uchirínkiunkma juya akaikim iniaata. Kame Yus-Papinium áarmaiti:

“Yus ni suntarín akatar akúptúrmakatui. Nawemin kayanam ajiintsumnin wenkurmakatui” tawai” tímiayi.

⁷ Tutai Jesus tímiayi “Núnisañ Yus-Papinium áarmaiti:

“Ame Úntrum Yus “Nekapsataj” tiip” tawai” tímiayi.

⁸ Ataksha uunt iwianch naint yakí wájakmanum iwiakmiayi tura nuyá ashí nunkanmaya péprun shiira nuna iniaktusmiayi. ⁹ Tura tímiayi “Winia tikishmatrurakninkia juna mash amastajai.”

¹⁰ Tutai Jesus tímiayi “Werumta, uunt iwianchi. Yus-Papinium aarma awai:

“Ame Úntrum Yúsak tikishmatrata tura Niñki shiir awajsata” tawai” tímiayi.

¹¹ Tutai uunt iwianch Jesusan ikiuak wémiayi. Túramtai Yusa suntarj tariar atsumamurjín súsarimiayi.

Jesus Kariréa nunkanam etserkamiania nu

(*Márkus 1.14-15; Rúkas 4.14-15*)

¹² Juan sepunam enketui taman antuk Jesus Kariréa nunkanam wémiayi. ¹³ Tura Nasaréñ péprunam pujutsuk Kapernáum péprunam we pujusmiayi. Kapernáumsha Kariréa antumianka kánmatkarjín pujumiayi. Ti yaunchusha Jakupu uchirj Sapurúnsha tura Niptarisha nu nunkanak nuñ pujustaitsar achikiaruyayi. ¹⁴ Jesus nuna túramtai yaunchu Yúsna etserin Isayas aarmia nu uminkiamiayi. Juna áarmiai:

¹⁵ “Sapurúnsha Niptarisha nayaantsanam tíjiuch Jurtañ entsa amainini nunkan achikiarimiayi. Nuka Kariréaiti Israer-shuarsha matsatainia nuñ. ¹⁶ Nu aents kiritniunam pujuiniayatan ti tsáapninian wáinkiarimiayi. Jákatniunam pujuiniaj tsáapin tsáapnirmiayi.” Tu áarmaiti.

¹⁷ Nuyá Jesus étseruk tímiayi “Tunaarum enentáimturum enentáim yapajjatarum. Ju nunkanam Yus akupkatin tsawant ishichik ajasai.”

Jesus kuaru aents namakan achinian ni unuiniamurj ajasarat tusa achikmiania nu

(*Márkus 1.16-20; Rúkas 5.1-11*)

¹⁸ Jesus Kariréa antumianka kánmatkarjín wesa jimiará áentsun nuámtak yáchinniun wáinkíamiayi. Chikichik Antresauyayi, chikichcha Semuñkauyayi. Nu Semuñ núnisañ Pitru náartiniuyayi. Namakan achin ásar namakan nekajai nankiak yujaarmiayi. ¹⁹ Nuna Jesus wáinkiar tiarmiayi “Nemartustarum. Túrakrumin shuarsha Yusna arti tusan yamá namak achíarima núnisañ shuaran-eau awajsatjarne.” ²⁰ Tutai ni nekarjín ikiukiar Nin nemariarmiayi.

²¹ Nuyá ishichik wésañ ataksha nuámtak yachinniun wáinkíamiayi. Jakupu Juanjai mai Sepetéu uchirj árimiayi. Niisha kanunam enkemsar ni nekarjín ni aparjjai iwiarainiak pujuriarmiayi. Tura Jesus “Nemartusta” tutai ²² nu chichamaik kanuncha tura aparíncha ikiukiar Jesusan nemariarmiayi.

*Jesus untsurí shuaran jintintiamiania nu
(Rúkas 6.17-19)*

²³ Ashí Kariréa nunkanam Jesus Israer-shuar iruntainiam etserki wémiayi. Yus ju nunkanam akupkatin chichaman etserkamiayi. Tura untsurí sunkurjaj jáinian ashí tsuármiai. ²⁴ Ashí Siria nunkanam Jesus tsuákratman nekaawar ashí nánkamas sunkurjaj wáitin armia nuna Jesusan tsuarti tusa itiararmiayi. Ashí jaancha, najaimiancha, yajauch wakantrukuncha, wáuruncha, tampemaruncha Jesus tsuármiai. ²⁵ Tura untsurí shuar Jesusan nemariarmiayi. Kariréa nunkanmayasha, Tekapurisnumiasha, Jerusarén péprunmayasha, Jutía nunkanmayasha, Jurtañ entsa amainiyasha Jesusan nemariarmiayi.

5

Náinnium Jesus etserkamu

¹ Jesus untsurí shuar káunkarun wáiniak náinnium waka nuñ pujusmiayi. Tura ni unuiniamurjisha taar pujusarmiayi. ² Nuyá Jesus júnis unuiniamiayi.

*Warastin ainia nu
(Rúkas 6.20-23)*

³ “Ame wakanim atsumamu nekamarum kakaram ajasrum warastarum. Tuma asarum Yus akupeamunam pachiinnuitrume. ⁴ Kúntuts pujarum nu warastarum. Yus atsan tamprattarme. ⁵ Péechach enentáimtumarmena nu warastarum. Yus ashí nunkan amastarume. ⁶ Eseer wekasataj tusa aya kitiamarum nu warastarum. Yus imiktamprattarme. ⁷ Waitnenkratniutiram warastarum. Yus waitnentrampattarme. ⁸ Péñker enentáimniutiram warastarum. Yus wáinkiáttarme. ⁹ Chicham iwiarin árum nu warastarum. Yusa uchirj turamartatui. ¹⁰ Péñker túrakrumin yajauch awajtamainiakui warastarum. Yus akupeamunam pachiinnuitrume. ¹¹ Wíi shuar asakrumin katsekramainiakui sha, itit awajtamainiakui sha, tura ashí tsanumprutmainiakui sha warastarum. ¹² Núnisanñ yaunchu Yúsnan etserin armia nunasha túrawarmiayi. Túramtai shiir enentáimkiuram warastarum. Nayaimpiniam ti péñker akinkiatarme’ tímiayi.

*Ju nunkanam átum tsáapnia áintsarum tura weeya áintsarum árum
(Márkus 9.50; Rúkas 14.34-35)*

¹³ “Átumka ju nunkanam wee ana áintsanketrume. Tura wééiatit jeakchaitkiunka míchiuti. ¿Nusha itiur yuánniak ati? Antsu ántraiti. Tuma asamtai ññ najatai tepet tusar ajapashtinkiait’ tímiayi.

¹⁴ “Átumka ju nunkanam shiripkia áintsanketrume. Náinniumka pepu úm kachminiaiti. ¹⁵ Núnisanñ shiripik ekeemakam kajunnum enkeatsme. Antsu yaki sukúatsmek ashí jeñam ana nu paant atí tusam. ¹⁶ Núnisanñ atumsha Yusjaj péñker túramu paant atí. Tura ashí aents nuna iisar niisha Yus Apan shiir awajsartatui’ tímiayi.

Yaunchu akupkamun pachis Jesus unuiniamiania nu

¹⁷ “Muisais akupkamuncha tura yaunchu Yúsnan etserin etserkarmia nuna ántar awajstawai” turutiirap. Antsu nuna Wikia umiktaj tusan táwitjai. ¹⁸ Nekasan tájarme. Ashí túrunatnia nu amúatsajñ nu akupkamu ishichkisha yapajniáshtatui. Nayaimpisha tura nun kasha tuke amúatsajñ nu akupkamusha amuukashtatui. ¹⁹ Nu asamtai shuar chíkichik akupkamun, yúpichuch ana nunaksha, umirchakka tura chíkich shuaran umirkashtinian unuiniaikka Yus nekas akupin paant ajastatna nuñ nú shuar uunt áchattawai. Antsu ashí shuar akupkamun umiana nu tura chíkich shuaran umirkatniun unuiniana nusha Yus nekas akupin paant ajastatna nuñ, nu shuarka uunt átatui. ²⁰ Tuma asamtai Yus akupeamunam pachiinkiatatj tákumka Pariséujaj nan kaamas tura akupkamu jintinnuijaj nan kaamas eseera wekasatniutirume’ tímiayi.

*Kajeamun pachis Jesus unuiniamiania nu
(Rúkas 12.57-59)*

²¹ “Yaunchu tiniu armia nu ántichukaitrume: “Mañkartuawairap. Mañkartana nuka asutniátniuti” tiniu ármiai. ²² Tura Wisha tájarme: Shuar ni yachin aya kajerakka nusha asutniátniuti. Ni yachin kátseka nuka akupniunam junaktiniaiti. Tura ni yachin “netsé” tákunka jinium akupnakminiaiti.’

²³ “Tuma asamtai Yus susataj tusam wakerakum tura ame yatsum ámin itit enentáimturman enentáimpramka, ²⁴ suamu nuñ ikiuakum emka ame yatsum werim niijaj iwiarata. Turam waketim Yus suam nu susata.’

²⁵ “Shuar úntnum júramkuin kía jintian wesam niijaj iwiarata úntnum ejetamtsajñ. Túrachakminkia úntnum suruttmaktatui tura niisha suntarnum suruttmaktatui tura sepunam enketmattawai. ²⁶ Tura nekas tajai, nuñ enkemamka ashí rearchisha akimachkumka jíinkishtatme’ tímiayi.

Tsanirmatniun pachis Jesus unuiniamiania nu

²⁷Yaunchu tiniu armia nu ántichukaitrum: “Tsanirmawaip.” ²⁸Tura Wisha tájarme: Shuar nuwan tsanirmataj tu iiska nuikia ni enentájn tsanirmayi.’

²⁹‘Tuma asamtai ame jimi tunaanum yajauch awajtamkuñkia ukuñkiam yajá ajapata. Ashí ame ayashim jinium esaatsajñ aya chikichik ayashmi muchitmarj emesratin péñkeraiti. ³⁰Ame ewejimesha untsuurmetiat tunaanum ajunmakuñkia tsupikiam yajá ajapata. Ashí ame ayashim jinium esaatsajñ aya chikichik ayashmi muchitmarj emesratin péñkeraiti.’

Nuwa ajapatniun pachis Jesus unuiniamiania nu

(Mateu 19.9; Márkus 10.11-12; Rúkas 16.18)

³¹‘Núnisañ yaunchu tiniu ármiayi: “Shuar ni nuarjn ajapatniun wakera nuka papí najana susati.” ³²Tura Wisha tájarme: Shuar ni nuarjn tsanirmachun ájapeakka nuwan tsanirmamtikiaiti. Tura ajapamujaj nuatnaiyakka nuka tsanirmaiti.’

Jesus aya nekasa nu titinian unuiniamiania nu

³³‘Núnisañ yaunchu tiniu ármiayi: “Yusa naarj pachisan turattajaj” tákumka nekas takamt-suk umiktiniaitme.” ³⁴⁻³⁷Tura Wisha tájarme: Áyatik “Ee” tákumka tura “Atsá” tákumka wáitrusuk nuke titiá. Támena nu nekas umiktaj takum ame nú arant pachistiniaitkiumka nuka yajauchiiti, iwianchnuigiiti. Ti nekas tajaj tusam nayaim pachischatniuitme. Nuka Uunt Yus pujutainti. Nunkasha pachischatniuiti Yusa tarimtaijri asamtai. Jerusaren péprusha pachischatniuiti Uunt Akupin pujutaj nuj asamtai. Múukmesha pachischatniuitme. Chikichik intiashkesha pújusha mukusasha awajsachminiaitme. Áyatik nekasa nu páchitsuk titiá.’

Iikkiatniun pachis Jesus unuiniamiania nu

(Rúkas 6.29-30)

³⁸‘Yaunchu tiniu armia nu ántichukaitrum: “Shuar máanikiar jji apujtukka niisha apujtuk-tiniaiti. Tura naj akarkasha ni najsha akarkatniuiti.” ³⁹Tura Wisha tájarme: Yajauch shuar taritraitrap. Antsu ame yapimin ijutmatmataí áatú yapimsha tsanekatkata. ⁴⁰Tura pushirmin jurutramkitiaj tákuisha sakurmesha susata. ⁴¹Tura káarkanca chikichik kirumitruk jurutkia tóramkui ámeká jimiaré kirumitru ejeeta. ⁴²Seatmana nu susata. Ikiatmakuisha páchitsuk ikiasta.’

Nemasri aneetniun Jesus unuiniamiania nu

(Rúkas 6.27-28, 32-36)

⁴³‘Núnisañ tiniu armia nu ántichukaitrum: “Ame shuarum aneeta tura nemasrumka kajerkata.” ⁴⁴Tura Wisha tájarme: Nemasrum aneetarum. Yajauch chichartamna nusha shiir awajsata. Nakitramana nusha nawamkata. Tura katsekramainiana nu tura yajauch awajtamainiana nusha Yus áujtusarta. ⁴⁵Atumsha nu túrakrum atumí Aparj nayaimpiniam pujana nu túrana áitkiasrumek túrame. Iista, Yus yajauch shuarumsha péñker shuarumsha tsáapin awajmatkiasuk. Núnisañ yumincha yajauch shuar pujuiniamunmasha péñker shuar pujuiniamunmasha yútmuktisuk. ⁴⁶Aya atumin anenmainia nuke aneakmesha ¿yaki akirmakat? Yajauch shuarsha nuna túrin ániawai. ⁴⁷Aya ame yatsumek shiir chichaakmeká ¿warí péñkerak túram? Yus-shuarchasha nuna túrin ániawai. ⁴⁸Nu asamtai atumí Aparj Yus nayaimpiniam pujana nuaj métek ti péñker átiniaitrume.’

6

Péñker túratniun Jesus unuiniamiania nu

¹‘Ashí íimainiajn aya shuar iirsarti tusarum Yusna nu takasairap. Tu takaakrumñkia Yus Apa nayaimpiniam pujana nu penké akirmachattarme. ²Nu asamtai shuar atuma nu yayakmeká ashí shuar ujakairap. Anan kartin ainia nuka iruntainmasha tura pepru jintí wekasasha ashí íimainiajn shiir túrajaj tusar nuna túrin ániawai. Junasha “péñker túrawai” tu enentáimturarti tiniu ásar Yus akiatsajñ aya tu enentáimturmajajñ akinkiaruiti, nekas tajaj. ³Antsu átumka atsumainia nu yayakmeká penké úukam túrata. Chikichiksha nu yáinman nekaashti. ⁴Úukam túrakminkia ame Apa Yus úukman wainia nu, nuna akirmaktatui.’

Yus áujsatniun Jesus unuiniamiania nu

(Rúkas 11.2-4)

⁵‘Atumsha Yus áujeakrumsha ántar chichamtin ainia núnis áujisairap. Nu shuarka iruntainmasha tura pepru jintísha shuar iirsarti tusa wajakar Yusán áujin ániawai. Nekasan tájarme, Yus akiatsajñ aya nu íismajajñ akinkiaruiti. ⁶Tura ame Yus áujeakmeká ame kuárturmin

wayam waiti epenim nuĵ amek ame Apa Yus áujsata. Nuna ame Apa Yus uŵka túramu waitma asa akirmaktatui.'

⁷'Yus áujeakmesha ánrnam esaram áujsaip. Yúsan nékainiatsna nuka "Esaram áujeakuinkia Yus anturtuktatui" tu enentáimainiawai. ⁸Niijjaj métek ajasairap. Átumka seatsrumniñ Yus Apa átum atsumamun nékawai. ⁹Nu asamtai Yus áujkuram júnis títiniaitrum:

'Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. ¹⁰Ashí áentsnum ame akupkatin tsawanrum wari jeati. Ame wakeramuram nayaimpiniam umikma ana núnisañ ju nuñkanmasha uminkiatí. ¹¹Aparu, ii yurumkarj ashí tsawant amasta. ¹²Tura winia nemasrun tsankurajna núnismek, Aparu, winia tunaaru tumashrjsha tsankurturta. ¹³Tunáa wakeruktin tsankatrukaip. Antsu ashí tunaanumiá uwemtikurta. Tuke ashí aents akupkamniaitme. Núnisam Amesha tuke ti kakarmaitme. Tura ti shíraitme. Tuma asakmin seajme. Nuke atí.'

¹⁴'Amesha chíkich shuar yajauch awajtamka nu tsankureakminkia Yus Apa nayaimpiniam pujana nu amincha tsankurtamprattawai. ¹⁵Tura chíkich tsankureachkumniñkia Yus Apasha ame tunaarmincha tsankurtamprashtatui.'

Jjiarmatniun pachis Jesus unuiniamiania nu

¹⁶'Jjiarmarum Yus áujkurmesha wake mesekrum susuntrairap. Anankartin shuar chíkich shuar "jjiarmaiti" tu enentáimtursarti tusa tuma áiniawai. Nekasan tájame, Yúska akíatsañ aya nuĵaj akikma áiniawai. ¹⁷Antsu ámeke jjiarmamsha péñker temashmaram péñker jaupmítia. ¹⁸Shuar jjiarmaiti tu enentáimturmasarañ. Aya Yus Apak nekaattawai. Tura asa akirmaktatui.'

Kuítian pachis Jesus unuiniamiania nu

(Rúkas 12.33-34)

¹⁹⁻²⁰'Ju nuñkanmaya kuit ikiaunĵkatniujaj nañkaamas nayaimpiniam kuit ikiaunĵkata. Juñkia kayaĵá yúchakait tura mash meseatsuk. Tura kasasha wayá kasamsuk. Antsu nayaimpinmanĵa kayaĵasha yuatsui tura mash meseatsui tura kasasha wayá kasamsui. ²¹Kuítrum ana nuĵ enentáimtustatme. Tuma asam nayaimpiniam ikiaunĵkata.'

Ayashĵ tsáapnintri

(Rúkas 11.34-36)

²²'Ame jímijaj tsáapin amijn wayamniati. Tuma asamtai ame jimi péñkeraitkiuñkia amijn tsáapin wayá tuke tsáapniiti. ²³Antsu ame jimi yajauchitkiuñkia tsáapin amijn wayachmin asamtai tuke kiritin átuati. Núnisañ yajauchia nu wakerakmeke péñkera nu ame enentáimijn wayachmin asamtai tuke kirit ajastatui. Nu kiritcha imiá yajauchiti.'

Yussha kuitsha máimtek enentáimtuschniati

(Rúkas 16.13)

²⁴'Shuar jimiará úuntriñ umirkatniun tujintiawai. Chíkichan wakerak chíkichnaka nakitrattawai. Chíkichan umiruk chíkichnaka umirkashtatui. Núnisañ átumka Yussha kuitcha máimtek enentáimtustin tujinkiattarme.'

Yus ni uchirín péñker wáinkiaiti

(Rúkas 12.22-31)

²⁵'Tuma asamtai tájarme: Wariniak yuataj wariniak umartaj tura wariniak entsartaj tuserum nuke enentáimsairap. Yus iwiaaku átinian amasu asa yurumkancha amaschamniakait. Tura ju ayashniasha najana asa entsataincha amaschamniakait. ²⁶Chínkisha enentáimpratarum. Yaki nanamainiak yurumkan arakmainiatsui. Tura juuk yurumkan ikuiniatsui. Tuma ain Yus Apa nayaimpiniam pujana nú Yusak áyureatsuk. Atumsha chinĵkia nú nañkaamaschakaitrum. ²⁷Nu arantcha ti enentáimkiumsha ĵnuĵaj tsakartatmek?'

²⁸'Nuikia ĵurukamtaĵ entsartincha timiá enentáimprum? Iistá, kukujsha takachuítat tura najanchaitaj ²⁹ti shíirmach áiniawai. Yaunchu uunt akupin Sarumún ti shiir iwiarmanniútiat kukujja timianchauyayi. ³⁰Iis, nupa yamá tsakaawai tura kashin aents tsupikar jinium epeenawai. Tuma ain Yus ti shiir áentseatsuk. Nuna tura asa atumniasha nú péñker waitmakchattawak. ĵUrukamtaĵ Yus nekas enentáimtatsrum? ³¹⁻³²Ju nuñkanam ana nu pachikiarap. Chíkich shuar, Yúsan nékainiatsna nu, warin yuataĵj warin umartataĵj warin entsartataĵj nuna ti pachiniawai. Tura atumsha tu enentáimsarum weerap. Ame Apa nayaimpiniam pujana nu ame atsumamurmin nékawai. ³³Tuma asamtai Yusĵaj shiir wekasatin tura Yus akupkamu ana nu uniktin emka enentáimsatarum. Túrakrumniñkia atsumamurmin Yus suramsattawai. ³⁴Kashin átatna nuĵaj itirchat enentáimsairap. Kashinkia nusháa itirchatrĵjaj tsawarchattawak. Yamá tsawanta juĵaj máachakait.'

7

*Chíkich sumamtikiawairap**(Rúkas 6.37-38, 41-42)*

¹ ‘Chíkicha tunaarj ti enentáimtusairap. Núnisan Yus atumí tunaarj iirtamsashtatui. ²Chíkich wárik sumamtikiatin enentáimkiumniñkia Yus núnisan sumamtikramattawai. Tura ame chíkicha túramurj nekapmarmena nú nekapkajajñ amincha nekapmarmattawai. ³Tuma asamtai žitiurtsuk atumi jijn numi enketna auk ítskesha atumi yachí jijn tsuat enketusha iyarum? ⁴Ame jiiimjijn numi tuke enketajsha žitiurtsuk ame yatsumi jiiya tsuátan jurustajme tame? ⁵Ántar shuará, ame yáintaj tákumka emka ame jiiimjijn numi enketna nu jusata. Nuyá paant iistatme yatsumi jijn tsuat enketna nu jurustin.’

⁶ ‘Ti shiira nuka yawá súsashtiniaiti. Nuna nakitrar amincha esatmichartimpiash. Kuítrumsha kuchi súsashtiniaiti. Aya najatrachartatuak.’

*Yus seakmin suramsattawai**(Rúkas 11.9-13; 6.31)*

⁷ ‘Yus seakrumin suramsattawai. Eakrumka wainkiattarme. “Winiajai” tákurmin awántiamattarme. ⁸Seana núnaka suñiawai. Eñana nuka wáiniui. “Winiajai” tuinia núnaka awániawai.’

⁹ ‘Ame uchiram apatkun seatmakui žkayaash súsaintiam? ¹⁰Tura namakan seatmakui žnaplash súsaintiam? ¹¹Nuikia átum yajauchitirmesha atumi uchirj péñker ana nu tuke súuchakaitrum. Nuna nankaamas nuikia seakrumniñkia atumi Aparj nayaimpiniam pujana nu péñker ana nuna suramsashtatuak.’

¹² ‘Júnaka Muisaisha Yúsnan etserniusha akupenawai: “Chíkich ámin túrutatí tusa wak-erakmea amesha núnismek túratá.” Tu akupenawai.’

*Wañkaram jintiasha tura yupikiach jintiasha**(Rúkas 13.24)*

¹³⁻¹⁴ ‘Wañkaram jintia awai. Wayatniusha yúpichuchiiti. Nujsa untsurj wániawai. Tura nusha menkkatniunam jeawai. Túrasha chíkich jintia awai. Nusha yupikiach asa itiurchataiti. Wayatniurjsha yupikchiiti. Nuñ ishichik wániawai. Tura nusha iwiaaku pujustinnium jeawai. Tuma asamtai tuke iwiaaku pujustaj tákurmeka yupipitin jintia achiktarum.’

*Nerejai numi nekaatainti**(Rúkas 6.43-44)*

¹⁵ ‘Aneartarum. Wáitruiniak “Wi Yúsnan étserjai” tuinia nu írunui. Pátatek murikua áinis yúpichuch ániawai tura ni enentáin nekas únt-yawá áinis ániawai. Pátatek shiir chichaini-awai tura ni enentáin yajauch piakuiti. ¹⁶Atumsha túramujajñ nin nekaatniuitrume. Naranmayá shuiya jjuukchamniaiti. žTsachiksha kushñkiapen nerektatuak? ¹⁷Núnisan péñker numia nu tuke péñkeran nereatsuk. Tura yajauch numia nu yajauchin nereatsuk. ¹⁸Péñker numi yajauchin nereatsui. Núnisan yajauch numi péñkeran nereatsui. ¹⁹Yajauch numi ajakar tsupirar jiniun apeashtinkiait. ²⁰Tuma asamtai wáitrin ainia nuka túramujajñ nekanattawai.’

*Ashikia Yus akupeana nuñ jeachartatui**(Rúkas 13.25-27)*

²¹ ‘Aya winia Apar nayaimpiniam pujana nuna wakeramurjñ umirin ainia nuke Yus akupeamunam pachiinkiatatui. Chíkichka “Uuntá, Uuntá” turutainiayat nayaimpiniam jeachartatui. ²²Amuukatin tsawant jeamtai untsurj turutiartatui “Uuntá, Uuntá, ame náaram pachisar ashí nuñkanam etserkachmakaj’. Ame náarmesha pachisar yajauch wakancha jjiiki akupkamji. Tura ame náaram pachisar aentsti tujintiamu túramji” turutiartatui. ²³Nuñ chichainiakui “Werumtarum. Peñke nekachuitjarme. Aya yajauchitrume” titiatjai.’

*Péñker ukurma tura yajauch ukurma**(Rúkas 6.47-49; Márkus 1.22)*

²⁴ ‘Shuar winia chichamprun antuk umirkañka nu shuar ti péñker enentáimniuiti. Niisha ju shuarjajñ méteketete. Jeñ jeamuk kayanam ukurmai. ²⁵Tura yumi ti yutuk entsa nuñkruamai tura nase ti kakaram umpuimiai. Túmaiñ pukukachmai ni ukurmarj kayanam ukuamu asamtai. ²⁶Tura shuar winia chichamprun antuk umirtukchañka ju shuara núnisan enentáimchaiti. Jeñ jeamuk náikminiam ukurmai. ²⁷Tura yumi yutuk entsa nuñkruamai tura nase ti kakaram umpuimiai. Túmakui jeñ mash saanaki iniaamai” tímiayi Jesus.

²⁸ Jesus nuna tinia amukmatai ashí shuar ti enentáimprarmiyai. ²⁹ “Yusa kakarmaríjjai unuítiamtsujik. Israer-shuara jintinniurínkia núnis unuiniainiatsui” tiarmiayi.

8

Jesus tunamarun tsuarmiania nu

(Márkus 1.40-45; Rúkas 5.12-16)

¹ Jesus muraya támatai untsurí shuar Nin nemariarmiayi. ² Nuj shuar tunamaru Jesusan jearin tikishmatramiyai. Tura tímiayi “Uuntá, wakerakmeke tsuáramniaitme.”

³ Tutai Jesus uwejéjaj antin “Wakerajai. Péñker ajasta” tímiayi. Tutai tunamaru ni tunamarmari péñker ajasmiyai. ⁴ Tura Jesus tímiayi “Pai, penké etserkaip. Áyatik Israer-patri iniakmamsam Muisais timia nu susata ashí shuar nekaawarti tusam.”

Jesus suntara uchirín tsuarmiania nu

(Rúkas 7.1-10)

⁵ Jesus Kapernáum péprunam wayamtai apachi suntara kapitiántri Nin tarimiyai. ⁶ “Uuntá, tímiayi. Winia uchir tampemaru jeá tepes ti wait ajáa tepawai” tímiayi.

⁷ Jesussha “Ayu, winin tsuartaajai” tímiayi.

⁸ Tutai kapitián tímiayi “Uuntá, Ame ti nankaamaku asam winia jeaurú wayachminiaitme. Áyatik “Péñker ajásti” tákumin winia uchir péñker ajatrustatui. ⁹ Iista, winiasha akuptuiniatsuk tura wisha suntaran akupenatsjak. Juna “Wetá” takui wéawai. Tura chikichnasha “Winitia” tutai winiawai. Tura takartinian “Ju túratá” tutai umiawai.”

¹⁰ Kapitián nuna tutai Jesus ti enentáimiuk Nin nemarainian tímiayi “Nekasan tájarme, Israer-shuar Yúsan tímiatrus enentáimtin atsawai. ¹¹ Maa, yajaya untsurí shuar Yus akupeana nuj jeawar Apraámjajisha Isakjajisha Jakupjajisha iruntrar yurumáwartatui. ¹² Tura Israer-shuar Yúsum jeamnia ániayat aq kiritniunam ajapnawartatui. Nuj ti úutin tura ti wáitsatin átatui.”

¹³ Nuyá Jesus kapitiánin chicharuk “Jeemjin waketkitia. Nekas enentáimtusú asakmin uchiram péñker ajatramsattawai” tímiayi. Túramtai ni uchirí nu chichamtaik péñker ajatsamiayi.

Jesus Pitru tsatsarín tsuármiania nu

(Márkus 1.29-31; Rúkas 4.38-39)

¹⁴ Jesus Pitru jeen we Pitru tsatsarín tsuemujaj jaa tepan wáinkiamiyai. ¹⁵ Tura ni uwején antiñmatai tsuemun michatramiyai. Tura nuwá nantakin ashí ajamsarmiyai.

Jesus untsurí jáinian tsuármiania nu

(Márkus 1.32-34; Rúkas 4.40-41)

¹⁶ Kashi ajasmatai yajauch wakantrukarun Jesusan itiararmiayi. Tura nu yajauch wakanin chikichik chichamjaj chicharas jiki akupiarmiayi. Ashí jáiniancha tsuáramiyai. ¹⁷ Yúsnan etserin Isayas “Ii pimpirmaríncha ii sunkuríncha jurutramkimiaji” yaunchu timia nu uminkiatu tusa nu túrunamiayi.

Jesus nemarsatin

(Rúkas 9.57-62)

¹⁸ Shuar untsurí Jesusan káutkarmatai “Entsa amain katíñtai” tímiayi.

¹⁹ Nuj Israer-shuara jintinniurí Jesusan tari tímiayi “Uuntá, Ámin páchitsuk nemarsatniun wakerajme.”

²⁰ Tutai Jesus tímiayi “Kujanchmasha ni waarín takaktsuk. Chínkisha pasunken takaktsuk. Tura Wi Yúsumiátiatan tepestiniur atsawai.”

²¹ Nin nemarniusha tímiayi “Uunta, emka winia aparun iwiarsan ikiuuttajai.”

²² Tura Jesus “Nemartusta, tímiayi. Wakannium jaka ainia nu jakan iwiarsarti” tímiayi.

Nasesha entsasha Jesusan umirkarmiania nu

(Márkus 4.35-41; Rúkas 8.22-25)

²³ Nuyá Jesus ni unuiniamuríjjai uunt kanunam enkemámiayi. ²⁴ Nuj nase ti kakaram umpuimtai antumian ti tamparintin ajasmiyai. Tura entsa kanunam yarána piákmiyai. Tuma ain Jesus kanunam kanar tepemiyai. ²⁵ Nuyá ni unuiniamurí kurashim Jesusan ishintiarar tiarmiayi “Uuntá, wayaji. Kakaram ajachkumniñkia jakattaji.”

²⁶ Jesus tímiayi “¿Urukamtai timiá ashamarum, Yus enentáimtuskesha?” Nuyá wajaki nasencha entsanacha chicharkamiayi. Tutai mash miaaku ajasmiyai. ²⁷ Nuna ísar ni unuiniamurí ti enentáimsarmiyai. Tura tiarmiayi “Jusha ¿warí áentsuit? Nasesha entsasha Nin umirainiatsuk” tiarmiayi.

Jatara nuñkanam Jesus yajauch wakantrukun tsuármiania nu
(Márkus 5.1-20; Rúkas 8.26-39)

²⁸ Nuyá Jesus entsá amaini katiñ Jatara nuñkanam jeamiayi. Nuj jimiara shuar yajauch wakantruku tuke iwiartainium pujú Jesusan tariarmiayi. Mai yajauch wakantruku ásar ti kajen ármiai. Tuma asamtai shuar nu jintianam nankaamachu ármiai. ²⁹ Niisha Jesusan wáinkiar kakantar tiarmiayi “¿Warí pujuram iijíai. Jesúsá, Yusa Uchirjá. Tsawant jeatsain in amukratkataj tusamek taum?” tiarmiayi. ³⁰ Nuj arant kuchi untsurí shushunmak yujaarmiayi. ³¹ Yajauch wancha Jesusan seainiak “Jíiki akupkartakmeke kuchiniam wayatín tsanekatkartukta” tiarmiayi.

³² Tutai Jesus “Pai, wetarum’ tímiayi. Yajauch wancha shuara enentáiya jínkiar kuchiniam enkemáwarmiayi. Túramtai kuchi wáurkiar arau utsanamiayi. Nuyá entsá iniankar jakerarmiayi.

³³ Kuchi wáinniusha nuna ashamar péprunam tseke wéarmiayi. Nuj jeawar ashí túrunamun etserkarmiayi. Yajauch wakantrukun péñker ajasmancha etserkarmiayi. ³⁴ Nuyá ashí nú peprumaya shuar Jesusan inkiuntai tusar ashinkiararmiayi. Tura inkiunkar ni nuñkeya waketkiti tusar seawarmiayi.

9

Jesus emearun tsuármiania nu
(Márkus 2.1-12; Rúkas 5.17-26)

¹ Nuyá Jesus kanunam enkemar antumian amaini katiñmiayi. Tura nuj ni péprurín Kapernáumnum jeamiayi. ² Nuj jeamtai shuar emearu jaan patak yanakin ejeetiarmiayi. “Tsuártatui” nekas tu enentáimtuinia ásamatai Jesus jaan tímiayi “Uchirú, kakaram ajasta. Ashí ame tunaarum tsankuramuiti.”

³ Takui Israer-shuara jintinniurj yajauch enentáimprar “Juka Yúsán ti yajauch chicharui” tiarmiayi.

⁴ Tu enentáimainian Jesus nekáa tiarmiayi “¿Urukamtai imiá yajauch enentáimprum. ⁵ Tua imiá yúpichuchit. Shuara tunaarín tsankuratin yúpichuchikiai. Tura emearun “Nantakim wekasata” titin yúpichuchikiai? ⁶ Wi Aents Ajasua núchakaitaj. Ju nuñkanam Wi tunaan asakátratniutjai. Wátsek, nu nekaatarum tusan juna iniakmastatjai.” Nuna tinia emearun “Wajaktia, tepetairam jukim jeemíin wetá” tímiayi. ⁷ Tutai emearu tsuámar nantaki ni jeen wémiayi. ⁸ Tura nuna ashí aents wáinkiar Yus kakarman shuáran susa asamtai ashamar Yúsán shiir enentáimtusarmiayi.

Jesus nemartusat tusa Mateun achíawai
(Márkus 2.13-17; Rúkas 5.27-32)

⁹ Nuyá Jesus wémiayi. Nuj wesa Mateun kuit jútainium pujaan wáiniak “Nemartusta” tímiayi. Tutai Mateu nuna ikiuak Jesusan nemarmiayi.

¹⁰ Nú ukunmasha Mateu jeen yurumuk pujaj yajauch armia nu Israer-shuar untsurj káunkar Jesusa unuiniamurijjai irunar yurumiarmiayi. ¹¹ Pariséusha nuna ísar Jesusa unuiniamurín aniasarmiayi “¿Urukamtia atumí Uuntrj kuitia achinjajisha tunaarinnuijajisha irunar yuruma?”

¹² Tura Jesus nuna antuk tímiayi “Pénker ainia nuka tsuákratniun atsumainiatsui. Antsu jainia nu tsuákratniun atsumainiawai. ¹³ Werum ju aarma unuimiutarum:

“Murik maam Winia surusum nujai “máakete” tátsujai. Antsu waitneñkartutain wakera-jai,” Yus-Papiniun tu áarmaiti.

Wikia “pénkeraitjai” tuínian untsuktaj tusan táchaitjai. Antsu tunáa shuar ni enentáin yapajjáwarat tusan táwtajai” tímiayi.

Ijarmatniun Jesusan aniasarmiania nu
(Márkus 2.18-22; Rúkas 5.33-39)

¹⁴ Nuyá imiakratin juanká unuiniamurj Jesusan tariar aniasarmiayi. “¿Urukamtai iikia tura Pariséusha ijarmajj tura ame unuiniamurmeka ijarmainiatsui?” tiarmiayi.

¹⁵ Jesus ayak tímiayi “Nuatma nampernum ipiaamu ainia nu ¿ajakra uutu wayamniakait? Yamái-nuatu pujakuí útchamin ániawai. Núnisan Wi pujakuí ijarmashtin ániawai. Tura tsawant jeattawai nuatua ántsan Wi junaktatjai. Antsu nujka ijarmawartatui’ tímiayi.

¹⁶ ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chínkiá nuna nankaamas jaaktatui. ¹⁷ Nijiamanch yamá nawar nuap najanamu arutnum yaraachminiati. Túramka kariak nuap najanamun ijakratniuiti, nijiamchisha ukaratniuiti, tura nuap najanamusha yajauch ajastiniati. Antsu yamaram nijiamanch yamaram nuap najanamunam yaraatniuiti. Nu túramka nijiamchisha nuap najanamusha mai péñker ártatui.”

Jesus Jairu nawantrincha tura chikich nuwancha tsuármiania nu

(Márkus 5.21-43; Rúkas 8.40-56)

¹⁸ Jesus nuna taj Israer-shuara uuntri Jesusan tari tikishmatar tímiayi “Winia nawantur jarutkayi, tura Ame winim ewejmijaj antinrukakminkia ataksha nantaktiatui.” ¹⁹ Tutai Jesus ni unuiniamurijaj wajakiar nijaj wearmiyai.

²⁰ Tura jintiá weenaj nuwá tuse (12) uwitin numpá ájapeak wáitias pujú asa Jesusa ukurinj amainian ni pushirin antinmiayi. ²¹ “Áyatik ni pushirin antinnaka péñker ajastatjai” tu enentaimpramiayi. ²² Nuna nekáa Jesus ayantar nuwan tímiayi “Shiir enentáimprata, nawantru. Yus shiir enentáimtusu asam péñker ajasume.” Nu chichamtaik ni jáamuri péñker ajasmiyai.

²³ Nuyá Jesus uunta jeen jeamiayi. Tura nuj charaatum ajainiancha tura jakan iwarsatai tusar péeman umpuiniancha wáiniak ²⁴ tímiayi “Aa jíntratarum. Nuwáchikia jákachai antsu aya kanarai.” Penké jakan nekayat túratta nuna neka asa “aya kanarai” tímiayi. Takui aents Nin wishikrarmiyai. ²⁵ Tura nuna ashí jjiir Jesus jeá wayá nuwáchin uwejunum achik iniantkimiayi. Túram nantakmiayi. ²⁶ Nu túramu ashí nu nunkanam etsernarmiyai.

Jesus kusurun jímianar tsuármiania nu

²⁷ Nuyá Jesus wéakui jimiará shuar jji kusuru untsunki weriarmiyai. “Uuntá, ii Uuntri Tawit ame weatrum asamtai in waitneñkarturta” tiarmiyai. ²⁸ Jesus jeá wayamtai jji kusuru tariarmiyai.

Tura Jesus aniasar “¿Juna túramniaiti túrutrumek?” tímiayi.

Niisha “Ee, Uunta” tiarmiyai.

²⁹ Tuúniakui Jesus ni jjin antinkiar tímiayi “Átum nekas enentáimtarmenta núnisan túrunati.”

³⁰ Nujaj jji péñker ajasarmiyai. Nuyá Jesus “Etserkairap. Shuar penké nekáwarajin” tímiayi.

³¹ Tamaitiat jjiinkiar Jesus túramun ashí nu nunkanam etserkarmiyai.

Jesus chichachun péñker awajsamiania nu

³² Nuyá wenaj shuar yajauch wakantru chichachun Jesusan ititariarmiyai. ³³ Tura Jesus yajauch wakanin jjiiki awemamtai nu chichachu chichakmiayi. Ashí nuna ísar ti enentáimprarmiyai. Tura tiarmiyai “Yáunchusha Israer nunkanam jujaj métek túramu penké atsuwiti.” ³⁴ Antsu Pariséuka yajauch enentáimtuiniak tiarmiyai “Nu shuar iwianchi uuntri kakarmarijaj yajauch wakanin jjiiki akupeawai.”

Jesus shuuran waitnentawai

³⁵ Jesus ashí péprunam we ni iruntairin wayá “Yus akupeana nuj enkemátarum” tu etsermiayi. Tura ashí nánkamasa sunkurjaj jáiniancha tsuármiyai. ³⁶ Shuuran ísar murik wáinchatia núnis pimpikiar tura kúntuts pujuinia asamtai waitnentrarmiyai. ³⁷⁻³⁸ Nuyá ni unuiniamurin tímiayi “Ju aents Yus-Chicham ujaktiniaitiji Yus-shuar ajasarat tusar. Nu takat ti nukap awai tura takarin ishichik ániawai. Nu takatka júuktinia áintsangete. Júuktin tsawant jeamtai takau táasmatai takamtikin ujaktin átsuk takaun akupak tusa. Atumsha núnisrumek Yus seatarun ni shuarin akupak áentsun júukarat tusarum.”

10

Jesus tuse (12) unuiniamurin achikmiayi tuke nemarsatniun

(Márkus 3.13-19; Rúkas 6.12-16)

¹ Nuyá Jesus tuse (12) unuiniamurin achik Yusa kakarmarin súsarmiyai yajauch wakanin shuara enentáiya jjiiki akupkatniun. Núnisan ashí sunkurjaj jáinian tsuárrartinian susamiayi.

² Ju ániawai Jesus tuse (12) unuiniamurin achikiarmia nu: Emka Semun núnisan Pitru náartiniuyayi. Nuyá ni yachí Antres. Nuyá nuámtak yáchintin Jakupusha Juansha, Sepetéu uchrí armia nu. ³ Nuyá Jiripi, Parturumi, Tumas, Mateu. Mateusha kuítian achiniuyayi. Arpeu uchrí Jakupusha. Ripú núnisan Tateu náartiniuyayi. ⁴ Ásump' Semunsha nuyá Jútas Iskariúti Jesusan ukunam surukmia nu. Nu tuse (12) achikma ármiyai.

Jesus ni unuiniamurin etserkarti tusa akupkarmiania nu

(Márkus 6.7-13; Rúkas 9.1-6)

⁵ Nu tuse (12) unuiniamurin Jesus júnis chicharak akupkarmiyai. “Israer-shuarcha matsatmanum weerap. Samaria nunkanam péprunam weerap. ⁶ Antsu Israer-shuar murikua áinis Yusajya wáakarua ainia nu weritiarum. ⁷ “Tsawant ishichik ajasai Yus jú nunkanam akupin ajastin” tu etserki wetarum. ⁸ Tunamarusha chikich sunkurjaj jainia nusha tsuatarum. Jakasha iniantkitiarum. Yajauch wakancha shuara enentáiya jjiiki awematarum. Nu túratin kuítchajaj kakaram susamuitrume, tuma asamtai atumsha ashí ánrarmek túratarum.”

⁹ ‘Kurisha ashí kuitcha jukiirap. ¹⁰ Uyuncha jukiirap. Sapatcha tura ushukrustincha jukiirap. Antsu chikichik pushí jukitiarum. Takau asakrumin yurumkan ajampramsartin áiniawai.’

¹¹ ‘Péprunam jearmesha péñker shuar wáinkiarum nuñ wayarum tuke nuñ pujustarum. ¹² Nu jeanam wayamsha “Ju jea shiir atí” titiá. ¹³ Nekas péñker shuaraitkiunka shiir ajasarti. Antsu nu shuar péñker itiarmachkuñka shiir ajascharti. ¹⁴ Tura náñkamsañ atumin awaintiamainiachkuñkia anturtamainiachkuñkia nuyá jínkitiarum. Nu shuar yajauch áarmatai jínkirum atumí naweya nuñka japimiarum ikiuktiarum. Ni tunaarj aents nekaawarat tusarum túratarum. ¹⁵ Nu shuaran nekapsatin tsawant jeamtai Yus asutiáshtatuak. Sutum péprunmaya shuara nankaamas Kumura péprunmaya shuarnasha nankaamas Yus asutiáttawai nu shuaran’ úmiayi.

Yajauch awajsatniun ujakmiania nu

¹⁶ ‘Aneartarum. Wisha murik yawanum akupkatniua áintsanak akupeajrume. Tuma asamtai shiir nawamkartin áyatarum aneartarum. ¹⁷ Yajauch shuarjaj aneartarum. Akupniunam juramkiartatui. Israer-shuar iruntainiam asutimawartatui. ¹⁸ Wíi shuar asakrumin uuntnumsha tura nuyá akupniunmasha juramkiartatui. Núnisrum akupniuncha tura Israer-shuarchancha winia chichamur ujaktarume. ¹⁹ Tura akupniunam surut-makakrumnisha wariniak titiáj tu enentáimprairap. Nuñ uuntjaj chichaakrumin Yus titinian jintintramattarme. ²⁰ Nuñkia átum enentáimmiajaj chichaschattarme antsu atumí Aparj Yusa Wakanj atumin chichamtikramsattarme.’

²¹ ‘Shuar ni yachíncha máawarti tusa suruktatui. Apasha ni uchirín suruktatui. Uchisha ni aparín máawarti tusa suruktatui. ²² Tura Wíi shuar asakrumin mash nuñramkartatui. Tura tuke katsuntea nu uwemprattawai. ²³ Chikichik péprunam yajauch awajtamainiakui chikich péprunam pisartarum. Wíi Aents Ajasuitjai. Tuma asan nekasan tájarme, átum Israer-shuar mashi ujatsrumniñ wantinkiajtajai.’

²⁴ ‘Unuiniamuka nin unuiniana nuna nankaamaschaiti. Takarniusha ni uuntriñ nankaamaschaiti. ²⁵ Unuiniamuka nin unuinia nuñjaj métek ajaska maak. Takarniusha ni úuntriñjaj métek ajaska maak. Wátsek, Winia atumí úuntriñ “Iwianchi uuntriñ” túrutainiakui atumniasha nuna nankaamas yajauch turamtatui.’

Yusak ashamkatniuiti

(Rúkas 12.2-9)

²⁶ ‘Tuma asamtai aentska ashamkairap. Ashí uukma nu paant nekanattawai. ²⁷ Ishishmasan kiritniunam ujaajrumna nu, tsawáj kakantrarum etserkatarum. ²⁸ Aya ayashin main ainia nu ashamkairap. Wakanin máachmin áiniawai. Antsu wakanniasha ayashniasha mai jinium emesramniha asamtai Yus ashamkatarum.’

²⁹ ‘Jimiará chinji penké ishichik kuitjaj surukmin áiniawai. Túmaitiat Yus tsan̄kateachkuñkia nuñká jaka iniainiatsui. ³⁰ Ame intiashmisha mash nekapmarmaiti. ³¹ Nu asamtai jákatin ashamkairap. Yusjaj átumka ti untsurí chin̄kijijaj nankaamas péñkerchakaitrum.’

Jesus natsantrashiniati

(Rúkas 12.8-9)

³² ‘Ashí shuar ashí íimiainiañ Winia natsantruiniatsna núnaka Winia Apar yakí nayaimpiniam pujana nuñ natsantrashtatjai. ³³ Antsu shuar íimiainiañ Winia natsantra núnaka Wisha yakí nayaimpiniam winia Apar pujana nuñ natsantrattajai.’

Jesusa chichamejaj shuar akannartatui

(Rúkas 12.51-53; 14.26-27)

³⁴ ‘Ashí shuar nawannaikiar shiir pujusarat tusan ju nuñkanam táchaitjai. Nuna túrat tusarum enentáimturairap. Antsu wi tamaajaj shuar péñker ajasarmatai yajauch shuar nin nakitrattatui. ³⁵ Shuar ni aparín nakitrattawai. Nuwasha nukurín nakitrattawai. Najatísha tsatsarín nakitrattawai. ³⁶ Tuma asa shuar ni shuarijijaj nemasrintin ártatui.’

³⁷ ‘Shuar ni aparíncha nukuríncha Wijijaj nankaamas aneakka Wíi shuar áchamniaiti. Núnisan̄ ni uchiríncha nawantriñcha nankaamas aneakka Wíi shuar áchamniaiti. ³⁸ Tura ashí wáitsatniun surimiatsuk ni krúsriñ yanaki juki nemartachkuñka Wíi shuar áchamniaiti. ³⁹ Aya jú nuñkanam péñker pujustaj tana nu ni iwiaakmarín emesrattawai. Tura Winia anentu asa jú nuñkanam péñker pujustinian páchiatsna nu tuke shiir pujustatui.’

Akinkiatin

(Márkus 9.41)

⁴⁰ ‘Atumin itiaarma nuka Winia itiaarui. Tura itiaarea nuka Winia akuptukmia nunasha itiaawai. ⁴¹ Yúsnan etserniuncha Yúsnumiá winiá asamtai itiaakka etserin akínkiáttana nuñjaj métek akínkiáttawai. Péñker shuarnasha péñker asamtai itiaakka péñker shuar akínkiáttana

nujaj métek akínkiáttawai niisha. ⁴² Uchíncha Wíi shuar asamtai entsá michan shikirak súsanika imiá nekas nusha akínkiáttawai.” Tu tímiayi Jesus.

11

Imiakratin Juan Jesusaj shuaran akupkamiania nu (Rúkas 7.18-35)

¹ Tura tuse (12) unuiniamurín Jesus tinia akupkar Niisha nú nunka péprunam we Yus-Chichaman jintiak etserkamiayi.

² Tura Juan sepunam enkemas Kristu túramun antukmiayi. Antuk ni unuiniamurín jímiarán Jesusaj akupkamiayi. ³ Tura Jesusan aniasarmiayi “¿Nekas ame Kristu Yus akupkamu tátinia nukaitiam. Kame chikichak nákastataj?”

⁴ Tutai Jesus tímiayi “Waketkirum ashí ántarmena nusha wáintrumna nusha Juan ujaktarum. ⁵ Kusurusha wáinmainiawai. Shutuapsha wekainiawai. Tunamarusha pénger ajainiawai. Empekarusha ántuiniawai. Jákarusha nantainiawai. Tura kuítrinchánmasha uwempratin chicham ujakmaiti. Nu ujaktarum. ⁶ Túrasha yawetsuk Winia tuke shiir enentáimturna nú shuar shiir átatui.” Jesus nuna tutai waketkiarmiayi.

⁷ Waketkiarmatai shuar káunkarun Jesus Juáñkan pachis áujmatmiayi. “Shuar atsamunmasha ¿warí werimiarum? Pintiu nase umpúam atúu we juní we ajana nuka ¿ístai tusarumek wémarum? Kame Juáñkka nú shuarchaiti. ⁸ Nuikia ¿warí werimiarum. Shuar pénger iwiarmampra ístai tusarmek wémarum? Warí, pénger iwiarmampraka uunta jeen pujuiniatsuk. ⁹ Nuikia ¿warí werimiarum. Yúsnan etserniuk werimiarum? Maa, túrachmashiuram. Túrasha Juáñkka yaunchu etserniu nankaamas enentáimustiniati. ¹⁰ Yaunchu Yus-Papinium áarmaiti:

“Winia akatramurun amijni emka akupeajai ame jintimin iwiarat tusa.”

Juan nu akatramuiti. ¹¹ Nekasan tájarme, shuar imiakratin Juanjaj nankaamas uunt atsuwiti. Tuma ain Yus akupeamunam pachiinia nu shuarnaka, nekasmianchancha, Juanjaj nankaamas shiir enentáimustiniati. Tuma asamtai nú pachiinkiatin enentáimpratarum.’

¹² ‘Kakaram shuarka imiakratin Juan támia nú tsawantnumiá Yus akupeamunam ti pachiinkiatiniun wakeruiniak kakarmajaj pachiinkiatiniun enentáimainiawai. ¹³ Juan pujumia nú yaunchu ashí Yúsnan etserin armia nusha tura Muisais akupkamusha Yus akupin ajastinian etserkarmiayi. ¹⁴ Yaunchu Yúsnan etserin “Kristu táatsain Erias tátiniaiti” tímiayi. Tura nekaatin wakerakrumka Juan nu Eriásaiti. ¹⁵ Antuktin jeakrumka nekaatarum.’

¹⁶ ‘Ju áentsnasha ¿warijaj métek nakumkataj? Uchijaj métek áiniawai. Ni ajijaj iruntrar nakurstaj táyatañ tuñiawai ¹⁷ “Námpera áinis nakurustaisar peem umpuarji túrasha jantsemáchureme. Nuyá iwiarsatniua áinis nakurustaisar íwiareakur kantamtaí kantamáji túrasha átum úutcharme.” ¹⁸ Atumsha núnisaitrume. Kame Juan núkap yurumtsuk nijiamchíncha úmutsuk wekaimiayi. Túmakui átumka “Yajauch wakantrukuiti” tímiarme. ¹⁹ Nuyá Wisha Aents Ajasu támajai. Tura yurumeakui tura úmakui “Ti yurumin ti nampenaiti. Ashí yajauch shuaran amikrinti” túrutrume. Wátsek, wí túramujaj Yus nekas nékamu nekanattawai.”

Yajauch péprunmayá shuaran chicharkamiania nu (Rúkas 10.13-15)

²⁰ Nuyá tujintiamun túramiania nú peprunmayá shuaran pachis Jesus chicharkamiayi. Tuma ain nuyá shuar ni enentáin yapajjácharu asamtai juna chicharkamiayi.

²¹ “Wáinkiatá, Kurasín péprunmayatiram, Petsaitia péprunmayatirmesha. Nuj aents tujintiamun ti túraitjai. Tiru péprunmasha Setuñ péprunmasha nu tujintiamu túramuitkiuinikia yaunchu ni enentáin yapajjáwaraayi. Túrawar kúntuts pujutai pushín entsarar yunúnim ajakiraayai. ²² Tura Wisha tájarme, nekapsatin tsawant jeamtaí Yus atumin ti asut-tiamattarme. Tirunmayá shuaran nankaamas tura Setuñnumiá shuaran nankaamas asuttiamattarme.’

²³ ‘Tura atumsha Kapernáum péprunmayatirmesha, ashí nankaamas nankaamantu ajastin enentáimtumarme. Antsu ashí emestampartatui. Atumjín aents tujintiamun ti túraitjai. Sutuma péprunam nu tujintiamu túramuitkiuinikia nu pepru yamaisha tuke aayi. ²⁴ Tura Wisha tájarme, nekapsatin tsawant jeamtaí Yus Sutumanmayá shuar nankaamas atumin asuttiamattarme.”

“Winin ayampratarum” tímiania nu (Rúkas 10.21-22)

²⁵ Nuyá Jesus tímiayi “Shiir enentáimtajme, Aparu, ashí nayaimpisha nunkasha Úuntrinme. Tuma asam Ame túram nu ti unuiniaru enentáimtumainia nuyá úukuitme antsu uchichia áinis nankaamantu enentáimtumainiatsna nú shuar paant awajtusuitme. ²⁶ Ame, Aparu, núnis wakera asam túraitme.’

²⁷ “Winia Apar ashí surusuiti. Wisha ni Uchirí asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nu shuarsha winia Aparun nékainiawai. ²⁸ Ashí pimpikniutirme-sha itiurchat pujarmena nusha Winí winitiarum. Túrakrumniŋkia ayamtikrattajrume. ²⁹ Wi kajechu asan tura péejchach enentáimin asamtai Winí winirum unuimiatarum. Winia chichamur ántakrum umiakrumniŋkia atumí wakaní ayamprattawai. ³⁰ Atarum akuptaj nú túratin yúpichuchiiti. Káarkasha Wi súajrumna nu wampuchiiti” tímiayi Jesus.

12

Jesusa unuiniamurí ayampratin tsawantaj trikiu neren pakaarmiania nu
(Márkus 2.23-28; Rúkas 6.1-5)

¹ Nuyá Jesus ayampratin tsawantaj ajanmañ ajapenin nanŋkaamamiayi. Ni unuiniamurjisha tsukarar trikiu neren majusar yukí wekasarmiayi. ² Pariséu shuarsha nuna wáinkiar Jesusan aniasarmiayi “Iista, ame unuiniamuram ayampratin tsawantaj túratin surimkiamua nuna túruiniawai.”

³ Tutai Jesus tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. ⁴ Yusa Uunt Jëen wayá Yus iniaktusma tantan yuámiayi. Nu tantasha aya Israer-patrik yúatin asamtai Tawitniasha tura ni nemarín ana nunasha suritkiamuyayi. Túmain yúawarmiayi. ⁵ Muisais akupkamunam aarma nu áusjachukaitrum. Israer-patrikia ayampratin tsawantaj takainiayatan nusha tunaachuiti. ⁶ Nekas tájarne, yamáí Yusa Jëen enentáimustinia nuna nanŋkaamas Wíniaka Aents Ajasuitjiana nu, nekas enentáimursatniutrum. ⁷ Yus-Papinium tawai: “Murik maam Winia surusum nujaj “maakete” tátsujai. Antsu waitnenkartutain wakera-jai.”

Nu chicham nekas nékaitkiurmeka yamáí túrarmena núnisrum tunáa túrachu ánrarum súmamtikiachaintrume. ⁸ Wi Aents Ajasu asan ayampratin tsawantan Úntrinjtjai.”

Shuara uweje jakan Jesusa tsuármiania nu
(Márkus 3.1-6; Rúkas 6.6-11)

⁹ Jesus nuyá wé Israer-shuar iruntainiam wayamiayi. ¹⁰ Nuj shuar ámiayi ni uweje jaka. Tura Jesusan ántar nekapsatai tusa wakeruinia ásar aniiniak “¿Ayampratin tsawantaj jaa shuar tsuarminkiait?” tiarmiayi.

¹¹ Tutai Jesus tímiayi “Atumsha atumí murikrj ayampratin tsawantaj wañnam akaiki iniamtai jusatai tusarum wéchaintrupash. ¹² Antsu shuarka murikraj nanŋkaamaschakait. Tuma asamtai ayampratin tsawantajsha péñker ana nu túramniati.” ¹³ Tinia iniais áishmañkan uweje jakan tímiayi “Uwejém takuitia.” Tutai uweje takuj chíkich uwejéjaj métek péñker ajasmiai. ¹⁴ Nuna túramtai Pariséu shuarsha aq jínkiar Jesusa itiuarak máawaintiaj tusar chichaman najatiarmiayi.

Isayas Jesusan tímia nu uminkiamiayi

¹⁵ Jesus nin máatniun nekaama nuyá jínkimiamiayi tura wéakui untsurj shuar nemariarmiayi. Untsurj jáiniancha tsuámiayi. ¹⁶ Tsuar “etserkairap” tinia akupiarmiayi. ¹⁷ Yaunchu Yúsnan etserin Isayas tímia nu uminkiatí tusa túrunamiayi. Niisha juna áarmiayi:

¹⁸ “Júiti Wi achikmaj nu. Niisha Wi tájana nuna umin asamtai ti aneakun Niijjaj waraajai. Winia Wakantru kakarmarjn takamtsuk susattajai. Túramtai winia uwempratin chichamprun ashí Israercha nuñkanmasha etserkattawai. ¹⁹ Jiakchattawai tura kakaram chichaschattawai. Winia anturtukarat tusa péprunam weak untsukchar-tatui. ²⁰ Akupin ajatsuk shuar pintiu punua núnis pimpiru ainia nuna kúpitsuk yáintatui. Núnisaj shuar ji yama ikiapámu áinis kakarmacha ainia nuna ikiajniatsuk ikiakártatui. Tura ashí nupetak ti péñker kakaram akupin ajastatui. ²¹ Tura Israer-shuarchasha Nin nekas enentáimtusartatui.”

Jesusan “iwianchi uuntri kakarmarjijaj túrawai” tiarmiania nu
(Márkus 3.19-30; Rúkas 11.14-23; 12.10)

²² Nuyá Jesusan shuar yajauch wakantrukun itiararmiayi. Nu shuar jji kusu-rusha chichachusha ámiayi. Tura Jesusa tsuármatai paant íimsamiayi tura chichakmiayi. ²³ Nuna wáinkiar shuar shiir enentáimprar tiarmiayi “¿Tawitia uchirí pampañku iniañnamu uwemtikiartin tátnia nuáshit?”

²⁴ Tura Pariséu shuarsha nuna antukar yajauch enentáimtuiniak tiarmiayi “Juka iwianchi kapitántrin Pirsepún umirniuiti. Tuma asa nuna kakarmarjijaj yajauch wakanin jjiiki akupeawai.”

²⁵ Jesus tu enentáimainian neka asa tímiayi “Nú nuñkanmaya shuar nuamtak kajer-naiyakuñkia nú nuñka wari meserchattawak. Núnisaj nuamtak shuar ní shuarjaj

mánainiakka amunaikchartatuak. ²⁶ Núnisan̄ íwianch nuamtak jiīki akupnainiakka máanaikiar wárik amuukashatuak. ²⁷ Kame Wi Pirsepú iwianchi kakarmarjijai iwianchin jiīki akupeakuinqia atumí uchirísha ¿yana kakarmarjijain̄ jiīki akupena? Ni túramurijijai átum awajirma nekamatarum. ²⁸ Wi Yusa Wakaní kakarmarjijai yajauch wakanin jiīki akupea asamtai atumsha Yusa akupeamurj̄i atumj̄in jeartamarmena nu nekaat-niutrume.”

²⁹ ‘Iista. Shuar kakaram shuara kuítr̄in kasarkatin wakerakka emka kakarman jin̄kiá aya túran̄ ni jeen wayá kasarkamniaiti. Wi iwianchin jiīkmiyajai uunt iwianch nupetkamua nu nekaamniaiti.’

³⁰ ‘Wijijai tsanin̄ pujatsna nuka winia nemasruiti. Núnisan̄ Winia yáintsuna nu aya itirchat nájateawai.’

³¹ ‘Tuma asamtai tájarme, Ashí shuar tunáa túruinia nusha yajauch chichainia nusha tsan̄kuratin awai. Antsu Yusa Wakanin̄ yajauch chicharin̄ ainia nuka tsan̄kurash̄tiniaiti. ³² Winiasha Aents Ajasuitjiana nuna yajauch chichartuinia nú shuarsha tsan̄kuramniaiti. Tura Yusa Wakanin̄ yajauch áujmatainia nuka pen̄ké tsan̄kurach̄miniaiti. Ju nun̄kanmasha tura ukunmasha tsan̄kurnarchattawai’ tímiayi.

Ni nerejai numi nekaamniaiti

(Rúkas 6.43-45)

³³ ‘Yutai numi pen̄keran nereawai. Tseas numisha yajauchin nereawai. Ni nerejai numi nekaamniaiti. Núniskete atumj̄ai. ³⁴ Tseas wenunniutirmesha, ¿atumsha iturak imiá yajauchitirmesha pen̄ker chichamsha chichastarum? Shuar ni enentáin̄ enentáimna nuna chichaawiti. ³⁵ Pen̄ker shuar pen̄ker enentáimiu asa shiir chichaawiti. Tura yajauch shuar yajauch enentáimiu asa yajauch chichaawiti. ³⁶ Tura Wisha tájarme, nekapsatin tsawant jeamtai ashí enentáimtsuk chichakma nuna Yúsán paant ujakartatui. ³⁷ Iis, ame chichammijijai nekanattarme. Pen̄ker chichakuitkiumka sumamashtatme. Tura pen̄ker chichakchaitkiumka sumamattame.”

Nu shuar yajauch ásar iniakmamun seawarmiania nu

(Márkus 8.12; Rúkas 11.29-32)

³⁸ Pariséu shuarsha Israer-shuara jintinniurj̄sha Jesusan̄ chicharuk “Uuntá, ame Yúsaiyaitjai tusam nayaimpinmayá kakarmajai iniakmamú túrata, iisha wáinkiatari” tiarmi-ayi.

³⁹ Tutaí Jesus tímiayi “Shuar yajauch tura Yúsán enentáimtachu ásar nayaimpinmayá iniakmamun seainiawai. Tuma asamtai, áyatik yaunchu Junas túrunamu iniakmastini-aiti. ⁴⁰ Junas menaintiu kashi menaintiu tsawantcha namaka ampujen̄ en̄kemsamiayi. Núnisnak Wi, Aents Ajasu asan, menaintiu kashi menaintiu tsawantcha nun̄ká jakan tepestatjai. ⁴¹ Junás Níniwi péprunmayá shuaran Yus-Chichaman etserkamtai nu shuar ni tunaarj̄in enentáimtsusar ni enentáin̄ yapajíáwarmiayi. Tura juī yamáí Junasa nan̄kaamas etserin̄ pujawai. Wiitjai nusha, tura anturkachuutrume. Tuma asamtai nekapsatin tsawant jeamtai Níniwinmayá shuar juyá shuaran súmamtikiawartatui.’

⁴² ‘Yaunchu nuwá yajayá shuaran uunt akupniurj̄iyayi. Nu nuwá Sarumún̄ ti neka asamtai nin̄ anturkatak tusa tarimiayi. Tura juī yamáí Sarumún̄jai nan̄kaamas anturkamnia pujawai. Nusha Wiitjai. Tuma asamtai nekapsatin tsawant jeamtai nu nuwá juyá shuaran súmamtikiawartatui’ tímiayi.

Yajauch wakan̄ jiīki akupkamuitiat wáketna nu

(Rúkas 11.24-26)

⁴³ ‘Shuara enentáiya yajauch wakan̄ jiīkin̄ yumi pen̄ké yútatsna nūj wéawai. Tura nūj pen̄ker pujustinian̄ wáinkiach ataksha waketitniun̄ enentáimiu. ⁴⁴ “Wi jiīkimijai nūj waketikittijai” tawai. Tura wakетки shuara enentáin̄ pen̄ker iwiamu tura an̄kantan wáiniak ⁴⁵ ni ain̄ siati (7) iwianchin̄ niijijai nan̄kaamas yajauchin̄ itia shuara enentáin̄ en̄kemáwartatui. Túrunamtai nu shuar nūki núna nan̄kaamas yajauch ajastatui. Núnisan̄ juyá shuar túrunawartatui” tímiayi Jesus.

Jesusa yachí, Jesusa nukurí

(Márkus 3.31-35; Rúkas 8.19-21)

⁴⁶ Jesus nu shuarjaī tuke chichaak pujaj̄ ni nukurj̄sha ni yachj̄sha tariarmiayi. Tura aa wajasar Niijijaī chichastaj̄ tiarmiayi. ⁴⁷ Túramtaī Jesusan̄ ujarak “Ame nukusha yatsumsha aa wajasar chichastaj̄ turamainiawai” tiarmiayi.

⁴⁸ Chichaman̄ ujakmia nuna Jesus tímiayi “¿Ya ainia winia nukursha winia yatsursha?”

⁴⁹ Nuyá ni unuinamurj̄in̄ iniakmas tímiayi “Jū ániawai winia nukur tura winia yatsursha.

⁵⁰ Ashí shuar winia Apar nayaimpiniam̄ pujana nu wakeramun̄ umiiniana nu winia yatsur winia umar winia nukur ániawai” tímiayi.

13

Untsurí métek-taku chichamjají Jesus unuiniamiania nu

(1) Atsaamin atsaampramiayi

(Márkus 4.1-9; Rúkas 8.4-8)

¹ Nu tsawantají Jesus ni jeeyá jíinkin antumianka kánmatkarin pujusmiayi. ² Tura ti untsurí shuar káunkarmatai kanunam enkemar nuj pujusmiayi. Shuarsha antumianka kánmatkarin pujusarmiyai. ³ Túrunawarmatai untsurí métek-taku chichamjají unuiniamiyai. “Atsaamin atsaamprataj tusa jíinkimiai, tímiayi. ⁴ Atsaamki wesa arakrj jintia písunmasha iniaarmai. Tura chínki tariar yuawarmai. ⁵ Chikichcha kaya írunmanum iniaarmai. Nunka ishichik asamtai wárik tsapainiarmai. ⁶ Tura nantu etsantramtai pénger kankáprúrcharu asa sukuam káararmai. ⁷ Chikichcha janí nupanam iniaarmai. Tura janí wárik tsakar nupetak ajakramai. ⁸ Chikichcha pénger nunkanam iniaarmai. Nusha pénger nerekar chikich siansha (100) nerekarmai. Tura chikichcha sesenta (60) nerekarmai. Tura chikichcha trainta (30) nerekarmai. ⁹ Kuishim ákuinkia antuktarum” tímiayi.

“¿Urukamtai aya métek-taku chichamjají jintiam?” aniasarmiania nu

(Márkus 4.10-12; Rúkas 8.9-10)

¹⁰ Nuyá ni unuiniamurín Jesusan taruntar aniiniak “¿Urukamtai aya métek-taku chichamjají ju shuar unuiniam?” tiarmiayi.

¹¹ Tutai Jesus tímiayi “Urukuk ju nunkanam Yus akupin ati, nuka yaunchu nekanachmiayi. Tura yamaikia Yus ashí nuna atumin paant iniakturmawai. Antsu chikich nuna nekaachmin áiniawai. ¹² Kame núkap takakna nu shuar nú nukap patatnaktatui tura ti núkap takustatui. Antsu ishichik takakna nuka ishichik takakuk juruktiniati. Núnisan Yusna ti nekarum nú nukapka yúpichuch nekaattarme. Tura ishichik nékarum wárik kajinmatkittarme. ¹³ Tuma asamtai aya métek-taku chichamjají unuinijají. Nú shuarka íniayatañ wáiniániatsui. Ántuiniayatañ ántachua núnis nékainiatsui. Túmainiak Winia nekarainiatsui. ¹⁴ Nujají yaunchu Yúsna etserin Isayas timia nu uminkiaiti. Júná tímiayi: “Ti ántayatrum anturkashatrum. Wáiniatrumsha nekaashatrum. ¹⁵ Ju shuara enentá kátsuram ásar péngkera nuna nakitiainiawai. Nu asamtai pénger ántuiniatsui, jíisha pusá áinis ániawai. Túrachkupa paant nekaawarainti, tura nekas antukarainti, tura enentájjají enentáimias Winia tsuarat tusa tarutiarainti.”

¹⁶ Tura átumka paant wainkia asarum pénger anta asarum shíraitrum. ¹⁷ Nekasan tájarne, untsurí Yúsna etserniusha tura pénger shuarsha átum yamá wáintrum nuna wáinkiatniun wakeruiniayatañ wáinkicharmiyai. Tura átum yamá ántarme nuna antukinian wakeruiniayatañ antukcharmiyai’ tímiayi.

Jesus atsaampramu chichaman paant jintintiamiania nu

(Márkus 4.13-20; Rúkas 8.11-15)

¹⁸ ‘Ayu, antuktarum. Atsaampramu chichaman paant jintintiatjarne. ¹⁹ Árak jintia písunam iniaararma nuka shuar Yus-Chichaman ántayatañ ni enentáin ikiuiniatsna núiti. Tura íwianch nu Yus-Chicham ni enentáin atsaampramu áinis antukman kajinmatkiawai. ²⁰ Árak kaya írunmanum iniaararma nuka shuar Yus-Chichaman antuk waras umirainia núiti. ²¹ Tura núkap kankapurrcharu ásar katsumiatsui. Antsu iturcharan ínkiuiniak tura Yus-Chichaman wakeruinia ásar matai chikich yajauch áujmatam wárik iniaisar ikiuiniawai. ²² Árak janí nupanam iniaararma nuka shuar Yus-Chichaman antuk emka umirniua núiti. Tura ju nunkanam írunna nuna tuke páchiniak ni kuitrincha ti enentáimtuinia ásar matai ashí Yus-Chichaman enentáimtamun núpeteawai. Tuma asamtai nu áentsnum Yus-Chicham atsaampramu nereatsui. Yus-Chicham ni enentáin takasma atsawai. ²³ Tura árak pénger nunkanam iniaararma nuka shuar Yus-Chichaman antuk pénger umirainia núiti. Tura pénger nerenawai. Chikich siñ (100) nerekarma núnis chikichcha sesenta (60) nerekarma núnis chikichcha trainta (30) nerekarma núnis ániawai” tímiayi Jesus.

(2) Yajauch nupá trikiunam atsaamkamú

²⁴ Jesus ataksha ju métek-taku chichaman áujmatsamiayi. “Shuar Yus akupeamunam pachíinkiertin jíinsaiti. Shuar pénger arakan, trikiun ni nunken araamai. ²⁵ Tura ashí kanararmatai nemasrj kashi taa trikiu arakmanum yajauch nupañ aratak ikiukmiai. ²⁶ Trikiu tsapakar nereakuí nuyá yajauch nupasha nusháa nereku asa ti paant ajasmai. ²⁷ Nuna ísar takainia nu ni úntrin werí tiarmai “Uunta, ¿pénger arak araachmakam. Itiura jusha yajauch nupasha tsapakuit?”

²⁸ ‘Tutai nérentin timiai “Winia nemasur arakuiti.”

‘Takui ni takarniurj tiarmai “¿Yajauch nupañ uwerat tusam wakeramek?”

²⁹ ‘Tutai timiai “Atsá, uwerairap. Yajauch nupá uweaj tukamarum trikiu uweniirum.
³⁰ Iniaisatarum. Antsu métek tsakakti. Júuktin tsawant jeamtai winia takartinian emka yajauch nupán uwer irumar jinkiwarat tusan akupkartatjai. Tura áesawartatui. Tura trikiu nerēn júukar péñker ikusarat tusan akupkartatjai” timiai” tímiayi Jesus.

(3) *Mustasa jínkiái*

(*Márkus 4.30-32; Rúkas 13.18-19*)

³¹ Jesus ataksha métek-taku chichaman áujmatsamiayi. “Shuar Yus akupeamunam pachiinkiertin mustasa jínkiáiya áintsankete. Shuar péñker nunken araamai. ³² Mustasa jínkiáikia imiá uchichiitiat tsapá tsakaakka ashí numichijíají nankaamas uunt ajawai. Ti uunt asamtai chíñki ni kanawen pasunmainiawai” tímiayi Jesus.

(4) *Karin enketatin*

(*Rúkas 13.20-21*)

³³ Núnisan chikich métek-taku chichaman áujmatsamiayi. “Shuar Yus akupeamunam pachiinkiertin karinia áintsankete. Nuwá nijiamchiniam karinia enkea mashi páchimiawai. Tura nu mash karintikiawai” tímiayi.

Jesus aya métek-taku chichamjajín jintintiamiania nu

(*Márkus 4.33-34*)

³⁴⁻³⁵ Ashí nuna Jesus métek-taku chichamjají áujmatsamiayi. Yaunchu Yúsna etserin timia nu uminkiatí tusa túramiayi. Etserin júna áarmiayi:

“Métek-taku chichamjají áujmattiatjai. Yámankamtaiknumiá nékashtain etserkattajai” tu áarmiayi.

Nu asamtai aya métek-taku chichamjajín áujmatmiayi Jesus.

Jesus yajauch nupá trikiunam atsamkamun paant awajsamiania nu

³⁶ Nuyá shuaran ikiukin Jesus jeá támiayi. Túramtai ni unuiniamurí tariar “Yajauch nupá áujmatmenia nu paant awajsata” tiarmiayi.

³⁷ Tutai Jesus tímiayi “Wi Aents Ajasuitjai. Wi péñker arakan atsaamkattjai. ³⁸ Ashí nunka aja áintsaiti. Péñker jínkiái Yus-shuaran Yus akupea nuna nakumeawai. Yajauch nupá iwianchna ainia nuna nakumeawai. ³⁹ Tura íwianch ii nemasrj asa yajauch nupán arakuiti. Tura nunka amúamunam Yusa suntarj arakan júuktinia áintsan shuaran yaruaktatui. ⁴⁰ Yajauch nupá irur jinium áesatniua áanis nunka amúamunam túrunattawai. ⁴¹⁻⁴² Nuí Wi Aents Ajasu asan winia suntarun akupkattajai. Tura ashí tunaan túruinia nunasha tura chikichan tunaanum útsuinia nunasha mash lrurar jinium apeawartatui. Nuísha ti úutin ti wáitsatniusha átatui. ⁴³ Antsu péñker túruinia nuka ti shiir wincha ajasar ni Aparj akupeana nuí etsa núnis tsáapnin ajasartatui. Wats, kuishim átsuk. Antukta.’

(5) *Kuit wáinkiamu*

⁴⁴ ‘Shuar Yus akupeamunam pachiinkiertin kuit nunká úukma áintsankete. Shuar nu kuitian wáiniak nuín ataksha úukmai. Tura ti waras wakетки ni kuit niiniu atí tusa ashí ni takakman suruk nu nunkan sumakmai.’

(6) *Kaya shiirmach ti kuitia nu*

⁴⁵ ‘Shuar Yus akupeamunam pachiinkiertin júnisaiti. Shuar kayachin ti shírman eak wekaana áintsankete. ⁴⁶ Tura kayan ashí nankaamas kuit jeean wáiniak wakетки ashí takakna nuna suruk nu kayan niiniu atí tusa súmawai.’

(7) *Neka*

⁴⁷ ‘Shuar Yus akupeamunam pachiinkiertin júnisaiti. Shuar nekajají namakan achía áintsankete. Nekan nayaantsanam ajuntak niisháa namakaim achíawai. ⁴⁸ Tura nekanam nemarmatai kukar jiki, nuí péñker namaknasha chaníinnium chumpiniawai. Tura yajauch namaknaka ajapenawai. ⁴⁹ Núnisan átatui nunka amúamunam. Yusa suntarj taar Yus-shuaran tura íwianch shuaran akantrattawai. ⁵⁰ Tura íwianch shuarnaka uunt jinium apeattawai. Nuísha ti úutin ti wáitsatin átatui.” Nuna ashí ni unuiniamurjijají áujmatsamiayi Jesus.

Yamá nekamujajísha tura yaunchu nekamujajísha Yus-shuaran yáintiniaiti

⁵¹ Jesus nuna tinia amuk “¿Jú mash antukurmek?” tímiayi.

Tutai ni unuiniamurj “Ee, Uunta, ashí antukji” tiarmiayi.

⁵² Tuiniakui Jesus tímiayi “Shuar ashí Yúsna péñker unuimiaruka aents kuítriniua áintsankete. Ni ikiutairjya yamarmancha yaunchu sumakmancha jusamniaiti. Núnisan nu shuar yamá nékamujajísha tura yaunchu nékamujajísha Yus-shuaran yáintiniaiti.”

Jesus Nasarétnum wakеткиmiania nu

(*Márkus 6.1-6; Rúkas 4.16-30*)

⁵³ Jesus nu métek-taku chichaman áujmatas amuk nuyá wémiayi. ⁵⁴ Tura ni péprurín Nasarénum jeá Israer-shuar iruntainiam wayá unuiniamiayi. Tura nuyá shuar antukar tí enentaimprarmiyai. Tura “¿Jusha tuj imiá unuimiaruit, tiarmiayi. Itiurak aents tujintiamun túramniat?” ⁵⁵ Juka karpintíru uchirinchkait. Nukurjsha Marichukait. Tura ni yachjsha Jakupu, Jusé, Semun, Jútas ániatsuk. ⁵⁶ Tura ni umajsha ijjaj írutra pujuiniatsuk. ¿Nuikia itiura mash neka?” tiarmiayi. ⁵⁷ Túrawar Jesusan ititurchat enentáimturarmiayi.

Túramtai Jesus chicharuk “Yúsnan etserniun ashí shuar péñker anturainiawai, antsu aya nuna nunkeyan̄ka ni shuarin̄kia nin anturainiatsui” tímiayi. ⁵⁸ Tura nú shuar Jesusan enentáimtuiniachu asamtai aentsti tujintiamun aya ishichik túramiyai.

14

Imiakratin Juan jakamu

(Márkus 6.14-29; Rúkas 9.7-9)

¹ Kariréa nunkanam Erutis akupniuyayi. Tura Jesus túramuncha antukmiayi. ² Tura ni írutramurín tímiayi “Nuka imiakratin Juan jakamunmayá nantaki túrawai auka. Tuma asa aents tujintiamun túrawai” tímiayi. Kame Erutis Juan̄kan maa asa tímiayi.

³⁻⁴ Akupin Erutis ni yachí Jiripi nuwen Jirutíasan akintrukmatai Juan̄ Erutisan “Ame yatsumi nuwé akintrukchatniuitme” tímiayi. Tutai Erutis Juan̄kan achik jirujaj jin̄kia sepunam en̄keatarum tusa akupkamiayi. ⁵ Niisha Juan̄kan máataj tukamá aentsun ashamiarmiayi. Ashí aents “Juan̄ Yúsnan etserniuiti” enentáimtuiniakui ashammiai. ⁶ Tura akupin Erutis akiiniamu tsawantr̄i jeamtai nú námpertin Jirutíasan nawantr̄i ashí ípiaamu pujuiniamunam jantsemamiayi. Túramtai Erutis shiir enentáimtak ⁷ “Ame ashí wakeram nu seattia, tímiayi. Nekasan amastatjai, Yussha iiru” tímiayi.

⁸ Tutai nu nuwáçh emka ni nukurj akatramu asa Erutisan chicharuk “Imiakratin Juan̄ka muuké tsupikiam amamkunam en̄keram surústá” tímiayi.

⁹ Tutai Erutis wake mesekmiayi. Túrasa “nekas Yus iiru” tiniu asa tura ni amikrjsha antukaru asamtai umikmiayi. ¹⁰ Ni suntarin̄ sepunmayan̄ Juan̄ka muuken̄ tsupik itiarti tusa akupkamiayi. ¹¹ Tura amamkunam itiar nuwáçhin̄ súsarimiayi. Tura niisha ni nukurj susamiayi.

¹² Nuyá Juan̄ka írutramurj tariar ayashí jukiar iwiarsarmiayi. Túrawar Jesusan ujawuearmiayi.

Jesus sen̄ku mir (5000) áishman̄kan ayuramiania nu

(Márkus 6.30-44; Rúkas 9.10-17; Juan̄ 6.1-14)

¹³ Jesus nuna antuk Niñki ni unuiniamurjijain̄ kanunam en̄kemar arant aents atsamunam wémiayi. Túrasa nuna aents nekaawar kukarak weriarmiayi Jesusan. ¹⁴ Kanunmayá jínijaj tukamá untsurj áentsun wáinkiamiayi. Tura wáiniak waitnentrarmiayi. Tura jáiniancha tsuárarmiayi. ¹⁵ Kjakui ni unuiniamurj Nin tariar tiarmiayi “Kíawai, Uunta. Tura shuar tíjiuch pujaaka atsawai. Ju aents akupkarta. Péprunam wear sumak yuuwearti” tiarmiayi.

¹⁶ Tutai Jesus tímiayi “¿Urukamtaik wearat? Antsu atumek ayuratarum.”

¹⁷ Tutai tiarmiayi “Iikia takaktsuji. Aya sen̄ku (5) tantachik jimiarchik namakchijain̄ takakji.”

¹⁸ Tuñiakui Jesus “Wats, nu itiantitiarum” tímiayi. ¹⁹ Tinia aents chírichriniam pujusarti tusa akupkamiayi. Nuyá sen̄ku (5) tantancha jímiar namaknasha achik nayaimpiniam ímias Yúsan yuminsamiayi. Tura puur ni unuiniamurín aents ayuratarum tusa súsarimiayi. ²⁰ Ashí yurumáwar jémararmiayi. Tura nuyásha puunaruka tuse (12) çan̄kin̄ tiarmiayi. ²¹ Nuñ yurumáwarmia nusha nuwáçha uchisha nekapmatsuk sen̄ku mir (5000) aya áishman̄ árimiayi.

Jesus entsá pátatek wekasamiania nu

(Márkus 6.45-52; Juan̄ 6.16-21)

²² Nuyá Jesus ni unuiniamurín kanunam en̄kemprarum amain émaa ajatarum tusa akupkarmiayi. Niisha áentsun akupkarmiayi. ²³ Akupkarsha naint waka Yúsan áujumiayi. Káshisha nuñ Niñki tuke pujumiayi. ²⁴ Tura antumian̄ tí wan̄kanar asamtai kanu ajapén ajasmatai nase tukumma entsa tamparukmiayi. ²⁵ Tsawaana añ nñ tuke wenaj̄ Jesus entsá pátatek wekas pujuiniamunam jeamiayi. ²⁶ Tura ni unuiniamurj entsá pátatek wekan wáinkiar tí sapijmiakarmiayi. Tura ashamainiak “wakanchashit” tiarmiayi.

²⁷ Tuñiakui Jesus tiarmiayi “Kakaram ajastarum. Wiitjai. Ashamprukairap.”

²⁸ Takui Pítiur chicharuk tímiayi “Uunta, Ámetkumka nuñ wekasa jeatin untsurkata.”

²⁹ Takui Jesus tímiayi “Wats, winitíá.”

Tutai Pítur kanunmaya akaikin Jesus wajana nuĵ jeataj tusa entsá pátatek wekasamiayi. ³⁰Tura ti nasen násentun nekáa ashamkamiayi. Ashama asa entsá wayamiayi. Tura “Uuntá, achirkata” tu untsummiayi.

³¹Nu chichamtaik Jesus uweĵnum achik júak “Maa, Yus imiá ishichik enentáimtuschemeĵ tımıayi. ³²Tura kanunam enĵkemáwarmatai nasesha menĵkakamiayi.

³³Túramtai kanunam enĵkemarmia nusha Jesusan tikishmatar chicharuk “Nekas ame Yusa Uchirĵnme” tiarmiayi.

Jesus Jinisarĵniumiá shuaran tsuármiania nu
(Márkus 6.53-56)

³⁴Tura amainĵ katĵnkıar Jinisarĵ nunĵkanam jearmiayi. ³⁵Tura nuyá aents Jesusan nekaawar nu nunĵkanam ashı ujanairarmiayi. Túrawar jaancha ni puĵamunam itiararmiayi. ³⁶Ni pushirĵnkisha antıntai tusar seawarmiayi.

15

Shuáran yajauch awajeana nuna Jesus jintintiamiania nu
(Márkus 7.1-23)

¹Nuyá Jerusarén péprunmaya Pariséusha yaunchu akupkamu jintinniurĵsha Jesusan tariar aniasarmiayi ²“ĵUrukantai ame unuiniamuram ii uuntrĵ yaunchu jintintrarmia nuna uminiatsu? Iis, ikijmiatskesha yurumániawai” tiarmiayi.

³Tuńiakui Jesus aniasarmiayi “ĵUrukantai atumsha Yus akupkamu umirtsuk aya aents akupkamu umiirum? ⁴Iis, Yus tíchamkia:

“Ame apa, nukusha shiir enentáimtustarum.” Tura “Shuarsha ni aparĵncha nukurĵncha katsekka nu shuar jakati” tíchamkia.

⁵⁻⁶Antsu átumka tárume “Shuar ashı nińnu irunna nuna mash “Yúsnaiti” takui nuikia nuĵai ni aparĵncha nukurĵncha yáıńchamniaiti, tárume. Nin yáıńtinian nakitiak ayatik “Ashı winia áńiana nu Yusana asamtai yáıńchamniatĵame” títiniaiti” tárume. Núńisrum tákuram Yus akupkamu iniaisarum aya aents akupkamu umiirume, tımıayi. ⁷Antra chichamtiniatrum. Yúsnan etserin Isayas yaunchu nekas atamin áartampramiayi ĵuna:

⁸“ĵU aents ni wengeĵai shiir awajtuiniawai, tura ni enentáı jeachat puĵuiniawai. ⁹Tura tuke-neasan shiir awajtuiniawai. Aentsu chichamen jintintiniayıat “Yusa chichamente” tuiniawai.” Tu áarmiayi” tımıayi Jesus.

¹⁰Tinia shuaran untsuk tiarmiayi “ĵU antukrum pépker nekaatarum. ¹¹Aents yúana nuka shuáran yajauch awajsashtatui. Antsu wenunmaya ĵiinia nuka shuáran yajauch awajeawai” tımıayi.

¹²Nuyá ni unuiniamurĵ Jesusan tariar “Maa, Pariséu ame chichammin antukar ti iturchat enentáimpraraı” tiarmiayi.

¹³⁻¹⁴Tuńiakui Jesus tımıayi “İkiuktıarum. Kusuru áıntsın áıniawai. Tura kusuruncha jintintiniawai. Mai kusuru ásar mai wáĵnam akaiki iniaawartatui. Wats, ajanam nupá áıntsın áıniawai. Tura ashı winia Apar nayaimpiniam puĵana nu araachmaka takamtsuk uwé ajapamu átatui” tımıayi Jesus.

¹⁵Takui Pítur Jesusan tımıayi “Nu métek-taku chicham paant awajsata.”

¹⁶Tutai Jesus tımıayi “ĵAtumsha nekaachurmek. ¹⁷Enentáimprachurmek? Ashı wenunam wayaana nu wakenam wéatsuk. Tura nuyá inianĵkastiniaiti. ¹⁸Antsu wenunmaya ĵiinia nu enentáınmaya ĵiınıu asa áentsun yajauch awajeawai. ¹⁹Enentáınmaya ashı yajauch enentáımsatin ĵiınıiniawai. Manĵkartuatniusha, chikicha nuwé kasamkatniusha, tsanirmatniusha, kasamkatniusha, wáıtruatniusha, yajauch áıjımsatniusha ²⁰ashı nu ániawai nekaska shuáran yajauch awajeana nu. Tura ikijmiatsuk yurumáńniuka shuáran ni enentáın yajauch awajeatsui” tımıayi.

Nuwa Israer-shuarcha Jesusan enentáimtusmiania nu
(Márkus 7.24-30)

²¹Jesus nuyá ĵiinki Tiru péprunmasha Sitiun péprunmasha wémiayi. ²²Tura nu nunĵkanmaya nuwa Jesusan tari tımıayi “Uunta, uunt akupin Tawit ame weĵtrum asamtai winia waitnentrurta. Nawantur yajauch wakantruku asa ti wáıtrutawai” tımıayi.

²³Tura Jesus áıĵchamiayi. Tura ni unuiniamurĵ tariar “Awemata, tiarmiayi. Tuke untsumki apapétmaji” tiarmiayi.

²⁴Nuyá Jesus tımıayi “Aya Israer-shuarnum menĵkaru áńia nuna eĵktinian Yus akup-tukuıti.”

²⁵Túrasha nuwa tikishmatar tımıayi “Uunta, waitnentrurta.”

²⁶Tutai Jesus tımıayi “ĵUchı apatkurĵ jurukir yawá susamniakait?” tımıayi.

²⁷Tutai nuwa tımıayi “Nekas, Uunta, tame. Tura yawasha ni aentsrĵ yurumainiakui nunĵká iniaarun yuńiatsuk.”

²⁸ Takui Jesus tímiayi “Maku, nekas Winia enentáimturaaitme. Ame wakeram núnisañ atí” tímiayi. Tura nu chichamaik ni nawantrij péñker ajasmiayi.

Jesus untsurí jáinian tsuararmiania nu

²⁹ Jesus nuyá jíinki Kariréa antumiañka káanmatkarin waketikimiayi. Tura naint waka nuj pujusmiayi. ³⁰ Nuj untsurí aents Nin tariar shutuapnasha kusuruncha chichachuncha tsupirkamuncha chíkich jáiniañcha itiararmiayi. Túrawar nawenam aeprusarmiayi. Túram tsuararmiayi. ³¹ Nuna ísar chichachusha chichainiakui, tsupirkamusha péñker ajainiakui, shutuapsha péñker wekainiakui, kusurusha wáinmainiakui, ti shiir enentáimprarmiayi. Yus ni áentsrin Israeran yáinmatai shiir yuminsarmiayi.

Jesus kuaru mir (4000) áishmañkan ayuramiania nu
(Márkus 8.1-10)

³² Nuyá Jesus ni unuiniamurin untsukar tiarmiayi “Ju aentsun waitnentainiajai. Warí, menaintu tsawant Wijíaj yurumsuk yujainiatsuk. Ayurtsuk ni jeen akupkachminiaitjai. Jintia pimpiki wáitsartatui.”

³³ Ni unuiniamurj tiarmiayi “Túrasha, Uunta, ¿shuar atsaasha tuyañ yurumak imiá sumaktaj jü aents ayurawartincha?”

³⁴ Jesus aniasarmiayi “¿Urutma tanta takakrum?”

Tutai niisha “Siati (7) tanta nuyá ishichik namak takakji” tiarmiayi.

³⁵ Nuyá aents nunká pujusarti tusa akupkamiayi. ³⁶ Tura siati tantan achik namaknasha achik nuyá Yúsán yuminsamiayi. Tura puur aents ayuratarum tusa ni unuiniamurin susamiayi. ³⁷ Ashí yurumáwar jémaramiayi. Tura puunaru siati chañkin tiarmiayi. ³⁸ Tura nuj yurumáwaruka nuwasha uchisha nekapmatsuk aya áishmañkak kuaru mir (4000) árimiayi. ³⁹ Nuyá Jesus áentsun akupak kanunam enkemar Maktara nunkanam wémiayi.

16

Pariséusha Satuséusha iniakmamurin Jesusan seawarmiania nu
(Márkus 8.11-13; Rúkas 12.54-56)

¹ Pariséusha tura Satuséusha Jesusan nekapsatai tusar tariarmiayi. Túrawar “Ame Yúsaiyáitkiunka kakarmarmijíaj nayaimpinnmaya iniakmasta, iisha wáinkiatatui,” tiarmiayi.

² Tutai Jesus tímiayi “Átumka “Kapaaku péetar kintiamkui kashin esatrurtatui” tñiuitrume.

³ Túrasha “Te ajas kapaaku péetar ísawaakui yumi yajauch átatui” tñiuitrume. Tura nekasaiti. Maa, átumka nayaim ísrum jü nunkanam túrunattana nu nékarme. Antsu Yus yamái jü nunkanam tura nuka nékatsrume. Ántraitrume. ⁴ Aents yajauch ásar tura Yusan enentáimtachu ásar kakarmajaj iniakmamun wakeruiniawai. Túrasha áyatik Junas túrunamia nuke iniakmastiniaiti” tímiayi. Tínia ikiuak wémiayi.

Pariséusha Satuséusha jintintiania nu aneartiniaiti
(Márkus 8.14-21)

⁵ Tura entsá amaini katinkiar ni unuiniamurj tantan júkitniun kajinmatkiarmiayi. ⁶ Nuyá Jesus tímiayi “Wáinkiatarum, Pariséusha Satuséusha wakaprutai takakainia nújajsha aneartarum.”

⁷ Tutai ni unuiniamurj tiarmiayi “Ii tanta itiachakrin tátsuk.”

⁸ Jesus nuna antuk tímiayi “¿Urukamtai tanta itiachji tunaiyarum. Yusa kakarmarj kajinmatkintrume. ⁹ Senku tantajaj túramiaj nu kajinmatkintrume. Senku mir (5000) áishmañkan ayuramtai untsurí chañkin tiármia nu enentáimtsurmek. ¹⁰ Tura siati tantajaj kuaru mir (4000) áishmañkan ayuramtai nuna ishichik chañkin tiármia nu kajinmatkintrume. ¹¹ Itiurak imiá nékatsrum? Wi Pariséu wakaprutairísha Satuséu wakaprutairísha aneartarum tákun penké tantan tátsujai” tímiayi. ¹² Nuna Jesus takui ni unuiniamurísha nekaawarmiayi. Penké tantaa wakaprutairin tíchamiayi antsu Pariséusha Satuséusha unuiniairín tímiayi.

Pítiur Jesusan Yus anaikiamun paant ujakmiania nu
(Márkus 8.27-30; Rúkas 9.18-21)

¹³ Tura Sesaria-jiripiunam jeawar Jesus ni unuiniamurin aniasarmiayi “Aents Ajasuit-jiana juna ¿yaiti turutainiawa Winia?”

¹⁴ Niisha ayak tiarmiayi “Chíkich, imiakratin Juáñkaiti turamainiawai. Chíkichka, Eríasaiti turamainiawai. Chikichcha Jeremiasaiti, chikichcha chíkich aents Yúsán etserniuiti turamainiawai” tiarmiayi.

¹⁵ Tutai nincha aniiniak “¿Atumsha yaiti túrutrum?” tímiayi.

¹⁶ Semuñ Pítrusha “Ámetme Kristu, Yus Anaikiamu. Nekas iwiaaku Yusa Uchirínme” tímiayi.

¹⁷ Tutai Jesus tímiayi “Shiiraitme Junasa uchirí Semuñka. Núnaka aents ujatmakchaiti antsu winia Apar nayaimpiniam pujana nu ujatmakmatai nekaam tame. ¹⁸ Tura Wisha tájame, ame Pítruitme, kayach tútaim. Nu kayanam jeǵ jeamtinia áintsan Yus-shuaran ekenin tsakatmartajai. Túramtai jákatniusha tura Yusa nemasrjsha nu jeamman pukukchattawai. ¹⁹ Yus akupeamu yawincha amastatjai. Ju nuñkanam jin̄kiatniusha atíatniusha amasmaiti. Tuma asamtai ame ju nuñkanam suritiam nu nayaimpinmasha suritniaktatui. Tura ju nuñkanam tsan̄kateam nu nayaimpinmasha tsan̄katnaktatui” tímiayi. ²⁰ Nuna tinia Jesus ni unuiniamur̄in Krístuítaiju nu etserkairap tinia akupkarmiyai.

Jesus Nin máatniun etsertumakmiania nu
(Márkus 8.37–9.1; Rúkas 9.22-27)

²¹ Nuyá Jesus juna unuiniamur̄in nan̄kammiayi. “Wi Jerusaréñnum wétiniatjai. Nuǵ Israer-shuara úuntrjsha, Israer-patri úuntrjsha, Israer-shuara jintinniurjsha ti wáitkiarsartatui. Nuyá mantuawartatui túrasha menaintiú tsawantaj nantaktiatjai.”

²² Takui Pítiur arantach júki chicharuk tímiayi “Uunta, nuka pen̄ké áchatniuiti. Áminkia túrutmacharminiaiti.”

²³ Jesus ayanmatar Pítrun tímiayi “Werumta, Satanása. Yajauch awajtame. Ámeke Yus wakeramu enentáimtsume. Antsu jú nuñkanam enentáimainia áinis enentáimme.”

²⁴ Nuyá Jesus ashí ni unuiniamur̄in tímiayi “Shuar Winia nemartustaj tusa wakerakka ni wakeramur̄in iniais ni krusj yanaki Winia nemartusti. ²⁵ Shuar áyatik péñker pujustaj tákuñka nu shuar uwemtsuk jakattawai. Antsu jákatniuitkuisha péñker pujustinian enentáimtsuna nú shuar nekas iwiaakman wainkiattawai. ²⁶ Wats, shuar ashí jú nuñkanam írúna nuna sumakka tura nuǵai ni wakanǵ émesek çitiurak péñker pujustij? Shuara wakanǵ emesramu çashí jú nuñkanam írúna nuǵai iwiamniakait? ²⁷ Wi Aents Ajasu asan, winia Aparu kakarmarjijai tura ni suntarjijai tana ashí shuaran ni takasmajai métek akiktatjai. ²⁸ Paant tájarne, shuar juǵi wajainia ju játsuk Wi akupin ajasmatai wáitkiartatui” tímiayi.

17

Jesus nushá iira ajasmiania nu
(Márkus 9.2-13; Rúkas 9.28-36)

¹ Nuyá sais (6) tsawant nan̄kaamasar Pítruncha, Jakupuncha, tura ni yachí Juannasha níniak júkiar Jesus náinnium yakí wakamiayi. ² Nuǵ Jesus nusháa iira ajattsarmiayi. Ni yapisha etsayá áinis wincha ajasmiai. Ni pushirjsha ti puju jitsumir ajasmiai. ³ Nuǵsha Muisaisnasha Eriasnasha Jesusǵai chichainian wáinkiarimiayi. ⁴ Nuyá Pítiur Jesusan tímiayi “Uunta, ti shiir pujaji juǵi. Wakerakminkia menaint áakmaktai, Áminiu chikichik tura chúkich Muisaisnasha, tura chikichcha Eriásna.” ⁵ Tura Pítiur tu auju wájai yuran̄kim ti puju amǵamiayi. Tura nu yuran̄minmayá chichaman antukarmiayi. “Juka winia aneamu Uchiruiti, tímiayi. Nin ti shiir enentáimtajai. Nii péñker anturkatarum” tímiayi. Tu chichasmiai Yus. ⁶ Nuna ni unuiniamur̄i antukar ti ashamkar pákea ajakiarmiayi. ⁷ Túrunawarmatai Jesus táriar antiñ “Ashamkairap, nantaktiarum” tiarmiayi. ⁸ Tura pañkainiar íimijai tukamá aya Jesusan wáinkiarimiayi.

⁹ Nuyá náinniumiá akainiak Jesus tiarmiayi “Átum ísurmena nu pen̄ké etserkairap. Wi Aents Ajasu asan jakamunmayá nantaatsajñ etserkairap’ tímiayi.

¹⁰ Nuyá ni unuiniamur̄i Jesusan aniiniak “çUrukamtai in̄ jintiniramín “Kristu táatsajñ Eriás emka tátiniati” tuinia?” tiarmiayi.

¹¹ Tuíniakú Jesus áikniayi “Nekas Eriás tátiniati. Tura nii mash iwiarattawai. ¹² Kame nekas Eriás táwiti tura nin nekaacharmai. Antsu aents wakeriarmia nuna túrawar yajauch awajarmiayi. Núnisan̄ Winiasha, Aents Ajasu aijn, wáitkiarsartatui.” ¹³ Nuna takui ni unuiniamur̄i imiakratin Juánkan áujmatui, tu enentáimprarmiayi.

Jesus iwianchin jiki akupkamiania nu
(Márkus 9.14-29; Rúkas 9.37-43)

¹⁴ Ataksha aents matsatmanum jeawarmatai shuar Jesusan tarí tikishmatramiayi. ¹⁵ Tura tímiayi “Uuntá, winia uchir waitnentrutata. Wainchi tukum ti wáitniuiti. Jiniumsha patamniuiti. Entsasha in̄ainiati. ¹⁶ Ame unuiniamurm̄incha itiarjai túrasha tujinkiarai.”

¹⁷ Takui Jesus ashí tímiayi “Maa, Yus pen̄ké enentáimtichuitrume. Imiá úmichuitrume. çWi atumin katsuntu ajatniukaitjarum? Wats, uchi itartitiarum’ tímiayi. ¹⁸ Itiarim Jesus yajauch wakanin jiki akupkamiayi uchi ayashíniá. Túramtai nu chichamaik péñker ajasmiai.

¹⁹ Nuyá urum ni unuiniamurí Jesúsaj níñki pujasar áujmatainiaki “¿Urukamtai yajauch wakan jíiktin iikia tujinkiamaj?” tiarmiayi.

²⁰ Tuíniakui Jesus tiarmiayi “Yus nekas enentáimtachu asarum tujinkiarne. Túmaitiat nekasaiti mustasa jíñkiái timiá uchichitiat ti uunt tsakaatsuk. Núnisañ Yus ishichkisha enentáimtakrumka nu naint ékemkata tutai nu naint túrunattawai. Penké tujinkiashtatrumé Yus nekas enentáimtakrumka. ²¹ Kame nu yajauch wakan jíiki akupkatniuka ijiarmam Yus áujsatniuiti.”

*Ataksha Jesus ni játniun ujakmiania nu
(Márkus 9.30-32; Rúkas 9.43-45)*

²² Jesus ni unuiniamuríjjíaj Kariréa nunkanam wekas júna ujakarmiayi. “Wi Aents Ajasu asan, aentsnum surunkattajai tura mantamnattajai. ²³ Túrutawarmatai menaintiú tsawantaj nantaktiatjai.” Tura ni unuiniamurí nuna antukar ti kúntuts enentáimprarmiayi.

Jesus ankantaitiat akiktinia nuna akikmakmiania nu

²⁴ Jesus ni unuiniamuríjjíaj Kapernáum péprunam jeawarmiayi. Tura kuitian achin Pítrun tariar aniasarmiayi “¿Atumi uuntri Israer-patrin akiktinia nuna akíñkíait?”

²⁵ Tutai Pítiur “Ee” tímiayi.

Tura Pítiur jeá wayá chichaatsajñ Jesus emka tímiayi “Chíkich nunkanmayá akupin ¿yana kuitríjjíajñ takainia. Ni shuárñiunkek atantainia. Antsu yajayá shuárnan atantainiatsuk. Nekaschak, Semunká?”

²⁶ Tutai Pítiur “Nekas yajayá shuárnan atantainiawai” tímiayi.

Jesus tímiayi “Nuikia ni shuarí ankant áiniawai. Iisha núnisrik nu akiktin ankantaitji. ²⁷ Túrusha iturchat enentáimprarajñ tusar akiktai. Ame tsau jukim entsá wetá. Túram emka namak japikim iwiankam nuí kuit wáinkíattame. Nu jukim Wíniasha áminiusha akikmakta.”

18

“¿Ya imiá nankaamantuit?” tunaiyarmiania nu

(Márkus 9.33-37; Rúkas 9.46-48)

¹ Nu tsawantaj ni unuiniamurí tariar Jesusan aniasarmiayi “Yus akupeamunam pachinia nu ¿ya imiá nankaamantu áminiait?”

² Nuna tuíniakui Jesus uchin untsuk ajapen awajtusar ³ tímiayi “Tí nekasn tájarme, atumí enentáimtaij yapajarum uchia áinis ajachkurmeka Yus akupeamunam pachíñkiachmini-aitrume. ⁴ Nu asantai jú uchia áinis péjchach enentáimtumana nuka Yus akupeana nuí nekas nankaamantu ajasminiaiti. ⁵ Nú arantcha Winia anentuk uchin itiaana nú shuar Winiasha itiaareawai” tímiayi.

Tsumainti yajauch túrumtikiatin

(Márkus 9.42-48; Rúkas 17.1-2)

⁶ Shuar jú uchin Winia umirtana nuna tunaanum ajuarmatañkia nuna túratsajñ niisha kuntujén kayajají jíñkiar nayantsanam ajapen kunanam ajunmaitkiunka maak ainti, tímiayi. ⁷ Jú nunkanam tunáa iniaatai írunuk tuke iturchataiti. Antsu shuar chikichan tunaanum ajuarka ti iturchatan inkiuntatuí’ tímiayi.

⁸ ‘Nu asantai ame uwejem tura nawem tunaanum ajunmatniuitkiunkia tsupikiam ajapata. Kame muntuch pujustin tura ukunam nayaimpiniam wétin péñkeraiti. Antsu kajinkiashtin jinium takamtsuk jeatniuka imiá yajauchiiti. ⁹ Núnisañ ame jíimi tunaanum ajunmatniuitkiunkia ukuinkiam ajapata. Kame chikichik jíjjíaj pujusam nayaimpiniam wétin péñkeraiti. Antsu jinium mai jíñtiuk wétin imiá yajauchiiti’ tímiayi.

Murik menkaaka áujmatsamu

(Rúkas 15.3-7)

¹⁰ ‘Uchi ainia nu nakitirairap. Yusa suntarij nin wáinkiatniua nu winia Aparuj tíjuch pujuiniawai. ¹¹ Kame wi Aents Ajasu asan, menkaakarun eaktajtsan táwitjai.’

¹² ‘Enentáimpratarum. Shuar siañ (100) murikiun takakuitiat chikichik menkakamtai untsurí menkakacharun náinnium matsaaka, menkakan eaushtatuak. ¹³ Wáinkiasha untsurí menkakacharua nujají nankaamas waraschattawak. ¹⁴ Núnisañ atumi Aparí nayaimpiniam pujana nu, nu uchi chikichkisha menkakacharti tawai’ tímiayi.

Yus-shuarti tsankurnairatin

(Rúkas 17.3)

¹⁵ ‘Chíkich Yus-shuar ámin yajauch túrutmakuñkia nú werim áujsa. Tura ámechik werim ame yatsumjají chichasta. Anturtamkuñkia ame yátsum yáñkiume. ¹⁶ Tura anturtamchakuñkia nuyá chikichik shuar jiniará shuarsha jukim ataksha weritia. Túram ataksha

ájúnaisatarum, niisha paant nekaawarat tusa. ¹⁷ Túrasha yatsum tuke ántachkuñkia Yus-shuar iruntainiam iwianiakta. Túrasha yatsum tuke ántachkuñkia Yus-shuarcha núnisan enentáimtusta nu shuar.'

¹⁸ 'Nekasan tájarme, ju nuñkanam suritiam nu nayaimpinmasha suritniaktatui. Tura ju nuñkanam tsan̄kateam nu nayaimpinmasha tsan̄katnaktatui.'

¹⁹ 'Núnisnak tájarme, ju nuñkanam pujusrum jímíarú Yus-shuurtiram métek enentáimprarum winia Apar nayaimpiniam pujana nu seakrumñkia wakerarmena nuna suramsattarme. ²⁰ Jímíar menaintiusha Yus-shuar Winia enentáimturuk iruntrarmatai Wisha nuñ níijai pujajai' tímiayi Jesus.

²¹ Takui Pítiur weri Jesusan aniasmiayi "Uuntá, winia yatsur yajauch awajtakuí çurutma tsan̄kuratniuitiaj. Siátikik tsan̄kuratniuitiaj?"

²² Jesus aiyak "Siátik tátsujme, antsu iniannatsuk tsan̄kuratniuitme" tímiayi.

Takakmau tsan̄kurachun pachis áujmatsamiania nu

²³ Tuma asa Jesus Yus akupeamunam pachiinkiaru tsan̄kurnairartiniati tusa ju métek-taku chichaman áujmatuk tímiayi, "Uunt akupin takarín tumashin akirkarat tusa untsukar-mai. ²⁴ Yama nánkamuk tí nukap tumashmakua nuna untsukmai. Akikmakchamnia ti tumashmakuyi. ²⁵ Tura nu takakmau kuitrj atsakuí uunt akupin "Yajasma áitkiasrum nuártiuk uchirtiuk ashí waririntiuk suruktarum, timiai. Nu kuitjaj akirkati" timiai.

²⁶ Tutai nu takakmau uunt akupniun tikishmatar seak timiai "Uunta, waitneasam nákar sátá. Auka, mash akiktatjame." ²⁷ Uunt akupin waitnentar mash tsan̄kur an̄kant akupkamai. ²⁸ Tura nú chichamaik nú takakmau jiinki ni ajn in̄kiunmai. Nú ajsha nin ishichik tumashiyyi. Tura tsékenki suwenam achik chicharuk timiai "Wari akirkata tumashitmena nu."

²⁹ Tura ni aj nin tikishmatar timiai "Waitneasam nákar sátá. Auka, mash akiktat-jame" timiai. ³⁰ Túrasha nakitramai. Antsu tsan̄kurtsuk sepunam en̄keamai ashí akirkati tusa. ³¹ Chíkich takakmau nuna wáinkiar ti kúntus enentáimtuiniak uunt akup-niun ashí etsertukarmai. ³² Nuna antuk uunt akupin untsuk itia timiai "Yajachiitme. çwinia "waitnenturta" túrutkumin tsan̄kurachmakjam? ³³ Amesha núnismek ame ajm tsan̄kuratniuitme" timiai. ³⁴ Tinia uunt akupin kajekmai. Tura ashí tumashin akikmatsuk asutniati tusa suntarnum surukmai." ³⁵ Jesus nuna áujmatas amúak tímiayi "Núnisan winia Apar nayaimpiniam pujana nu atumin túrutmattarme atumi yachj nekas enentáijjaj tsan̄kureachkurminkia."

19

Jesus nuwá ajapatniun áujmatsamiania nu

(Márkus 10.1-12; Rúkas 16.18)

¹ Jesus nuna tinia ikiuak Kariréa nuñkanmaya wémiayi. Tura Jurtañ entsa amain Jutía nuñkanam jeamiayi. ² Untsurj aents nemariarmiayi tura jáiniancha pen̄ker awajsamiayi.

³ Nuñ Paríséu Jesusan nekapsataj tusa aniasarmiayi "çshuar ni nuwen itiurchat akui ajapamniakait?"

⁴ Tutai Jesus tímiayi "çÁtumka Yus-Papí áujtsachukaitrum? Yámankamtaik Yuska shuáran áishman̄kan nuwan̄cha najanamiayi tawai. ⁵ Tuma asamtai áishman̄ ni aparín ni nukurín ikiuki ni nuwejjaj tsan̄in̄ chikichik ayashtinia áinis ajasartatui, tu áarmaiti, tímiayi. ⁶ Tuma asa jímíarcha antsu chikichik ayash áiniawai. Tuma asamtai shuar Yus apatkamia nuna, aents akankashtiniaiti' tímiayi.

⁷ Takui tiarmiayi "Nuikia çurukamtai papí áarar nuwá ajapatniun Muisais tsan̄katkamia?"

⁸ Tutai Jesus tiarmiayi "Timiá ántichu asakrumin nuwá ajapatniun tsan̄katkamiayi. Túrasha émkaka núnischauyayi. ⁹ Wi tájarme, shuar ni nuwen chikichjaj pujuschan ajapeakka tura chikichan nuatkuñka tsanirmayi. Chíkich áishman̄sha nuwá ajapamun nuátkañka nusha tsanirmayi" tímiayi.

¹⁰ Takui ni unuiniamurj tiarmiayi "Nuikia áishman̄ ni nuwé pen̄ké ikiukchamniaitk-iuñkia nuátkachminiati."

¹¹ Jesus tiarmiayi "Nu chichamnaka mash antukchamin áiniawai. Antsu Yus nuna umiktin susamna nuke antukmin áiniawai. ¹² Chíkich chíkich nuatkachmin áiniawai. Chíkich nuátkachmin akiiniawaru áiniawai. Chikichcha aentsjaj nuátkachmin najanaru áiniawai. Chikichcha nuátainiatsui Yus akupeamu takatan takastinian. Juna antuktinian jeaka antukti."

Jesus uchin shiir awajsamiania nu

(Márkus 10.13-16; Rúkas 18.15-17)

¹³ Nuyá Jesusan uchin itiararmiayi. Nin antin̄ Yúsan áujtusarat tusa wakeriarmiayi. Túruiniakui ni unuiniamurj chicharkarmiayi. ¹⁴ Túruiniakui Jesus tímiayi "Uchi Winí winitin

tsaṅkatkatarum. Suritkiairap. Kame ju uchia áintsan péechach áinian nunak Yus akupkam-niaiti.”¹⁵ Tinia uchin miniakas nuyá wémiayi.

Kuítrintin Jesusjai chichasmiania nu
(*Márkus 10.17-31; Rúkas 18.18-30*)

¹⁶ Shuar natsa Jesusan tarin aniasmiayi “Uuntá, péñkeraitme. Tuma asam turuttia ¿warinia túrakna tuke iwiaaku átataj?” tímiayi.

¹⁷ Tutai Jesus nin enentáimtikrataj tusa tímiayi “¿Urukamtai péñkeraitme túrutam. Shuar péñkerka atsatsuk. Aya Yúskechukait? Wats, tuke iwiaaku pujustaj tákumka akupkamu umírkartá.”

¹⁸ Tutai shuar “¿Tuna nekas umírkatniuitiaj?” tímiayi.

Takui Jesus tímiayi “Mañkartuawai, tsanirmawai, kasámkáip, chíkich shuar tsanumpruraip,¹⁹ ame apa nukusha umírkartá, ame shúarum ame ayáshim aneamna nútiksamek aneeta.”

²⁰ Tutai natsa tímiayi “Núnaka úchichik mash umiki tsakaruitjai. Nuyásha ¿warí táatrusa?” tímiayi.

²¹ Takui Jesus tímiayi “Nekas péñker átaj tákumka, weme ame kuítrum kuítrinchá ainia nu súsartá. Tura nayaimpiniam kuítrintin ajastatme. Nuyá Winia nemártústá” tímiayi Jesus.

²² Tura natsa nuna antuk kúntuts wémiayi ti kuítrintin asa.
²³ Nuyá Jesus ni unuiniamurín tiarmiayi “Nekasan tájarme, kuítrintin Yus akupeamunam pachiinkiatin ti itiuurchataiti.”²⁴ Ataksha tájarme, kamírúka kawái nankaamas uunt asa auja jín wayachminiaiti. Núnisan kuítrintin Yus akupeamunam pachiinkiatin ti itiuurchataiti.”

²⁵ Ni unuiniamurí nuna antukar antúu ajarmiayi. Túrawar aniniainiarmiayi “¿Nuikia yaki uwempramniait?”

²⁶ Tuíniakui Jesus ashí íisar tímiayi “Aents uwempratniun nekas tujintiainiawai antsu Yuska ashí tujintiatsui.”

²⁷ Nuyá Pítur tímiayi “Uuntá, iikia ashí ikiukchajik Ámin nemarsatai túsar. ¿Warin wáinkiatattaj’ iisha?”

²⁸ Jesus tímiayi “Nekasan tájame, ukunmañka ju nunka yamaram ajastatui. Aents Ajasu asan, Wisha nu, uunt akupin ajastatjai tura atumsha winia nemartusutirmeka Wijíaj métek akupin ajastatrumé ashí Israer-shuar akupkatin.”²⁹ Tura shuar ni jéenchá, yachínchá, umaínchá, aparínchá, nukurínchá, nuarínchá, uchirínchá, tura nunqénchá Winia anentu asa ikiukin wekaakka, nu shuar nii ikiukmia núnisan wayamásha ti untsurí wáinkiatatai tura ukunmasha tuke shiir pujustatui Yusjai.³⁰ Untsurj yamái penkerj áiniana nu ukunam ukunmaani pujusartatui, tura yapajáwar yamá ukunmaya áiniana nu ukunam emka pujusartatui tímiayi Jesus.

20

Jesus takarniun pachis áujmatsamiania nu

¹ Yus akupeamunam pachiinkiatin júnisaiti. Nunka nérentin ni araamurín júuktaj tusa káshik iniartaj tusa jínkimiaiyi. ² Chikichik tenariu kuit jean tsawant takamtsuk akiktajrume tusa chichas ni araamun júuktiniam akupkarmiaiyi. ³ Nantu takuntajsha ataksha jiinki shuar yujan wáiniak ⁴ timiai “Atumsha winia arakur júuktin yáintkiatarum. Shiir akiktajrume.” Tutai wearmai. ⁵ Ataksha tutupin aj nuyá áanqúsha jínki, núnisan tinia akupkarmai. ⁶ Ataksha nantu patamsaj jínkimiaiyi. Tura shuaran yujan wáiniak “¿Urukamtai takamtsakesha áani pujarum?” timiai.

⁷ “Warí, iincha iniatmainiatsji” tiarmai.

“Tuíniakui timiai “Atumsha winia nunkarui takautarum. Péñker akiktajrume.”

⁸ Kirit ajátekiá takatrín wáinnium timiai “Takatan takasaru untsukam akikiarta. Kíaraj nankamawaru emka akikiarta. Túram káshik nankamawarujaj amuktá” timiai. ⁹ Takui nantu patamsa aj nankamawaru wayawarmatai chíkichik tenariu kuit jean ashí akikiar-mai. ¹⁰ Mash umintramtai nuyá emka nankamawaru wayawar “nuna nankaamas achikchatjash” tu enentáimsarmai. Tura chíkichik tenariu kuit jean achikiar-mai. ¹¹ Achikiar nérenniun itiuurchat enentáimturarmai. ¹² Tura tiarmai “Iikia ashí tsawant nantujaj wáitsachjik. Ju shuarsha nantu patamsa aj nankamawaruka penké ishichik takasara. Túrasha iijaj métek akikiarume” tiarmai.

¹³ Tutai nérentin chíkichikiniak iniakmas timiai “Umpá, penké kasartsujme. Káshik chíkichik tenariu kuit jeá chíchasar iijaj iwarachjik, timiai. ¹⁴ Pai, ame kuítrum achikiume. Nantu patamsaj takasuncha amijaj métek akiktiniam wakerajai. ¹⁵ Warí, winia kuítrujaj wi wakeramun túrachminkaitiaj. Antsu wi tsanaka asamtai ¿yajauch enentáimturmek?” timiai.”

¹⁶ Núnisaiti Yus-shuarnum. Émkaru áinia nu uku ártatui. Tura ukuya áiniana nu, emka ártatui. Untsurí ipiaamu áiniawai tura ishichik achikma áiniawai.” Tu áujmatsamiayi Jesus.

*Jesus ataksha ni jákatniurín etserkamiania nu
(Márkus 10.32-34; Rúkas 18.31-34)*

¹⁷ Jesus Jerusarénum jintiá wesa ni unuiniamurín akankin tiarmiayi ¹⁸ “Iistarum, Jerusarénum wéaji. Nuísha Israer-patri úuntrín tura ni jintinniuríncha Winia surutkartatui. Nuísha, wi Aents Ajasu ajn, “mantamnatí” túrtiartatui. ¹⁹ Tura apachnium surutkartatui. Nuí katsekrukar, awattiar krúsum máawarti tusar túrtawartatui. Túrasha jakayatan menaintiú tsawantaj nantaktiatjai” tímiayi.

*Jakupu tura Juanka nukurí Jesusan seamiayi
(Márkus 10.35-45)*

²⁰ Nuyá Jakupusha Juansha, mai Sepetéu uchirí, nukuríjjai tariat Jesusan tikishmatrarmiayi. Tura nukurí Jesusan waitnentrutarat tusa seamiayi. ²¹ “¿Warí wakeram?” tímiayi Jesus.

Tutai nuwá tímiayi “Ame uunt akupin ajastatmena nuí winia uchir chikichik untsuurnu-maani chikichcha menaanmaani akupkarti tusam apusarta.”

²² Takui Jesus tiarmiayi “Atum seatrumna nu nékatsrume. ¿Wi wáitsattajna nujai métek túramniakaitrum? Wi wáitsatniun yapá umartinia áinis umartiniaitjai. Núnisañ wáitsatniujai imiaitniua áintsan imiantiniaitjai. ¿Nú piniñnumiá umarminkiaitrum. Núnisañ imianminkiaitrum?”

Tutai “Páchitskea” tiarmiayi.

²³ Tuíniakui Jesus tímiayi “Ayu. Winia piniñkrujya umartatrum. Wi imiantiatjana nujai imiantiatrum. Antsu Wijjai tsaniñkia pujustinniaka Wikia íschatniuitjai, antsu winia Apar iwiarturu áinia nuna nuí apusattawai” tímiayi.

²⁴ Chíkich tias (10) unuiniamurí nuna antukar nu jímiaran kakerkarmiayi. ²⁵ Túmainiakui Jesus untsukar tiarmiayi “Ju nékarme, apachniumka kapitán ajasar ni shuarín nérenniua áinis ti akupenawai. Ni úuntrísha waantu enentáimsar “wíitjai akupniun” tu enentáimtiainiawai. ²⁶ Antsu atumjainkia núnis áchatniuiti. Nankaamaku ajastaj tákuñka chikicha yaintrí átiniaiti. ²⁷ Ame kapitántrum ajastaj tákuñka ashí shuara yaintrí ajástí. ²⁸ Wisha Aents Ajasuitiatan, Winia yáintkiarat tusan táchaitjai antsu shuáran yáingtaj tusan táwitjai. Untsurí shuaran tunáa tumashrín akikmatkataj tusan jákatniuitjai. Nuna tarimjai” tímiayi Jesus.

*Jímiar jii kusurun Jesus tsuármiania nu
(Márkus 10.46-52; Rúkas 18.35-43)*

²⁹ Jirikiú péprunmaya wénakui untsurí aents Nin nemariarmiayi. ³⁰ Nuí jintiá yantam jímiar jii kusuru pujuarmiayi. Jesus wéawai taman antukar kakantar untsukarmiayi. “Uuntá, uunt akupin Tawitia Uchirínchukaitiam. Waitnentrurta” tiarmiayi.

³¹ Tuíniakui “Takamatsatarum” tiarmiayi.

Tútaisha nú nankaamas untsukarmiayi. “Uuntá, Tawitia Uchiriá, waitnentrurta” tiarmiayi.

³² Tuíniakui Jesus wajas jii kusurun untsukar aniasarumayi “¿Warí ititurtak tusarum wakerutarum?”

³³ “Uuntá, iimtiaj tusar wakeraji” tiarmiayi. ³⁴ Tuíniakui Jesus nin waitnentrar ni jiiñ antiñkiarmiayi. Nu chichamaik ímiar niisha Jesusan nemariarmiayi.

21

*Jesus Jerusarénum wayamiania nu
(Márkus 11.1-11; Rúkas 19.28-40; Juan 12.12-19)*

¹ Jerusarénum nuntumsar Petpajá péprunam jeawarmiayi. Nusha Uriwiu náinnium ayamchiiyayi. Nuí jeawar Jesus ni unuiniamurín jímiaran akupeak tímiayi ² “Tjijuch péprunam wérum umpuuru umpuuruchijjai jiníkiama wáinkiatrum. Nu atiarum itartiarum. ³ Tura aents “Urukamtaí áitkiarum” túramkurminkia “Uunt wakerawai, tura wárik awainkittiwai” titiarum” tímiayi.

⁴ Tura nusha yaunchu Yúsnan etserin aarmia nu umíkiatí tusa tímiayi. Júnis áarmiai:

⁵ “Ashí Israer-shuarnum ju etserkatarum:

“Iistarum, atumi Akupniurí, péejchach ajas umpuuruchiniam ekeemak winitramprume. Péejchach asa káarak áintstai umpuuru uchirín ekeemak winitramtatrume,” titiarum.”

Tu áarmaiti.

⁶ Tutai nu jímiar unuiniamurí wear Jesus timia núnisañ túrawarmiayi. ⁷ Umpuuruchin nukurtiuk itiarumayi. Tura ni pushirín áitkiaram Jesus entsamkamiai. ⁸ Shuar untsurí ásar

ni wéamunam pushirín áitkiarmiayi. Chikichcha nuká jurukar ni wéamunam áeprurarmiayi. ⁹Shuar untsurí eem wearmia nusha tura uku winiarmia nusha kakantar untsumiarmiayi. “Juna weatří uunt akupin Tawit asamtai nankaamakuiti. Yusa náarín winiana ju ii Uuntrinti. Shiir atí. Nayaimpinmasha Yus shiir awajsatái.” Tu untsumiarmiayi.

¹⁰Jesus Jerusarénum wayamtai ashí shuar ti enentáimainiak “¿Yusha yait?” tiarmiayi. ¹¹Chikichcha “Yúsnan etserin Jesusaiti, tiarmiayi. Nasarét pepru Kariréa nunkanmayaiti” tiarmiayi.

Yusa Uunt Jeeñ suruktinian Jesus surinkiamiania nu
(Márkus 11.15-19; Rúkas 19.45-48; Juan 2.13-22)

¹²Nuyá Jesús Yusa Uunt Jeeñ wayá kuítian súruiniak tura súmainiak pujan akuprámiayi. Kuítian yapajinia misaríncha ayanturmiayi tura yampitsa súruinia kutankríncha núnisan ayanturmiayi. ¹³Nuyá tímiayi “Yus-Papiniun áarchamukaiti,

“Yusa Jeeñka Yus aujtai jégaiti.” Antsu átumka kasa matsamtaiya nútikiarme” tímiayi.

¹⁴Nuñ Yusa Jeeñ jii kusurarussha shutuapsha Jesusan tariarmiayi. Túramtai tsuáarmiayi.

¹⁵Tura Israer-shuar pátrisha tura Israer-shuara jintinniurísha aents tujintiamun Jesus túrakui íisar kajerarmiayi. Nu arantcha uchi Yusa Jeeñ “Juna weatří uunt akupin Tawit asamtai nankaamakuiti” unsumainiakui Jesusan ti kajerarmiayi. ¹⁶Tura tiarmiayi “¿Ju uchi tuinia nu ántamek?”

Tutai Jesus “Ee, ántajai, tímiayi. Átumka Yus-Papí juna tana júka áujsachukaitrum. Júnis tawai,

“Uchisha kuírchisha Yusa náarín imiá shiir awajtusarat tusa Yus tsanekatkaiti.” Tu áarmaiti.

¹⁷Nuna tinia ikiuniak Jerusarénumia jüinki Petania péprunam we nuñ kanarmiayi.

Jesus iikiu numin yuminkrimiayi
(Márkus 11.12-14, 20-26)

¹⁸Kashin tsawaar Jerusarénum waketas Jesus tsukaarmiayi. ¹⁹Iikiu numi jintiá yantam wáiniak akakajtasa werimiayi. Tura weri aya númiak wáinkiamiai. Túra numin tímiayi “Atakka nerekchattame.” Takui nu chichamaik káarmiayi.

²⁰Nuna wáiniak ni unuiniamuri ti enentáimprar aniasarmiayi “¿Urukaku imiá wárik jaka?”

²¹Tuñiakui Jesus tiarmiayi “Nekasan tájarme, Yus nekas enentáimtakrumka, “nekaspash túrat” táchakrum iikiun túrajna nusha túramniaitrum. Tura nu arantcha nu naint “Ékemtam nayaantsanam iniañta” tutai túrunattawai. ²²Ashí Yus áujeakum seamna nu, Yus nekas enentáimtakum seakmeka, wáinkiañtame” tímiayi.

Yusa kakarmarijají Jesus takasmiania nu
(Márkus 11.27-33; Rúkas 20.1-8)

²³Yusa Uunt Jeeñ Jesus wayá unuiniamiayi. Turaj Israer-patri uuntrí tura Israer-shuara úntrisha Jesusan tariar aniasarmiayi “¿Yana chichamejají ju túram. Ya ju túratniuncha akuptamkait?” tiarmiayi.

²⁴Tutai Jesus tiarmiayi “Wisha aniañtaj tusan wakerajrume. Ju áirkakrumniñkia Wissha yana chichamejají túraj nuna ujaktatjarme. ²⁵Wats, ¿ya imiakratin Juanñkan akupkamia. Yusak, aentsuk, ya akupkamia?”

Tutai nuámtak tunainiarmiayi. “Yus akupkamiayi” tákurniñkia “¿urukamtai enentáimtichuitrum?” túramtaji. ²⁶Kame “shuar akupkaiti” tákurnisha ashí aents mantamattaji. Warí, ashí niisha Juan Yúsnan etserniuyi tuñiatsuk” tiarmiayi. ²⁷Nuyá Jesusan “Nékatsji” tiarmiayi.

Tutai Jesussha añniak “Wátsek, Wissha núnisnak akuptukua nuna ujakchattajrume” tímiayi.

Jimiará uchi tiarmia nuna áujmatsamiania nu

²⁸Jesus unuiniak tiarmiayi “Enentáimpratarum. Shuar uchín Jiménez takakuuyi. Nuna chikichkin chicharuk timiai “Uchirú, arakur júuktin yamáí wetá.”

²⁹Tutai uchi “Atsá, nakitiañjai” timiai. Tayat urum enentáimprar takaumai.’

³⁰‘Nuyá aparj chikichnasha weri núnisan timiai.’

‘Tutai uchi “Apawa, páchitsuk wetajai” timiai, túrasha wéchamai.’

³¹¿Túa ni aparj wakeramun umirkama?” tímiayi Jesus.

Tutai “Emkaa nu” tiarmiayi.

Tuñiakui Jesus tímiayi “Nekasan tájarme, yajauch shuar ainia nu tura tsanirma ainia nusha átumka pachiiñsrumniñ nii emka Yus akupeamunam pachiiñkiartatui. ³²Iis, imiakratin Juan péñker wekasatniun etserkamiayi, túrasha antukchamarme. Antsu yajauch shuar ainia nu tura tsanirma ainia nu umirkarmiayi. Nusha wáinkiañtium atumi tunaarj enentáimturchamarme’ tímiayi.

*Yajauch takaun áujmatsamiania nu**(Márkus 12.1-12; Rúkas 20.9-19)*

³³ Jü chikich áujmatmasha antuktarum. Nunká nérentin uwa ajan ajammai. Tura wenuimiai. Uwa neketaincha najanamai. Kumpin jeancha najanamai. Tura mash péñker iwiar shuar wáitrukarti tusa apujkimiai. Tura niníka yajá nunkanam wemai. ³⁴ Tura júuktin tsawant jeamtai juuk nakak akúptúrkarti tusa chikich takarniurj akupkamai. ³⁵ Tura nuj pujuinia nu, akupkamun achikiar chikichnaka katsumkar, chikichnasha máawar, chikichnasha kayajaj tukurar máawarmai. ³⁶ Túrawarmatai nérentin takarniun nuna nankaamas akupramai. Ataksha nuj pujuarmia nu núnisañ túrawarmai. ³⁷ Amúamunam ni uchirín akupeak “Winia uchir asamtai umirkachartimpiash” timiai. ³⁸ Túrasha nu takau nérenniu uchirín wáinkiar “Nuna aparí jakamtai juna mashi júkishtatuak, tiarmai. Maatai, túrar ii nérentin ajastai” tiarmai. ³⁹ Tiar achikiar arant júkiar nuj máawarmai.” ⁴⁰ Tinia Jesus aniasarmiayi “Nunká nérenniurj taa nu takaun ¿itiurkatin?” tímiayi.

⁴¹ Tutai tiarmiayi “Nu shuar ti yajauch ásarmatai waitnutsuk máawartai. Tura nu ajan chikich takaun neren akanak nin susamnia nuna apujstatawai” tiarmiayi.

⁴² Tuíniakui Jesus tímiayi “Átumka Yus-Papikia ¿peñkek áujchaitrum? Júnis áarmaiti: “Jea jeamin utsankarmia nú kaya ashí kayajaj nankaamas apujsamuiti. Núnaka ii Uuntri Yus túraiti. Iisha ísar ti enentáimtai.” Tu áarmaiti.

⁴³ Tuma asamtai tájarne, Yusna írúnna nu wáinkiatárum tusa suramsamuitai atumíya junas chikich aents súnastatui. Niisha awantukiartatui. ⁴⁴ Tura shuar nu kayan tukumainia nuka kupintrartatui. Tura nu kaya shuarnum iniarka tsai tsai awajstatawai auka” tímiayi Jesus.

⁴⁵ Israer-patri uuntri sha Pariséussha Jesus áujmatman antukar “in túramji” tusar achiktaj tiarmiayi. ⁴⁶ Tura ashí aents “Jesus Yúsnan étserui” tuinia ásarmatai nin ashamkarmiayi.

22*Métek-taku chichamjai nuatnaiyamun Jesus áujmatsamiania nu*

¹ Jesus ataksha áujmatuk juna tímiayi: ² “Yus akupeamunam pachiinkiertin júnis enentáimpramniati. Uunt akupin ni uchirí nuáteakui nampermamai. ³ Túrak ni takarniurín ipiaamautarum tusa akupkarmai. Tura ipiaamusha nakitrarmai. ⁴ Ataksha chikich takarniuncha ipiaamakrum ju titiarum tusa akupkarmai. “Mash yurumkan iwiarajai, tawai, titiarum, timiai. “Waakasha máatarum tusan akupkarjai, tawai. Ajaermancha máatarum tusan akupkajai, tawai. Ashí nuatnaiyamunam winiarti,” tawai” titiarum” timiai. ⁵ Támaiati nú ipiaamusha nakitrarmai. Chikichik ni nunken wemai. Chikichcha kuítian suruktinian wemai. ⁶ Chikichcha ipiaakratniun achikiar yajauch awajstatawai, tura chikichnaka máawarmai. ⁷ Túramtai uunt akupin ti kajek, ni suntari mash máatarum túrarum ni jea mash ekeemáktárum tusa akupkarmai. ⁸ Nuyá ataksha ni takarniurín akupkamai. “Nuatnaikiatin jísat mash iwaramuít, timiai. Tura nu ipiaamu winichmin armai. ⁹ Tuma asamtai pepru jinti werum ashí shuar nanekamas wáinrum nu ipiaatarum” timiai. ¹⁰ Takui takarniurj jünkiar pepru jintin wajainian, yajauch shuarnasha péñker shuarnasha, ashí ipiaawarmai. Túramtai jea piákmai.”

¹¹ Nuyá uunt akupin ipiaamun ísartaj tusa wayamai. Nuj shuaran péñker iwiarmam-prachun wáinkiamai. ¹² Tura timiai “Umpá, ¿urukamtai nuatnaiyamunam entsatai pushí entsatsuk wayam?” Tutai nu áishman tákamtak pujusmiayi. ¹³ Nuyá uunt akupin yurumka ajaaman timiai “Achikrum nawenmasha uwejnusha jünkiarum aa júikrum kiritniunam ajapatarum. Nujsha ti úutin ti wáitsatin átatui” timiai. ¹⁴ Kame untsurj ipiaamu ániawai antsu ishichik achikma ániawai.”

*Uunt akupin Sésar akiktinia nu**(Márkus 12.13-17; Rúkas 20.20-26)*

¹⁵ Nuyá Pariséu chichaman najatawar uyumtikiatai tusar tiarmiayi. ¹⁶ Túrawar ni shuarjíncha tura akupin Erutisa nemarniurjsha Jesusan akuptukarmiayi. Kame akupin Erutis uunt akupin Sésara kuitri wáinin asamtai nu apachniasha akupkarmiayi. Niisha jeariar Jesusan tiarmiayi “Uuntá, amesha nekas chicham chichaame. Nu nekaji. Chikich shuar tuinia nu ántutsuk nekasam Yus-Chicham jintiame. Shuar shiir enentáimturarat tusam jintiatsme, tiarmiayi. ¹⁷ Tuma asamtai ju nekaatai tusar wakeraji. ¿Uunt akupin Sésar akikminkiait?” tiarmiayi.

¹⁸ Jesus ni yajauch enentáijaj aniam nekáa tiarmiayi “Aya shiir chichamtiniaitrueme. ¿Urukamtai uyumatkiarkatin wakerutarum? tímiayi. ¹⁹ Wats, Sésar akiktinia nú kuit itiaritiarum.” Takui chikichik kuítian itiararmiayi. ²⁰ Nuna iis Jesus aniasarmiayi “¿Jui yana yapimpiait tura yana naarj áarmait?”

²¹ Tutai “Uunt Sésarna” tiarmiayi.

Tuiniakui Jesus chicharuk tiarmiayi “Nuikia uunt Sésarna nu, Sésar susatarum. Tura Yusna nusha Yus susatarum” tímiayi. ²² Tura nuna antukar ti enentáimprarmiayi. Tura ikiuiniak wearmiayi.

Jesusan jakamunmayá nantaktinian aniasarmiania nu
(*Márkus 12.18-27; Rúkas 20.27-40*)

²³ Nu tsawantajk Satuséusha Jesusan tariarmiayi. Satuséuka jakamunmayá nantakchat-niuiti tuñiawai. Nuna tiniu ásar juna Jesusjái áujmatsarmiayi. ²⁴ “Uuntá, Muisais juna áartampramiayi, “áishmañ uchin yajutmatsuk jakamtaiñkia ni yachí nu nuwan nuatak ni yachin yajútmátrati,” tu áarmiayi, tiarmiayi. ²⁵ Ayu, íi shuarnum siati (7) yáchtin árimiayi. Iwiaíri nuatak uchin yajutmatsuk jakamiayi. Tura wajen ni yachin ikiurkimiayi. ²⁶ Tura niisha nuatak uchin yajutmatsuk jakamiayi. Tura chikichcha núnisan jakamiayi. Tura chikichcha siati armia nu ashí nuatkar jákarmiayi. ²⁷ Nuyá nuwasha jakamiayi. ²⁸ Jakamunmayá nantakiar zyaki nekas ni aishri ati? Ashí nin nuatkacharmakia” tiarmiayi.

²⁹ Tuñiakui Jesus tímiayi “Yus-Chichamsha nékachkuram tura Yusa kakarmarjsha nékachkuram nantaktin atsawai tákuram ti awajiarne. ³⁰ Nekaatarum. Jakamunmayá nantakiaruka nuatkachartatui. Antsu Yusa suntari nayaimpiniam pujuinia núnisar nuartichu pujusartatui. ³¹ Túrasha jakamunmayá nantakiartatna nu nekaatajtsa wakerakrumka ju enentáimsatarum. Muisais aarma nu áujaschukaitrum. Júnisan áarmiayi:

³² “Wiitjai Apraáma Yúsrinjai, Isaka Yúsrinjai, Jakupu Yúsrinjai.” Tu áarmiayi. Watsek, Yuska jaká Yúsrinchuiti. Antsu iwiaaku ana nuna Yúsrinti, tímiayi. Iis, nu shuar imiá yaunchu jákaruitiat Yusjai iwiaaku pujuiniak nantakmin áiniawai” tímiayi. ³³ Ashí aents nuna antukar nu jintintiam ti enentáimprarmiayi.

Yus akupkamu imiá enentáimtustinia nu
(*Márkus 12.28-34*)

³⁴ Satuséu Jesusan áiktinian tujinkarmatai Pariséu nuna antukar iruntrarmiayi. ³⁵ Tura chikichik Pariséu jintintin asa Jesusan uyumtikiataj tusa aniasmiayi ³⁶ “Uuntá, ztúa Yus akupkamu imiá nankaamas enentáimtustiniat?”

³⁷ Tutai Jesus tímiayi “Júiti: “Ame Yúsrum ashí enentáimjai aneeta. Ashí ame wakan-mijajsha tura tuke enentáimtusam aneeta.” Tu áarmaiti, tímiayi. ³⁸ Núiti emka ashí akupkamu nankaamas enentáimtustinia nu. ³⁹ Chikichcha jujai métek-taku awai. Nusha tawai: “Ame írutramuram ame ayashim aneamna nútiksamek aneeta.” ⁴⁰ Nu jímjar akupkamu umirkam ashí Muisais akupkamia nusha tura ashí Yúsnan etserin unuiniarmaria nusha umirkattame” tímiayi.

Kristu Tawit weeatiat Yusa Uchirinti
(*Márkus 12.35-37; Rúkas 20.41-44*)

⁴¹ Tura Pariséu tuke irunar pujuiniakui ⁴² Jesussha aniasarmiayi “Kristu tutai zyá weeá átiniait. Warí enentáimtarum atumsha?”

Takui “Tawit weeá átiniaiti” tiarmiayi.

⁴³ Tuñiakui Jesus tiarmiayi “Nuikia zurukamtaí Tawit, Yusa Wakaní “títia” tutai, Kristun “winia Úuntur” tímia? Iis, Tawit juna tímiayi:

⁴⁴ “Uunt Yus winia Úuntron juna tímiayi: “Akupin pujutainium, winia untsuuruinj, pujusam nákarasata. Ashí ame nemasrumin nupetkan Ámin umirtamkarti tusan amastatjai” tímiayi Yus.” Tu tímiayi Tawit.

⁴⁵ Watsek, Tawit Kristun “winia Úuntur” tajsha zjiturak ni pampanmarj áti?” tímiayi Jesus.

⁴⁶ Nuna takui penkesha ájkcharmiaiyi. Túrarrow atakka uyumamtkiatai tusar aniascharmi-ayi Jesusan.

23

Jesus Pariséuncha Israer-shuara jintiniurincha “yajauchitrumé” timiania nu
(*Márkus 12.38-40; Rúkas 11.37-54; 20.45-47*)

¹ Jesus ni unuiniamurjincha tura ashí shuárnasha tiarmiayi ² “Israer-shuara jintinni-urjsha tura Pariséusha Muisais akupkamun paant ujatmainiawai. ³ Tuma asamtai tuinia nu umirkatarum. Túrasha ni túruinia nu jumamkiirap. Nu shuar shiir chichainiyat nusháa túrin áiniawai. ⁴ Ti itiurchat ana nuna akupeenak ti emeram entsaktinia áinsan áentsun apujtuiniawai. Túrasha chikichik uwejejaisha ishichkisha takuitniun nakitiaini-awai. ⁵ Aya shuar írsarti tusar ashí túruiniawai. Ashí shuar péñker enentáimturarti tusar Yus-Papin nijajincha tura kunturjincha ti wanakaram awajsar anujak yujainiawai. Tura nu arantcha pushirj sasariarman ashí shuarjai nankaamas esaram awajas wekainiawai. ⁶ Nampernumsha péñker iwiaramunam pujustinian wakeruiniawai. Iruntainmasha

nan̄kaamantu ajasa pujustinian wakeruiniawai. ⁷Jintiá wekainiaksha ashí aents áujtuniak “Jintinkartiiniá” turutiarti tusa wakeruiniawai’ tímiayi.

⁸ ‘Túrasha átumka ashí shuar “Jintinkartiiniá” turutiarti tusa enentáimsashtiniatrume. Átumka nuámtak yáchintrume. Átumka chikichik jintinkartin ni naari Kristu takakrume. Nu asamtai “Jintinkartiiniá” túramcharmin ániawai. ⁹Ju nun̄kanmasha shuar “Aparú” tíirap. Chikichik nayaimpiniam pujana nu atumí Aparínti. ¹⁰Atumi uuntri aya Kristuk asamtai “Uuntru” túramcharmin ániawai. ¹¹Antsu átum írutkamunmayá uunta nuka peejchach átiniaiti. ¹²Shuar nan̄kaamantu ajastaj tákuñkia Yus nin péejchach awajsattawai. Antsu péejchach ana nuna Yus nin nan̄kaamaku awajsattawai’ tímiayi.

¹³ ‘Maa wáinkiatárum jintinniutirmesha, Pariséutirmesha. Ántrarum shiir chichamtinaitrume. Yus akupeemunam wayátin waiti epenniuutrume. Atumsha wayatsuk chikichcha wayataj tuinia nusha suritniiuutrume.’

¹⁴ ‘Maa wáinkiatárum jintinniutirmesha, Pariséutirmesha. Ántrarum shiir chichamtinaitrume. Wajé jee atankiirum aents enentáimturain̄ tusarum ti esaram Yus áujtiniaitrume. Túrin asarum átum ti asutniátniuutrume.’

¹⁵ ‘Maa wáinkiatárum jintinniutirmesha, Pariséutirmesha. Ántrarum shiir chichamtinaitrume. Nun̄kanmasha nayaantsanmasha yajá wekainiuutrume chikichik shuar winí nermatusat tusarum. Tura atumi nemiari ajasmatai atumjai nan̄kaamas tunáa sumamannia awajearme.’

¹⁶ ‘Wáinkiatárum átumka. Jintinkartiiniatiatrum nékachu asarum kusurua ániiuutrume. Ju jintiarne: “Shuar nekasan tajai tusa Yusa Jeeñ páchiakka nii tana nuna umitsuk ikiukminiaiti. Antsu nekasan tajai tusa Yusa Jeeñ kuri ana nuna páchiakka ti nekas umiktiniáiti” tíniiuutrume. ¹⁷Nétsetrume. Yúsjañkia ashí kuri ánrachukait. Antsu Yusa Jeeñ íranna nuka aya nuñ ikúsma asa Yusna ajasuiti. Tuma asamtai kurijjai nan̄kaamas Yusa Jee enentáimustiniáiti. Enentáimcha asarum kusurua ánin wáakuitrume. ¹⁸Nu arantcha tíniiuutrume: “Shuar nekasan tajai tusa namañ-maar-Yús-sutain páchiakka nii tana nuna umitsuk ikiukminiaiti. Antsu Yús-sutainiam namañ patasman páchiakka ti nekas umiktiniáiti” tíniiuutrume. ¹⁹Nétsetrume. Penké namañ Yúsjai ánrachukait. Aya Yús-sutainiam patasma asa nu namañ enentáimtuschatniukait. Enentáimcha asarum kusurua ánin wáakuitrume. ²⁰Enentáimpratarum. Shuar nekasan tajai tusa Yús-sutain páchiakka aya sútainiak páchiatsui antsu sutaincha tura nuñ patasmancha mái-metek páchiawai. ²¹Núnisan̄ shuar Yusa Jeeñ páchiakka aya nunak páchiatsui antsu Yus nu jeanam̄ pujú asamtai nunasha páchiawai. ²²Núnisan̄ shuar nayaimpin̄ páchiakka Yus pujutainchsetrume. Penké namañ Yúsjai ánrachukait. Aya Yú tura Yus nuñ pujana nunasha páchiawai.’

²³ ‘Maa wáinkiatarum jintinniutirmesha, Pariséutirmesha. Ántrarum shiir chichamtinaitrume. Kumínsu nukésa, anisa nukésa, menta nukésa tias (10) akantram chikichik akankamu Yus súwitrum. Nuka péñkeraiti, ikiukchatniuiti. Túramaitiat nekas péñker túratniua nu túrutsuk ikiuwitrum. Yus nekas enentáimustinch, waitnentáimurtinch tura tuke péñker túratniusha enentáimtsuk ikiuwitrum. ²⁴Átumka jintinkartiiniatiatrum nékachu asarum kusuru ániiuutrume. Kutanam yajasmach enketu wáinkiumeka júwitrum. Túrayatrum kamiriu wáinkiumeka kawai nan̄kaamas úunt aiñ takamtsuk kújawitrum.’

²⁵ ‘Maa wáinkiatarum jintinniutirmesha, Pariséutirmesha. Ántrarum shiir chichamtinaitrume. Átumka tsapasha piniñsha initiaañ̄ nijiatsuk aya páatek nijiawitrum. Núnisrum páatek shiir awajamniiuutrume tura enentáiminkia kasamkatniusha tura chikichna wakeruktinch nujaj piákuiti. ²⁶Kusuru ániiuutrume, Pariséutirmeá. Antsu emka initiaañ̄ tsapasha piniñsha nijiaktarum. Túrakrumniñkia páatkesha mai péñker átatui. Núnisrum atumsha atumí enentáin̄ ana nu shiir awajсарum páatkesha shiir átatrum.’

²⁷ ‘Maa wáinkiatarum jintinniutirmesha, Pariséutirmesha. Ántrarum shiir chichamtinaitrume. Iwiarsamu pújujai yakarar shiir awajsamua ániiuutrume. Aan̄i shiir ániawai. Tura inítkia jaká ukunchjijai piákuiti. ²⁸Núnisaitrume atumsha. Chikich shuar ísmaka ti shiira ániiuutrume. Túrasha atumí enentáin̄kia ashí mujmiai piákuiti.’

²⁹ ‘Maa wáinkiatarum jintinniutirmesha, Pariséutirmesha. Ántrarum shiir chichamtinaitrume. Yaunchu Yúsnan etserin iwiarsamunam átumka shiir enentáimtakrum jea jeamkairume. Tura péñker shuar yaunchu jákarusha shiir enentáimurtaj tusarum ni iwiarsamu shiir awajearme. ³⁰Túrakrum ju tíniiuutrume: “Íikia yaunchu ii weatrijjai pujaitkiurkia Yúsnan etserin máatin yáimkiachaaji.” ³¹Nujai ti paant chichaarme atumsha. “Íi weatrij Yúsnan etserniun máawar tunáa túrin ármiai” tárume. Tura “Yáimkiachaaji” táyatrum, atumsha métek túrin asarum “Nijijai méteketji” tárume. ³²Wats, atumi weatrij nan̄kamawarmia nu átum amuktatrum’ tímiayi Jesus.

³³ Napia áiniuitrume. Shuar aya yajauch awajniuitrume. Túmatirmesha Yús tunáa shuaran jinium akupkartatna nuyá çitiurak uwempratarum? ³⁴ Untsurí shuaran akuptuktatjarne. Yúsnan etserniuncha, ti nekancha, jintinkiertinniasha akuptuktatjarne. Tura atumsha chíkich máattarme, chikichcha krúsum ajintruarum máattarme, chikichcha iruntai jeanam asutiáttarme, tura chikichcha ashí nunkanam áintrattarme. ³⁵ Nu tura asarum péñker shuara numpé puarma nujai átum sumamattarme. Yámankamtaik Apir ti penker shuáraitiat máamuyayi. Tura ukunam Perekiása uchirí Sakarías atumi uuntrí Yusa Jee ámanum namañ-maar-Yús-sutai ajapén aténkamunam máawarmiyai. Wats, Apir máamunmaya Sakarías máamunam ashí péñker shuar ti untsurí máamujai sumamattarme. ³⁶ Nekasan tájarne, yamáí pujuinia nú shuar ashí nujai sumamawartatui' tímiayi Jesus.

Jerusarénumia shuaran Jesus aneak lutmiania nu
(Rúkas 13.34-35)

³⁷ Jerusarénumiatirmeá, Yúsnan etserin máiniaitrume. Yus akatar akupturmakmasha kayajai tukuram máiniaitrume. Túrin árumniñ waitnentajarne. Atash ni uchirín weaana áitkiasnak weartinian wakerinjarme, tura nakitarmarme. ³⁸ Iistarum. Ame pépruram ajapamuiti. ³⁹ Tura “Yusa náarjin winiana nu, shiir ati” títiatrumna nu tsawant jeatsain penké wáitkiashtatrum. Nuna tájarne” tímiayi Jesus.

24

Yusa Uunt Jee saanaktinian Jesus ujakmiania nu
(Márkus 13.1-2; Rúkas 21.5-6)

¹ Jesus Yusa Uunt Jeeñia jiniki weaj ni unuiniamurí nin tariar Jeeñ iniktusar áujmatsarmiyai. ² Tura Jesus tiarmiayi “Nu mash yamáí wáintrume. Tura nekasan tájarne ukunmança mash saanaktiatui. Chikichík kayaksha ekentramurí atsuttawai” tímiayi.

Amúamu tsawant nekaatin
(Márkus 13.3-23; Rúkas 21.7-24; 12.22-24)

³ Nuyá Uriwiu náinnium wear niñki nuí pujusar ni unuiniamurí Jesusan aniasarmiyai “¿Nusha urutaik túrunati. Tura ame tátincha tura nunka amuukatin tsawant jeakuisha warijiañ nekaattaj? Nu ujatkata” tiarmiayi.

⁴ Tuíniakui Jesus tímiayi “Aneartarum, anañkramawairap. ⁵ Untsurí shuar winia náarun pachisar “wi Krístuitjai” tiar untsurí shuaran anañkawartatui. ⁶ Ti untsurí meset chicham antuktatrumé túrasha sapijmiakairap. Núnisan átiniaiti nunka amúatsain. ⁷ Apachcha chíkich nunkanmaya apachjai máaniawartatui. Tura ti sukasha átatui. Sunkursha ti pampartatui. Uúsha ti uurkartatui. Nuka untsurí nunkanam ashí túrunawartatui. ⁸ Nujai ti wáitsatin aya yama nañkamui’ tímiayi.

⁹ Nuyá atumniasha yajauch awajarti tusa surutnakartatui. Tura mantamawartatui. Tura winia naar pachia asakrumin ashí shuar muñramkartatui. ¹⁰ Nu tsawantaj untsurí shuar Yúsán iniaisartatui. Túrawar nuamtak muñniainiak surunairartatui. ¹¹ Untsurí shuar wáitruiniak “wi Yúsán etserniuitjai” tiartatui. Túrawar untsurí shuáran nusháa enentáimtikartatui. ¹² Tura tunáa ti ákui nuamtak anenaichartatui. ¹³ Tura shuar ashí nuna tuke katsuñra nu uwemprattawai. ¹⁴ Ashí aents nekaawarar tusa Yus-Chicham ashí nunkanam etsernaktatui. Túramtai amuukatin tsawant jeattawai” tímiayi.

¹⁵ Shuar juña áujea nu enentáimprati. Kame Jesus tímiayi “Yúsán etserin Taniar muñmi-antik tuke emesratin ana nuna yaunchu aar etserkamiyai. Nuka Yusa Jeeñ wantinkiamtai ¹⁶ ashí shuar Jutía nunkanam írúnna nu, muranam pisararti. ¹⁷⁻¹⁸ Ti wárik pisartin asamtai shuar jee yakí pujaksha tura shuar ajanam wekaakusha jeá waketki warirí jukitiaj tíchati. Antsu nuyáñ wárik pisarti. ¹⁹ Nu tsawantaj nuwá ajamtincha tura kuírchin takaku ainia nusha ti wáitsartatui. ²⁰ Ayampratin tsawantajsha tura michá nántutincha nu pisartin tsawant áchati tsarum Yus seatarum. ²¹ Maa, nu tsawantaj ti wáitsatin átatui. Ti yáunchusha núnisan wáitsatin atsuuyayi. Ukunmasha atsuttawai. ²² Nu wáitsatin ti esarmaitkiuñkia chikichkisha uwemprachainti. Tura Yus nu wáitsatniun wárik amumtikiattawai. Shuar Niiniu ajasarat tusa achikma ainia nu uwemprarat tusa wárik amumtikiattawai’ tímiayi.

²³ Tura atumin “Júiti Kristu,” tuíniakuisha tura “Nují pujawai” tuíniakuisha anturkairap. ²⁴ Untsurí shuar Krístuitjai tusar wantinkiertatui. Untsurísha “Yúsán etserniuitjai” tiartatui. Tura shuáran anankataj tusar aents tujintiamun iniakmasartatui. Tura ti kakarman túruiniak Yús-shuarnasha anañkamin áiniakuñkia anañkawarainti. ²⁵ Túrunatsain nuna emka ujaajrume. ²⁶ Tuma asamtai “Iis, Kristu nuí aents atsamunam pujawai” túramainiakuisha nuí wéerap. “Jui úumak pujawai” tuíniakuisha anturkairap. ²⁷ Núnisan úumkan táchattajai. Peem péçtuk ti wárik ashí nunkanam wáinkiachminkiait. Núnisnak wi Aents Ajasuka winiakun paant wantinkiaitajai. ²⁸ Wats, jaka tepaana nuí chuan káutkachartatuak’ tímiayi.

*Kristu tátintri**(Márkus 13.24-37; Rúkas 21.25-33; 17.26-30, 34-36)*

²⁹ ‘Ti wáitsatin nan̄kaasmatai ti wárik tsawáí nantu kajinkiatatawai. Tura kashí nan̄tusha etsantrashtatui. Yaasha ashí muchitrattatawai. Nayaimpiniam kakaram ainia nusha peantrartatui. ³⁰ Nūkia Wi Aents Ajasuka, tátiniur paant átatui. Tura ashí nun̄kanmayá aents Wi winiáí wáitkiar asuttiamattaji tusar útiartatui. Wisha ti kakaram tura Yusa wincharjijai yuranminiam winiáí wáitkiartatui. ³¹ Yusa suntarjin kachu kakaram umpuarterum tinia akupkamtai nu suntar ashí nun̄kanmayá ashí Yús-shuaran, Yus achikma ásmatai, irurartatui’ tîmiayi.

³² ‘Ikiu numiri nakumea nu nekaatarum. Ni nuken eteakui “esat nantu jeatemayi” tátsurmek. ³³ Núnisan ashí ju wáinkiumeka “amuukatin tsawant nekas jeatemayi” títiniaitume. ³⁴ Nekasan tájarme, yamáí aents pujuinia nu amúatsain ashí túrunatawai. ³⁵ Nun̄kasha nayaimpisha amuukartatui antsu winia chichamur amuukashtatui’ tîmiayi.

³⁶ ‘Tura nu túrunatin tsawant nekanachminiati. Yusa suntarjsha nékainiatsui. Wisha Yusa Uchirntiatnak nékatsaji. Antsu aya winia Aparuk nékawai’ tîmiayi.

³⁷ ‘Wi tátiniur jeamtai yaunchu Nuai pujumia nú tsawantin túrunamia núnisan átatui. ³⁸ Nu tsawantin, tuke amaartsain, aya júnisan aa asamtai yurumuk umarar pujuarmiayi. Nuatnainiarmiayi. Ni nawantrincha nuatmamtkiarmiayi. Tura tumá pujuinia Nuai uunt kanunam énkematui ³⁹ nu aents tuke nékainiatsain ama amaarak mash amuukarmiayi. Núnisan átatui Wi tátin jeamtai. ⁴⁰ Nu tswantaijk jimiara shuar ajanam pujuttatawai. Chikichik junaktiatui tura chikichkia ikiunkittiatui. ⁴¹ Núnisan jimiara nuwá shana nekeak pujuttatawai. Chikichik junaktiatui chikichcha ikiunkittiatui’ tîmiayi.

⁴² ‘Nu asamtai atumsha iwiarnarum pujustarum. Nekaachminiati uruk áintsuk taritjarum. ⁴³⁻⁴⁴ Tuma asamtai aneara pujustarum. Wi nekaachmanum tátin júnisan enentáimpramniati. Shuar ju kashí kasa tátiniam nekaanka kánutsuk kasa táawai tusa iwiarnar nákasainti. Núnisrum aneara pujustarum.’

*Pénker takamtikniuncha yajauch takamtikniuncha Jesus áujmatsamiania nu**(Rúkas 12.41-48)*

⁴⁵ ‘Shuar pénker uminian tura pénker enentáimniun áujmatsattajai. Nuna uuntri yajá irauweak “Yurumátin jeamtai winia takartin ayuratarum” tichanpiash. ⁴⁶ Nu takamtikniuncha ni uuntri taa takatrin tîmiatrusan túran tarinkia shiir enentáimtusainti. ⁴⁷ Nekasan tájame, umin asamtai ni uuntri ashí ni warirjin wáitrukát tusa takatan susattatawai. ⁴⁸⁻⁴⁹ Antsu úuntur wau táchattatawai tusa takamtikin ni uuntri yáintrin yajauch awajeak tura takatsuk aya yurumátiniun tura nampektinian wararkun̄ka nu takamtikin yajauchiiti. ⁵⁰ Turaj ni uuntri aya aneachma taa nu takamtikniun, yajauch asamtai, ⁵¹ ti kakaram asutiattatawai. Yajauch shuar pujuinia nu akupkattatawai. Nūsha ti wáitki ti úttiatui’ tîmiayi Jesus.

25*Jesus tias (10) nuwān áujmatsamiania nu*

¹ ‘Yus akupeamunam pachiinkiatin júnis átatui. Nuatnaikiatin jisat akui tias nuwā natsa kantiran akaawar nuátkattana nu áishman̄kan in̄kiun̄ jeá itiatatui tusar wearmai. ² Sen̄ku nuwā enentáimcha armai. Tura chikich sen̄ku nuwā enentáimin armai. ³ Enentáimcha arma nu nuwā aya akaamunak juñiak amuukamtai yaraatniun asutin júkicharmai. ⁴ Antsu chikich sen̄ku nuwāka akaamuncha juñiak tura ataksha amuukamtai yaraatniun asutin júkiarmai. ⁵ Tura jünkiarmatai nuatkatín áishman̄ wari taachkui karj pujakui kanararmai. ⁶ Nuyá kashi ajapén̄ shuar unsumuk “Pai nuatkatín winiawai. Werirum in̄kiun̄tarum” timiai. ⁷ Tu unsumun antukar nantakiar kantiran akaatai tusar pujursarmai. ⁸ Nuyá sen̄ku nuwā enentáimcha arma nu, chikich nuwā enentáimniun tiarmai “Incha atumi asutitir̄ ishichik ajamprusaitia. Ii kantir̄jsha kajiniawai.”

⁹ ‘Tutai chikich sen̄ku nuwā tiarmai “Átsá, warí in̄cha jeartamchattaji. Tura atumnia pen̄ké jeashtatui. Nekaska surutainium werum sumaka utumtarum” tiarmai.’

¹⁰ ‘Tura nuyá sen̄ku nuwā enentáimcha arma nu, asutian sumak utitai tusar wéaraj ukunam nuatkatín áishman̄ tamai. Túramtai enentáimin nuwā arma nuka nuatnaikiatin námpernam nuatkatniujai wayawarmai. Túramtai wáitin epeniarmai. ¹¹ Tura epeniaraj enentáimcha nu táarmai. Tura tiarmai “Úntá, waiti uratritia.”

¹² ‘Tu unsumainiakui nu uunt kajerak chichak “Cha, zyátsukaitrum? Pen̄ké nékatsjarne” tiarmai.” ¹³ Jesus nuna áujmatas umik tîmiayi “Aents Ajasuitjai tura tátin tsawantrusha tura uruk aiñ táat nusha nékatsrume. Tuma asarum tuke iwiarnarum pujustarum’ tîmiayi.

Kuit susamun áujmatsamiania nu

¹⁴ ‘Núnisan Wi tátin júnisaiti. Shuar chíkich nuñkanam wéak, ni takarniurin untsukar ni kuítrín akanak súsarmai. ¹⁵ Chikichkiniak senku mir (5.000) kuítian susamai. Chikichnasha jimiara mir (2.000) kuítian susamai. Tura chikichnasha chikichik mir (1.000) kuítian susamai. Nii takastin jearma nujai métek súsarmai. Tura ikiuak yaja wemai. ¹⁶ Takarin senku mir kuítian achikmia nujai takakmas ataksha senku mir kuítian patakmai. ¹⁷ Chikichcha núnisan jimiara miran achikmia nujai takakmas ataksha jimiara miran patakmai. ¹⁸ Tura chíkich shuar ni uuntri kuítrín chikichik miran achikmia nuna waja taur úukmai.’

¹⁹ ‘Nuyá ukunam nu shuara uuntri támai. Tura kuítian súkiarma nujai itiuurkarmakit tusa untsukarmai. ²⁰ Emka senku mir kuítian achikmia nu tamai. Nuyá ni uuntri chikich senku mir patakman suak timiai “Uuntá, senku mir kuit surusmame. Pai, atak senku miran patasmajai.”

²¹ ‘Takui ni uuntri timiai “Ti péñker takakmawitme. Nekas uminiaitme. Ishichkijajsha ti péñker takakma asakmin ti nukap yamaikia amastatjai. Winí wayam wijiái ti shiir warasta” timiai.’

²² ‘Nuyá chíkich shuar jimiara miran achikmia nu tari timiai “Uuntá, jimiara mir surusmame. Pai, ataksha jimiara miran patasmajai.”

²³ ‘Takui ni uuntri timiai “Ti péñker takakmawitme. Nekas uminiaitme. Ishichkijajsha ti péñker takakma asakmin ti nukap yamaikia amastatjai. Winí wayam wijiái ti shiir warasta” timiai.’

²⁴ ‘Nuyá chíkich shuar chikichik miran achikmia nu tari timiai “Uuntá, ti kajen asakmin tura araachiatam tura atsaamprachiatam júurtuktarum tiniu asakmin ²⁵ sapijmiakun ame kuítrumniaka nuñká táutran úukmajai. Pai, júfíti ame surukmian nu” timiai.’

²⁶ ‘Takui ni uuntri timiai “Ámeke yajauchiitme. Aya nákiitme. Wi araachiatan tura atsaamprachiatan júurtuktarum túniitme túrutsumek. ²⁷ Tu enentáimkiukma zurukamtai kuit-iruntainiam ikiurtuschamam? Nuikia wi táakun patasan achikiájai” timiai. ²⁸ Nuna tinia nuj wajainian tiarmai “Ju shuar chikichik mir kuit atankirum tias mir kuítian takaka nu susatarum. ²⁹ Kame nukap takakna nú shuar ataksha patatnastatui tura ampiniartatui. Antsu ishichik takakna nusha ishichik takakuiat jurunkitiawai. ³⁰ Ju umichu shuarsha aa kiritniunam ajapatarum. Nuj ti wáitai ti úuttiatu” timiai”. Tu áujmatsamiayi Jesus.

Akantratin áatna nu

³¹ Jesus áujmatuk tímiayi ‘Aents Ajasuitjiana nu ashí akupin ajasan Yusa suntari éñkekma winittijai. Tura Uunt Akupin asan shiir pujutairú pujustatjai. ³² Túramtai ashí nuñkanmaya aents Winia irunturartatui. Túrunawarmatai akantrartatjai. Murikiu wáinin kachurtinian tura kachurtichujai akanea nútisanak shuáran akantrartatjai. ³³ Tura kachurtichunka, péñkera nuna, untsuuruinj awajsartatjai. Tura kachurtinniaka, yajauchia nuna, menaruinj awajsartatjai. ³⁴ Túran nekas Uunt Akupin asan untsuuruinj wajainian títiatjai “Atumniaka winia Apar shiir awajtamsaitrume. Wi akupeajna nuj winitiarum. Yus nuñkan najanania tímianai átum nu warastinian tsankatramkamiarme. ³⁵ Kame Wi tsukamá wekai ayurtuamiarme. Kitiama wekajsha umartin surusmiarme. Wait aja wekajsha itiaararum ajamprusmiarme. ³⁶ Pushir atsajsha átumka surusmiarme. Jaa tepajsha íraimiarme. Sepunam enketajsha tarum íraimiarme” títiatjai. ³⁷ Tutai untsuuruinj wajainia turutiartatui “Uuntá, zurutia tsukamá wekaamnisha ayuramaj’. Urutiá iisha kitiama wekaa wainkiarsha umartincha amasmaj’. ³⁸ Tura urutia wait aja wekaamnisha tura pushiram mamurmataisha iisha amasmaj’. ³⁹ Urutia iisha jaa tepamin tura sepunam enketmin wainkiarsha winitir íimijai?” turutiartatui.’

⁴⁰ ‘Turutainiakui Wi Uunt Akupin asan tiartatjai “Nekasan tájarme, ashí ju wí shuar péejchachisha waitnentramarum nu Winia anentakum túraitrume” tiartatjai’ tímiayi.

⁴¹ ‘Wi Uunt Akupin asan menaruinj wajainian tiartatjai “Atumsha yaja wetarum. Yajachijai yuminikramuitrume. Yus uunt iwianchi ni suntarjijai tuke kajinkiashtin jinium apeatinua nuj wétatrume atumsha. ⁴² Átumka Wi tsukamá ayurtuachmarum. Kitiamaisha umartin suruschamarme. ⁴³ Wait aja wekajsha ikiatrachmarum. Pushiran imiamprajsha entsartin suruschamarme. Jaa tepajsha tura sepunam enketajsha íraichmarum” tiartatjai.’

⁴⁴ ‘Tutai niisha turutiartatui “Zurutia, Uuntá, tsukamakmesha, kitiamakmesha, wait ajaknisha, pushiram imiampramsha, jáakmesha, tura sepunam wait aja pujamnisha iisha winitir yáinchamajai?” turutiartatui.’

⁴⁵ ‘Wi Uunt Akupin asan tiartatjai “Nekasan tájarme, Ashí Wí shuar, péejchachisha waitnentrachmarum nuj Winiasha túrutachuitrume” tiartatjai. ⁴⁶ Nu shuarka tuke wáitsatniunam weartatui. Tura Yus achikma ainia nusha tuke iwiaaku Yusjai pujustinnium weartatui” tímiayi Jesus.

26

Jesus achiktin chichaman jurusarmiania nu

(Márkus 14.1-2; Rúkas 22.1-2; Juan 11.45-53)

¹ Jesus ashí nuna tinia umik ni unuiniamurjín tiarmiayi ² “Atumsha nékarme, Paskua jisat jeatin jimiaarchik tsawant ajasai. Nuí Wi Aents Ajasu asamtai krúsnum máawarti tusar surutkartatui” tímiayi.

³ Nuyá Israer-patri uuntrjsha Israer-shuara jintinniurjsha Israer-shuara úuntrjsha Kaipiasa jéen áarin iruntrarmiayi. Kaipiassha Israer-patri uuntrjyayi. ⁴ Nuí anankatin chichamjai Jesus achikiar maatai tusar chichaman jurusarmiai. ⁵ Tura tiarmiayi “Jístatin túrachminiati aents téetar ajarajín tusar.”

Nuwa Jesusan kunkuinian ukatramiania nu

(Márkus 14.3-9; Juan 12.1-8)

⁶ Jesus Petania péprunam pujus tunamaru Semunka jéen pujumiayi. ⁷ Nuí pujaj nuwa ti kuit jeá kunkuinian arapástru tutai kaya najanamunam piakun itiamiayi. Tura Jesus misanam yurumátaj tusa pujan tari nu kunkuinian ukatramiai. ⁸ Túramtai ni unuiniamurj nuna íisar kajerkar tiarmiayi “¿Urukamtai au kunkuin imiá kuitniasha áantrasha wasurea? ⁹ Antsu ti kuitjai suruk shuar kuítrincha ainia nuna yáítskesha” tiarmiayi.

¹⁰ Jesus tuinian anturak tiarmiayi “¿Urukamtai ju nuwa yajauch enentáimtarum? Túrutana ju ti péngeran túrayi. ¹¹ Kuítrincha tuke atumjai pujushtatuak. Antsu Wikia atumjai tuke pujushtatajai. ¹² Ju nuwa kunkuinjai ukatruaraj júka, Wi iwiarnastin asamtai áitkiarayi. ¹³ Nekasan tájarme, ashí nunkanam uwempratin chicham etsernakui tuke ju nuwa pachinias etsernaktatui. Túramtai ni túramurj kajinmankishtatui” tímiayi.

Jútas Jesusan surukmiania nu

(Márkus 14.10-11; Rúkas 22.3-6)

¹⁴ Nuyá Jesus tuse (12) unuiniamunmaya chikichik ni naarj Jútas Iskariúti Jesusan suruktaj tusa Israer-patri uuntrjín wémiayi. ¹⁵ Tura jeari tímiayi “Jesusan achikia amakui ¿urutmá akirkaintrum?” Takui trainta (30) kuitin akikiarmiayi. ¹⁶ Nu akikiam Jútas ititurak Jesusan súsaraintaj tu enentáimias wekaimiai.

Kristu jakamu enentaimtustin námper

(Márkus 14.12-25; Rúkas 22.7-23; Juan 13.21-30; 1 Kurintianam 11.23-26)

¹⁷ Wakapruachu tantan yurumáinia nú námper yama nanakamkui Jesusa unuiniamurj tariar aniasarmiayi “¿Tui paskua námper iwiaarakrin yurumáttam?” tiarmiayi.

¹⁸ Tuíniakui Jesus tímiayi “Péprunam wetarum. Nuí chikichik shuara jéen jearum titiarum “Uunta chichaak “Winia tsawantur ishichik ajasai. Tuma asan paskua namperan winia unuiniamurjai ame jéemjín yurumátajai” tawai” titiarum” tímiayi. ¹⁹ Tutai ni unuiniamurj wear Jesus tinia nuna umikiar paskua nampertin yurumátniun iwiararmiayi.

²⁰ Tura kashi ajasaj Jesus ni tuse (12) unuiniamurjijai misanam yurumuk pujumiayi. ²¹ Nuí yurumáiniaj Jesus tiarmiayi “Nekasan tájarme, átum pujarmena júyá chikichik Winia surutkattawai.”

²² Nuna takui ti kúntuts enentáimprar mai aní awajjarmiayi “Uuntá, ¿wiáshitiaj?”

²³ Mai tu awajenam Jesus tiarmiayi “Wi nú pininnumañ jimartukan yuajna ju Winia surutkattawai. ²⁴ Wi Aents Ajasu asan Yus Chicham tana nujaj métek túrunattajai. Túrashu shuar Winia surutkattana nuka ti asutniátin asa akiinmainchu ajakuiti” tímiayi.

²⁵ Nuyá Jútas suruktaj tana nu Nin tímiayi “Uuntá nuikia ¿wiáshitiaj?”

Takui Jesus tímiayi “Ee, nekas ámethe.”

²⁶ Tura yurumuk pujuiniaj Jesus yurumkan achik Yúsan yuminsamiayi. Tura puur ni unuiniamurjín suiniak tímiayi “Ju yuatarum. Júka winia ayashruiti.” ²⁷ Nuyá pininikian achik Yúsan yuminsamiayi. Tura suiniak tiarmiayi “Jusha ashí umartarum. ²⁸ Júka winia numparuiti. Tura winia numpar puármatai, yamaran chicham nekas uminkiatstawai tawai. Tura puármatai untsurj shuara tunaarjín tsankurattawai. ²⁹ Tura ataksha átum Yus akupea nuí jeatrumjín ju uwa yumirjín umarchattajai. Tura tsawant jeamtai atumjai Yus akupeana nuí yamarman umartatajai” tímiayi Jesus.

Pítiur natsantratniua nuna Jesus ukakmiayi

(Márkus 14.26-31; Rúkas 22.31-34; Juan 13.36-38)

³⁰ Yús-kantan kantamáwar umikiar Uriwiu náinnium wearumiayi. ³¹ Nuí Jesus tímiayi “Ju kashi átum Winia ashí natsantrurtatrum. Kame Yus-Papinium áarmaiti “Murikiu wáinnium mantuattajai túram murik pisarartatui.” Tu áarmaiti. ³² Tura nantakin Kariréa nunkanam Wi émkattajai átum wéatstrumin.”

³³ Takui Pítiur tímiayi “Chikich natsantramainakuisha wikia túrashtatajai.”

³⁴ Tutai Jesus tímiayi “Nekasan tájame, ju kashi atash shiniatsajin menaintiú natsantrur-tatme.”

³⁵ Pítiur tímiayi “Maa, Ámijijai métek mántuiniakuisha penkeshu natsantrashtatjame.” Ashí ni unuiniamurj núnisan tiarmiayi.

Jesus Jitsemáni ajanam Yúsán áusamiania nu
(Márkus 14.32-42; Rúkas 22.39-46)

³⁶ Nuyá Jesus ni unuiniamurjijai Jitsemáni náartin ajanam jeá tímiayi “Juí pujusrum nákarasatarum. Aranta aj wena Yúsán áusatjai.” ³⁷ Tinia Pitruncha tura mai Sepetéu uchiř jukí wémiayi. Nuřsha ti kúntuts enentáimuk wake mesekmiayi. ³⁸ Nuyá Jesus tímiayi “Ti kúntuts jakamnia enentáimjai. Atumsha juí pujusrum Wijjai métek iwiáa pujutarum.” ³⁹ Tinia Jesus arantach we nuí tikishmar tsuntsuama Yúsán áujeak tímiayi “Winia Aparú, Wi túrunatniua nu nusháa iwiamniaitkiuńkia ju wáitsatniua nu tsankatrukaip. Tura Wi wakeraj núniska áchatu antsu Ame wakeram núnis atí” áujuk tímiayi.

⁴⁰ Nuyá ni menaintiú unuiniamurj pujuiniamunam waketki kanúu pujuinian jeariar Pítrun tímiayi “Átumka chikichik úraksha Wijjai iwiáa pujutin ĉtujinkirmek? ⁴¹ Iwiáa pu-jusrum Yus áusatarum. Tunáa nupettamkairap. Enentáimin ti wakeriniaitrumé túrasha ayashim pimpiruiti.”

⁴² Tinia ataksha we Yúsán áujeak tímiayi “Winia Aparú, Wi imiá nekasan wáitsatniuitkiuńkia nuńkia Ame wakeramna nu atí.” Tu áusamiayi.

⁴³ Nuyá ataksha taa ni menaintiú unuiniamurj tarimiayi. Tura karj ti nupeteam ataksha kanúu pujuarmiayi. ⁴⁴ Túmainiakui nin ikiukin ataksha áujmia núnisan Yúsán áusataj tusa waketkimiayi. ⁴⁵ Áujas umik ni unuiniamurj pujamunmań wémiayi. Tura tiarmiayi “Antsu yamaikia kanarum ayampratarum. Ura jeayi. Wi Aents Ajasu aiń, tunaarintin shuarnum surunkatin jeayi. ⁴⁶ Wari nantaktiarum. Wéartai. Súrutna nu winiawai” tímiayi.

Jesusan achikiarmiania nu
(Márkus 14.43-50; Rúkas 22.47-53; Juan 18.2-11)

⁴⁷ Jesus tu chichaj Jútas támiayi. Nusha ni unuiniamurijayi. Nujajsha untsurj shuar puniajajsha tura numijajajsha winiarmiayi. Nu shuaran Israer-patri uuntriřsha Israer-shuara úuntriřsha akupka ármiai. ⁴⁸ Jútas, Jesusan sura, tuke Jesusaj jeatsuk nu shuaran tiarmiayi “Wi miniakkan mukunattajna núiti. Nu achiktarum.” ⁴⁹ Nu asantai Jesusan tari “Winiajai Uuntá” tinia mukunamiayi.

⁵⁰ Takui Jesus tímiayi “Amikrú, ĉwarí winitiam?” Nuyá achikiar Jesusan júkiarmiayi.

⁵¹ Nuí chikichik Jesusa tsaniakmarj ni puniarin ukuinjak shuara kuishin tsupirkamiayi. Nu shuarsha Israer-patri uuntriř takarniurjyayi. ⁵² Túramtai Jesus tímiayi “Puniarum enkeata. Ashí puniajai máanainia nusha puniajai mantamnashtatuak. ⁵³ Wi wakeraknaka winia Aparun timiá untsurj suntarin seaku páchitsuk akupturkainti. ĉNu nékatsmek? ⁵⁴ Tura nuna túramtaińkia Yus-Chichamnum tana nu uminkiaachainti” tímiayi.

⁵⁵ Nuna tinia Jesus nu shuaran tiarmiayi “Átum kasá achiktaj tawa nútkisarum puni-ajajsha numijajajsha tarutniurme. Kame ashí tsawantaj Yusa Jeen atumjai pujusan Yus-Chichaman etsermijai. Nuřsha achirkachmarme. ⁵⁶ Antsu yamaikia yaunchu Yúsán etserin áarmania nu umínkiatj tusarum jútkrarme.” Tu tímiayi Jesus.

Nuyá ni unuiniamurj Jesusan Níniak ikiuiniak pisararmiayi.

Israer-patri uuntriř Jesusan júkiarmiania nu
(Márkus 14.63-65; Rúkas 22.54-55, 63-71; Juan 18.12-14, 19-24)

⁵⁷ Shuar Jesusan achikiarmia nusha Kaipiasaj júkiarmiayi. Nusha Israer-patri uun-trijayi. Nuřsha Israer-shuara jintinniurjsha Israer-shuara uuntriř armia nusha irunar matsamarmiayi. ⁵⁸ Tura Pítiur árantak Jesusan nemarkin uuntriř jeen aari jeamiayi. Tura suntarjai tsanin pujusmiayi Jesusan itiuřkartin tusa.

⁵⁹ Tura Israer-patri úuntriřsha Israer-shuara úuntriřsha tura ashí naamka uunt armia nusha Jesusan wait-chichamjai súmamtikiatai tusar áujmatiarimiayi. ⁶⁰ Untsurj shuar ántar tsanumpruiniakuisha máatin chichaman nekaracharmiayi. Nuyá jimiari shuar tsanumpruiniak ⁶¹ tiarmiayi “Ju áishmań chichaak “Yusa Uunt jeen yumpuaran ataksha menaintiú tsawantin jeammniaitjai,” tu chichamai” tiarmiayi.

⁶² Nuyá Israer-patri uuntriř wajaki Jesusan tímiayi “ĉÁimtsmek. Turamainia nusha anturmammek?” ⁶³ Túrasha Jesus tuke áimchamiayi. Túmakui Israer-patri uuntriř chicharuk “Nekas iwiaaku Yusa náariń tájame nekasa nu táchakminkia Yus írmastatui. ĉAme Krístukaitiam. Yusa Uchirínkaitiam? Paant etsérkatá” tímiayi.

⁶⁴ Tutai Jesus tímiayi “Ee, ame támena núitjai. Tura ataksha atumin tájarme, wi Aents Ajasu asan ti kakaram Yusa untsuuriń puja wáitkiáttarme. Tura yuranminiam winiajsha wáitkiáttarme” tímiayi.

⁶⁵ Nuyá Patri uuntri nuna antuk ti kajek ni pushiri jaak tímiayi “Ju áishmañ ni chichamejai Yúsan nekas yajauch chicharniuiti. Nuyásha ¿warí atsumaj? Atumsha Yúsan yajauch chicharu antukcharumek. ⁶⁶ ¿Waritia enentáimprum?”

Tutai “Sumamayi. Mantamnati” tiarmiayi. ⁶⁷ Tiar usukiawarmiayi yapiniam. Tura awattiarimiayi.

Chikichcha yapiniam awati wishikiainiak tiarmiayi ⁶⁸ “Ame Krístuchukaitiam. ¿Ya awatama? Ítsuk nekaata.” Tu chichariarmiayi.

Pítiur Jesusan natsantramiania nu

(*Márkus 14.66-72; Rúkas 22.56-62; Juan 18.15-18, 25-27*)

⁶⁹ Nu túmaiñ Pítiur aa pujai nuwa chikichik jeari tímiayi “Amesha ju Kariréanmayá Jesus tutajijai wekaichamkam.”

⁷⁰ Tutai Pítiur ashí ántuiniamunam tímiayi “Nékatsjai. ¿Warittsuk chichaam?”

⁷¹ Nuna tinia jínkitiaj tusa wéaj chikich shuar wáiniak nuñ pujuiniam tiarmiayi “Au áishmañsha Nasarénumiá Jesusjai wekainiuiti.”

⁷² Tutai Pítiur ataksha tímiayi “Nekasan tájarme, ju áishmañkan penké nékatsjai.”

⁷³ Árusañ nuñ pujuarmia nu Pítrun tariar tiarmiayi “Nekas amesha aujai wekaimiame. Warí, chichammijjai páantaiti.”

⁷⁴ Tutai Pítiur “nekas Yus írui” taku tímiayi “Nu áishmañkan penké nékatsjai.” Nuna taj atash shiniukmiayi. ⁷⁵ Túramtai Pítiur Jesus nuik tímia nuna enentáimpramiayi. “Atash shiniatsañ menaintiú natsantrurtatme” tímiayi Jesus. Pítiur nuna enentáimiar jínki we ti úutmiayi.

27

Piratu Jesusan júkiarmaniania nu

(*Márkus 15.1; Rúkas 23.1-2; Juan 18.28-32*)

¹ Kashin tsawarmatai Israer-patri uuntrijsa Israer-shuara úntrijsa Jesus maatai tiarmiayi. ² Tiar Jesusan jinikiawar apachi uuntrin Punsiu Piratu júkiarmaniayi.

Jútas máamamiania nu

³ Jútas Jesusan suruk tura máatai tuñian antuk enentáimiar trainta kuítian Israer-patri uuntrincha Israer-shuara úntrincha awantukiarmiayi. ⁴ Tura tímiayi “Nu áishmañ tunaar-inchan máatarum tusan surukan wi sumamajai.”

Taku tiarmiayi “Nusha íjjaisha warí urukatiñ. Nuka amek íschatniukaitiam.” ⁵ Tinia Jútas nuñ Yusa Uunt Jee kuítian utsañ ikiuak nuyá we kajempramiayi. ⁶ Nuyá Israer-patri uuntri nu kuítian júukar tiarmiayi “Ju kuit shuar sumakma asamtai Yusa kuítrijjai írurchamniaiti.” ⁷ Tura nuamtak áujmatsar “nunka sumaktai” tiar Nuwe Najantai nunkan sumakarmiayi yajaya shuar nuñ iwíarsatniun. ⁸ Shuar sumakma kuitjai sumakma asamtai yamaisha Numpá Nunka tuke tuñiawai. ⁹⁻¹⁰ Nujai yaunchu Yúsnan etserin Jeremías timia nu uminkiamiayi:

“Uunt Yus turutmia núnisan túrawarmiayi. Israer-shuar trainta kuítian seawarmatai nuna akantrar nujai Nuwe Najantai nunkan sumakarmiayi.” Tu áarmiayi.

Piratu Jesusan aniasmiania nu

(*Márkus 15.2-5; Rúkas 23.3-5; Juan 18.33-38*)

¹¹ Jesusan apachi úntrin ejeniarmatai nii aniasmiai “¿Nekasmek Israer-shuara uunt akupniuríntiam?”

Tutai Jesus “Ame támena núitjai” tímiayi.

¹² Nuyá Israer-patri úntrijsa Israer-shuara úntrijsa súmantikia Jesus pachischamiayi. ¹³ Nuyá Piratu tímiayi “Ashí yajauch chichartamainia nu ¿anturmammek?” ¹⁴ Tútaisha Jesus penké áimkiachmiayi. Túmakui akupin ti enentáimiar títinian nekaachmiayi.

Piratu Jesusan “mantamnati” tímiania nu

(*Márkus 15.6-20; Rúkas 23.13-25; Juan 18.39-19.16*)

¹⁵ Jísat tsawantin apachi uuntri Israer-shuar shiir enentáimprarat tusa sepunam enketun shuar wakeramun jiki ankant akupniuyayi. ¹⁶ Nuñ sepunam tunáa shuar Parapás náartin pujumiayi. Ashí shuar nékarmiayi. ¹⁷ Tuma asamtai Piratu Israer-shuar íruntrarun aniasmiai “¿Yana ankant akupkat tusarum wakerarum. Parapásnak akupkattaj; Kristu tutai Jesusnak akupkattaj?” tímiayi. ¹⁸ Kame Israer-shuar ántar kajerainiak ni ifiarmian nekaamiayi.

¹⁹ Tura Piratu nuna inintrak pujai ni nuarí chichaman akuptukmiayi. “Ju péñker áishmañ súmantikiatniujai pachiiñkiaip. Mesekranam nii áitkiatniun nekaan wáitsan tsawarjai” tímiayi.

²⁰ Túrasha Israer-patri úuntriſha Israer-shuara úuntriſha “Parapás anċant weti, tura Jesus mantamnati” titiarum tusa shuáran akatrarmiayi. ²¹ Apachi akupniurĭ ataksha aniasarmiayi “Ju jimiara áentsun zyana anċant akupkat tusarum wakerarum?”

Tutai “Parapás” tiarmiayi.

²² Tutai aniasarmiayi “Jesusnasha. Yusa Anaikiamurĭ Kristu tuinia nunasha, ċitiurkáttaja?”

Tutai ashĭ “Krúsnum máatá” tiarmiayi.

²³ Tuńiakui Piratu tiarmiayi “ċWarĭ yajauchinia túrait?”

Tutai kakantar untsumuk “Krúsnum máatá” tiarmiayi.

²⁴ Tura Piratu Jesus uwemtikrachminiaitkiui antsu ashĭ shuar charaatum ajainiakui entsa uturtitiarum tusa seamiayi. Tura ashĭ íimiaiainĭ ikijmiak tímiayi “Ju péńker áishman máatniunam wikia pachintsujai. Antsu atumek ístarum.”

²⁵ Tutai ashĭ shuar tiarmiayi “Iik ii shuarjĭjĭi ju áishman máatin íistaji.”

²⁶ Nuyá Piratu Parapásan anċant akupkamiayi. Tura Jesus asutiárum krúsnum máatárum tusa akupkamiayi. ²⁷ Nuyá akupin pujutai jeċanam akupniurĭ suntariĭ Jesusa júkari ashĭ suntaraim irunturarmiayi. ²⁸ Tura pushirĭ áitkiar akupin entsatin kapaċku pushin áentsarmiayi. ²⁹ Múuknúmsha tawaspan jańki najanamun etsemtikiarmiayi. Tura karisun akupniurĭ numirĭa áaniun untsuurĭńi ataksarmiayi. Túrawar wishikiainiak tikishmatrar tiarmiayi “Israer-shuara uunt akupniurĭńime.” ³⁰ Tiar usukiarmiayi. Tura karisun júrkari múuknum awatiarmiayi. ³¹ Tura núkap wishikrar kapaċku pushin áitkiar ni pushirĭń áentsarmiayi. Nuyá krúsnum maatai tusar júkariarmiayi.

Jesusa krúsnum máawarmiania nu

(Márkus 15.21-32; Rúkas 23.26-43; Juan 19.17-27)

³² Jesusa júki wésar Serini nuńkanmaya shuaran, ni naariĭ Semun, Jesusa krúsriń jurukit tusar achikiarmiayi. ³³ Nuyá Kúrkutanam ejeniarmiayi. Kúrkutaka, shuar chíchamjainĭkia, muuka ukunch tútainti. ³⁴ Nuĭ Jesusa umutai yapájai pachimpra najanamun áartaj tusar súsararmiayi. Tura Jesus apas iis umarchamiayi.

³⁵ Krúsnum ajinrurar suntar yáki Jesusa pushirĭń jukit tusar nakurusar awakmakua nuna súsararmiayi. Nújainĭkia yaunchu Yúsnań etserin áarmia nu uminkiamiayi: “Winia entsarmanun akantrarmiayi tura nakurusar awakmakua nuna winia pushirun súsararmiayi.” Tu áarmiayi.

³⁶ Nuyá wáinkiatĭai tusar pujursarmiayi. ³⁷ Tura urukamtaĭ máamuit ashĭ aents nekaawarti tusa áarman muuknumaani anujtukarmiayi. **JUĬTI JESUS, ISRAERA UUNT AKUPNIURĬ**

Tu áarmauyayi.

³⁸ Núnisan Niiĭjai métek jimiara kasa chikichkin untsuurnmanĭ tura chikichnasha menaanmanĭ krúsnum máawarmiayi. ³⁹ Shuar nuĭ nańkaamainiak muuke peċtar wishikiainiak ⁴⁰ tiarmiayi “Ame Yusa Uunt Jee sáakim menaintiú tsawantin jeamtatjai tíchakaitiam. Nekas Yusa Uchirĭńkiúmka krúsnumiá akaikim uwemprata” tiarmiayi.

⁴¹ Núnisan Israer-patri úuntriſha, Israer-shuara jintinniurĭsha, Paríeusha, Israer-shuara úuntriſha, Jesusan wishikiainiak nuamtak tiarmiayi ⁴² “Chikichnaka uwemtikraiti tura Nínĭkĭkia uwemtsui. Israera Uunt Akupniurĭńtkiunĭka krúsnumiá akaikimtai nekas enentáimtusatjai. ⁴³ “Yúsnań nekas enentáimtiniaitjai” tawai. Wátsek, Yus nekas Nin aneakka uwemtikrati. “Wi Yusa Uchirĭńtjai” turamchamkaj” tiarmiayi. ⁴⁴ Kasá shuarsha Niiĭjai ajintruamu armia nusha Nin wishikrararmiayi.

Jesusa jakamuri

(Márkus 15.33-41; Rúkas 23.44-49; Juan 19.28-30)

⁴⁵ Nuyá tutupin ai tee ajasmiayi. Túrunayat ataksha ańku tsáapin ajasmiayi. ⁴⁶ Nuni ai Jesus kakantar untsumkamiayi. “Erĭ, Erĭ, rama sapaktaniĭ tímiayi. Nusha shuar chíchamjainĭkia “Yusrú, Yusrú, ċurukamtaĭ ajapa ikiurĭńiam?” tawai. ⁴⁷ Shuar nuĭ wajarmia nusha nuna enentáimtsuk antukar tiarmiayi “Yaunchu Yúsnań etserniun Eriasan untsuwai.” ⁴⁸ Tura chikichik tsékeńki we uruchin itiamiayi. Tura churuinian ajamper sapapjai iĭiú mukunati tusa susamiayi. ⁴⁹ Tura chikichcha wishikeak tiarmiayi “Iníáísatá, Eriás tarĭ uwemtikratpiash.”

⁵⁰ Jesus ataksha kakantar untsumak nuyá jakamiayi. ⁵¹ Nu chichamaik Yusa Uunt Jee tarach ajamu yakiiniyá achik nuńkaani tseu jaanakmiayi. Nuńkasha úurkamiayi. Kayasha jakukarmiayi. ⁵² Núnisan iwíarsamusha uraniarmataĭ untsurĭ Yus-shuar jákarusha nantakiarmiayi. ⁵³ Nusha emka Jesus nantakmiataĭ niisha nantakiar iwíarsamun ikiukiari Yusa péprurĭń Jerusarénnum wayawarmataĭ untsurĭ shuar wáinkiamiayi.

⁵⁴ Nuyá suntar Jesusan wáinkiar^mia nusha tura ni kapitíántrísha nuńka úurkamtai nuyá chikichcha ashammai ajasmatai ti sapijmiakarmiayi. Tura tiarmiayi “Ju áishman nekas Yusa Uchirinti.”

⁵⁵ Nujša nuwá Jesusan nemariarmia nu, arant wajasar, ii wajaarmiayi. Nusha Kariréanmayá pataatukiar Jesusan yainki ejeniarmiayi. ⁵⁶ Nujai Máktaranmayá Marisha, Sepetéu nuwésha, tura chikich Marisha ármiai. Chikich Marikia Jakupuncha tura Jusenchá nukuríyayi.

Jesus iwiarsamu

(Márkus 15.42-47; Rúkas 23.50-56; Juan 19.38-42)

⁵⁷ Kiaraj shuar ti kuitrintin Arimatéu péprunmayá ni naari Jusé támiayi. Nusha Jesusan enentáiminiuyayi. ⁵⁸ Nii Piratuj we Jesusa ayáshin seamiayi. Nin súsarat tusa Piratu akupkamiayi. ⁵⁹ Túram Jusé Jesusa ayáshin krusnumiá jasa ti péńker tarachjai penuariayi. ⁶⁰ Tura kaya wáá táurmanum yamaram amia nuj iwiarsamiayi. Ni iwiarsatin táumtikramunam Jusé iwiarsamiayi. Iwiaras kaya uuntjai etektuk ikuak wémiayi. ⁶¹ Nujša Máktaranmayá Marisha tura chikich Marísha iwiarsamunam naka ii pujuarmiayi.

Jesus iwiarsamun suntar wáinkiarmania nu

⁶² Nú kiarajin ayampratin tsawantna mash iwiarnakui Israer-patri úuntriśha Pariséusha Piratuj wearmiayi. ⁶³ Tura tiarmiayi “Uuntá, nu wáitrin áishman iwiaaku pujus “Menaintiú tsawant jakan nantaktiatjai” tiniuyi. ⁶⁴ Nu asantai iwiarsamunam menaintiú tsawant suntar wáinkiarat tusa akuptukta. Ni unuiniamurj kashi tariar tura ni ayáshin kasamkar “Pai, nantakni” shuáran tiarajin. Jujainkia nuna nankaamas shuáran ananġawarainti” tiarmiayi.

⁶⁵ Tutai Piratu tiarmiayi “Nuj suntar takakrume. Werum iwiarsamu urakchamnia péńker wáinkiatárum.” ⁶⁶ Tutai wear iwiarsamun urankashti tusar etektukma inġiuñmanum serajai yakarar ni áarmarin anujtukarmiayi. Tura sunarnasha awaj-tukiarmiayi.

28

Jesusa nantakmiari

(Márkus 16.1-8; Rúkas 24.1-12; Juan 20.1-10)

¹ Ayampratin tsawant nanġaasmatai tumiñtin yama tsawaana aj Máktaranmayá Marisha chikich Marijjai iwiarsamu iyutai tusar wearmiayi. ² Tumaj Yusa suntaraj nayaimpinmayá iwiarsamun tari kaya atukamun urak nuj pujusmiayi. Túmakui nuńka ti úurkamiayi. ³ Yusa suntarjsha peemia tímiatrus winchauyayi. Pushirjsha ti puju áuyayi. ⁴ Tura iwiarsamun wáiniarmia nú suntarsha nuna wáinkiar ashamainiak ti kurańkarmiayi. Jaká áinis ajasarmiayi.

⁵ Nuyá nayaimpinmayá suntar nuwan tímiayi “Ashamkairap. Werum krúsnum máawarmia nu eatsrumek. ⁶ Juinġia pujatsui. Nii timia núnisan nantakniuiti. Pai, áepsarma nu ítiarum. ⁷ Wárik wérum ni unuiniamurj “Jesus jakamunmayá nantakni tura wari Kariréanam wétatui. Nuġ werirum wáinkiatárme” titiarum. Wats, nunak tájai” tímiayi. ⁸ Tutai nu nuwá iwiarsamunmayá wárik jinkiar ashamainiayat ti warasar tseġe waketkiarmiayi ni unuiniamurjin ujaktai tusar. ⁹ Tumaj Jesus wantintiukarmiayi. Tura “pujarmek” takui Jesusan tariar tikishmatrar nawencha miniakrusar shiir awajarmiayi. ¹⁰ Túram Jesus tiarmiayi “Ashamprukairap. Werum winia yatsur ujatruktarum. Kariréanam wearti. Nuġ wear wáitkiartatui. Tu ujaktarum” tímiayi.

Suntar etserkarmiania nu

¹¹ Nuwá wéarmatai iwiarsamu wáinin suntarsha péprunam wéar Israer-patri úuntrin ashí túrunamun ujakarmiayi. ¹² Niisha nuna antukar Israer-shuara úuntriġjai áujmatsatai tusar wearmiayi. Áujmatsar suntaran ti kuít akikiar ¹³ tiarmiayi “Atumsha étserkuram “Kashi kanararin ni unuiniamurj taar Jesusa ayáshin kasamkarmai” titiarum. ¹⁴ Tura akupin átum kanarman nekamtaisha niġjai ii iwiarattaji atumin yajauch awajtamśain tusar” tiarmiayi.

¹⁵ Nuyá suntarsha kuitian achikiar tiarmia nuna tímiatrusan titiái tusar wéarmiayi. Tura tuke yamaisha Israer-shuar tu túrunaiti tuńiawai.

Jesus ni unuiniamurjin akatar akupkarmiania nu

(Márkus 16.14-18; Rúkas 24.36-49; Juan 20.19-23)

¹⁶ Nuyá ni auntse (11) unuiniamurj Kariréanam wéarmiayi. Tura Jesus timia nú nainnium jeawar ¹⁷ nuġ Jesusan wáinkiar tikishmatrarmiayi. Kame chikichka Jesusashit tuńiayat Nin wáinkiar tikishmatrarmiayi. ¹⁸ Nuyá Jesus tíjiuch tantá tímiayi “Ashí nayaimpinmasha nuńkasha akupkatniun kakarman surusuiti. ¹⁹ Tuma asantai ashí nuńkanam werum ashí

shuar jintintiarum Wí shuar awajsatarum. Túrarum Yus Apa náaríjaj, Yus Uchi náaríjaj, tura Yus Wakaní náaríjaj imiaitarum. ²⁰ Ashí atumin Wi akatramajrum nu nútiksarmek umiktin ununiartarum. Tura ju nekaatarum: Tuke tsawantaj ikiutsuk atumjaj pujuttajai” tímiayi Jesus.

Yúsan Shiir Chichamen

MÁRKUS aarmia nu

Imiakratin Juan̄ka etserkamuri

(Mateu 3.1-12; Rúkas 3.1-9, 15-17; Juan̄ 1.19-28)

¹ Jui Jesukristunu shiir chicham nan̄kameawai. Jesukristu Yusa Uchir̄inti.

² Yuska imiakratin Juan̄kan pachis ni etserniur̄in Isayasan ti yaunchu ni Papir̄in̄ juna áamtikramiayi:

“Iisiana, ame wéamurm̄in emka wetí tusan winia akatramurun akupejai. Niisha ame jintimin iwiarattawai. ³ Niisha aents atsamunam unsumuk juna títiatui: “Uunta jinti iwiarturtarum; naka awajsatarum.”

Nuke áarmaiti.

⁴ Wats, aents atsamunam imiakratin Juan̄ imiait̄sa pujus étseruk, ““tunaarun Yus asakatrur̄at” tusarum, enentáim yapaj̄ár̄um imiantiarum” tímiayi. ⁵ Anturkatai tusar ashí Jutiá nun̄kanmaya shuar tura Jerusar̄en peprunmaya shuarsha Niin̄ tariarmiayi. Taar, ni tunaar̄in ujakarmatai, Juan̄ Jurtañ entsanam imiainiarmiayi.

⁶ Juan̄sha kamiriu ur̄e najantramun entsauyayi. Emenmamkesha nuapeyayi. Tura chin̄ij̄i yutai-títikriatsnasha yuuyayi. ⁷ Niisha áentsun ujaak tímiayi “Wíj̄iain̄kia nan̄kaamas ana nu winia ukuruj̄ winittiwai. Niisha nekas ii Uuntr̄i asamtai, wikia tsuntsumpruan ni sapatr̄i nj̄nkiamur̄inkisha atitrachminiait̄jai. ⁸ Wikia entsaj̄ain̄ aya ayashmin imiaajrume, antsu Niñkia imiantinia áanis Yusa Wakan̄i atum̄i enentáin̄ en̄ketramprattarme” tímiayi.

Juan̄ Jesusan imiaimiania nu

(Mateu 3.13-17; Rúkas 3.21-22)

⁹ Juan̄ áentsun imiak pujurain̄i, Jesuska Nasarét pepru Karir̄ea nun̄kanam ana nuyá jiinki Juan̄kan tarimiayi. Tura Juan̄ Jurtañ entsanam Jesusan imiaimiai. ¹⁰ Nuñ, Jesus entsaya jiin̄iuk, nayaimpin uranniun wáinkiamiayi. Tura Yusa Wakan̄in̄ yámpitsa núnin najanar Niin̄ taarun wáinkiamiayi. ¹¹ Tura nayaimpinmaya chichaamun juna antukmiayi, “Ámeke winia aneamu Uchiruitme. Ámin shiir enentáimtajme.”

Unt iwianch Jesusan anañkataj̄ tímiania nu

(Mateu 4.1-11; Rúkas 4.1-13)

¹² Nuyá wárik Yusa Wakan̄i Jesusan atsamunam jukimiayi. ¹³ Tura nuj, yajasma yujamunam, kuarenta tsawant pujumiayi. Nuj pujaj̄ uunt iwianch Satanás naartin Jesusan nekapsataj̄ tusa pujurmiayi. Túramtai Jesusan wáinkiat̄ai tusar nayaimpinmaya suntar tariarmiayi.

Karir̄ea nun̄kanam ni takatr̄in̄ Jesus nan̄kammiania nu

(Mateu 4.12-17; Rúkas 4.14-15)

¹⁴ Ukunam, Juan̄kan sepanam enkeawarmatai, Jususka Karir̄ea nun̄kanam Yusa akupeamur̄in̄ pachis shiir chichaman etserki támiayi. ¹⁵ “Tsawant jeayi. Shuarum Yusa akupeamur̄i jeatemai. Tuma asamtai, yaunchu enentáimsamuram yapaj̄ár̄um, Uwempratin Chicham umirkatarum” tu etserkamiayi.

Jesus namakan achinian ni unuiniamur̄i ajasat tusa kuaru achikmiania nu

(Mateu 4.18-22; Rúkas 5.1-11)

¹⁶ Jesus Karir̄ea antumian̄ka kánmatkar̄in̄ wekas, namakan achinian Semun̄nasha ni yach̄i Antresnasha nekan ajuntut̄ pujuinian wáinkiamiayi. ¹⁷ Wáiniak “Nemartustarum, tímiayi. Namak achiar̄mena nútiskanak áentsun-ēgu Yusna arti tusan awajsatjarme” tímiayi. ¹⁸ Tura nuyañka ni nekar̄in̄ ajapa ikiuiniak Jesusan nemarsarmiayi.

¹⁹ Nuyasha Jesus ishichik arantach wesa, Sepet̄eu uchir̄in̄ Jakupun ni yach̄in̄ Juáñnasha kanunam ni nekar̄in̄ apáa pujuinian wáinkiamiayi. ²⁰ Wáiniak, nemartusta tusa unsumukarmiayi. Tutai ni apar̄in̄cha, ni apar̄i takarniur̄in̄cha kanunam ikiuiniak Jesusan nemarsarmiayi.

Jesus iwianchin̄ áishman̄numiā j̄iiki akupkamiania nu

(Rúkas 4.31-37)

²¹ Nuyá Kapernáum péprunam jeawarmiayi. Nuj Israer-shuara ayampratin tsawantr̄i jeakuí Jesus Israer-shuar iruntainiam wayá Yus-Chichaman unuiniamiayi. ²² Tura ni jintinniur̄i jintintiar̄mia nuna iniañkas uunt chichamj̄ai Jesus jintiakui ni chichamen anturkar̄ ti enentáimprarmiayi. ²³ Nuñsha nu iruntainiam áishman̄ iwianchr̄uku ámiayi.

Niisha untsumuk ²⁴ “¿Warí itiertamkattsamea incha taum, Nasarénumiá Jesusa? Wikia nékajme. Ámetme Tunaartichu Yúsaiya winiamna nu. In emestamprataj tusam táchamek” tímiayi.

²⁵ Tutai, Jesus kakantar chicharuk “Takamátsatá. Ni enentáiya jiiinkitia, tájame” tímiayi.

²⁶ Tutai iwianch áishmankan ukurak ajakniñkiar untsumak kakaar aa jiiinkimiayi. ²⁷ Nuna wáinkiar, ashamak nuámkan aniniáisarmiayi. “¿Ausha warinkit. Yamaram chicham warí chichamait? Ju Jesuska timiá kakaram asa imia iwianchin akupeatsuk. Iisiana umirainiat-suk” tiarmiayi. ²⁸ Tura ti wárik nu túrunamu ashí Kariréa nunkanam antunkamiayi.

Jesus Semunka tsatsarín tsuármiania nu
(Mateu 8.14-15; Rúkas 4.38-39)

²⁹ Nuyá Israer-shuara iruntai jeenia jiiinki Jesuska Jakupujai Juanjaisha we, Semun ni yachi Antresjai pujuarmia nu jeawarmiayi. ³⁰ Semunka tsatsari tser peaknum jaa tepemiayi. Núnaka wárik Jesusan ujakarmiayi. ³¹ Nuñkia Jesus weri uwejnun achik iniantkimiayi. Tura nu chichamaik michatramiayi. Michatar, péñker ajas, Jesusnasha ni nemarniuríncha ayurawarmiayi.

Untsurí jaan Jesus péñker awajsarmiania nu
(Mateu 8.16-17; Rúkas 4.40-41)

³² Nu tsawantai kjarai, ashí jáinian, iwianchrukuncha Jesusan itiararmiayi. ³³ Tura ashí nú pérunmaya shuar taar wáitiniam Jesusan káutkarmiayi. ³⁴ Untsurí shuáran chikich sunkuraim jáinian Jesus tsuararmiayi. Tura iwianchruku armia nuna enentáiyán iwianchin jiiirkarmiayi. Jesuska iwianch nékamu asa, winia náarun ántar pachisarain tusa suritkarmiayi.

Kariréa nunkanam Jesus Yus-Chichaman etserkamiania nu
(Rúkas 4.42-44)

³⁵ Nuyá kashin káshik tsawaatsain Jesus nantaki Yusan áusataj tusa jiiinki atsamunam wémiayi. ³⁶ Tura Semun ni amikrijiai Jesus wemaanum wéarmiayi. ³⁷ Nin wáinkiar “Ashi shuar Ámin eátmainiawai” tiarmiayi.

³⁸ Tutai Jesus chichaak “Chikich pérunmasha arantach wetai. Nuí Yusa chichame etserkatai; nuna túrattsan táwitjai” tímiayi.

³⁹ Nuna ti ashí Kariréa nunkanam Israer-shuar iruntai jeanam etseras wekaimiayi; tura núnisan iwianchniasha jiiiki akupkini wekaimiayi.

Tunamaru shuaran Jesus tsuármiania nu
(Mateu 8.1-4; Rúkas 5.12-16)

⁴⁰ Túramtai, ti tunamaru shuar Jesusan seatajtsa tarimiayi. Taa tikishmatar tímiayi “Wakerutakmeka tsuaratin tujintratsme.”

⁴¹ Jesus nin waitentak uwejejai antiñmiayi. Antiñ “Wakerajme. Péñker ajasta” tímiayi. ⁴² Nu chichamaik, Jesus chichakmatai, ni sunkurí menkakamiayi. Tura péñker ajasmiai. ⁴³ Túrunamtai Jesus kakantar chicharuk ⁴⁴ akupeak “Wáinkiatá, náñkamsam etseraip, tímiayi. Antsu weme, Israer-patirmin iniakmamsata. Túram ashí aents ame péñker ajasmarumin nekaawarat tusam, Muisais aar akupkamiania nu umikiam súsatin ana nu susata” tímiayi. ⁴⁵ Tura etserkaip támaitiat, jiiinki ni túrunamurín mash etseramiayi. Tura nuna etserka asamtai, pérunam, aents írunmanum wéinian Jesus nakitramiayi, antsu aa atsamunam pujumiayi. Tura ashí nunkanmaya Jesusan tariarmiayi.

2

Jesus emearun péñker awajsamiania nu
(Mateu 9.1-8; Rúkas 5.17-26)

¹ Kapernáum pérunam Jesus ukunam ataksha wémiayi. Jeamtai, ni jeen pujan nekaawarmiayi. ² Tuma asamtai shuar wárik ti untsurí káutkarmiayi. Ti untsurí asamtai, jea piakmiayi; wáitinmasha ankantchauyayi. Jesuska Yus-Chichaman nu aentsun ujaak pujurmiayi. ³ Nuñkia ni amikrín emearun kuaru shuar tampumpuwar júkiar Jesusan itiararmiayi. ⁴ Tura jeawar, untsurí shuar írunu ásamtai jea wayatniun tujinkarmiayi. Tuma ásar, yakininj wakar jea urakar, áankawar, tampunam ni amikrín Jesus pujamunam awaintuawar itiararmiayi. ⁵ Tura niisha Jesus nekas tsuáratui tu enentáimmiarín Jesus nekáa emearun chicharuk, “Uchirú, ame tunaarumka tsankuramuítí” tímiayi.

⁶ Israer-shuara jintinniurísha nuna antúu pujuarmiayi. Tura ni enentáijiai enentáimsar, ⁷ “¿Jusha urukamtai emearun tu chichara? Yusan imiá yajauch chicharuí. Warí, yaki tunaan asakarminiait; aya Yúsak tunaan asakarchamniakait” tu enentáimsarmiayi.

⁸ Jesuska ni enentáimmiarin nekarawar “¿Urukamtia átum tu enentáimprum? tímiayi. ⁹ Emearu, tunaarum tsankuramuuti títinjai, emearu, wajakim tampuram entsakim wekasata títinjai ¿tuá imiá yúpichuchit? ¹⁰ Wats wi, Aents Ajasu asan Yusa kakarmarjijai shuara tunaari tsankuramniaitjiana nuna paant iwiaintiuktajrume” tímiayi. Nuna tinia emearun chicharuk ¹¹ “Wajaktia, tájame; túram tampuram jukim jéemjin wetá” tímiayi. ¹² Nu chichamaik emearu wajakí, tampurin jukí, ashí ímiainiajn jínkimiai.

Nuna túrunamtai ashí ashamkarmiai. Tura “jútikiamu penké wáinchaitji” tiar Yusa náarin uunt awajsarmiai.

Jesus Riwin untsukmiania nu

(Mateu 9.9-13; Rúkas 5.27-32)

¹³ Nuyá ukunam Jesus antumiannum waketkimiai. Tura ashí shuar káunkarmatai jintintiwarmiai. ¹⁴ Tura jintintiwaw amuk, akupin akitiai jeanam nankaamak, Arpeu uchirin Riwin pujan wáinkiami. Wáiniak “Nemartusta” tímiayi. Tutai Riwi wajakí Jesusan nemarsamiai. ¹⁵ Chíkich tsawant, Riwishá Jesusan ni jeen itiaamiai. Tura untsurí kuítian-juu shuarsha, yajauch shuarsha Jesusjai ni unuiniamurjijaisha ashí nuim misanam pujuarmiai. ¹⁶ Tura kuítian-juu shuarsha yajauch shuarsha Jesusjai irunar yurumánian wáinkiar, Pariséu jintinniurjisha Israer-shuara jintinniurjisha Jesusa unuiniamurin aniasarmiai. “¿Urukamtai ame úntrum Jesus, kuítian-juu shuarjai tura yajauch shuarjaisha yuruma?” tiarmiai.

¹⁷ Jesus nuna antuk tímiayi “Jaachu shuar tsuákratniun atsumainiatsui. Antsu jaa ana nu tsuákratniun atsumainiawai. Wats, “pénkeraitjai” tuinia nú shuaran untsuktajtsan táchaitjai; antsu “tunaitjai” tuinia nú shuaran Winia ajasat tusan untsuktajtsan táwitjai” tímiayi.

Yurumtsuk Yus áujsatniun Jesusan aniasarmiania nu

(Mateu 9.14-17; Rúkas 5.33-39)

¹⁸ Juanka unuiniamurjisha Pariséu unuiniamurjisha yurumtsuk Yúsán áujarmiai. Túmakui chíkich shuar Jesusan tariar chicharainiak, “Juanka unuiniamurjisha, Pariséu unuiniamurjisha yurumtsuk Yúsán áujainiatsuk; ¿ame unuiniamurmeka urukamtai yurumtsuk áujainiatsu?” tiarmiai.

¹⁹ Tutai Jesus chichaak, “¿Nuatma nampernum ipiaamu ainia nu ijiarmawartiniak ainia? Yama nuatu pujakui ni amikri warainiak ijiarmachartin ainia. Núnisan winia unuiniamur; Wi pujakui, warainiak yurumtsuk pujuschartin áiniawai. ²⁰ Tura tsawant jeattawai, Winia jurukiartin. Nuínkia winia unuiniamur ijiarmawartatui’ tímiayi Jesus.

²¹ Tura nuyá juna tímiayi ‘Mamuru pushí jaanakmatai yamaram tarach anujtukchatniuti. Túramka nijiam yamaram tarach sumpeak mamushan chiníá nuna nankaamas jáaktatui. ²² Nijiamanch yamá nawar nuap najanam arutnum yaraachminiati. Túramka wakaprúa kariak nuap najanam ijiakratniuti. Tura nijiamanch ukarattawai. Nuap najanam yajauch ajastatui. Antsu yamaram nijiamanch yamaram nuap najanamunam yaraatniuti” tímiayi.

Trikiu nerén yuawarmiania nu

(Mateu 12.1-8; Rúkas 6.1-5)

²³ Chíkich ayampratin tsawantai Jesus ajanman ajapén nankaamarmiai. Tura ni unuiniamurj trikiu nerén majukiarm wearmiai. ²⁴ Nuna wáinkiar Pariséu Jesusan chicharainiak “¿Wari, urukamtai ame unuiniamuram ayampratin tsawant takastin surimkiamu ajsha takainia?” tiarmiai.

²⁵ Tutai Jesus tímiayi “Ii uuntri Tawitia túramuri Yús-Papinium áujshukaitrum. Niisha ni nemarniurjisha tsukamainiak, ni yurumkarí atsakui, túrawarmia nu áujshukaitrum. ²⁶ Apiatár Yusnan pujurniu uuntri pujaí Uunt Tawit Yusa jeen wayamiayi. Tura Tawitkia, patri nankaamas uunt asa, pátrichuitiat, iniaktusma tantan, aya patri yútainiak, yuamiayi; tura ni nemarniurjinchá ajamsamiayi. Nu áujshukaitrum, tímiayi. ²⁷ Ayampratin tsawantai túrashtinian umirkashtimpiash tusa Yuska aentsun najanachmiayi. Antsu aents ayamprarat tusa Yus ayampratin tsawantan tesamiayi. ²⁸ Wishá, Aents Ajasu asan imia ayampratin tsawantan Nerenniurintjai” tímiayi.

3

Uweje jakan Jesus tsuármiania nu

(Mateu 12.9-14; Rúkas 6.6-11)

¹ Ataksha chíkich tsawantai Israer-shuar iruntainiam Jesus wayamiayi. Nuí shuar ámiayi, ni uweje jaka. ² Tura tunán túrayi titiai tusar wakeruiniak “ayampratin tsawantai tsuártimpiash” tusar, Pariséu shuarsha Jesusan ii pujuriarmiai. ³ Nuínkia Jesus uweje jaka

shuaran chicharuk “Ajapén wajašta” tímiayi. ⁴ Nuiñkia mamikmaun chicharuk “¿Ayampratin tsawantaj péñker túratin yajauch túratniujaj tuá imiá péñkerait?” tímiayi.

Nuna takui niisha pachisharmiayi.

⁵ Tura Jesus kajek nin iyarmiayi; tura ni enentáin kátsuram ášarmatai kúntuts enentáimsamiayi. Tura shuáran chicharuk “Uwejem iniakmasta” tímiayi. Iniakmasmatai ni uweje jaruku ataksha péñker ajatsamiayi. ⁶ Nuyá Pariséu shuar jíinkiar, Jesus maami tusar Ertutis shuarjaj áujmatsarmiayi.

Untsurí shuar Jesusan káutkarmiania nu

⁷ Nuyá Jesus ni unuiniamurijjaj antumiañnum wémiayi. Kariréa nunñkanmaya untsurí shuarsha Jesusan nemariarmiayi. ⁸ Untsurí nunñkanmayasha káunkarmiayi. Jutía nunñkanmayasha, Jerusarén péprunmayasha, Itiumiá nunñkanmayasha, Jurtañ entsa amainiasha, Tiru tura Setun pepru pujuinia nú nunñkanmayasha, untsurí shuar ni túramurín nekaawar, Jesusan káutkarmiayi. ⁹ Untsurí káunkar chanuntawarajñ tusa Jesus ni unuiniamurín kanuram inianástarum tusa seamiayi. ¹⁰ Kame untsurí shuaran Jesus nuik tsuaru asamtai, jaa shuar nuí káunkarmiania nu Jesusan antintaj tusar shitianainiakui nuna seamiayi. ¹¹ Tura iwianchrukusha Jesusan wáinkiar tikishmatrarmiayi. Untsumainiak “Ame nekas Yusa Uchirínme” tiarmiayi. ¹² Tura nuna etserkairap tusa Jesuska kakantramiayi.

Jesus tuse shuaran anaikiarmiania nu

(Mateu 10.1-4; Rúkas 6.12-16)

¹³ Nuyá Jesus náinnium wakamiayi. Tura anaikiatniun wakerimia nú shuaran untsukmiayi. Tura niisha Jesusan weriarmiayi. ¹⁴ Tura Niiñjaj wekasar Yus-Chichaman unuinartinian tuse shuáran anaikiarmiayi. ¹⁵ Tura sunkar tsuártinian, iwianchcha jíiki akupkatniun ni kakarmarín súarmiayi nú shuaran. ¹⁶ Ju shuáran anaikiamu ármiayi; Semun, Jesus chíkich naarin Pítiur apujtushmania nu; ¹⁷ Sepetéu uchirí Jakupu, ni patai Juáñsha; ípiamtajaj métek kakaram ášarmatai nuna mai “Puanérjis” naari susamiayi. Nusha shuar chichamjainkia “ípiamta nuke” tawai. ¹⁸ Nuyá Antressha, Jiripi, Parturumí, Mateu, Tumas, Arpeu uchirí Jakupu, Tateu, ásump Semun, ¹⁹ Jutas Iskariúti. Jesusan ukunam surukmia nú Jutasauyayi. Anaik amukmatai jeá waketrarmiayi.

Yusa Wakanñ yajauch chicharna nu

(Mateu 12.22-32; Rúkas 11.14-23; 12.10)

²⁰ Waketkiarmatai, ti untsurí shuar taarmatai takatrí ti akui, yurumátniun jeacharmiayi. ²¹ Jesusa shuáñsha nuna nekaawar Jesus ti ititurchat pujus wáurtsuash tu enentáimsar jukitai tusar nu jeañam jeariarmiayi.

²² Nuyá Israer-shuara jintinniurí Jerusarénnumiá táarmiania nu, Jesusan áujmatainiak “Pirsepu enkea asa iwianchrukuiti. Tuma asa uunt iwianchi kakarmaríjjaj iwianchin jíiki akupeawai” tiarmiayi.

²³ Tutai Jesus winitiarum tusa nin untsukmiayi. Tura enentáimtikrataj tusa juna tímiayi: “¿Iwianch Satanáskesha ititur ajapmamatiñ? ²⁴ Chikichik nú nunñkanmaya shuar nuámtak kajernaiyakuñkia, nu nunña wari meserchattawak. ²⁵ Nuámtak shuar ni shuaríjjaj kajernaiyakuñkia nu shuarsha amunaikchartauak. ²⁶ Núnisan ¿Satanáskesha ni suntaríjjaj máaniakka ititurak tuke pujusarat? Amunaikiartatui. ²⁷ Náñkamas shuar kakaram shuara jeen wayá, nérenniun jinñkiatsuk ni kuítrín kasarkachminiaiti. Antsu nérenniun jinñkia ni kuítrín kasarkamniaiti. ²⁸ Nekas tájarme, shuar tunáa ashí túruiniana nuka tsañkuramniaiti. Winiaasha winia Aparnasha yajauch áujmatusha tsañkuramniaiti. ²⁹ Antsu Yusa Wakanñ yajauch áujmatna nuka tsañkurachminiaiti; antsu nu shuar niñki tuke sumamattawai.” ³⁰ “Jesuska iwianchrukuiti” tuiniakui Jesus nuní tímiayi.

Jesusa yachí Jesusa nukurí

(Mateu 12.46-50; Rúkas 5.19-21)

³¹ Nuyá ni yachí ni nukuríjjaj taar aq wajasar, Jesusan untsukat tusa akupkarmiayi. ³² Shuar Jesusan téntak pujuarmia nu tiarmiayi “Iis, nukusha, yatsumsha aq wajasar untsurmainiawai.”

³³ Tutai Jesus chichaak “Ya ainia winia nukursha yatsursha” tímiayi. ³⁴ Nin téntakar pujuarmia nuna iis “Júiti winia nukurka, yatsurka, tímiayi. ³⁵ Shuar Yusa wakeramurín uminiana nu winia yatsuruuti, winia umaruuti, winia nukuruuti” tímiayi.

4

Atsaamin atsaampramiania nu

(Mateu 13.1-9; Rúkas 8.4-8)

¹ Nuyá jiinki antumianka yantamen Jesus ataksha unuiniartinian juarkimiayi. Tura untsurj shuar iruntrarmatai, kanunam enkempramiayi. Shuarsha antumianka káanmatkarin pujuarmiayi. ² Jesuska métek-taku chichamjai ti jintintiarimiayi. Jintintiuuk juna tímiayi: ³ “Antuktarum. Atsaamin atsaamprataj tusa jínkimiai. ⁴ Atsaamkui ni arakri jintiá iniararmai. Chínki yakiyá káutkar yuawarmai. ⁵ Chikichcha kaya írunmanum iniararmai, nunka ishichik ámanum. Tura nunka ishichik asamtai wárik tsapainiarmai. ⁶ Tura etsa etsantar sukuám kancape atsa asamtai káararmai. ⁷ Chikichcha janjí nupanam iniararmai. Jankisha tsapainiar kankar ajakrarmai; túram nereckharmai. ⁸ Chikichcha pénger nunkanam iniararmai. Tura tsapainiar nereckharmai, chikich trainta, chikich sesenta, chikich sian nereckharmai. ⁹ Kuíshim ákuinikia antuktarum” tímiayi.

(*Mateu 13.10-17; Rúkas 8.9-10*)

¹⁰ Untsurj wearmatai, ishichik Niijjai juakarmiania nu, ni tuse unuiniamurijjai ani-armiayi “¿Ame jintintiamna nusha warimpiait?” tiarmiayi.

¹¹ Tutaí Jesus chichaak “Yuska ni akupeamurj in atumin paant nekamtikramattsa wakerutmarme. Antsu chikich shuarka aya métek-taku chichamjai jintintiawartatui. ¹² Íniyatayá wáinkicharat tusa, antukarsha nekaacharat tusa, umirtsuk ni tunaarj tsankurnacharat tusa túrattawai” tímiayi.

(*Mateu 13.18-23; Rúkas 8.11-15*)

¹³ Tura tímiayi ‘Wi jintintiajrumna nú métek-taku chicham nekaachurmek. Nu nékachkurmeka ¿itiurak chikich métek-taku chichamsha nekaatarum? ¹⁴ Atsaamnua nuka Yus-Chichaman étserna nuna nakumui. ¹⁵ Jínkiái jintiá iniaarua nuna chikich shuar ántuiniaman nakumui. Nu shuar chichaman ántuiniawai. Tura antukarmatai Satanás wárik tari ni enentáin atsaampramun jurawai. ¹⁶ Chikich shuar ántuiniamu kayanam atsaampramua núniskete. Niisha chichaman antukar wárik warainiak umiktasa wakeruiniawai. ¹⁷ Tura ni kancape atsakui, aya ishichik katsuiniawai. Tura ukunam, Yus-Chichaman wakeruiniakui shuar kajeram tura chikich itiuurchatan wáinkiar Yúsaiya kanainiawai. ¹⁸ Chikich ántuiniamuka janjí nupanam atsaampramua núniskete. Nu shuar Yus-Chichaman ántuiniawai. ¹⁹ Ántuiniayat ju nunkanam ana nuna ti páchinawai. Tuma ásar kuítian tura shiirmachin ti takustinian wakeruiniawai. Nú wakeramu ni enentáin Yus-Chicham ana nuna kankar emenkatui. Tuma asamtai nerektinian tujintiainiawai. ²⁰ Tura chikich ántuiniamusha pénger nunkanam atsaampramua núniskete. Nú shuarsha Yus-Chichaman antukar umiiniawai. Tura nerenawai, chikich shuar trainta, chikich shuar sesenta chikich shuar siansha nerenawai.’

Uukma ana nu paant nekanattawai

(*Rúkas 8.16-18*)

²¹ Nuyá Jesus juna tímiayi ‘¿Shuar shiripkin ekeemak itia pitiaknum enkeattawak. Peaknum wakenam ikiustatuak? Atsa. Antsu misanam ekentsashtinkiait. ²² Núnisan ashí uukma ana nu ukunam paant nekanattawai. Tura núnisan yamá ishishmasa chichas-masha ukunam paant nekanattawai. ²³ Kuíshim ákuinikia antuktarum.’ ²⁴ Tura nuyá tímiayi ‘Ántarmena nu esetrarum enentáimsarum antuktarum. Urutá péngerak enentáimsatarum, núnisan Yuska ámin nekaatniun suramsattarme, tura nú nukap patatramsattarme. ²⁵ Tuma asamtai shuar núkap takakna nu patatnastatui. Antsu chikich shuar ishichik takakuk jurunkittawai.’

Yusa akupeamurj júnisaiti

²⁶ Nuyá Jesus chichaak juna tímiayi ‘Yusa akupeamurj júnisaiti. Shuar jínkiain atsaampratniua núniskete. ²⁷ Jínkiáin atsaamar, untsurj kanar, tsawar, uruksanpi tusa nákwai. Tura itiuura tsapainia núnaka nékatsui. ²⁸ Kame jínkiái nunkanam inít aku níñki tsapaatsuk; emka nukareawai, nuyá tuyureawai tura nujamar katsuawai. ²⁹ Túruna káakmatai júuktin tsawant jeyai tusar júiniawai.’

(*Mateu 13.31-32; Rúkas 13.18-19*)

³⁰ Ataksha Jesus tímiayi ‘¿Yusa akupeamurj warijaink’ nakumkataj. Warijaink’ métek-takuit? ³¹ Mustasa jínkiái araamua nujaj métek-takuit. Nu jínkiáisha ashí nankaamas ishitiupchichiti. ³² Tura araam tsapaj ashí nankaamas uunt ajawai; tura tsenkeakmarjsha kámpuram asamtai nuj minkintranam chinikisha shiir ayamainiawai.’

(*Mateu 13.34-35*)

³³ Núnisañ Jesus untsurí métek-taku chichamjaj Yus-Chichaman ujaamiayi. Nii nekaat-niun jearmia nunak ujaamiayi. ³⁴ Chíkich shuaran aya métek-taku chichamjaj ujaamiayi; antsu ni unuiniamurijjaj Ninñi pujus ashí paant jintintrarmiyai.

Nasencha, entsanacha Jesus imijiámmia nu
(Mateu 8.23-27; Rúkas 8.22-25)

³⁵ Nu tsawantaj etsa akaikimtai Jesus ni unuiniamurijn chicharainiak “Entsa amain katintai” tímiayi. ³⁶ Tutai kanunam enkemprarmiyai. Chíkich shuarnaka káanmatkanam ikiukiari Jesusan kanunam pujan júkiarmiayi. Chíkich kanunmayasha atampriarmiayi. ³⁷ Tura nasesha ti nasenkatasanañkammiayi; chíchimi kanunam yarána piáktasa ajamiayi. ³⁸ Jesuska kanú senkarin atamprus kanúu tepemiayi. Tura, ni unuiniamurij Jesusan ishintiaki chicharuk “Uunta ii wayajnia júka pachitmatmek” tiarmiayi.

³⁹ Tutai Jesus nantaki nasen kakantramiayi. Entsanacha chicharuk “Takamatsata. Miaku ajasta” tímiayi. Tutai nasesha menkakamiayi, entsasha miaaku ajasmiayi. ⁴⁰ Túrunamtai Jesus ni unuiniamurijn chicharainiak “¿Urukamtai ashamarum? Itiura Yus nekas enentáimatsrum” tímiayi. ⁴¹ Tura imía ashamainiak “¿Maa júsha yait? Nasesha entsasha nin umirainatsuk” tunaiyarmiayi.

5

Jataranmayan iwianchrukun Jesus tsuármiania nu
(Mateu 8.28-34; Rúkas 8.26-39)

¹ Nuyá antumiañ amaini Jataran nunkanam jeawarmiayi. ² Jesus kanunmayá jiinkimtai áishman iwianchruku, shuar jakáa iwiarainiumiá wárik taa Jesusan inkiunmiayi. ³ Nu shuar iwiarainium tuke pujuyayi. Tura jirujajinkia nin jinkiaatniun tujinkiararmiayi. ⁴ Jirujaj nawenmasha, uwejnumsha tuke jinñkiau ármiai. Túramaitai jinkiaarman tsuriari tepet-tepet awajmiayi. Tura ti kakaram asamtai nin nupetkachminiuyayi. ⁵ Tuke tsawajsha káshisha, iwiarainiumsha murasha kayajaj ijumak untsumúu wekainiuyayi. ⁶ Tura yajayan wáiniak Jesusan tseke tarimiayi; tura tikishmatramiyai. ⁷⁻⁸ Túrunamtai Jesus chicharuk “Iwianchiá, ni enentáiya jiinkitia, tájame” tímiayi.

Takuí iwianch kakantar chichaak “¿Winiasha urukamtai tarutniun, Uunt Nañkaamaku Yusa Uchirij Jesúsá? Yus iirmanum wáitkiarsaip, tájame” tímiayi.

⁹ Takuí Jesus tímiayi “¿Ame náarmesha yait?”

Tutai niisha ayak “Untsurí ásar wikia Untsurí-suntar tu anaikiamuitjai” tímiayi.

¹⁰ Nuna tí amik, nu nunkanmayá akuptukajñ tusa Jesusan ti seamiayi. ¹¹ Nuñsha nainiun nuntumas untsurij kuchi shushunmak matsamarmiayi. ¹² Tuma asamtai, kuchiniam enkemátin tsañkatrukta tusar Jesusan seawarmiayi.

¹³ Tuiniakui Jesus “ayu” tímiayi. Takuí iwianch áishmanñkajniá jinñkian kuchiniam enkemáwarmiyai. Kuchisha ti untsurij, jimiará mir (2.000) áchiawash. Ashí mash nánatanam iniaawar antumiannum iniañkarmiayi. Nuñsha entsá kñakar jakerarmiayi.

¹⁴ Túrunamtai kuchin wáinin pisarar péprunmasha shuarnumsha nuna etserarmiayi. Tuma asamtai iyutai tusar ashintiukarmiayi. ¹⁵ Túrawar Jesúsaj jeawarmiayi. Jeawar áishman yaunchu iwianchrukun yamaika péñker ajasun pushirin entsar puñjan wáinkiararmiayi. Wáinkiar ashankarmiayi. ¹⁶ Tura wakеткиar kuchi túrunamuncha iwianchruku péñker ajasmancha mash etserkarmiayi. ¹⁷ Tuma asamtai ni nunkeya jiinki wetá tusa seawarmiayi. Jesus kanunam enkemamtai áishman nuik iwianchruku amia nu Jesusan chicharuk ¹⁸ “Wi Ámijaj tuke tsaniñkian wekasatjai” tímiayi.

¹⁹ Tura núnaka Jesus suritkiarmiayi. “Antsu ame jeemijn, áminiurmijn weme, ashí Uunt Yus túrutma nu tura waitnentrampra nusha ujakarta” tímiayi.

²⁰ Tutai áishmanñsha wémiayi. Tura antsu Tekapuris nunkanam Jesus nin péñker awajsamia nuna ashí shuaran ujakmiayi. Nu nunkanmayá shuarka nuna antukar ti enentáimprarmiyai.

Jimiará jaan Jesus tsuármiania nu
(Mateu 9.18-26; Rúkas 8.40-56)

²¹ Ataksha Jesus kanujaj katinmatai, aents untsurij Nin irunturarmiayi. Jesuska antumianka káanmatkarj wajamiayi. ²² Tura Israer-shuar iruntaj jea náampruku, ni naarj Jairu, támiayi. Taa, Jesusan wáiniak, piniakum tepersamiayi. ²³ Piniakumar ti seak, “Winia nawantur jarutui. Winitia, túram péñker ajasat tusam uwejmijjaj antintrukta. Nuñkia jarutkashtatui” tímiayi.

²⁴ Tu tímiatai Jesus nijjaj wémiayi. Tura untsurij shuar wena ásar Nin chánuarmiayi.

²⁵ Nuñ pachitkia nuwá ti jaa wémiayi. Niisha tuse uwí numpan ajapeak wáitias pujuyayi.

²⁶ Ti untsurij tsuakratin nincha iisu armiyai. Tura iyamsha ti wáitias pujuyayi. Tura

ni kuútríncha ashí ajapaitiat tsuámarchauyayi; antsu tsuamsha nu arant ajauyayi. ²⁷ Nu nuwasha, Jesus túramun antuku asa, ni ukuurinj amainiã ni pushirín antinmiayi. ²⁸ “Wi aya ni pushirín antiñnaka péñkerapi ajasaintjia” tu enentáimiar túramiayi. ²⁹ Tura Jesusa pushirín antiñ nú chichamaik numpa ajapman menkakamiayi. Péñker ajasman ayashijn nekapramiayi. ³⁰ Tura nuñ Jesúska, ni kakarmarjijai tsuarman nekappampramiayi. Tura nuna nekáa, ayantar chichaak “¿Yaki winia pushirun antintruca?” tímiayi.

³¹ Tutaí ni nuñiamurj tiarmiayi, “Untsurj Ámin antinmainiasha ¿Urukamtaí “yaki winia antintkia” tame?”

³² Tura Jesus, yaki túruta tusa ashí ímpramiayi. ³³ Nuñkia nuwasha, ni ayashin túruna nuna nekáa, ti ashamak kuraimiayi. Tura Jesusan jearj tikishmatrmiayi. Tura ni túrunamurín ashí paant ujakmiayi. ³⁴ Takui Jesus nin chicharuk “Nawantru, Winia nekas enentáimtursa asakmin, péñker awajtamsaitme. Shiir wetá, tura tuke péñker pujusta” tímiayi.

³⁵ Tura Jesus nuna tuke chichas pujaj, iruntai jea uuntri jeeniã tariarmiayi. Tariat chicharainiak “Ame nawantrum jakayi. ¿Urukamtaí Unuikiartin tuke itit awajsatam?” tiarmiayi.

³⁶ Tura Jesuska, nii tiarmia nuna ántayat, núnaka pachitsuk, iruntai jea uuntrin chicharuk “Ashamkaip; áyatik nekas enentáimtursata” tímiayi. ³⁷ Tura Niijjai wétinian aya Pitruncha, Jakupuncha ni yachj Juanjai tsankatkarmiayi. ³⁸ Iruntai jea uuntri jeen jeawar, áentsun charaatum ajainian, útainian untsumuk ajainiancha Jesus wáinkiamiayi. ³⁹ Tura nuwäch penké jakan nekayat, wayá nin chicharuk “¿Urukamtaí timiá úutrum, tura wa wa ajarum? Nuwäch jákachi, antsu kanarai” tímiayi.

⁴⁰ Nuna takui wishikrarmiayi. Tura Jesus ashí jjiir akupkarmiayi. Áyatik nuwächj aparín, nukuríncha tura Niijjai táaruncha nuwächj tepamurín jukimiayi. ⁴¹ Tura wayawar Jesuska nuwächj uwejen achik tímiayi “Taritia kumi.” Nusha shuar chichamjainkia “nawantrú nantáktiá” tawai. ⁴² Nuwäch tuse uwí takakuya nu, nú chichamaik nantaki wekasamiayi. Túramtaí nuj pujuarmiania nu ti enentáimprarmiayi. ⁴³ Jesuska chichaak “Atumsha penké etserkairap” tímiayi. Tura “nuwäch ayuratarum” tímiayi.

6

Jesus Nasarétnum pujusma

(Mateu 13.53-58; Rúkas 4.16-30)

¹ Jesus nuyá jjiñki ni nunken waketkimiayi. Ni unuñiamurjsha nemariarmiayi. ² Nujsha ayampratín tsawant jeamtaí Israer-shuar iruntainiam wayá unuñiamiami. Tura Jesusan anturkarmiania nu ti enentáimsarmiayi. “¿Jusha tuj unuñiaruit. Ni nekaatniuríncha yaki susait. Tura aentsti tujintajnia nuna Niisha itiurak tura? ³ Jusha karpintiruchukait; Maríi uchirínchukait. Ni yachjsha Jakupusha, Jusesha, Jútassha, Semunsha nékatsjik. Tura ni unajsha juí iijjai pujuñiatsuk” tiarmiayi. Túrawar Nin nekas enentáimtustinian tujinkiarimiayi.

⁴ Túrasha Jesus nin chicharuk “Yúsnan etserniun chikich nunkanmayaanka shiir anturaini-awai. Antsu ní nunkeyanaka, ní shuarsha anturainiatsui” tímiayi.

⁵ Tura nujsha, ni nunkenkikia aentsti tujintiamun túratniun tujinkiamiayi. Antsu jaancha aya ishichik ni uwejejai antiñ tsuármiayi. ⁶ Tura nekas enentáimtacham “¿Urukamtaí nusha?” tu enentáimsamiayi.

Nuyasha chikich péprunam wayá, chikich péprunam wayá Yus-Chichaman unuñiakní wekaimiayi.

Yus-Chicham etserkatarum tusa Jesus ni unuñiamurj akupkarmiania nu

(Mateu 10.5-15; Rúkas 9.1-6)

⁷ Tuse unuñiamurj untsuk jímiarchik jímiarchik werum Yus-Chicham etserkatarum tusa akupkarmiayi. Tura iwianchin nupetkarat tusa ni kakarmarjín súsarmiayi. ⁸ Tura chicharuk “jintiá yurumátmiusha jukiirap, uyuntrumíncha kuitcha enkearum jukiirap. Antsu aya áanik mashtun jukiirum wetarum. ⁹ Sapat uwekatarum, tura entsartincha jímiar jukiirap, tímiayi. ¹⁰ Tura jea wayarmena nuñ pujustarum; pujá-pujakuarum nuyá chikich peprunmasha wetarum. ¹¹ Tura nánkamas aents atumin awaintiamainiachkuisha, anturtamainiachkuisha, nuyá jjiñkirum, nu shuar yajauch ániawai tusarum, atumí nawe nunka akakekrum ikiiktuarum. Kame Yus áentsun nekapsattana nú tsawant jeamtaí, nu shuarnaka asutiattawai. Sutuma péprunmaya shuarjai tura Kumura péprunmaya shuarjai nankaamas nin asutiattawai” tímiayi Jesus.

¹² Nuyá Jesusa unuñiamurj jíñkiar enentái yapajjar Yúsai enentáimtumartinian etserkarmiayi. ¹³ Tura iwianchruko enentáiyá iwianchin jíñki akupkarmiayi, tura asutiijjai yakarak untsurj jáinian tsuararmiayi.

Juanka jakamuri
(Mateu 14.1-12; Rúkas 9.7-9)

¹⁴ Jesusa náarín tura ni túramurín ashí aents áujmatin ásarmatai, uunt akupin Erutis nuna antukmiyai. Erutiska “Imiakratin Juán jakamunmaya nantakni. Tuma asa ti kakaram takaawai” tímiyai. ¹⁵ Tura chikich shuar “Eriásaiti” tiarmiiai. Chikichcha “Yúsan etserniuiti, yaunchu etserniuya núkete” tiarmiiai. ¹⁶ Erutis nuna antuk “Nekas Juánkaiti. Ni muuken tsupikínian akupkamiyai nu, jakamunmaya nantakniuiti” tímiyai. ¹⁷⁻¹⁹ Kame Uunt akupin Erutis, ni yachj Jiripi nuarín nuatkamiyai. Nu nuwá naarj Jirutiasaiti. Juansha uunt akupniun Erutisan chicharuk “Yatsumi nuarj akintrukchatniuitme’ tímiyai. Tutai nuwá Jirutías Juánkan ti kajerkamiyai. Tura Juánkan máataj tusa wakerimiyai. Túrasa uunt akupin Erutis nuna surimkiamiyai. Antsu Juán achikrum sepunam enkeatarum tusa akupkamiyai. ²⁰ Juansha tuke enentáijjai Yusa jintin wekainiuyuyai. Erutis, ni esetar enentáimniun neka asa Juánkan ashamak Jirutías wakeramurín túrawajin tusa suritkiamiyai. Kame Erutis Juán etserman nékachuítat antuktinian wakerimiyai.

²¹ Jirutías, itirak máawaj tu pujai, uunt akupin Erutis, ni akiiniamu tsawantrj jeamtai, ni suntaríncha, Kariréa nunkanmaya úuntríncha, kuítrintin armia nunasha untsukar, namperan najanamiyai. ²² Nujsa Jirutías nawantrj wayá jantsemámtai Erutis tura níijjai nampernum matsarmia nusha shiir enentáimsarmiiai. Túramtai uunt akupin nuwáchin chicharuk “Ame wakeram nu seattia. Wi amastatjai. ²³ Nekas tájame, ashí ame seatmena núnaka amastatjai. Wats, seatkumniñkia takakjana nuna jímiapetek nakakan, amastatjai” tímiyai.

²⁴ Tutai nuwách jiinki ni nukurín Jirutíasan chicharuk “¿Wariniak seattaj?” tímiyai.

Tutai “Imiakratin Juanka muuke seata” tímiyai.

²⁵ Nu chichamaik nuwách wari wayá Erutisan chicharuk “Yamaikia uunt amamkunam Juanka muuken wakerajai” tímiyai.

²⁶ Nuna takui uunt akupin ti kuntuts enentáimpramiyai. Tura níi tiniu asa ni amikrj matsatainia nu antukaru ásarmatai surimkiatniun tujinkiamiyai. ²⁷ Tuma asa uunt akupin Juanka muuke itiat tusa ni suntarín wárikmas akupkamiyai. ²⁸ Túramtai suntar wari we, sepunam Juanka muuken tsupikmiyai. Tsupik, amamkunam itia, nuwan susamiyai. Túram achik ni nukurín susamiyai. ²⁹ Juán maamun antukar ni unuiniamurj ni ayashin iwiarsatai tusar júkiarmiiai.

Senku mir áishmankan Jesus ayuramiania nu
(Mateu 14.13-21; Rúkas 9.10-17; Juán 6.1-14)

³⁰ Tura Jesusa unuiniamurj Nii akupkarma nu, ataksha waketki káunak irunturarmiiai. Ashí níi túrawarmia nuna, unuinarmia nunasha ujakarmiiai. ³¹ Tura untsurj shuar táiniakui, níisha ankant ajastinniasha yurumátniuncha tujinkiarimiyai. Tuma asamtai Jesus chichaak “Iijjai wemí aents atsuiniamunam; nuj ishichik ayamprarmi” tímiyai. ³² Nuyá Jesus ni unuiniamurjjai kanunam enkemprar, aents atsuiniamunam jeatai tusar jíinkiarimiyai. ³³ Túrasa shuar ni wéenan wáinkiarimiyai. Tura “Jesusaiti” tiarmiiai. Tuma ásar ashí péprunmaya untsurj shuar tseke ashintiukar, ni jeatniunam nákakarmiiai. ³⁴ Jesus kanunmaya jiinki ti untsurj aents iruntrar matsatun wáinkiamiyai. Murik péñker wáinchataiya núnisan matsatu ásarmatai Jesus nin wáitnentrarmiiai. Tura núkap unuiniamurj. ³⁵ Nuyá kjakui ni unuiniamurj Jesusan tariar chicharainiak “Atsamunam pujatsjik; tura yamá kjatsuk. ³⁶ Shuar wari akupkarta. Tíjiuch péprunmasha, shuarnumsha wearti, ni yurumkarj sumarmakarati” tiarmiiai.

³⁷ Tutai Jesus chichaak “Atumek ayuratarum” tímiyai.

Tutai “Ísha ju shuar ayuratai tusar, ¿jimiara sian kuitjai yurumak sumaktai tusar wétinkiaitai?” tiarmiiai.

³⁸ Tura Jesus ni unuiniamurj chicharainiak “Tanta takakrum nu iistarum ¿urutmak aa?” tímiyai.

Tutai nekapmarar chichainiak “Tántaka séñkuchikiiti, tura namaksha jímiarchikiiti” tiarmiiai.

³⁹ Tutai Jesus tímiyai “Ju shuar chírichriniam pujusarti tusar akupkatarum.” ⁴⁰ Ankant ankant sian siansha, senkuenta senkuenta iruntrar matsamsarmiiai. ⁴¹ Jesuska senku tantancha, jímiar namaknasha jusa, yakí nayaimpinmaaní íimias Yúsan yuminsamiyai. Tura yurumkan púurmiyai. Puur ni unuiniamurj súsarmiiai. Namaknasha puur súsarmiiai, ashí shuáran ajamsarat tusa. ⁴² Ashí yurumáwar ejemarmatai, ⁴³ puunaruncha, namak ampirmancha achikar, tuse chankinian áimkiar júkiarmiiai. ⁴⁴ Nu yurumkan ti untsurj yurumáwarmiiai. Aya áishmankak senku mir (5.000) ármiai.

Jesus entsá pátakek wekasamiania nu
(Mateu 14.22-27; Juán 6.16-21)

⁴⁵ Nuyá Jesus ni unuiniamurĭn chicharainiak “Kanunam enkemprarum, katĭnkrum amain émaa ajatarum, Petsaitia péprunam. Wisha ju shuaran áujšan ikiuktiatjai” tímiayi. ⁴⁶ Shuáran áujas ikiuki Yusjaj chichastaj tusa náinnium wémiayi.

⁴⁷ Tura kirit ajasmanum kánuka antumiannum ajapén nanammiayi. Jesuska niŋki juakmiayi. ⁴⁸ Jesusa unuiniamurĭsha wia-wiantainiakua ti pimpikiarmiayi, nase tukumma ásar. Nuna Jesus wáiniak tsawřartin ishichik ajasmatai entsá pátask wekas nin jeariarmiayi. Tura nanċaamaktiasa wea núnisan wémiayi. ⁴⁹ Jesus entsá wekaan ni unuiniamurĭ wáinkiar, wakanchashit, tu enentáimprarmiayi. Túrawar ti untsumkarmiayi. ⁵⁰ Ashí wáinkiar ti ashamkarmiayi. Tura Jesus wárik nin chicharuk “Kakaram ajastarum, wíitjai Jesus; ashamprukairap” tímiayi. ⁵¹⁻⁵² Nuŋkia entsaya kanunam waka enkempramiayi. Túramtai nasésa majaantmiayi. Ni unuiniamurĭnkia enentá kiritia áintsan ásar matai Jesus yurumkan núkap awajsamia nuna paant nekaatniun tuke tujinkiar miayi. Tuma ásar yamá túrunamu itirak aankia tusar ti enentáimprar sapijmiakarmiayi.

Jinisarĭtinniumĭ shuáran Jesus tsuármiania nu
(Mateu 14.34-36)

⁵³ Nuyánka katĭnkjar, Jinisarĭt núŋkanam jeawarmiayi. Jeawar kanun ajujmiarmiayi. ⁵⁴ Kanunmaya ĵintrar matai, nu nuŋkanmaya shuar Jesusan nekaawarmiayi. ⁵⁵ Tura “Jesus pujawai” táman antukar, ashí jeanmaya jaan ni peakrintiuk Jesus pujamunam itiaarmiayi. ⁵⁶ Tura Jesus wekaak wémiya nuŋsha, péprunmasha, shuar matsatmanumsha, ishichik matsakamunmasha jaan itiarĭn jintiá áeprusarmiayi. Túmainiak Jesusan pushirmin antĭntaj tusar seawarmiayi. Tura ashí antĭnkjarmia nuka péŋker ajasarmiayi.

7

Jesus Pariséun áujmatsarmiania nu
(Mateu 15.1-20)

¹ Pariséusha, Israer-shuara jintinniurĭsha Jerusarĕnnumĭa Jesusan tariarmiayi. ² Tura Jesusa unuiniamurĭn ikijmiatsuk yurumun wáinkiar “Israer-shuara túrutairĭn túruiniatsui” tiarmiayi. ³ (Kame Pariséusha, tura ashí Israer-shuarsha, ni uuntrĭ jintintiamurĭn umikiar ti núkap ikijmiarar yurumin ármiai. ⁴ Péprunmaya tari “ikijmiatsuk yurumáshtiniati” tiniu ármiai. Tura ti untsurĭ ni uuntrĭ túrutairĭ núnisan ármiai. “Tsapancha, ichinŋasha, ĵiruncha, peaknasha niĵiakartiniati” tiniu ármiai.) ⁵ Tuma asamtai Pariséusha, Israer-shuara jintinniurĭsha Jesusan chicharainiak “ĵUrukamtai ame unuiniamuram ĵi uuntrĭ jintintramniuitaj nuna túruiniats. Urukamtai ikijmiatskesha yurumáinia?” tiarmiayi.

⁶ Tutai Jesus tímiayi “Ántar chichamtiniatrume. Isayas yaunchu nekas atumin áartampriamiayi ĵuna:

Ju aents ni wenejaj Winia “ti péŋkeraiti” turutainiawai, tímiayi Yus, tura ni enentáinkia jeachat puĵiuniawai. ⁷ Tura tukeneas Winia shiir awajtuuniawai. Aentsu chichame jintiainiyat, “Yus-Chichamaiti” tuĵniawai.”

Tu áarmaiti. ⁸ Tura átum Yusa chichame iniaisarum, aentsu jintintiamurĭ umirkarum, ichinŋasha, tsapancha niĵiaktin, tura chĭkich túrutaisha áintsarmek untsurĭ túrarme. ⁹ Túrákrum Yus-Chichamka tsukintiaani ikiusurme atumi uuntrĭ chichame umirkatai tusarum. ¹⁰ Kame Muisais yaunchu aar ĵuna tíchamka:

Ame apa nukusha shiir enentáimtustarum.

Tura ataksha áarmiayi:

Shuarsha ni aparĭn, nukurĭncha yajauch chichareakka, nu shuar jákatniuiti.

¹¹⁻¹² Túrasha átumka Pariséutirmeka, antsu ju tárume: “Shuar ni aparĭn ni nukurĭn chicharuk “Wĭ yáintinian takakjana nu Kurpanaiti” takuŋkia, atumsha péŋkeraiti, aparĭncha nukurĭncha yáinċatĭ” tarume. (Kurpan tana nuka, Yus susamu, tawai.) ¹³ Nekaatarum, Pariséutiram. “Ĵi yaunchu uuntrĭ chichame tuke umiki wétniatĭji” tákurum, Yus-Chicham peŋké ántar chichama núnin awajearme. Núnisrumek chikichcha untsurĭ túrarme.” Tu tímiayi Jesus.

¹⁴ Nuyá ataksha Jesus ashí shuáran untsukar “Mash anturtuktarum, ashí nekaatarum, tímiayi. ¹⁵ Aaya ayashnium wayaana nu, shuáran yajauch awajsaminiati; tura antsu ni enentáiniá ĵiinia nu, yajauch awajsettawai. ¹⁶ Shuar nuna ántakka enentáimprati” tímiayi.

¹⁷ Nuyá áentsun ikuiak, jea wayamtai, ni unuiniamurĭ aniasarmiayi “ĵNu métek-taku chicham warintia?” tiarmiayi.

¹⁸ Tutai Jesus tímiayi “Atumsha nékatsrumek. Páantchakait; yurumak yúajnia nu, enentáiniam wayaċhu asa, shuáran yajauch awajsaminiati. ¹⁹ Antsu wakenam wayá, nanċaamas meŋkaatsuk” tímiayi. Nuna taku, ashí yurumak páchitsuk yuamniati, tímiayi. ²⁰ Nuyá tímiayi “Shuara enentáiniá ĵiinia nu, yajauch awajsamniati. ²¹ Shuara enentáiniá, iniatĭ, yajauch enentáimsatniusha, tsanĭrmatniusha, natsa tsanĭrmatniusha,

shuar máatniusha, ²² kasamkatniusha, chikichna wakeruktincha, péñkercha túratniusha, anañkatniusha, natsantain átincha, yajauch enentáimtustincha, tsanumpratniusha, waantu enentáimtumastincha, netse túratniusha, ashí nuka initiã wininiatsuk. ²³ Ashí nu tunáa ainia nu, shuara enentáiniã jiniu asa, shuáran yajauch awajainiawai” tímiayi.

Serupinísianmaya nuwã Jesusan nekas enentáimtusmiania nu
(Mateu 15.21-28)

²⁴ Tiru pepru, Setún péprusha Serupinísia nunkanam ámiayi. Nuka Israer-shuara nunkenchauyayi. Nu nunkanam Jesus wémiayi. Tura jeá, jeá wayáa pujusmiayi. Tura nuñ pujamun nu nunkanmaya shuar nekarawarain tusa nakitmiayi; túrasha uumkatniun tujinkiamiayi. ²⁵ Wárik nu nunkanmaya nuwã Jesus pujan nekaamiayi. Nu núwaka nawantrj iwianchrukuyayi. Tuma asa Jesusan tarí ni nawen piniuch tepersamiayi. ²⁶ Nu nuwã Israer-shuarcha, Serupinísianmayayuyayi. Túmaitiat, nawantru enentáiyã iwianchin jjiirturkitia tusa Jesusan seamiayi. ²⁷ Tutai Jesus nuwan chicharuk “Uchi emka ejemaratí. Uchi apatkurj atankir yawach súsatin péñkerchaiti” tímiayi.

²⁸ Tutai nuwã ayak “Nekas, Uunta, tame. Tura yawachisha misanam wakenam pujuinia nu, uchi apatkun yurumuk juyumak kákeamun yuñiatsuk” tímiayi.

²⁹ Tutai Jesus tímiayi “Péñker tame. Tuma asam, shiir wetá; ame nawantrumj enentáiyã iwianch jiiinkiyi” tímiayi.

³⁰ Takui niisha wémiayi. Tura ni jeen jeá, ni nawantrjn íwianch jiiinkimtai péñker ajas peaknum tepan wáinkiamiayi.

Jesus empekun tsuármiania nu

³¹ Jesus Tirunmaya jiiinki Setún péprunam nankaamarkutak, Tekapuris nunkanmaani nankaamaki, Kariréa antumiañnum ataksha jeamiayi. ³² Nuñ chichachu ámiayi, kuishjn empeku. Nu shuáran Jesusan itiarar, ni uwejejañ antinikiat tusa seawarmiamiayi. ³³ Shuar matsatmanumiã Jesus nin akanki juki kuishjn tsara uwejejañ tsutsukruamiayi. Tura usukia, nu shuara iniãñ antintkiamiayi. ³⁴ Tura nayaimpinmaanñ ímias súkaska mayati “Epata” tímiayi. Nuka, shuar chichamnumka “chinkiatí” tawai. ³⁵ Nu chichamaik ni kuishjsha chinkiamiayi, iniãjsha séermiayi. Tura paant chichasmiai. ³⁶ Tura Jesus chicharainiak “Penké etserkairap” tímiayi. Jesuska suri-suritiamaitiat, nu nankaamas et-seriarmiayi. ³⁷ Tura ti enentáimprarmiayi. Enentáimprar, “Ju Jesus aya péñkeran túrawai. Empekuncha ántumtikniaiti, tura chichachun chichamtkniaiti” tiarmiayi.

8

Kuattru mir shuáran Jesus ayuramiania nu

(Mateu 15.32-39)

¹ Nu tsawantáñ shuar timiã untsurj iruntrararmiayi. Yurumkarj atsakui Jesus ni unuiniamurjn untsukar juna tímiayi: ² “Ju shuáran waitnentajai. Menaintiú tsawant Wijjaj pujuinia ásaratai ni yurumkarj amuukachaik. ³ Tura ni jeen ayurtsuk akupeamka, tsukarain jintiã pimpikiartatui, yajaya káunkaru ásar” tímiayi.

⁴ Tutai ni unuiniamurj chichainiak “Túrasha juñ atsamunan, ju aents ejemaratat tusa çtuyá yurumkak wáinkiatatj?” tiarmiayi.

⁵ Tutai Jesus nin aniasmiayi “¿Urutmã tanta aa?”

Tutai “siati awai” tiarmiayi.

⁶ Nuñkia ashí áentsun “nunká pujustarum” tiarmiayi. Tura tantan achik, Yúsan yuminsamiayi. Tura puuk, áentsun ajamsatarum tusa ni unuiniamurjn susamiayi. ⁷ Tura uchich namaksha ishichik aan achik, Yúsan yuminkias, ni unuiniamurjn chicharuk “Jusha shuar ajamsatarum” tímiayi. ⁸ Turam ashí yurumáwar ejemarmarmiayi. Ampirma púnaruncha siati chañkinnium áimkiarmiayi. ⁹ Kuattru mir (4.000) shuar yurumáwarmiayi. Yurumáwar amikiarmatai, Jesus nin áujas akupkarmiayi. ¹⁰ Tura ni unuiniamurjijai kanunam enkempr Tarmanúta nunkanam wearmiayi.

Pariséu Jesusan iniakmasta tiarmiania nu

(Mateu 16.1-4; Rúkas 12.54-56)

¹¹ Pariséu Jesusjaj áujmatsatai tusa tariarmiayi. Nekapsatai tusa wakeruiniak Nin chicharuk “Nayaimpinmaya kakaram iniakmasta” tiarmiayi.

¹² Tuñiakui Jesus kúntuts enentáimias, súkaska mayati “¿Urukamtai, yamaiyã aentstiram, nayaimpinmaya kakarman iniakmasat tusaarum wakerarum? Nuka penké sunaschat-tarme, paant tájarme” tímiayi.

¹³ Nuyá nin ikiukiar ataksha kanunam enkemar amain katiñmiayi.

Pariséu túramurjijai aneartarum, tímiayi Jesus

(Mateu 16.5-12)

¹⁴ Tura ni unuiniamurj yurumak kujitai tukamá kajinmatkiarmiayi. Kanunmaŋka aya chikichik tantanak takaku ármiayi. ¹⁵ Jesussha ni unuiniamurj enentáimtikuiuk tímiayi “Wáinkiatarum; Pariséusha Erutissha wakaprutain takakainia nújajsha aneartarum” tímiayi.

¹⁶ Tutai ni unuiniamurjsha tunaiyarmiayi “Tanta kajinmatkin asakrin nuna túramtsujash” tiarmiayi.

¹⁷ Tura Jesus nuna nekáa chichaak “¿Urukantai aya yurumkak enentáimtarum? Tuke nékatsrumek. Peŋké enentáimtsurmek. Atumí enentái tuke kiritkiai? tímiayi. ¹⁸ Jimi ajsha itiura wáintsurmea. Kušhim ajsha itiura ántatsrum. Ashí kajinmatkintrumek. ¹⁹ Nekaatarum, nuik, seŋku tantan púuran seŋku mir áishmaŋkan ayurachmakaj. ¿Tura ampirma urutmá chaŋkinnium chumpiamarum?” tímiayi.

Niisha tiarmiayi “Tuse chaŋkinnium chumpiamji.”

²⁰ Ataksha Jesus tímiayi “Tura siati tantajaj kuartru mir shuaran ayurantai, ¿ampirmasha urutmá chaŋkinnium chumpiamarum?”

Niisha “siati” tiarmiayi.

²¹ Tuma asamtai Jesus tímiayi “¿Itiura imiá nékatsrum?”

Jesus kusurun ímtiksamiania nu

²² Nuyá Petsaitia péprunam jeawarmiayi. Jeawarmatai, áishmaŋ jji kusurun Jesusan itiararmiayi. Túrawar antiŋta tusar seawarmiayi. ²³ Tuma asamtai Jesus uwejnnum achik péprunam aani enkeki jukí jjin usukjjijai kuérmiayi. Tura uwejéjaj antiŋ “¿ímmeke?” tímiayi.

²⁴ Tutai kusuru ími tímiayi “Aentsun iyajaj, túrasha paantcha. Numi wekainian áaniun iijajaj” tímiayi.

²⁵ Nuyá ataksha Jesus ni uwejéjaj kusuru jjin antiŋmiayi. Tura kusurusha úmamkes iis, péŋker ajas, ashí paant ímprimiayi. ²⁶ Jesus chichaak “Jeemjin weakum péprunam wayawaip tura shuar ujakaip” tímiayi.

Pítur Jesusan “Yusa Anaikiamurinme” tímiania nu

(Mateu 16.13-20; Rúkas 9.18-21)

²⁷ Jesus ni unuiniamurjjijai uunt pepru Sesaria-jiripiuam jeatsuk, tjjuuch uchich péprunam irasarmiayi. Jintiá wésar Jesus ni unuiniamurj chicharainiak, “¿Yaiti turutaini-awa Winia?” tímiayi.

²⁸ Tutai niisha áimkiarmiayi “Chíkich chichainiak, imiakratin Juankaiti, turamainiawai. Chíkichcha, Eriasaiti, tura chíkichkia, yaunchu Yúsnan etserin nantakniua núiti, turamaini-awai” tiarmiayi.

²⁹ Tutai Jesus tímiayi “Atumsha, ¿waritrume. Yáitij?” tímiayi.

Tutai Pítur tímiayi “Ámeke Krístuitme; Yúsaiya akupkamuitme.”

³⁰ Tutai Jesus chichaak “Peŋké etserkairap” tímiayi.

Jesus ni jákatniurj ujakmiania nu

(Mateu 16.21-28; Rúkas 9.22-27)

³¹ Unuiniaik: “Wi Aents Ajasuitjiana ju ti wáitsatniuitjai. Israer-shuarti ii uuntriŋsha, Patri úuntriŋsha, ii jintinniurjsha Winia nakitrurar mantuawartatui. Túrasha menaintiu sawant naŋkaasmatai nantaktinaijtai” tímiayi. ³² Nunasha paant ujakmiayi.

Tura Pítrusha Jesusan arantach jukí kakantramiayi. “Tu chichasaip” tímiayi.

³³ Tutai Jesus ayantmatar; ni unuiniamurj iis, Pítrun kakantar chicharuk “Satanása, weruma. Ámeke Yusna ana nu enentáimtsme, antsu aya áentsnak enentáimtame” tímiayi.

³⁴ Nuna tuasua amik tura nuj matsamarmia nunasha, ni unuiniamurjcha untsuk tímiayi, “Shuar Winia nekas nemartustasa wakerakka ni wakeramurjŋkia iniaisati; tura ni krusj yanakj nemartustí. ³⁵ Kame shuar ju nuŋkanam aya niŋki anenmamkunka nu shuar ni iwiaakmarj emeŋkattatui. Antsu Winia anentu asa tura winia chichamprun anea asa, shuar aya péŋker pujustinniak enentáimtsuna nu, nekas iwiaakman wáinkiatawai. ³⁶ Nekaata, shuar ashí ju nuŋkanam írúnna nuna sumaksha túrasha ni wakanj jinium wéakuisha, ¿itiurak péŋker pujusaint? ³⁷ Shuarka wakanj uwentikratay tusa wakerak ¿urutmak akikmakaint? ³⁸ Antuktarum. Yamaiya aents Yúsnan nakitjar ajapawaru yaucha ainia nu ímiainiamunam shuar Winia natsantrakuŋkia tura winia chichampruncha natsantrakuŋkia, wi, Aents Ajasuitjiana ju, winia Aparu kakarmarjjijai tura nayaimpinmaya péŋker suntarjaj atak taakun, nú shuaran natsantrattajaj Wisha.’ Tu tímiayi Jesus.

9

¹ Ataksha Jesus nin chicharuk, ‘Nekas tájarme, shuar játsuk Yus ni kakarmarjjijai aentsu enentáin akupkattana nú tsawantan wáinkiatatna nu ju iijijai pujuiniawai’ tímiayi.

Jesus nusháa iira ajasmiania nu

(Mateu 17.1-13; Rúkas 9.28-36)

² Nuyá sais tsawant nan̄kaamasmatai, Jesus Pítruncha, Jakupuncha, Juáñnasha uunt náinnium júkiarmiayi. Nuiŷha Jesus nushá iira ajasmiayi. ³ Ni pushir̄isha ti puju j̄iitsumir ajattsarmiayi. Nujai métek puju awajsatin ju nun̄kanam atsawai. ⁴ Túruna nuĵ Eriás, Mui-saisjai wantinkiar Jesusjai chichainian wáinkiarimiayi. ⁵ Nuyasha Pítiur Jesusan chicharuk “Uuntá, ii juĵ pujustin ti péñkeraiti. Menaintiú áakmaktai, Áminiu chikichik, Muisaisna chikichik, Eriásnasha chikichik” tímiayi. ⁶ Jesusa unuiniamurĵ sapijmainiak, Pítiur wariniak titi nekaachmiayi. Nékachu asa nuna tímiayi.

⁷ Tura yurañkim tara mikintiu awajsamiayi. Yurañminmaya chichaak “Júiti winia aneamu Uchir. Nii anturkatarum” tímiayi.

⁸ Nuyanka ni unuiniamurĵ ayantmar iiyaj tukamar aya Jesusnak wáinkiarimiayi. Chikichkia atsuarmiayi.

⁹ Nuyá náinniumia akainiak Jesus nin chicharuk “Wáinkiarumna nu etserkairap. Wi, Aents Ajasuitjiana ju jakamunmaya nantaatsain nu etserkairap” tímiayi.

¹⁰ Tutai ni tímian ímíatrusan úukarmiayi. Tura “jakamunmaya nantaatsain tana nu, ¿wariniak ta?” nuamtak tunainiarimiayi. ¹¹ Tura Jesusan aniasarmiayi “¿Urukamta Israerti ii jintinniur̄isha, Eriás emka tátiniati, tuinia?” tiarmiayi.

¹² Tutai Jesus tímiayi “Nekas Eriás ashí iwiarattsa emka tátiniati. ¿Tura Aents Ajasunun Yus-Papinium warintua?

“Ti wáitsattawai; Nin nakitrartatui.” Tu áarmaiti.

¹³ Wi tájarme, Eriás nekas táwiti. Támatai, shuar ashí ni wakeriarmia nuna nin túrawarmiayi. Yusa Papir̄in Eriása túrunatniurĵ aarma amia tímiatrusan túrawarmiayi” tímiayi Jesus.

Jesus iwianchin j̄iki akupkamiania nu

(Mateu 17.14-21; Rúkas 9.37-43)

¹⁴ Tura ni unuiniamurĵ matsatmanum atak wáketuk, ti untsurĵ aents káutkar Israer-shuara jintinniur̄isha niijjai tunai pujuinian wáinkiamiayi. ¹⁵ Tura aencha, Jesusan wáinkiar warainiak, tséñki weriar, áusarmiayi. ¹⁶ Túrunawarmatai, Jesus chicharainiak, “Warí tunaiyarum?” tímiayi.

¹⁷ Tutai chikichik ayak “Uuntá, winia uchirun Ámin itiarjame. Iwianchruku asa chichachuiti. ¹⁸ Túmakui iwianch en̄kemtakun paat ajar áepeawai; túram uchisha saun kaput apak naĵin kátetete awajeawai. Túram kakaakcha ame unuiniamurmin seamjai, j̄irtukti tusan, túrasha tujin̄trutkarai” tímiayi.

¹⁹ Tutai Jesus tímiayi “Yúsan enentáimtichutirmea urutmá tsawantak pujustaj atumjai. Urutmá katsun̄trataj! Uchi itiatarum” tímiayi. ²⁰ Takui uchin Jesusan itiararmiayi. Tura íwianch uchin en̄kemta Jesusan wáiniak uchin ajakramiayi. Uchisha chichiptur nun̄ká inaian péper-péper ajakin wenunam saun apakmiayi.

²¹ Túrunamtai Jesus ni aparĵin aniasmiayi “¿Urutá yaunchu áinkiait?”

Tutai ni aparĵ tímiayi “Uchichik áinkiaiti. ²² Tuma asa tuke jutikiú pujurniuiti; jiniumsha apeawai, entsá maataj tusa ajuawai. Yaintrukminiaitkiumka waitneasam yaintrukta” tímiayi.

²³ Tutai Jesus chicharuk “¿Urukamta, yaintrukminiaitkiumka, tame? Nekaata, shuar Winia nekas enentáimturna nu ashí túramniaiti” tímiayi.

²⁴ Tutai uchi aparĵ kakantar chichaak, “Uuntá, nekas enentáimtajme. Nekas enentáimtustinian táasjana nu yáintkiata” tímiayi.

²⁵ Tura shuar untsurĵ káunainian Jesus wáiniak kakantuk “Empeku chichachu awajin iwianchi j̄inkitia, tájame. J̄in̄kim ataksha wayawaipia” tímiayi. ²⁶ Tura iwianch j̄iniuk unsumak uchin we-werkasa ajakar chichichiptu áepkimiayi. Túram uchi jaka ímanis tepemiayi. Túrunamtai untsurĵ shuar “jakayi” tiarmiayi. ²⁷ Tánanak Jesus uwejen achik awajkimiai, tura uchi nantaki wajakmiayi.

²⁸ Tura Jesus jeá wayamtai, niñki pujusar, ni unuiniamurĵ aniasar “¿Urukamta iisha j̄iktin̄ tujinkiamaj?” tiarmiayi.

²⁹ Tutai Jesus tímiayi “Ju iwianchkia ijjarmar Yus áujkur j̄iikminiaiti” tímiayi.

Jesus ataksha ni jákatniur̄in ujakmiania nu

(Mateu 17.22-23; Rúkas 9.43-45)

³⁰ Nuyá j̄inkiar Kariréa nun̄kanmaani nan̄kaamakarmiayi. Ni unuiniamurĵin unuinia asa nu nan̄kaamamun nekaawarain̄ tusa Jesus nakitmiayi. ³¹ Unuiniak juna tímiayi: “Wi Aents Ajasuitiaj juna mantamnati tusar achirkar surutkartatui. Tura máamuitiatnak, iwíarsamunmagan menaintiú tsawantaj nantaktiatjai” tímiayi. ³² Tura nu chichaman nekaacharmiayi. Nékaiaichiat, anintrustinian arantukarmiayi.

“¿Yaki imiá nan̄kaamantuit?”

(Mateu 18.1-5; Rúkas 9.46-48)

³³ Nuyá Kapernáum péprunam jeawarmiayi. Tura Jesus jeá pujus ni unuiniamurjn aniniak, “¿Atumsha jintiá winisrum warí áujmatmiarum?” tímiayi. ³⁴ Tura natsarar pachis-charmiayi. Kame jintiá wésar “iijjaj ¿yaki imiá nankaamantu ajasat?” tunainiarmiayi. ³⁵ Ni unuiniamurj pachischarmatai, Jesus pujus ashí tuse unuiniamurjn irur chichaak “Shuar nekas nankaamantu ajastajtsa wakerakka, peejchachia nuke enentáimtumar shuara yáintri atí” tímiayi. ³⁶ Tura uchin itíáa miniakas chichaak: ³⁷ “Shuar uchin winia naaruj shiir awajeakka Winia shiir awajatawai. Tura Winia akuptukua nunasha shiir awajeawai” tímiayi.

“Shuar in nakitramachkunka in páchitkiawai”

(Rúkas 9.49-50; Mateu 10.42)

³⁸ Nuyá Juan Jesusan chicharuk “Uuntá, shuar ame náarmin pachis iwianchin akupea wainkiamji. Tura iijjaj írutkachu asamtai nu túratin suritkiamji” tímiayi.

³⁹ Tutai Jesus tímiayi “Antsu suritkiairap. Shuar winia náarun pachis tujinkiamun túrakka, nu shuar warí tsanumprutatniun tujinkiattawai. ⁴⁰ Shuar in nakitramachkunka, in páchitkiawai, tímiayi. ⁴¹ Winia nemarka asakrumin shuar yumiichinkesha ajampramkuka ántar túratsui; akikma átatui” tímiayi.

(Mateu 18.6-9; Rúkas 17.1-2)

⁴² Tura shuar ju uchin Winia umirtuinia nuna yajauchin túrumtikiamtáinkia, ti asutniattawai. Tuma asamtai uchin yajauchin túrumtiktsáin kuntujen kayajaj jinmiar nayaantsanam ajunmaka maak ainti. ⁴³ Ame uwejmek yajauchin túrumtikramamniaitkuinkia tsupikta. Mai uwejtuk wáitsatniunam jeatniujajinkia chikichik uwejjaj ju nunkanam pujusar tuke iwiaaku pujustinnium jeatin ti shiiraiti. Warí, wáitsatniunmanka ji kajinkiashtin awai, ⁴⁴ jákaru akarisha jáiniatsui tura jisha tuke kapaawai. ⁴⁵ Nawemsha yajauchin túrumtikramamniaitkuinkia nusha tsupikta. Mai nawentuk wáitsatniunam jeatniujajinkia chikichik nawejaj ju nunkanam pujusar tuke iwiaaku pujustinnium jeatin ti shiiraiti. Wáitsatniunmanka ji kajinkiashtin awai, ⁴⁶ jákaru akarisha jáiniatsui tura jisha tuke kapaawai. ⁴⁷ Jimisha yajauchin túrumtikramamniaitkuinkia ukuinkia. Mai jiiintiuk wáitsatniunam jeatniujajinkia chikichik jijijaj ju nunkanam pujusar Yus akupeana nu jeatin ti shiiraiti; ⁴⁸ wáitsatniunmanka jákaru akarisha jáiniatsui tura jisha tuke kapaawai.

⁴⁹ Naman Yus susamu weaktinia áintsan aentstirmesha jijjaj nekarnastatrum. ⁵⁰ Weesha ti penkeraitiat michumarka, ¿itiurak jea-jeat áting? Wats, wee jeakua áintsarmek atumek shiir enentáimtunastarum” tímiayi Jesus.

10

Nuwá ajapatniun Jesus áujmatsamiania nu

(Mateu 19.1-12; Rúkas 16.18)

¹ Jesus Kapernáummiáj jiiinki, Jutiá nunkanam nankaamaki, Jurtañ entsa amain jeamiayi. Nu jujaj, aents ataksha Nin irunturarmiayi. Iruntrarmaiti tuke túrin asa ataksha unuiniamiyá. ² Tura Pariséu Jesusan nekapsatai tusar wakeruiniak, Nin chicharainiak “¿Áishman ni nuarj ajapatin tsankekamukait?” tiarmiayi.

³ Tutai Jesus tímiayi “¿Muisais wariniak timia?”

⁴ Tutai “Papijjaj in ajapatniun tsanekatramkamiaji” tiarmiayi.

⁵ Tutai Jesus tímiayi “Atumí enentaj kátsuram asamtai nu chichaman atumin tsanekatramkiamarme. ⁶ Tura Yus yámankamtaik ashí najanamia nu j, áishmannasha nuwancha najanamiayi. ⁷ Tuma asamtai áishman ni aparíncha nukuríncha kanaki ikiuki, ni nuarrijaj tsanintiniati. ⁸ Warí, áishman nuarrijaj jimairaitiat chikichik ajasartatui. Tuma asamtai yamá jimiarichaiti, antsu chikichik ajasuiti. ⁹ Tuma asa, Yus atsanikiania nuna, aents akankashtiniati” tímiayi.

¹⁰ Tura urum jeá wayawar, Jesusa unuiniamurj nu chichaman ataksha aniasarmiayi. ¹¹ Tuiniakui Jesus tímiayi “Shuar ni nuarjn ajapa ikiuak chikichan nuátkanka, emka nuarjn yajauch awajas, ikiuak, tsanirmayi. ¹² Nuwasha ni áishri ajapa ikiuak, chikichjaj niiniurtukka, niisha tsanirmayi” tímiayi.

Jesus uchin shiir awajsamiania nu

(Mateu 19.13-15; Rúkas 18.15-17)

¹³ Antinjarat tusar uchin Jesusan itiriarmiayi. Túruiniakui Jesusa unuiniamurj “iti-airap” tiarmiayi.

¹⁴ Tura Jesus nuna wániak, kajek juna tímiayi “Uchi Winí winitin tsanekatruktarum. Suritkiarap. Iis, shuar ju uchía núnisan peejchach enentáimtumainia nu Yusa akupeamurjn

pachiinkiamniaiti. ¹⁵ Nuní asamtai tájarme, uchi umiana núnisañ Yusa akupkamurjñ shuar umíachkuñka nuna pachiinkiachminiaiti. ¹⁶ Nuyá uchin miniakas, “Yus yáinmakarti” tímiayi.

Kuítrintin Jesusan áujsamiania nu
(Mateu 19.16-30; Rúkas 18.18-30)

¹⁷ Ukunam, Jesus nuyá weaj, shuar tseke Nin tarimiayi. Tari tikishmatar chicharuk “¿Uuntá, Amesha ti péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

¹⁸ Tutai Jesus tímiayi, “¿Urukamtai Winia, péñkeraitme, túrutam? Shuarka chikichk-isha péñkerka atsawai. Aya Yúsak péñkeraiti. ¹⁹ Yus akupkamu nékatsmek. Ju áiniawai: tsanirmawairap, mañkartuawairap, kasamkairap, chikich shuar tsanumprurairap, anañkartuawairap, apasha nukusha umirkatarum. Nu áiniawai” tímiayi.

²⁰ Tutai kuítrintin chichaak “Uunta, núnaka úchichik mash umiki tsakaruitjai” tímiayi.

²¹ Tutai Jesus iis waitnenmai tímiayi “Chikichik táasume. Weme ashí áminiu ana nu surukta. Túram nu kuit kuítrinchá susarta. Túrakum nayaimpiniam kuítrum ikiañkattme. Túram winitia, krus yanaktinia áintsamek itiuurcharum aññ nemartusta” tímiayi.

²² Tura kuítrintin nu chichaman antuk, wake mesek, kúntuts enentáimiar wémiayi, ti kuítrintin asa.

²³ Nii wématai, Jesus ashí ni téntakmarjñ iis, ni unuiniamurjñ chicharuk, “Kuítrintin ainia nu Yusa akupeamurjñ pachiinkiatin ti itiuurchaiti” tímiayi. ²⁴ Takui ni unuiniamurjñ nuna antukar niisháa enentáimprarmiaiyi. Túramtai Jesus tímiayi “Uchiru antuktarum. Shuar kuítriniak enentáimtuinia nuka, Yusa akupeamurjñ pachiinkiatin penké itiuurchataiti. ²⁵ Uunt kamiriu auja jijn wayatin ana nú nankaamas, kuítrintin Yusa akupeamurjñ pachiinkiatin itiuurchataiti” tímiayi.

²⁶ Nuna antukar nú arant niisháa enentáimprarmiaiyi. “¿Nuñkia yaki uwempramniait?” tunaiyarmiayi.

²⁷ Tura Jesus nin iisar chichainiak “Aents niñki túrachminiaiti, antsu Yus túramniaiti. Yuska ashí túramniaiti” tímiayi.

²⁸ Nuyá Pítiur Nin chicharuk “Iis, iikia ashí ikiukir némartusujik” tímiayi.

²⁹ Tutai Jesussha tímiayi, “Nekas tájarme, shuar Winia nemartak Yus-Chichamnasha ipi-ampartasa wakerak ni jeencha, yachjñcha, umajñcha, aparjñcha, nukurjñcha, nuarjñcha, uchirjñcha, nunñkencha uyumatsuk ikiuakka, ³⁰ nu shuar ju nunñkanam sian patatas jeencha, yachjñcha, umajñcha, nukurjñcha, uchirjñcha, nunñkencha, ju nunñkanam wáitiyat sunastatui. Tura ukunam, nunñka amuukamtai, nu shuarsha jáchatainim tuke péñker pujustatui. ³¹ Tura untsurj shuar yamá penkerj ainia nu, ukunam ukunmaañ pujustatui, tura fiksañ untsurj shuar yamá ukunmaya ainia nu, ukunam eem pujustatui” tímiayi Jesus.

Jesus ni jákatniurj ataksha ujakmiania nu
(Mateu 20.17-19; Rúkas 18.31-34)

³² Nuyá arak Jerusaréñnum wéenak, jintiak wearmiayi. Jesuska émak wémiayi. Ni unuiniamurjñsha niisháa enentáimprarmiaiyi. Ashamainiayatan Jesusan nemarsarmiayi. Túmainiaj atak ni nekas unuiniamurjñ akankiar, ni túrunatniurjñ ujakmiayi. ³³ Ujaak tímiayi “Antuktarum, arak Jerusaréñnum wéaji. Nuñ Winia, Aents Ajasuitjiana juna, Patrj uuntrjñcha, jintinnunmasha surutkartatui. Niisha apachnium mantamnatu tusar surutkartatui. ³⁴ Nusha Winia wishikrurar, katsumprukar, usukruawar mantuawartatui. Túramaitatnak menaintiú tsawantaj nantaktiatjai” tímiayi.

Jakupu Juanjaj seawarmiania nu
(Mateu 20.20-28)

³⁵ Sepetéu uchirj Jakupusha Juansha Jesusan taruntarmiayi. Taruntar “Uuntá, ii seattajnia nu túrak tusar wakeraji” tiarmiayi.

³⁶ Tutai Jesus tímiayi “¿Warí itiuurtukat tusam wakerutam?”

³⁷ Tutai “Ame nupetmaktin tsawantrum jeamtai, iisha Ámijaj pujustaitsar wakeraji, wi untsuurumini, winia yatsursha menaarmini. Nu tsañkatrukta” tiarmiayi.

³⁸ Tura Jesus tímiayi “Átum seatrumna nu nékatrum. Wi umartatjana nu umarminkaitrum. Tura Wi imiantiatjana núnisrum imianminkaitrum” tímiayi.

³⁹ Niisha tiarmiayi, “Túramniaitji, páchitskea.”

Tuñiakui Jesus tímiayi “Wats, Wi umartatjana nu umartatrum, tura Wi imiantiatjana núnisrumek imiantiatrum. ⁴⁰ Túrasa winia untsuuruini, menaruinisha átum pujustinian Wikia súsashiniatjarme, antsu Yus wakerana nu nuñ apujusattawai” tímiayi.

⁴¹ Tura chíkich tias unuiniamurj nuna anturkar Jakupuncha, Juágnasha ti kakerkarmiaiyi. ⁴² Tura Jesus ni unuiniamurj irur tímiyai “Ju nékarme; Yus-shuarchanum akupniuitjai tulinia nu, waantu enentáimtumas, ni shuárin ti akupeawai; tura uunt ainia nusha ashí shuar ti takamtikiainiawai. ⁴³ Antsu atumjai núnisaj atsutniuiti. Átumka, wi unuiniamutiram, uunt ajastaj tusarum wakerakumka, ashí yáimin ajastiniaitruma. ⁴⁴ Shuar atumj penkerj ajastajta wakerakka, takarniua nuke ajas, umirtamkatí. ⁴⁵ Wisha, Aents Ajasuitjiana ju, shuar takartusarat tusan táchamjai, antsu ashí shuáran yáintaj tusan táwitjai. Wisha jarukan shuáran uwentikratajtsan táwitjai” tímiyai.

Jesus Partimiásan tsuármiania nu
(Mateu 20.29-34; Rúkas 18.35-43)

⁴⁶ Jesus ni unuiniamurjijai, tura chíkich untsurj aentsjai Jirikiú péprunam jeawarmiaiyi. Nuyá Jirikiúnmayasha jinkiar weenaj, Timiasa uchirj Partimiás, kusuru amia nu, jintiá yantam kuítian seamu pujumiyai. ⁴⁷ Niisha, Nasarénumia Jesusaiti táman antuk, untsumuk “Uunt Jesusa, amesha Uunt Akupin Tawit weeachukaitiam, Yus anaikiachmakaitiam. Winiaja waitnentrurta” tímiyai.

⁴⁸ Tura untsurj nuj matsamarmia nu nin chicharainiak “Takamatsata” tiarmiaiyi. Niisha nú nankaamas untsummiyai “Tawit weeá Jesusa, winia waitnentrurta.”

⁴⁹ Nuna antuk Jesus wajatas, chichaak “Untsuktarum” tímiyai.

Takui shuar kusurun untsuiniak “Kakaram ajasta. Wajaktia; untsurmawai” tiarmiaiyi.

⁵⁰ Tuiniakui niisha esekmatairj ajapa ikiuak wajaki Jesusan tseke tarimiyai.

⁵¹ Tura Jesus nin chicharuk “¿Winia itiuurtukat tusamea wakerutam?” tímiyai.

Tutai kusuru chicharuk “Uunta, ímtiasan wakerajai” tímiyai.

⁵² Tutai Jesus chichaak “Shiir wetá. Winia nekas enentáimtura asam pénger ajasume” tímiyai. Tura nu chichamaik ímpramiyai. Tura Jesusan nemarki wémiyai.

11

Jesus Jerusarénum wayamiania nu
(Mateu 21.1-11; Rúkas 19.28-40; Juan 12.12-19)

¹ Wésar Jerusarénum tura Petpajái péprusha Petania péprusha Uriwiu naint ínkiuasmak ámanum jeawar, Jesus jimiará unuiniamurj ujuikimiyai. ² Ujuiak tímiyai “Aatuninj pépruchiniam werum nuñ umpuuru uchich jinkiamu wáinkiatarme. Nu umpuuruka tuke entsamprukhamuiti. Nu atiarum utitiarum. ³ Tura “¿Urukamta áitkiamum?” turamaini-akuisha, “ii Uuntrj wakerawai” titiarum” tímiyai. ⁴ Tutai wearmiaiyi. Tura umpuurun wáitiniam aani jinkiamum, jintiá yantannum wajan wáinkiar atiawarmiaiyi. ⁵ Nujuarmia nu “¿Warí áitkiamum. Urukamtaí umpuuru atiarum?” tiarmiaiyi. ⁶ Takui, niisha Jesus timia nu ujakam suritkiacharmiaiyi. ⁷ Tura umpuurun Jesusan itiarar pushirj unpuurunam awantkarmiaiyi. Túram Jesus entsamkamiaiyi. ⁸ Tura untsurj shuarsha pushirj jintianam ayapar áinkiaromiaiyi. Chíkichcha jintiá yantannumián nukan juuk jintianam áintrarmiaiyi. ⁹ Eem wearmia nusha, uku winiarmia nusha warainiak “Jusanna” untsumkarmiaiyi. “Yusa náarín winiana nu imiá péngeraiti. ¹⁰ Ii uuntrj Tawitia akupeamurj tátatna nu imiá pénger atí. Ii Yusrj naarj shiir ati.” Tu untsumki wearmiaiyi. ¹¹ Tura Jesus Jerusarénum jeamiyai. Jeá, Yusa Uunt Jeen wayamiyai. Tura ashí iiyasua amik, kintiamprajj tusa ni tuse unuiniamurjijai tjijuch Petania péprunam wearmiaiyi.

Jesus iikiu numin yuminkramiania nu
(Mateu 21.18-19)

¹² Kashin tsawar, Petaniamaya jintia wesa, Jesus tsukammiaiyi. ¹³ Tura arant wajan iikiu numirj núkenniun wáiniak, nereatsuasah tusa iyumiyai. Tura nereshairj asamtai neren penké wáinkiachmiaiyi. ¹⁴ Nuyá iikiu numin yuminkeak: “Ame nerem penké yunaashti” tímiyai. Ni unuiniamurjsha nuna táman antukarmiaiyi.

Yusa Uunt Jeen suruktinian Jesus suritkiamiania nu
(Mateu 21.12-17; Rúkas 19.45-48; Juan 2.13-22)

¹⁵ Nuyá atak Jerusarénum jeawarmiaiyi. NuJ Jesus Yusa Uunt Jeen wayá suruktai tusar pujuarmia nuna jilki akupkatasa nankammiyai. Kuítian yapajj armia nuna misarj tura yampitsan súrin armia nuna kutankrincha ayanturmiyai. ¹⁶ Tura káarak entsaki Yusa Uunt Jeen nankaamaktinian suritkiarmiaiyi. ¹⁷ Nuyá “Yus áusatai tusar ashí shuar Yusa jeen wayamnia átatui” tú aarchamukait Yusa Papirj. Antsu átumka Yusa jeé kasa matsamtaiya nútikiarme” tímiyai. ¹⁸ Aents nuj matsamarmia nu Jesusa chichamen antukar ti enentáimprarmiaiyi. Tuma asamtai Israer-patri úntrjsha, Israer-shuara jintinni-urjsha, nuna nekaawar, Jesusan ashamainiak mantamnatí tusar chichaman jurusarmiaiyi. ¹⁹ Nuyá kiákuí Jesus Jerusarénumia jinkimiyai.

*Iikiu numin káarun wáinkiarmania nu
(Mateu 21.20-22)*

²⁰ Kashin káshik nan̄kaamainiak iikiu numin kan̄kaptuk jaka wajan wáinkiarmai.
²¹ Tura Pítiur enentáimias Jesusan tímiayi “Uunta, iista, iikiu Ame yumin̄kramam nu kan̄kaptuk káarchaik.”

²² Tutai Jesus tímiayi “Yus nekas enentáimtustarum. ²³ Iis, nekas tátsujrumek, shuar “Yus nekas túratpiash” tútsuk, tura “wí tájana nuna Yus nekas túrattawai” tu enentáimsar, jū náintian “jiinki nayaantsanam iniánti” tákuin̄kia, páchitsuk iniantatui, tímiayi. ²⁴ Tuma asamtai tájarme, ashí Yus áujkuram searmena nuna suramsattarme. “Wí seajna nuna yamá takákjai” tu enentáimkiurmeka, wáinkiáttarme. ²⁵ Tura Yus áujkuram pujarmena nu, kajernaiyamuram ákuin̄kia tsan̄kurnáiratarum. Atumí Aparí nayaimpiniam pujana nu atumí tunaarín tsan̄kurturti tusarum túratarum. ²⁶ Atumsha tsan̄kurnáiyachkurminkia, núnisan̄ atumí Aparí nayaimpiniam pujana nu atumí tunaarín tsan̄kurtámprashtatrumé” tímiayi Jesus.

*Yusa kakarmaríjají Jesus takasmania nu
(Mateu 21.23-27; Rúkas 20.1-8)*

²⁷ Ataksha Jerusarénnum waketkiarmiayi. Jesus Yusa Uunt Jeen wekaj, Israer-patrí úuntrīsha, Israer-shuara jintinniur̄isha, Israer-shuara iruntai-jēe úuntrīsha Nin káutkarmiayi. ²⁸ Káutkar Jesusan tiarmiayi “¿Yana kakarmaríjají jū túram. Ame túramna nuna ya tsan̄katrama?” tiarmiayi.

²⁹ Tuiniakui Jesus tímiayi, “Chikichiniak aniastatjarne. Áirkatarum. Túrakrumn̄kia Wisha winia takastinian tsan̄katrukma nuna ujaktatjarne. ³⁰ Wats, turutiarum, ¿ya Juan imiaitniun tsan̄katkama? ¿Shuar tsan̄katkamka? ¿Yus tsan̄katkamka? Áirkatarum” tímiayi.

³¹ Tura niisha enentáimprar “Yus akupkaiti” tákurninkia, “¿urukamtia umirkachuram?” turamchattajik. ³² Antsu “shuar tsan̄katkaiti” tákurkia, ashí shuar ashamáji” tunainiarmiayi. Ashí aents Juan nekas Yúsnan etserniuiti, tu enentáimainiakui ashammiarmiayi. ³³ Nuyá Jesusan tiarmiayi “Iikia nékatsji.”

Tutai Jesus tímiayi “Wisha núnisnak yana kakarmaríjají takaaj nuna ujakchattajrumé.”

12

*Yajauch takau armia nu
(Mateu 21.33-46; Rúkas 20.9-19)*

¹ Jesus jū métek-taku chichaman unuiniamiayi: “Shuar uwa ajan ajam wenuimiai. Nuyá uwa nekeetaín najanamai. Tura kumpin jēan najanamai. Najana takartusti tusa shuáran ikuak nin̄kia jeachat wémai. ² Neretai tsawant jeamtai, ni takarniur̄in júukman akankat tusa akupkamai. ³ Tura ajanam takau arma nu, nu takarniun achik, katsumkar, áyatik awain̄kiarmai. ⁴ Ataksha chíkich takarniun akupkamai, tura nunasha kayajají tukurar, múuknum katsumkar, katsekar awain̄kiarmai. ⁵ Tuma aín ataksha chíkichan akupkamai, tura nunasha máawarmai. Ti untsur̄in akupramai. Chikichnasha katsumkarmai, chikichan máawarmai.

⁶ Tura niijají chikichik tuke ámiayi, nuka ni aneamu uchir̄j. Nu uchincha ukunam akupkamai. Akupeak “Winia uchir̄naka shiir awaj Sartatui” tímiai. ⁷ Tura ni uchir̄j winian wáinkiar, takau shuar nuámtak chichainiak “Juka ajá nérenniu uchir̄nti. Wátsek, maatai; túramka ájaka iiniu átatui” tiarmái. ⁸ Túsar achikiar máawarmai. Ayáshincha ajanmayá ajapawarmai” tímiayi.

⁹ Tura nuyá aniasmiayi, “¿Wats, warí enentáimsarum; ajá nérenniur̄i ititurkattawa? Jeash-tanmayá taa, ajá takainia nú shuaran amuktatui. Ni ajar̄incha chikichan ikiastatui. ¹⁰ Jū, Yus-Papiniun aarma ana nu áujsachukaitrum:

Kaya pé̄nkernak, jeammín “yajauchiiti” tusar ajapawarmia nu ashí kayajají nan̄kaamas pé̄nker apujsamuiti. ¹¹ Nusha Yus túramuiti. Iisha íisar ti enentáimtaji. Nuke áarmaiti” tímiayi.

¹² Tura nú metek-taku chichamjají nin áujmatma asa achiktai tusar chichaman jurusarmiayi. Túmainiyat shuáran ashamainiak Jesusan ikiuiniak wearmiayi.

*Uunt akupin súsatín tura Yus súsatín
(Mateu 22.15-22; Rúkas 20.20-26)*

¹³ Tura wear, imiaamtikiar yajá chíchakmatai nújají yajauch títiar tusar Pariséu shuar-nasha, Erutisa neman̄in shuarnasha akatar Jesusan akuptukarmiayi. ¹⁴ Túram Nin jeariar chícharainiak: “Uuntá, aents nakitiainiaj̄n tuke nekas chícham páchitsuk chíchaame, nu nékaji. Aents pátatek iyatsme, antsu nekas Yusa jint̄j̄ unuiniame. ¿Waritia enentáimiam,

ii kuitri̯ uunt Sesar súsatin pé̯nkerkait. Susattajik. Suritkiattajik? Nu nekaatai tusar wakeraji” tiarmiayi.

¹⁵ Tura Jesus ni yajauch enentáimmiari̯n nekara “¿Urukamtai Winia yajauch titi tusarum wakerutarum? Kuit itiatarum, Wi ístaj” tímiayi.

¹⁶ Tutai kuítian ititariarmiayi.

Jesus nuna iis tímiayi, “¿Jusha yana yapí tura yana naarí áarmait?” tímiayi.

Tutai “Uunt Sésarna” tiarmiayi.

¹⁷ Nuyá Jesus tímiayi “Uunt Sésarna ana nu susatarum; túrarum Yúsnaka Yus susatarum” tímiayi. Tura ni áimkiamurí̯n antukar ti enentáimprarmiayi.

Aents nantaktinian Satuséu anintrusarmiania nu

(Mateu 22.23-33; Rúkas 20.27-40)

¹⁸ Nu̯shsha Satuséu aents, jakamunmaya̯ nantaktin penké atsawai tiniu armia nu, Jesusan tariarmiayi. Taar Jesusan chicharainiak: ¹⁹ “Uuntá, Muisais juna áatrampramiaji:

“Áishmañ ni nuarí̯ júreatsañ̯ jakamtañ̯kia, yachin yajutmatratsa, ni yachí nu wajen nuátkatniuiti.”

²⁰ Wats, siati yachi árimiayi. Iwiarí̯ nuwañ̯ nuatak yajutmatsuk jakamiayi. ²¹ Ni yachí wajen akinkiamiayi. Nusha núnisañ̯ yajutmatsuk jakamiayi. Nuna yachísha núnisañ̯ tura nuna yachísha núnisañ̯ túramiayi. ²² Tura ashí siati patañ̯mañ̯, patañ̯mañ̯ nu nuwañ̯ nuátkarmiayi. Yajutmatsuk, yajutmatsuk jíiniawarmiayi. Tura ukunam nuwasha jakamiayi. ²³ Nuñ̯kia nantaktin tsawantai, nantakiarmatai, ¿yana nuarí̯n ati? Ashí siati nuátkacharmaka” tiarmiayi.

²⁴ Tutai Jesus tímiayi ““Jakamunmaya̯ nantaktin atsawai” tátsurmek. Yusa chichame tura Yusa kakarmarí̯ nékachu asarum awajiarme, tímiayi. ²⁵ Iimiatarum, aents jakamunmaya̯ nantakiarmatai, nuatnaikiatin atsuttawai, antsu nayáimpinmaya̯ suntara núnisarañ̯ pujusartatui. ²⁶ Tura jakamunmaya̯ nantaktiniapitia tusarum nu nekaatin nekas wakerakrumka Muisais armia nu enentáimtustarum. Yúska numichinmaya̯ Muisaisan chicharuk “Wikia Apráama Isaaka tura Jakupu Yúsrí̯ntjai” Yus tímiayi. ²⁷ Yaunchu jákaru aín̯, Yus nuna taku, ayashniun jakayat iwiaaku pujuinia nuna Yúsrí̯ntjai, tawai. Nekas jaka ainia nuna Yusrí̯nchuiti. Nantaktin atsawai tau asarum awajirurme” tímiayi Jesus.

Yus akupkamu imiá pé̯nker ainia nu

(Mateu 22.34-40)

²⁸ Jessusha Satuséusha áujmatnainian Israer-shuara jintinniurí̯ taa anturkamiayi. Anturak, Jesus ti pé̯nker áimkiui, niisha Jesusan juna aniasmiayi: “¿Yus akupkamu tuá imiá pé̯nkerait? tímiayi.

²⁹ Tutai Jesus tímiayi “Júiti Yus akupkamu imiá pé̯nker: Antukta Israer shuará. Ii Yusrí̯ úuntaiti, tura Niñ̯ki nekas Yúsaiti. ³⁰ Tuma asamtai, tuke enentáimjai̯ ti enentáimsam Uunt Yus aneeta. Túram ame iwiaakmarmesha, kakarmarmesha Yus íktusta. Núiti nekas pé̯nker akupkamu, tímiayi. ³¹ Nuyasha chikichcha awai, “ame ayashim aneamna tímiatrusmek ame írutramurmesha aneeta.” Chíkich nu nankaamas pé̯nker akupkamu atsawai” tímiayi.

³² Tutai jintintin tímiayi “Ee, pé̯nkeraiti, Uunta. Nékasmeke tame. Chikichí Yus awai, chíkichkia atsawai. ³³ Tura tuke enentáijjai̯ ti enentáimsar, ii kakarmarí̯sha Yus íktusar Nin aneakrikia, ii ayashí̯ aneajnia núnik ii írutramurí̯sha aneatniuiti. Nusha ashí Yus sutai ana nujai nankaamas pé̯nkeraiti” tímiayi.

³⁴ Nuna tiniu asamtai Jesus ni pé̯nker áimkian nekáa “Ameja Yus akupeamunam pachinikiatin ishichik táasume” tímiayi. Tura nuyá chíkich shuar Jesusan aniastinian arantukarmiayi.

Kristu tutai ¿yana uchirí̯mpait?

(Mateu 22.41-46; Rúkas 20.41-44)

³⁵ Jesus Yusa Uunt Jé̯en unuiniak pujumiayi. Tura chichaak “¿Urukamtai ii jintinniurí̯ “Yus anaikiamu Kristun Tawitia shuari” tuinia?” ³⁶ Tawit, antsu, Yusa Wakaní̯ aarta tutai, Yus-Papinium juna áarmiayi:

Uunt winia Úntrun tímiayi “Ame nemasrumin nupetkatin amuatsañ̯ winia untsuuruiní̯n pujusta”.

³⁷ Kame Tawitkia, Kristun áujmatuk, “winia Uuntru” taisha, ¿itiura ní̯ shuarí̯sha átiñ̯k?” tímiayi Jesus. Tuma asamtai untsurí̯ shuar nuí̯ matsamarmia nu ti shiir antukarmiayi.

“Israer-shuarañ̯ jintintin ainia nújai̯ aneartarum” Jesus tímiania nu

(Mateu 23.1-36; Rúkas 11.37-54; 20.45-47)

³⁸ Jesus unuiniak tímiayi, “Israer-shuara jintinniurí̯ ainia nujai̯ aneartarum. Ni-isha waantu enentáimtumasar, esaram pushin entsarar wekasatajtsar wakeruiniawai. Pé̯runmasha shuar shiir áujtusarat tusa wakeruiniawai. ³⁹ Israer-shuar iruntiniam

penkeri pujutainium pujustinian wakeruniawai. Nampernumsha penkeri pujutainium pujustinniasa wakeruniawai. ⁴⁰ Tura waje jeencha atantainiawai. Túrawar aents nekaracharat tusar ti esaram chichamjai Yúsan áujainiawai. Nincha chikichjai nankaamas Yus asutiawartatui” tímiayi.

*Waje kuítrín susamiania nu
(Rúkas 21.1-4)*

⁴¹ Jesus Yusa Uunt Jeen kuit enketainiam naka pujus áents kuítrín chumpian wáinkiamiyi. Untsurí kúitrínin núkap enkeawarmiayi. ⁴² Nuyá waje kuítríncha taa jimiará uchich kuítian, rera áantsañ, enkeamiayi. ⁴³ Jesuska unuiniamurín untsuk “Nekas tájarme, jú waje kuítrínchaitiat, ashí enkeena nú nankaamas núkap enkeayi. ⁴⁴ Iis, kuítrínniusha ní ampirma nuna enkeenawai, tura antsu jú nuwá kuítrínchaitiat, ampirmatsuk ní yurumatniurín takurmakman ashí enkeayi” tímiayi.

13

*Yusa Uunt Jeen yumpuntratniun Jesus ujakmiania nu
(Mateu 24.1-2; Rúkas 21.5-6)*

¹ Yusa Uunt jeeniá Jesus jiinkimtai, unuiniamurí Nin tímiayi “Iisia, Uunta, kayasha ti shiir áiniawai. Jeasha imiá úuntchakait.”

² Tutai Jesus tímiayi “Jú imiá uunt jea wáinmek. Kaya ekentramu au ashí mash yumpuntratratui” tímiayi.

*Amuukatin tsawantin uruku átatna nu
(Mateu 24.3-28; Rúkas 21.7-24; 17.22-24)*

³ Nuyá Uriwiu náinnium wakar, Yusa Uunt Jee naka pujusar, Pítrusha, Jakupusha, Juansha, Antressha, níngkimas Jesusan aniiniak ⁴ “Uuntá, tímiam nu, ¿urutia túrunatta. Nu túrunatin jeakuisha itiura nekaattajia? Paant ujatmakta” tiarmiayi.

⁵ Tutai Jesus tímiayi “Aneartarum, anankramawairap. ⁶ Nekaatarum, untsurí winia naarun pachisar winiartatui. Chikich chikich “Wiítjai Kristu” taku, untsurín anankawartatui. ⁷ Tura meset chicham ántakrumka, yajaya meset chicham ántakrumsha sapijmiakairap. Nekas túrunashinkiait. Nujajsha amuukatin tsawantka tuke jeatsui, tímiayi. ⁸ Shuar chikich shuarjai mesetan najanawartatui; apachcha chikich apachjai núnisarañ mesetan najanawartatui. Untsurí nunkanam úurkattawai. Tsukasha ártatui, charaatum ajamusha núnisañ átatui. Tura nujai itiurchatka aya yama nankamui.’

⁹ Túmaitkui atumsha aneartarum. Akupin iruntainiumsha surutmakartatume, tura íi shuar iruntainmasha katsumpramkartatume. Wíi shuar asakrumin, kapitiánnium, akupniunmasha juramkittiarne. Nuj jearum, Winia chichastatume. ¹⁰ Nu túruntsañ ashí áentsnum Yus-Chicham etsernaktiniaiti. ¹¹ Atumin surutmaktasar juramainiakuiusha, warintiajak tusarum ti enentáimsairap. Chichastin jeamtai, Yusa Wakaní jintinramattarmena nu titiarum. Iis, atumí enentáijjai tíchattarme, antsu Yusa Wakaní jintintiam títiatume. ¹² Nu tsawantin shuarsha ní yachín mantamnati tusa suruktatui. Apasha ní uchirín suruktatui. Uchisha aparíncha nukuríncha kajerak, jakati tusa suruktatui. Núnisañ untsurí shuar túrawartatui. ¹³ Nuínkia Wíi shuar asakrumin ashí nakitramprartatui. Tura shuar yawetsuk katsuntranka uwemprattawai” tímiayi.

¹⁴ Nuyá Jesus tímiayi “Shuar júna áujeana nu nekaati. Yúsnan etserin, ní naarj Taniar, ti yajauch tuke emesin ana nuna yaunchu aar etserkamiayi. Nuka pujushtainiam pujan wáinkiermesha, ashí Jutia nunkanam pujarmena nu, náinnium pisartarum. ¹⁵ Jea yakiinj pujana nu akaiki wariri achiktajtsa, jeen wayashti. ¹⁶ Ajanam pujana nusha ní pushirín jukitiajtsa waketskisti. ¹⁷ Tura ajamtin áiniana nusha, kuírchin umuntsainia nusha, nu tsawantin timiá itiurchatan wáinkiaratui. ¹⁸ Tuma asamtai átum pisaarmena nú yumitin achati tusarum Yus seatarum. ¹⁹ Nu tsawantinkia ti wáitsatin átatui. Yama nankamtaik Yus nunkan najanama nujsha, yamaisha ukunmasha timiu wáitsatin penké atsuttawai. ²⁰ Tura Uunt Yus wáitsatin tsawantan ishichik awajstatajai tíchaitkuínkia, uwempratin penké atsuinti. Tura ní shuarín anaikiamia nuna yáingajtsa wakerak, nu tsawantan ishichik awajstatawai. ²¹ Nu tsawantaj “júiti Kristu” túramkuínkia anturkairap. ²² Kame “Kírstuitjai” ántar tuinia nu, tura “Yúsnan etserniuitjai” ántar tuinia nusha wantinkiaratui. Wantinkiar Yus anaikiamu shuárnasha anankatai tusar wakeruniak, ní kakarmarín iniakmainiak aentsti tujintiamun túrartatui. ²³ Tura átum aneartarum. Aetak, túruntsañ ujakchajrumek’ tímiayi Jesus.

*Aents Ajasu tutai táintri
(Mateu 24.29-35, 42-44; Rúkas 21.25-36)*

²⁴ Jesus tuke unuiniak juna tímiayi: ‘Tura nu wáitsatin nankaasmatai, etsaasha nantusha etsantrashtatui. ²⁵ Yaasha nayaimpinmaya kakekartatui, tura nayaimpiniam kakaram ainia nu muchitrartatui. ²⁶ Nuyasha ashí aents Winia wáitkiartatui. Wi, Aents Ajasuitjiana ju, ti kakaran, ti wincha ajasan, yuranminiam winiáj wáitkiartatui. ²⁷ Nuñ nayaimpinmaya suntarun akupkattajai, Wíi shuaran ashí nunkanmayan irurarat tusan. Arakaanjya, nunkaanjya, ashí nunka nankatkamunmayan Wíi shuaran irurartatui.’

²⁸ ‘Ikiu numi nakumea nu nekaatarum. Ni chinjimpri punkak nuké jeakuj, “ju nunkanam esat jeatemai” tátsurmek. ²⁹ Núnisrumek Wi tájarmena nu wáinkiumeka, ni tatintrí jeatemai tu nekaattarme. ³⁰ Nekas tájarme, yamaí aents pujuinia nu kajin amuniatsain, ashí Wi tájana nu túrunatniuiti. ³¹ Nayaimpisha nunkasha amuukatniuiti. Tura winia chichampruka amuukashtiniaiti. ³² Tura tsawantcha nekanachminiaiti. Nayaimpinmaya suntarsha nékainiatsui; Wisha Yusa Uchirintiatan nékatsjai. Aya winia Aparuk nékawai. ³³ Atumsha anearum enentáimprarum Yus aujsa pujustarum, tsawant nékachu asarum.’

³⁴ ‘Tura Wikia ju shuarjaj méteketjai. Ju shuarsha jeachat weak, ni jeen ikuiawai. Ikiuak ni shuarin wáitrukarti tusa apujas ikiuak ashí shuaran takatrin súawai. Tura wáitin wáinnun, “ameja pénger wáinkiaata” tímiayi. ³⁵ Wikia nu jea nérenniua núnisnak, urutai tátataj nékachu asarum anearum pujustarum. Kjaraimpiash, tura ajapkeash, atash shiniukaimpiash, káshikiash tátataj. ³⁶ Nérentin aya aneachmak taa, kanúu tepaj wáitkijaj tusarum aneartarum. ³⁷ Wi atumin tájana nu, ashí shuaran tajai, anearum pujustarum” tímiayi Jesus.

14

Jesusan chichaman jurusarmiania nu

(Mateu 26.1-5; Rúkas 22.1-2; Juan 11.45-53)

¹ Jimiarchiki tsawant ajasmiaiyi paskua tutai námper jeatin. Paskua námper tincha wakapruachu tantan yuatin námpernasha métek najanin ármiayi. Israer-patri uuntrinsha, Israer-shuara jintinniurjsha Jesusan ananjar achikiar maatai tusar wakeriarmiayi. ² Túrasha “Jista tsawantin túrachmi, aents charaatum ajarain tusar” tiarmiayi.

Nuwaj kunkuinian Jesusan ukatramiania nu

(Mateu 26.6-13; Juan 12.1-8)

³ Jessusha Petania péprunam tunamaru Semunka jeen misanam pujan, nuwaj tarimiayi. Nartu kunkuinian arapástru tutai kaya najanamunam piakun itiamiayi. Nu kunkuin ti kuitiaiti. Mutí chuchuké kupik Jesusa muuken kunkuinian ukatramiayi. ⁴ Tura nuñ pujuarmia nu, kajerar tunaiarmiayi “¿Urukamtai ju kunkuinian ántar wasurea? ⁵ Junasha súrakka, menaintiú sian kuitnium surukminiuyi. Nu kuitcha kuitrinchan súsanaka maak” tiarmiayi. Tusa nuwaj kajerarmiayi.

⁶ Antsu Jesus chicharainiak ‘Iniasatarum. ¿Urukamtai au kajerarum? Winia shiir túrutayi, tímiayi. ⁷ Kuitrincha atumjaj tuke íruntsuk. Wakerakrumka tuke pénger awajsatniuitrume. Antsu Wikia atumjaj tuke pujushtajai. ⁸ Ju nuwaj ashí nií túramnia núnaka umikiai. Wi jákatin jeatsain, iwiarsatin kunkuinian shiir ukatrarui. ⁹ Nekas tájarme, ashí nunkanam Yus-Chicham etsernaktatna nuñ, ju nuwaj túramurjsha etsernaktatui, nin kajinmatkiarain tusa” tímiayi.

Jútas Jesusan suruktaj timiania nu

(Mateu 26.14-16; Rúkas 22.3-6)

¹⁰ Nuyá Jútas Iskariúti, Jesusa unuiniamurintiat, Israer-patri uuntrin werimiayi, Jesusan suruktaj tusa. ¹¹ Niisha nuna antukar, warasar “Kuit amastatji” tiarmiayi. Jútassha Jesusan itirak yúpitchuch tsanjamkattaj tusa enentáimias wekaimiayi.

Jesusjaj iruntrar yurumáwarmia nu

(Mateu 26.17-29; Rúkas 22.7-23; Juan 13.21-30; 1 Kurintianam 11.23-26)

¹² Wakapruachu tantan yuatin jisat nankama tsawant tsawarmatai, paskua námper tin yuatin murik máatin jeamtai, Jesusa unuiniamurj iniasarmiayi “Paskuatín murikiu yuatin iwiaratai tusar ¿tuj wétataj? Tuj yurumattam?” tiarmiayi.

¹³ Tutai Niisha jimiará unuiniamurj in akatar akupeak “Péprunam wetarum. Nuñ áishman yumin juki wéa wáinkiatarme. Nu áishman nemarsatarum. ¹⁴ Wayana nuñ jea nérenniurj títiarum “Uunt túramui, ¿wisha, unuiniamurjaj tuj yurumáttaj?” ¹⁵ Nu nérentin, yakí písunam uunt tesamunam ashí iwiaramun iniakturmastatrume. Nuñ jisat ii najanatin iwiaratarum” tímiayi. ¹⁶ Ni unuiniamurj wear, péprunam jeawar, Jesus timia núnisan wáinkiarimiayi. Tuma ásar paskua námperan iwiararmiayi.

¹⁷ Nuyá kíakui Jesus ni tuse unuiniamurijjaj wayawarmiayi. ¹⁸ Niisha misanam pekaamak, yurumániak pujusar, Jesus tímiayi. “Nekas tájarme, chikichík shuar Wijjaj yurumna nu, surutkattawai.”

¹⁹ Nujaj kúntuts enentáimprarmiayi. Chíkich chíkich Jesusan aniasar “wíashitiaj” tiarmiayi.

²⁰ Jesus tímiayi “Ju misanam tuse Irunar yurumprum nu, chikichik surutkattawai. Wijjaj pininnum yurumkam ayak yuana núiti. ²¹ Nekas Wi, Aents Ajasuitjiana ju, jákatniunam wéajaj, áarturma áintsanak. Tura áishmañ súrutna nu ti wáitsattawai. Niisha akiinmainchu ajakuiti” tímiayi.

²² Yurumainiak Jesus Yúsan yuminkias, yurumkam achik, puuk, chicharainiak “Achik-tarum, jusha winia ayashruiti” tímiayi. ²³ Piniñnasha achik, Yúsan yuminkias, ni unuiniamurjñ súsarmiayi. Ashí umararmiayi. ²⁴ Umararmatai Jesus tímiayi “Júiti winia numpar, untsurjñ yáñtajtsa puártinia nu. Nujaj Yamaram Chichaman Yus najanaiti. ²⁵ Nekas tájarme, uwa yumirj ataksha juj umarchattajai. Tura tsawant jeamtai, ukunmasha, Yus akupeana nuj yamarman umartajjai” tímiayi.

Pítur natsantratniua nuna Jesus ujakmiania nu
(Mateu 26.30-35; Rúkas 22.31-34; Juan 13.36-38)

²⁶ Yus-kantan kantámawar, jíinkiar, Uriwiu náinnium wearmiayi. ²⁷ Nuñkia Jesus nin tiarmiayi “Ju kashi átum natsantrurtatume. “Murikiu wáinnium máattajai, túramtai murik tsakinmakartatui” tu aarchamukait. ²⁸ Tura ukunam Wi nantakin atumin Kariréanam émtuktajrume” tímiayi.

²⁹ Tutai Pítur chicharuk “Ámin ashí natsantramainiakuisa, wikia natsantrashtatjame” tímiayi.

³⁰ Tutai Jesus tímiayi “Nekas tájame, ju kashi atash jimiará shiniatsajñ, natsantrurtatme. “Núnaka nékatsjai” menaintiú turuttiatme” tímiayi.

³¹ Tutai Pítur kakaram chichaak “Ámijjaj métek máantuiniakuisha, núnaka penké tichattajai” tímiayi. Ashí ni unuiniamurj núnisañ tiarmiayi.

Jesus Jitsemani ajanam Yúsan áusamiania nu
(Mateu 26.36-46; Rúkas 22.39-46)

³² Nuyá Jitsemani ajanam wearmiayi. Jeawar Jesus ni unuiniamurjñ tímiayi “Juj pujus-tarum, Yúsan áusatasata pujaj”. ³³ Pítur. Jakupuncha, Juáñnasha jukimiayi. Tura Jesuska ti kúntuts enentáimiar wake mesek nekapsatasata nanñkammiayi. ³⁴ Tura nin chicharuk “Wi ti kúntuts enentáimjai, tura jakamnia nekapeajai. Juj iimia pujutarum” tímiayi. ³⁵ Jesussha ishichik arantach we, nunjá piniakumar tepes Yúsan aujmiayi. “Ju wáitsatin átatna nu, túrutatniuitkuiñkia iniaitiusta” tu seamiai. ³⁶ Tuke ájuk tímiayi “Apawá, ashí tujinchaitme. Piniñnumiá ashí umartinia áantsañ ti nekapsatajna nú wáitsatniun, jurutkítia. Antsu Wi wakeraj nucha, ame wakeramuram túrunati.” ³⁷ Tura ni unuiniamurjñ tarin, kanúu tepenan wáinkiamiayi. Pítur tímiayi “¿Semunka kánamek. Kanutsuk ishichikisha iimia pujustin tujinkiamek? ³⁸ Anearum Yus áusatarum, tunaanum iniaarajj tararum. Atumí wakanjñ kakarmaitrume, antsu atumí ayashjñ kakarmachuitrume” tímiayi.

³⁹ Ataksha we, nuik Yúsan áusama núnisañ áusamiayi. ⁴⁰ Ataksha waketruki, ni unuiniamurjñ kanúu tepenan tarimiayi. Karj ti pujá asamtai, Jesusan áusatniun tujinkiamiai. ⁴¹ Jesus ataksha we, tarí tímiayi “Kananarum ayampratarum. Máakete. Jeayi. Wi, Aents Ajasuitjiana ju, tunáa shuarnum surukmaitjai. ⁴² Nantáktiárum, wemí. Iis, Winia súrutna nu nuntumsai” tímiayi Jesus.

Jesusan achikiarmiania nu
(Mateu 26.47-56; Rúkas 22.47-53; Juan 18.2-11)

⁴³ Jesus nuna chicháa pujá unuiniamurjñ Jútas tarimiayi. Nijjaj untsurj aents puniá takaku, tura numincha takaku káutarmiayi. Israer-patri uuntri, Israer-shuara jintinniurj, tura Israer-shuara úuntri akupkarma asa káutkarmiayi. ⁴⁴ Káuntsajñ Jútas chicharainiak, “Wi mukunattaj áujkin núiti Jesus. Achíurum, penker emetarum jukitiarum” tímiayi. ⁴⁵ Tura Jesusan tarí, mukunuk áujas “Uuntá, Uuntá” tímiayi. ⁴⁶ Túramtai aencha Jesusan achikiar emetawarmiayi. ⁴⁷ Túruiniakui nuj wajatusha puniarj úkuitsañ, patri uuntri takarniurjñ awati ni kuishjñ tsupirkamiayi.

⁴⁸ Túram Jesus áentsun tímiayi “Kasakaitaj. Puniajaj numijjaj, kasá nútiksarmek achirkatai tusarum tarutniurme. ⁴⁹ Ashí tsawant atumjai Yusa Uunt Jeen wayan unuiniakun pujuchmakaj. Túmaj nuj achirkachmarme. Tura Yus timia nu uminkiat tusa ju túrunayi.”

⁵⁰ Nuñkia ni unuiniamurjñ Niniak ikiuniak pisararmiayi.

Natsa pisarmiania nu

⁵¹ Tura áishmañ nátsaach aya tarachin penumas Jesusan atamprimiayi. Tura natsaach suntar achikiam ⁵² tarachrjñ ajapa ikiuak misú tsékenkimiayi.

*Patri uuntriin Jesusan júkiarmiania nu**(Mateu 26.57-68; Rúkas 22.54-55, 63-71; Juan 18.12-14, 19-24)*

⁵³ Patri uuntriin Jesusan ejeniarmiayi. Nuí Patri uuntriisha, Israer-shuara jintinniurisha, Israer-shuara uuntriisha irunturarmiayi. ⁵⁴ Tura Pítiur íkian nemarki Patri jeen aach jeá, Patri suntarijijai jinia anamuk pujumiayi. ⁵⁵ Patri uuntri ashí naamka uunt armia nujai iruntrar maatai tusar wakeruiniak shuar Jesusan tsanumprurat tusar eatkarmiayi. Nu chichamjai mantamnati, tiarmiayi. Túrasha wáinkiacharmiayi. ⁵⁶ Túrasha untsurí shuar Jesusan tsanumpruniayatan yapajjá yapajjá chichainia ásmartai wáinkiacharmiayi. ⁵⁷ Nuyá chíkich wajakiar wáitruiniak juna tiarmiayi ⁵⁸ “Yusa Uunt Jeen, aents jeamarmia nuna yumpuntajai. Túran menaintiú tsawantaj, chikichan, aents jeamchamun jeamtatjai” tau antukmaji” tiarmiayi. ⁵⁹ Tura tuke yapajjáwar tiarmiayi.

⁶⁰ Nuísha Patri uuntri ajapén wajaki Jesusan chicharuk “¿Áimsatin penké tujintiamék. Warinia turamainia?” tímiayi.

⁶¹ Tura Jesus takamtak áimsuk pujumiayi.

Patri uuntri atak chicharuk “¿Ame nekas Yusa Anaikiamurinkaitiam. Ii Yusri Uunt tajinia nuna Uchirinkaitiam?”

⁶² Tutai Jesus tímiayi “Ee, nútjai. Winia, Aents Ajasu tutaintajna nu Kakaram Yusa untsuuriñi pujaj wáitkiattarme. Tura nayaimpinmaya yurañminiam winiaí wáitkiattarme” tímiayi.

⁶³ Tutai Patri uuntri kajek, ni pushirín jaak tímiayi “¿Chíkich títincha warí atsumaji? ⁶⁴ Nii tana nujai Yusan kátsekeamu antukurme. ¿Warintia enentáimprum?” tímiayi.

Takui “jakamniati” ashí tiarmiayi. ⁶⁵ Chíkich chíkich Jesusan usukiáwarmiayi. Jjin epetkar awatiar “¿Ya áitkiarma? etserkata” tiarmiayi. Patri suntariisha yapiniam awatiarmiayi.

*Pítiur Jesusan natsantramiania nu**(Mateu 26.69-75; Rúkas 22.56-62; Juan 18.15-18, 25-29)*

⁶⁶ Núnaka túruiniáj Pítru nunká, jea aani pujan, nuwa Patri uuntri takarniuriya nu tarim-iaiy. ⁶⁷ Niisha Pitrun jinia anamu pujan wáinkiamiayi. Wáiniak, “Amesha Nasaretnumia Jesusjai wekaichukaitiam” tímiayi.

⁶⁸ Tutai Pítiur chicharuk, “Nékatsjai. Ame támena nuna nékatsjai” tímiayi. Tura aa wáitainiam jínkimiayi. Tumai atash shiniukmiayi.

⁶⁹ Nu núwasha Pitrun ataksha wáiniak, shuáran nuí pujuinian tímiayi “Júiti ni shuari.”

⁷⁰ Tura ataksha “atsá” tímiayi.

Ishichik árusan, shuar nuí pujuarmia nu ataksha Pitrun chicharuk “Nekas ni shuarinme. Kariréanmaya shuárchakaitiam. Auya shuara nuní chichaame” tiarmiayi.

⁷¹ Tutai Pítrusha kakantar chichaak, “Ju áishmanaka átum tárumna núnaka nékatsjai. Wáitrukuñkia Yus írsati” tímiayi. ⁷² Nuyá ataksha atash shiniukmiayi. Pítrusha, Jesus nuik timian enentáimmiayi. Iis, Jesus nuik tíchamka “Atash jimiar shiniatsain, ame, núnaka nékatsjai, menaintiú turuttiatme” tíchamka. Pítru nuna enentáimias ti úutmiayi.

15*Jesusan Piratúí ejeniarmiania nu**(Mateu 27.1-2, 11-14; Rúkas 23.1-5; Juan 18.28-38)*

¹ Tura kashin káshik Patri uuntri, Israer-shuara úuntriijjai, Israer-shuara jintinniurijjai, ashí naamka armia nujai iruntrar, chichaman jurusarmiayi. Túrawar Jesusan jínkiamun apach kapitán Piratúin ejeniarmiayi. ² Ejeniarматаi Piratu aniasmiayi “¿Amesha Israer-shuara Uuntriinkaitiam?”

Tutai Jesussha “Amek tame” tímiayi.

³ Nuyá Patri uuntri ti tsanumprurarmiayi. ⁴ Ataksha Piratu aniasmiayi “¿Áimsatin penké tujintiamék? Ti untsurí etserturmainiatsuk.” ⁵ Tura Jesus nunasha áikchamiayi. Túmakui Piratu ti enentáimpramiayi.

*Jesusan, mantamnati, tiarmiania nu**(Mateu 27.15-31; Rúkas 23.13-25; Juan 18.38-19.16)*

⁶⁻⁷ Shuar ámiayi, ni naarí Parapás. Niisha ni shuarijjai meset ámanum, shuaran maa asamtai sepunam enkeamuyayi. Tura námper tsawantaj Piratu sepunmaya chikichik shuarnak jiki akupniuyayi, aents seawarmia nuna. ⁸ Nuísha untsurí shuar Piratu káutkar tiarmiayi “Ame ju námper tin tuke tárumna nu túratá. ⁹⁻¹⁰ Patri uuntri Jesusan kajeraru ásar surukarmiayi. Piratusha, nuna nekáa chicharainiak “Israer-shuartiram ¿atumí akupniurín jiki akupkattajak? ¿Nu wakerarmek?” tímiayi.

¹¹ Tutai Patri uuntri áentsun chichainiak ““Antsu Parapás jikim akúpkatá” titiarum” tiarmiayi.

¹² Tutaí Parapásan seawarmatai Piratu ataksha chicharainiak “Jesusnasha, átum ii akupniurj tarumna nuna, ¿itiurkattaja?” tímiayi.

¹³ Ataksha ni kakantar tiarmiayi “Krúsnum mantamnatí.”

¹⁴ Piratusha nin tiarmiayi “¿Warí tunaana túriniait?” tímiayi.

Takui niisha nú nankaamas kakantar tiarmiayi “Krúsnum mantamnatí.”

¹⁵ Tuma asamtai, aents shiir enentáimprartí tusa, Piratu tunáa shuaran, Parapásan jjiiki akupkamiayi. Tura Jesusnasha katsumkarum krusnum ajinrurtarum tusa suntaran tsankatkamiayi. ¹⁶ Tiniu asamtai suntar Jesusan jukiar, kapitiani jeen awayawarmiayi. Nu jea naari Piritiúriiiti. Túrawar untsurj suntaran untsukarmiayi. ¹⁷ Ashí káunkar, pushin kapañnium Jesusan áentsrarmiayi. Tawasap janí najanamun etsenkrumtikarmiayi. ¹⁸ Nuisha Jesusan áujsar “Shíiraitme, Jesúsá, Israer-shuara akupniuriya” wishikiainiak tiarmiayi. ¹⁹ Muuknumsha sapapjai awatiarmiayi; nuyá usukiawarmiayi, túrawar ántar tikishmatrarmiayi. ²⁰ Tura Jesusan wishikrar amukar, kapañtin pushin áitkiar, ni pushin áentsrarmiayi. Túrawar krúsnum ajinrurtai tusa jjiikiarmiayi.

Jesusa jakamuri

(Mateu 27.32-44; Rúkas 23.26-43; Juan 19.17-27)

²¹ Semun Serini núñkanmaya shuárayayi. Arijantruncha, Rupuncha aparjyayi. Semun kan takatnumia winian suntar emetawarmiayi, Jesusa krusin yanaki jukiti tusa. ²² Jesusnasha Kúrkuta náinnium júkiarmiayi. Kúrkuta, shuar chichamjainkia, muuka ukunch naint, tutainti.

²³ Jeawarmatai, karía, mira kunkuinjai pachimprar áartaj tusa susarmiayi Jesusan. Túrasha umarchamiayi. ²⁴⁻²⁵ Nantu yakí jatemsamtaí krúsnum ayapar ajinrur ar ikusarmiayi. Túrawar suntar yakí jukit tusa nakurutaijai nakurusar Jesusa pushin yaruakarmiayi. ²⁶ Urukamtaí máamuit, ashí aents nuna nekaawarat tusa, ni krusin ju aarmauyayi: **ISRAER SHUARA AKUPNIURI**

²⁷ Nu náinnium jimiará kasa shuaran Niijai máawarmiayi. Chikichik Jesusa untsurinj krúsnum, chikichik ni menarjin krúsnum máawarmiayi. ²⁸ Yus-Papinium aarma ana nujai uminkiauyayi. Nuj “tunáa shuarjai nekapmarmayayi” tu áarmaiti.

²⁹ Shuar nankaamainiak, muuke pearar, Jesusan katsekainiak tiarmiayi “Iisia, amesha, “Yusa Uunt Jeen yumpuntiatjai, tura menaintiú tsawantaj ataksha jeamkattajai” tichakaitiam, tiarmiayi. ³⁰ Amek krúsnumia akaikim uwemprata.” ³¹ Núnisan Patri uuntrisha, Israer-shuara jintinniurisha Jesusan wishikrar chicharnaisarmiayi “Chikichan uwemtikraitiat, Niñki uwempratniun tujintiawai. ³² Yusa anaikiamuri Krístuashit, ii akupniurjiniashit, tiarmiayi. Wats, yamáí krúsnumia akáikiti, iisha nu ísar Yus-shuar ajastai” wishikiainiak ántar nuna tiarmiayi. Jesusjai krúsnum ajintruamusha Nin wishikiarmiayi.

(Mateu 27.45-56; Rúkas 23.44-49; Juan 19.28-30)

³³ Tutupin jeamtaí ti kiritin ajasmatai ashí nunkanam. Tura, nantu nunkaach ajasmatai ataksha tsaapnirmiayi. ³⁴ Nuin Jesus kakantar untsumuk tímiayi “Iruí, Iruí, rama sapahtani.” Nuka shuar chichamjainkia, “Yusrú, Yusrú, ¿urukamtaí ajapa ikiurkiniam?” tawai. ³⁵ Shuar nuí pujuarmia nu, nu chichaman nékachu ásar, nuna antukar “Eriasan untsúawai” tiarmiayi. ³⁶ Chikichik shuar churuinian uruchjai ajamper, sapapjai iiji mukunati tusa susamiayi. Tura tímiayi “Wajastarum, Eriás Nin jukitiaj tusa winishtimpiash. Iistai” tímiayi.

³⁷ Nuñkia Jesus kakaram untsumak jakamiayi. ³⁸ Túramtaí Yusa Uunt Jeen ejamu niní jaganakmiayi, yakíya nunká. ³⁹ Suntara kapitiantrisha Jesusan ayamtus wajamia nu, Jesus kakaram untsumak jaamun iis tímiayi “Nuka ti nekas Yusa Uchiriyayi.”

⁴⁰ Nuwasha arant ii pujuarmiayi. Nu nuwajai Máktara péprunmaya Marí, chikich Marisha, Sarumáisha pujuarmiayi. Chikich Marisha uchich jakupuncha Jusencha nukurjyayi. ⁴¹ Nu núwaka, Kariréa nunkanam Jesus wekaimia nu, Nin nemarsar yáintaisar wekasarmiayi. Untsurj chikich nuwasha Jesusjai Jerusarénnum wear, nu nuwajai arant ii pujuarmiayi.

Jesusan iwiansarmiania nu

(Mateu 27.57-61; Rúkas 23.50-56; Juan 19.38-42)

⁴² Kjatemamtaí, ayampratn tsawant jeatsain, námper iwiaratin tsawant asamtaí, ⁴³ Arimiatianmaya Jusé arantutsuk, kakaram ajas, Piratui jeá Jesusa ayashin seatajtsa utuamiayi. Nu Jusencha ashí irunin ainia nu anturin ármiai. Niisha Yus ju nunkanam akupin ajasat tusa nákasmiayi. ⁴⁴ Tura Jesusa ayashin seam, Piratusha “wárik jaka” tímiayi. Tuma asa suntara kapitiantrin untsurak “¿Nekas jakayik?” tímiayi. ⁴⁵ Tutaí kapitian “Ee” takui, Jesusa ayashin Jusen tsankatkamiayi. ⁴⁶ Jusesha puju tarachin pépkeran sumarak, Jesusa ayashin itiar áepas penuarmiayi. Tura yamaram kaya tármanum ikusmiayi. Ikius wáitiniam kayan áutumiai. ⁴⁷ Tura Máktaranmaya Marí, Jusé nukurj Marijaj ni ikuiamun ii wajarmiayi.

16

*Jesus nantakmiania nu**(Mateu 28.1-10; Rúkas 24.1-12; Juan 20.1-10)*

¹ Tura ayampratín tsawant nankaamasmatai, Máktaranmaya Marisha, Jakupu nukurí Marisha, Sarumáisha, kunkuinian Jesusa ayashín kuertai tusar sumakarmiayi. ² Tura kashin Tumintín, ti káshik, nantu yáma jiiniaí, iwiarsamunam jeariarmiayi. ³ Wésar chichainiak “Iwiarsamu wáitirí kayancha ¿yaki akanketramkattají?” tiarmiayi. ⁴ Jear uunt kaya akankekman wáinkiararmiayi. ⁵ Iwiarsamunam wayawar, natsan esaram puju pushin entsar, untsuurnumaanj pujan wáinkiar ti ashamkarmiayi. ⁶ Túmainiakui natsa tímiayi “Ashamkairap. Nasarétnumiá Jesúsnum jakama nu éarme. Iniantkimiuiti. Juí pujatsui. Wátsek, ju ikiusmanum ístarum. ⁷ Túrarum werum Pítrusha, chíkich unuiniamurísha ju ujaktarum. Kariréanam atumin émkíyi. Turammarumna núnisan túruna wáinkíattarme” tímiayi. ⁸ Niisha ti ashamainiak purushniarar iwiarsamunmaya tseke wearmiayi. Ti ashamainia ásar, chikichkinkesha ujakcharmiayi.

*Máktaranmaya Marín Jesus wantintiúkmania nu**(Juan 20.11-18)*

⁹ Émkaka Tumintín ti káshik Jesus nantaki, Máktaranmaya Marín wantintiúkmiayi. Nu María enentáiyá siati iwianchin Jesus yaunchu ajapruyayi. ¹⁰⁻¹¹ Marisha Jesusa nemari kúntuts uutu matsatainian werí, “Jesus iwiaakui, imia wi wainkiajai” tímiayi. Támaítat anturkacharmiayi.

*Jesus jimiará shuaran wantintiúkmania nu**(Rúkas 24.13-35)*

¹² Tura urum jimíara shuar Jerusarénnumiá tsaniñ weenan, Jesus nusháa iira ajas tarimiayi. ¹³ Niisha Jesusan wáinkiar waketkiar, unuiniamurín ujakarmiayi, tura ni chichamencha anturkacharmiayi.

*Jesus ni unuiniamurín akupkarmiania nu**(Mateu 28.16-20; Rúkas 24.36-49; Juan 20.19-23)*

¹⁴ Nuyasha Jesusa aunte unuiniamurí misanam pekaamkar pujuinian Jesus tarimiayi. “¿Atumí enentáí urukamtaí kátsuram ainia, urukamtaí Winia nekas enentáimtursachuram?” tímiayi. Ni nantakmarín wáinkiaru chichamen anturkacharu ásmatai kakantramiayi. ¹⁵ Nuyá chichaak “Ashí nunkanam wetarum. Túrarum ashí shuarum Yusa shiir chichame etserkatarum. ¹⁶ Shuar anturak imiani uwemprartatui. Shuar antukcharka, tuke sumamawartatui. ¹⁷ Shuar winia náarun pachis, Yúsán nekas enentáimtakka, juna túrawartatui, Yusa kakarmarín iniakmastaj tusa: iwianchin jíiki akupkartatui; chíkich chichamjaj chichasarukamtaí Winia nekas enentáimurtatui; ¹⁸ napincha achiksha, tseasnasha úmaksha, jaa ajaschartatui. Jaa shuaran ni uwejejai antín, nu shuaran péñker awajsartatui.” Tu tímiayi.

*Jesus nayaimpiniam wakamiania nu**(Rúkas 24.50-53)*

¹⁹ Jesus chichas amukmatai, Yus nayaimpiniam jukimiayi. Túruna Yusa untsuuríní pujusmiayi. ²⁰ Ni unuiniamurísha jíinkiar, ashí nunkanam Yus-Chichaman etserkarmiayi. Tura Uunt Yus nin yáñmiayi. Tura etserainiakui, ashí aents ni kakarmarín nekaawarat tusa, aentsti tujintiamun túratniun susamiayi. Nuke atí.

Yúsán Shiir Chichamen

RÚKAS aarmia nu

¹ Nekas iinj Jesús túramia nuna “Ímiatrusañ áartajai” untsurj aents tiarmiayi. ² Yámankamtaikniumiñ ísarmia nú shuar, tura Yus-Chichaman etserkatniun yáinkarmia nusha in unuítiamprarmia nútiksarañ áartinian wakeriarmiayi. ³ Wisha núnisnak esetsaran enentáimsan, yámankamtaikniumiñ nuna nekaamjai. Tuma asan túrunamia nuna ímiatrusnak amincha áatratajtsan wakerinjame, winia úuntur Tiupiru. ⁴ Jintintramawarma nú nankaamas nekaata tusan wakerakun áatjame.

Ímiakratin Juan̄ka akiiniatniur̄in ujakmiania nu

⁵ Jutía nuñkanam uunt akupin Erutis akupkamia nú tsawantin Israer-shuar Yúsnan pujurin ámiayi, ni naarj Sakariás. Niisha Aptías weeauyayi. Ni nuwēsha Irisapít Arun weeauyayi. Irisapítia úuntrjsha Israer-shuar Yúsnan pujurin ámiayi. ⁶ Yúsajisha Sakariássha Irisapítcha máí-metek péñker ámiayi. Yus akupkamia nunasha umirin ámiayi. Tuma asamtai péñkesha chíkich nin yajauch chicharkatin atsuarmiayi. ⁷ Yusjaj péñker wekainiyat Irisapít júrechuyayi. Túrasha máí úuntach ámiayi.

⁸⁻⁹ Israer-shuar Yúsnan pujurin chíkich weeanmaya nuyá chíkich weeanam, an̄kant an̄kant Yusa jeen takáu ámiayi. Chíkich tsawant, Sakariás weeá takastin amia nuj, Sakariáska kun̄kuinian ekeemaktaj tusa inít wayatniuyayi. ¹⁰ Inít kun̄kuinian ekeemaj untsurj aents aani matsamsar Yúsán áujtak pujuarmiayi. ¹¹ Sakariás inít pujaj kun̄kuin ekeematainiam untsuurnumaan̄j aya aneachma nayaimpinmaya suntar wajumiayi. ¹² Nuna wajan wáiniak Sakariáska purushnairmiayi. ¹³ Túrasha nayaimpinmaya suntar chicharuk tímiayi “Sapijmiakaip Sakariása. Nekaata. Ame seamna nuna Yus anturtamkayi. Tura ame nuwem Irisapít uchin takastuai. Nii akiiniamtai, “Juan̄” anaikiata. ¹⁴⁻¹⁵ Ame uchiram akiiniattana nuka Yusajisha nankaamantu átatui. Tuma asamtai akiiniamtai, amesha shiir enentáimsam warastatme. Tura chíkich aents untsurj warasartatui. Ame uchirmesha karía ainia nuna umarchattawai. Tura áetak akiinchanak Yusa Wakan̄j pim-iutkattawai, tímiayi. ¹⁶ Tura ni shuarin Israer-shuar áiniana nuna, ii Untrj Yusjaj ataksha nawamtikiartatui. ¹⁷ Uunt Yúsajya akatramu átatui. Yaunchu Yúsnan etserin Eriás kakaram etserkamia núnisaj niisha etserkattawai. Nujaj shuaran ni uchirijjaj nawamtikiartatui. Tura umichu áinia nuna eseer enentáimtikrartatui. Ni Untrj taakuú ni enentáj iwiamamu arti tusa etserkattawai” tímiayi nayaimpinmaya suntar.

¹⁸ Nuna takui Sakariás nayaimpinmaya suntaran tímiayi “¿Nunasha warijjajin paant nekaataj? Wisha nuarjaj máí-metek ti úuntchichukaitiaj” tímiayi.

¹⁹ Tutai nayaimpinmaya suntar tímiayi “Wikia Kapriiraitjai, Yusa suntarintjai. Nii akatturmatai chichastájam tusan tura nu shiir chichaman ujaktájam tusan tarijme, tímiayi. ²⁰ Túrasha wí tájamna nu “nekasaiti” tu enentáimprachume. Tura asam uchiram akiintsajin muut ajastatme. Chichastin pen̄ké tujinkiatame. Tura wí tajana nu, tsawant jeamtai túrunattawai.”

²¹ Nuna tumaj Yusa jeen aani pujusar, Sakariásan nákas pujuarmiayi. “¿Urukamtaik inít we imiá men̄kaka?” tu enentáimprarmiai. ²² Nuyá Sakariás jünkimtai, áusartaj tukamá tujinkiarmai. Sakariáska, muut ajasu asa, aya úwjmiasañ chichamiayi. Túmakui, Sakariás inít pujus Yúsaj wáimiakun nekaawarmiayi.

²³ Yusa jeen takastin tsawant̄rj amuukamtai Sakariáska ni jeen waketkimiayi. ²⁴ Nuyá ukunam ni nuarj Irisapít ajaprukmiayi. Tura sen̄ku nantutin aya jeen pujusmiayi. ²⁵ Jeá pujus, “Aents wishikruiniakuú natsantan jurutkitiaj tusa uchi takustinian Yus tsan̄katrukai” tu enentáimpramiayi Irisapít.

Jesusa akiiniatniur̄in nayaimpinmaya suntar etserkamiania nu

²⁶ Nu sen̄ku nantu nankaamasmatai Yus ni suntarin Kapriiran Nasarét péprunam akupkamiayi. Nu pepru Kariréa nuñkanam pujawai. ²⁷ Nasarétnumiñ nuwan, naarj Marí, iyutí tusa akuptukmiayi. Nu núwaka áishman̄jaj pujuchuyayi. Niisha Jusejaj nuatnaikiatsa anajmanair pujumiayi. Juseka uunt Tawit weeauyayi. ²⁸ Wats, nayaimpinmaya suntar Marí pujamunam wayá tímiayi “Yus péñker enentáimturma asamtai, ámin winitjame, Mariya. Yuska ámin nemartamuk ashí nuwá nankaamas péñker awajtamui” tímiayi.

²⁹ Tura Marisha nayaimpinmaya suntaran wáiniak, chichaamun nékatsuk “Urukamtaik tu chicháa” tu enentáimpramiayi. ³⁰ Nuyá nayaimpinmaya suntar chicharuk tímiayi “Mariya, sapijmiakaip. Yus shiir enentáimturmawai. ³¹ Antukta. Amesha ajapruktatme. Túram Uchi takustatme. Nusha “Jesús” anaikiata. ³²⁻³³ Niisha uunt átatui. Nincha “Uunt

Naŋkaamaku Yusa Uchiriꝝ tiartatui. Tura Uunt Yuska yaunchu Tawitian uunt akupniuri awajsamia núnsaŋ ame Uchirmin ame shuárumin Israer tutain Uunt akupin awajsattawai. Ni akupeamurisha Yus susamu asa penké amuukashtiniaiti” tîmiayi.

³⁴ Nayaimpinmaya suntar nuna tutai Marí tîmiayi “Nusha winia áishur atsajsha, ¿itiurak túrunataj?”

³⁵ Tutai nayaimpinmaya suntar Marín tîmiayi “Yusa Wakaní tarutramtatui. Tura yuraŋmia núnsaŋ Uunt Yusa kakarmarí ijmattawai. Nu tuma asamtai Uchi akiiniattana nu Yúsaiya asamtai, “Yusa Uchirínti” tiartatui, tîmiayi. ³⁶ Tura Irisapít ame kaná kaimia nusha núnsaŋ weamtanam ajaprukai. Iis, “júrechuiti” tiarmia nu, yamaikia sais nantu pujawai ajamtin. ³⁷ Yúsjaŋkia itiurchatka penké atsawai” tîmiayi.

³⁸ Tutai Marí tîmiayi “Yus wakeramun túriniaitjai wikia. Ame tame nuna Yus wakerana nuna túrutati, tajai” tîmiayi. Nuna tîmiatai nayaimpinmaya suntarka wémiayi.

Irisapítian Marí iyumiania nu

³⁹⁻⁴⁰ Nu tsawant Marí wárikmas muranam Jutía nuŋkanam ni kaná kaŋn Irisapítian iyutaj tusa wémiayi. Sakaríasaj jeá, ni jeen wayá, Irisapítian áujsamiayi.

⁴¹ Marí áujeamun antukmatai Irisapítia ampujén uchirí muchitkamiayi. Tumaj Yusa Wakaní ni enentáin pimiutkamiayi. ⁴² Nuŋkia kakantar chichaak Marín tîmiayi “Yus amincha ti shiir awajtamsaiti. Tura Uchiram akiiniattana nusha Yus shiir awajsamuiti. ⁴³ Kajrua, ame winia Uuntru nukurí áminin, Yus winia ti waitnentra asa, áujsata tusa ámin akuptamkachaik, tîmiayi. ⁴⁴ Warí, wisha ame áujtamna nuna ántakui ampurju uchi waras muchitrutkayi. ⁴⁵ Amesha Yus turámiania nu umikiu asam shiir pujame. Yus tîmia nu túrunattawai auka” tîmiayi.

⁴⁶ Nuna tinia iniasamtai Marí juŋa tîmiayi:

“Wikia tuke enentairjai “Yus timiá úuntaiti” tajai. ⁴⁷ Tura Uunt Yuska winia Uwemtikruru asamtai ti warajai. ⁴⁸⁻⁴⁹ Wisha péejchach aiŋ ni wakeramurín umiktajtsan wakerakui winia enentáimturayi. Tuma asamtai ashí aents, “Marincha Yus shiir awajsaiti” tuke turutiartatui. Yuska imiá penker tura imiá kakaram ana nu winia ti uuntan túrutaiti. Tuma asamtai ashí aents “Marincha Yus shiir awajsaiti” turutiartatui. Núnaka yamá naŋkamamunak tuke turutú ajartatui. ⁵⁰ Tura Nin umirkatniun wakerana nunasha Yus tuke waitnentrartatui. ⁵¹ Ti itiurchatan páchitsuk túraití Nii. “Naŋkaamantuitjai” tu enentáimtumainia nuna nupetkaiti. ⁵² Ashí akupin ainia nuna awakkaruítí. Tura iksaŋ péejchach ainia nuna uunt awajsaruítí. ⁵³ Péŋker ana nuna kitiamainiakui Yus péŋkeran súsaruití. Tura antsu “ashí takakjai” tuinia nuna aya júnik awajsaruítí. ⁵⁴ Israer-shuar Niiniu ájinia núnaka waitnentratniun kajinmattsuk yáimákuitji. ⁵⁵ Yaunchu ii Uuntri Apráaman tura ní shuarnasha “túratattajai” timia nuna ímiatrusaŋ tuke túraití.” Nuní tîmiayi Marí.

⁵⁶ Marikia Irisapítjai menaintiú nantu pujus ni jeen waketkimiai.

Imiakratin Juánka akiiniamuri

⁵⁷ Nuyasha ni jurertin tsawantri jeamtai Irisapítcha uchín áishmaŋkan takusmiayi. ⁵⁸ Tura ni shuarisha, ni írutramurisha “Irisapítian Yus ti shiir yaŋnmiayi” tuŋiak, nin iyuwearmiayi. Tura máí-metek warasarmiai.

⁵⁹ Israer-shuar túrutai júnisaiti: uchi akiiniamurí uchu tsawant jeamtai, shunichirí nuapen tsupiktin awai, sirkunsisiún tutai. Yus nuna tú tiniu asamtai tuke túrin ármiai. Wats, Irisapítia uchirí akiiniamuríni uchu tsawant jeamtai tsupirkatai tusar ni jeen jearmiayi. Nuŋkia ni aparí naarí Sakarías anaikiataitsar wakeriarmiayi. ⁶⁰ Tura ni nukurí tîmiayi “Atsá. Antsu ni naarí Juán átutai.”

⁶¹ Tutai tiarmiayi “¿Nusha urukamtia? Amée shuarumsha nu náartincha áwak’ tiarmiayi. ⁶² Nuŋkia uchi aparín “¿Warí anaikiatajtsam wakeram?” tusar aya úwejejaŋ iniasarmiai.

⁶³ Tutai uchi aparísha “Nakash surusta; áartaj tusan wakerajai” tusa aya úwejejaŋ iniakmamiayi. Takui nakash susam, ni naarí Juánkaiti, tu ármiai. Nuna wáinkiar “Ayawá urukakuŋ ta” tu enentáimprarmiayi. ⁶⁴ Nú chichamaik Sakarías chichatsuk pujamun chichakmiayi. Tura nuŋn Yusa náaríncha shiir awajsamiayi. ⁶⁵ Nuŋkia ni írutramurísha ashamkarmiayi; tura ashí Jutía nuŋka murá amia nuŋ nu túrunamun ujakam ashí nekaawarmiayi. ⁶⁶ Nu túrunamun antukar ti enentáimsarmiayi. Tura “ju uchín Yus nekas pujurtsuk. Tuma asamtai uunt ajas ¿urukuk ati?” tu enentáimprarmiayi.

Sakarías Yus jintintiam tîmiania nu

⁶⁷ Uchi aparí Sakarías, Yusa Wakaní pimiutkam tura Yus jintintiam, juŋa tîmiayi:

⁶⁸ “Israer-shuartí ii Yusrí naarí shiir awajsatniuitji. Íi Yusrísha tarutmaiŋji. Tura uwemtikrampraitji. ⁶⁹ Yaunchu ii uuntri Tawít Yusa wakeramuríjjaj uunt akupin áchamkia. Tura ni ukurín ti kakaram Uwemtikiartinian suramsaitji. ⁷⁰⁻⁷² Yuska

ii nemasriya tura in nakitramainiajnia nuyá uwentikrampratniun enentáimsamia nuna, yaunchu ni etserniurin péñker armia nuna ujakmiayi. “Winia ti penker chichamprun tájana nuna yapajitsuk umirkan tuke wáitnentratajrume” yaunchu ii úntrin tímiania nunasha ni etserniurin ujakarmiayi. Yaunchu nu ujakma yamá iisha wainji. ⁷³⁻⁷⁵ Nu ujakman Yuska yámankamtaik imiá yaunchu ii uuntri Apráaman tichamkia. Apráaman ujakmia nu júiti: “Wi wakeraj nútiksaran, Winia umirtukar péñker wekainia nuna ni nemasriya uwentikrattajai. Sapijmiatsuk winia tuke takartusarat tusan túrattajai” Yus tímiai Apráaman. Iisha ni shuarj asakrin, nuna taku incha túramaji. ⁷⁶ Tura amincha, uchiru, “Uunt Yusna etserniuiti” turamartatui. Amesha ni tátintri iwiarataj tusam Uuntaj émkim wétatme. ⁷⁷ Ni shuarj, ni tunaarj tsankurnar uwemprarat tusam túrattame. ⁷⁸⁻⁷⁹ Yuska ashí shuaran anea asa, incha wáitnentrak ni pujamunmaya ni tsáapnintrin suramsaitji. Ni enentáin kiritniunam wekainia nuna, mesertinnium jeatemá ásarmatai, ni tsáapnintrj jeat’ tusa túrait. Tura ashí incha ii enentáin imiatkinchanum wekasarmí tusa túrait.” Nuní tímiai Sakarías.

⁸⁰ Uchisha tsakarmiayi. Tura Yúsan nekaki-nekaki wémiai. Israer shuarum etserkatín tsawantrj jeatsajinkia atsamunam pujuyayi.

2

Jesusa akiiniamuri (Mateu 1.18-25)

¹ Wats, Juan akiiniamia nú uwitin uunt akupin Akustu ashí nunkanam áentsun nekapmararti tu chichakmiayi. ² Nu nekapmartinian yaunchu túrushtain yamá túriarmiayi. Siria nunkanam Seriniu akupin pujáj túrawarmiayi. ³ Ni naarj áartaj tusa ashí shuar ni nunkenj wétin ármiai. ⁴ Tuma asamtaí Jusé Nasaréé péprunmaya Kariréa nunkanam amia nuyá jinki Piriñ péprunam Jutia nunkanam amia nuj wémiai. Juseka Tawit weeanam akiinia asa, ni nekas nunkenka Piriñkauyayi. ⁵ Nu asamtaí, ni náarj áartaj tusa Jusé wémiai Marijjai. Marisha Jusé núweyayi. Tura tsaniñcharuyayi. Túmaitai Marisha Yusa Wakanj kakarmarijjai ajamtiniuyayi. ⁶ Tura nuj Piriñnum pujuiniaj Marí takustintrj jeamiayi. ⁷ Nu jiwaijirj uchin áishmankan takusmiayi. Tura uchi penutaijjaj penuar, waaka yurumtainiam áepsamiayi. Írar kanutainiam pujustin ankant atsá asamtaí túrawarmiayi.

Murikiun wáinnun nayaimpinmaya suntar Yus akatar akuptukmia nu

⁸ Tura Piriñnum tíjiuch murikiun wáinin kashi murikrin wáiniuk pujuarmiayi. ⁹ Túmainiaj nayaimpinmaya suntar murikiun wáinin matsatainiam wantintuukmiayi. Tura Yúsnumjá tsáapnin ni matsatainiamunam etsantramiayi. Túrunamtaí murikiun wáinniuka ti ashankarmiayi. ¹⁰ Túrasa nayaimpinmaya suntar tímiai “Ashamprukairap. Ashí áentsnum ti warastin atí tusan ti penker chichaman itiarjarme. ¹¹ Júiti: yamá tsawantaj uunt Tawitia péprurj Piriñnum yaunchu Yus anaikiamu KRISTU tutaí, uwentikrampratj tusa akiinturmarme. Nu Uchisha ashí áentsun akupniuiti, tímiai. ¹² Tura jujaj nekaattarme: uchi penutaijjaj penuarma waaka yurumtainiam tepá wáinkiatarme. Nu wáinkiarum nekas júiti, tu nekaattarme.” ¹³ Nu chichamaik nayaimpinmaya suntar ti untsurj, nayaimpinmaya káunkarmiayi. Túrawar Yusa naarj shiir awajainiak juna tiarmiayi:

¹⁴ “Nayaimpinmasha Yus nankaamantuiti tu enentáimtusarti. Tura ju nunkanmasha Yusjaj nawamnaikiaru aina nu imiatkinchanum pujusarti.” Tu tiarmiayi.

¹⁵ Tura Yusa suntarj nayaimpiniam waketiarmataí murikiun wáinin tiarmiayi “Wats, Piriñnum wárik wetái. Nu túrunamu Yus turamajnia nu iyumi” tiarmiayi.

¹⁶ Nuna tiar wárik wearmiayi. Tura Marincha Jusencha wáinkiarumiayi. Tura uchincha waaka yurumtainiam tepan wáinkiarumiayi. ¹⁷ Wear nuna wáinkiar, nayaimpinmaya suntar uchi túrunamurj timia nuna etserkarmiayi. ¹⁸ Tura murikiun wáinin tiarmia nuna antukaruka ti enentáimtusarmiayi. ¹⁹ Túrasa Marikia ashí túrunamia nuna ni enentáijjajinkia enentáimtu pujumiayi. ²⁰ Tura murikiun wáinniuka antukarmia nuna enentáimtusar, tura ísarmia nunasha enentáimtusar “Nayaimpinmaya suntar ujatmakmajnia tímiatrusañ túrunayi” tiarmiayi. Tuma ásar Yusa náarj shiir awajsar kantampruawar waketiarmiayi.

Uchin Jesusan Yusa Uunt Jeen itiarmania nu

²¹ Tura uchi akiiniamu uchu tsawant jeamtaí, ni túrutairjín túrin ásar, ni shunichirj nuapen tsupirkarmiayi. Túrawar Marí ajapratsajin nayaimpinmaya suntar tímia nútiksaj “Jesus” anaikiarumiayi. ²² Tura Muisais akiiniatniunam akupkamia núnisaj, tsawantrj jeamtaí, Yusa Uunt Jeen Jerusarénnum uchin Yus iiktustai tusar júkiarmiayi. ²³ Kame Yus-Papiniun ju aarma awai:

“Ashí uchi iwíajiri áishman akiinkiuŋka Yusna átatui.”²⁴ Tuma asamtai, Marí Yusa Uunt Jeen wáitsuk pujamu wayatniuri jeamtai, uchin Yus iistí tusa Yusa Uunt Jeen Jerusarénum pujana nuji itiarŋiayi. Tura yampitsan jímiarana súsarŋiayi. Muisáis akupkamun umiiniak nuna túrawarŋiayi.

²⁵ Nu túmaj Semeún naartin áishman Jerusarénum pujumiayi. Semeúnsha Yusa Wakaní pujurama asa péŋker áishmanŋauyayi. Yúsana nekas enentáimtinuiyayi. Yusa anaikiamurjijai Israer-shuar anŋanta ajastin jeati tusa nákauyayi. ²⁶ “Winia anaikiamur KRISTU tutai wáintsuk jákashatame” uunt Yusa Wakaní tu jintintiamiayi. ²⁷ Nú Semeún Yusa Wakaní “wetá” tutai, Yusa Uunt Jeen wémiayi. Tura nú tsawantai Muisáis tímia núnisaŋ umirkatai tusar Marisha Jusesha uchin Jesusana Yusa Uunt Jeen itiarŋiayi. ²⁸ Itiarŋimatai Semeún uchin jusa miniakas Yúsana áujuk juna tímiai:

²⁹ “Yamaikia, Uunta, Amiin wi jeatin anŋanta atí. Turutmiamna nu ímiatrusmek umikiume. ³⁰⁻³¹ Ju Uchi ashí aents uwentikrartá tusam susamna nuna yamá imia winia jiiurujai wáinkiajai. ³² Israer-shuar achina ainia nu tsáapniniu wekasarat tusa akuptukmaiti ju Uchi. Tura Israer-shuar Áminiuram ájiniya nuna ashí aents shiir enentáimtikrartí tusam ju Uchi akuptukmaiti. Nuna wáinkian shiir enentáimsan jákatniuitjai.”

³³ Tura Semeún Uchiniun tu chicharkui Jusesha Jesusa nukurjsha ti enentáimprarmiai. ³⁴ Semeúnsha chichaak “Yus shiir enentáimturmasarti” nin tímiai. Nuyasha Marín chicharuk tímiai “Nekaata. Ju Uchin Israer-shuartisha untsurj nakitrar iniarartatji. Tura chikich Israer-shuartikia ju Uchin shiir enentáimtusar ti wararsartatji. Tura Uchiram Yusa kakarmarín ti paant iniakmastatui. Tuma aŋ untsurj Aun yajauch chichariartatui. ³⁵ Nujai shuar ni enentáin warinia enentáimia nu, paant átatui. Maaj, ashí nu túmakui, ijiumua núnismek ame enentáimin ti wáitsattame, Mariya.” Tu chichasŋiayi Semeún.

³⁶ Nuwasha Ana naartin nuji Yusa Uunt Jeen pujumiayi. Niisha Yúsana etserniuyayi. Ni aparjsha Panuíruyayi tura Aser shuaruyayi nu nuwa. Niisha ti úntchiyayi. Niisha yama nuatnaikiamujai siati uwi ni áishrijjai tsanin pujusarmiayi. ³⁷ Tura wajemamiayi. Tura uchenta kuaru uwi takakuwayi. Tura ninkia Yusa Uunt Jeenia jintsuk káshisha tsawajsha tuke Yúsana áujniuyayi. Tura yurumsuk Yúsana áujniuyayi. ³⁸ Semeún tuasua amikmatai Anasha taa, Uchin wáiniak Yúsana yuminsamiayi. Tura Jerusarénum Yus uwentikrampratai tusa nákarmia nuna áujkuŋka uchin áujmat wémiayi.

Nasarénum wakеткиarmiania nu

³⁹ Nuyá Yus tímia nuna ashí túrawar Kariréa nunŋanam, kame nii pujumia nú peprunam Nasarénum Jusesha Marisha Uchisha wakеткиarmiayi. ⁴⁰ Uchi Jesus tsakaki, kakaram ajaki tura nú nanŋaamas nekaki wémiayi. Tura Yus Nin ti shiir awajsamiai.

Jesus Yusa Uunt Jeen túrunamuri

⁴¹ Jusesha, Jesusa nukurjsha tuke uwitin paskua námper jeakui Jerusarénum weu ármiayi. ⁴² Ni túrutairi túruiniak, Jerusarénum weak Jesusana tuse uwi jeamtai júkiarmiayi. ⁴³ Námper amuukamtai ni nukurjsha Jusesha nékachmanus Jesuska Jerusarénum juákmiayi. ⁴⁴ Marisha Jusesha “wí shuarjai winiawai” tusa, núnaka eatsuk chikichik tsawant wekasarmiayi. Nuyá wáinkiataj tukamá, ni shuarjin tura ni nékamunam eakarsha, ⁴⁵ wáinkiacharmiai. Nuŋkia Jerusarénum ataksha waketrukiarmiayi, eaktai tusar. ⁴⁶ Tura menaintiú tsawant eakar Yusa Uunt Jeen Yus akupkamun jintinnian anturak anintrú pujan wáinkiarŋiayi. ⁴⁷ Tura nuji ashí Jesusana anturkarmiania nu, niisha ti nékakui tura áimtanash ti péŋker áimkiui, ti enentáimturarmiayi. ⁴⁸ Ni aparjsha nukurjsha tumáa pujan wáinkiar, ti enentáimprarmiai. Tura ni nukurj chichaak tímiai “Uchiru, ¿ausha urukamtai itiuŋchat enentáimtikrurram? Ame apasha wisha urukayik tusar ti eakjame” tímiai.

⁴⁹ Tutai Jesus tímiai “¿Urukamtai eaktrum? Winia Aparnan túratniuitjiana nuka nékatsrumek” tímiai.

⁵⁰ Tura tímia núnaka péŋké nekacharmiai. ⁵¹ Nuyá Jesus niijjai Nasarénum wakеткиarmiayi. Ninkia tuke umiriarmiayi. Ashí nu túrunamun Marikia tuke enentáimtu pujumiayi. ⁵² Jesuska tsakaki, tura nekaki wémiayi. Yussha tura aencha Nin shiir enentáimtiarmiayi.

3

Imiakratin Juanka etserkamuri

(Mateu 3.1-12; Márkus 1.1-8; Juan 1.19-28)

¹ Tipiriu uunt akupin pujamu kinse uwi jeamtai, Jutía nunŋanam Punseu Piratu akupin pujumiayi. Tura Kariréa nunŋanam Erutis akupin pujumiayi. Itiurea nunŋanmasha Trakuniti nunŋanmasha ni yachi Jiripi akupin pujumiayi. Tura Apirinia nunŋanam Risania akupin pujumiayi. ² Tura nu uwitin Anasha Kaipíasha Israer-patri uuntri

pujuarmiayi. Nu uwitin Sakaríasa uchirí Juan atsamunam pujan Yúsaiya chichaman antukmiayi. ³Nuyá Jurtañ entsanam supichik matsamarma nuna Juan wekaatusar juna tímiayi “Winia tunaarun Yus tsankurturat tusarum, enentai yapajjárúm imiantiarum.” Tu ujakmiayi. ⁴Nu ujakman Isayas yaunchu juna áarmiayi:

Atsamunam wekaana nu untsumun ántuiniawai. Nii untsumuk juna tawai: Atumí enentáí Uunta jintí iwiarturatarum; naka awajsatarum. ⁵Jápaaka ainia nusha áimkiamu arti. Naint ainia nusha paka awajsamu arti. Jintia apijiaru ainia nusha naka jiikmia arti. Tura pujutrin ainia nusha métekrak paka awajsamu arti. ⁶Túrunamtai ashí nuñkanmayá aents Yúsaiya uwempratin aan nekaawartatui.

⁷Untsurí aents imiatit tusar tariarmia nuna Juan chicharainiak tímiayi “Napia áaniutirmincha, ti asutniátin jeatemáttana nuyá uwempratarum tusa zyá ujatmakuram? tímiayi. ⁸“Iikia Apraám weeatji, tuma asakrin Yus shiir enentáimturmají” tu enentáimtumaisairap. Antsu enentáim yapajjáimuitkiuñkia péñker wekaamurmijíai paant iniakmatarum. Warí, Yus wakerakka, ju kayan Apraám shuarín páchitsuk najankainti, tímiayi. ⁹Aneartarum. Numi ajaktinian kampuwárin jacha atuttsamuiti. Numi péñker nereatsna nuka ajakar jinium apeamu ártatui” tímiayi.

¹⁰Tutai aentska enentáimprar “¿Nuñkia ititurkatjik?” tiarmiayi.

¹¹Tutai Juan tímiayi “Kuit ititurkatjik takakna nu, takaktsuna nuna chikichan súsatniuiti. Yurumkan takakna nusha takaktsuna nuna ajamsatniuiti” tímiayi.

¹²Uunt akupniu kufrin juu armia nú shuar imiantiaj tusar Juáñkan weriar aniasarmiayi. “Uunta, ¿iisha warí ititurkatjik?” tiarmiayi.

¹³Tutai Juan tímiayi “Kuit uunt akupin tana nu iniañkasrum achikiairap.”

¹⁴Suntarsha aniasarmiayi “Uunta, ¿iisha warí ititurkatjik?”

Juansha tímiayi “Ame kakarmarmijíai chikichna jurukip. Tura nin tsanumpruraip. Tura uunt akupin akirmaná nujáin warasta” tímiayi.

¹⁵“Ju Juan Yusa anaikiamurínchuashit” tu enentáimsar paant nekaataitsar náarmiayi.

¹⁶Tumaj Juan tímiayi “Wikia aya ayashmin entsanam imiajrumé. Tura wijíai nankaamas ana nu tátatui. Ni sapatrj jinkiamurínkisha atitrachminiaitjai. Niisha taa, imiantinia áanis tura júya áanis Yusa Wakanin enketramprattarme. ¹⁷Shuar aruasan awajtia núnisan, nusha yajauach ana nuna ajapa aya péñkernak júuktatui. Neren ikiustatui tura yajauachinkia ji tuke kajinchatainiam apeattawai” tímiayi.

¹⁸Juan nu arant shiir chichaman áentsun ti núkap ujakarmiayi. ¹⁹Tura nuyasha akupin Erutisan chicharkamiayi. Ni yachí Jiripi nuarín Jirutíasan kasarak nuatkuí tura chikich yajauachincha túrakui chicharkamiayi. ²⁰Tura Erutis núnaka ántutsuk chikich yajauachin túramiayi. Juáñkan achik sepunam enkeamiayi.

Jesusa imianmiari

(Mateu 3.13-17; Márkus 1.9-11)

²¹Nu túruntsain, Juansha ashí nú nuñkanmayá áentsun imiak pujurainaj Jesussha imianmiayi. Niisha Yúsun áujuk pujañ nayaimpisha uranmiayi. ²²Tura Yusa Wakaní yámpits najanar paant túrumiayi. Tura Yus nayaimpinmayá chicharuk “Amek winia aneamur Uchiruitme; Ámin ti wararjame” tímiayi.

Jesukristu shuari

(Mateu 1.1-17)

²³Jesus trainta (30) uwí takaku asa ni takatrin nankamamiayi. “Jusé uchirínti” tiniu armiai. Jusésha Iriá uchiríyayi. ²⁴Iriáshá Matata uchiríyayi; Matat Riwí uchiríyayi; Riwí Mirkía uchiríyayi; Mirki Jana uchiríyayi. Jana Jusé uchiríyayi; ²⁵Jusé Matatíasa uchiríyayi; Matatías Amusa uchiríyayi; Amus Najuma uchiríyayi; Najum Esrí uchiríyayi; Esri Nakaia uchiríyayi; ²⁶Nakai Maata uchiríyayi; Maat Matatíasa uchiríyayi; Matatías Semái uchiríyayi; Semái Jusé uchiríyayi; Jusé Jutáa uchiríyayi; ²⁷Jutá Juana uchiríyayi; Juana Resa uchiríyayi; Resa Surupapira uchiríyayi; Surupapir Saratiira uchiríyayi; Saratiir Nerí uchiríyayi; ²⁸Neri Mirkí uchiríyayi; Mirki Atí uchiríyayi; Atí Kusama uchiríyayi; Kusam Irmutama uchiríyayi; Irmutam Ira uchiríyayi; ²⁹Ir Jusué uchiríyayi; Jusué Irieséra uchiríyayi; Iriesér Jurema uchiríyayi; Jurem Matata uchiríyayi; ³⁰Matat Riwí uchiríyayi; Riwí Semeúnka uchiríyayi; Semeún Jutáa uchiríyayi; Jutá Jusé uchiríyayi; Jusé Junañka uchiríyayi; Junañ Iriakimia uchiríyayi; ³¹Iriakím Mirea uchiríyayi; Mirea Mainiánka uchiríyayi; Mainián Matata uchiríyayi; Matata Natanka uchiríyayi; ³²Natan Tawitia uchiríyayi; Tawit Isai uchiríyayi; Isai Upitia uchiríyayi; Upit Puusa uchiríyayi; Puus Saramúnka uchiríyayi; Saramún Naasúnka uchiríyayi; ³³Naasun Aminiatapa uchiríyayi; Aminiatap Arama uchiríyayi; Aram Esuma uchiríyayi; Esum Paresa uchiríyayi; Páres Jutáa uchiríyayi; ³⁴Jutá Jakupa uchiríyayi; Jakup Isaka uchiríyayi; Isak Apraáma uchiríyayi; Apraám Tarea uchiríyayi; Taré Nakura uchiríyayi; ³⁵Nakur

Seruka uchiríyayi; Seruk Rakaua uchiríyayi; Rakau Pirikia uchiríyayi; Pirik Epera uchiríyayi; Eper Sará uchiríyayi; ³⁶ Sara Kainiánka uchiríyayi; Kainián Arpaksata uchiríyayi; Arpaksat Sema uchiríyayi; Sem Nuaia uchiríyayi; Nuai Ramikia uchiríyayi; ³⁷ Ramik Matusarínkia uchiríyayi; Matusarín Enuka uchiríyayi; Enuk Jaritia uchiríyayi; Jarit Maararíira uchiríyayi; Maararír Kainiánka uchiríyayi; ³⁸ Kainián Enusa uchiríyayi; Enus Seta uchiríyayi; Set Atańka uchiríyayi; tura Atań Yus najanamuyayi.

4

Jesusa nekapsamuri

(*Mateu 4.1-11; Márkus 1.12-13*)

¹ Jesusa enentáin Yusa Wakaní pimiutkamiayi. Jesussha Jurtań entsanmaya waketkimtai Yusa Wakaní aents atsamonam jukimiayi. ² Tura nuńsha kuarenta tsawant pujusmiayi. Tura íwianch Nin tunaanum ajuaraintiajtai tusa pujurmiayi. Nu kuarenta tsawantin Jesus yurumsuk puja asa ti tsukammiayi. ³ Nuńkia íwianch chicharuk “Amesha nekas Yusa Uchiríntkiumka ju kaya apatuk najanata” tímiayi.

⁴ Tutai Jesus tímiayi “Yus-Papí tawai:

“Aya apatkujain shuar iwiaaku pujuschamniaiti. Antsu ashí Yus-Chicham tana nujai nekas iwiaaku pujusminiaiti,” tawai” tímiayi.

⁵ Tura nuyá íwianch naint yakí wájakmanum jukí, ashí nuńka ainia nuna ju chichamaik iniaktusmiayi. ⁶⁻⁷ Tura chicharuk tímiayi “Ashí ju nuńka wáinmena nu wíniati. Tura wi wakerajna nú shuaran súsatniuitai. Tuma asamtai tikishmatrurakminkia ju nuńkanam ashí akupkatniun susattajme. Tura nuj ni warirí ainia nusha áminiu átatuí” tímiayi.

⁸ Tutai Jesus tímiayi “Yus-Papí tawai:

“Aya Nińki Yus ame Úuntrum tikishmatram enentáimtustiniaitme.”

Tau asamtai, werumta, iwianchi” tímiayi.

⁹ Ataksha íwianch Jesusan Jeruserén péprunam jukimiayi. Tura Yusa Uunt Jee yakiini iwiaak tímiayi; ¹⁰ “Yus-Papí tatsuk:

“Yuska ni suntarín wáinkiatá tusa akupturmaktatui. ¹¹ Kayanam ajintraín tusa wenkurmaktatui.”

Tuma asamtai nekas Yusa Uchiríntkiumka juyá akaikim iniaata” tímiayi. ¹² Tutai Jesus ámiuk tímiayi “Yus-Papí junasha tawai:

Yus ame Úuntrum nekapsataj tiip.”

¹³ Tuma asamtai íwianch penké tujintiak ishichik tsawant Jesusan iniaisamiayi.

Kariréa nuńkanam Jesus ni takatrín nankamamiania nu

(*Mateu 4.12-17; Márkus 1.14-15*)

¹⁴ Jesus ni enentáin Yusa Wakaní kakarmari pimiutkamu ajas Kariréa nuńkanam waketikimiayi. Nu nuńkanam nankaamantu túramurín áujmatiarimiayi. ¹⁵ Nu nuńkanam ashí péprunam Israer-shuar iruntai jea armia nuju unuiniarmiayi. Tura anturkarmia nuka ni náarín shiir awajsarmiayi.

Jesus Nasarétnum pujumiania nu

(*Mateu 13.53-58; Márkus 6.1-6*)

¹⁶ Ni tsakarmariin Nasarétnum Jesus wémiayi. Tura Israer-shuar ayampratin tsawantin iruntai jeanam wayamiayi, tuke turin asa. Tura wayá Yus-Papin áusataj tusa wajakmiayi. ¹⁷ Nuńkia Yúsnan etserin Isayasa áarmarín súsarmiayi. Nuna urak, nuju juna áarman wáinkiamiayi:

¹⁸ Yusa Wakaní winí pujurtawai. Shuar warainiachun shiir chichaman ujaktinian anaítiukuiti. Kúntuts enentáimiar wake mesek pujuinian tsuártinian akuptukuiti. Tura jii kusuruncha ímtiktinian, tura yajauch awajsamu ainia nuna péńker awasatniuncha, ¹⁹ tura Uunt Yus, shuáran yaíntin tsawantrí jeán etserkatniuncha akuptukuiti.

²⁰ Nu áarman ajsua amik papin nukukmiayi. Tura iruntai jeanam yáimin pujan susa iniais Nińkia etserkataj tusa pujusmiayi. Tura ashí shuar pujuarmia nu émamkes ii pujuarmiayi. ²¹ Jesussha chicharuk tímiayi “Yus-Chicham yamá antukurmena nu yamá tsawantin túrunayi.”

²² Jesusan ashí péńker áujmatiarimiayi. Tura Jesus ti shiir chichaakui ti enentáimprar “Juka Jusé uchirínchukait” tiarmiayi. ²³ Tu enentáimiainiakui, Jesus chicharuk “Atumsha shuar tuke tuinia núnismek, “tsuákratniuitkiumka amek tsuámarta,” turuttiatrume. Kapernáum péprunam aentsti túrachmin túramamna núnismek juńsha túrata tusarum nu turuttiatrume. ²⁴ Túrusha nekas tájarne, Yúsnan etserniun ni nuńkenkikia nii tana nuna anturainiatsui.

²⁵ Nuyasha tájarme, Iriás pujumia nú tsawantin, menaintiú uwí nan̄kaamas yumi yutukcha asamtai ashí Israer nun̄kanam ti tsuka amia nūj ti untsurí waje irunmiayi. ²⁶ Tuma ain nu wajen yāinti tusa Yus Iriásan akuptukchamiayi. Antsu chíkich nun̄kanmayá wajen Sarepta péprunam pujumia nuna yāinti tusa akuptukmiayi. Sarepta pepru Sitiún péprunam tíjiuch pujawai. ²⁷ Núnisan̄ ii nun̄kesha Iriséu pujumia nu tsawantin ti untsurí tunamaru iruniarimiayi. Tura núnaka tsuárcharmiayi. Antsu chíkich nun̄ka, Sírianmayá Naaman̄kan tsuármiayi” tímiayi Jesus.

²⁸ Israer-shuarsha iruntai jēen pujuarmia nu, nuna antukar ti kakerkarmiayi. ²⁹ Tura wajatkjar Jesusan jiki péprunmayá akupkarmiayi. Tura pepru amia nūj naint yakí nan̄katkamunam, nuyá akaki ajuatai tusar júkiarmiayi. ³⁰ Túrasha Jesuska irunar matsat-ainiamunman̄ etempraktak jiinki wémiayi.

Iwianchrkun Jesus tsuármania nu
(Márkus 1.21-28)

³¹ Nuyá Jesus Kariréa nun̄kanam Kapernáum pepru amia nūj wémiayi. Tura Israer-shuara ayampratin tsawantriin tuke etserki wémiayi. ³² Yusa kakarmar̄in takaku asa nujai etserkamiayi. Tuma asamtai “Yusa kakarmar̄ijjai unuitiamtsujik” tiar ti enentáimprarmiayi.

³³ Chíkich tsawantai áishman̄ iwianchrku Israer-shuar iruntai jēenam pujumia nu untsumuk tímiayi, ³⁴ “Inikiartusta. Iikia Áminkia pachistin nakitijai. ¿Warí, incha amukratkataj tusam táchamek? Wikia nékajme. Ámeke ti pen̄ker Tunaaríncha nútme” tímiayi.

³⁵ Tutai Jesus iwianchin kakantar chicharuk “Takamatsata. Ju áishman̄ ikiuktia” tímiayi. Tutai nu chichamaik iwianch áishman̄numiá jiinki weak nun̄ká ajuant ikiukmiayi. Túrasha nekas yajauach awajtsuk ikiukmiayi.

³⁶ Ashí pujuarmiania nu ti enentáimiar mai tunai ajarmiayi. “¿Jusha warí chichamait? Ju áishman̄ Yusa kakarmar̄ijjai iwianchr̄in jiki awematsuk” tiarmiayi.

³⁷ Tura ashí nú nun̄kanam Jesusa túramur̄in áujmatiarimiayi.

Semuñ Pitru tsatsar̄in Jesus tsuármania nu
(Mateu 8.14-15; Márkus 1.29-31)

³⁸ Jesussha Israer-shuara iruntai jēeniá jiinki Semun̄ka jēen wémiayi. Semun̄ka tsatsar̄i tsūer ti jáamiayi. Ti jaakui Jesusan “tsuárturtá” tiarmiayi. ³⁹ Jesussha jaa tepan tsuntsuprua tsūemun “michatrata” tímiayi. Tutai nú chichamaik nuwasha michatramiayi. Nú chichamaik nantaki nincha ayurawarmiayi.

Untsurí jaan Jesus tsuármania nu
(Mateu 8.16-17; Márkus 1.32-34)

⁴⁰ Etsa akaikin aj ni shuarí nan̄kamas sunkurjai jaarmia nuna Jesusan ikiaatkarmiayi. Jesussha jáinian chíkichkiniak chíkichkiniak uwejéjai antin̄kjar tsuárarmiayi. ⁴¹ Ti untsurí iwianchrku armia nunasha iwianchr̄in jir̄kjarimiayi. Jiinkjar iwianchka untsumainiak “Ámeke Yusa Uchir̄inme” Jesusan tiarmiayi. Tura niisha “Jesuska Yusa anaikiamur̄inti” tu nékainiakui Jesus kakantar chicharak itiatmantikiarmiayi.

Kariréa nun̄kanam Jesus etserkamiania nu
(Márkus 1.35-39)

⁴² Kashin káshik tsawaak Jesus péprunmayá jiinki atsamunam Niñki wémiayi. Tura shuarsha eakjar ni pujamunam jeariarmiayi. Tura iijjai tuke pujusat tusar emetataitsar wakeriarmiayi. ⁴³ Túmain̄ Jesus tímiayi “Yus ii enentáin akupkatajtsa wakera nú shiir chichaman chíkich péprunam matsatania nunasha ujaktin̄iaitjai. Nu túrata tusa akupka-muitjai” tímiayi. ⁴⁴ Tuma asamtai Kariréa nun̄kanam Israer-shuar iruntai jēenam Jesus tuke etserki wémiayi.

5

Namakan ti untsur̄in achikiarmiania nu
(Mateu 4.18-22; Márkus 1.16-20)

¹ Chíkich tsawantai Jesus Jinisar̄it antumian̄ka tutainium káanmatkar̄i pujai ti untsur̄i shuar, Yusa chichamen antuktai tusar wakeruiniak Jesusaj káunkarmiayi. Antuktai tusar wakeruiniak kāe ajattsarmiayi. ² Tura jimiará kanun antumian̄kan káanmatkar̄in tepan wáinkiarimiayi. Ni n̄erenniur̄inkia jiinkjar ni nekar̄in nijá pujuinia asamtai kánuka an̄kant ármiai. ³ Tuma asamtai Jesus Semun̄ka kanur̄in enkempramiayi. Tura Semun̄kan chicharuk “Ishichik ajapén juruktia” tímiayi. Nuiñkia kanunam en̄kemas áentsun

káanmatkanan pujuinian unuiniamiayi. ⁴ Unuiniasua amik Semunġan chicharuk “Kanu kunanam jukim neka aġ ajunġatarum” tímiayi.

⁵ Tutai Semunġ tímiayi “Túrasha, Uuntá, káshisha tuke aġ-junġuar tsawarġi. Túrasha penġé achikhġaji. Kame áankisha Ame támajai ajunġatjai” tímiayi.

⁶ Tura ajunġkar namakan ti untsurġn achikiarmiayi. Túram nekasha jaanaki wémiayi. ⁷ Tuma asamtai ni írutkamurġn chġkġich kanunam pujuinian uweġéġai “winitia, yáintkiamnium” tusar untsukarmiayi. Niisha táarmiayi. Túrawar ġimiará kanunam méteġ awajsarmiayi. Tura kanusha inġt wayastatuk ajamiayi. ⁸ Nuna túramtai Semunġ Pítiur Jesusan tikishmatar tímiayi “Uuntá, wikia ti tunaitjai. ¿Wíġiġaisha itiuarak puġustam?” ⁹ Semunġsha ni írutkamurġiġai namakan tímiá untsurġn wáinkiar ashamkarmiayi. Tuma asa Semunġsha nuni tímiayi. ¹⁰ Tura Sepetéu uchiġiġ Jakupusha Juansha Semunġai puġuarmia nusha ashamkarmiayi. Tura Jesus Semunġan tímiayi “Ashamkaip. Yamaikia namaka-achinia áintsamek aents-ġaġu ajastatme.” ¹¹ Nuyasha kanurġn kukar ġukiar, ashí takakmarġnġha ikiukiar Jesusan nemarki wearmiayi.

Tunamaru áishmanġan Jesus tsuármiania nu
(Mateu 8.1-4; Márkus 1.40-45)

¹² Ukunam Jesus chġkġich péprunam puġai tunamaru áishmanġ taa Jesusan wáiniak tikishmatar nunġá shushuma pankái Jesusan tímiayi “Uuntá, wakerutakmeká páchitsuk tsuáramniaitme.”

¹³ Nuna tutai Jesus antiġn tímiayi “Wakerajai. Tsuaajme.” Tura nú chichamaik tunamarusha pénġer ajasmiayi. ¹⁴ Túrasha Jesus chicharuk “Ámeká nu etserkaip, tímiayi. Antsu Israer-shuar Patrġiġ werim ame pénġer ajasmanum Muisáis akupkamia núnismek susata. Nujai ashí shuar ame pénġer ajasmarmġn nekaawartatui” tímiayi.

¹⁵ Tura Jesusa túramurġi ti etsernamiayi. Túmakui untsurġi aents anturġataġ tusar káutkarmiayi. Tura ni sunġkurġnġha tsuámartaj tusar káutiarmiayi. ¹⁶ Núnisanġ Jesuska aents atsuiniamunam we ni Aparġin áujmiayi.

Emġarun Jesus tsuármiania nu
(Mateu 9.1-8; Márkus 2.1-12)

¹⁷ Chġkġich tsawantaj Jesus unuiniaġ puġai Pariséu aents tura Israer-shuara ġintinniurġsha Kariréa péprunmayasha, ġutía péprunmayasha tura Jerusarénnumiásha káunkarmia nu antúu puġuarmiayi. Jaa tsuártiniaġ Yusa kakarmarġn takakuyayi Jesus. ¹⁸ Nuinġkia emġarun tampunpua kuaru shuar itiararmiayi. Jesus puġamunam inġt awayatġsar wakeriarmiayi. ¹⁹ Tura shuar ti untsurġi piaku asamtai wayamnia atsumiayi. Túmaitkui yakiinġ wear ġeġn urakar, aents kaġ ajas matsatmanum Jesus puġamunam emġarun tampunan nená itiararmiayi. ²⁰ Nin itiarmania nu, Jesus Yusa kakarmarġn takakui, tú enentáimtamun Jesus nekáa emġarun tímiayi “Ame tunaarum tsanġkuramuitme.”

²¹ Nuinġkia Israer-shuara ġintinniurġsha, Pariséusha ni enentáin enentáimsar “¿ġusha yait Yúsa náarġn yajauch awajġin? Warí, aya Yúsak tunaan tsanġkurachminkiait” tu enentáimsarmiayi.

²² Tura Jesus ni enentáimsamurġn nekáa tímiayi “¿Urukamtai tú enentáimprarum átum? ²³ Nuinġkia ¿warí imiá yúpichuchit, tsuártiniaġ, ni tunaarġi tsanġkuratniuk? ²⁴ Wats, Aents Ajasu tutai Wisha tunaan tsanġkuratniun Yusa kakarmarġn takakjai. ġujai nekaatarum tusan wats itiuġchat táruman nuna túrattajai.” Nuyá emġarun chicharuk tímiayi “Ame sha wajakim, tampuram achikiam ame ġemġin wetá.”

²⁵ Nú chichamaik emġaru niisha íimiainiamunmanġ tampurġn achik wajaki ni ġeġn Yúsan wararkí wémiayi. ²⁶ Túmakui ashí shuar ti enentáimprar Yusa náarġn shiir awajsarmiayi. Tura ashamainiak “aentsti tujinkiamu yamá wáinkiaġi” tiarmiayi.

Riwġn Jesus untsukmiania nu
(Mateu 9.9-13; Márkus 2.13-17)

²⁷ Ukunam Jesus wekas akupniú kuġtrġn-ġuu, naarġi Riwi, ni chġkġich naarġi Mateu, akupin akitiaġi ġeġnam puġan wáinkiamiayi. Wáiniak “nemartusta” tímiayi. ²⁸ Tutai Riwi wajaki takakmarġnkia ikiuak Jesusan nemarsamiayi.

²⁹ Nuyá ukunam Riwi namperan Jesusan najatamiayi. Tura untsurġi akupniú kuġtrġn-ġuu tura chġkġich shuarsha káunkar misanam puġuarmiayi. ³⁰ Tura Pariséusha Israer-shuara ġintinniurġsha Jesusan tsanumpruiniak Jesusa unuiniamurġn tiarmiayi “¿Maaj, urukamtai atumsha akupniú kuġtrġn-ġuu ainia núġaiġsha tura chġkġich yajauch shuarġaisha irunġrarum yurumprum?”

³¹ Tutai Jesus áimkiamiayi “Shuar jaachu pénġer ainiana nu ¿tsuákratniun atsumainiawak? Antsu jaa ainia nu tsuákratniun atsumainiawai. ³² “Wikia pénġeraitjai” tuinia nuna

untsuktajtsan táchaitjai. Antsu yajauch shuar ni enentáin yapajjá Winia ajasat tusan untsuajai” tímiayi.

Yurumtsuk Yus áujsatniun Jesusan aniasarmiania nu
(Mateu 9.14-17; Márkus 2.18-22)

³³ Nuyá Jesusan aníak tiarmiayi “Juanka unuiniamurjsha, Pariséu unuiniamurjsha yurumtsuk Yúsan áujainiatsuk. Tura ame unuiniamurmeka ¿urukamtai ijiarma Yúsan áujainiatsu?” tiarmiayi.

³⁴ Tutai Jesus tímiayi “Nuatma nampernum, ¿ipiaamu ainia nu ijiarmamniakait, yamánuatu pujaj? ³⁵ Atsá. Wats Wisha ukunam junaktiatjai; nuñkia ijiarmatin átatui” tímiayi.

³⁶ Tura junasha nujaj métek-taku unuiniamiayi: “¿Yamaram pushí tsupikiar nujaj arut pushiniam anujtukminkiait? Nu túramka yamaram pushí yajauch ajasaintiui; túrasha shiir anujkam arut pushijaj mai metek yamaram wáinkiachminiati. ³⁷ Núnisan nijiamanch yamá nawamu nuap najanamu arutnum yaraachminiati. Túramka nijiamanch kariak ijiakratniuiti; túmak nijiamchisha nuap najanamusha mai metek menkainiawai. ³⁸ Tuma asamtai nijiamanch yamá nawamu yamaram nuap najanamunam yaraatniuiti. Nu túramka mai metek péñker átiniaiti. ³⁹ Yaunchu nawamu úmana nuka yamarman nakitratui. “Yaunchu nawamu imiá penkeraiti” tiártatui” tímiayi Jesus.

6

Ayampratin tsawantaj trikiu neren achikiarmiania nu
(Mateu 12.1-8; Márkus 2.23-28)

¹ Ayampratin tsawantaj Jesussha unuiniamurjijaj araamunam wekasar, unuiniamurjsha trikiu neren majurkutak wekainiarmiayi; tura tishisar neren yuawarmiayi. ² Nuna túruiniakui Pariséu tiarmiayi “Maaj, atumsha ayampratin tsawantaj takaschatniua nu, ¿urukamtai takaarum?”

³ Takui Jesus ayak tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. ⁴ Tawit Yusa jeen wayá, Yus iniaktusma tantan yuámiayi; tura nemarniuncha ajamsamiayi. Tura nu tantancha aya Israer-shuara Pátriri yúatin ármiai. Tuma aín Tawitcha yajauchin túrutsuk achikmiayi, tímiayi. ⁵ Wisha Aents Ajasuitkiun ayampratin tsawantan Nérenniurintjai” tímiayi Jesus.

Shuara uweje jakaan Jesus tsuármiania nu
(Mateu 12.9-14; Márkus 3.1-6)

⁶ Chíkich ayampratin tsawantaj Israer-shuar iruntai jeanam Jesus wayá unuiniartasa nankamamiayi. Nuñ shuar uweje untsuurja nu jakaa pujumiayi. ⁷ Tura Israer-shuara jintinniurjsha, Pariséusha Jesusan “yajauch túrayi” titiai tusar wakeruiniak, “ju ayampratin tsawantaj nu shuaran tsuartimpiash” tusar ii pujuarmiayi. ⁸ Túrasha Jesuska ni enentáimmarin nekariarmiayi. Túmayat uweje jakaan chicharuk “Ju ajapén wajasta” tímiayi. Tutai áishman ajapén wajasmiai. ⁹ Nuñkia iruniarmiania nuna Jesus tímiayi “Enentáimpratarum. Ayampratin tsawantaj yajauch túratin, péñker túratniujaj ¿tuá péñkerait? ¿Uwemtikratin, máatniujajsha tuá péñkerait?” tímiayi. ¹⁰ Nuyá téntakarmia nuna iis áishmankan tímiayi “Uwejem takuitia.” Áishmansha uwejen takuimtai nú chichamaik péñker ajasmiai. ¹¹ Tura chíkichkia ti kajerkarmiayi. Túrawar “Jesus warí itirukamniakit” tusar aniniaisarmiayi.

Tuse unuiniamun Jesus anaikiamiania nu
(Mateu 10.1-4; Márkus 3.13-19)

¹² Nuyá Jesus Yúsan áujsatat tusa náinnium wakamiayi. Tura nu kashi Yúsan au-aujkuwa tsawarmiayi. ¹³ Tsawarmatai unuiniamurj inikanar tuse anaikiamiai. “Winia akatramuruitrume” tímiayi. ¹⁴ Ju ármiai: Emka, Semun chíkich naarj Pítiur apujtusmia nu; tura nuyá ni yachí Antres, Jakupusha, Juansha, Jiripisha, Parturumisha, ¹⁵ Mateusha, Tumassha, Arpeu uchirj Jakupusha, Ásump Semunsha, ¹⁶ Jakupu yachí Jútassha, tura Jútas Iskariúti Jesusan ukunam surukmia nu. Nu tuse achikma ármiai.

Untsurí shuaran Jesus yáinkiamiania nu
(Mateu 4.23-25)

¹⁷ Nijijaj Jesus náinniumia pakanam taawarmiayi. Nuñ pujusarmiayi. Nuñsha untsurí unuiniamurjsha, tura Jutía nunkanmaya, tura Jerusarénumia tura nayaantsanam ayamach Tiru, tura Setun péprunmaya ti untsurí aents antuktaitsar pujuarmiayi. Jesus tsuarati tusar káunkarmiayi. ¹⁸ Iwianchrukusha tsuámararmiayi. ¹⁹ Jesus tsuártinian tujinkiachu asamtai ashi shuar antintaj tusar wakeriarmiayi.

*Náinnium Jesus etserkamu**(Mateu 5.1-12)*

²⁰ Ni unuiniamurin Jesus iis juna tímiayi: “Yusan atsumajai” tárúmna nu, Yus akupeamunam páchitkíaitrume; tuma asamtai warasminíaitrume.’

²¹ ‘Yamáí tsukamarmena nu ukunam ejemartatrume. Tuma asamtai warasminíaitrume. Yamái útrumna nu, ukunmañka wishíratrume. Tuma asamtai warasminíaitrume.’

²² ‘Atumin nakitramprarmatai, ajapramawarmataisha, tura Winia Aents Ajasu tutaiya nú shuar ajasuiti tusar tsanumprutmak katsekkramkarmataisha warasminíaitrume.’

²³ ‘Túramtai nayaimpiniam ti shiir ana nu núkap sunastin átatui tu enentáimsarum ti warastarum. Warí, ju shuara uuntrí yaunchu Yúsnan etserniun nútiksarañ yajauch awajsacharmakia.’

²⁴ ‘Tura kuítrinniutiram atumsha atumí waratairí aya yamaik waintrume. Ukunmañka waraschattarme.’

²⁵ ‘Atsumatsjai, tu enentáimprumna nu, ukunmañka atsumattarme. Nuñkia waraschattarme. Yamái wishíarmena nu, ukunmañka wáitiakrum úttiatrume. Nuñkia waraschattarme.’

²⁶ ‘Ashí aents atumin shiir awajtamkurmin aneartarum. Nujai waraschatniuitrume. Warí nuna uuntrí ántar-yusnan etserin armia nuna nútiksarañ yaunchu shiir awajsarmiayi.’

*Ii nemasri aneatniun Jesus unuiniamiayi**(Mateu 5.38-48; 7.12)*

²⁷ ‘Winia anturtarmena nuna juna tájarme: Ame nemasrum aneata, nakitramainia nusha shiir awajсата; ²⁸ yajauch chichartamainia nusha shiir enentáimtusarta; katsekrainia nusha Yus áujtusarta. ²⁹ Ame yapimin ijiutmamtai áatui yapirujsha ijiuti tusam iniaiktusta; ame pushirmin jurutramkitiaj tuíniakuisha sákurmencha jukíti tusam iniaisata.

³⁰ Seatmana nu susata, tura áminium jurutramainiakusha ataksha awanturkitia tiip. ³¹ Chíkich winia túrutati tusam wakeramna nútiksamek chíkichcha túrata.’

³² ‘Iista, aya atumin anenmainia nuke aneakmesha, ¿nusha warí péñkera túrarum? Yajauch shuarsha nuna túrin ániawai. ³³ Tura atumniasha péñker awajtamainia nuke péñker awajkurmesha ¿nusha warí péñkera túrarum? Yajauch shuarsha nuna túrin ániawai.

³⁴ Awanturkímniaiti tu enentáimtarum nuke ikiakrumsha ¿nusha warí péñkera túrarum? Yajauch shuar nuamtak yajauch shuarjai awanturkímniaiti tu enentáimsar íkianainiawai. ³⁵ Tura atumsha nemasrum aneatniuitrume, tura péñker túratniuitrume, tura awanturkíttiaiwai tu enentáimtsuk ikiastiniuitrume. Túrakrumñkia Uunt Yus péñker akirkmatrume; tura ni uchiríntjai tu iniakmastatrume. Yuska, “yumiñsajme” ticha nunasha tura yajauch shuarnasha shiir awajeawai. ³⁶ Ii Aparí waitnentrarnia nútiksarmek atumsha waitnentratarum.’

*Chíkicha túramuri ti enentáimtusairap**(Mateu 7.1-5)*

³⁷ ‘Chíkicha túramuri ti enentáimtusairap. Núnisañ Yuska atumí tunaarín iirtamsashtatui. Chíkicha tunaarín “nuke asutniatniuiti” tiirap. Núnisañ Yus atumin sumantikramashtatrume. Tsañkurnairatarum. Núnisañ Yus tsañkurtamprattawai. ³⁸ Chíkichcha susata. Núnisañ Yus atumin suramsattarme. Niisha péñker nekapma, tura núkap ati tusa teeka awajas tura patas núkap enke emetsaj amastatui. Atum chíkich túrarmena nútiksarañ atumniasha túrutmattarme.’

³⁹ Tura nuyasha juna métek-taku chichaman ujakarmiayi: “Jii kusurusha ¿itiurak chíkich kusuruncha jukímniait. Mai metek wáñnam iniaashtatuak? ⁴⁰ Unuiniamua nu unuiniana nuna nankaamas áchatniuiti. Túrusha niisha ti unuimiatar unuiniana nujai métek nekaamniaiti.’

⁴¹ ‘¿Itiurtsuk atumi jiiñ numi enketna auk ítskesha atumí yachí jiiñ tsuat enketusha iiyarum? ⁴² Ame jiiñ numi tuke enketaisha ¿itiurtsuk ame yatsumi jiiya tsuátan jurustajme tame? ¡Ántrairume! Emka ame jiiñ numi enketna nu jusata. Nuñkia paant wáinkiatame yatsumi jiiñ tsuat enketna nu jurustin.’

*Nerejai numi nekaatainti**(Mateu 7.17-20; 12.34-35)*

⁴³ ‘Péñker numi yajauchin nereatsui; tura yajauch numi péñkeran nereatsui. ⁴⁴ Numisha ni neren nékanui. Tsachikniumiñsha kushinñkiap júukchamniaiti. Tura naranmaya shuinia júukchamniaiti. ⁴⁵ Núnisañ péñker shuar ni enentái péñker asamtai péñkeran chichaawai; tura yajauch shuar, enentái yajauch asamtai yajauchin chichaawai. Páantchakait. Enentáin pimiutkamu ana nuyañ ni wenejai chichaawai.’

*Jimiará jea ukurtin**(Mateu 7.24-27)*

⁴⁶ “Wi tájana nu túrachiatrumsha çurukamtai Winia, Uunta, túrutrum?” ⁴⁷ Shuar winia chichamprun ántuinia nu jea jeammajai méteketete. Winia anturtuk umiana nu jujai méteketete: ⁴⁸ Shuar jean jeamuk emka inít taur kayanam ukurmai. Tura yumi ti yutuk, entsa nujañkraua tukummaítai pukukachmai kayanam ukuamu asa. ⁴⁹ Antsu Winia anturtukiát umiatsna nuka jujai méteketete: Shuar jean jeamuk aya naikminiam jeammai. Tura entsa nujañkraua tukumpram nu jeaka pukukamai. Tura mash sáantramai.” Tu unuiniamiyai Jesus.

7*Suntara yáintrin Jesus tsuármiania nu**(Mateu 8.5-13)*

¹ Jesus áentsun unuiniasua amik Kapernáum péprunam wémiayi. ² Nuj Rúmanmaya suntara kapitíántri pujumiayi. Nu kapitíáni takarniuri, ti aneamuri, jakamnia jaamiayi. ³ Tura Jesusan pachis áujmatainian antuk, ame shuarum Jesusan ititirti tura winia takarniun tsuárturti tusa Israer-shuara úuntrin akupkamiayi. ⁴ Niisha Jesusan weriar, umirtukat tusa ti seainiak tiarmiayi “Ju kapitíán nekás yáintrin péñkeraiti. ⁵ Niisha yajaya apachitiát in shiir enentáimturmajai. Tura íruntai jean jeamtinniasha niñki chicharkaiti, tura yayawai.”

⁶ Nuyá Jesus niñjai wémiayi. Tura ni jeen jeastatuk jatemsamtaí kapitíáncha ni amikrin akatar ju titiarum tusa Jesusan akuptukarmiayi. Niisha Jesusan chicharuk juna tiarmiayi “Uuntá, ántram wayataj tu enentáimsaip. Ame ti nañkaamaku asam winia jearu wayachminiaitme. ⁷ Tuma asakmin imia wiki Amiin jeatniun arantukjame. Ayatik “péñker ajastí” tákumin winia takarniusha péñker ajatrustatui. ⁸ Wi nékajai. Winia úuntur winia akuptuiniawai. Tura wisha suntaran akupenajai. Nunasha wi “wetá” takui wéawai. Tura chikichnasha “winitía” tutai winiawai. Tura winia takartinian “ju túratá” tutai umíawai.” Tu tímiayi.

⁹ Jesus nuna antuk ti enentáimias ni nemarainian tímiayi “Nekás tájarne Israer-shuar Yúsan tímiatrus enentáimtinian wáinçhaitjai.”

¹⁰ Tura kapitianj akatramurj jeá waketkiar, takarniuri péñker ajasun wáinkiarimiayi.

Wajé uchrin Jesus iniantkímiania nu

¹¹ Nuyá ukunam chikich pepu Nain tutainium ni unuiniamurjijai tura chikich untsurj aentsjai Jesus wémiayi. ¹² Tura péprunam nuntumas jakaan iwarsataí tusar juínian wáinkiamiayi. Jakáa nukurj wájeyayi, tura uchrin jakamia núchikiiyayi. Tura ti untsurj nu pepunmaya nin nemarsarmiayi. ¹³ Jesus nu wajen wáiniak tura waitntar “úutip” tímiayi.

¹⁴ Nuñkia Jesus jakaan enkerman tarunt antiñmiayi; nuna juíniasha wajasarmiayi. Nuñkia Jesus jakaan chicharuk “Umpa nantaktia, tájame” tímiayi.

¹⁵ Tutai niisha nantaki pujus chichaamiayi. Tura Jesus ni nukurin “Jujú uchrin” tímiayi.

¹⁶ Tura matsamiarmia nu, nuna wáinkiar ashamkarmiayi. Tura Yusa náarin shiir awajarmiayi. Tura chichainiak, “Yúsnan etserniuchukait Niisha. Ataksha Yúsnan etserin uunt ana nu tarutramji” tiarmiayi. Tura “Israer-shuarti Niiniú ájnia nuna yáinmaktai tusa Yus tarutramji” tiarmiayi.

¹⁷ Tura ashí Jutía nuñkanmayasha tura ni írutkamu nuñka ármia nuyasha Jesus túramia nuna nekaawarmiayi.

*Imiakratin Juan sepunam pujak ni amikrin akatar Jesusan akuptukarmiania nu**(Mateu 11.2-19)*

¹⁸ Juan ni írutkamurj ujakam Jesus túramun nekaamiayi. Nekáa ni írutkamurj jímiaran untsukmiayi. ¹⁹ Tura Jesusaj akupkarmiayi. “Atumsha Jesus aníastarum. ¿Amesha nekás Kristu Yus akupkamu tátnia núkaitiam. Kame chikichak nákastataji? titiarum. Nu nekáa ikíuutarum’ tímiayi.

²⁰ Tutai niisha Jesusan weri jeariar tiarmiayi “Incha imiakratin Juan akatar akuptamkaji. ¿Amesha nekás tátnia núkaitiam. Chikichak nákastataji? Nu nekaatai tusar wakeraji” tiarmiayi.

²¹ Wats, nii jeawarmia nuj Jesus untsurj jaan tsuártasa pujurmiayi. Iwianchrunkucha iwianchrin jirki akupkatasa pujurmiayi. Tura kusuruncha íimtikmiayi. ²² Tuma asa Jesus akatramun juna tímiayi: “Waketkirum ashí átum antukurmena nusha, wáinkiarumna nusha ujaktarum. Kusurusha wáinmainiawai; shutuap ainia nu péñker wekainiawai; tunamarusha tsuámainiawai; empekusha ántuiniawai; jakaasha atak iwiaaku ajainiawai; tura kuítrinchanumsha uwempratín chicham ujakmaiti. Juan nu ujaktarum. ²³ Yawetsuk Winia tuke shiir enentáimturna nú shuar shiir átatui” tímiayi Jesus.

²⁴ Waketkiarmatai Jesus Juánkan pachis áujmatman antuk shuar matsarmia nuj juna tímiayi: “Shuar atsamunmasha ¿warí werimiarum. Pintiu nase umpúam atúu we juní we ajana nu iistai tusarmek wémarum? Juan núnischaiti. ²⁵ Nuikia ¿warí werimiarum. Shuar péñker iwiarmampra listai tusarmek wémarum? Warí, péñker iwiarmampraka uunt akupni jeen pujuiniatsuk. ²⁶ Nuñkia ¿warí werimiarum. Yúsnan etserniuk werimiarum? Maa, nú nankaamas wáinkiarne. ²⁷ Yaunchu Yus-Chichamun ju áarmaiti: “Winia akatramurun amjini emka akupeajai ame jintimin iwiarat tusan.” Juan nu akatramuíti. ²⁸ Nekasan tájarme, Yúsnan etserin imiakratin Juanjaj nankaamas uunt atsuwiti. Túmaitiat Yus akupeamunam páchinia nu shuarka nekas imianchaitiat, Juanjaj nankaamas átatui” tímiayi. ²⁹ Penké shuarsha, kuítian-juusha, Juan imiaimuijai imianiarmia nu, Jesus timian antukar Yusa náarin shiir awajarmiaiyi. ³⁰ Túrasha Paríséusha Israer-shuara jintinniurjsha Yus yáintaj támaitiat Juan imiaamujaj imiancha ásar naki-trarmiaiyi. ³¹ Nuñkia Uunt Jesus tímiayi “Yamaiya áentstirar, warijjajin métek árum nuna paant títiatjarme. ³² Uchijjaj métek árum. Ni ajjjaj iruntrar nakurustaj tukamá tuíniawai “Námpera áinis nakurustaitsar peem umpuarji, túrasha jantsemáchurme. Nuyá iwiarsatniua áinis nakurustaitsar íwiareakur kantamtaí kantamáaji, túrasha átum úutcharme.” Tu tuíniawai. ³³ Atumsha núnisatrume. Kame Juan núkap yurumtsuk úmutsuk wekaimiaiyi. Túmakui átumka “íwianchrukuítí” tímiarme. ³⁴ Nuyá Wisha Aents Ájatan támajai. Tura yurumá úmakuisha “ti yurumin tura ti nampenaiti; kame ashí yajauch shuara tura kuítian-juu amikrinti” túrutrumé. ³⁵ Wats, nekas neka ainia nu, Yusa nekatairjin iniakmainiawai.” Tu tímiayi.

Pariséu Semuñ náartin Jesusan ni jeen ipiaamiania nu

³⁶ “Winí yurumáitia” tusa Paríséu Jesusan ipiaamiaiyi. Tutai Jesus ni jeen werí misanam pujusmiayi. ³⁷ Nuñkia nu péprunmaya yajauch nuwá, Jesus Paríséu jeen yurumáttsa weyi táman antuk, kayá mutinim kunkuín asuítí áimkiamun takukí jearmiayi. ³⁸ Tura úutki Jesusa nawen pujuras neajkijjaj nijjarmiaiyi. Tura intiashjjaj japirmiayi; nuyá nawenam mukuta kunkuínian ni nawen ukatramiaiyi. ³⁹ Paríséu Jesusan ipiaamia nu, nuna wáiniak juna enentáimsamiayi: “Ju nekas Yúsnan etserniuitkiunka, ju yajauch nuwá ántiana nuna nekaawainti. Warí, niisha netse nuwachukait” tu enentáimsamiayi.

⁴⁰ Nuñkia Jesus Paríséun chicharuk tímiayi “Semunká, ámin titiaj tusan wakerajai.”

Tutai Paríséu chichaak “Turuttiá, Uuntá” tímiayi.

⁴¹ Tutai Jesus tímiayi “Kuítian ikiamniun jimiará áishman tumashmakarmiaiyi. Chíkich kiniantus (500) tura chíkichka aya senkuentak tumashmakmiayi. ⁴² Akiktin tsawant jeamtaí máí-metek takakcha ármiaiyi. Tuma asamtaí kuítian ikiamin ni tumashrin máí-metek asakátrarmiaiyi. Wats, turuttiá ¿tú áishmanka ikiamniun nekas aneamia?” tímiayi.

⁴³ Tutai Semuñ tímiayi “Enta, núkap tumashrin tsankuramia nu.”

⁴⁴ Tutai Jesus tímiayi “Nekas tame.” Nuñkia nu nuwan iis Semuñin tímiayi “Ju nuwá wáintsumek. Awe jeemjin wayamtaí winia nawer nijjartin entsa suruschamame; antsu ju nuwáka nawerun neajkijjaj nijjarturai, tura intiashjjaj japirturai. ⁴⁵ Mukutam áujtusshamame; antsu ninjka nawerun tuke mukutui. ⁴⁶ Winia muukaruísha asuítí ikiur-tuschamame; antsu ninjka naweruj kunkuín asuítin ukatruarai. ⁴⁷ Nu tuma asamtaí tájame, niisha Winia ti anentu asamtaí ni tunaarj untsurj ana nu tsankuramuiti. Tura tunaar ishichik awai tau tsankuramu ana nuka ishichik anenkratniuiti.” Tu tímiayi Jesus.

⁴⁸ Nuñkia nuwan tímiayi “Ame tunaarum tsankuramuitme.”

⁴⁹ Tura chíkich ipiaamu Jesusjaj misanam pujuarmiania nu “¿Jusha ya asañ tunaancha tsankurea?” nuamtak tunainiarmiaiyi.

⁵⁰ Tura Jesu nuwan chicharuk “Uwentikiartiniaiti” tu enentáimtururu asam uwem-praitme. Shiir wetá” tímiayi.

8

Nuwá Jesusan yáinkiarmaniania nu

¹ Nuyá untsurj péprunam Jesus wekaráktak Yus akupeana nuna shiir chichaman etserkini wekaimiaiyi. Tura ni unuiniamurj tuse ármia nu nemarsarmiaiyi. ² Yaunchu untsurj nuwá jaa armia nuna tura iwianchruku armia nunasha Jesus tsuáarmiaiyi. Nu nuwasha Nin nemarsarmiaiyi. Nusha ju ármiaiyi: Maktaranmaya Marí, siati íwianch jjúrkimiuyania nusha ³ tura uunt akupin Erutisa takarniurj Chusa nuwé Juancha, tura Susancha; tura chíkich untsurj ni takakmarin súsar Jesusan yáinkiarmaniania.

Atsaamin atsaampramun Jesus unuiniamiania nu

(Mateu 13.1-9; Márkus 4.1-9)

⁴ Untsurj péprunmaya Jesusan iistai tusar jjiinkiarmaniania. Tura untsurj káunkarmatai ju métek-taku chichaman Jesus unuiniamiania:

⁵ “Atsaamin atsaamprataj tusa jínkimiayi. Atsaamki wesa jinkíái jintiá iniaararmiayi. Túrunantai weenak najakarmiayi. Nuyá chíñki tariar yuawarmiayi. ⁶ Chíkich jinkíái kaya írunmanum iniaararmiayi. Nu jinkíái tsapainiar, wárik nantu sukuam káramiayi. ⁷ Chíkich jinkíái jañkiniam iniaararmiayi. Tura jañkisha jinkíáisha máí-metek tsapainiar, jañki kanakar jakramiayi. ⁸ Tura chíkich jinkíáisha péñker nunkanam iniaararmiayi. Tura tsapainiar, péñker nerekar chíchíkha siansha (100) nerekararmiayi.” Tuasua amik kakantar chichaak Jesus tímiayi “Kuishim ákuíñkia antuktaram.”

(Mateu 13.10-17; Márkus 4.10-12)

⁹ Nuyá ni unuiniamurí Jesusan aniak tiarmiayi “Ju métek-taku chicham tamena nu ¿warintkumea tame?”

¹⁰ Tutai Jesus tímiayi “Atumnia Yus ni akuptairín nekaachma ana nuna nekamtikram-prume. Tura chikichnaka, wáiniainiyat kusurua núnin árti tusan, tura ántuiniayat nekaacharat tusan aya métek-taku chichamjaí jintintiatjai,” tímiayi.

Atsaampramu chichaman Jesusa paant jintintiamiania nu
(Mateu 13.18-23; Márkus 4.13-20)

¹¹ “Wats, ju nekaatarum, tímiayi. Jinkíáisha Yusa chichamen nakumui. ¹² Jintiá iniaaru tana nuka shuar aya ántana nuna nakumui. Yúsan nekas enentáimtus uwempracharti tusa íwianch wárik taa nu chichaman ni enentáijan júawai. ¹³ Kayanam iniaaru tana nuka shuar antuk waras umiana nuna nakumui. Tura nú shuar kankepe atsa asamtai, ishichik tsawantiniñ umikiar tiurchatan wáinkiar wárik kanainiawai. ¹⁴ Jañkiniam iniaaru tana nuka tuke enentáijiai umiatsna nuna nakumui. Nu shuarsha ántuiniawai, túrasha ni wakeramuríjiai wekainiawai. Ju nunkanman ana nuna ti páchiniakui, tura kuitian ti wakeruiniakui, warastinniak enentáimtuiniakui, Yus-Chicham ni enentáin takaatsui. Nujai kan karma ásar nerektiniñ tujintiainiawai. ¹⁵ Tura jinkíái péñker nunkanam iniaaru tana nuka shuar antuk umiinia nuna nakumui. Niisha antukarmia nuna péñker enentáimtusar, yawetsuk umirkar ti péñker nerenawai.”

Ashí iwaiainiakma átatui
(Márkus 4.21-25)

¹⁶ “¿Shiripkin ekeemak nukuktinkiait? Peaknum waaptak ikiuschatniuiti. Antsu jeanam wáiniana nu paant wáinkiarat tusa yakí ekentsatniuiti. ¹⁷ Núnisaj ashí nekaachma ana nu paant átatui. Tura úkma ana nu nekanattawai. Tura iwaiainiakma átatui. ¹⁸ Tuma asamtai anearum péñker antuktaram. Shuar takakna nu patatsamnia átatui. Túrasha takaktsuna nu, takakjai tu enentáimtumana nuka jurunkítiaiawai.” Tu tímiayi.

Jesusa nukurí, Jesusa yachi
(Mateu 12.46-50; Márkus 3.31-35)

¹⁹ Jesus pujamonam nukurí ni yachísha tariarmiayi. ²⁰ Turamtai Jesusan tiarmiayi “Ame nukusha yatsumsha aq wajasar untsurmainiawai.”

²¹ Tutai Jesus tímiayi “Ee, nukuruít, yatsuruít, tura Yus tana nuna antuk umiána nusha winia nukuruít, winia yatsuruít.”

Nasesha entsasha Jesusan umirkarmiania nu
(Mateu 8.23-27; Márkus 4.35-41)

²² Chíkich tsawantai Jesus ni unuiniamuríjiai kanunam enkemprar “Antumian amaini wetai” tímiayi. ²³ Entsanam wesar Jesus kanarmiayi. Tura aya aneachma nase ti kakaram násentkui chíchimi tampá tukumar kanun inít awayastatuk awajmiayi. ²⁴ Túram nuñkia Jesusan ishintiainiak “Uuntá, iisha entsá wayaaji” tiarmiayi. Nuñkia Jesus nantaki nasencha entsanacha chicharkamiayi. Nú chichamaik nasesha menkakamiayi, tura entsasha miaaku ajasmiai. ²⁵ Nuyá ni unuiniamurín chicharuk “¿Urukamtai Winia enentáimtusachuram?” tímiayi.

Tura niisha ashamainiak, ti enentáimprar “¿Ausha warí áishmankait? Nasesha entsasha Nii chicharkam umirainiatsuk” tiarmiayi.

Jatara nunkanam Jesusa iwianchrupun tsuármiania nu
(Mateu 8.28-34; Márkus 5.1-20)

²⁶ Kariréa nunka amaini Jatara nunkanam jeawarmiayi. ²⁷ Kanunmaya Jesus jinkimtai nu pérunmaya áishman Nin taruntamiayi. Nu áishmansha yaunchu iwianchrupuyayi. Misú wekas, jeá pujatsuk aents iwiansamunam pujuyayi. ²⁸⁻²⁹ Íwianchka nu aishmankan ti kakaram nupet wémiayi. Tura emetatai tusar uwejencha nawencha jirujai jinkíái wearmiayi. Túrasha tujinkiararmiayi. Niisha jiruncha tsurí wémiayi. Tura íwianch aents atsamunam útsuk awemamiayi. Nu aishman Jesusan wáiniak tikishmatar kakantar chicharuk “¿Urukamtai winiisha tarutnium, Uunt Nankaamaku Yusa Uchirí Jesusa? Winia wáitkiarsaip

tusan seajme” tímiayi. Íwianch nijn pujurun Jesus jiki akupeam tu tímiayi. ³⁰ Jesus nu áishmanġkan anias “¿yáitiam?” tímiayi.

Tútai nii chichaak “Wikia Untsuríntjai” tímiayi. Untsurí íwianch nijn pujurma asa nuna tímiayi. ³¹ “In uunt wágnam ii jiiinkimíaj nuñ akuptukam amutkaip” íwianch seawarmíayi Jesusan. ³² Nuñ ishichik arantach náinnium untsurí kuchi shushunmak yujaarmíayi. Tura íwianch chichainiak, “Antsu kuchiniam wayatín tsankatrukta” tiarmiayi.

Tutai Jesuska “Ayu, wetarum” tímiayi.

³³ Nuna takui íwianch áishmanġnumíaj jiiinkiar kuchiniam wayawarmíayi. Túram kuchisha nánatanam akaiki iniaaawar entsanam utsanawarmíayi. Túrunawar jakekarmíayi.

³⁴ Kuchin wáinniusa túrunam wáinkiar, ashamkar, péprunmasha tura arantcha etserkatai tusar tseke wearmiayi. ³⁵ Etserkarmatai, iyutai tusar untsurí shuar wearmiayi. Tura Jesus pujamunam jeawar, íwianch jiiintuikiarmia nú áishmanġkan péñker ajas pushí entsar Jesusa nawen pujan wáinkiaríayi. Tura ashamkarmíayi. ³⁶ Íwianchruku áishmanġ tsuárman wáinkiaríam nu yama taan ujakarmíayi. ³⁷ Tura ti ashamainiak Jatara nunġanmayá aents ashí Jesusan “Wetá” tiarmiayi. Tutai Jesus kanunam enġkamar wémiayi. ³⁸ Íwianch jiiintuikiarmia nú áishmanġ Jesusan, wisha ame wéamunam winítiaj tusa seamiayi. Tutai Jesus nuna surítiaik, ³⁹ “Antsu ame jeemíin weme Yus ámin túrutma nu ashí etserkata” tímiayi. Tutai áishmanġ we Jesus nin túramia nuna ashí nu péprunam etserkamiayi.

Jairu nawantríncha tura chíkich nuwáncha Jesus tsuármanía nu

(Mateu 9.18-26; Márkus 5.21-43)

⁴⁰ Tura Jesus katínki Kariréanam tatí tusar nákas pujuarmíayi. Tuma ásar Nii waketki katínki támatai nu aencha warasar áujsarmíayi. ⁴¹ Tumaj Israer-shuara iruntai jeá uuntrí Jairu naartín támiaiyi. Nii taa, Jesusa nawen tikishmatar “Winia jearuñ waitneasam winítrítia” tímiayi. ⁴² Ni nawantrí chikichik amia nu, tuse uwí takaku, jakatasa pujakuí nuna tímiayi.

Jesus “ayu” tinia weakui ti untsurí aents nemariarmíayi. Tura untsurí shuar kaé ajas weena ásar chanuawarmíayi.

⁴³ Nuñ nuwá páchitkia wémiayi. Niisha tuse uwí numpa ajapeak wáitias pujuyayi. Tsuákratniua nuísha ni kuítrín ashí ajapaitiat tsuámarchauyayi. ⁴⁴ Jesusa úkuriiní winiá weantuk ni pushirí náñkatramurín antiñmiayi. Nuna tura nú chichamaik numpé ájapeamuncha péñker ajasmíayi. ⁴⁵ Nuñkia Jesus chichaak “¿Ya Winia antintkia?” tímiayi.

Tura “penġkesha antiñchajme” tuñiakui Pítur ni tsaniakmaríjjai Jesusan chicharuk “Uuntá, ti untsurí antiñmasha, tura ti untsurí chanunmainiasha ¿itiura “ya Winia antintkia” tame?” tíarmiayi.

⁴⁶ Tútaisha Jesus tímiayi “Nekas Winia antintkiayi. Winia kakarmarjai tsuáraina nuna nékajai” tímiayi.

⁴⁷ Nuyá nu nuwásha, nekarayapi tusa kuránki taa Jesusa nawen tikishmatramíayi. Tura ashí aents ántuiniamunam urukaku antiñkia tura itíura wárik péñker ajasmia nuna ujakmiayi.

⁴⁸ Nuñkia Jesus nuwán tímiayi “Nawantrú, shiir wetá. Winia nekas enentáimtursa asam péñker ajasume.”

⁴⁹ Jesus tuke chichas pujaj uunt Jairu jeá, ti untsurí antiñmasha, tureníaj taa, Jáirun tímiayi “Ame nawantrum jakayi. Unuikiartín tuke itit awajipia” tímiayi.

⁵⁰ Tura Jesus nuna antuk tímiayi “Ashamkaip. Áyatik Winia nekas enentáimtursata. Túrakmin nawantrum péñker ajastatú” tímiayi.

⁵¹ Jeá jeawar Jesussha Níjjai untsurí wayatniun surimkiarmíayi. Antsu aya Pítrun, Jakupun, Juáñnasha tura nuwáchi aparín nukuríncha wayatniun tsankatkamiayi. ⁵² Ashí útainiak atakka wáinkiashtatjapi tu útiarmiayi. Túmainiakui Jesus penġké jakaan nékayat tímiayi “Úutirpa. Nuwáchka jákachai, antsu kanarai” tímiayi.

⁵³ Jakaancha urukaku ta tusar wishkrarmíayi. ⁵⁴ Nuyá Jesus nuwáchi uwején achik, kákantar chicharuk “Nawantru nantaktia” tímiayi. ⁵⁵ Túram niisha jakayat atak iwíaaaku ajasmíayi. Tura nú chichamaik nantakmiayi; túrunamtai Jesus “ayuratarum” tímiayi. ⁵⁶ Nuwáchi aparí nukurísha ti enentáimprarmíayi. Tura Jesus “Ju túramu penġké etserkairap” tímiayi.

9

Jesus ni unuiniamurín etserkati tusa akupkarmiania nu

(Mateu 10.5-15; Márkus 6.7-13)

¹ Ni tuse unuiniamurín ikiaanak ni chichamejai iwianchrुकun enentáiyen iwianchin jírki akupkatniun tura suñkurjai jaa tsuártinniasha ni kakarmarín súsarímiayi. ² “Yus

akupin ajastin ujaktarum, tura jaa tsuártarum” tinia akupkarmiayi Jesus. ³ Nuyá tímiayi “Wéakrum áyatik wetarum. Ushukrustincha, uyuncha, yurumkasha, kuitcha penké juki-irap. Aya chikichík pushí jukitiarum. ⁴ Nánkamas jeanam jearum wayarmeka nuin pujustarum. Nuin pujusrumek chíkich péprunam wéakrum jínkitiarum, tímiayi. ⁵ Tura atu-min awántiamatniun nakitiana nú péprunmaya jínkirum nawemiyá nunka akakekrum ikiuktiarum. Awántiamachma paant ati tusarum nu túratarum” tímiayi.

⁶ Nuyá jínkiar ashí péprunam uwempratin chichaman ujakiar wearmiayi; tura ashí péprunam jáiniancha tsuákiar wearmiayi.

Erutis “Jesusan ústaj” tímiania nu
(Mateu 14.1-12; Márkus 6.14-29)

⁷⁻⁸ Uunt akupin Erutis Jesus túramun antukmiayi. Nu túramun chíkich shuarka “Juan jakamunmaya nantaki túrawai” tu wearmiayi. Chíkichkia, “yaunchu Yúsnan etserin Eriás wantiniak túrawai” tu wearmiayi. Chíkichkia, “chíkich yaunchu etserin nantaki túrawai” tiarmiayi. Tuma asantai Erutis penké nekaachmiayi. ⁹ Tura tímiayi “Wiki, Juanka muuke tsupirkatarum, tichamkaj. Tuma aisha, ¿ju shuar, ni túramurj ashí shuar chichainia nusha yátsukait?” Tu enentámiuk “iistaj” tímiayi.

Senku mir áishmankan Jesus ayuramiania nu
(Mateu 14.13-21; Márkus 6.30-44; Juan 6.1-14)

¹⁰ Atak Jesusa akatramurj waketki taar ni túramurjín Jesusan ujakarmiayi. Nuínkia aents atsamunam Petsaitia péprunam tíjiuch weak nuj júkiarmiayi. ¹¹ Tura penké shuar nuna nekaawar nemariarmiayi. Túram Jesus nin shiir áujsamiayi. Tura Yusa akuptairj pachis unuiniamiayi. Tura jaa armia nuna tsuáarmiai.

¹² Tura kíakui, tuse unuiniamu Jesusan wériar tiarmiayi “Uuntá, shuar akupkachmini-ashit. Tíjiuch péprunmasha, shúarnumkesha wear ni yurumátiniurjín sumarmakarti, tura kanartintrjín wáinkarti. Juj pujajnia juínkia penké atsawai” tiarmiayi.

¹³ Tutai Jesus tímiayi “Atumsha ayuratarum.”

Tutai chichainiak “Iisha aya senku tanta tura namaksha jímiarchik takakji. Ju shuar ayuratin sumaktai tusar wétiniatj” tiarmiayi.

¹⁴ Áishmansha ti untsurj senku mir (5000) jeeá ámiayi. Tura Jesus ni unuiniamurjín chicharainak “senkuenta senkuenta kanaarum ankant ankant pujustarum,” titiarum” tímiayi.

¹⁵ Túrawarmatai ashí pujusarmiayi. ¹⁶ Nuyá senku tantan tura jimiará namaknasha Jesus achik, yakiniñ íimias Yúsán yumisamiayi. Nuyá ajamsarat tusa ni unuiniamurjín súsarmiayi. ¹⁷ Ashí yurumáwar ejemarmarmiayi. Tura ampirman tuse chanjinnium áimkiarmiayi.

Jesus Yusa anaikiamurjinti ujakma amia nu
(Mateu 16.13-19; Márkus 8.27-29)

¹⁸ Jesus ni unuiniamurjijai áentsnumia kanaki pujuarmiayi. Jesus Yúsán ajsua umik ni unuiniamurjín tiarmiayi “¿Yáiti turutainia Winia?”

¹⁹ Niisha áimkiarmiayi, “Chíkich “Imiakratin Juánkaiti” turamainiawai; chikichcha “Íriásaiti” tura chíkichkia “yaunchu Yúsnan etserin nantakniua núiti” turamainiawai” tiarmiayi.

²⁰ Tutai “Tura atumsha ¿yáiti túrutrum?” tiarmiayi.

Takui Píitir chichaak “Ámeka Yusa Anaikiamurj, Kristu tutai, núitme” tímiayi.

²¹ Tutai Jesus “Penké etserkairap” tímiayi.

Ni jákatniurjín Jesus ujakmiania nu
(Mateu 16.20-28; Márkus 8.30-9.1)

²² Nuyá Jesus tímiayi “Wi Aents Ajasuitjiana ju ti waitstaniuitjai. Wíi shuara uuntrj, tura ni Pátrirj únuntrjsha tura ni jintinniurjsha nakitrurar maantuáwartatui. Túrashá iwiartusarmatai menaintiu tsawant jeamtai nantaktiatjai.”

²³ Nuyá ashí áentsun chicharuk juna tímiayi “Shuar Winia nekas nemartustajtsa wakerakka ni wakeramuriñkia iniaisati. Tuke tsawant ni krusj yanaki nemartusti. ²⁴ Kame shuar ju nunkanam aya péñker pujustaj tákunka nu shuar uwemtsuk jakattawai. Antsu Winia anentu asa péñker pujustinniak enentáimtsuna nú shuarka nekas iwiaakman wáinkiatawai. ²⁵ Íimiata, shuar ashí ju nunkanam ana nuna súmakuí tura jinium wétin ákuisha ¿itirak péñker pujusat? ²⁶ Wi Aents Ajasuitjiana ju Winiasha tura winia chichampruncha shuar natsantraitkuínkia, winia wincharujai, winia Aparu wincharijjai tura nayaimpinmaya péñker suntara wincharijjai atak táakun shuar natsantrurmia nuna natsantrattajai Wí. ²⁷ Tura shuar Yusa akuptairjín wáintsuk jákachartatna nu juj pujuiniawai. Nuna nekas tájarme” tímiayi.

Jesús nusháa iira ajasmiania nu

(Mateu 17.1-8; Márkus 9.2-8)

²⁸ Nuna tuasua amik nuyá chíkich semanatin Yúsán áujstaj tusa Jesus náinnium wakamiayi. Pítuur, Jakupu, Juanjaj nemariarmiayi. ²⁹ Jesus auju pujus nusháa iira ajattsarmiayi. Ni pushirisha ti puju jítsumir ajasmiai. ³⁰ Nuñkia jimiará áishmaj Niijjaj chicháa wajarmiayi. Nuka Muisáis Eriásaj ármiayi. ³¹ Njíncha wincha jítsumir téntakarmiayi. Tura Jesus wáitias Jerusarénnum jákatniurín amia nuna áujmatiarmiayi. ³² Pítuur ni tsaniakmarijjaj karj ti pujainiajn iwíáa pujuarmiayi. Tuma ásar Jesusan tura jimiará áishmajjaj jítsumir ajas wajainian wáinkarmiayi. ³³ Tura nu áishmaj Jesusan ikiuki weenaj Pítuur Jesusan chicharuk “Uuntá, iisha ti shiir pujatsjik. Menaintiu áakmaktai, Áminiusa, Muisaisnasha, Eriasnasha áakmaktai” tímiayi. Tura Pítrusha enentáimtsuk nuna tímiayi. ³⁴ Nuna chicháa pujaj yuranjim tarí kaput amuawarmiayi. Tura yuranjim amuam ti ashamkarmiayi. ³⁵ Nuñkia yuranminmaya ju chichaamun antukarmiayi: “Juka winia aneamu Uchiruiti. Nii anturkatarum.” ³⁶ Chichaamun antasua amikiar Jesus niniki wajan wáinkarmiayi. Nuñkia takamtak pujuarmiayi. Tura wáinkarmia nuna penké etserkacharmiayi.

Uchi iwianchrukun Jesus tsuármiania nu

(Mateu 17.14-21; Márkus 9.14-29)

³⁷ Kashin tsawantaj, náinniumjá táarmatai, ti untsurj shuar Jesus inkiuntai tusar wearmiayi. ³⁸ Nu shuarnumiá chikichik áishmaj Jesusan untsuak tímiayi “Uuntá, waitneasam uchir íirtústá. Uchirsha júchikiiti. ³⁹ Íwianch achik núpeteam niisha nánkamas yatsumui. Tura chichichiptu ajas wenunmasha saun kaput apaawai. Íwianch nin tuke yauch awajas ankant awajsatniun nakitiawai. ⁴⁰ Túmakui ame unuiniamurmin iwianchin júrútkit tusan seamjai. Túrasha tujinkiarmai” tímiayi.

⁴¹ Tutai Jesus tímiayi “Yus enentáimtichutirmin, tutupnik wekaichatirmin çurutmá tsawantsuk atumjaj pujustaj. Urutmá katsuntratjatsuk? Uchiram juú itiaa” tímiayi.

⁴² Tura uchi winiaj iwianch nuñká ajuant chichichiptu áepsamiayi. Tura Jesus iwianchin kakantar chicharkamiayi. Tura uchin penker awajas ni aparin awantuki susamiayi. ⁴³ Tura ashí pujuarmia nu ti enentáimprar “Yuska imiá úntchakait” tiarmiayi.

Jesús ni jákatniurín ataksha ujakmiania nu

(Mateu 17.22-23; Márkus 9.30-32)

Jesús túramun ti enentáimtu pujuiniaj Jesús ni unuiniamurín tímiayi ⁴⁴ “Wi tájarmena ju penker antuktatum. Winia Aents Ajasu tútain surutkartatui.”

⁴⁵ Tura Nii timia nuna unuiniamurj nekaacharmiayi. Nekaawarajin tusa paantcha awajsamuyayi. Tura warinkit tusa anintrustinniasa arantukarmiayi.

“¿Yaki imiá nankaamantuit?”

(Mateu 18.1-5; Márkus 9.33-37)

⁴⁶ Nuyá ni unuiniamurj, yaki imiá nankaamaku ati tusa, nuamtak mai tunai ajarmiayi. ⁴⁷ Tura ni enentáimsamurín Jesús nekaamiayi. Tuma asa uchin achik ni pujamunam itiamiayi. ⁴⁸ Itiá tímiayi “Winia anentuk ju uchin shiir awajeana nuka Winiasa shiir awajatawai. Tura Winia shiir awajtana nuka Winia akuptana nunasha shiir awajeawai. Kame átum nankaamantuchu tárumba nu ti nekas nankaamantuiti’ tímiayi.

(Márkus 9.38-40)

⁴⁹ Nuyá Juanjaj tímiayi “Uuntá, shuar ame náarmin pachis iwianchin jjiiki akupea nu wáinkiamji. Tura in páchitkiachu asamtai nuka suritkiamji.”

⁵⁰ Tutai Jesús tímiayi “Antsu suritkiarap. Shuar in nakitramachkuñka in páchitkiawai.”

Jesús Jakupun Juánasha chicharkarmiania nu

⁵¹ Jesús, nayaimpiniam waketikniurj jeatemamtai, enentáimmia ímiatrusaj Jerusarénnum we-wémiayi. ⁵² Wesa, kanartinian wáinkiarat tusa akatar éntikiarmiayi. Tura niisha Samaria péprunam jeawarmiayi. ⁵³ Tura Samarianmaya aentska, Jerusarénnum wéenan nekaawaru ásar itiaatniun nakitrarmiayi. ⁵⁴ Jesusa unuiniamurj Jakupusha Juansha nuna nekaawar, Jesusan tiarmiayi “¿Uuntá, Eriás yaunchu túramia núnisrik iisha túrat tusam wakeramek. Nayaimpinmaya ji tara Samarianmaya aentsun amukarti, títiatjik?”

⁵⁵ Tutai Jesús nin íisar kakantar chicharuk tímiayi “Atumsha atumi enentáju urukukit nuka nekamatsrume. ⁵⁶ Wi Aents Ajasu áentsun emesratsan táchaitjai. Antsu uwemtikratajtsan táwitjai” tímiayi. Nuyá chíkich péprunam wearmiayi.

Jesús nemarsatin

(Mateu 8.19-22)

⁵⁷ Jintíá weenaj, chíkich áishmañ Jesusan chicharuk “Uuntá, tuí wétatam nuísha nemarsatjame” tímiayi.

⁵⁸ Tutai Jesus tímiayi “Kujanchmasha ni wáarín takaktsuk. Chínkisha pasunken takaktsuk. Tura Wi Yusa Uchiríntiatan tepesan ayampratniur atsawai.”

⁵⁹ Chíkich áishmañkan Jesus “Nemartusta” tímiayi.

Tutai ní chichaak “Antsu, Uuntá, winia apar jakamtai, iwiarsa ikiuakun nemarsatjame. Nu tsankátrúktá” tímiayi.

⁶⁰ Tutai Jesus tímiayi “Jakaa ainia nu ni shuarín iwiarsatniunka enentáimtusarti. Tura ámeka weme Yus-shuar átin urukukit nu etserkata” tímiayi.

⁶¹ Nuyá chíkich tímiayi “Uuntá, nemarsataj tusan wakerajme. Túrasha wíi shuaran emka áujan ikiuweartaj tsankátrúktá” tímiayi.

⁶² Tutai Jesus tímiayi “Shuar arayata ukunmaañ apajas iimna nu, Yus akupeana nuí takaschamniati.”

10

Ni unuiniamurín setenta armia nuna Jesus etserkatarum tusa akupkarmiania nu

¹ Nuyá ukunam chíkich unuiniamurín setenta anaikiarmiayi Jesus. Tura jímíar jímíar apatak émkítíarum tusa ashí péprunam ashí nuñkanam ní wétin amia nuí akupkarmiayi.

² Akupeak tímiayi “Nekas tájarme, Yus-Chicham étserkum, júuktinia núnisañ, aents Yus-shuar awajsatín ti awai. Tura zyaki júukat, aya ishichik takainiasha? Tuma asamtai ní takarniurí akupkat túsarum Nerentín seatarum. ³ Wetarum. Átumka murikiua núninaitrume. Uunt yawá yujamua núninnium tsuumai ámunam akupeajrume. ⁴ Yurumkasha, kuitcha, sap-atcha júkiirap; shuarjái jintíá áujmamsatai túsarum wajasairap. ⁵ Jeá wayákrum emka jú titiarum: “Jú jeanam pujuinia nuna Yus shiir awajjarti.” ⁶ Nérentín “Ee, nuna wakerajai” tákuiníakia túrunattawai. Tura “Átsá, wakeratsjai” tákuiníakia, “nuiníakia túrunashti” titiarum. ⁷ Jeá wayattarmena nú jeañmañ pujustarum. Tura ajampramsattarmena nu yuatarum. Wari, takaana nu akinkiashtinkiait. Chíkich jeanam nuí werum nuí werum ajairap. ⁸ Awaintiamawartatna nú peprunam jearmeka ajampramsartatna nu yuatarum. ⁹ Jaa ainia nu tsuártarum. Túrarum “Yus jú nuñkanam akupin ajastín ishichik ajatemsai” nu peprunmayá shuar titiarum. ¹⁰ Íksarmek itiaarmachartatna nú peprunam jearum, jintíá wajasarum jú titiarum, ¹¹ “Yusna nakitra asakrumin, atumi pépruriniá nuñka ii nawen peema japírar akakekji. Túrasha jú paant nekaatarum: Yus jú nuñkanam akupkatin ishichik ajatemsai.” ¹² Yusa nekapsatín tsawantrí jeamtai nu peprunmayá shuaran ti asutiáttawai. Yaunchu Tsumanmayá shuaran asutiámia nujái naníkaamas asutiáttawai. Núnaka paant tájarme tímiayi.

(Mateu 11.20-24)

¹³ Wáinkiatá, Kurasín péprunmayatíram. Wáinkiatá Petsaitia péprunmayatírmesha. Atumí péprurín aents tujintiamun ti túraitjai. Wari, yaunchu Tiru péprunmasha, Setun péprunmasha nu tujintiamu túramuitkuiníakia yaunchu ní enentáin yapajíawaraayí. Túrawar kúntuts pu-jutai pushin entsarar yuníunim ajakíaraayí. ¹⁴ Tura atumsha aents tujintiamu túram wáiniatrum yapajíachu asakrumin Tirunmayá tura Setunnumiá tentsjai naníkaamas asutniáttarme. ¹⁵ Tura atumsha Kapernáumnumiáttírmesha, “ti naníkaamantu ajarar nayaimpiniam jeattaji” tu enentáimtsurmek. Maa, antsu jaka matsamtanium jeattarme, auka” tímiayi.

¹⁶ Tura Jesus ní unuiniamurín junasha tímiayi: “Atumin anturtamainiakka Winiasha anturtuiniawai; atumin nakitramainiakka Winiasha nakitruiniawai; tura nú arant, Winia nakitrakka Winia akuptukua nunasha nakitiawai.” Tú áujas Jesus nin akupkarmiayi.

Setenta unuiniamu wakетки táarmiania nu

¹⁷ Ukunam nu setenta unuiniamu warasar wakетки táarmiayi. Tura chichainiak “Uuntá, ame náarmiñ íwianch jíiki akupeam umirtamkamji” tiarmiayi.

¹⁸ Tutai Jesus tímiayi “Ee, Wisha nayaimpinmayá peem peetna núnisañ, uunt iwianch Satanásan akaiki iniaan wáinkiamjai. ¹⁹ Atumniaka winia kakarmarun susanjarme, napi najarmasha titín najarmasha yajauch awajtamsairum tusan; tura ii nemasrí kakarmari nupetkatniuncha susanjarme. ²⁰ Túrasha íwianch umirtamkui nu enentáimsam warasairap. Antsu atumí naari nayaimpiniam aarma aa asamtai warastarum” tímiayi Jesus.

Jesus warasmiai

(Mateu 11.25-27; 13.16-17)

²¹ Nuiníakia ní enentáin Yusa Wakaní waramtiksam Jesus júna tímiayi: “Aparú, ashí nayaimpíjijai nuñka Úntrinme; tuma asam jú túrunamu tí unuimiaru enentáimtumainia nuyá úukuitme; antsu uchichia núnis naníkaamantucha enentáimtumainia nú shuar paant

awajtusuitme. Ee, Aparú, núnik wakerichmakum. Tuma asamtai shiir enentáimtajme, Aparú” tímiayi.

²² “Winia Apar ashí surusuiti. Wisha ni Uchirj asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nú shuarsha winia Aparun nékainiawai.” Tu tímiayi Jesus.

²³⁻²⁴ Nuyá ni unuiniamurj̄n iis tímiayi “Wi tájarme, untsurj̄ Yúsna etserniusha tura uunt akupniusha átum yamáí wáinrum nuna wáinkiatniun wakeruiniayatan̄ wáinkiacharmiaiyi. Tura átum yamáí ántarme nuna antuktinian wakeruiniayatan̄ antukcharmiaiyi. Tura Yus achirmaku asakrumin, wáinrumna nu ti péñkeraiti” tímiayi.

Samarianmaya áishmañ katsumkamun yañmia nuna Jesus unuiniamiania nu

²⁵ Nuyá akupkamun jintinkiertin Jesus warintiak chichakat tusa wajatki werimiyai. Werí iniimiayi “Uuntá, wi tuke iwiaaku átaj takun çwarinia túratniuitaj?” tímiayi.

²⁶ Tutai Jesus ayak “çYús-Papiniun Muisáis áarmanum waritia áarmait. Waritia enentáimiam?” tímiayi.

²⁷ Akupkamun jintinkiertin ayak tímiayi “Juna tawai: Ti enentáimsam, tuke enentáimjai Uunt Yus aneeta. Ame kakarmaram, iwiaakmarmesha Yus íktusta. Tura ame ayashim aneamna núnismek ame íruramuresha aneeta. Núchakait” tímiayi.

²⁸ Tutai Jesus tímiayi “Péñker áimsame. Nu túrakmeke tuke iwiaaku átatme.”

²⁹ Tutai akupkamun jintinkiertin ni aninramun kíishtumaktajtsa wakerak “Winia íruramursha çya áinia?” tímiayi.

³⁰ Takui Jesus tímiayi “Jerusaréñnumiã jintia Jirikiú péprunam jeana nú jintianam áishmañ wean, kasa áishmañ tariar ni warirj̄n, pushirj̄ncha kasarkarmiaiyi. Tura katsumkar mayáí ashirak ajuantar ikiukiarmiaiyi. ³¹ Tura Israer-shuar Patri ukunmañ winis nu áishmañkan wáiniak aya íkiañ iis ikiukmiaiyi. ³² Nuyá ukunam Patri yáintrj̄sha nu jintianam wesa, nu áishmañkan wáiniak, áyatik iis ikiuak wémiayi. ³³ Tura nuyá Samaria nunkanmaya áishmañsha nu jintianmañ wesa, nu áishmañkan wáiniak ní shuárinchunak wáitnéntramiaiyi. ³⁴ Nuyá nu áishmañkan weantuk ni numpamnamurj̄n asuitijj̄aj tura wíniujj̄aj tsuar jaanchj̄jaj penuarmiaiyi. Tura ni kawairj̄j̄in ekenak jukimiyai. Tura írar kanutainiam jukí ejé nu áishmañkan péñker wáinkiamiaiyi. ³⁵ Tura kashin tsawarmatai Samarianmaya áishmañ weak jimiará kuítian jusa jeá nérenniurj̄n susamiayi. Susa tímiayi “Ju áishmañ péñker wáitrukta. Tura wi amaajna ju táasmataisha wi wáktkun akiktajme” tímiayi. ³⁶ Ayu, ámijj̄ajsha, nu menaintiu áiniana nu, çtuá imiá nekas katsumkamun waitnéntramia?” tímiayi Jesus.

³⁷ Takui akupkamun jintinkiertin chichaak “Entá, katsumkamun wáitnéntramia núa” tímiayi.

Tutai Jesus tímiayi “Amesha weme núnismek túrata.”

Marta ni kajijj̄aj Marí jeen Jesus pujusmiania nu

³⁸ Nuyá Jesus jintiá wesa chíkich péprunam jeamiayi. Nu péprunmaya nuwá naarj̄ Marta ni jeen itiaamiayi. ³⁹ Marta kají ámiayi ni naarj̄ Marí. Marisha unuiniamun anturkataj tusa Jesusa nawen pujusamiayi. ⁴⁰ Tura Mártaka ni takatrj̄n ti enentáimkat Jesusan weantuk tímiayi “Uuntá Jesúsá, çwinia kajr takatan winiak íktursainia nuka enentáimsumek? Winia yáintá turuttia” tímiayi.

⁴¹ Tutai Jesus tímiayi “Maaj Martí, untsurj̄ túratin ana nu ti enentáimsam itit awajtamui. ⁴² Tura aya chikichik nekas túratniuiti. Marikia nekas péñker ana nuna achikiai. Nusha penké jurunkishtatui” tímiayi.

11

Jesus Yus áujsatniun unuiniamiania nu

(Mateu 6.9-15; 7.7-11)

¹ Chíkich tsawantaj Jesus Yúsna áujsataj tusa atsamunam pujumiayi. Áujsua amikmatai ni unuiniamurj̄ chikichik Nin tímiayi “Uuntá, imiakratin Juan̄ ni unuiniamurj̄n unuiniamia núnismek Yus áujsatin unuiturta.”

² Tutai Jesus tímiayi “Yus áujkuram ju titiarum: Aparu Yus, nayaimpiniam pujamna nu, ii Aparj̄nme. Ame náarmincha shuar ántar pachischarti. Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisan̄ ju nunkanmasha uminkiatí. ³ Aparú, ii yurumkarj̄ ashí tsawant amasta. ⁴ Tura winia nemasrun tsañkurajna núnismek, Aparú, winia tunaaru tumashrj̄sha tsañkurturta. Tunáa wakeruktin tsañkatrukaip. Antsu ashí tunaanumiã uwemtikrurta.”

⁵⁻⁶ Nuyá Jesus juna tímiayi. “Wats, ju titiái. Kashi ajapéñ amikrum werishtameash. Tura “Winia amikiur yajaya winia jeärúj̄ yama tayi. Tura ajamsatniun penké takaktsujai.

Tuma asamtai amikru, menaintiu apatuk ajamprustá" t́chatameash. ⁷ Tura nii inít pujasan chichaak "Wari, wáitisha epenmiaiti, tura winia uchirsha wijiái ashí tepeenawai. Itiur nantakniak amastaj. Itit awajtipia" turamchanpiash. ⁸ Wats, paant tájarme, niisha amikrum asa, nantaki ikiatmastinian nakitiyat, itit awajtin tusa nantaki ashí wakeramna nuna suramsattawai. ⁹ Tuma asamtai tájarme: Yus seatarum; túrakrumin suramsattarme. Eákrumka wáinkiatarme. "Winiajai" tákurmin awajintiamattarme. ¹⁰ Seana núnaka suániatsuk. Eána nuka wáintsuk. "Winiajai" tuinia núnaka awániatsuk.'

¹¹ 'Wats, átum uchirtintiram, ame uchiram apatkun seatmakui źkayaash súsaintiam? Namakan seatmakui źnapíash súsaintiam? ¹² Nujintian seatmakuisha źtitiŋkiash súsaintiam? ¹³ Wari, átum imiá yajauchitirmesha atumí uchirj péŋker ana nu tuke súchakitrum. Atumí Aparj nayaimpiniam pujana nu, seakrumniŋkia nú nankaamas ni Wakanin suramsattawai." Tu unuiniamiyai.

Jesusan "iwianchi kakarmarijai túrawai" tiarmiayi
(Mateu 12.22-30; Márkus 3.19-27)

¹⁴ Shuar iwianchruku asa chichachu ámiayi. Nuna enentáiyen nu iwianchin Jesus j́iki akupkamiyai. Íwianch j́iinkimtai chichachu chichasmiyai. Túramtai shuar nuj pujuarmia nu tí enentáimpramiayi. ¹⁵ Tura ch́kich tiarmiayi "Juka iwianchi kapitiatnri Satanásan, ni ch́kich naarj Pirsepún umirniuiti. Tuma asa nuna kakarmarijai iwianchin j́iki akupeawai."

¹⁶ Tura ch́kichkia, nekas Yúsnumia taawashit túsar "Nayaimpinmaya kakaram ana nu iniakmasam aents tujintiamu túrata" Jesusan tiarmiayi.

¹⁷ Tura Jesus tu enentáimianian neka asa tímiayi "Núu nunkanmayan shuar nuamtak kajernaiyakuŋkia nú nunka wárik meserchattawak; nuamtak shuarsha ni shuarj́ijai kajernaiyaksha amunaikchartatuak. ¹⁸ Winiaka "Pirsepú iwianchi kakarmarijai iwianchin j́iki akupeawai" túruttsurmek. Tuma asamtai tájarme, uunt iwianch Satanás naartin, ni suntarj́ijai kajernaiyaksha źitiur tuke kakaram átkin? ¹⁹ Tura Wi Pirsepú kakarmarijai iwianchin j́iki akupeakuŋkia, atumi shuarisha zyana kakarmarijai iwianchin j́iki akupena? Niisha "iwianchi kakarmarijai túrichuitji" tuiniaisha źitiura Winiasha, "iwianchi kakarmarijai túrait" turutminiatrum? ²⁰ Wikia Yusa kakarmarijai iwianchin j́ikin akupeajai. Nu nekaarum Yus atumj enentáin akupin ajasuana nu nékarme.'

²¹ 'Kakaram áishman ḱishtumaktajtsa iwiarnar wajas jeen wáinkui, ni warirj inít ana nusha tímatrusan ániawai. ²² Antsu níijai nankaamas kakaram ana nu winiakka nu-petkashatuak. Tura ḱishtumaktinian iwiar takakman jurawai. Tura kasamkámun ni amikrin súawai. Kakaram áishman iwianchin nakumeawai. Tura nujai nankaamas kakaram áishman Winia nakumprawai. ²³ Iista. Winia nemartatsna nu winia nemasruiti. Núnisan Winia yáintsuna nuka aya itiurchat nájateawai.'

Iwianch j́iki akupkamuiiat wáketna nuna ujakmiania nu
(Mateu 12.43-45)

²⁴ Nuyá Jesus juna tímiayi: 'Shuara enentáiyá íwianch j́iinki ayamprataj tusa yumi penké yútatsna nuj wéawai. Tura ayampratniun wáincha asa ataksha waketkitniun enentáimui. "Wi j́iinkimij nuj waketkitjai" tawai. ²⁵ Tura waketki péŋker iwiamun tura ankant aan wáiniui. ²⁶ Nuna wániak, ni ain siati iwianchin níijai nankaamas yajaunchin itia enkemáwartatui. Túrunamtai nu shuar nuiki nuna nankaamas yajauch ajastatui." Tu tímiayi Jesus.

Nekas warastin

²⁷ Shuar iruniarmia nuj Jesus nuna chichaa pujai, nuwa untsukum "Ame nukun Yus ti yáin_kiai. Ni ampújey ame pujuschkam. Ámin amuntstamchkam" tímiayi.

²⁸ Tutai Jesus tímiayi "Antsu ni chichamen antukar umirainia nuna, nukurjai nankaamas Yus ti yáin_kiaru ániawai, tajai" tímiayi.

(Mateu 12.38-42; Márkus 8.12)

²⁹ Shuar untsurj Njin káunkarmatai Jesus tímiayi "Yamaiya shuaraka yajauch ániawai. Yajauch ásar, chichartuiniak "Nekas Yúsnumiaitkiúmka aents tujintiamua nu túram Yusa kakarmari iniakmasta" turutainiawai. Túrasha áyatik yaunchu Junas túrunamujai iniakmasmia nujain nekaatin ániawai. ³⁰ Kame Junas túrunamujai Niniwi péprunmaya shuaran yaunchu Yus ni kakarmarin iniakmasmia núnisan yamaisha Aents Ajasu tutainjiana nu Wi túrunamujai Yuska ni kakarmarin iniakturmastatrum. ³¹ Yaunchu Sarumún uunt akupin pujai Sepa núŋkanmaya nuwa akupin Sarumunka chichamen nekaataj tusa ti jeash-tanmaya támiayi. Tura yamaikia Sarumunjai nankaamas pujai átumka anturtatrum. Tuma asamtai Wi tájarme, Yus ashí shuaran nekapsattana nu tsawant jeamtai nu nuwa,

akupniun péñker anturka asamtai, Yus íimianum péñker átatui. Antsu atumsha Winia anturtukcha asakrumin Yus íimianum yajauch átatume. ³²Tura Yúsnan etserin Junas Níniwi péprunmaya shuarum Yus Chichaman etserkamtai nu shuar ni tunaarín enentáimtusar enentáin yapajíáwarmiayi. Tura juí yamáí Junasjái nankaamas etserin pujajái. ¡Tuma asamtai nekapsatin tsawant jeamtai Níniwinmaya shuar yamaiya shuar árumna nuna sumamtikramattarme!

Ayashi tsáapnintri
(*Mateu 5.15; 6.22-23*)

³³ ‘¿Shirikip ekeemakar úqutinkiait? Pitiaknumsha enkeashtiniaiti. Antsu shuar jeá wayana nu paant íimsat tusar yakí ekensatniuiti. ³⁴Ame jímijíjái wáinkiam nujái wekasatin nekaattame. Tuma asamtai ame jímijíjái péñker ana nu wáinkiumka péñker wekasattame; antsu ame jímijíjái yajauch ana nu wáinkiumka, kiritniunam wekasatniua núnisañ yajau-chiniam wekasattame. ³⁵Anearta. Enentáimin tsáapin ana nu kiritin ajaschati tusam anearam wekasata. ³⁶Ame ayashmíin kirit ajatsuk aya tsáapniniatkiungkia, shirikip paant awajea núnisañ ashí paant wáinkiatame” tímiayi.

Pariséuncha, Israer-shuara jintinniurísha “yajauchiitume” tímiayi Jesus
(*Mateu 23.1-36; Márkus 12.38-40; Rúkas 20.45-47*)

³⁷ Jesus chichasua amikmatai Paríséu shuar, winia jearuñ yurumáitia tusa untsukmiayi. Tutai Jesus wayá misanam pujusmiayi. ³⁸Tura Israer-shuar ikijmartin ana nuna túrutsuk aya pujakuí Paríséusha nuna wáinia “maa ¿urukamtia tura?” tu enentáimsamiayi.

³⁹ Tura Uunt Jesus tímiayi “Pariséutirmeka atumí yurumtairí aya pátatek niijaktin ti wakeriniaitume. Atumsha nu yurumtaijái méteketume. Pátatek péñker túrarme. Tura atumí enentáinkia kasamkatniusha tura yajauchia nusha piakuiti. ⁴⁰¡Enentáimcha! Warí, ashí pátatek wáiniaj’ nuna Yus najanachmakia; tura inít paantcha ana nunasha Yúsak najanachmakia. ⁴¹⁻⁴²Aneartarum, Paríséutirmesha. Aya nuka méntasha, anissha tura aya apatkusha Yus súsatin ti enentáimprume. Nukasha tsuriasrum apatkusha tias ana nuyá chikichik achikrum, Yúsnaiti tátsurmek. Tura antsu nu túratin iniaitsuk péñker wekasatniusha, Yus anenmarmena nusha péñker enentáimsatniitume. Wats inít, enentáimin ana nútiksarmek jusam susarta. Nuñkia ashí chamir átatui.’

⁴³ ‘Tura aneartarum Paríséutirmesha. Yus áujtai jeanam penkerí pujutainium pujustin wakerarme. Tura jintiá aents íimainiamunam ti shiir áujtusarat tusarum wakerarme.’

⁴⁴ ‘Jintinniutirmesha, Paríséutirmesha máí-metek aneartarum. ¡Antar shiir chichamtinia! Iwarsamu paantcha núniniatirume. Shuar nu nankaamaksha nájamiat nékatsui. Núnisañ shuar atumí chichame antukar yajauchia nuna nekartamtsurme.’

⁴⁵ Nuñkia Israer-shuara jintinniurí chikichik Jesusan chicharuk tímiayi “Uuntá, nu tákum incha yajauch chichareame.”

⁴⁶ Tutai Jesus tímiayi “Átumsha jintinniutiram aneartarum. Atumí akupkamurjijái káarak ti kijin entsakchamnia súarme. Tura átumka yáintaj tusarum atumí uwejejaísha penké ántiatsurme.’

⁴⁷ ‘Aneartarum tájarme. Yaunchu atumí uuntri Yúsnan étsernium máawarmia nuna iwarsamurí átum jeamniutirume nu etserin ti péñker ásarmatai kajinmatkishtin. ⁴⁸Nu túrakrum atumí uuntri túrawarmia nu, “yajauchichuiti” tarume. Warí, niisha máawarmiayi, tura atumsha máawarai táyatrum niijái méteketume. Warí, Yúsnan etserniu iwarsamurín jeamkum atumek sumamarme.’

⁴⁹ ‘Atumí túramurín nekáa Yus juña yaunchu tímiayi: “Winia etserturniun tura winia akatramurnasha niin akuptukartajai. Túramtai chikichnaka máawartatui, tura chikichnaka pataatukartatui.” ⁵⁰Tuma asamtai ashí ni etserniurín maamu ainia nuna, yamaiya áentstirmir Yus sumamtikramattarme. Nunka najanamunmaya jukí ⁵¹yamáí ímiajái maamu ainia nuna, kame Apir maamunmaya jukí yamáí Sakarías maamua tímiajái an-intrustatui. Naman maar Yus sutai ámanum tura Yus-jea ámanum ajapén atenkamunam máawarmia nú Sakaríasan tajai. Nu tuma asamtai tájarme, ni etserniurí maantamawarmia nuna yamáí matsatrumna nútirmin aninmasartatui.’

⁵² ‘Jintinniutiram aneartarum. Waiti asakatniua núnisrumek nekas nekaatin surimi-arme. Atumkesha nékatsurme. Tura nekaataj tana nusha suritiarme” tímiayi.

⁵³⁻⁵⁴ Jesus nuna takui Paríséusha, jintinniusha ti kajerkmarmiayi. Tura nii tana nujái “yajauch túrame” titiai tusar wakeruiniak untsurí anintriarmiayi.

12

¹ Nu tumaj shuar ti untsurí káunkarmiayi. Ti kaunka ásar nawen mai-najatnai ajarmiayi. Tura Jesus ni unuiniamurín tútan juarkímiayi. “Pariséu ántar chichamtin áiniawai. Nuka wakaprutaiya núnisaiti. Wakaprutaiikia nijiamanch yumirniun yama enkeam páantchaiti.

Tura ukunam nekaamniaiti. ² Núnisañ ashí paantcha ana nu iwiainiakma átataui. Uúkma ana nusha nekaamu átataui. ³ Nu tuma asamtai, kiritniunam tímiarmena nusha tsawái tsáapin ajasmanum antunkattawai. Tura jea inít pujusrum ishishmasrum tímiarmena nusha áa ti paant etsernaktataui.'

Yusak ashamkatniuiti

(Mateu 10.28-31)

⁴ 'Amikrutiram, aya ayashmin main ainia nu ashamkairap, tájarme. Ayashmin maa nú arantka máashtataui. ⁵ Tura ya nekas ashamkatniuitrum, nuna paant jintintiattajrume. Ame ayashmí maa, nuyá ámin jinium akuptamkatniun tujintiatsna nu ashamkatarum. Ee, Yus ashamkatarum, tájarme.'

⁶ 'Jimiará chínki ishitiúpchich ishichik kuitjai surukchatniukait. Túrasha Yussha nu chinínkin penké kajinmatkishtataui. ⁷ Wats, ashamkairap. Untsurí chiníkjijai nankaamas Yuska atumin enentáimturmarne. Warí, ame intiashmin mash Yus nekapmaruítí.'

(Mateu 10.32-33; 12.32; 10.19-20)

⁸ 'Ashí shuar ashí íimiainiamunam Winia Aents Ajasu tutain, Winia natsantruiniatsna núnaka, Wisha Yusa suntarj íimiainiamunam natsantrashtataui; ⁹ antsu shuar íimiainiamunam Winia natsantrana núnaka Wisha Yusa suntarj íimiainiamunam natsantrattataui.'

¹⁰ 'Winia, Aents Ajasu tutain, shuar yajauch chichartakuínkia nusha tsankuramniaiti, tura Yusa Wakaníncha yajauch chicharkuínkia nuka penké tsankurachminiaiti.'

¹¹ 'Wats, Israer-shuar iruntai jeanmasha, tura Israer-shuar kapitiániumsha, uunt-numsha juramainiakui, aninmainiakuisa warintiajak tusam ti enentáimsáip. ¹² Ame áimkiatin jeamtaí, Yusa Wakanj ame títiatmena nuna jintinramattawai,' tu tímiayi.

Kútiak enentáimtuschatniuiti

¹³ Chíkich áishmañ Jesusan tímiayi "Uuntá, ii aparí ikiurtamkimiay nuna yatsur winiasha nakak surustí, titia" tímiayi.

¹⁴ Tutai Jesus tímiayi "Áishmañka, atumin nu túratin anaikiamukaitaj."

¹⁵ Nuyá tímiayi "Pénker enentáimsatarum. Nii takakna nújain shuar iwiaaku, áchatniuiti. Tuma asamtai kútrintin ajastin aya nuke enentáimsaip."

¹⁶ Nuyá juna métek-taku chichaman unuiniak tímiayi:

"Kútrintin áishmañ ní ajariyan arakan ti nukap juukmai. ¹⁷ Tura "¿Ti nukap asamtai tuin ikiustaj. Itiurkatjak?" tu enentáimsamiai. ¹⁸ Wats, wi nékajai. Winia ikiutái-jearun ashiran nú nankaamas úntan najanatjai. Tura nuj ashí ikiustajai. ¹⁹ Nuínkia untsurj uwitin shiir pujustinian ikiusman takustataui. Tuma asamtai, ayampran, yurumán, umaran shiir pujustataui" timiai.'

²⁰ "Tura Yus nin chicharuk timiai "Netse. Yamái kashi jakattame. Nuínkia imiá núkap ikiusumna nusha zyana átata?" timiai" tímiayi.

²¹ Nuyá Jesus tímiayi "Shuar niníki kútrín ikiauntumna nu, núnisaiti. Túrasha Yusjaj íismaka kútrinchaiti."

Yus ni uchirín péñker wáinkiaiti

(Mateu 6.25-34)

²² Nuyá ni unuiniamurjín Jesus juna tímiayi: "Warí yuarik pujustaj' tura warin entsartaj' tusarum nuke ti enentáimsairap. ²³ Yus iwiaaku átinian amasu asa yurumkancha amastataui. Tura ju ayashniasha najana asa entsataincha amastataui. ²⁴ Chiníkisha enentáimsatarum. Ni-isha arakmainiatsui. Juuk yurumkan ikiuiniatsui. Tuma ain Yuska ni yurumátniurjín tuke stáawai. Atumsha chiníka nú nankaamaschakaitrum. ²⁵ Tura ya shuarak, ti enentáimtana nujái nú naya ajasminiait. ²⁶ Kame yúpichuch ana nusha túrachminiaitiatrumsha, ¿urukamtaí chíkich ainia nusha ti enentáimtarum?"

²⁷ 'Íistá, kukujsha takaachitiat tura nájanchitiat ti shiirmach áiniawai. Yaunchu akupin Sarumún ti shiir iwiarmanniuitiat kukujia tímianchauyayi. ²⁸ Iis, nupa yamá tsakaawai tura kashin aents tsupikiar jinium apeánawai. Tuma ain Yus ti shiir awajeatsuk. Nuna tura asa atumniasha nú péñker wáitmakhattawak. ¿Urukamtaí Yus nekas enentáimtarum? ²⁹⁻³⁰ Ju nunkanam ana nu ti pachirap. Chíkich shuar, Yúsán nékainiatsna nu, warin yuataj', warin umartaj' nuna ti pachiniawai. Tura atumsha tu enentáimsairap. Urukataj, tiirap. Ame Apa nayaimpiniam pujana nu, ashí atsumarmena nuna nékawai. ³¹ Antsu emka Yusna nu enentáimtustarum. Túrakrumniñkia atsumamna nuna Yus suramsattawai.'

Kútián pachis Jesus unuiniamiania nu

(Mateu 6.19-21)

³² 'Winia murikrutiram ashamkairap. Untsurjchuitrume. Túrasha atumí Aparí ni akup-tairjín pachitmaktasa ti wakerutmarme. ³³⁻³⁴ Kútrum tuj aa, nuj tuke enentáimtitiarme. Tume asamtai takakrumna nu surukrum atsumainia nu susatarum. Nuka enketai

arut ajatsna nuĵ enĵkeatniua núnskete. Túrakrum nayaimpinmaya kuit amuatsna nu iĵiĵwearme. Nuĵsha kasa nu kuitian kasamkataĵ tusa wayaĵchminiaiti, tura kayaĵsha nu kuitian yúatniun tujintiawai.'

Anearar wekasatniuitĵi

³⁵⁻³⁶ Ĵu enentáimsatarum. Ni uuntriĵ nuatnaikiatin námpernumiĵ taa, "uraitia" takui, takarnĵurĵiĵ jinia ekeemakar wárik urattiai tusar nakáa puĵuiniawai. Atumsha núnisrumek Wi atumĵ Uuntriĵ támatai, shiir itiaatai tusarum anearum wekasatarum. ³⁷ Ni uuntriĵ taak iwiáa puĵuiniian wáinkiarai nuka shiir puĵuiniawai. Nu úntak iwiar, "misanam puĵustarum" ni takarnĵurĵin titiatui tura yurumkan sústartui. ³⁸ Kashi ajapén taaksha tura tsawaĵana aĵ taaksha ni takarnĵurĵin iwiáa puĵuiniian wáinkiuĵka, nu takarĵin shiir puĵuiniawai. ³⁹ Tura ĵusha nekaatarum. Jeennua nu, kasa tátinian nékaitkiuĵka, iwiáa puĵusaĵayi. Kasa wayá kasamkatniun suritkiĵayi. ⁴⁰ Atumsha núnisrumek, anearum puĵustarum. Wi Aents Ajasu tutai aya aneachmanum tátatĵai" túmiayi.

Pénker takarin yajauch takarniuĵai

(Mateu 24.45-51)

⁴¹ Nuyá Pítur aniasmiayi "ĵAya ínkik unuiniartaj tusam nu métek-taku chicham támek. Kame ashí nekaawarat tusamek tame?" túmiayi.

⁴² Tutai Jesus túmiayi "Atumsha pénger takatan wáinnua núnsketrume. Takatan wáinin ni uuntriĵ takatrin takainia nuna, yurumátin jeamtai, ayurkamna núiti ni uuntriĵ shiir umirna nu, tura pénger enentáimtana nu. ⁴³ Ni uuntriĵ taa, takatrin túmiasuraj túran wáinkiuĵka nu wáinnuasha shiir enentáimsamniaiti. ⁴⁴ Umirin asamtai, ni uuntriĵ ashí ni warĵin wáitrukata tusa apuĵsattawai. Nuna paant tájarme. ⁴⁵ Tura nu takatan wáinnuasha "úuntur wau táchattawai" tu enentáimias, ni uuntriĵ takarnĵurĵin yajauch awajeakuĵkia tura niĵki ti yurumá, ti umar nampeakuĵkia, ⁴⁶ nuĵkia ni uuntriĵ ni nákachmanum aya aneachma taa ti asutiáttawai. Umichu puĵuinia nuĵ akupkattawai.'

⁴⁷ "Takarĵin ni uuntriĵ wakera nuna nékayat, iwiartsuk umitsuk puĵakka ti awatramu átatui. ⁴⁸ Túrasa takarin nékachu asa, asutniámnia túrakka, ishichik awatnartatui. Núkap susamu ana núnaka núkap seawartatui. Núkap ataksamu ana núnaka núnisarĵ nanĵkaamas seawartatui.'

Jesusĵai shuar akannartatui

(Mateu 10.34-36)

⁴⁹ Ĵiĵiĵai nekapsatniua nútiksanak nuĵkanam jinia ikiapartaj tusan tamajai. Tura túrunat tusan ti wakerajai. ⁵⁰ Imiantinia núnisar itiuĵchat ukatruktatui. Nusha wárik amuukat tusan ti wakerajai. ⁵¹ "Ashí shuar shiir puĵusarat tusa táwiti" tu enentáimturumek. Núchaiti. Antsu shuar tesanairat tusan táwitĵai. ⁵² Yamái ĵukimiutak chikichik shuarnum senĵu ainia nu akannakartatui; menaintiu shuar ni shuarĵin ĵimiaran nakitrartatui. Ĵimiarsha ni shuarĵin menaintiun nakitrartatui. ⁵³ Apasha ni uchirĵin nakitrattawai. Núnisarĵ uchisha ni aparĵin nakitrattawai. Nukusha ni nawantrĵin nakitrattawai, nawantrĵisha nukurĵin nakitrattawai. Tsatsarĵisha ni najatĵin nakitrattawai; najatĵisha tsatsarĵin nakitrattawai.'

(Mateu 16.1-4; Márkus 8.11-13)

⁵⁴ Jesus áentsun chicharuk ĵunasha túmiayi "Atumsha nantu akaatainmaani ĵiamatai "yutuktatui" tátsurmek. Nusha nekas tárume. ⁵⁵ Tura anaaraniaĵ nase násenkamtai "séejik átatui" tárume. Tura nekas tárume. ⁵⁶ Yuraĵminmasha nuĵkanmasha túruna nu nékarme. Túmaitiatrumsha ĵu tsawantaj túrunattana nusha ĵitiura nékatsrum? ĵMaaj, ántraitrumek!"

Nemasrumĵaisha nawamnaikiata

(Mateu 5.25-26)

⁵⁷ "Túrasa pénger ana nusha ĵurukamtai atumek enentáimsarum wáintsuram? ⁵⁸ Irutramuram úntnum ĵuramkuĵkia jintia wésamek "nuamtak iwiarartai" titiá. Túrachkumniĵkia akupniunam ĵuramkittiamé. Tura niisha suntarum akuptamkattame. Tura niisha sepunam enĵketmattawai. ⁵⁹ Tura nekas tajai, nuĵ enĵkemamka ashí rearchisha akikmachkumka ĵínkishtatme" túmiayi.

13

Ii enentáĵ yapajátniuitĵi

¹ Nu tsawantin chícham ujaktai tusar Jesusan tariarmiayi. Kariréa nuĵkanam Israer-shuar ni waakarĵin máawar Yús susatai tusar puĵuiniĵai, Piratu nin maa, nuna numpen waaka numpeĵai pachimpramun ujakarmiayi. ² Tura Jesus túmiayi "ĵWarí enentáimsarum? Kariréanmaya áishmaĵ tárumna nu, chíkich Kariréanmaya áishmaĵĵai nanĵkaamas yajauch ásar túrunawarai ĵtu enentáimprumek? ³ Atsá; atumĵ enentáĵ yapajáĵchurmeka núnisrumek atumsha ĵakattarme. Nuna paant tájarme, túmiayi. ⁴ Tura tiasiúchu áishmaĵ yakí ĵeĵ

Seruí kupiniak iniaak nekenkarmiania nu, ¿warí enentáimtarum? Chíkich Jerusarénnunniya shuarjají nankaamas tunáa ásar túrunawarai ¿tu enentáimprumek? ⁵ Atsá, tájarme. Atumí enentáí yapajíáchkurmeka núnisrumek atumsha jakattarme.”

Iikiu numi nereatsna nu

⁶ Junasha Jesus métek-taku chichaman tímiauyi. Júiti:

Shuar ni ajarín líkiu numin araamun takakuyi. Nerekchiash tusa iyumai. Túrasha nere atsumai. ⁷ Nuínkia ni ajarín wáinniuun timiai “Antukta, menaintiú uwitin júna nere átai tusan waketrú pujajai; túrasha penké wáinkiachjai. Ajakta. ¿Urukamtai ánttrash wajastata?”

⁸ Tutai ajá wáinin timiai “Atsá, uuntá; jú uwitin wajastí. Wajamurín takarsatjai tura penker nuñkan matsatkatjai. ⁹ Nujají nerekchampiash. Tura tuke nereachkuínkia nuínkia ajakta” timiai”, tímiayi.

Nuwān punuá kaarun Jesus tsuármiania nu

¹⁰ Ayampratin tsawantají Israer-shuar iruntai jeñam Jesus unuiniak pujumiayi.

¹¹ Nujsha nuwā pujumiayi. Nu nuwāsha tiasiúchu uwitin tuke jaa pujumiayi. Íwianch nin yajauch awajas apuna tuke ikiamiamiyi. Túramu asa pañkái nakuenkataj tukamá penké tujinnmiayi. ¹² Jesus nuna wáiniak, chícharuk “Nawantrú, ame jaamurmiya ankant ajasume” tímiayi.

¹³ Nuna tinia ni uwejejai antinmiayi. Tura nú chichamaik nuwāsha pañkái nakuenkamiayi. Tura Yusa náarin uunt awajsamiamiyi. ¹⁴ Tura Jesus ayampratin tsawantají tsuaru asamtai, iruntai jeñ uuntri kajak iruntrarmia nuna tímiayi “Sais tsawantin takaschatniukait; ayampratin tsawantají tsuámartaj tusarum táchatniuitrume. Sais tsawant ana nuí tátiniaitrume.”

¹⁵ Tura Jesus tímiayi, “¿Ántar chichamtinia! ¿atumí waakarjisha atumí umpuururjisha yumi aartai tusarum ayampratin tsawantin atiarum júatsrumek? ¹⁶ Tura jú nuwāsha, atumí shuarjí Apraám shuarnunniya akiiniati. Nii tiasiúchu uwí Satanás yajauch awajsamujají jinkiamuyayi. Níncha ayampratin tsawant ain yajauch awajsamunmayá atíachminkiait” tímiayi.

¹⁷ Jesus nuna takui ni nemasrjisha natsaáarmiamiyi. Tura penké shuar ni penker túramurín wáinkiar warasarmiamiyi.

Mustasa jiníkiái

(Mateu 13.31-32; Márkus 4.30-32)

¹⁸ Nuyá Jesus tímiayi “¿Yusa akupeamurj warijjain métek-takuit? ¹⁹ Mustasa jinkiaíjjai métek-takuiti. Mustasa jinkiaíncha shuar ni ajarín araamiayi. Tsapái, tsakaak, uunt numi ajasmiai. Ti uunt asamtai chíñki ni kanawen pasunmarmiamiyi.”

(Mateu 13.33)

²⁰ Tura junasha tímiayi: “¿Yusa akupeamurj warijjain métek-takuit? ²¹ Tanta wakaprutaia métek-takuiti. Arinia núkap ana nuí nuwā wakaprutain ishichik enkéamiayi. Túram ashí wakapruamiayi.” Tu tímiayi.

Yupikiach waiti

(Mateu 7.13-14, 21-23)

²² Jesus Jerusarénum jeatts weak untsurí peprunam wayá unuiniarkutak wémiayi.

²³ Weají chíkich shuar aniasmiayi “Uuntá, ¿uwemáinia nu ishichikíai?”

²⁴ Tutai Jesus tímiayi “Yupikiach wáitiniam wayataj tusam ti wakeritiarum. Kame untsurí wayataj tusar wakeriartatui, túrasha tujínkiartatui, tájarme. ²⁵ Jeá nérenniurj wáitin epeniatai, atumsha aq wajarum nu, wáitiniam wajasrum untsúakrum “Uuntá, uratritia” títiatrume. Túrasha “Nékatsjarme. ¿Tuyantskaitrum?” turamtrume. ²⁶ Nuyá átum títiatrume “Túrasha, uuntá, iisha ámijijai yurumámji, ámijijai umarmaji. Tura ii péprurjíncha unuiniamame.” ²⁷ Túrasha nii títiatui “Tuyantskaitrum, nékatsjarme, tátsujrumek. Yajauch túrintirmeka winiyanéka kanaktiarum.”

²⁸ ‘Nuyá Apraámsha, Isaksha, Jakupsha tura ashí Yúsnan etserin Yus akupeana nuí wayawaru wáinkiarum tura aq ajapam pujusrum ti útkuram naim tásarara ajatarme. ²⁹ Tura Yus akupeana nuí, nantu tatainmaaniyasha nantu akaatainmaaniyasha, arakiasha, nuñkaaniasha taar, imia Israer-shuarchaitat yurumátaí tusar pujusartatui. Tura atumsha, “Apraám shuáraitjai” táyatrum, wayashtatrume. ³⁰ Nujsha yamáí ukunmaani ainia nusha emka ártatui; tura yamáí emka ainia nusha nujsha ukunmaani ártatui.”

Jerusarénumaani Jesus wémiayi

(Mateu 23.37-39)

³¹ Nu tsawantají Pariséu aents Jesusan tariar tiarmiayi “Erutis mantamattsá wakerut-mawai. Tuma asamtai júyañka wetá.”

³² Tutaí Jesus tímiayi “Werum nu kujancham ju titiarum: “Ístá. Yamaisha ishichik tsawant iwianchin jikin akupkartajai; túran jaancha tsuárartajai. Tura ukunam amukatjai.” ³³ Tura Jerusarénnumaaní ishichik tsawant tuke wétiniatjai. Yúsnan etserin aya Jerusarénnuman jákatniuiti.”

³⁴ “Jerusarénnumaítiram, Yúsnan etserin máiniaitrume; tura Yus akatar akupturmakmania nasha kayajai tukurum máiniaitrume! Tuma aín atash ni shiamprín etektana núnisnak Wisha weaktasan wakerimjiarme, túrasha nakitramarme. ³⁵ Iistarum. Atumniasha Yus ajapramaitrume. Tura “Yusa náarín winiana nu, shiir atí” títiatrumna nú tsawant jeatsain penké wáitkiashatrum. Nuna tájarne” tímiayi Jesus.

14

Aishman eaak-jaan Jesus tsuármiania nu

¹ Ayampratin tsawantaj Pariséu uuntri jeen Jesus yurumátsa wémiayi. Tura chikich Pariséu wariniak túrat tusa ii pujuarmiayi. ² Nuí áishman eaak-jaa Jesus pujamunam naka pujumiayi. ³ Jintinniuncha Pariséuncha Jesus aniasmiayi “¿Warí tárum? ¿Ayampratin tsawantaj jaa tsuárminkait? tsuárchamniakait?” tímiayi.

⁴ Tura niisha áimtsuk pujuarmiayi. Nuínkia jaan antin tsuármiai. Tura “shiir wetá” tímiayi. ⁵ Nuyá Pariséun chicharuk, “Atumí umpuurarísha, waakarísha waá tármanum akaiki iniamtai, ayampratin tsawant aín nu chichamaik júatsrumek” tímiayi.

⁶ Takui áimkiatniun penké tujinkiarimiayi.

Nuátnaikiatin nampernum ipiaamu ármia nu

⁷ Ipiamusha penkeri pujutainium pujustaitar ti wakeruiniakui, Jesus nuna wáiniak juna jintinramiayi:

⁸ “Nuátnaikiatin nampernum penkeri pujutainium pujusaip. Nuí pujakminkia, chikich ámijjai nankaamas penkéri táchatpiash.”

⁹ “Tura ipiatmania nu chichartamuk “Chikich iiltusta” turamchatpiash. Nuínkia chikich nánkatkamu pujutainium wéakum natsartatme. ¹⁰ Antsu ipiatmakmin, nánkatkamu pujutainium pujustá. Nuínkia ipiatmamnia nu chichartamuk “Amikru, ámeke juí penkeri pujutainium pujustá” turamtatui. Nujai chikich ipiaamu ainia nu, “nekas penkerinti” turamartatui. ¹¹ Imiata, “penkerintjai” tu enentáimtuma nuka péejchach awajnatatui. Tura ímianchach enentáimtúmana nuka waantu ajastiniati.”

¹² Nuyá Nin ipiaamua nuna chicharuk tímiayi “Amesha yurumáití tusam untsuktajtsam wakerakmeke, ame amikrumsha, yatsumsha, ame shuarumsha, írtramuram kuítrintin ainia nusha ipiaawaip. Nii ipiaamka, ataksha íksan ámin ipiatmashtatuak. Nujai akikma átatme. ¹³ Antsu yurumáití tusam untsuktajtsam wakerakmeke, kuítricha, wekaicha, shutuapsha, kusurusha ipiaawarta. ¹⁴ Niisha akirmaktinian tujintiainiawai. Pénger shuar nantakiartatna nuí akinkíartame. Nu tuma asamtai warastatme” tímiayi.

Uunt namperan Jesus nekarmá chichasmiania nu

¹⁵ Nu misanam pujuarmia nuyá, chikichik Jesus chichaamun antuk, Jesusan tímiayi “Yus akupeamunam pachiiniak, yurumkuñka ti shiir ainti.”

¹⁶ Nuna takui Jesus juna jintintiamiayi: “Áishman namperan nájanuk, untsurí shuaran taartí tusa akatar akupkamai. ¹⁷ Yurumátin jeamtai “Winitiarum, yurumátin jeayi” tu tiarta tusa ni takarniurín akupkamai. ¹⁸ Tura winichminiatji tusar ashí ujakarmai. Chikich timiai “Nunkan yamá sumarmakjai. Iyutaj tusa wéakun winishtatjai. Tsankurturti” timiai. ¹⁹ Tura chikich chichaak “Wisha tias waakan sumarmakjai. Nekapsatsan wakerajai. Tuma asan winishtatjai. Tsankurturti” timiai. ²⁰ Tura chikich chichaak “Yamá nuatnaikiatjai. Tuma asan winishtatjai” timiai. ²¹ Takarin waketki ni úuntrin ashí nuna ujakmai. Nuna antuk niisha kajekmiayi. Tura ni takarniurín timiai “Ju péprunam pénger jintianmasha tura uchich jintiachinmasha weme, kuítricha tura wekaichasha, shutuapsha, kusurusha itiaarta.” ²² Nuyá ukunam ni takarniurí taa chicharuk “Uuntá, ame turutmiamna nútiksanak túramjai; túrasha tuke ankant awai” timiai.”

²³ “Tutaí ni uuntri chichaak “Jintianam weme, chikich jintiachiniam weme, wáinmena nu ashí awaygwarta. Winia jearu piakat tusan wakerajai. ²⁴ Emka ipiaawarmajnia nuka penké chikichkíksha winínkia yurumáchartatui, tajarme” tímiayi.”

Kristu nemarsatin yúpichuchichuiti

²⁵ Untsurí aents Jesusjai irunki wearmiayi. Niisha nuna apajas iis juna tímiayi:

²⁶ “Shuar ni aparíncha, ni nukuríncha, nuaríncha uchiríncha, yachíncha, umaincha Wijiái nankaamas enentáimtakka, tura shiir pujustinian wakerak Winí winitniun nakitiakka winia unuiniamur ajaschamniati. ²⁷ Ní wakeramurín ajakeak ni krusrj yanaki nemartatsna nu winia unuiniamur ajaschamniati.”

²⁸ ‘Jeá yaki jeamtaj tusam wakerakmekka, kuítian urutmak ajapawaintiaj tusam tura urutmajaink’ amukaintiaj tusam emka enentáimsashtatmek. ²⁹ Túrutuk aya ukura iniaisam amuktin tujinkiakminkia, nuna wáiniainia nu, wishikiainiak juna tiartatui: ³⁰ ‘Ískua. Nu shuar jeamtinian nankamamiayi. Túrasha amuktinian tujinkiamiayi.’

³¹ ‘Tura uunt kapitíán chíkich kapitíánjaj mesetan najanatin áchatpiash. Emka, niisha pujus, tias mir (10.000) suntarjaj paiti mir (20.000) suntar winiana nuna nupetkaintjash tusa enentáimsashtatuak. ³² Tujintiakka, chíkich kapitíán jeachat pujaanak, nawamnaikiatai tusa akatar akupkashtatuak. ³³ Wats, ‘Kristu unuiniamurj ajastinjaj, wi takakjana juna warí winia iturtawa’ tu enentáimsatniufrume. Túrachkurmeka winia unuiniamur ajastin tujinkiarne.’

Wee michumarka yajauchiiti
(Mateu 5.13; Márkus 9.50)

³⁴ ‘Weeka jeaku péñkeraiti. Tura michumarka çitiurak atak péñker ati? ³⁵ Wee michumarka arakmatniunmasha yayaçatsui. Tura tsuatnum ikiusmasha áñtraiti. Aya ajapatniukete. Kuishim ákuinkia antuktatum’ tímiayi.

15

Jesus murik menkakamu chichaman unuiniamiania nu
(Mateu 18.10-14)

¹ Akupniu kuitrin-juu tura yajauch shuarsha Jesusan anturkatai tusar tarú wearmiai. ² Tuma asamtai Pariséusha, Israer-shuara jintinniurísha Jesusan ájmatainiak ‘Júsha tunáa shuarai itiaawai tura niijjaj yurumáiniawai’ tiarmiayi.

³ Nuna tuiniakui Jesus ju métek-taku chichaman jintintiwarmiai:

⁴ ‘Shuar siañ (100) murikiun takuschampiash. Nu siánumiá çhikichik menkakamtai nuwintia nuíwinkia ni matsatmariin ikiuak, menkaka nuna ti eakchattawak. Wáintsuk iniaisashtatui. ⁵ Tura wáiniak yakainium awañkek waras jeen wáketui. ⁶ Tura jeen jeá ni amikrin, írutramuríncha ikiaanak, ‘Wijjaj warastarum. Murikiur menkaka nuna wáinkiajai’ tawai. ⁷ Wats, nuwintia nuiwi péñker shuar akui nayaimpiniam warastin awai. Tura antsu çhikichik yajauch shuar ni enentáin yapajjámtainkia, nú nankaamas warastin átatui, tájarne’ tímiayi.

Kuit emenkakman Jesus unuiniamiania nu

⁸ ‘Nuyá çhikich enentáimsatai. Nuwá tias kuítian takakna nuna çhikichik menkakamtai, wáinkiataj tusa jinia ekeemak, jeañ japimiak émamkes eakchattawak. ⁹ Tura wáiniak ni amikrin, írutramuríncha ikiaanak, ‘Wijjaj warastarum. Kuit menkakamia nuna wáinkiajai’ tawai. ¹⁰ Núnisañ yajauch shuar ni enentáin yapajjámtai, Yusa suntari matsatmanum ti warastin awai’ tímiayi.

Uchi ni aparín waketkitniun Jesus unuiniamiania nu

¹¹ Nuyá Jesus juna unuiniamiayi:

‘Áishman jimiara uchin takakuyi. ¹² Tura páatka uchi ni aparín timiai ‘Apawá, surustini-aitmena nu yamá surusta.’

‘Tutai ni aparí ni kuitrin jímiapetek nakak mai uchin susamai. ¹³ Ishichik tsawant nankaamasaj páatka uchi ni warirín irur júki jeachat chíkich núñkanam wémai. Nuísha náñkamas yajauchin túrak kuitrin ashí ajapamai. ¹⁴ Ni kuitri ashí amuuka aín nu nuñkanam ti tsuka ámai. Niisha núnisañ tsukariin wáitsamai. ¹⁵ Túmak takatan eakajtisa nu nuñkanmaya apachiin werimiai. Nu áishmansha kuchirín wáitrukta tusa akupkamai. ¹⁶ Uchi ti tsukamak kuchi ukatramun niisha yuátajsa ti wakerimiai. Túrasha penké súcharmai. ¹⁷ Tumáa pujus nuñkia enentáimpramai. ‘Winia aparuj takau shuar péñkeran ti yurumáiniawai. Tura wikia ju tsukaruj wáitajai. ¹⁸ Wats, aparuj waketkitjai. Tura aparun çhicharkun ‘Apawá Yúsjaisha ámijjaisha tunaan túrajai, titiajai. ¹⁹ Ame uchiram áchamniitjai yamaikia. Ame takarniurmea áantsanak átaj tusan wakerajai’ titiajai’ tu enentáimsamai. ²⁰ Tura wajaki ni aparín waketkimiai’ tímiayi.

‘Tura ni aparísha jeachat winian wáiniak waitnentramai. Aparí tsékenki inkiun miniakak mukunámai. ²¹ Nuñkia uchirísha timiai ‘Apawá, Yúsjaisha ámijjaisha tunáan túrajai. Ame uchiram áchamniitjai.’

²² ‘Túrasha ni aparínkia ni takarniurín chicharuk ‘Ti penker pushi itiarum áentsratarum, timiai. Tura uwejnun aweetaisha aweemtikiatarum. Tura sapatça aweemtikiatarum. ²³ Túrarum waaka nueram ana nu maatarum. Námper náñkankur shiir enentáimsar yurumámi. ²⁴ Warí, ju winia uchir jakaapitia tu enentáimsamjai. Túrasha iwiaakui. Menkakama nuna wáinkiajai.’ Nuñkia ti warasarmai’ tímiayi.

²⁵ ‘Tumaj iwiáí úchikia takatnuk pujumai. Tura wáketuk, jeá nuntumas jantsemáiniak túntuiyamun antukmai. ²⁶ Nuiñkia yaintri matsatun chikichkiniak untsuk “¿Warimpait?” timiai.’

²⁷ ‘Tura nii chichaak “Ame yátsum tayi. Túramtai ame apa waaka nueram maatai tawai, ame yatsum péñker tau asamtai” timiai.’

²⁸ ‘Tura iwiáj uchi kajek wayatniun nakitramai.’

‘Tuma asamtai ni aparí jiiñtiuki “wayata” timiai.’

²⁹ ‘Tura uchisha aparín chicharuk “Wisha ámin umirkun untsurí uwitin ame takatrumin túraitjai. Nu nékame. Túrasha winia amikrujaj námpér najanatín chiipiuksha péñké surichuitme. ³⁰ Tura ju ame uchiram nuwajaj yajauchin túrak ame kuítrumin wasurkania nu támatái, waaka nueram máachumek” timiai.’

³¹ ‘Takui aparí chicharuk “Uchirú, ámeka wijjaj tuke pujame. Tura wi takakjana nusha ashí áminuiti. ³² Tura ame yatsum jákai ti tu enentáimsamaj nu iwiakuiti. Menkaka nu yamaikía wáinkiaji. Tuma asamtai námpér najanar waraschatniukaitiaj” timiai’ tíaiaji.

16

Takatan wáinin

¹ Ju métek-taku chichamnasha Jesus ni unuiniamu⁷ ‘Tura nii chichaak “Ame yátsrin unuiniamiaji.

“Kuítrintin áishmanka takatrin wáinniuri ámai. Tura nérenniun ujainiak “Ame wáinniuram ame kuítrumin náñkamas ajapeawai” tiarmai.’

² ‘Nuna antuk ni wáinniurín untsuk “¿Warinia jusha turamainia? timiai. Yamaikía winia wáinniur áhattame. Tuma asamtai winia kuítrujaj itiuirkamea nu iniaktursata” timiai.’

³ ‘Tutai takatan wáinin enentáimsamai. “Maaj, wisha itiuirkatjak, timiai. Nunka táurtinnia sha jeatsjai. “Kuit surusta” tínnia sha natsamajai. ⁴ Winia takatur atsakui yurumkan ajamprusarat tusan túratajna nuna nekajai” tu enentáimsamai. ⁵ Nuyá nérenniun tumashmaku armia nuna ankant ankant untsukarmai. Emka tamia nuna chicharuk “¿Winia úuntur urutma tumashmakuitiam?” timiai.’

⁶ ‘Niisha áimiuk “Asuitin siañ taru tumashiitjai” timiai.’

‘Tutai takata wáinin chicharuk “Pai. Papinium tumashrum ana nu juá: wárikmasmek pujusam, nu papí jaakam, chikich papinium aya senkuentachik aarta” timiai.’

⁷ ‘Nuyá chikich tumashmaku támatái “¿Amesha urutná tumashiitiam?” timiai.’

‘Tutai nii chichaak “Shana siañ taru tumashiitjai” timiai.’

‘Tutai “Pai. Papinium tumashrum ana nu júiti. Chikich papinium aya uchentak aarta” timiai.’

⁸ ‘Nuyá takata wáinniu uuntri nuna nekáa “Nii yajauch túriniaitai imiá enentáimniuiti” timiai’ tíaiaji.

Nuyá Jesus tíaiaji ‘Yus-shuarjaj nankaamas Yus-shuarcha ajjjaj ni túratniuriniak takainiak imiá enentáimkia ániawai.’

⁹ ‘Ju nunkanam anankatin átsuk. Tura kuitsha aya ju nunkanmayan ketete. Tuma asamtai atumsha kuitrumjaj “shuaran yaintaj” tu enentáimsatarum. Kuitjaj yaintin amuukamtai atumsha amuicha jeanam ipiaamu átaj tusarum túratarum.”

¹⁰ ‘Shuar ishichik takakna nujaj péñker túrakka, núkap takakna nujajisha péñker túratawai. Tura ishichik takakna nujaj péñker túrachkunka, núkap takakna nujajisha péñker túrashtatui.

¹¹ Tuma asamtai ju nunkanmaya anankartin kuitjaj péñker túrachkurmeka, tuke átin ana nujaj takastincha žitiur takastarumek? ¹² Takakme nuna Yus ikiatmasuiti. Nujaj péñker túrachkurminkia, atumnia átinia nuna žitiurak suramsat?’

¹³ ‘Takarniurj jimiara úuntrintin ajastinian tujintiawai. Warí, chikichnaka aneak chikichnaka nakitrashta túratawai. Turya senkuentachik aarta” timiaituak. Chikichan umiruk chikichnaka umirkashtatui. Yussha kuitcha máí-metek enentáimtuschamniaitrumete” tíaiaji Jesus.

¹⁴ Pariséusha kuítian anen armia nu, ashí ni táman antukar Jesusan wishikrarmiaji. ¹⁵ Túmakui Jesus nin tíaiaji “Atumsha aents ímmianum péñker awajmamprume. Túrasha atumí enentáincha Yus péñker nekawai. Kame winia “nankaamantuiti” turutit tusa wakera nuna Yuska nakitiawai.’

Yaunchu etserkamu, yamá etserkamu

¹⁶ Juan étsertsain Muisáis aar akupkama nunasha tura Yúsnan etserin unuiniarmia nunasha antuktin ármiyai. Tura yamaisha tímianaj ti shiir chicham awai. Yus akupeana nuj urukukit nuka paant etserkamuiti. Tura ashí shuar nuj pachiiñkiataj tusar ni kakar-marjjiañ ti takainiawai.’

17 ‘Túrasha yaunchu akupkamu ashí chicham uminkiatniuiti. Nu chicham uminkiashtinkia nayaimpisha nun̄kasha amukatniujaj̄i nan̄kaamas itirchataiti.’ *

18 ‘Áishman̄ nuar̄in ajaqa chikichan nuát̄kun̄ka tsanirmawai. Tura nuwá ajapamu niinirtakka nusha núnisan̄ tsanirmawai.’

Kuítrintin áishman̄ Rásaruaj̄i

19 ‘Áishman̄ kuítrintin ámai. Niisha imiá shiir pushin ti kuit ainia nujaj̄i iwiarmamniuyi. Tura tuke tsawant yurumak ti kuit amia nujaj̄i namperan najanniuyi. 20 Tura kuítrincha ámai ni naar̄i Rásaru. Niisha kuchapruku tunamaruyi. Tuke tsawant kuítrinniu wáitir̄in̄ pujuyi. 21 Ti tsukamak kuítrinniu misariniā kakekan yuatts wakerimiai. Tura yawasha ni kuchaprin̄ nukatiarmai. 22 Kuítrincha jakamai. Jakamtai jaka shiir pujutanium, Apraám pujumia nūj̄i nayaimpinmayā suntar júkiarmai. Kuítrinniusha jakamai. Jakamtai iwiarsarmai. 23 Jaka pujutanium wáitias pujus, pañkáī íimias, Rásarun̄ Apraám̄jaj̄i pujuinian wáinkiamai. 24 Wáiniak̄ antsumuk “Apawá Apraámá wáitnentrurta, timiai. Rásaruka tsara uwejejaj̄i entsan uchupir winia iniairun imichturat akupturkata. Wisha jūj̄i jinium pujusan ti waitiajai” timiai.’

25 ‘Tutai Apraám timiai “Uchirú enentáimpraté. Ame nun̄ká iwiaaku pujusam ti shiir pujumame. Antsu Rásaruka nūj̄i ti yajauch pujumai. Tura niisha yamaikia jūj̄i áyamui tura ámeke wáitiame. 26 Tura nú arant nánata ti uunt awai. Tuma asamtai juv̄á aj̄i wétinian wakeruiniayat tujintiainiawai. Tura ajāj̄i jūj̄i tátinian wakeruinia nusha tujintiainiawai.’

27 ‘Nuñkiā kuítrintin timiai “Nuñkiā apawá Apraamá, juna seajme. Winia aparú jeen Rasaru akupturkata. 28 Nūj̄isha winia yatsur señku matsatainiawai. Niisha jūj̄i wáitsatniumam tácharat tusa ujakartí, tájame” timiai.’

29 ‘Tutai Apraám timiai “Muisáis áarman tura Yúsnan etserin áarman takakainiawai. Nuna umikiarti.”’

30 ‘Tutai kuítrintin áimkiamai “Túrasha apawa Apraamá, antsu jakamunmayā nantaki, shuar we ujakam enentáin̄ yapajíáwarainti.”’

31 ‘Tura Apraám timiai “Muisáis áarman tura Yúsnan etserin áarman anturainiachkun̄ka jaka nantaki we ujakmasha antukchartatui” timiai.’ Tu áujmatsamiayi Jesus.

17

*Yajauch túrumtikiatin ti tsúumainti
(Mateu 18.6-7, 21-22; Márkus 9.42)*

1 Jesus ni unuiniamur̄in̄ juna timiayi, “Aentsun yajauchin túrumtikiatana nu tuke áatui. Tura shuar ni ājn̄ tunaan wakerumtikna nu aneartí. 2 Jūj̄i shuar uchich ainia nuna yajauchinium túrumtikna nuna Yus imiá asutiáttawai. Tuma asamtai nuna túratsājn̄ uunt kayajaj̄i kuntujnum̄ jin̄kiá nayaantsanam ajunkam maak ainti. 3 Túrasha atumek ímiashtarum. Ame yatsum ámin̄ tunáa túrumtamtañkiā chicharkata; tura niisha “tsañkurturta” túramkuñkiā tsañkurata. 4 Chikichik̄ tsawantiniñ̄ siati túrumtamtai, tura “tsañkurturta, atakka túrashtajaj̄i,” siati túramkuñkiā, tuke tsañkurata.”

Yus nekas enentáimtakrikia tujinkiashtatji

5 Jesusa unuiniamur̄i Nin chicharuk “Yus enentáimtajniā nú nan̄kaamas enentáimtustin yáinmaktá” tiarmiayi.

6 Tutai Jesus timiayi “Mustasa jin̄kiá ti ishitiúpchich ana núnisan̄ ishichkisha Yus enentáimtaikiurmeka, sikiumuru numi wajana nu, “Wajamurm̄j̄iyan̄ka ukuiniakam nayaantsanam wajasta” tákurmin̄ nú numi umirtamkainti.’

Yusa takatr̄j̄i takasar “ti pen̄ker túraitji” tíchatniuitji

7 ‘Atumí takarniur̄j̄i arakmasua amik, waakancha iis támatái, ¿nú chichamaik amesha, “Winitiā, yurumáitiá” tíntmek? 8 Atsá. Antsu, “yurumak iwiarturata. Wi yurumátin̄ tura umartíncha surusminiam̄ iwiarnarta. Nuyá ame yurumátá.” Nu tíchaintmek. 9 Nii túratin̄ ana nunak túratsuk. Tuma asamtai yum̄insashtatme. 10 Atumsha núnisrumek Yus túramna nu ashí umikiam “ti pen̄ker túraitjai” tíchatniuitme. Antsu “aya ii túratniur̄j̄i ana nuke tura asar iikiā ántraitji” títiniaitme.” Tu timiayi Jesus.

Tias áishman̄kan tunamarun̄ Jesus tsuárarmiania nu

11 Jesus Jerusar̄en̄num wesa Kariréa nun̄ka ikiuki Samaria nun̄kanam nan̄kaamakmiayi. 12 Tura péprunam̄ jeamtai, tias áishman̄ ripra sun̄kur̄jaj̄i tunamaru armia nu, arant wajasarmiayi. 13 Tura unsumainiak̄ “Uunt Jesúsá, waitnentrurta” tiarmiayi.

14 Jesus nin wáiniak̄, “Pátr̄ij̄i werirum̄ iniaktumastarum” timiayi.

* 16:17 Mateu 19.1 ya señkuentachik aarta” timiai-12; Márkus 10.1-12

Tura wésar péñker ajasarmiayi. ¹⁵ Nuyá chikichik ni tsuamarman nekáa kakantar chichaki Yusa náarjn uunt awajki wakетки Jesusan tarimiayi. ¹⁶ Yumiñsataj tusa Jesusan tikishmatar piniakumar tepesmiayi. Nu áishmañka Samarianmayauyayi.

¹⁷ Nuna wáiniak Jesus tímiayi “Tsuámaru tiáschakait. ¿Chíkich nuiwisha tui pujuinia? ¹⁸ ¿Ju yajaya áishmañ níñkik Yusa naari uunt awajtsataj tusa wakетки tai?” ¹⁹ Nuyá áishmañkan tímiayi, “Winia nekas enentáimtursa asam péñker ajasume. Wajakim shiir weta” tímiayi Jesus.

*¿Yusa akupeamuri urutaik ati?
(Mateu 24.23-28, 36-41)*

²⁰ Pariséu aents Jesusan aniak “¿Yusa akupeamuri urutaik ati?” tiarmiayi.

Tutai Jesus tímiayi, “Yusa akupeamuri paant wáinkiachminiati. “Yamaí nanñkamnayi” tichamniati. ²¹ “Juí awai, nuñsha awai” tichamniati. Warí, Yusa akupeamuriñkia atumiin pujawai” tímiayi.

²² Nuyá ni unuiniamuriñ chicharuk juna tímiayi: “Tsawant jeattawai atumsha Winia Aents Ajasu tutain “aya chikichik tsawantkesha Nii wáinkarkia mak” turuttiatrume. Túrasha tujinkiattarme. ²³ Aents Ajasu tutai “juí pujawai, nuñsha pujawai” tuiniakui weriirap. Tana nu nemariirap. ²⁴ Wi, Aents Ajasuitjiana nu tátinian tsawantur jeamtai paant wáitkiattarme. Peem péetuk ashí nayaimpin tsáapnin awajna núnisan wi taamu paant átatui. ²⁵ Tura nu túruntsain yamai pujuinia nu Winia nakitruiniakui ti wáitsatniuitjai. ²⁶ Winia atak tátiniur jeamtai, yaunchu Nuái pujumia nu tsawantin túrunamia núnisan túrunattawai. ²⁷ Yurumáwarmiayi, umararmiayi, nuatnaikiarmiayi, ni nawantri nuatnakat tusa surukarmiayi. Tumáa pujuiniái Nuái uunt kanunam enñkemprantai, amarak nu aentsnasha mash amuukarmiayi. ²⁸ Tura Sutuma péprunmasha Rauta írutramuriña núnisarañ Yusa asutiátniñ enentáimtutsuk pujuarmiayi. Yurumáwarmiayi, umararmiayi, sumakarmiayi, surukarmiayi, ajancha ajamarmiayi, jeancha jeammarmiayi. ²⁹ Tura Raut Sutuma péprunmaya jinkimtai asupri tutai kaya keek yútana ántsañ nayaimpinmaya kakeetuk nu áentsun mash máawarmiayi. ³⁰ Núnisan winia atak tátiniur jeamtai enentáimtsuk pujusartatui.”

³¹ “Nu tsawant jeamtai jea yakiiniñ pujana nú shuar ni waririñ achiktaj tusa akaikishti. Jeá wayashiti. Tura kampunniunam wekaana nú shuar ni jeen wakеткиkishi. ³² Rauta nuari túrunamu enentáimpratarum. ³³ Aya ju nuñkanmayan enentáimias “iwiaku átaj” tana nu ni iwiaakmarjn emenñkátatui. Tura ju nuñkanam ni iwiaakmarjn emenñkana nu nekas iwiaakma ana nuna wáinkiatstawai. ³⁴ Paant tájarme. Nú káshitin jimiará áishmañ nuu peaknumañ kanú tepeartatui. Chikichik junaktiatui, chíkichkia ikiunkittiawai. ³⁵ Jimiará nuwa máí-metek neké pujuartatui. Chikichik junaktiatui, chíkichkia ikiunkittiawai. ³⁶ Jimiará áishmañ kampuniunam wekainiartatui. Chikichik junaktiatui, chíkichkia ikiunkittiawai.” Tu tímiayi.

³⁷ Nuna antukar “Uunta ¿tuj túrunatta?” tiarmiayi.

Tutai ni chichaak “Jaka tepana nuñ chuan káutkartatui.”

18

Shuar yawetsuk Yúsan tuke áujtsatniuiti

¹ Shuar yawetsuk Yúsan tuke áujtsatniua nuna unuiniartaj tusa Jesus ju métek-taku chichaman tímiayi:

² “Chíkich péprunam shuaran akupin amai. Nú áishmañ Yúsnasha ashamchayui; shuárnasha péñker enentáimtichuyi. ³ Tura nú péprunam waje amai. Niisha shuáran akupniun chicharuk “Áishmañ winia yajauch awajtusmania nu írtusta” tusa tuke wakétruj pujuyi. ⁴ Yámankamtaikkia nin anturkatniun nakitmiái. Tura ukunam enentáimias “Wisha Yúsan ashamachiatnák shuárnasha péñker enentáimtichuiatnák ju waje tana nuna túrattajai. ⁵ Warí niisha tuke taa itit awajtsatsuk. Tuma asamtai nin kajerkañ tusan wárik túrattajai” timiai” tímiayi.

⁶ Nuyá uunt Jesus tímiayi “Shuaran akupin yajauchiitiat nuna timiai. ⁷ Tura Yus ti péñker asa, ni achikmarin tsawajsha, káshisha untsuamka nú nanñkaamas anturkashtat-uak. ¿Yajitsuk menñakatuaq? ⁸ Atsá, wárik yáinkiatatui, tájarme. Tura Wi Aents Ajasuitjiana ju atak támatai, ¿shuaran tuke Winia nekas enentáimturainia nuna wáinkiatjash?” tímiayi Jesus.

Pariséusha, kuítian-juuncha Yúsan áujtsarmia nu

⁹ “Péñkeraitjai” tu enentáimtumainiak chíkichnaka yajauch enentáimtiarmia nuna Jesus nekapmá chichasmiayi. Juna tímiayi:

¹⁰ “Jimiará áishmañ Yusa Uunt Jeen Yus áujtsatai tusar wearmai. Chíkichkia Pariséuuyi, chíkichkia kuítian-juuyi. ¹¹ Pariséusha wajaki Yúsan áujuk júnis tímiayi: “Yusrú, chíkich

áishman kasa, yajauch, tsanirmau ainia nujai métekcha asan yuminsajme. Tura ju kuítian-juu wajana jújaisha métekchaitjai. ¹² Warí, Ame akupkamna nuna iniañkasan wisha chikichik semanatinin jimiará tsawant ijiarman áujeajai; tura wi achiajna nuna tiásnumia chikichikiniak Yúsnaiti tusan akan kan súajai.” Tu tímiyai.’

¹³ “Tura kuítian-juusha arant wajas, nayaimpinmaanji pankáji ímsatniunkesha natsaamak, tsuntsuma, ni netsepen awatí “Yusá, ti tunaitjai. Waitnentrurta” tímiyai.’

¹⁴ “Wats tájarme, nu kuítian-juu shuar Yus ímmianum ni enentáji péñker awajnas ni jeen waketkimiai. Tura Pariséuka tamia núnisan waketkimiai. Nekaatarum. Shuar nankaamantu enentáimtumana nuka péejchach awajnastatui. Tura antsu péejchach enentáimtumana nu, nankaamantu awajnastatui” tímiyai Jesus.

Uchisha Jesusna áminiaiiti
(Mateu 19.13-15; Márkus 10.13-16)

¹⁵ Jesus antinjiarat tusar uchin itiararmiayi. Tura Jesusa unuiniamurjisha nuna wáinkiar suritkiarmiayi. ¹⁶ Tura Jesus nin utsukar tímiyai “Uchi Winí winitin tsankamkarum, surimkiarap. Enentáimsatarum. Uchichia áintsan enentáimtumana nú shuárak Yus ni enentáin akupin ajasminiaiiti. ¹⁷ Uchi ni úntrin umira núnisan shuar Yúsán umiáchkunka Yus ni enentáin akupin ajaschamniaiti.” Tu tímiyai Jesus.

Kuítrintin áishman Jesusjai áujmatsamiania nu
(Mateu 19.16-30; Márkus 10.17-31)

¹⁸ Shuara uuntri Jesusan tarí áusamiayi. “Uuntá, amesha péñkeraitme. Tuma asam, turuttia, ¿warinia túrakna tuke iwiaaku átataj?” tímiyai.

¹⁹ Tutai Jesus, “¿Urukamtia Winia, péñkeraitme, túrutam? Aents péñkerka atsawai. Aya Yusak péñkeraiti. ²⁰ Tura Yus akupkamnu ana nu péñker nékame. Tsanirmawairap, mankartuawairap, kasamkiarap, tsanumprurairap, ame apasha, nukusha shiir enentáimtustarum. Nusha nékame” tímiyai.

²¹ Tutai áishman tímiyai “Uuntá, úchichik mash umiki tsakaruitjai.”

²² Jesus nuna antuk “Chikichik taatrumsai, tímiyai. Ame takakmena nu ashí surukam kuítrinchá ainia nu susarta. Nuiñkia nayaimpiniam kuítrum átatui. Túram nemartustaj tusam winitia.”

²³ Tura nuna antuk, nu áishman ti kuítrintin asa ti kuntuts enentáimpramiayi. ²⁴ Tura kúntuts enentáimprantai Jesus nuna nekáa “Kuítrintin ainia nu Yus akupeamunam pachinkiatin ti iturchataiti, tímiyai. ²⁵ Kamiriuka, uunt ana nu, auja jijn wayatin iturchataiti. Tura shuar kuítrin ti enentáimtana nu Yus akupeamunam pachinkiatin nú nankaamas iturchataiti.” Tu tímiyai.

²⁶ Tura nuna antukarmia nu tiarmiayi “¿Nuiñkia yaki uwempramniaiti?”

²⁷ Tutai Jesus tímiyai “Aents tujintiainia nuna Yuska páchitsuk túramniaiti.”

²⁸ Nuyá Pítur Nin chicharuk tímiyai “Uuntá, iikia Ámin nemarsataj tusar ii takakmaaka ikiukjli.”

²⁹⁻³⁰ Tutai Jesus tímiyai “Shuar Yus akupeana nuna túrataj tusa ni jeen ikiuakka tura núnisan ni aparíncha, nukuríncha, yachínkisha, nuwenkesha, uchirínkisha ikiuakka ju nunkanmasha núkap wáinkiatatawai nu shuar. Tura tuke iwiaaku pujustinniaasha wáinkiatatawai.”

Ataksha ni jákatniurjin Jesus ujakmiania nu
(Mateu 20.17-19; Márkus 10.32-34)

³¹ Jesus ni tuse unuiniamurjin akaniki ikiaanak juna tímiyai:

“Jerusarénum jeatemaji. Jujisha Jerusarénum Winia, Aents Ajasu tutain, túrunatniurun Yúsán etserin yaunchu áatrurarmia nu uminkiatatawai. ³² Apachnium surutkartatui. Túrawar wishikrurar, katsekrukar usukruawartatui. ³³ Awatiar mantuáwartatui. Túramaitatnak menaintiú tsawantaj nantaktiatjai” tímiyai.

³⁴ Tura Nii tímiania nuna nekas túrunattawai, tícharmiayi. Wariniak ta tusar nekaacharmiayi.

Jirikiúnmayá áishman kan Jesus ímtikmiania nu
(Mateu 20.29-34; Márkus 10.46-52)

³⁵ Jesus Jirikiú péprunam nuntumsaj, nuji áishman jiji kusuru, kuítian surusarat tusa jintia pujumiayi. ³⁶ Untsurí aents nankaamainian antuk “¿warínkit?” tímiyai.

³⁷ Tutai, “Nasarénumia Jesus nankaamawai” tiarmiayi.

³⁸ Kusurusha nuna antuk unsumuk “Jesusá, Uunt Kapitán Tawit weeachukaitiam. Tátiniuya núchakaitiam. Winiaja waitnentrurta” tímiyai.

³⁹ Eemak wearmiania nu chicharainiak “takamatsata” tiarmiayi.

Tutaisha nú arant unsumuk “Tawit weeachukaitiam; winiaja waitnentrurta” tímiyai.

⁴⁰ Nuiñkia Jesus wajas “itiatarum” tímiayi. Tura nii támatai, ⁴¹ “¿Warí ititurtukat tusamea wakerutam?” tímiayi.

Tutai kusuru áimiuk “Uuntá, ímtiasan wakerajai” tímiayi.

⁴² Tutai Jesus chichaak “íimtia. Winia nekas enentáimtura asam péñker ajasume” tímiayi.

⁴³ Nu chichamaik kusuru íimmiayi. Tura Yusa naari uunt awajki Jesusan nemarmiayi. Tura ashí aents nuna wáinkiarinia nusha Yusa náarín uunt awajsariniayi.

19

Sakú Jesusjai

¹ Nuyá Jirikú péprunam wayá nuí wekaikini ajamiayi. ² Nuí kuítrintin áishman ni naari Sakú pujumiayi. Nu Sakú kuítian-juu úntriyayi. ³ Aents ti káunkámtai, Sakú ti sútarach asa, Jesusan iistaj tukamá tujínkiamiayi. ⁴ Tuma asa Jesus nuke nankaamaktin asamtai, eemki tsékiñki sikiumuru numi wajamunam wakamiayi iistaj tusa. ⁵ Jesus nuí nankaamak pankáí íimtas chicharuk “Sakú wárik akáikitiá. Ame jeemín yamá kanartiniaitjai” tímiayi.

⁶ Tutai Sakúsha wárik akaiki, shiir enentáimias Jesusan itiaamiayi. ⁷ Ashí aents nuna wáinkiar “Maaj, Jesus tunáa áishmanka jeen pujawai” tusa mai tunaim ajarmiayi.

⁸ Nuyá Sakú wajaki Jesusan chicharuk “Íistá Uuntá, wi takakjana juna jímiapetek nakakan kuítrincha ainia nuna susartajai. Tura wáitruan chikichan kasarkaitkiuncha menaintiu patatsan awainkittiajai” tímiayi.

⁹ Tutai Jesus tímiayi “Ju áishman Apráama shuárintiat yamá niisha níniuujai uwempra asa nekas Apráama shuari ajasuiti. ¹⁰ Wisha Aents Ajasu asan menkakaru ainia nuna ekan uwentikrartaj tusan táwitjai.” Tu tímiayi.

Kuítian nekapmá chichasmiai

¹¹ Nu aents Jesusan anturkarmia nu “Jerusarénum jeawakrin Nii, Yus anaikiamu asa, wárik akupin ajastatui” tu enentáimsarmiayi. Tuma asamtai wésar Jerusarénum nuntumsaraj, nuna enentáimsarajín tusa Jesus juna métek-takun chichasmiai:

¹² “Áishman penkerj amai. Nu áishmansha jeachat chikich núñkanam kapitián náamkan tátaj tusa wemai. ¹³ Tura wétsuk ni takarniurín tias armia nuna utsukarmai. Tura ankant ankant kuit kurijjai nankaamas péñker armia nuna suíniak “Ju kuitjai wi táatsain takakmá ajatarum” timiai.”

¹⁴ “Tura ni nunkenia shuarka nakitiarmai. Túmainiak “nu áishman ii kapitiantri ajasain tusar nakitijai” nu titiá tusar áishman kan akatrar akuptukarmai.”

¹⁵ “Tuma ain kapitian náamak ni nunken wakетки tamai. Taa “winia kuítrujai warí túrarum” titiaj tusa ni takarniurín kuitia súsarman nuna utsukarmai.”

¹⁶ “Ni takarniurj emka chikichik taa “ame kuítrumjai takakmasan tias patasan achikmajai” timiai.”

¹⁷ “Tutai kapitian chichaak “Pénker túrame. Ishichik susamjamna nújainkí wi tímiajna tímatrusmek túrame. Tuma asakmin tias péprun akupin awajattajme” timiai.”

¹⁸ “Chikich taa “Íistá Uuntá, ame kuítrumjai takakmasan senku patasan achikjai” timiai.”

¹⁹ “Nunasha chicharuk “Amincha senku péprun akupin awajattajme” timiai.”

²⁰ “Nuyá chikich taa “Uuntá, ame kuítrumin panijjai ijian ikiusmajai. ²¹ Amesha kakaram chichau asakmin, ikiuschiatam achin asakmin tura arakmachiatham juu asakmin ashamkamjame” timiai.”

²² “Tutai kapitian timiai “Maaj, amesha ti yajauchiitme. Ame támena nuke makurmawai. Wi kakaram chichau aisha, ikiuschiatam achin aisha tura araknasha arakmachiatham juu aisha, ²³ nuñkia ¿urukamtia kuit-ikiutainiam ikiuschiamam? Nuiñkia wi atak taakun patasan achikajaina” timiai. ²⁴ Tura nuí wajarmia nuna chicharuk “Kuítian takakmarj juruktiarum; túrarum tias takakna nú shuar susatarum” timiai.”

²⁵ “Tura niisha chichainiak “túrasa Uuntá, tias takakja” tiarmai.”

²⁶ “Tutai kapitian chichaak “Takakna nujai takaakuñkia patatnastatui tájarme. Tura takakna nujai takaakuñkia ishichik takakkuisha jurunkittawai. ²⁷ Tura winia nemasar kapitian ajasain tusar nakitrurarmania nu itiatatum. Tura wisha íimiaiñ máatatum” timiai.” Tu tímiayi Jesus.

Jerusarénum Jesus wayamiayi

(Mateu 21.1-11; Márkus 11.1-11; Juan 12.12-19)

²⁸ Nuna tuasua amik Jesus Jerusarénumaanj wémiayi. ²⁹ Petpajai pepru tura Petania péprusha Uriwiu náinnium tíjiuchi; nuí jeastatuk ajatemas ni unuiniamurín jímiarman chicharuk, ³⁰ “Tíjiuch péprunam wetarum. Túrarum nuí umpuuruch ekemtukchamu jínkiamu waja wáinkiatarme. Nu atiarum itiatatum. ³¹ Tura “¿urukamtai atiarum?” tura-mainiakkuisha, “ii untrj wakerawai” títiarum” tímiayi.

³² Tutai unuiniamurj wear, Jesus timia ímiatrusañ wáinkiarmai ³³ Tura umpuuruchin atiakui nérentin chichainiak “¿Urukamtai umpuuruchsha atiarum?” tiarmiayi.

³⁴ Tutai unuiniamusha “Ti untrj wakerawai” tiarmiayi.

³⁵ Tura umpuuruchin Jesusan itiarmai. Túrawar ni pushirjñ umpuuruchiniam awantkar Jesusan ekenkarmiai. ³⁶ Tura Jesus wétinnium ni pushirjñ jintianam ayaparar áintrarmiayi. ³⁷ Tura Uriwiu naint awankénamunam tjiuch ajasarmatai untsurj aents Jesusan nemariarmia nu warainiak kakantar unsumainiak aents tujintiamun untsurj túran wáinkiaru ásar Yusa náarjñ unnt awajsarmiai. ³⁸ “Yusa náarjñ winiana ju ii unnt Akupniuiti. Nincha Yus shiir awajsati. Nayaimpiniam pujuinia nu shiir enentáimsar Yusa náarjñ unnt awajsarti” tiarmiayi.

³⁹ Tura Pariséu aents nuj páchitra pujuarmia nu Jesusan chicharainiak “Uuntá, nemartamainia nu “takamatsata” tiarta” tiarmiayi.

⁴⁰ Tutai Jesus tímiayi “Nuñkia ju takamatsarmatainñkia, kayasha untsumkarainti. Nuna paant tájarme” tímiayi. ⁴¹ Jerusarénum tjiuch ajatemas péprun wáiniak útuk júnis tímiayi: ⁴² “Jerusarénumiá shuártiram, ju tsawantinkesha shiir pujustintrum nekaarmeka maak. Túrasha yamaikia nekaatin nañkaamasai. ⁴³ Kame ti itiuurchat tsawant jeartamtatrame. Atumí nemasrj nuñkajaj aa-tanishan tanishmarar téntatramkattarme. Mesetan najatramatarme, tura áatusha júnisha mash árenmaktatrame. ⁴⁴ Túrutma nuñká ajunmartatume. Tura atumjñ pujuinia nuna máawartatui. Tura ashí emesarmatai ishichkisha kaya irumpramusha penké atsuttawai. Wi Yusa anaikiamurjñ tarijrumna nu nekaachu asakrumin túrutmattarme.” Tu tímiayi.

Yusa Uunt Jeeñ suruktinian Jesus surinkiamiania nu

(Mateu 21.12-17; Márkus 11.15-19; Juan 2.13-22)

⁴⁵ Nuyá Jesus Yusa Uunt Jeeñ wayá suruktasa pujuarmia nuna sumaktasa pujuarmia nunasha jiki awemarmiai. ⁴⁶ Túrak juna tímiayi:

“Yús-Papinium yaunchu aarma awai: “Winia jeárka Yus áujsatin jeáiti” tu áarmaiti. Túrasha áatunka kasáa matsamtaiya nútikiarme” tímiayi.

⁴⁷ Tuke tsawantin Yusa Uunt Jeeñ Jesus uwempratin chichaman unuiniak pujaj Israer-patri úntrisha, Israer-shuara jintinniurjsha, tura pepru úntrisha, itiuur máamniakit tusar ti enentáimsarmiai. ⁴⁸ Túrasha ashí aents émamkes anturainiakui máatniun tujinkiarmai.

20

Yusa kakarmarijaj Jesus takasmiania nu

(Mateu 21.23-27; Márkus 11.27-33)

¹ Yusa Uunt Jeeñ Jesus uwempratin chichaman unuiniak pujaj Israer-patri úntrisha, Israer-shuara jintinniurjsha, Israer-shuara úntrisha táarmiai. ² Taar Jesusan chicharainiak “¿Yana chichamejaj ju túram? ¿Ya ju túratniuncha akuptamkai?” tiarmiayi.

³ Tutai Jesus tímiayi “Wisha aniaštajrum tusan wakerajrume. ⁴ ¿Ya Juáñnasha imiakrattia tusa akupkamia? ¿Yusak? ¿Aentsuk? Turuttiarum” tímiayi.

⁵ Tútaisha niisha nuamtak warintiajik mai tunai ajarmiai. ““Yus akupkaiti” tákurniñkia, “¿urukamtai enentáimtuscharum?” turamtatji. ⁶ Túrasha “aents akupkaiti” tákurnisha ashí aents kayajaj tukurmar mantamtatji. Warí “Juan Yúsnan etserniuiti” tuñiatsuk” tiarmiayi. ⁷ Nuñkia Jesusan áiniak “Iisha nékatsji, Juan ímiakratinniasha yátsuk akupkamia” tiarmiayi.

⁸ Tutai Jesus tímiayi “Wisha núnisnak winia akuptukua nuna tichattajrume” tímiayi.

Pénker-takachu armia nu

(Mateu 21.33-44; Márkus 12.1-11)

⁹ Nuyá Jesus ju métek-taku chichamjaj aentsun jintintiamiai:

“Áishman ni ajarjñ uwa araa amuk, shuuran takartusti tusa ikiukmiai. Tura niñkia wau táchataj tusa jeachat wémai. ¹⁰ Tura júuktin tsawant jeamtaí juukman akanak jurumkit tusa takarniurjñ takau shuarjñ akuptukmai. Tura takarniurjñ katsumkar áyatik awañkarmai. ¹¹ Nuyá nérentin chikich takarniurjñ akupkamai; tura nunasha núnisñ katsekkar, awatiar, sútsuk akupkarmai. ¹² Nuyá ataksha chikichan akupkamai. Tura nunasha takau shuar katsumkar akupkarmai.”

¹³ Nuyá ukunam ajá nérenniurjñ “Itiurkatjak, timiai. Winia aneamu uchirun akupkattajai. Nin wáinkiar shiir enentáimtuschartimpiash” timiai.”

¹⁴ Túrasha takau shuar nuna wáinkiar, nuamtak chichainiak “Juka ajá nérenniurjñ ajastatui. Maatai. Nuñkia aja iiniu átatui” tiarmai. ¹⁵ Nuna tuñiak ajanmaya jiki máawarmai.”

Nuyá Jesus aniasmiayi “Wats ¿warí enentáimsarum, ajá nérenniurjñ itiuurkattawa? ¹⁶ Niisha taa, nu takau shuáran máawartatui. Tura núñkanka chikichan susattawai” tímiayi.

Nuna anturkar “Yus núnaka tsan̄katkashti” tiarmiayi.

¹⁷ Tura Jesus nin émamkes ísar tímiayi “¿Nuikia Yus-Papinium áarma nu warintia? Ju áarmaiti:

Kayan péñkernak jea jeamin “yajauchiiti” tusar ajapawarmia nu ashí kayajai nan̄kaamas péñker apujsamuiti. ¹⁸ Nu kayan tukumainia nuka kupintrattawai. Tura nu kaya shuarnum iniarka nu shuaran tsai tsai awajsattawai. Tu áarmaiti.

Pariséu achiktai tusar wakeriarmiania nu

(Mateu 21.45-46; 22.15-22; Márkus 12.12-17)

¹⁹ Israer-patri uuntri tura Israer-shuara jintinniurjsha “nu métek-taku chichamjai in túramji” tu nekaawar nuikⁱ Jesusan achikiar emetatai tusar wakeriarmiayi. Tura untsurj shuar Jesusan wakeruiniakui, ashamainiak túracharmiayi. ²⁰ Tura Kapitiánnium suruktai tusar wakeruiniak mamikmau shuaran Jesusan akuptukarmiayi. Nu shuar péñker shuara núnisañ jeariar, Jesus nékatsuk yajauch chichakat tusar, aniastaj tusar wearmiayi. Ni chichakmarijijai uuntnum suruktai tusar túrawarmiayi. ²¹ Tu enentáimsar tíarmiayi “Uuntá, ame tuke nékas chicham chichaame, nu nékaji. Aents pátekek íyatsme, antsu nékas Yusa jintj jintintiamé. ²² Wats turuttia, ¿Rúmanmaya uunt akupin ii kuitri akiktin péñkerkai? ¿Akiktinkiait? ¿Suritkiatniukait? Nu nekaatai tusar wakeraji” tiarmiayi.

²³ Tura Jesuska ni yajauch enentáimsamurjñ nekáa chicharainiak, ²⁴ “Kuit itiatarum. ¿Yana yapi tura yana naarj juí áarmait?” tímiayi.

Tutai nii tiarmiayi “uunt akupniunu.”

²⁵ Tutai Jesus tímiayi “uunt akupniunu átinia nu uunt akupin susatarum. Tura Yusna átinia nu, Yus susatarum.”

²⁶ Aents ántamunam ni chichakmarijijai achiktinian penké tujinkiarimiayi. Antsu aya ímprarmiayi tura takamtak pujusarmiayi.

Satusésha achiktai tusar wakeriarmiania nu

(Mateu 22.23-33; Márkus 12.18-27)

²⁷ Nuyá Satuséu “jakamunmaya penké nantakchamniaiti” tuinia nu, Jesusan aniastai tusar tariarmiayi. ²⁸ Aniniak tiarmiayi “Uuntá, Muisáis juna áartampramijai: “Áishman ni nuarj júreatsañ jakamtañkia ni yachj nu wajen nuátkati, yachjñ yajutmatratsa.” Tu áarmaiti, tiarmiayi. ²⁹ Wats, siati yachí áрмаi, tiarmiayi. Iwiajri nuwan nuatak yajutmatsuk jakamai. ³⁰ Ni yachj wajen akintiak, nuátak, niisha yajutmatsuk jakamai. ³¹ Nuna yachjsha núnisañ nu wajen nuátkamai; tura núnisañ ashí siati nuna patañkⁱ nuátkarmai. Yajutmatsuk yajutmatsuk kajin̄kiarmai. ³² Tura ukunam nuwasha jakamai. ³³ Nantaktin tsawantaj, nantakiarmatai, ¿yana nuarjñ ati? Ashí siati nuátkacharmaka” tiarmiayi.

³⁴ Tutai Jesus tímiayi “Ju nunkanman nuatnaikiat in awai. ³⁵ Tura nantakiar atak iwiaaku ámin ainia nuka nuatnaikiachartatui. ³⁶ Warí, jákashtin ániatsuk. Nayaimpinmaya suntara áintsañ ajasartatui. Tura nantakiaru ásar Yusa uchirjñ ajasartatui. ³⁷ Tura jákaru nantakiartin ainia nuna imia Muisáis jintiamiyai. Warí, numichiniam ji wajái keamunan Yus nijjai chichaamun, Yus-Papinium Muisaiska áarmiayi. Nú áarmanum Uunt Yus Apráama, Isaka tura Jakupu Yúsrinti, tímiayi. Nú áishman yaunchu jákaru ain “ni Yúsrinti” tímiayi. Nuna taku nantaktin awai tu jintiamiyai. ³⁸ Kame jaka men̄kakatniunam pujuinia nuna Yúsrinchuiti. Tuma asamtai jakáa Yúsrinti tíchamniaiti. Antsu iwiaaku ainia nuna Yúsrinti. Ashí Niiniun iwiaarkainiawai” tímiayi.

³⁹ Nuna anturkar Israer-shuara jintinniurj “péñker tame, Uuntá” tiarmiayi.

⁴⁰ Tura nuyánka aniastinian arantukarmiayi.

¿Kristu tutai yana uchirimpiait?

(Mateu 22.41-46; Márkus 12.35-37)

⁴¹ Nuyá Jesus tímiayi “Yus anakiamu Kristu tutaisha, ¿itiura “Aya Tawit weeaiti” tárum?

⁴² Warí, Sarmu papinium Tawit nin̄ki juna tátsuk: “Uunt winia Úuntrun “Akupin pujutainium Winia untsuuruinjñ pujustá, tímiayi. ⁴³ Ame nemasrumin núpeteatsaññ nuj pujustá” tímiayi.” Tú áarmaiti.

⁴⁴ Kame Tawitkia, Kristun chicharuk, “winia Úuntur” tajisha, ¿itiurak Kristu tutai Tawitia pampañmarj átiñkⁱ?” Tú tímiayi Jesus.

Israer-shuaran jintintin ainia nuyá aneartarum

(Mateu 23.1-36; Márkus 12.38-40; Rúkas 11.37-54)

⁴⁵ Ashí aents Nin anturkatasa pujuiniaj ni unuiniamurjñ Jesus juna tímiayi:

⁴⁶ “Israer-shuaran jintintin ainia nuyá aneartarum. Niisha esaram pushin entsarar wekasataisar wakeruiniawai. Tura jintiá ti shiir áujtusarat tusar wakeruiniawai; tura iruntai jeañam penkerjñ pujutainium pujustinian wakeruiniawai. Tura nampernumsha uunt pujutainium pujustaj tusa wakeruiniawai. ⁴⁷ Túrasa wajé jeñcha atantainiawai.

Túrawar aents nekaracharat tusar ti esaram chichamjaj Yúsán áujainiawai. Nincha chikichjaj nankaamas Yus asutiáwartatui.”

21

*Waje ni kuítrín susamía nu
(Márkus 12.41-44)*

¹ Yusa Uunt Jeen kuítrintin kuit enketainiam kuítian enkeenan Jesus wáinkiamiayi. ² Tura waje kuítríncha jimiara uchich kuítian, rera áaniun, enkean wáinkiamiayi. ³ Wáiniak tímiayi “Nekas tájarne, ju waje kuítrínchaitiat, ashí enkeena nú nankaamas núkap enkeayi. ⁴ Warí, chikichcha ampirma nuna enkeenawai. Tura niisha aya núchiniak takurmakman ampirmatsuk ashí enkeayi.”

*Yusa Uunt Jeen saanaktinian Jesus ujakmiania nu
(Mateu 24.1-2; Márkus 13.1-2)*

⁵ Yusa Uunt Jeen kaya shíirmach armia nuna tura chikich shíirmach susamu armia nunasha chikich shuar áujmatuk pujuarmiayi. Nuyá Jesus tímiayi:

⁶ “Átum yamá shiir wáintrumna nu ashí emesnartatui. Kaya ekenramusha mash yumpuuntrartatui” tímiayi.

*Amuukatin tsawantin uruku átata nu nekaatin
(Mateu 24.3-28; Márkus 13.3-23)*

⁷ Nuyá Jesusan chicharainiak “Uuntá, nusha ¿urutaik túrunat? ¿Kame ju túrunatin jeatemamtaisha warijiajn nekaattaj?” tiarmiayi.

⁸ Tutai Jesus tímiayi “Aneartarum; ananawairap. Nekaatarum. Winia náarun pachisar, “wi Kristuitjai” tau ti untsurj jíntrartatui. “Nuñka amuukatin jeayi” tu etserkartatui. Tuíniakui anturkarum nemariirap. ⁹ Tura meset chichamsha, kapitíán mesetan nájanmasha antukrum sapijmiakairap. Nusha emka túrunatniuiti. Túrasha nú chichamaik amuukatin tsawant jeashtatui.”

¹⁰ Nuyá tuke chicharuk tímiayi “Shuar chikich nunkanmaya shuarjaj mesetnum ti nekas maaniawartatui. ¹¹ Ti uqrkattawai; untsurj nunkanam tsukasha, sunkursha ti átatui. Nayaimpinmasha ti ashammai nánkamas túrunattawai. Nujaj Yus ni kakarmarín iniakmas-tatui.”

¹² Tura ju túruntsajn atumin pataaturmakar achirmakartatui. Iruntai jeanmasha makurmartai tusar juramkiartatui. Sepunmasha enketmattarme. Tura winia naar páchia asakrumin, akupniunmasha, úuntnumsha juramkiartatui. ¹³ Nuñkia atumin túrutmakrumin wi túramu etserkatin arutmattarme. ¹⁴⁻¹⁵ Tura atumj nemasrj nakitramainiak “wáitíaiti” títinian tujinkiarat tusan, winia nekatairjaj chichastinian amastatjarne. Tuma asamtai “Jurakuisha warinia tiniak kísishtumaktaj tusan áetak enentáimsashtajaj” titiarum.”

¹⁶ Tura imia atumj aparísha surutmakartatui. Atumj yachísha, atumj shuarísha amikrumsha núnisarañ surutmakartatui. Tura máamunka máawartatui. ¹⁷ Tura Winia ajasaru asakrumin ashí aents nakitramprartatui. ¹⁸ Tura penké ishichkisha yajauch awajtamsachartatui. ¹⁹ Katsuntrarmeka iwiaaku átin wáinkiatarme.”

²⁰ “Ju pepru Jerusarénka aq tanishrijn suntar téntakar matsatu wáinkiumeka, emesratin jeá nekaattarme. ²¹ Nuikia juí Jutía nunkanam pujuinia nu, náinnium pisartin ániawai; tura juí Jerusarénnum pujuinia nusha juyanka juñki wétin ainiawai. Tura ajanam pujuinia nusha, péprunam waketkishtin ániawai. ²² Nu tsawantíncha Yus asutiámun wáinkiatatui. Yús-Papínium nu túrunatin yaunchu aarma nu uminkiatstawai nu tsawantin. ²³ Nunkanam ti wáitsatin átatui. Tura ju aents ti asutniawartatui. Tuma asamtai nuwá ajamtin ainia nusha, tura uchi kuirchin takakainia nusha imia itirchatan wáinkiatatui. ²⁴ Tura juyá aents mesetnum jákartatui. Tura chikichnaka ashí nunkanam misaawar júkiartatui; tura yajayá apach, Yúsnan enentáimtuiniatsna nu, juí Jerusarénnum wayawar najakartatui. Nu túratniunka Yus tsanqatkana nujn túrawartatui.”

*Aents Ajasu tutai táintri
(Mateu 24.29-35, 42-44; Márkus 13.24-37)*

²⁵ “Nuñkia etsanmasha, nantunmasha, yáanmasha Yuska ni kakarmarín iniakmak nusháa túrattawai. Nunkanmasha ashí aents páchim enentáimprartatui. Tura nayaantsanam chíchimi ti aku tantáa ajakui ti ashamkartatui. ²⁶ Tura túrunatin ana nuna enentáimsar mayáj ashinkiatatui. Warí, nayaimpiniam kakaram ainia nusha peantrartatui. ²⁷ Nuyá Winia, Aents Ajasu tutain, yuranminiam ti shiir ajasan winiaj wáitkiartatui. ²⁸ Nu túrunatin nápkamkui uwempratin jeatemayi tusarum kakaqrum shiir enentáimsatarum.”

²⁹ Tura ju chichamnasha nekapmamiayi. “Ikiu numi tura nápkamas numisha enentáimsatarum. ³⁰ Ju nunkanam ni nuké yama punkaktatai “esat jeatemayi” tátsurmek.

³¹ Núnisan Wi tájana nu wáinkurmeka, Wi ju nunkanam akupin ajastin jeatema nu nekaatarum.’

³² ‘Tura aents yamaí pujuinia nu jáatsain nusha ashí túrunattawai. Núnaka paant tájarme. ³³ Nayaimpisha nunkasha amuukartatui. Tura winia chichampruka amuukachminiaiti. ³⁴⁻³⁵ Nu tsawant aya aneachma jeattawai. Ashí aents ju nunkanam pujuinia nu, nuna enentáimsuk pujuinia jeattawai. Tuma asamtai atumsha anearum wekasatarum. Ya-jauchiniam emetnarum, aya yurumátniuk, aya umartiniak enentáimtusrum, ju nunkanam ana nu ti wakerakrumniñkia péñker enentáimsatin tujinkiattarme. Nu atsuti tusarum tura nu tsawant aya áwaktamkajj tusarum péñker wekasatarum. ³⁶ Anearum wekasatarum. Túrunattana nuj katsuñtrataj tusarum Yus aujsa pujustarum. Túrarum Aents Ajasu tutai fimmianum péñker átaj tusarum túratarum.”

³⁷ Tuke tsawant tsawaisha Yusa Uunt Jeeñ Jesus unuiniamiayi. Tura káshikia Uriwuu náinnium we-wémiayi. ³⁸ Tura tuke tsawant Yusa Uunt Jeeñ Jesus chichaamun anturkatai tusar káshik tariarmiayi.

22

Jesus achiktin chichaman jurusarmiania nu

(Mateu 26.1-5, 14-16; Márkus 14.1-2, 10-11; Juan 11.45-53)

¹ Wakaprutai enketaachma tanta yuatin námper, paskua tutai, jeatemamiayi. ² Israer-shuara Pátrirjsha Israer-shuara jintinniurjsha áentsun ashamainia ásar, itiurak máawaintiaj tusar ti enentáimsarmiayi.

³ Nuñkia Iskariúti Jútasan enentáin íwianch wáintiamiayi. Nú Jútaska Jesusa unuiniamurjñ páchitkiauyayi. ⁴ Israer-patri úuntrñ tura Yusa Uunt Jeeñ kapitán pujuarmia nuna werimiayi. Tura Jesusan tu surukminiaiti tusa niijjaj chichasarmiayi. ⁵ Niisha nuna antukar warasar “kuit amastatji” Jútasan tiarmiayi. ⁶ Niisha “ayu” tinia, aents nékachmanum suruktaj tu enentáimsamiayi.

Kristu jakamu enentáimtustin námper

(Mateu 26.17-29; Márkus 14.12-25; Juan 13.21-30; 1 Kurintiunam 11.23-26)

⁷ Wats, wakaprutai enketaachma tanta yúatin námper jeamiayi. Paskua tutainium murikchin máatin ármiai. ⁸ Tura Jesus Pitruncha, Juáñnasha akupeak “Paskua tutai námper iwiaratarum” tímiayi.

⁹ Tutai niisha chichainiak “¿Tuj iwiarat tusamea wakeram?” tiarmiayi.

¹⁰ Tutai Jesus juna tímiayi “Péprunam wetarum. Jearum áishman yumin takaku wekaa wáinkiattarme. Nú áishman nemarsatarum. Tura jeá wayaakui, ¹¹ nú jea nérenniurj chichareakrum “Uunt chichartamuk unuiniamurjaj paskua yurumátn ¿tuj aa? turamui” titiarum, tímiayi. ¹² Tákurmin nu nérentin yakí pisonam uunt kuártun ashí iwiamun iniakturmastatrum. Nuñ ii yurumátn iwiaratarum” tímiayi.

¹³ Tutai niisha wear Jesus tímiania tímiatrusañ wáinkiarimiayi. Tura paskua namperan nu iwiararmiayi.

¹⁴ Yurumátn jeamtai ni unuiniamurjñ Jesus misanam pujusarmiayi. ¹⁵ Pujusarmatai, Jesus chichaak “Wisha játsuk atumjaj ju paskua najanatniun ti wakerimjai, ¹⁶ atakka ju nunkanam atumjaj najanashin asan. Tura antsu Yus akupeana nuñ jear atak najanattaji” tímiayi.

¹⁷ Nuyá piniñkian achik, Yúsán yumiñkias, ni unuiniamurjñ tímiayi “Ju piniñ achikrum sunaisatarum. ¹⁸ Atakka ju nunkanam uwa yumirñ atumjaj umarchattajaj, tajarme. Tura antsu Yus akupin ajastin jeamtai atak iijjaj umartatji” tímiayi.

¹⁹ Nuyasha yurumkan achik, Yúsán yumiñkias puuk susarmiayi. Tura chicharainiak “Juka winia ayashruiti. Winia ayashur atum péñker pujustinnium surunkattana núti. Winia enentáimtursarum yuatarum” tímiayi.

²⁰ Tura yurumsua amikiarmatai piniñkian achik, “Ju piniñ winia numparun nakumea asa uwempratin yamaram chicham najanamun nakumeawai. Winia numpar atumñian puartamprattawai” tímiayi.

²¹ ‘Túrasha winia surutkattana nu Wijjaj métek ju misanam pujawai. ²² Kame Wi, Aents Ajasutjiana ju, Yus iwiamarua nútiksanak jakattajaj. Túrasha Winia surutkana nu nekaati. Ti asutniattawai” tímiayi. ²³ Nuna antukar “Wíashitiaj, yákit” tunaim ajarmiayi.

Nañkaamantu ana nu

²⁴ “¿Iijjaj yakí imiañ nañkaamantu aint?” tunaim ajarmiayi. ²⁵ Tura Jesus tímiayi “Ju nunkanam akupin ainia nu, waantu enentáimtumasar akupenawai. Tura aku-penakuí “péñker túrin áiniawai” tuñiawai. ²⁶ Tura atumjainkia nuka atsuti. Antsu nañkaamantu ana nu, uchichia núnik ajastiniati; akupeana nusha takarniua núnik ajastiniati. ²⁷ Enentáimsatarum. Misanam pujus yurunna nu, yurumkan ajamana nuñjaj

¿tuá imiá nekas nan̄kaamantuit? ¿Yurumna nu nekas nan̄kaamantuchukait? Tura Wis̄ha atumín yurumkan ajamna núnisnak pujajai.'

²⁸ 'Winia itiuŕchatruŕn wáinmij nū atumsha Wijijai tuke pujumarme. ²⁹ Tuma asakrumin akupin ajastinian winia Apar surusu asamtai Wis̄ha nútíksanak akupkatniun súajrume. Wi akupkatjana nū atumsha Wijijai yurumáttarme, tura Wijijai umartatrume, tájarme. ³⁰ Tura akupin pujutainium pujusrum, Israer-shuar tuse írútkamu akupkattarme tajai." Tu tímiayi.

*Pítuŕ "atsá nékatsjai" títinian Jesuŕ ujakmiania nu
(Mateu 26.31-35; Márkus 14.27-31; Juan 13.36-38)*

³¹ Nuyá Uunt Jesuŕ tímiayi, "Nekaatá, Semuŕká. Trikiu neré tsatsamátinua áintsan Satanás atumi enentáin páchim enentáimtikramprataj tusa seayi. ³² Tuma aín Yus enentáimtustinian kajinmatkiñ tusan Wis̄ha Yúsan seamjai. Tura Yúsnun waketkim ame yatsum ikiakárarta" tímiayi.

³³ Tutai Semuŕn tímiayi "Uuntá, sepunam enketmainiakuiŕsha wis̄ha nemarsatajme. Tura mantamainiakuiŕsha métek jakatjai" tímiayi.

³⁴ Tutai Jesuŕ tímiayi "Pitrú, nekas tájame, yamaik atash shiniatsajñ ame menaintiú natsantrurtatme" tímiayi.

Itiuŕchat winiawai

³⁵ Nuyá Jesuŕ tímiayi "Wis̄ha yurumkajainchu, kuítjainchu, sapatjainchu akupkamjar-mena nū ¿táatramsamkarum?"

Niisha "Átsá penké táatramsachmaji" tiarmiayi.

³⁶ Tutai Nii tímiayi "Antsu yamaikia yurumkan takakkuŕka takustí, kuítiniasa núnisan; tura puniancha takakchakka ni pushirín suruk punian sumakti. ³⁷ Nekaatarum. Yus-Papiniun yaunchu aarma ana nu wi túrunamujai uminkiatawai. Juiti aarma: Yajauŕshuarnum pachikiarmiayi.

Wari, Yus-Papiniun ashí Winia aarma ana nu uminkiatniuiti."

³⁸ Tutai ni unuiniamurj tiarmiayi "Uuntá, juj jimiara puniá awai."

Tutai Niisha "Asati" tímiayi.

*Jitsemáni ajanam Jesuŕ Yúsan áujsamiania nu
(Mateu 26.36-46; Márkus 14.32-42)*

³⁹ Nuyá Jesuŕ jínkimiyai. Tura tuke túrin asa Uriwiu náinnium wémiayi. Ni unuiniamurjsha nemariarmiayi.

⁴⁰ Aj jeá nin chicharuk "Itiuŕchat winiakui iniaraj tusarum Yus áujsatarum" tímiayi. ⁴¹ Tuasua amik arantach, kaya nankimiam jeana núnik Jesuŕ wémiayi. Tura Yúsan áujsataj tusa tikishmarmiyai. ⁴² Tikishmar juna tímiayi "Apawá, piniñnum yapá umartinia áintsan Wi wáitsattajna nu wakerakmeke jurutkitia. Tura Wi wakerajna nucha antsu Ame waker-amna nu atí, tajai" tímiayi.

⁴³ Nuyá, ikiakártaj tusa Yusa suntarj nayaimpinmaya tarimiayi. ⁴⁴ Tura Jesuŕ imiá wáitias pujak nú kakaram Yúsan áujsamiayi. Tura ni searmarjsha numpá ántsaj nunká kitiawarmiayi.

⁴⁵ Yúsan aujsua amik wajaki ni unuiniamurj werimiayi. Tura kúntuts enentáimmarijijai ti pimpiki kanúu tepenan tarimiayi. ⁴⁶ Nuñkia chicharainiak "¿Urukamtai kanúu teparum? Itiuŕchat winiakui iniaraj tusarum nantakrum Yus áujsatarum" tímiayi.

Jesusan achikiarmiania nu

(Mateu 26.47-56; Márkus 14.43-50; Juan 18.2-11)

⁴⁷ Jesuŕ tuke chichaa pujaj, untsurj shuar táarmiayi. Tura nuní eemka Jesusa unuiniamurj Jútas naartin winimiayi. Tura Jesusan mukunatajtsa tarunmiayi. ⁴⁸ Támatai Jesuŕ chicharuk "Jútasá, ¿Aents Ajasu tutai mukunamek surutkattam?" tímiayi.

⁴⁹ Jesusjai pujuarmia nu, túmamun wáinkiar "¿Uunt puniajai ijuuatartjik?" tiarmiayi. ⁵⁰ Tura chikichik Patri untrj takarniurj kuishjñ untsuurjñ tsupirkamiayi.

⁵¹ Tura Jesuŕ tímiayi "Iniaisatarum." Nuna tinia ni kuishjñ antñ tsuármiai. ⁵² Nuyá Israer-patri úntrjñ, Yus-jeá úntrjñcha, tura pepru úntrjñcha, Nin achiktaj tusa tariarmia nuna chicharuk "¿Wis̄ha kasakaitaj. Urukamtai puniajaisha numijjaisha tarutniuram?" ⁵³ Nuik Yusa Uunt Jeeŕn tuke tsawant atumjai pujumaj nū achirkachmarme. Túrasha átum kiritniumiá kakarmajai nupetkatin yamá tsawantin tsan̄katkamuitrume" tímiayi Jesuŕ.

Pítuŕ "Jesuŕnaka nékatsjai" tímiania nu

(Mateu 26.57-58, 69-75; Márkus 14.53-54, 66-72; Juan 18.12-18, 25-27)

⁵⁴ Nuñkia Jesusan achikiar emetawar Israer-patri untrj jeeŕn júkiarmiayi. Tura Pítrusha ikian nemarki wémiayi. ⁵⁵ Tura açch jinia ikiapármiai. Túrawar anamuk pujuarmiayi. Pítrusha niijjai pujusmiayi. ⁵⁶ Tura nuwá, Patrj takarniurj amia nu, Pítuŕ jinia anamuk pujan wániak "Ju áishmansha Nijjai pujumiayi!" tímiayi.

⁵⁷ Tutai Pítur chichaak “Nuwá, Nin nékatsjai” tímiayi.

⁵⁸ Tura árusaŋ chíkich nin wániak “Amesha Nijn páchitkiatme” tímiayi.

Tutai Pítur tímiayi “Atsá. Wikia áinŋia páchitkiatsjai” tímiayi.

⁵⁹ Chíkichik ura naŋkaasmatai chíkich apach chichaak “Nekas ju áishmaŋsha Niijjai pujumiayi. Warí, niisha Kariréanmayanŋchakait” tímiayi.

⁶⁰ Tutai Pítur chichaak “Ame támena núnaka nékatsjai” tímiayi. Nú chichamaik Pítur chicháa pujajŋk' atash shiniukmiayi. ⁶¹ Tura nuinŋia Uunt Jesus Pítrun apajas ísmiayi. Túra “atash shiniatsajŋ ame menaintiu natsantrurtatme” Uunt Jesus timia nuna enentáimpramiayi. ⁶² Nuyá Pítur jiiŋki ti útmiayi.

Jesusan wishikrarmiayi

(Mateu 26.67-68; Márkus 14.65)

⁶³ Áishmaŋ Jesusan wániarmiania nu ti wishikiainiak awattiarmiayi. ⁶⁴ Jjin epetkar yapiniam awattiar chicharainiak “Nekamata, ya awatama” tiarmiayi. ⁶⁵ Tura katsekainiak ti untsurí chíkichnasha naŋkamas tiarmiayi.

Uunt Iruntainiam Jesusan ejeniarmiania nu

(Mateu 26.59-66; Márkus 14.55-64; Juan 18.19-24)

⁶⁶ Tsawarmatai, Israer-shuara úuntriŋsha, Israer-patri úuntriŋsha, Israer-shuara jintin-niurŋsha iruntrar ni iruntairjin ejeniarmiayi. Nuŋ chicharainiak ⁶⁷ “Paant titiá. ¿Yus anaikiamu Kristu tutaia núkaitiam?” tiarmiayi.

Tutai Jesus tímiayi “Wi “ee” tákuisha, “nekasaiti” tíchattarme. ⁶⁸ Tura Wi aniamsha áirkashatrume, túrasha akuptukhattarme. ⁶⁹ Tura wárik Wisha Aents Ajasuitjiana nu, ashí naŋkaamaku ajasan, Yusa untsuurjŋi pujustajai” tímiayi.

⁷⁰ Tutai niisha tiarmiayi “¿Nuiŋkia amesha Yusa Uchirjŋkaitiam?”

Tutai Jesus tímiayi “Ee, Witjaj, átum Winia túrutrum núnisnak.”

⁷¹ Tutai niisha tiarmiayi “Warí, ¿iisha chíkich ujatkat tusar atsumajik? Imia niŋki chichaamu antukchajik” tiarmiayi.

23

Piratuŋ Jesusan júkiarmiania nu

(Mateu 27.1-2, 11-14; Márkus 15.1-5; Juan 18.28-38)

¹ Nuyá ashí Uunt iruntrarmia nu wajatkiar Rúmanmayá akupin Piratuŋ Jesusan júkiarmiayi. ² Nuŋ jeawar, Piratun chicharainiak “Ju áishmaŋ íi shuaran awajimtikiar enentáimtikiania nu nekaamji. Rúmanmayá uunt akupin Sésaran kuit akiktinian suritramaji. Tura nu arant Niŋki, akupin Kristu tutaingtjai, tawai” tiarmiayi.

³ Tutai Piratuŋ Jesusan chicharak “¿Ame Israer-shuara akupiniurjŋkaitiam?” tímiayi.

Tutai Jesus tímiayi “Ee, núitjai, ame támena núnisnak.”

⁴ Nuyá Israer-patri úuntriŋcha tura aents nuŋ iruntrarmia nunasha Piratuŋ chicharainiak “Ju áishmaŋ tunaan túran penŋké wáinkiachuitjai, tajai” tímiayi.

⁵ Túrasha niisha nú nekasar chicharainiak “Antsu nekas ashí Jutía nuŋkanmayá aentsun ni unuiniana nujaj akajenawai. Kariréa nuŋkanmayá naŋkaamas ímiajajsha tayi” tímiayi.

⁶ Piratusha nuna antuk “Nu áishmaŋ ¿Kariréanmayanŋkâit?” tímiayi.

⁷ “Ee” tuiniakuŋ, Erutisan akuptukarmiayi. Erutiska Kariréanmayá aentsun akupniuyayi. Túmaitiat nu tsawantín Jerusaréŋnum ishichik tsawant pujusmiayi.

⁸ Erutiska Jesusan ístaj tusa ti wakerimiayi. Jesusa túramurjŋ áujmatman ti antukmiayi. Tuma asa, “Wi íimiai aents tújintiamun túrashtimpiash” tusa Jesusan wániak warasmiayi.

⁹ Jesusan ti nukap aniasmiayi; túramsha penŋké áimkiachmiayi. ¹⁰ Nuŋsha Israer-patri úuntriŋsha, tura Israer-shuara jintinniurŋsha yajauchiiti tusar charaatum awajiararmiayi.

¹¹ Tura Erutissha ni suntarjijaj Jesusan yajauch enentáimtuiniak Nin wishikiainiak ti penŋker pushin, akupniu entsatairjya ánnium, áentsrarmiayi. Nuyasha Erutis ataksha Piratuŋ akupkamiayi. ¹² Túram nu tsawant Piratuŋ Erutisjaj nawamnaikiarmiayi. Kame yáunchuka nemasnaikiau ármiai.

Jesusan “mantamnati” tiarmiania nu

(Mateu 27.15-26; Márkus 15.6-15; Juan 18.39–19.16)

¹³ Nuyá Israer-patri úuntriŋ aentsu úuntriŋjai tura penŋké aentsjai Piratuŋ ikiaanak tímiayi

¹⁴ “Ju áishmaŋ aentsu awajimtikiuŋ tusarum itiantinrume. Túrasha átum íimprumŋŋ an-intrusan yajauch átum tárumna nuna penŋké nekarachjai. ¹⁵ Erutissha núnisan yajauchin nekaachai. Warí, juŋ awainkíchimaka. Nuikia páantchakait jú aishmaŋ jakamnia tunaanka túrichuiti” tímiayi.

¹⁶⁻¹⁷ Túraitiat tuke túrutai asamtai, jisat jeakuŋi sepunmayá chíkichik áishmaŋkan Piratuŋ anŋkant akupkatín ámiayi. Tuma asamtai, niŋ chichaak “juna asutián awematjai” tímiayi.

¹⁸ Tura aencha iruntrar ti untsumainiak “Atsá; jucha. Ju nakitiaji. Antsu Parapás akupkata” tiarmiayi. ¹⁹ Nu Parapássha akupniun nakitiak mesetan najana asa tura maṅkartin asa sepunam eṅkeamuyayi.

²⁰ Piratuka Jesusan akupkattsa wakerak ataksha aentsun áujsarmiayi. ²¹ Túrasha nú arant untsumainiak “Atsá. Krúsnum mantamnati” tiarmiayi.

²² Tura ataksha Piratu chicharainiak “¿Urukamtaí. Warí tunaan túrait? Jakamnia tunaan túrachiashtusan, aniasan peṅké nekarachjai. Asutián akupkatjai” tímiayi.

²³ Tura niisha kakaram untsumainiak “Jesus mantamnati” tiarmiayi. Kame aencha tura Patri úmtrjsha ti untsumaina ásarmatai ni wakeramurj tsanṅkatnakarmiayi. ²⁴ Nii wakeriarmia nuna Piratu “túrattajai” tímiayi. ²⁵ Tuma asa Parapásan, mesetan najanin tura maṅkartin amia nuna akupkamiayi. Tura Jesusnaka ni wakeramun túrawarti tusa íktusarmiayi.

Jesusan krúsnum ajinrurarmiania nu

(Mateu 27.32-44; Márkus 15.21-32; Juan 19.17-27)

²⁶ Jesusan jukitiasa pujuiniaj Serini nuṅkanmaya Semuṅ ni pépruriya Jerusarénum yama jeamiayi. Nin achikiar, Jesusa krusrj ayantkar “ni ukurj wetá” tiarmiayi.

²⁷ Untsurj aents Jesusan nemariarmiayi. Tura untsurj nuwasha ti kuntuts enentáimiainiak útkiar tura wa-wa ajakiar wearmiayi. ²⁸ Túmainiakui Jesus nin iis, “Jerusarénumia nuwátiram Winia enentáimtursarum úttiirap. Antsu atumniak tura atumj uchirj enentáimtursarum úttiirum. ²⁹ Warí, ti iturchat tsawant jeawartatui. Tuma asamtaí “Uchirtichu ainia nu, ajaprukchana nu tura amuntsachu ainia nu, chíkich aentsjai nanṅkaamas peṅker pujuiniawai” tiartatui. ³⁰ Nu tsawantaj aents chicharainiak “Náint in nekentmak yuturmaartaí” tiartatui. ³¹ Warí, numi sameka áinis yajauch aya náṅkamna aṅsha ju iturchat átsuk. Tura numi kukaru ainṅkiamtai itirak nú yajauch túrunachat!.” Tu timiayi Jesus.

³² Tura Jesusjai krúsnum maatai tusar jímiar yajauch áishmaṅkan júkiarmiayi. ³³ Karawír nain tutainium jeawar Jesusan krúsnum ajinrurarmiayi. Tura Jesusa untsuurinj chikichik yajauch áishmaṅkan tura ni menaarinj chíkich yajauch áishmaṅkan núnisan krúsnum ajinrurarmiayi.

³⁴ Tura Jesus krúsnum ajintraku pujuram, chichaak “Apawá, tsanṅkurarta. Nii áitkiania nuna nékainiatsui” tímiayi.

Tura suntar pujuarmiania nu, yaki Jesusa pushirj jukit tusar nakurusarmiayi. ³⁵ Péprunmaya aents ii wajatiarmiayi. Tura uunt armia nusha Nin wishikiainiak “Chikichnaka uwemtkiuiiti. Wats, yamáí nekas Yusa anaikiamurj Kristu tútainṅka imia Niṅki uwéprati” tiarmiayi.

³⁶ Suntarsha Nin wishikrarmiayi. Tariar churuínian aartaí tusar awajiararmiayi. ³⁷ Tura chicharainiak “Amesha nekas Israer-shuara uunt akupniurjnkiumka amek uwemprata” tiarmiayi. ³⁸ Tura muuknumaani, Kriaku chichamjai, Rúmanmaya apach chichamjaisha tura Israer chichamjaisha ju áarar anujkamu ámiayi: *JÚITI ISRAER-SHUARA UUNT AKUPIN*

³⁹ Chikichik yajauch áishman nuj ajintruamu amia nu kátsekek chicharuk “Amesha nekas Yusa anaikiamurjntkiumka amek uwemprata tura incha uwemtkramprata” tímiayi. ⁴⁰ Tura chíkich ni tsaniakmarin kakantar chicharuk “¿Amesha Niijjai métek asutniátasa pujayatam, Yus ashamatsmek? tímiayi. ⁴¹ Íikia yajauch asar wáitsatniuitji; ii tunaarj akíkmakur wáitaiji. Antsu ju áishmaṅka yajauchin túrichuiti” tímiayi.

⁴² Nuyá Jesusan chicharuk “Amesha akupin ajasam winiasha enentáimtursata” tímiayi.

⁴³ Tutai Jesus chicharuk “Nekas tájame, jakar shiir pujutainium yamáí tsawant Wijjai pujustatme” tímiayi.

Jesusa jakamuri

(Mateu 27.45-56; Márkus 15.33-41; Juan 19.28-30)

⁴⁴ Tutupin aj ashí nuṅkanam ti kirit ajasmiayi. Tura menaintiú ura nanṅkaamasu aṅ, nantu nuṅkaach ajassha tuke kirit ámiayi. ⁴⁵ Tsawái nantusha mushatmarmiayi. Tura Jerusarénum Yusa Uunt Jeencha tarach ajamu aa jímiapetek nakaakamiayi. ⁴⁶ Nuyá Jesus untsumuk “Apawá, winia wakantrun Amjín ikiuajai” tímiayi. Nuna tinia jakamiayi.

⁴⁷ Suntara kapitiánri nu túrunamun wáiniak, Yusa náarin shiir awajeak “Jusha imiá nekas peṅker áishmaṅkuyi” tímiayi.

⁴⁸ Tura untsurj aents pujuarmia nu, nu túrunamun wáinkiar ti kuntuts enentáimiainiak ni netsepen paat awatiar waketkiarmiayi. ⁴⁹ Tura Jesusa amikrjsha tura nuwá Kariréanmaya Nin nemariarmia nusha íkiaṅ wajasar ii wajarmiai.

Jesusan iwiersarmiania nu

(Mateu 27.57-61; Márkus 15.42-47; Juan 19.38-42)

⁵⁰ Naka enentáimin péñker áishman ámiayi ni naari Jusé. Arimatéa pepru Jutía núñkanam ana nuyayuyayi. Israer-shuara Uunt Iruntairin páchitkiauuyayi. ⁵¹ Yus ju núñkanam akupin ajasat tusa Jusé nakas pujumiayi. Tuma asa Uunt Iruntainium Jesusan túrawarmia nuna nakitmiayi. ⁵² Tuma asantai Piratuj we Jesusa ayashin seamiayi. ⁵³ Piratu “ayu” takui, Jesusa ayashin krúsnumia jusa tarachjaj penuar kaya táurmanum iwiarsamiayi. Nu táurmanum chíkich iwiarsachmauyayi. ⁵⁴ Iwiaratin tsawantaj, ayampratin tsawant tsawástatuk ajas-matai túrunamiayi.

⁵⁵ Tura nuwa Kariréanmayá jukiniutak Jesusan nemarsarmia nusha iwiarsamunam weriar, Jesusa ayashj itiuur ikusmait nuna iisarmiayi. ⁵⁶ Iisar ikiuak ni jeen waketkiarmiayi. Tura Jesusa ayashj mejeeniñ tusar kuñkuinian iwiararmiayi. Tura ayampratin tsawantaj, Israer-shuar akupkamun umikiar ayamprarmiayi.

24

Jesus nantakmiania nu

(Mateu 28.1-10; Márkus 16.1-8; Juan 20.1-10)

¹ Tumintin káshik kuñkuinian iwiarapun júkiar ni nuwa Jesus iwiar samunam weriarmiayi. Tura chíkich nuwasha atampriarmiayi. ² Tura iwiar samu kaya atutkamu urani aan wáinkiar miayi. ³ Tura wayawar uunt Jesusa ayashin wáinkiachar miayi. ⁴ Wáinkiachu ásar ashankarmiayi. Tura “itiurkatjik” tiarmiayi. Tumaj jimiara áishman kan pushin wincharpatniun entsaru nin ayaamach wajainian wáinkiar miayi. ⁵ Nuna wáinkiar ti sapijmiainiak tsuntsunawarmiayi. Túmakui nu áishman chicharainiak “¿Iwiaakusha urukamtai jaka anumsha eñrum? tiarmiayi. ⁶ Juj pujatsui. Antsu nantakni. Nékatsrume. Ni isha Kariréanam tuke pujus ⁷ “Wi, Aents Ajasuitjiana nu, yajauch aentsnum surunkat-tajai. Túran krúsnum mantamnattajai. Tura menaintiú tsawantaj nantaktiatjai” turamchamkarum” tímiayi.

⁸ Nuna takui Jesus timian enentáimprarmiayi. ⁹ Tura iwiar samunmayá wakетки taar, Jesusa unuiniamurin aunte armia nuna tura chikichnasha ashí nu túrunamun ujakarmiayi. ¹⁰ Jesusa unuiniamurin ujakarmia nu ju ániawai: Maktaranmayá Marí, Juánasha, Jakupu nukurj Marisha, tura chíkich nuwajaj. ¹¹ Tura Jesusa unuiniamurisha nuwa tuñiakuissha nekasaiti tu enentáimtsuk “wáuruk tuñiawai” tiarmiayi.

¹² Túrasa Pítrusha jiinki Jesus iwiar samunam tsékenki werimiayi. Jeá, inít iis, aya tárachik tepenan wáinkiamiayi. Tura túrunamia nuna ti enentáimiar ni jeen waketikmiayi.

Emaús wetai jintianmaani túrunamia nu

(Márkus 16.12-13)

¹³ Nu tsawantajk Jesusa nemarniurj jímjar Emaús péprunam wéarmiayi. Emaúska Jerusarénumia aunte kirumitru jeá pujawai. ¹⁴ Túrunamia nuna chichakí wear miayi. ¹⁵ “Itiurkit” tu aujmatki weenaj imia Jesus taa nuj páchiniak niijjaj wear miayi. ¹⁶ Tura wáinkiarat nekaashin asamtai yait nekaacharmiayi.

¹⁷ We-wénakua Jesus chicharainiak “Jintiasha ¿warí áujmatkirum wéarum? ¿Urukamtai kúntuts enentáimprum?” tímiayi.

¹⁸ Chikichik, Kreupas náartin chicharuk “Jerusarénum túruna nuna ashí nékainiawai. ¿Ámeke amekék túrunamia nu nékachu páchitkiam?” tímiayi.

¹⁹ Tutai Jesus tímiayi “¿Warí urukait?”

Tutai tiarmiayi “Entá, Nasarétnumia Jesusa túrunamurj taji. Niisha Yúsnan etserin asa Yusa kakarmarjijaj chichasmiayi tura nuna kakarmarjijaj takasmiayi. Núnaka ashí aents nékainiawai. ²⁰ Tura ii Pátrirj uuntrj tura ii péprurj uuntrj “tunáa jakamnia túrayi” tusar “krúsnum mantamnati” tiarmiayi. ²¹ Tura ii Israer-aentstín uwemtikrampratin tu enentáimsamji. Tura ni maamusha menaintiú tsawant nankaamasai. ²²⁻²³ Túrasa ii nuwa ni iwiar samunam yamaí káshik weriar ni ayashin wáinkiacharmai. Tura “Yusa suntarj wáinkiaji tura “Jesus iwiaakuiti” túramji” tiarmai. Nuna tu ujatmakakrin ti enentáimpraji. ²⁴ Nuyá íi shuar iwiar samun weriar, nuwa tiarmia tímiatrusan wáinkiar miayi. Tura Jesusa naka wáinkiacharmai. Tu ujakarmai Jesusan.

²⁵ Nuyá Jesus nin chicharainiak “Enentáimchaitrume. Ashí Yúsnan etserin tiarmia nu wau enentáimtsrume. ²⁶ ¿Yusa anaikiamurj, Kristu tutai, shiir awajnat suk ti wáitsashtinkiait?” tímiayi.

²⁷ Tura nuyá Yus-Papinium Muisáis aarmia nuyá jukin ashí Yúsnan etserin ni túrunatniurin áararmia nuna jintintiatasa nan kamamiayi.

²⁸ Ayu, nií wear mia nú peprunam jeawarmiayi. Tura Jesuska nuj nan kaamaki wétaj tau ajamiayi. ²⁹ Tura niisha chicharainiak “Weep. Iijjaj pujustá. Warí, nantu akaikiyi, kirit ajatemsai” tiarmiayi.

Tutai Jesus niijjai pujustaj tusa wayamiayi. ³⁰ Tura niijjai irunar misanam pujus, yurumkan achik, Yúsan yuminkias nincha puuk súarmiayi. ³¹ Nu chichamaik, ni jji uranniuwa núnikiarmatai Jesusan nekaawarmiayi. Tura Niisha nú chichamaik menkakamiayi. ³² Tura nu shuarsha mai tunai ajainiak “Jintia winis Niisha Yus-Papin jintinramuk nekas ii enentáin shiir enentáimtikramprachmakaji” tiarmiayi.

³³ Nuyá, Emaúsnumiá wárik jjiinkiar Jerusarénum wakеткиarmiayi. Nuj Jesusa unuini-amurjin auntse armia nuna tura chikich shuar Jesusan nemariarmia nunasha iruntrar pujuinian wáinkarmiayi. ³⁴ Auntse armia nusha tiarmiayi “Uunt Jesus nekas nantakni. Semun Nin wáinkiaiti.”

³⁵ Tutai niisha jintiá túrunamun ujakarmiayi. “Jesus yurumkan ajaamakui nuj nekaamji” tiarmiayi.

Ni unuiniamurjin Jesus wantintiukmiania nu

(Mateu 28.16-20; Márkus 16.14-18; Juan 20.19-23)

³⁶ Nuna áujmatuk pujuiniaj Jesus aya aneachma ajapén wajas “Shiir enentáimsatarum” tímiayi.

³⁷ Nuna antukar, ti sapijmiakar, wakanchashit, enentáimsarmiayi. ³⁸ Tura Jesus chicharainiak “¿Urukamta sapijmiakrum wakanchashit, tu enentáimsarum? ³⁹ Winia uwejrusha, nawersha írtustarum. Wíkiitjai. Takarsa írsatarum. Warí, wakancha ayashtinkiait, ukunchtinkiait” tímiayi.

⁴⁰ Nuna tinia ni uwejencha nawencha iniaktusarmiayi. ⁴¹ Warainiyat sapijmiainia ásar, Niimpiashit tu enentáimtusarmiayi. Tuma asamtai, nin chicharainiak “¿yurumak takakrumek?” tímiayi. ⁴² Takui, namaknasha, míshkincha súarmiayi. ⁴³ Tura Jesus nuna achik niisha ímiainiamunmaj yuamiayi. ⁴⁴ Tura nin tiarmiayi “Winia túrutawarma nuna, Wi atumjai nuik pujusan tímiajrum. Nekas uminkiatniuyayi. Iis, wi túrunatniurun Muisáis aarmia nusha, Yúsnan etserin aarmia nusha, tura Sarmu papinium aarma ana nusha ashí uminkiatniuyayi” tímiayi.

⁴⁵ Nuyá Yus-Papinium aarman jintintiwarmiayi. ⁴⁶ Jintintiuik juna tímiayi: “Yusa anaikiamurj Kristu tutai jaka menaintiú tsawantaj jakamunmaya nantaktinia nu yáunchuk áarmauyayi. Tura Wi nú Kristuchukaitiaj. ⁴⁷ Winia náarun pachisar, Jerusarénumiá nanakama ashí nunkanam nu chicham etsernaktinia nu áarmauyayi. Shuar ni tunaari tsankurnarat tusar enentáin yapajiátniuiti. Tura tu etserkatniua nusha yaunchu áarmauyayi. ⁴⁸ Tura wi túrunamu neka asarum etserkatniuitrume, tímiayi. ⁴⁹ Tura winia Apar, winia Wakantrun susartatjai, turammarumna nuna akuptuktatjarne. Tura nayaimpinmaya táatsain jui Jerusaréñ pérunam pujústárum. Taa ni kakarmarjin suramsat-tarne.” Tu tímiayi.

Jesus nayaimpiniam wakamiania nu

(Márkus 16.19-20)

⁵⁰ Nuyá Jesus Jerusaréñ pérunmaya júkiar Petania pérunam ejeniarmiayi. Tura nuj ni uweje takuí, “Yus yáinmakarti” tímiayi. ⁵¹ Nuna tu pujus, niyá kanakmiayi. Tura nayaimpiniam junakmiayi. ⁵² Ni unuiniamurjsha Nin imiá shiir enentáimtusarmiayi. Tura nuyá ti warasar Jerusarénum wakеткиarmiayi. ⁵³ Tura Yusa Uunt Jeen pujusar Yusa náarin shiir awajú pujuarmiayi. Áukete.

Yúsán Shiir Chichamēn JUAN aarmia nu

Chícham aents ajasmiania nu

¹ Ashí nanċamamia nú yaunchu Yusa Uchirí tuke pujuyayi. Niisha Yúsán ti paant awajeakui, Chícham tíminiaiti. Chichamsha Yusjaj pujuyayi. Chichamsha Yúsauyayi. ² Yámanċamtaik Niisha pujuyayi Yusjaj. ³ Ashí najanamú ainia nu Niijjaj najanamuiti. Nii najanachmaka penċé atsawai. ⁴ Niisha iwiaaku átinia nérenniuti. Nu iwiaaku atincha tsáapninia áinis Yusna ana nuna ashí shuaran paant neċamċiamniaiti. ⁵ Nu tsáapnin kiritniunam tsáapniawai. Tura kiritniusha tsáapninian ikiajniaktinian tujinkiaiti.

⁶ Aishman ámiayi, Yus akupċamu, ni naarj Juan. ⁷ Niisha tsáapnin chichaman etserkatajtsa támiayi. Nuna étserek ashí umirċarat tusa támiayi. ⁸ Juansha nu tsáapninchauyayi. Áyatik akupċamuyayi tsáapnin chichaman etserkat tusa. ⁹ Nu tsáapninkia neċas tsaapniniaiti. Ju nunċanam taa ashí shuaran enentájn tsáapniartiniiaiti.

¹⁰ Chichamsha taramiayi ju nunċanam. Tura nunċasha ni najanamú ain, nunċaya aents Nin neċaacharmiayi. ¹¹ Támiayi ni nunċén tura ni shuarsha ni enentájn itiaacharmiayi. ¹² Tuma ain chíkich shuar Nin enentáimtuiniak ni enentájn itiaawarua nuna Yusa uchirí ajastinian Yus tsanċatkamiayi. ¹³ Niisha Yusa uchirí ajasar ataksha númpentin ayashímkiacharmai. Áentsnúmiá akiiniachu áiniawai niisha. Aishman wakeramujajsha akiiniacharmai. Antsu Yúsnumiá akiiniawaru ásar Yusa uchirí ániawai.

¹⁴ Nú Chichamsha ayashtin ajas iijjaj núċap tsawant pujumiayi. Yusa anenċratairijjaj piakuyi. Aya neċasa nunak chichaamiayi. Núnisan ni penċerjn, aya Yusa Uchirí chikichkia nu takusminia nuna iniakmamiayi. Nusha iisha paant wáinkiaitji. ¹⁵ Juansha Nin neċa asa, étserek tímiayi “Júiti wi tímiay nu: “Winia ukuruinj winittiana nu wjjajinkia émċaiti. Maa, wi atsaisha tuke pujuyayi” tuiujaj.” Tu etserkamiaiyi.

¹⁶ Chichamsha ti anenċartin asa ashí penċer ana nuna iniaitsuk súramji. ¹⁷ Yusa akupemurjn Muisais yaunchu jintintraiti, antsu aneatniuncha tura ashí neċas ana nunasha Jesukristu jintintraiti. ¹⁸ Chikichkisha Yúsán penċé wáinkiachuiti. Tura ni Uchirí chikichkia nu tuke Niijjaj tsaniaku asa Yúsán paant awajturmasuitji.

Imiakratin Juan Jesukristunun etserkamiania nu

(Mateu 3.11-12; Márkus 1.7-8; Rúkas 3.15-17)

¹⁹ Jerusarénnumiá Israer-shuar ni Pátrirjcha Riwi-shuarj Juanċaj akupċarmiayi yákit tusar.

²⁰ Inintruiniakui paant uċakmiayi. “Wikia Krístuchitjai” tímiayi.

²¹ Takui ataksha aniasarmiayi “¿Nuikia yáitiam. Yúsán etserin yaunchu amia nú Eriřaskaitiam?” tiarmiayi.

Juansha “Atsá, núċaitjai” tímiayi.

Nuyá ataksha aniasarmiayi “Nuikia ¿Yúsán etserin tátinia núċaitiam?” tiarmiayi.

Niisha “Atsá” tímiayi.

²² Takui “¿Nu arantcha yáitiam. In akuptamċajnia nusha warí títiataj. Warintia enentáimiam?” tiarmiayi.

²³ Juansha tímiayi “Yúsán etserin Isayas yaunchu timia núitjai. Niisha áarmiayi “Aents atsamu nunċanam shuar untsumu “Íi uuntrj jinti naka awajsatarum,” tu untsumu.” Núnaka Isayas áaruiti. Tura wikia untsumna nú shuaraitjai” tímiayi.

²⁴ Juanjaj chichainiakka Pariséu akupċarma áarmiayi.

²⁵ Niisha tiarmiayi “Nuikia Krístuchuitatmesha, Eriřashaitatmesha, Yúsán etserin tátinia núċaitiatmesha ¿urukamta imiakratam?” tiarmiayi.

²⁶ Juansha tímiayi “Wikia entsajaj imiakratjai. Tura átum írutramunam shuar átum néċatrumna nu wajaawai. ²⁷ Niisha winia ukuruinj winiayat wjjajinkia ti nanċaamantuiti. Nii ti penċer asamtai wisha ni sapatrj jnċiamurjcha atitrahminiaitjai” tímiayi.

²⁸ Nuka Petapara peprunam túrunamiayi. Petaparasha Juan imiakratmia nuj Jurtañ entsa amain amai.

Jesus Yusa Murikrinti

²⁹ Nuyá kashin Juan Jesusan winian wáiniak tímiayi “Iistarum. Núiti Yusa Murikrj ashí aentsu tunaarjn júana nu. ³⁰ Núiti wi tímiay nu, “Winia ukuruj winiana nu wjjajinkia nanċaamantuiti. Tura wi atsaisha tuke pujuyayi” tímiajaj. ³¹ Wisha Nin neċaachmajai. Tura ashí Israer-shuar Nin neċaawarat tusan imiakrin támajai” tímiayi.

³² Nuyá tímiayi “Yusa Wakanin yámpitsa núnin nayaimpinmayan táarun wáinkíámjai. Tura ekemsamai. ³³ Nu túruntsaín tuke Nin nekaachmajai. Tura Yuska winia imiakrattinian akuptak turutmiai “Chikichik shuarnum Yusa Wakaní tara ekemsa wáinkiam, nujai nekaat-tame. Yusa Pénker Wakaníjjai imiakratniua núiti” túrutmiai. Tura nujai Nin nekaamjai. ³⁴ Yamaikia wainkia asan ti paant nékajai tí nekas Yusa Uchirínti” tímiayi Juan.

Jesusa unuiniamurí emka armia nu

³⁵ Kashincha ataksha Juan nuj wajasmiai ni unuiniamurí jímiarjai. ³⁶ Jesussha nuí nankaamakui Juan tímiayi “Iistarum, Yusa Muríkrí áuwiti.”

³⁷ Juanka unuiniamurí nuna antukar mai Jesusan pataatukarmiai. ³⁸ Jesussha úkumur ímias nu jímiarar wininian wáinkíámiai.

Tura tímiayi “¿Ya earum?”

Niisha “Uuntá, ¿tui pujam?” tiarmiayi.

³⁹ Jesussha tímiayi “Wats, iitiarum.”

Niisha wear ni pujutairin wáinkíarmiayi. Tura áanókú ajasmatai nu tsawantai nuj kinti-amprarmiayi.

⁴⁰ Juanka chichamen antukar Jesusan pataatukaruka jímiar ármiai. Chikichik Antre-sauyayi. Niisha Semun Pitru yachíiyayi. ⁴¹ Antressha wárik ni yachí Semunkan eaktajtsa wémiayi. Tura wáiniak “Mísias wáinkiaji” tímiayi. Misiaska ni chichamen “Kristu” tawai. Kristuka Israer-shuaran yaínkiarat tusa Yusa anaikiamuiti.

⁴² Nuyá Antres ni yachí Semunkan Jesus pujamunam jukimiai. Jesussha wáiniak tímiayi “Ámetme Semun, Junasa uchirí. Túrasha Sépas átatme.” Sépaska Israer-shuar chichamnum kaya tawai. Tura Kriaku chichamnum nuka Pítruiti.

Jesus Jiripíjjai tura Natanaérjai chichasmiania nu

⁴³ Kashincha Jesus Kariréa nunkanam wétajtsa pujumiayi. Tura Jiripin wáiniak “Nemartusta” tímiayi.

⁴⁴ Jiripisha Petsaitia péprunmayayuyayi. Antressha Pítrusha nu péprunmayayuyayi. ⁴⁵ Nuyá Jiripi Natanaéran eakmiayi.

Tura wáiniak tímiayi “Muisais Yus akupkamu papinium “Anaikiamu tátatui” tu áarchamkia. Yaunchu Yúsnan etserniusha ujakcharmakia. Nu shuar wáinkiaji. Jesusaiti, Jusé uchirí. Nasarét péprunmayaiti.”

⁴⁶ Natanaérsha tímiayi “¿Nasarétnumia pénker shuar áminkiait?”

Jiripisha “Winim ítiá” tímiayi.

⁴⁷ Jesussha Natanaéran tíjuch winian wáiniak tímiayi “Ju shuar iistarum. Ti pénker Israer-shuaraiti. Peñké anañkartichuítí.”

⁴⁸ Natanaérsha tímiayi “¿Itiur nékaram?”

Jesussha tímiayi “Jiripi tuke untsurmatsain wáinkíájme ikiu numirin ejamkam wajamin.”

⁴⁹ Natanaér nuikia tímiayi, “Uunta, nekas Yusa Uchirínme. Israer-shuar akupniuitme” tímiayi.

⁵⁰ Tura Jesus tímiayi “¿Aya wi “Ikiu numirin ajamkam wajamin wáinkíájme” takui Winia enentáimturamek? Antsu nuna nankaamas nekaachmin ana nusha wáinkíáttame” tímiayi.

⁵¹ Nuyasha Jesus tímiayi “Wi nekas tájarme, Aents Ajasu asan atumsha nayaim uranmianum Yusa suntarí Winin tara waka ajainia wáinkíáttarme.” Tu tímiayi.

2

Nuatnaikiatin jísat Kaná péprunam ámiania nu

¹ Menaintiu tsawant nankaasmatai nuatnaikiatin jísat Kaná péprunam ámiayi. Kaná péprusha Kariréa nunkanmauyayi. Jesusa nukurísha nuí pujumiayi. ² Jesussha ni unuiniamurísha nu nuatnaiyamunam ípiaamu ármiai.

³ Umutai amuukamtai Jesusa nukurí tímiayi “Umutai amuukai. Peñké takakainiatsui.”

⁴ Tura Jesus tímiayi “Nukuá, ¿urukamtai Winia túrutam? Iníaitiústá. Winia kakarmar iniakmastin jeaatsui.”

⁵ Nuyá umutain wáinmainia nuna ni nukurí tímiayi “Ashí ni tana nu umiktárum.”

⁶ Nuj kayajai najanamu yumi-yaraatai saís (6) ámiayi. Nu yaraatainmaya Israer-shuar ni ewejéncha ni nawéncha nijiamau ármiai Yus shiir enentáimturatsú tusar. Chikich chikich yaraatainnum uchenta (80) rítrusha, siañ (100) rítrusha yumi wayamniauyayi.

⁷ Nuyá Jesus umutain wáinmaun “Ju yaraatai áimpratarum” tímiayi. Takui mete áimprarmiayi. ⁸ Áimprarmatai Jesus tímiayi “Pai, ishichik shikikrum námper chicharu suutarum.” Tutai nútíkisañ túrawarmiayi.

⁹ Jista chicharusha nu umutai ajasun nekáprámiayi. Yaraatainmaya yumi jusamun nekaachmai niisha tura umutai ajamau jusaru ásar nékarmai. Jista chicharusha nuwáñun

untsuk ¹⁰ tímiayi “Jístanmaŋka péŋker umutain emka suíniatsuk. Tura jémarmataĩnŋkia tímianchan suiniatsuk. Túrasha ámeŋka péŋker umutai ikiusam yamá jíkchamek” tímiayi.

¹¹ Jesus túramu Kananum Kariréa nuŋkanam túrunamiayi. Nújainŋkia Jesus emka ni kakarmarĩn paant iniaktusmiayi. Nuna íisar ni unuiniamurjsha Nin enentáimtusarmiayi.

¹² Nuyá Kapernáum péprunam wémiayi. Ni nukurjsha ni yachjsha ni unuiniamurjsha nemariarmiayi. Nujsha utsurj tsawant pujusarmiayi.

*Yusa Uunt Jeen suruktinian Jesus surimkiamiania nu
(Mateu 21.12-13; Márkus 11.15-18; Rúkas 19.45-46)*

¹³ Israer-shuara namperi, paskua tutai, ishichik ajasmatai Jesus Jerusarénum wémiayi. ¹⁴ Nuĩ jeá Yusa Uunt Jeen súruinĩn wáinkiamiai. Turuncha murikniasha yampitsnasha súrin ármiai. Chikichcha ni misarĩn pujusar kuítian yapajĩniancha wáinkiamiai.

¹⁵ Nuna wáiniak yaranŋen chapikmar asutkiartutain najana nujaĩ ashí waakartiuk murikrintiuk aa jĩrmiayi. Kuítian yapajniu misarĩncha ayantar ni kuĩtrin nuŋká ut-saŋkarmiai. ¹⁶ Yampitsan súrinniasha tímiayi “Nuka juyá jítarum. Winia Aparu Jeen surutai jea najanawairap” tímiayi.

¹⁷ Nuna íisar ni unuiniamurj yaunchu Yus-Papinium áarman enentáimprarmiayi. Ju áarmaiti:

“Ame Jeem shiir atĩ tusan ti wakerukuitjai.”

¹⁸ Nuikia Israer-shuara unuĩrĩ Jesusan aniasarmiayi “Juna túramniatjai tusam ¿warĩ kakarmak iniakmastatam?”

¹⁹ Jesussha tímiayi “Ju jea sáakiakrumin menaintiũ tsawantaj iniantaittiai Wiki.”

²⁰ Israer-shuarsha tiarmiayi “Kuarentisáis (46) uwitin juna jeamtinian pujursarmiayi. Amesha menaintiũ tsawantaj jeamtameash.” ²¹ Kame Jesus “jea” chichayat ni ayashĩn tímiayi. ²² Tuma asamtai Jesus ukunam jakamunmaya nantakmiatĩ ni unuiniamurj ni timian enentáimprar ni chichamencha tura yaunchu Yus-Papinium áarmancha “Nekasaiti” tu enentáimtusarmiayi.

Jesus ashí shuara enentáin nekawai

²³ Paskua námpertin ti utsurj Jerusarénum pujuarmia nu, Jesus aents tujintiamun túramtai, nuna wáinkiar Nin nekas enentáimtusarmiayi. ²⁴ Tuma ain Jesus ashí neka asa ninkia enentáimtuscharmiayi. ²⁵ Niŋki ashí shuara enentáin neka asa chíkich ujatkat tusa atsumchamiayi.

3

Jesus Nikiutémujai

¹ Shuar ámiayi ni naarj Nikiutému. Niisha Pariséu asa nii tuinia áintsan Yúsna takauyayi. Niisha Israer-shuara unuĩrĩyayi. ² Niisha kashi Jesusaj irastajtsa wé tímiayi “Uuntá, shuáran unuiniarat tusa Yus akúptámkaiti. Nu paant nekaji. Yúsaiyanchuitkiunka aentsti tujintiamu túramna nu tujinkiaintme’ tímiayi.

³ Jesussha tímiayi “Tĩ nekas tájame. Atak yamaram akiiniachuka Yus akupeamunam pachĩinkiashtatui.”

⁴ Tutai Nikiutému aniasmiayi “¿Itiurak shuar uunta nu ataksha akiiniat. Ataksha ni nukurj ampujén enkemprramniakait atak akiiniatniuna?”

⁵ Ataksha Jesus tímiayi “Ti nekas tájame. Shuar entsayasha tura Wakanniumiasha akiiniachuka Yus akupeamunam penké pachĩinkiashtatui. ⁶ Ayashniumiá akiinia nuka ayashchakait. Núnisan Wakanniumiá akiinia nuka wakanchakait. ⁷ Wi “atak yamaram akiiniatniuiti” takui itiurchat enentáimpraip. ⁸ Nase enentáimpratá. Nase náŋkamsan umpúawai. Amesha ántame tura tuyan winiá túrasha tuiŋ weti nekatsme. Núniskete ashí Wakanniumiá akiinia nu.”

⁹ Tuma asamtai Nikiutémusha atak anias “¿Jusha itiuurak áiniat?” tímiayi.

¹⁰ Jesus áikmiayi “Ame Israer-shuara jintinniurjintiatmesha ¿itiura nekatsmea? ¹¹ Ti nekasán tájame. Nekas nekakur chichaaĩ. Íismajnia nusha ujaaji. Tuma ain ii chichame ántatsrume. ¹² Aya ju nuŋkanmaya túramu ujaam ántachkurmeka ¿itiurak nayaimpinmaya túramusha antuktarum?”

¹³ Shuar chikichkisha nayaimpiniam waka atsawai. Aya Wiki, nayaimpinmaya taran Aents Ajasu asan, túraitjai. Tura Wiki nayaimpinmayaitjai. ¹⁴ Tura Winiasha, Aents Ajasu ain, mantuawartatui. Íis, yaunchu Israer-shuar atsamunam wekainiak napijjai ti jáiniakui tuke tsuamartĩ tusa Muisais napin jirú najana yakĩ numiniam awajaimiai. Núnisnak Wisha awajnitniuitjai. ¹⁵ Nújainŋkia ashí Winia enentáimturna nuka jinium wétsuk Yusaj tuke iwiaaku pujustatui.”

Yuska ashí shuaran ti aneawai

¹⁶ Yuska ashí shuaran ti anea asa, ni Uchirín chikichik ana nuna shuáran uwemtikrarat tusa tsan̄katkamiayi. Ashí shuar Nin enentáimtana nu, jinium wécharat tusa, antsu Yúsnum tuke iwiaaku pujusarat tusa ni Uchirín akúpturmakmiayi. ¹⁷ Yus áentsun kajerak jinium surukat tusa ni Uchirín akupkachmiayi. Antsu uwemtikrarat tusa akupkamiayi.

¹⁸ Yusa Uchirín enentáimtana nuka jinium pen̄ké surunkashtiniati. Tura Nin enentáimatsna nuka, Yusa Uchirín chikichik ana nuna enentáimtachu asa, páchitsuk jinium surukmaiti. ¹⁹ Yusa Uchirí tsáapninia áintsan̄ ii tunaarj paant awajturmaj. Nu tsáapnisha ju nun̄kanam táraiti. Shuar tunáa ti tura ásar tsáapninian nakitrar kiritniun wakermiai. Nuna tura ásar jinium surunkaruiti. ²⁰ Ashí tunaan túruinia nuka tsáapninian mūjjiainiawai. Túrawar yupitiainiawai ni tunáa túramu paant ajasaj tusa. ²¹ Antsu ashí nekas túratniun uminiana nuka tsáapninian weantainiawai. Yus ni enentáji pujuram tsáapninium takainiawai. Nuka ti paantaiti.

Imiakratin Juan ataksha Jesusnan chichasmiania nu

²² Nuyá Jessusha ni unuiniamurijjiaisha Jutía nun̄kanam wear nūj pujusar imiakratmiayi. ²³ Juansha Enun̄ nun̄kanam, Sarim tjījchia nūj, imiakratuk pujumiayi entsa nūj núkap aa asamtai. Tura aents táarmatai imiainiarmiayi. ²⁴ Nusha Juánkan sepunam en̄kenatsain̄ túrunamiayi.

²⁵ Tura Juanka unuiniamurí Israer-shuarjaj jianaiktinian nan̄kamawarmiayi. “¿Ya imiakratma imiá péñkerait?” tusar áujmatarmiayi. ²⁶ Juánkaj inintrustai tusar wéarmiayi. “Uunta, ame nuik Jurtan̄ entsa amain̄ pujakum shuar nūj pujá “núiti Yusa Murikri” tíchamkum. Yamaikia imiakratui tura ashí shuar Nin nemarkainiawai” tiarmiayi.

²⁷ Tutai Juan̄ tímiayi “Ashí kakarmaka aya Yúsajyan̄chakait. ²⁸ Wisha paant tímiajai “Wikia Kristuchitjai antsu ni jintin̄ iwiarat tusan emka akupkamuitjai.” Nusha antukmarme. ²⁹ Kame shuar nuwán nuatna nuna áishrinti. Nuatnaiyak áishman̄ nuwéjaj áujnainiakui, ni amikrisha nuna antuk ti waraatsuk. Wisha núnisnak aents Jesusaj wénaku ti waraajai. ³⁰ Niisha tuke nan̄kaamaku uunt ajastiniati antsu wikia tuke tímiancha ajastiniaitjai.” Juan̄ tu chichasmiai.

Nayaimpinmaya tara nu

³¹ Nayaimpinmaya tara nuka ashí nan̄kaamakuiti. Nun̄kaya nuka, nun̄kaya asa jū nun̄kanmayanak áujmatui. Nayaimpinmaya tara nuka ashí nan̄kaamakuiti ³² tura nūj antukmancha ísmancha áujmatui. Túrasa ni chichamen̄ ántuiniatsui. ³³ Antsu ni chichamen̄ ántana nuka “Yusa chichame imiá nekasaiti” tawai. ³⁴ Yus akupkamuka Yusa chichamen̄ éterui. Yuska ni Wakan̄in̄ ementutsuk susa asamtai tu éterui. ³⁵ Yus Apa ni Uchirín anea asa ashí ana nuna iisti tusa ataksaiti. ³⁶ Shuar Yusa Uchirín enentáimta nuka yamaram iwiaakmanum akiinia asa tuke Yusaj shiir pujustiniati. Antsu Yusa Uchirín enentáimatsna nuka nu iwiaakmanum akiiniachuiti antsu Yus tuke nin kajerkaiti.

4

Jesus Samaria nun̄kanmaya nuwajaj chichasmiania nu

¹ “Jesus untsurí shuaran ni nemarkin̄ awajeawai; kame Juan̄jaj nan̄kaamas untsurí imiaawai” taman̄ Pariséu shuar antukarmiayi. ² Nekaska Jesus imiakratchamiayi, antsu ni unuiniamurí túrawarmiayi. ³ Pariséu nu chichaman̄ antukarman̄ Jessusha nekáa Jutía nun̄kanmayā jinki Kariréa nun̄kanam waketikmiayi.

⁴ Wáketuk Samaria nun̄kanmaan̄j nan̄kaamaktiniuyayi. ⁵ Samaria nun̄kanam wéak Sekar péprunam jeamiayi. Nu pepru jeastatuk Jakupa nun̄ké ámiayi. Jakupsha nu nun̄kan ni uchirín Jusén ti yaunchu susamiayi. ⁶ Nuisha yumirmat ámiayi. Jakup taurma asamtai “Jakupa yumirmatrij” tiarmiayi. Tutupin̄ jeamtai Jessusha pimpiki winis yumirmat ayamach̄ pujusmiayi. ⁷ Nūj pujaj Samarianmayā nuwá yumí shikiktajtsa támiayi. Tura Jesus “Entsa surusta” tímiayi. ⁸ Jessusa unuiniamurísha yurumkan̄ péprunam sumaktajtsa wéaru asamtai aya Jessusak pujumiayi.

⁹ Samarianmayā nuwá Jessusan̄ tímiayi “¿Itiura Israer-shuaraitatmesha Samarianmayā nuwá aisha entsa seatam?” Kame Israer-shuar Samarianmayā shuarjain̄kia pen̄ké chichachu ásar nuna tímiayi.

¹⁰ Jessusha tímiayi “Yus súamu nékameka tura entsa surusta tájam nusha nékameka ame antsu seattinme tura Wikia iwiaaku entsan̄ amasaintjai.”

¹¹ Nuwásha tímiayi “Uunta, entsasha ti iniati tura shikiktincha takaktsume. ¿Tuyan̄ iwiaaku entsasha surustam?” ¹² Ii uuntrī Jakup jū yumirmatan̄ taur juyan̄ak niisha ni uchirísha ni waakarísha umararmiayi. Nuyá ikiurtamkimiayi. ¿Amesha Jakupjaj nan̄kaamas kakarmakaitiam?”

¹³ Jesussha tímiayi “Ashí shuar jū entsan umarka ataksha kitiamtiatui. ¹⁴ Antsu Wi súajna nú entsan umarka penké kitiamchattawai. Antsu nu entsa Wi susamuka ni enentáin púkunia áintsan tuke pajamtiatui nujai tuke iwaaku pujustí tusa.

¹⁵ Tutai nuwá tímiayi “Uuntá, winiasha nu entsa surusta. Wisha kitiamcha átaj. Tura ju entsancha shikiktinian táchataj” tímiayi.

¹⁶ Nuyasha Jesus tímiayi “Áishrum untsukam utitia, turam jui tatá.”

¹⁷ Nuwasha “Winia áishur atsawai” tímiayi.

Tutai Jesus tímiayi “Maa, nekas tame. Áishrum atsawai. ¹⁸ Kame ame áishrum senku (5) takusuitme. Yamái takakmena nusha ame áishrumchaiti. Nekas tame.”

¹⁹ Nuna antuk nuwasha tímiayi “Uunta, ame Yúsnan etserniuchukaitiam. ²⁰ Ii úuntrin^{ri} k^{ia} tuke Samarianam pujuarmia nu jū nainnium Yúsan tikishmatrarmiayi. Antsu átum Israer-shuar árumna nu aya Jerusarénnum Yus tikishmátratniuiti tárume.”

²¹ Jesus tímiayi “Nuwá, enentáimsata. Tsawant jeattawai átum jū náinniumsha tátsuk tura Jerusarénnumsha wétsuk Yus Apa tikishmatratin. ²² Átum tikishmatrum nuka nékatsrume. Iikia tikishmatrajnia nu nékaji. Israer-shuarnumia Uwentikkiartin winiakui nékaji. ²³ Tsawant winittiana nu yamáí jeayi. Ashí shuar Yus Apan nekas tikishmatainiakka tuke wakanjai tuke enentáijia^{ia} awajitsuk tikishmatrartatui. Núnisan^{an} tikishmatrurat tusa wakerawai Yus Apa. ²⁴ Yuska Wakaniiti tura ashí Nin tikishmatainia nuka tuke wakanjia^{ia} tura tuke enentáijia^{ia} awajitsuk tikishmatratin ániawai.”

²⁵ Nuwasha tímiayi “Anaikiamua nu tátiniaiti. Nusha Krístu^{iti}. Niisha taa ashí jintintra^{mat} taji.”

²⁶ Jesus tímiayi “Wiitjai. Ámin chichaa^{aj}mena nú Kristuitjai.”

²⁷ Nuinⁿ ni unuiniamurⁱ táarmiayi tura nuwajai chichaa pujan wáinkiar ti enentáimprurarmiayi. Tumaitait “¿Wari wakerakmea nuwajai chichaam?” títinian arantukarmiayi. ²⁸ Nuyanka nuwá ni yumirⁿ ikiuki péprunam we ashí áentsun tímiayi ²⁹ “Winiirum ítiarum, shuar ashí wi túramun túruta nu. ¿Juka Krístu^{itti}ya?” ³⁰ Tutai péprunmaya jⁱinkiar Jesus pujamunam wearmiayi.

³¹ Jeainiatsaiⁿ ni unuiniamurⁱ seak tiarmiayi “Uunta, yurumáta.”

³² Tura Jesus tímiayi “Wi yúatniunka takakjai átum nékachman.”

³³ Ni uniuiniamurⁱsha nuámtak anniasarmiayi “¿Chíkich shuar yurumak itiarim tátsuash?” tiarmiayi.

³⁴ Tura Jesus tímiayi “Winia akuptukua nuna wakeramurⁱ túrakun tura ni takatrin takaakun Wijiaⁱⁿ k^{ia} yurumátinua áintsan ikiakáatui. ³⁵ Átumka “Tuke kuaru nantu árak júuktin taasai” tátsurmek. Túrasha Wi tájarme, shuar wininia nu iistarum. Yus-Chicham ni enentáin araamuiti. Tura júuktin tsawant jeayi. ³⁶ Arakan júaka akinkiatniuiti. Júukmataisha nu shuar uwemprar tuke iwaaku pujusartatui. Núnisan^{an} arakan araana nusha júana nusha mai metek warasartatui. ³⁷ Tiniu armia nuka nekasaiti: “Chikichik araawai chikichcha júawai.” ³⁸ Iis, chíkich araa^{km}amu júuktinian akupkaitjarme. Átum araachiatrumek chíkich takasmanum atumsha pachⁱintiuku^{it}rum^e” tímiayi.

³⁹ Tura núwaka péprunam jeá “Ashí wi túramun u^{at}kayⁱ” takui untsurⁱ shuar Jesusan ti shiir enentáimtusarmiayi. Niisha Samarianmaya shuar ármiai. ⁴⁰ Nu asamtai ashí Jesusai taar nijia^{ia} pujusát tusa seawarmiayi. Tutai Jesus jimiara^á tsawant nuⁱ pujusmiayi. ⁴¹ Nú shuar untsurⁱ ni chichamen antukar Jesusan ti shiir enentáimturarmiayi. ⁴² Nuyá nuwan tiarmiayi “Yamaikia aya ame chichammijaⁱⁿ Jesus enentáimtatsji antsu imia iisha ni chichamen anturkaji. Tura nékaji nekas Krístu^{iti}, ashí shuaran Uwentikin.”

Jesus akupniú takarniurⁱ uchirⁿ tsuármiania nu

⁴³ Jimiara^á tsawant nan^{ka}amasmatai Jesus Samaria nun^{kan}maya jⁱinki Kariréa nun^{kan}am wémiayi. ⁴⁴ Kariréasha Jesusa nun^{ke} asamtai, aⁱⁿsha Jesus timia áintsan ámiayi: “Yúsnan etserniun ashí shuar péⁿker anturainiawai antsu nuna nun^{ke}yanka nin anturainiatsui.” ⁴⁵ Tuma aⁱⁿ Kariréa nun^{kan}am jeamtai auyá shuarsha Jerusarénnum paskua námpernum wearu ásar tura ashí ni túramun nuⁱ wainkia ásar ti shiir awajarmiayi.

⁴⁶ Nuyá Jesus Kaná péprunam atak támiayi. Nu péprunmasha nuik Jesus yumin umutai awajsamiai. Jesussha nuⁱ pujaⁱ yajaⁱ péprunam Kapernáumnum akupniú takarⁿ ámiayi. Ni uchirⁱsha jaa tepemiayi. ⁴⁷ Niisha Jesus Jut^{an}maya Kariréa nun^{kan}am taman antuk Jesusai wémiayi. Tura ni uchirⁱ jákatin tepakui ni jeen we ni uchirⁿ tsuarat tusa Jesusan seamiai.

⁴⁸ Jesussha tímiayi “Aya aents túrachminian túrakui ísrum aya nújainⁿ Winia enentáimtar^{me}.”

⁴⁹ Tura takarⁿ tímiayi “Uunta, winia uchirⁱ jáatsaiⁿ wari winitia.”

⁵⁰ Nuinⁿ k^{ia} Jesus tímiayi “Jeemⁿ wak^{et}kitia. Yamaikia ame uchiram péⁿker ajasai.” Tutai nú aishmanⁿ Jesus táman antuk wémiayi.

⁵¹ Ni jeen jeátémámtai ni takarniurⁱ in^{ki}unⁿ tiarmiayi “Yamaikia uchiram péⁿker ajasai.”

⁵² Apasha inintrusmiyai nantu urukaim péñker ajasma.

Niisha tiarmiayi “Yau, nantu pukuntamtaí, tsuemun michatramai” tiarmiayi.

Nuna antuk uchí aparísha enentáimsamai. ⁵³ Nantu pukunta aí Jesus “Ame uchiram péñker ajasai” timia nuní aín michatraití. Tuma asamtaí niisha ashí ní shuarísha Jesusan nekas enentáimturarmiayi.

⁵⁴ Jesus nú túramujáí ní kakarmarín jimiará iniakmasmiayi. Nunasha Jutíammayá jíinkí Kariréa nunkanam jeá túramiayi.

5

Petesta amia nuí tampemaruñ Jesus tsuármiania nu

¹ Nu nankaamasmatai, Israer-shuar namperan najanainiakui Jesus ataksha Jerusarénnum waketikmiayi. ² Jerusarén yama wayamunam murik wayatín waiti tíjuuch amia nuí entsa pajamtaí jeammauyayi. Nu pajamtain Petesta tiarmiayi. Nuna wáitirísha señku (5) ármiayi. ³ Nuí untsurí jáiniak nunkanam tepearmiayi. Kusurusha shutuapsha tampemakusha tepesar entsa miartukat tusa nákasarmiayi. ⁴ Kame ní tátaj taku Yusa suntarí táuyayi entsan umuchkiatsta. Nuyánka emka shuar entsá wayá nu ní jáamuriya tsuármarmiayi. ⁵ Áishman traintiúchu (38) uwi jaa tepá nuí ámiayi.

⁶ Jesussha nu shuaran nuí tepan wáinkímiayi. Tura untsurí uwitin jaa tepan nekáa aniasmiayi “¿Shiir ajastiniak wakeram?”

⁷ Tutai jaasha tímiayi “Uunta, entsa muchitkiuí ¿winia yaki enkétat? Kame wi enkemátaj tai chíkich emka enkemáiniawai.”

⁸ Nuyá Jesus tímiayi “Nantaktia. Ame peakrum jukim wetá.”

⁹ Nu chíchamtaik áishman shiir ajasmiai. Tura ní peakrín jukí wémiayi. Nusha ayampratin tsawantaj túrunamiayi. ¹⁰ Tuma asamtaí Israer-shuar shiir ajasan tiarmiayi “Yamá ayampratin tsawantaiti. Peakrum júkishtiniatme” tiarmiayi.

¹¹ Áishmansha tímiayi “Winia tsuara nu “Peakrum jukim wetá” turutni” tímiayi.

¹² Nuínkia aniasarmiayi “¿Ya “Peakrum jukim wetá” túramam?” tiarmiayi. ¹³ Tura áishmansha Nin tsuárun nékachmiayi. Untsurí shuar nuí aa asamtaí tura Jesus weu asamtaí nin nekaachmiayi.

¹⁴ Atak Jesus Yusa Uunt Jeen áishmankan wáiniak tímiayi “Antukta. Yamaikia shiir ajasume. Atak tunáa túrawaip; nu arant ajasáim” tímiayi. ¹⁵ Nuínkia áishman Jesus nin tsuáрман nekáa Israer-shuaran ujakmiayi. ¹⁶ Tuma asamtaí ayampratin tsawantaj túramtaí Israer-shuar Jesusan maatai tusar áintrarmiayi. ¹⁷ Tura Jesus tímiayi “Wina Apar tuke yamaisha takawiti. Núnisnak Wisha takaajai.” ¹⁸ Tutai Israer-shuar nuna nankaamas maatai tusa wakeriarmiayi. Ayampratin tsawantaj takaakui kakerkarmiayi. Tura nu arantcha “Yus winia Aparuítí” takui Yusjáí métek enentáimtumawai tusar nu arant kakerkarmiayi.

Yusa Uchirí túramnia nu

¹⁹ Nuyá Jesus tímiayi “Ti nekas tájarme, Yusa Uchirínkia ní enentáijjain takaatsui. Antsu aya winia Apar takaana nuna ísan métek takaajai. Ashí winia Apar túramun Wisha ní Uchirí asan métek takaajai. ²⁰ Ni Uchirí asamtaí winia Apar anentui tura ashí tura nuna iniakturuí. Tura nuna nankaamas tujínkiannian iniaktursattawai Wisha túratniun. Tura nuna túrakui ashankattarme. ²¹ Winia Apar jakamunmayan iwiaaku ajasat tusa Ni wakerana nuna inianteatsuk. Núnisnak, ní Uchirí asan, Wi wakeraj nuna iwiaaku awájsámniatjai. ²² Winia Aparka súmamtiksui antsu shuar súmamtikiatniun ní Uchirín súsaiti. ²³ Tuma asamtaí ashí shuar Yus Apan shiir awajainia áintsan ní Uchiríncha métek shiir awajsatín áiniawai. Yus Apa ní Uchirín akupka asamtaí, Uchin shiir awajeatsna nuka Yus Apancha shiir awajeatsui’ tímiayi.

²⁴ “Ti nekasaiti. Winia chíchamprun ántana nú shuarka Winia Akuptukun enentáimtak ní iwiaakmarín tuke amuukashtinian takakui. Nu shuarsha ayashí iwiaakuítat jákaui antsu yamá nekas iwiaakuítí. Tuma asa sumamashtatui. ²⁵ Ti nekasaiti. Tsawant winítiana nu jeayi. Nu tsawant jaka ainia nu Wí untsumman untukar umirkarka iwiaaku ajasartatui. ²⁶ Iis, winia Apar iwiaaku awajsatniun takakui. Tura Winiasha, ní Uchirí asamtaí, iwiaaku awajsatniun surusuiti. ²⁷ Nu arantcha wí Aents Ajasu asamtaí, shuaran súmamtikiatniun surusuiti. ²⁸ “Ju chícham iturchataiti” enentáimprairap. Atak tsawantaj wí untsumman ashí jákaru ainia nu antukartatui. ²⁹ Tura ashí iwiansamunmayá jíinkíartatui. Péñker túrawarusha nantakiar tuke iwiaaku pujusartatui. Antsu tunáa túrawarusha nantakiar jinium surunkartatui’ tímiayi.

“Jesus nekas Yúsajáiti” tu áujmatainia nu

³⁰ Imia Wiki takaatsjai. Antsu Yus tana núnisnak súmamtikeajai. Wi wakeraj nuna enentáimsuk antsu winia Apar wakera nuna wakerukan, Nii akupta asamtaí, awajitsuk

súmamtíkjai. ³¹ Aya Wiki “Yúsajyáitjai” tákunka winia chichamur ántar ainti. ³² Chíkichcha awai. Niisha “Yúsajyáiti” túrutui. Ni chichamesha imiá nekasaiti. ³³ Atumsha Juankej wi túramu inintrusmarme tura nii timia nu nekasaiti. ³⁴ Tuma aijn aents táman atsumatsjai. Antsu Juanka chichame enentáimkiuram uwempratarum tusan tájarme. ³⁵ Juansha jiya núnis keemai. Atumsha ishichik tsawantín nú tsáapninnium warastin enentáimpramarme. ³⁶ Tura Winia “Yúsajyáiti” túrutna nu, Juanjai nankaamas pépkeran takakjai. Wi takasma núiti. Winia Apar takastinian surusma nuna takaakun nujai páantaiti Yus Apa akupka-muitjai. ³⁷ Winia Aparsha, akuptuku asa, ayamprutui. Túrusha átumka ni chichamesha antukchaitrume tura wáintiash wáinkiachuitrume. ³⁸ Yus Apa akuptukuiti. Tuma asam-tai Winia enentáimurchakum winia Aparu chichamesha atumi enentáin tusarum ti unuimi-aruitrume. Nu chichamsha Winian áujmatui. ⁴⁰ Tuma aijn nekas iwiaaku átaj tusarum Winí tátin nakitiarme” tímiayi.

⁴¹ “Shuar Winia “shúiraiti” túrutainiakuisha nuna páchiatsjai. ⁴² Maa, Wi nékajrume. Átumka Yus aneatsrume. ⁴³ Winia Apar akuptukmatai táwitjai túrusha nakitrarme. Antsu chíkichka ní enentáijijain jeartamkuinkia nuka átum wakerarme. ⁴⁴ Átumka nuámtak “Shiir enentáimtursati” tu enentáimtunaiyarme. Tura Yus enentáimturma nuka páchiatsrume. Nújainkia jíturak Yus enentáimtustam? ⁴⁵ “Ii tunaarj Yusaj etserturmaktatji” turuti-irap. “Muisais akupkamun umirkan uwemprattajai” tátsurmek. Antsu Muisais arma nujai atumi tunaarj etsernaktatui. ⁴⁶ Iis, Muisais Winia áaturrmiayi. Atumsha ni timia enentáimtakrumka Winiasha enentáimturaintrume. ⁴⁷ Tura ni arma enentáimtachkurmeka jíturak wi tama enentáimtustarum?” tímiayi Jesus.

6

Jesus senku mir (5.000) áishmankan ayurawarmiania nu

(Mateo 14.13-21; Márkus 6.30-44; Rúkas 9.10-17)

¹ Nu nankaasmatai Jesus Kariréa antumiañnum amain katinmiayi. Nu antumiansha Tipirias antumian tuiniawai. Jimiará náartiniaiti. ² Untsurj shuar Jesus ti jáinian timiá wárik tsuan wáinkiaru ásar Nin nemariarmiayi. ³⁻⁴ Israer-shuara paskuanamperj ishichik ajasmatai Jessussha ni unuiniamurijjai náinnium waka nuj pujusmiayi. ⁵ Jessussha untsurj aents wininian wáiniak jiripin tímiayi “Timiá untsurj shuar ayuratniusha jtuayan yurumak sumaktaj?” tímiayi. ⁶ Kame Jesuska Nii túrattana nuna neka asa jiripi warittin tusa tímiayi.

⁷ Jiripisha nuyá tímiayi “Timiá nukap kuitjai tanta sumakmesha ashí ishichik susamsha jeachaintjia” tímiayi.

⁸ Nuyá chikich unuiniamurj Antres, Pitru yachj, tímiayi ⁹ “Uchi juj senku (5) tantan jimiará namakjai takakui. Ausha timiá untsurnmasha jeatpiash” tímiayi.

¹⁰ Nuyanka “Ashí pujustarum” titiariymi.

Áishmansha nuwasha uchisha irunmiayi. Tura chírichri núkap aa asamtai nujsa senku mir (5.000) áishman pujusarmiayi. ¹¹ Jessussha nu tantan achik Yúsán yuminkias ni unuiniamurj susamiayi. Niisha ashí nuj pujuinian súsararmiayi. Namaknasha núnisaj ashí ni wakeriarmiania nuna súsararmiayi.

¹² Jémarmataisha Jesus ni unuiniamurj tímiayi “Ampirma júukrum chaninnium chumpiatarum. Wasúrnákain.” ¹³ Niisha senku (5) tantanmayá ampirmán júukar tuse (12) chaninnium áimkiarmiayi.

¹⁴ Nu shuarsha Jesus túramun ísar tiarmiayi “Ju nekas Yúsán etserin tátinia núchakait.”

¹⁵ Shuar Jesusan uunt akupin awajsataj tutaj Jesus nekáa Niniki náinnium wémiayi.

Jesus entsá pátatek nanamas wekasamiania nu

(Mateo 14.22-27; Márkus 6.45-52)

¹⁶ Kíakui Jesusa unuiniamurj antumiañnum wearmiayi. ¹⁷ Káshisha Jesus tuke táchamtai uunt kananam enkemáwar Kapernáum péprunam wéenak jíinkiarimiayi. ¹⁸ Tura nase ti umpúakui chíchimi ti wajaimiayi. ¹⁹ Ajapén ajasar Jesus entsá pátatek nanamas tíjiyuch winian wáinkiar ashamkarmiayi. ²⁰ Tura Jesus “Wiitjai. Ashamprukairap” tímiayi. ²¹ Nújainkia ti shiir warasar kanunam itiaawarmiayi. Tura nu chichamtaik ni wéamunam jeawarmiayi.

Shuar Jesusan eak wekainiawai

²² Kashincha chíkich shuar amain ayuramunam kanararu nekaawarmai. Jesusa unuiniamurj Jessujainchu chíkich kanu amia nujai wéarun nekaawarmai. ²³ Nuji chichak matsataj Tipirias péprunmayá chíkich kanu táarmiayi. Yau Jesus Yúsán yuminkias tantan ayuramunam tíjiyuch táarmatai ²⁴ nu shuar, Jessussha ni unuiniamurjsha nuj atsuiniakui, nu kananam enkemáwar Kapernáum péprunam Jesusan éaktajtsa wearmiayi.

Jesus apatkua áintsankete

²⁵ Entsa amain Jesusan wáinkiar aniasarmiayi “Uunta, ¿urutía juísha támam?”

²⁶ Jesussha tímiayi “Ti nekas tájarme. Aents tujintiamu nekáa asarum éatsurme. Antsu tanta yuarum jémaru asarum éatrumé. ²⁷ Juyá yurumak amuukatin asamtai ti pachisairap. Antsu amuukashtin yurumak tuke iwiaaku pujustinian amaana nu takarsatniuiti. Nú yurumkanka Wi, Aents Ajasu asan, susattajrume. Yus Apa nuna túratniun surus “Júka shuáran Yáinškiartiniiaiti” túrutui” tímiayi.

²⁸ Tutai inintrusarmiayi “¿Warí túratniuitiaji! Yus wakerana nu umiktin?”

²⁹ Jesussha tímiayi “Yus akupta asa Winia enentáimtusarat tusa wakerawai.”

³⁰ Tutai aniasarmiayi “¿Aentsti tujintiamuka warí túrátam ii ísar Ámin nekas enentáimtustin? Chikichcha túratá. ³¹ Yaunchu ii uuntri aents atsamunam maná yurumkan nayaimpinmaya susamun yurumáwarmiayi. Yus-Chichamnum núnik áarmaiti: “Nayaimpinmaya yurumkan Yus susamiayi.” Tu áarmaiti” tiarmiayi.

³² Jesussha tímiayi “Wi tájana nu nekasaiti. Muisais atumí uuntriñ nayaimpinmaya yurumkan súaschmiayi. Antsu winia Apar yamáki nekas apatkun nayaimpinmaya súramui. ³³ Iis, Yusajya apatkunka, nayaimpinmaya tára nu súramui tura nekas apatuk asa ashí shuaran nekas iwiaakman súawai.”

³⁴ Tutai “Uunta, nu apatuk tuke amasta” tiarmiayi.

³⁵ Tura Jesussha tímiayi “Wiitjai nu apatuk nekas iwiaakman súana nu. Winí winiana nú shuar penké tsukamashtatui, tura Winia enentáimturna nusha tuke kitiaarchattawai.

³⁶ Túrasa Wi túramu wáinkiumesha winia chichamur enentáimtatsrume. ³⁷ Ashí shuaran winia Apar tsankatrukarmiania nu, Wíi shuar ajasartatui. Winin winiana núnaka penké nakitrashatjai. ³⁸ Wi wakeraj nuna túratniun táchaitjai antsu Winia akuptukmia nuna umirkatniun táwitjai. ³⁹ Winia Apar akuptukuiti tura júna wakerawai. Ashí winia tsankatrukman emenkátsuk amuukatin tsawantaj iniantkiarat tusa wakerawai. ⁴⁰ Yus Apa wakerana nu júiti. Ashí shuar Winia “Yusa Uchirinti” tu enentáimturkui yamaram iwiaakman tuke takusat tusa wakerawai. Nú shuarnaka amuukatin tsawantaj iniantkittiajai” tímiayi Jesus.

⁴¹ Tura Jesus “Wiitjai, nayaimpinmaya apatuk akupkamu” takui Israer-shuar Jesusan áujmatiarimiayi.

⁴² Tura tiarmiayi “Ju Jesuschakait, Jusé uchiríya nu. Iikia ni aparísha nukurísha nékatsjik. ¿Itiurak “Nayaimpinmaya táraitjai” ta?” tiarmiayi.

⁴³ Jesussha tímiayi “Tu áujmatrukairap. ⁴⁴ Shuáran winia Apar akúpturkachuítikuiñkia penké weanturkachainti. Tura Winia akupturna nuna amuukatin tsawantaj iníántkittiajai. ⁴⁵ Yúsnan etserniú áarmarín tawai “Ashí Yus jintintiamu ártatui”. Núnisañ ashí Yusa chichamen antukar unuimiatainiakka Winí táiniawai” tímiayi.

⁴⁶ ‘Aya Wiki Yúsajya tau asan Yúsan wáinkiaitjai. Chikichka penké wáinkiachuiti. ⁴⁷ Ti nekas tájarme. Winia enentáimturna nú shuarka yamaram iwiaakman amuukashinian takakui. ⁴⁸ Wikia iwiaakman súana nú apatkuiitjai. ⁴⁹ Iis, atumí uuntri aents atsamunam maná yurumkan yúawariatcha ashí jákarmiayi. ⁵⁰ Antsu Wi tájana nú apatkun shuar yúakka jákachartatui. ⁵¹ Wikia nayaimpinmaya iwiaaku apatkuiitjai. Nu apatkun shuar yuakka tuke iwiaaku átiniaiti. Nu apatkun Wi susattaj nusha winia ayashruiti. Ashí shuar Yusaj iwiaaku pujusarti tusan winia ayashrun susattajai” tímiayi Jesus.

⁵² Nuyá nuámtak áujmattsar tiarmiayi “¿Itiurak ni ayashínkesha ayurtamattaj?” tiarmiayi.

⁵³ Jesussha tímiayi “Ti nekas tájarme, Wi Aents Ajasu asamtai winia ayashur yúatniuitrume. Winia ayashur yúachmeka tura winia numpar umarchamka nekas iwiaaku pujat-srume. ⁵⁴ Winia ayashrun yúana nuka tura winia numparun úmaka yamaram iwiaakman amuukashinian takakui. Tura nu shuaran amuukatin tsawantaj iníántkittiajai.

⁵⁵ Winia ayashruka nekas yurumkaiti tura winia numparsha nekas umutainti. ⁵⁶ Winia ayashruncha yúaka tura winia numparnasha úmaka Wijíaj tsaniñ pujawai tura Wisha nu shuarjaj tsaniñkian pujajai. ⁵⁷ Yus Apa, Winia akuptukuka, nu iwiaakma nérenniuiti. Tuma asamtai ni iwiaakmaríñ iwiaaku pujajai. Núnisañ Winia yurakka winia iwiaakmaruj iwiaaku pujustatui. ⁵⁸ Nayaimpinmaya apatkun tajai. Ju apatuk maná yurumka áintsachuiti. Atumí uuntri maná yurumkan yuawarsha ashí jákarmiayi. Antsu ju apatkun shuar yúakka tuke iwiaaku pujustatui” tímiayi Jesus. ⁵⁹ Núnaka Jesus Israer-shuar iruntainiam ununiarmiayi.

Iwiaaku chicham

⁶⁰ Nu chichaman antukar Jesusa unuiniamurj chicharainiak “Nii tana nu ti itiurchat asamtai ¿yaki antukminiait?” tiarmiayi.

⁶¹ Jesussha ni áujmatman nekáa tímiayi “Átum “ju chicham itiurchataiti” tárume. ⁶² Wátsek, Wi nayaimpiniam pujumiaj nuj waketkimtaisha ¿urukawaintrume? ⁶³ Warí, aya wakanik

iwiaakman súwaiti. Ayashkia penké áantraii nekas iwiaaku awajsatniun. Wi tájana nujá imiá nekas wakankia iwiaaku awajsamniati” tímiayi Jesus. ⁶⁴ Tura Jesus Nin enentáimtachun tura Nin suruktatna nunasha yaunchu neka asa ni unuiniamurjín tímiayi “Atumjíncha winia chichamprun enentáimtachu tuke awai. ⁶⁵ Nu asantai tímiajrumé “Shuáran winia Apar akupturkachmaitkiuinjka penké weanturkachainti” tímiajai” tímiayi Jesus.

⁶⁶ Nuyasha ni nemarniurj untsurj armia nu Jesusan ikiukiar atakka Nijijai wekasacharmiayi. ⁶⁷ Nuyá Jesus ni tuse (12) unuiniamurjín chicharainiak “¿Atumsha wétin wakerarmek?” tímiayi.

⁶⁸ Semuñ Pítrusha áikmiayi “Uunta, ¿yáiniñ wetajj? Ame chichamijjain nekas iwiaaku áminiaiti. ⁶⁹ Ame Kristu asam nekas iwiaaku Yusa Uchirínme. Nuka enentáimtusar ti paant nékaji” tímiayi.

⁷⁰ Jesussha tímiayi “Ashí tuse (12) árumna nu achikiuitjarme nekas Wíi shuar ajastin. Tuma aijn atumjín chikichik iwianchiiti” tímiayi. ⁷¹ Nuna taku Jútás Iskariútin, Semuñka uchirjín, enentáimtus tímiayi. Jútassha ni unuiniamurjintiat Jesusan ukunam surukmiayi.

7

Jesusa yachísha Nin enentáimtuscharmiaiyi

¹ Nu nankaasmatai Jesus Kariréa nunkanam wekaimiayi. Jutiá nunkanam wéchamiayi Israer-shuara uuntrj nuí máataj tutaí. ² Tura Israer-shuar aak aakmatai namperj jeatemamtaí ³ Jesusa yachj wishikiainiak tiarmiayi “¿Urukamtaí juísha pujam? Jutiá nunkanam wetá, áisha ame unuiniamuram túram nuna ísarat. ⁴ Ashí shuar nekaawarat tákumka úukam túrawaip. Ti tujintiamu túriniaitkiumka ashí shuar ímmianum túratá” tiarmiayi. ⁵ Ni yachísha ishichkisha Nin enentáimtachu ásar tiarmiayi.

⁶ Tura Jesus tímiayi “Winia tsawantur nampernum wétin jeatsui. Atumjainjka nánkamas tsawant wétin péjkeraiti. ⁷ Ju nunkanmayá aents atumniaka kajertamatsrume. Antsu ni tunaarjín etsertin asantai Wíniaka kajertuiniawai. ⁸ Átumka nampernum wetarum. Wikia tsawantur jeachkui wéatsjai.” ⁹ Juna tinia Jesuska Kariréa nunkanam juákmiayi.

Aak aakmatai nampernum Jesus timia nu

¹⁰ Ni yachj wearmatai Jesussha nampernum wémiayi. Tura nekarawarain tusa úumak wémiayi. ¹¹ Israer-shuara úuntrjsha námpér irunturmanum eakar “Nu aishmanjsha ¿tuin pujá?” tiarmiayi. ¹² Ashí shuarsha Nin áujmatiararmiayi. Chikich “péjkeraiti” tiarmiayi. Tura chikichcha “Péjkerchaiti. Aya anañkartawai” tiarmiayi. ¹³ Tura Israer-shuara úuntrjín ashamainiak úuk áujmatiararmiayi.

¹⁴ Nampersha ajapén ajasmatai Jesus Yusa Uunt Jeen wayá shuáran unuiniamiaiyi. ¹⁵ Israer-shuara úuntrjsha nuna ísar ti enentáimsar chichaak “Jusha unuimiátrachiatcha ¿itiurak imiá neka?” tiarmiayi.

¹⁶ Jesussha tímiayi “Wi unuiniajna nu winia chichampruchuiti antsu Winia akup-tukua Núnan unuiniajai. ¹⁷ Yus wakerana nuna shuar nekas umiktinian wakerakka winia chichamprun nekaattawai. Nekas Yúsnaikuiinjka, nuna nekaattawai. Aya wi enentáimmiájainj chichaakuisha, nuna nekaattawai. ¹⁸ Ni enentáimmiájai chichaana nuka ashí shiir enentáimtursarti tusa chichaawai. Antsu nin akupka nuna shiir awajserti tusa wakerak, nekas wáitratsuk tawai. ¹⁹ Muisais Yusa akupkamurjín atumí uuntrjín amaschamka. Tuma aijn nu umitsuk mantuatin wakerutarme” tímiayi Jesus.

²⁰ Nu shuarsha tiarmiayi “Wáurtsmek. ¿Ya mantamataj tusa wakera?”

²¹ Jesussha tímiayi “Ayampratin tsawantaj chikichik túramtai ti enentáimtsurmek. ²² Muisais ashí tsupirnaktinian akupkachmiayi. Antsu ni uuntrjínka nuna akupka ániawai. Tuma aijn átumka Muisais akupkamu umiktai tusarum ayampratin tsawantajsha uchi áishmanj tsúpirnaitrume. ²³ Wátsek, Muisais akupkamu uminkiatí tusarum ayampratin tsawantajsha uchi áishmanj tsúpirkurmekaka ¿urukamtaí Wi ayampratin tsawantaj áishmanjka ayashj takamtsuk tsuármataí kajertarum? ²⁴ Shuar túrana nu ísam wárik súmamtikiaawai. Antsu inintrúsam paant nekaam, nekasa nu enentáimtusta” tímiayi Jesus.

Jesus Yúsnumig akupkamuiti

²⁵ Nuyá Jerusarénnumig shuar tiarmiayi “Maatai tuinia núchakait. ²⁶ Tura nuj ashí ántamunam étserei tura suntar páchiniatsui. ¿Ii uuntrjsha “Nekas Kristuiti” tu enentáimtuiniawash? ²⁷ Antsu nekas Kristu taa tuyañ winiá nekanashtatui tura ju pujamuka ashí nékaji” tiarmiayi.

²⁸ Jesus nuna antuk, Yusa Uunt Jeen waja kakaram chichaak tímiayi “Winia nekararum tuyá winiaj nu nékarme. Kame núnisrum enentáimprume. Tura winia enentáirjai táchaitjai antsu winia Apar akuptukuiti. Niisha ti nekas akupniusha átumka nékatsrume. ²⁹ Antsu

Winia akuptukuitkiui *aiya* tau asan Wikia *nekajai*” *tímiayi*. ³⁰ Nuyá *sepunam enkeataj* táyat achikcharmiayi ni tsawantrj *jeachu* asantai. ³¹ Tura untsurj *shuar Nin* enentámtusar “Kristu ta *ɕnuna nankaamas* aentsti *tujintiamun túratpiash?*” *tiarmiayi*.

“Éátkáttarme tura wáitkiashtatume” tímiayi Jesus

³² Pariséusha Israer-patri *úuntrjsha* Jesusnan timian antukar *suntaran* akupkarmiayi Jesusan achikiar *sepunam enkeawarat* tusar. ³³ Nuyá Jesussha *tímiayi* “Aya ishichik tsawant *atumjai* *pujstatjai*. Nuyá ataksha Winia akuptuku *pujana nu* *waketkittiajai*. ³⁴ Átumka *éátkáttarme tura Wi* *wéajna nu* *wéchamniaitkiuram wáitkiashtatume.”*

³⁵ Israer-shuarsha *nuamtak aniniaisarmiayi* “*ɕjusha tu* *wéakuin iisha wáinkiashtataj*. Israer-shuar *apachnium* *pujuinia nu* *we* *apachin unuiniartatuak*. ³⁶ Nii *timia nu* *ituirkit*. “Átumka *éátkáttarme tura Wi* *wéajna nu* *wéchamniaitkiuram wáitkiashtatume” tana nu* *ituirkit?*” *tiarmiayi*.

Yamaram iwiaakman súana nú entsa

³⁷ Jista *amúamunam* ti *shiir najanawarmia* nu *tsawantaj* Jesus *wajaki kakaram chichaak* *tímiayi* “Shuar ni *enentájn* *kitiamakka* Winin *taa umar* *kitiakén imíkráti*. ³⁸ Winia *enentáimturna* *nuka ni* *enentáiya* *entsa wa áintsan* *yamaram iwiaakman súana nú entsa* *jiinkittiwai.”*

³⁹ Nuna *taku* Jesus “Ashí *Yúsan* *enentáimtusarun* *Yusa Shiir* *Wakanj* *súsatniuiti*” *tímiayi*. Tura *núnisan* *Yus-Papiniumsha áarmaiti*. Antsu Jesus *tuke* *nayaimpiniam wéatsajin* *Yusa Wakanj* *shuar súsachmauyayi*.

Shuarsha niisháa niisháa enentáimprarmiania nu

⁴⁰ Chikich *shuarsha* *nuna* *antukar* “Ju *nekas* *Yúsnan* *etserin* *tátinia núiti*” *tiarmiayi*. ⁴¹ Chikichcha “Ju *ka* *nekas* *Kristuiti*” *tiarmiayi*. Tura *chikichkia* Jesus *Kariréanmayaiti* *tu* *enentáimiaiiniak* *tiarmiayi* “Wari, *ɕKariréa nunkanmayá* *Kristu áminkiait?* ⁴² *Yus-Papinium* *paant* *tawai* “Kristuka *yaunchu* *uunt* *akupin* *Tawit weeanmaya* *akiiniatniuiti*, *tawai*. Tura *Tawitia pépruriya* *Pirinnumiá* *átiniaiti*” *tawai*” *tiarmiayi*. ⁴³ Tuma *asantai* *shuar niisháa* *niisháa* *enentáimprar* *kanakiarmiayi*. ⁴⁴ Chikich *aiya* *nuka* “*sepunam enkeatai*” *tiarmiayi* *túrasha túracharmiayi*.

Israer-shuara uuntri Jesusan enentáimtuscharmiania nu

⁴⁵ *Suntarsha* *waketkiarmiayi*. Tura *Pariséusha* *Israer-patri* *uuntrjsha* “*ɕUrukamtai itiachuram?*” *tiarmiayi*.

⁴⁶ *Suntarsha* *tiarmiayi* “Chikichkisha *ju áishman* *chichaa áanis* *chichaschaiti*” *tiarmiayi*.

⁴⁷ Nuyá *Pariséu* *tiarmiayi* “*Átumsha anannarume*. ⁴⁸ *Pariséutisha* *uuntcha* *nuna* *enentáimtuiniawash*. ⁴⁹ *Penké* *shuarka* *yaunchu* *akupkamun* *nekachua* *nuka* *yajauchiniam* *yuminkramu ániawai*” *tiarmiayi*.

⁵⁰ *Nikiuté* *musha*, *kashi* *Jesusan* *tarimia* *nu*, *Pariséuítat* *tímiayi* ⁵¹ “*Ii* *shuartikia*, *shuar* *ni* *túramun* *etserkanu* *ántutsuk* *súmamtikiachminiaiti*” *tímiayi*.

⁵² *Nuin* *kia* *niisha* *tiarmiayi* “*Wats*, *amesha* *Kariréanmayanchuashitiam*. *Yus-Chicham* *áujsam* *nekaattame*. *Kariréanmayá* *Yúsnan* *etserin* *penké* *táiniatsui*” *tiarmiayi*.

Nuwá wáinmakman Jesusan itiararmiiania nu

⁵³ Nuyá *ashí* *ni* *jeen* *waketkiarmiayi*.

8

¹ Tura *Jesuska* *Uriwiu* *náinnium* *wémiayi*. ² Tura *kashin* *tsawar* *Yusa* *Uunt* *Jeen* *atak* *támatai* *ashí* *shuar* *Nin* *káutkarmiayi*. *Túrawarmatai* *Jesus* *pujus* *unuiniarmiayi*. ³ Nuyá *Israer-shuara* *jintinniurjsha* *Pariséusha* *nuwan* *wáinmakman* *Jesusan* *itiararmiayi*. Tura *ashí* *iruntramunam* *ajapén* *awajsarmiayi*. ⁴ Tura *Jesusan* *tiarmiayi* “*Uunta*, *ju* *nuwá* *tsanirma* *pujá* *achinkiyai*. ⁵ *Muisais* *akupkamunmasha* *nuna* *túraka* “*kayajaj* *tukurar* *máatniuiti*” *tawai*. *ɕAmesha* *warintmea?*” *tiarmiayi*. ⁶ Aya *mamikmar* *nekapsatai* *tusar* *tiarmiayi*. *Nin* *sumamtikiatniun* *wakeriarmiayi*.

Nuyá *Jesus* *tsuntsumá* *ni* *uwejéjaj* *nun* *ká* *áarmiayi*. ⁷ Tura *tuke* *iniam* *wajaki* *tímiayi* “*Ayu*, *atumiyá* *tunáa* *túrichu* *áku* *nka* *kayan* *achik* *nin* *emka* *tukuti*” *tímiayi*. ⁸ Tura *nuna* *tj*, *ataksha* *tsuntsumá* *nunká* *ámiayi*.

⁹ Tura *ni* *chichamen* *antukar* *ni* *enentájn* *sumamawar* *úuntnumiá* *jukí* *chikichik* *chikichik* *jiinki* *wéarmiayi*.

Ashí *wéarmatai* *Jesus* *Nin* *ki* *nuwájaj* *juákmiayi*. ¹⁰ *Jesussha* *wajaki* *aya* *nuwan* *nak* *wáiniak* *tímiayi* “*ɕÁmin* *súmamtikramainia* *nusha* *tuinj* *pujuinia*. *Chikichkisha* *áwak?*” *tímiayi*.

¹¹ *Niisha* “*Átsá*, *Uunta*. *Chikichkisha* *atsawai*” *tímiayi*.

Nuyá Jesus tímiayi. “Ayu. Wisha súmamtikiatsjame. Yamaikia weme atakka tunáa túrawaip” tímiayi.

Jesus tsáapninia áintsankete

¹² Ataksha Jesus Yusa Uunt Jeeñ iruntrarun tímiayi “Ju nunkanam Wi tsáapninia áintsan shuara enentáin tsáapnijai. Ashí Wijíaj tsaniñ wekaana nú shuar ni enentáin kiritniunam wekasastatui antsu tsáapnin yamaram iwiaakman súana nujaj wekasattawai.”

¹³ Pariséu nuikia tiarmiayi “Ame péñkerun tau asam támena nu áantrai.”

¹⁴ Jesus tímiayi “Tuyá winiaj tura tui weaj nu nékatsrume, tura Wikia nékajai. Tuma asan winia péñkerun táyatnak tájana nu péñkeraiti. ¹⁵ Ju nunkanmaya aents enentáimmiyaj enentáimtakrum ti súmamtikrume. Tura Wikia chikichkinkesha súmamtiktsujai. ¹⁶ Tura súmamtikiunka awajitsuk túrajai. Iis, Wiki shuar túramun péñkerashit tusan enentáimtsujai antsu winia Apar Wínik akuptukua nusha Wijíaj métek shuar túramun nékawai. ¹⁷ Atumí akupkamuríin áarmaiti: “Jimiará shuar mai nú chichamnak tákuinkia nu chicham nekasaiti.” ¹⁸ Wátsek Wisha winia Aparsha mai métek taji. Winia Aparsha akuptukuíti” tímiayi.

¹⁹ Tutai “¿Ame apasha tui pujá?” tiarmiayi.

Jesusha tímiayi “Átumka Winiasha winia Aparsha nékatsrume. Winia nékarkurmeka winia Aparsha nekaawaintrume.” ²⁰ Nuna Yusa Uunt Jeeñ Yusa kuítrín suinia nuí tímiayi. Tuma aiñ sepunam eñkeatniun achikcharmiayi ni tsawantrí jeachu asamtai.

“Wi wéajna nuí wéchamniaitrume” tímiayi Jesus

²¹ Jesus ataksha tímiayi “Wikia wéajai. Atumsha eátkáttarme tura wi wéamunam wéchamniaitkiuram atumí tunaarjijaiñ jakattarme.”

²² Israer-shuarsha tiarmiayi “Wi wéamunam wéchamniaitrume” tutai, nuñkia máamatpiash” tiarmiayi.

²³ Nuñkia Jesus tímiayi “Átumka nunkayáitrume antsu Wikia nayaimpinmayaitjai. Ju nunkayáitrume tura Wikia juyanchuitjai. ²⁴ Tuma asamtai tájarme “Atumí tunaarjijaiñ jakattarme.” Nekas Wí tájana núitjai. Tura nu enentáimtachkurmeka atumí tunaarjijaiñ jakattarme” tímiayi.

²⁵ Niisha aniasarmiayi “¿Amesha yáitiam?”

Jesusha tímiayi “Yaunchu tájarme. ²⁶ Nu arantcha atumin súmamtikiatjarum tusan ti tímíniaitjai. Winia Apar akuptukua nuka tuke nekas nuna tawai. Tura aya ni taman antukan ashí shuaran nunak taji” tímiayi. ²⁷ Tuma aiñ ni Aparín áujmatman penké nekaacharmiayi. ²⁸ Tuma asamtai tímiayi “Aents Ajasuitjiana ju, numíniám ajntruuarum yakí takuriakrumin nújainkia nekarattarme. Wi tájana núitjai tura winia enentáirjaiñ takatsuk aya winia Apar unuíturmanak tájai. ²⁹ Winia akuptukua nuka tuke Wijíajaiñ pujawai. Winia Apar wakeramun tuke shiir túrakui ikiurkichiiti” tímiayi. ³⁰ Tutai untsurí shuar Nin nekas enentáimtusarmiayi.

Yus-shuarsha tura tunaanum emetamusha

³¹ Israer-shuaran Nin shiir enentáimtusarmia nuna Jesus tímiayi “Wi tájarmena nu yawetsuk túrakurmeka nekas winia unuiniamur átatrume. ³² Nújajisha timiá nekas ana nu nekaattarme tura nekas ankant ajastatrume” tímiayi.

³³ Niisha tiarmiayi “Iisha Apraám weeitji. Chikicha takarniur átai tusar penké emetach-maitji. ¿Urukamtai “Ankant ajastatrume” tame?” tiarmiayi.

³⁴ Jesus tímiayi “Timiá nekasaiti, ashí shuar tunaan túruinia nuka nu tunaajaj emetamuiti. Tuma asa takarniua núnisaj ajasuiti. ³⁵ Takarniusha ajapnamnia asamtai Yus atumin ajapramanniaitrume. Tura Akupniu Uchirínkia ni Aparíjajai tuke pujawai. ³⁶ Tuma asam-tai Akupniu Uchirí ankant awajitamsamtainkia imiá nekas ankant pujustatrume. ³⁷ Átum Apraám weeitrume nékajai. Túmaitiatrum winia chichamur ántachu asarum mantuataj tárume. ³⁸ Winia Apar iniaiktursamun áujmatjai. Átumka atumí uuntrí timia túrarme” tímiayi.

³⁹ Tutai niisha tiarmiayi “Iikia Israer-shuar asakrin ii úuntrínkia Apraámaiti” tiarmiayi.

Tura Jesus tímiayi “Nekas enentáimin Apraám weeitkiurmeka níya núnis túrawaintrume. ⁴⁰ Nekas ana nuna Yus iniaiktursamtai nuna ujakjarme, tuma ajñ mantuataj tarume. Apraámka nuní túrachmiayi. ⁴¹ Antsu atumí uuntrí túrana áintsarum túrarme” tímiayi.

Tutai niisha tiarmiayi “Warí, tsanirnumiá akiiniachuitji. Ii uuntrí Yúskete. Niisha ii Aparínti.”

⁴² Tura Jesus tímiayi “Yus nekas atumí Aparíntkiuinkia Winiasha anentíntrume Yúsnumiá tau asamtai. Wisha winia enentáimmiarjaiñ juí táchaitjai antsu Yus akuptukuíti. ⁴³ ¿Urukamtai Wi tájana nu imiá nékatsrum? Wi tájana nu nakitia asarum winia chichamur ántatsrume. ⁴⁴ Atumí aparínkia úunt iwianchiiti. Tura niiniu asarum nii wakera nu túrarme. Yámankamtaiksha úunt iwianchkia tuke mankartiniaiti. Nekas ana nunasha nakitiawai tuke wáitrin asa. Wáitraksha níniunak chichaawai. Iis, waitia uuntrí asa tuke wáitriniaiti. ⁴⁵ Tura

Wikia nekas takui átum enentáimtursume. ⁴⁶ ¿Yaki chikichkí tunaajají súmamtikruamniait? Nuikia Wi nekas nuna tau aisha ¿urukamtaí enentáimtursum? ⁴⁷ Yús-shuarka Yus tímian ántawai tura átum Yúsnachu asarum Wi tájana nu nakitiarme” tímiayi.

Apraám akiintsajin Jesus pujumiayi

⁴⁸ Nuikia Israer-shuar tiarmiayi “Maa, ti nekas tátsujik “Ame Samarianmaya shuáraitme. Tuke yajauch ániawai nusha. Nu arantcha iwianchrukuitme amesha” nekas taji” tiarmiayi.

⁴⁹ Jesussha tímiayi “Iwianchrukchaitjai. Áyatik winia Aparun shiir enentáimtikiajai. Tura átumka yajauch chichartarme. ⁵⁰ Wikia “shiir enentáimturarti” tátsujají túrasha Yuska ashí shuar Winia shiir enentáimturat tusa wakerawai. Niisha Yus asa ashí shuar túramun péñkerashit tusa nekaattawai. ⁵¹ Ti nekasaiti. Wi tájana nuna enentáimta nú shuarka penké jákashitiniati” tímiayi.

⁵² Nuinkia Israer-shuar tiarmiayi “Pai, yamaikia ti paant íwianch takakme. Apraámsha ashí Yúsnan etserniusha jákaruítí tura Ame “Wi tájana nuna enentáimtaka penké jákashitiniati” tátsumek tiarmiayi. ⁵³ ¿Nuinkia ii uuntrj Apraám nankaamaskaitiam. Niisha tura Yúsnan etserniusha jákacharuk ánia. Itiurak imiá nankaamantu enentáimtumam?” tiarmiayi.

⁵⁴ Jesussha tímiayi “Wiki shiir enentáimtumaknaka penké áantrai. Antsu Winia shiir enentáimturna nu winia Aparuítí. Nusha átumka “winia Yúsrúiti” tárumna núiti. ⁵⁵ Nusha táyatrum Nin nékatsrume. Wikia Nin nékajai. “Nin nékatsjai” tákunka atumjají métek wáitrin áintjai. Tura Nin neka asan Nii tana nuna tuke túriniaitjai. ⁵⁶ Apraámka, atumí uuntrj, imiá yaunchu jákaitiat Wi ju nunkanam tátinian wararas nákasmiayi. Tura wáitiak ti shiir warartusmiayi” tímiayi.

⁵⁷ Nuyá Israer-shuar Jesusan tiarmiayi “Warí, senkuenta (50) uwí takaktsume túmaitiatam Apraám wáinkiamjai tame.”

⁵⁸ Jesussha tímiayi “Ti nekas tájarme, Apraámka pujatsajin Wikia pujajai” tímiayi Jesus.

⁵⁹ Nuna takui kayan achikiar “Jesusan tukutai” tiarmiayi. Tura Jesus úumak ni matsatmanum ajapénin weak Yusa Uunt Jeeniá jiinki wémiayi.

9

Kusuru akiinian Jesus tsuármiania nu

¹ Jesus ni unuiniamurjijají wesa áishmankan kusuru akiinian wáinkiamiayi. ² Ni unuini-amurjisha aniasarmiayi “Uunta, jusha ¿urukamtaí kusuru akiiniawit. Yana tunaarjijajin kusuru akiiniait. Niiniujajimpiash, aparjiniujajimpiash túrunawit?” tiarmiayi.

³ Jesus tímiayi “Ni tunaarjijajinchusha ni aparjiniujajinchusha túrunaiti. Antsu Yus ni ayashin túratniau nu paant atí tusa túrunaiti. ⁴ Tsawajikia takastiniati. Yamaikia Winia akuptukua nuna takatrin túratniuitjai. Kashi ajasmataí takastin atsuttawai. ⁵ Jú nunkanam pujakun shuara enentáin tsáapnimitkratniuitjai” tímiayi. ⁶ Nuna chichas nunká usukmi nunkajají pachimiar kusuru jin yakarmiayi. ⁷ Nuyá chichaak “Siruí pajamtaí entsanam nijiamauta” tímiayi. Siruísha nu chichamnum “akupkamu” tawai. Kusurusha we nijiamar péñker ímiar támiayi.

⁸ Nuyá ni írutkamurjisha nuik wáinin ármia nusha tiarmiayi “Juka pujus tuke kuítian seamniyuwa núchakait.” ⁹ Chikich “Ee, núkete” tiarmiayi. Chikichcha “Atsá, núchaiti; kame nuash tumainti” tiarmiayi.

Tura niníki “Ee, wiitjai” tímiayi.

¹⁰ Tutai aniiniak “¿Itiurak yamaikia ímiam?” tiarmiayi.

¹¹ Niisha tímiayi “Áishman Jesusa nu tsakusan jirun yakartur “Siruí pajamtaí entsanam nijiamauta” turutmiai. Takui wena nijiamaran paant iimpranjai” tímiayi.

¹² Tutai “Nu áishmansha tuin pujá” tiarmiayi.

Niisha “Cha, nékatsjai” tímiayi.

Pariséu kusuru tsuáрман inintrusarmiania nu

¹³ Nuyá kusuru tsuáрман Paríséunam júkiarmiayi. ¹⁴ Kame Jesus kusurun tsuarmia nuj ayampratin tsawantauyayi. ¹⁵ Tuma asamtaí Paríséusha itiurak ímniun tusar aniasarmiayi.

Niisha tímiayi “Jiruín tsakusan yakaarámtai, nijiamaran paant iimjiai.”

¹⁶ Nuyá chikich Paríséu shuarnumiá nuamtak tunaiyar “Juna tsuáruka Yúsajyanchuiti. Kame ayampratin tsawantají túraiti” tiarmiayi.

Tura chikichcha “Tunáa shuaraitkiuinjia júnisan túratniun tujinkiaayi” tiarmiayi. Nujají akannaikiarmiayi.

¹⁷ Tsuármiancha ataksha aniasarmiayi “Ámin tsuármianu nu ¿warí enentáimtam?” tiarmiayi.

Tutai “Wikia “Yúsnan etserniuiti” tajai” tímiayi.

¹⁸ Tura Israer-shuar nekas kusuruitiat yamá ímiui tu enentáimtuscharmiayi Pariseu. Tuma ásar ni aparíncha untsukar ¹⁹ inintrusarmiayi “¿Ame uchiram kusuru akiinia tárumna nukait. Itiurak yamaikia íimia?” tiarmiayi.

²⁰ Ni aparísha tiarmiayi “Íi uchirínkia kusuru akiiniana nu nékaji. ²¹ Tura iisha nékatsji itiurak yamaikia íimia. ¿Yátsuk péñker tsuáruit? Niisha úntchakait, níi aniastarum. Niñki ujatmakarti” tiarmiayi. ²² Sapijmiak tiarmiayi. Israer-shuara úuntrínkia “Jesus Yus akupkamu asa nekas Krístuiti” tuinia núnaka Israer-shuara iruntainmaya jíkí akupnakti tiniu ásar matai tsuarma aparí ashankarmiayi. ²³ Nu asamtai ni aparí “Niisha úntchakait, níi aniastarum” tiarmiayi.

²⁴ Nuínkia Israer-shuara uuntri kusuru tsuárman ataksha untsuk tiarmiayi “Yus íimianum nekasa nu titiá, ju áishmanñka tunaarinniuiti nékaji” tiarmiayi.

²⁵ Tutai tímiayi “Kame tunaarinchashit. Nékatjsai. Antsu junak nékajai. Yaunchu kusuruítian yamaikia íimjiai.”

²⁶ Ataksha aniiniak “¿Ítiurtámka. Itiur íimtikrammia?” tiarmiayi.

²⁷ Niisha tímiayi “Yaunchu tájarme tura anturtatsrume. ¿Urukamta ataksha titi tusa wakerarum. Niiniu ajastin enentáimprumek?” tímiayi.

²⁸ Nuínkia katsekkar “Ámeka ní shuarínme. Tura iikia Muisaisa shuarínñi, tiarmiayi.

²⁹ Yus Muisaisan akupkaiti iikia nékaji antsu nu áishman nékatsji. ¿Tuyantskait?” tiarmiayi.

³⁰ Áishman tsuarma tímiayi “¿Ausha itiurtsuk áminiait? Winia íimtikruma nu átumka nékatrume tuyañkit. ³¹ Paant nékaji tunaarinniun Yus anturtsui. Tikishmatar ni wakeramun túruinia nunak anturui. ³² Yáunchusha kusuru akiinian tsuárka tuke atsuwaiti. ³³ Ju áishman Yúsaiyanchuítikunka penké túracháayi” tímiayi.

³⁴ Nuínkia tiarmiayi “Ámeka tunaarintin akiiniaiatmesha ¿in jintintin átaj tamek?” Nuna tiar jíkí awemarmiayi.

Wakanñin kusurua nu

³⁵ Kusuru tsuárman jíkí awemarma nuna Jesus nekaamiayi. Tura wáiniak “Yusa Uchiría nu enentáimtamek” tímiayi.

³⁶ Tsuarma tímiayi “Uunta, turuttia wisha nekaan enentáimtustaj.”

³⁷ Jesussha tímiayi “Wainme. Wiitjai ámjijai chichaaajna nu.”

³⁸ Tutai, tikishmatar “Uunta, enentáimtajme” Jesusan tímiayi.

³⁹ Nuyá Jesus tímiayi “Shuara enentáin nekaan, akantratajtsan táwitjai. Ni enentáin kusuru ajñ íimtikinian tura anañmamuk “Yusnan nekaan paant íimjiai” tana nuna ukusturtinian táwitjai” tímiayi.

⁴⁰ Tutai Pariséu shuar nuñ pujuarmia nu nuna antukar “¿Nuínkia iikia kusurukaitaj?” tiarmiayi.

⁴¹ Jesussha tímiayi “Átum kusuruítkiurmeka atumí tunaari wáinchakrum sumamachu áintrume. Tura “paant íimjiai” tau asarum sumamaitrume” tímiayi.

10

Iikia murikiua áintsar aji

¹ Jesus tímiayi “Wí tájana nu ti nekasaiti. Shuar murikiun takakna nu ni murikrñ wenuimiunam kashi íkiuawai. Tura murik wenuimiunam pujuiniakui yajauch shuar murikiun kasamkatniun wakerakka wáitiniam wayachmin asa tanishnum waruk yajá wayawainti. ² Antsu murikiu wáinniuka wáitiniam wayawawai. ³ Waiti wáinniuka nekas murikiun wáinniun wáitin uratui. Muriksha ni wáinniurí chichamen nékainiawai. Niisha ashí ni murikrñ chikichik chikichik náarñ anaitius untsúawai. Tura tsawakia ni murikrñ jíkí ayurtainiam yarumui. ⁴ Tura ashí ni murikrñ jñir émtuki wéawai. Muriksha ni chichamen ántuiniak untsuam nesarainiawai. ⁵ Chikich shuárnaka nékachu ásar nesarainiatsui. Antsu ni chichamen nékainiachu ásar pisainiawai. ⁶ Nu métek-taku chichamnaka Jesus áujmatsamiayi tura shuar antukar nekaacharmiayi.

Pénker wáinniuka Jesusaiti

⁷ Nuyá Jesus tímiayi “Ti nekasan tájarme. Wenuimiu wáitirj murik wainia nuka Wiitjai. Shuarsha murikiu áintsar Wini wayamin áiniawai. ⁸ Wí táatsajñ ashí táruka kasa ániak winia shuarun kasamkatai tusa wakeriarmiayi. Tura winia murikiur Wí shuar ániak nu shuaran anturkacharmiayi. ⁹ Wikia wáititjai. Ashí Winin wayaaka uwemprattawai. Tura murikiua áintsan wenuimiunmaya jñinki péñker yurumáttawai tura atak wayá ayamprat-tawai” tímiayi.

¹⁰ Kásaka aya kasamkatniuncha máatniuncha emesratniuncha wakerawai. Antsu Wikia yamaram iwiaakman tuke shiir atsumtsuk takusarti tusan táwitjai. ¹¹ Wikia péñker

wáinniiutjai. Péñker wáinniuka ni murikrĭn uwentikrartaj tusa jakattawai. ¹² Antsu aya kuitjai takauka ni murikrĭchu ániakui tura nekas wáinniuchu asa péñker wáintsui. Kame uunt yawá winiakui murikiun ikiuki pisaawai. Uunt yawasha murikiun achik tsakiñmawai. ¹³ Nu shuarsha akikiam takáa asa murikiun enentáimatsui. Nu asamtai aya pisaawai' tĭmiayi.

¹⁴⁻¹⁵ 'Wikia péñker wáinniiutjai. Winia Aparsha nékarui. Wisha Aparun nékajai. Núnisnak murikrun nékajai tura winia murikrusha nékarui. Wisha murikiun uwentikrartaj tusan jakattajai. ¹⁶ Chĭkich muriknasha takakjai. Nusha jĭ wenuimunnmayanchu ániawai. Nunasha itiattajai. Nu muriksha Winia umirtukar ashí métek matsamsar chĭkichĭk wenuimunnmayá ajasartatui tura chĭkichĭk wáinin átatui' tĭmiayi.

¹⁷ 'Winia murikrun uwentikrartaj tusan jakattajai turan atak nantaktiatjai. Nu asamtai winia Apar anentui. ¹⁸ Wi wakerakun jakattajai. Wi wakerachkuinĭkia chĭkichĭkia mantuachminĭaiti. Jákatniuncha tura nantaktinnishashash winia Apar surusuiti" tĭmiayi Jesus.

¹⁹ Israer-shuarsha nuna antukar niisháa enentáimprar kanakiarmiayi. ²⁰ Untsurĭ tiarmiayi "¿Urukamtai ántarum wáuruk tausha. Yajauch wakanin takaktsuk?" ²¹ Tura chĭkichĭcha tiarmiayi "¿Yajauch wakantrinniusha núnisan chichasminkĭait. Yajauch wakantrinniusha kusurun ĭmtikramniashit?" tiarmiayi.

Israer-shuarsha Jesusan nakitiarmiiania nu

²² Micha nantutin Israer-shuar Jerusaréñnum namperan najanainiawai. Nu nampernumsha Yusa Uunt Jee atak jeamman enentáimtuiniawai. ²³ Jesussha Yusa Uunt Jee áachĭniam wekasamiayi Sarumúnĭka wáitirja nui.

²⁴ Israer-shuarsha Nin téntakar tiarmiayi "¿Ame nekas Kristukaitiam? Jĭ chichamaik etserkata. ¿Urukamtia nekas paant tátsum?" tiarmiayi.

²⁵ Tutai Jesus tĭmiayi "Yaunchu tiniu ajñ enentáimturachmarme. Winia Apar akupkamun takaaĭna nu ti paant awajtawai. ²⁶ Tura átumka winia murikruchu asarum enentáimturtsurme. ²⁷ Wisha winia murikrun uitsuam anturtuiniak nemartuiniawai. Wisha wĭnianak mash nékajai. ²⁸ Tura yamaram iwiaakman tuke jákashĭnĭan súajai. Nu asamtai niisha menĭkakachartatui antsu Wi waĭnĭka asamtai ¿yaki jurutkit? ²⁹ Winia Apar murikiun surusuiti. Niisha ashí nanĭkaamas kakaram asamtai ¿yaki uwejéyan atankit? ³⁰ Wisha winia Aparjai iisha aya chĭkichĭkĭitji" tĭmiayi Jesus.

³¹ Tutai Israer-shuarsha atak kayan achĭkiar tukutaj tiarmiayi.

³² Jesussha tĭmiayi "Winia Aparu kakarmarijĭai ti untsurĭ péñkera nuna takasuitjai. ¿Tújajĭmpia mantuattarum?"

³³ Israer-shuarsha Nin tiarmiayi "Péñker túra asakmin máataj tátsuji antsu Yus yajauch chĭcharkumin túrattajai. Ámeĭka shuárĭaitiam Yusa nuke enentáimtumame" tiarmiayi.

³⁴ Nuyá Jesussha tĭmiayi "Atumĭ akupeamurĭin Yus timia nu áarmaiti: "Átum yúsaitrume" tawai. ³⁵ Kame Yus-Papĭnium aarma nu tuke nekaschakait. Tuma asamtai ni chichamen antukarun Yuska "yúsaitrume" takui nuĭkia ti nekaschakait. ³⁶ Niisha yúsaitkuinĭkia nuĭkia Yus Apa anaĭkia jĭ nunĭkanam akupkamu asan ti nekas Yúschakaitĭaj. Nújajĭnĭka wi "Yusa Uchĭrĭntjai" takui ¿itĭurak "Yusan yajauch chĭcharui" túrutrum? ³⁷ Winia Apar túramu túrachkuinĭkia enentáimturtsairap. ³⁸ Tura nekas túrakuinĭkia enentáimturtsatarum. Tura Winia nakitrakrumsha nuĭkia wi túramu enentáimturstarum. Nujajĭnĭka winia Apar Winin pujamu ashí nekaattarme. Núnisnak Wisha Nĭin pujajai. Iisha chĭkichĭkĭitji." ³⁹ Tutai ataksha sepunan enĭkeatai tiarmiayi. Túrusha Jesus uwempramiayi.

⁴⁰ Nuyá Jesus Jurtañ entsa amain wé yaunchu Juan ĭmiakrattainium pujusmiayi. ⁴¹ Ti untsurĭ shuar iyuwar tiarmiayi "Nekas Juanĭka aentsti tujintiamun túrachiat ashí Jesusan timia nu nekasaiti" tu tiarmiayi. ⁴² Nuĭsha untsurĭ Jesusan enentáimtusarmiayi.

11

Rásaru jakamu

¹ Petania péprunam áishmag, ni naarĭ Rásaru, jaa pujumiayi. Nu péprunam Marĭ ni kajĭjai Mártaĭjai pujumiayi. ² Niisha Rásaru umai ármiayi. Nu Marisha ukunmanĭka kunĭkuinĭan sumak Jesusan kuer ni ĭntiashĭjĭajĭ japirmiayi. ³ Tura Rásaru jaakuĭ ni umaj Jesusan chichaman akuptuiniak tiarmiayi "Uunta, ame amikrum jaawai."

⁴ Jesussha nuna antuk tĭmiayi "Tuke jakataj tusa jaatsui. Antsu Yusa kakarmariĭsha tura ni Uchĭrĭ kakarmariĭsha jĭ sunĭkur tsuármanum paant atí tusa jaawai." ⁵ Jesus Mártañcha ni kajĭncha tura ni umaj Rásarunĭcha nekas aneemiayi. ⁶ Túmaitiat Rásaru jaawai taman antukiat ni pujamunam jimiará tsawant pujusmiayi. ⁷ Nuyá ni unuiniamurĭin "Ataksha Jutĭa nunĭkanam wetáĭ" tĭmiayi.

⁸ Tura ni unuiniamurĭisha tiarmiayi "Uunta, nuĭksha Israer-shuar kayajĭ tukurmar mantamatai tĭcharmaka. ¿Nuj ataksha wétai támek?"

⁹ Jesussha ju métek-taku chichaman tímiayi “Tsawajkia páantchakait. Tsawaj wekaana nu paant asamtai tukumkashtatui. ¹⁰ Tura kashi wekaana nusha kirit asamtai tukumkáttawai. Núnisan Wíi tuke pujakun winia takatrun takastiniaitjai. Túraknasha iturchatan wáinkiashtatjai.” ¹¹ Nuyásha Jesus atak tímiayi “Ti amikri Rásaru kanarai. Wi ishintiartatjai.”

¹² Tutai ni unuiniamurj tiarmiayi “Uunta, aya kanarka nuñkia péñker ajastatui.” ¹³ Jesuska Rásaru jakamu nékayat “kanarai” tímiayi. Tura ni unuiniamurj Rásaru kajinmakua áintsan kanarai enentáimprarmiayi.

¹⁴ Jesus nuikia ti paant tímiayi “Rásaru yamaikia jakayi. ¹⁵ Tura nuj pujuscha asan kúntuts pujatsjai. Jean túrattajna nu íisrum ti nekas enentáimtusattarme. Nuna nekaan shiir enentáimjai. Wátsek, iyutai.” ¹⁶ Nuyá Jimiampramu Tumas chíkich unuiniamurj nuj armia nuna “Iisha weri Niijjai métek jakatai” tímiayi.

Iwiaaku átiniaasha jaka nantaktinniasha Jesus nérenniuiti

¹⁷ Nuñ taa, Rásarun kuatru tsawant ikusman wáinkiamiayi. ¹⁸ Petania pépruka Jerusarénnumia menaintiú kirumitru áinis tíjiuchiiti. ¹⁹ Tuma asamtai untsurj Israer-shuar Mártaasha Marísha, ni umaj jakamtai uutkui atsankratay tusa weriarmiayi. ²⁰ Mártaasha Jesus tíjiuch ajasun nekáa inkiuntajtsa wémiayi. Antsu Marikia jeá pujumiayi. ²¹ Tura Marta Jesusan inkiun tímiayi “Uunta, Ame pujakminkia winia umar jákachaayi. ²² Tura tuke nekajai ashí Yus seamna nuna súramui.”

²³ Jesussha tímiayi “Ame umaimisha nantaktiatui.”

²⁴ Mártaasha tímiayi “Nekas, ashí amuamunam jákaru nantaktin tsawantaj nantaktiatui. Nuna nekajai.”

²⁵ Nuyá Jesus tímiayi “Iwiaaku átinia nérentin asan Wikia iniantkartiniaitjai. Winia enentáimturna nuka jakasha nantaktiatui. ²⁶ Tura ashí iwiaaku pujana nusha Winia enentáimturaka penke jákashtatui. ¿Nu nekasaiti tu enentáimtakek?”

²⁷ Niisha “Ee, Uunta, ame Yusa Uchirinme. Kristuítme, uwemtikkiartin ju nuñkanam tátinia nu” tímiayi.

Jesus Rásaru iwiansamunam taa útmiانيا nu

²⁸ Mártaasha nuna tí, ni kaj Marin untsuk úñkan tímiayi “Uunt juñ taa untsurmawai.” ²⁹ Marisha nuna antuk wárik wajaki Jesusa iyuttsa wémiayi. ³⁰ Jesussha péprunam jeatsuk Marta inkiunmanum pujumiayi. ³¹ Marí wari wajaki wématai Israer-shuar nu jeanam atsankratssa pujuiniasha nuna íisar weriarmiayi. Iwiansamunam úttiasa wéatsush tusa weriarmiayi. ³² Marisha Jesus pujamunam jeá tikishmatar tímiayi “Uunta, Ame pujakminkia winia umar jákachaayi.”

³³ Jesussha Maríncha tura niijjai útuncha wáiniak wáitnentaimta asa ti kúntuts pujusmiayi.

³⁴ Tura “Tuj iwiansamarum” tímiayi.

Niisha “Uunta, itia” tiarmiayi.

³⁵ Jesussha útmiayi. ³⁶ Israer-shuarsha “Ti aneatsuk” tiarmiayi. ³⁷ Tura chíkich “Kusuru tsuaruchukait. Nii pujakuisha Rásaru jákaampiash” tiarmiayi.

Rásaru iniantkimiu

³⁸ Jesussha ti kúntuts enentáimiar iwiansamunam weakámiayi. Náinnium asa paka taurna áuyayi. Tura kaya atutkamuyayi. ³⁹ Tura Jesus “Kaya jurustarum” tímiayi.

Rásaru umaj Marta tímiayi “Uunta, kuatru tsawant jákai. Mejeatsuk” tímiayi.

⁴⁰ Tura Jesus tímiayi “Yus enentáimtakme Yusa kakarmari wáinkiatame tíchamkajam.” ⁴¹ Nuikia kayarin uratiarmatai Jesus nayaimpin iis tímiayi “Apari, Winia anturtakmin yuñsajme. ⁴² Winiaasha tuke anturtame tura ju shuaran péñker enentáimtikratay tusan tajai. Ame akuptukuitmena nuna nekarmawarti.” ⁴³ Nuna tinia kakaram untsuk “Rásaru jíinkitia” tímiayi. ⁴⁴ Nujainkia penuarmartiuk jíinkimiayi. Yapinmasha jaanchjiai ijiamuyayi. Tura Jesus “Atirtarum. Wéti” tímiayi.

Jesusan achiktin chichaman jurusarmiania nu

(Mateu 26.1-5; Márkus 14.1-2; Rúkas 22.1-2)

⁴⁵ Untsurj Israer-shuar Marin nemariaru Jesus túramun íisar enentáimtusarmiayi. ⁴⁶ Tura chíkichkia Paríséunam wear Jesus túramun ujakarmiayi. ⁴⁷ Nuna antukar Paríséusha Israer-patri úuntriasha ashí naamka uunt armia nujai iruntrar tiarmiayi “¿Wari ituirkamniait? Nu shuarka aentsti tujintiamun ti túratsuk. ⁴⁸ Aya júnik iniaiyakrinkia ashí shuar Nin enentáimtuschartatuak. Nuyá Rúmanmaya apach taar mesetan najanawartatui tura in amutmakar Yusa Uunt Jeencha emesrartatui.”

⁴⁹ Nu uwitin Kaipias Israer-patri uuntriayi. Niisha tímiayi “Átumka nékatsrume. ⁵⁰ ¿Ashí Israer-shuar mesertin péñkerkai. Antsu aya chíkichik shuar jákatin péñkerchakait?” tímiayi. ⁵¹ Kaipiaska aya ni enentáimmiájai tíchamiayi. Antsu nu uwitin Israer-patri

uuntri asamtai Yus nuna enentáimtikramiayi. Nújainkia Israer-shuar Jesus jaruktinian ujakmiayi. ⁵² Tura aya Israer-shuarnakcha antsu niijjaisha ashí nunkanam Yus-shuar ajasarun irurajtsta jákatniuyi. ⁵³ Tuma asamtai nu tsawantiniñ Israer-shuara uuntri Jesus máatai tusar áujmatsarmiayi.

⁵⁴ Nu asamtai Jesus paant wantiniak Israer-shuarnum wekaichmiayi. Antsu Jutía nunkanmaya jinki atsamu nunkanam Eprain pepru tjiyuch wémiayi. Tura nuj pujusmiayi ni unuiniamurijjai.

⁵⁵ Israer-shuara namperj paskua ishichik jatemsamtai untsurj shuar yajá péprunmaya Jerusarénum káunkarmiayi. Kame paskua jeatsain Muisais timia núnisañ ni ayashísha enentáisha iwiarnarat tusa wakermiayi. ⁵⁶ Jesusnasha eak yujarmiayi. Tura Yusa Uunt Jeen pujusar nuamtak aniniaisar “¿Warí enentáimiam. Jístanam tatimpiash?” tiarmiayi. ⁵⁷ Pariséusha Israer-patri uuntriha akupainiak “Jesus pujá nekaamka ujakkata” tiarmiayi. Jesusan sepunam enkeatai tusar tiarmiayi.

12

Marí Jesusan kunkuinian kuérmiana nu

(Mateu 26.6-13; Márkus 14.3-9)

¹ Paskua jisat jeatin sais tsawant ajasmatai Jesus Petania péprunam wémiayi. Jesus jakamunmaya iniantkimia nú Rásaru nuñ pujumiayi. ² Jesus jeamta ayurawarmiayi. Rásarusha niijjai yurumkan iwiasmakmiayi. ³ Tura Marikia kunkuinian ti kuitjai ritru ajapén sumak itiamiayi. Tura Jesusa nawen kuer ni intiashijjai japirmiayi. Jeasha nu kunkuinjai ti shiir kunkunmiayi. ⁴ Jutas Iskariúti, Semunka uchirí, nuj pujumiayi. Niisha Jesusa unuiniamurintiat ukunam Jesusan surukmiayi máawarat tusa. Niisha tímiayi ⁵ “¿Urukamtaí nu kunkuinian ti kuitjai surukchama kuítrinchán súsatniun?” ⁶ Kame kuítrinchán enentáimtak tíchamiayi. Antsu unuiniamu kuítrin wainkia asa yúpichuch kasamkamniuyayi. Tuma asa nuna tímiayi.

⁷ Tura Jesus tímiayi “Iniaisata. Wi iwiarnakui kuératniun sumak ikiurtusúiti. ⁸ Kuítrinchá tuke atumjai íruntzuk. Antsu Wikia atumjai tuke pujuschattajai” tímiayi.

Rásaruncha máataj tiarmiana nu

⁹ Israer-shuarsha Jesus Petania péprunam pujan antukar Jesus ístaitsar weriarmiayi. Rásaruncha Jesus jakamunmaya iniantkimia nusha iyutai tusar wearmiayi. ¹⁰ Túramtai Israer-patri uuntriñkia chichaman jurusarmiayi Rásaru maatai tusar. ¹¹ Untsurj Israer-shuar Rásaru iniantkimium nekaawar Israer-patrin ikiukiar Jesusan enentáimtusarmiayi. Túrawarmatai Rásaruncha máatniun wakerukarmiayi.

Jesus Jerusarénum shiir wayqmiana nu

(Mateu 21.1-11; Márkus 11.1-11; Rúkas 19.28-40)

¹² Paskua namperan pachiiintuktajsta ti untsurj shuar Jerusarénum wearmiayi. Kashin tsawar Jesus nú peprunam tátinian nekaawarmiayi. ¹³ Niisha tintiuki nuké áinis nukan júurar Jesusan inkiuntai tusar jinkiarmiayi. Túrawar untsumainiak “Shiir tati, tiarmiayi. Yusa kakarmarjijjai winiana nu tí péñkeraiti. Israer-shuara uuntri asa shiir atí” tu untsumiarmiayi. ¹⁴ Jesussha umpuurun wáiniak entsamkamai. Núnisañ áarmaiti Yus-Chichannum:

¹⁵ “Seuñ péprunmaya shuara, ashamkairap. Atumí Akupniurj umpuurunam entsamak winiwai.”

¹⁶ Nu chichamaik Jesusa unuiniamurj nu túrunamun nekaacharmiayi. Tura ukunam Jesus nayaimpiniam shiir waketkimtai enentáimprarmiayi. Ashí Jesusna aarma núnisañ túrunamiayi.

¹⁷ Jesus Rásaru iwiarsamunmaya iniantkimium wáinkiarua nú shuar nuna áujmatarmiayi. ¹⁸ Tuma asamtai shuar Jesus nu tujintiamun túramtai nekaawar Jesusan inkiunktaj tusar jinkiarmiayi. ¹⁹ Tura Pariséusha nuamtak tiarmiayi “Íis, penké tujinkiaji. Maa iista, ashí shuar Nin nemarainiatsuk.”

Kriaku apach Jesusjai chichastinian wakermiana nu

²⁰ Paskua nampernum Yus shiir awajsatniun Jerusarénum weriaruka untsurj nunkanmaya shuar ármiai. Kriaku apachcha ármiai. ²¹ Niisha jiripin weantukarmiayi. Kame nu jiripi Petsaitia péprunmayauyayi. Petsaitia péprusha Kariréa nunkanam awai. Nincha Kriaku apach seainiak “Uunta, Jesusjai chichastaitsar wakeraji” tiarmiayi. ²² Jiripisha Antresan werí ujakmiayi. Nuyá niijjai métek tsaninkiar Jesusan weriar ujakarmiayi.

²³ Jesussha tímiayi “Wi Aents Ajasuitjiana ju tsawantur jeayi. Túramtai shiir awájnátatjai. ²⁴ Wí tájana nu ti nekasaiti. Jínkiaia ántsanketjai. Araachmaka ninji pujatsuk. Antsu

araamka tsapain jinkiaichirij kaushmariat nerek ti untsurj ajatsuk. Núnisnak Wi jakam-tai ti untsurj shuar yamaram iwiaakman takusartatui. ²⁵ Shuarsha jinkiaia nuke aya ju nunkanam pénger pujustinian enentáimkiungka ántar pujak nekas iwiaakmarin emenkkattatui. Tura ju nunkanam pénger pujustinian enentáimtsuk jákatniuncha asham-chaá nú shuarka nekas iwiaakman wáiniak tuke iwiaaku átatui. ²⁶ Shuar winia átaj takungka nemartusti. Túraŋka Wi pujajna nuj Wíi shuar tuke átatui. Núnisaŋ Wíi shuar winia takatrun takáa nuna winia Aparsha shiir enentáimtusatui⁷ tímiayi.

Jesus ni jákatniun étserui

²⁷ Yamaikia enentáiruuj ti itiurchat pujajai. ¿Warittiajak. “Aparu, ju túrunatniunmaya uwemtikrurta” titiajash? Antsu ju túrunatniun táwitjai. ²⁸ Aparu, wi túramujai ashí shuar ame náarmin shiir enentáimturarti⁸ tímiayi Jesus.

Tutai nayaimpinmaja chichaman antukarmiayi. “Winia náarun shiir awajsattajai tura ataksha shiir awajsattajai” tímiayi.

²⁹ Shuarsha nui pujuinia “ipiamtachuashit” tiarmiayi. Tura chikichcha “Nayaimpin-maya suntar Nin chichasai” tiarmiayi.

³⁰ Jesussha tímiayi “Wi antuktinian chichaschayi antsu átum nekaatarum tusa chichasai. ³¹ Yamaikia nunkanam makumatin jeayi. Tura íwianch ju nunkanam akupniua nu nupetnak ajapnattawai. ³² Tura numiniam awajnaintai ashí nunkanmayanŋka shuar enentáimturartatui” tímiayi. ³³ Juna taku krúsnum jákatniun ujakmiayi.

³⁴ Shuarsha awajjar tiarmiayi “Yaunchu Yus akupkamu papiniumiá áusar nékaji. Kristu tutai tuke jáatsuk iwiaaku pujustiniaiti. ¿Itiurak nuikia “Aents Ajasu numiniam awajnaiti-niuti” tame? Aents Ajasuka Kristuchukait, Yus anaikiamu. Núchaitkiungka Aents Ajasuka yait?” tiarmiayi.

³⁵ Nuinŋka Jesus tímiayi “Wi tsáapninia áintsanŋketjai. Tsáapnisha atumjín aya ishichik tsawantin tsáapniartatui. Tsáapin ana juik wekasatarum kirit ajatsain. Kame kiritniunam wekaana nusha nékatsui ituiranimpia wea. ³⁶ Tsáapnin wáinkuram nin enentáimtusatarum. Túrakrum winia tsáapninruuj wekasattarme.” Jesussha nuna tj wémiayi uumak pujustaj tusa.

Untsurj Israer-shuar Jesusan enentáimtuscharmiania nu

³⁷ Jesus aentsi tujintiamun ti untsurj túramtaisha Nin enentáimtuscharmiai. ³⁸ Yúsnan etserin Isayas yaunchu aarma uminkiatniuyi:

“Uunta, ¿ya ii ujam antukuit. Yusa kakarmarisha yana iniaktusuit?” tu áarmaiti.

³⁹ Nuna uminiak Jesusan enentáimtuscharmiai. Tura nu arantcha Isayas áarmiai:

⁴⁰ “Yus nin kusuru awajsaiti tura ni enentáincha kátsuram awajsaiti. Ni juijiai ímsain tusa tura ni enentáijjai nekaawain tusa túrait. Kame ni tunaari iisar enentáimtuiniakui Yus nin tsúarainti” tu áarmaiti.

⁴¹ Isayas yaunchu Jesusan nayaimpiniam ti shiir pujan wáiniak nuna tímiayi.

⁴² Tuma ajn untsurj Israer-shuarsha tura ni uuntrinmayasha Jesusan nekas enentáimtusarmiayi. Tura niisha Pariséun ashamaianiak paant tícharmiai. Israer-shuara iruntairiya jiki awetamaj tusa ashammarmiayi. ⁴³ Yus shiir enentáimtusati tutsuk antsu shuar shiir enentáimtusati tusar túrawarmiayi.

Shuaran sumamtikiatniun táchaitjai antsu uwemtikratniun táwitjai, timiania nu

⁴⁴ Jesus kakantar untsukum tímiayi “Winia enentáimturuk aya Winiak enentáimturtsui antsu winia Aparun Winia akuptukua nunasha enentáimtaawai. ⁴⁵ Winia wáitkiusha Winia Aparnasha wáinui. ⁴⁶ Wikia tsáapnin asan Winia enentáimturainia nuka kiritniunam wekasain tusan ju nunkanam táwitjai. ⁴⁷ Shuaran sumamtikiatniun táchaitjai antsu uwemtikratniun táwitjai. Tuma asamtai shuar winia chichamprun antuk umíachkungka sumamaiti. Tura Wikia sumamtikiachuitjai. ⁴⁸ Winia nakitrur chichampruncha enentáimtachuka sumamtikiamuiti. Wi timiaj nuka amuukatin tsawantaj nin sumamtikiattawai. ⁴⁹ Wi enentáimmiyajin chichaatsjai. Winia Apar akattur akuptukuiti. Tura chichastinia nuna surusuiti. ⁵⁰ Wissha nékajai, ashí winia Apar akupeamuka yamaram iwiaakman tuke amuukashthinia súawai. Tuma asamtai winia Apar túrutmia núnisnak tajai” tímiayi Jesus.

13

Jesus ni unuiniamurj nawen nijiatramiania nu

¹ Paskua jisat jeatin chikichik tsawant ajasmatai Jesusa tsawantrj jeatemayi. Túramtai ju nunkan ikiuki ni Aparin wétiniuyi. Jesussha nuna nekaamiayi. Ashí Níiniun ju nunkanam pujuinian tuke anea asa amúamunmasha yapajitsuk tuke aneemiayi. ² Nu tsawantajsha murikiun yúatin ármiai. Tura yurumátin jeatsain, uunt iwianch Semunŋka uchirj Jutas Iskariúti enentáin Jesusan surukat tusa enentáimtikramiai. ³ Tura Jesus Yusaiaj tau asa

waketkitniuyi. Tura Yus Apa ashí mash susamiayi akupin atí tusa. Jesusha nuna nekáa⁴ chíkich yurumuk pjuiniñají wajakmiayi. Tura pushirín ámiak awankéman emenmamamiayi.⁵ Nuyá nijaamatainium entsan yará ní unuiniamurí nawen nijiatriamiayi. Tura awankémají japirmiayi.⁶ Semuñ Pítrunam jeamtai Pítíur tímiayi “Uunta, ¿Winia nawer nijiartaj tamek?”

⁷ Jesusha tímiayi “Wi túrajna nu yamáí nékatsme tura ukunam nekaattame.”

⁸ Tura Pítíur tímiayi “Peñké winia nawer nijiarchattame.”

Jesusha tímiayi “Wi nijaachkuñkia Wíjjíaj tsaniñkia pujuschamniaitme.”

⁹ Tutai Semuñ Pítíur tímiayi “Nuñkia, Uunta, aya nawerkechu antsu uwejrusha tura muokarsha nijiaturta.”

¹⁰ Tura Jesus tímiayi “Yamáí mainkia ayashí shiir asamtai aya nawenín nijiamártiniaiti. Atumí enentáin ashí péñkeraitrume. Túrashashí shuarcha” tímiayi.¹¹ Kame Jútas Nin suruktinian nekáa “ashí shuarcha” tímiayi.

¹² Jesusha nijiar umik ní pushirín entsarmiayi. Tura atak pujus tímiayi “¿Atumsha Wi túrajna nu nekaarmek? ¹³ Wi atumí Uuntrí asamtai nekas “Uunta” túrutrume. Nusha péñkeraiti.¹⁴ Tura Jintinniuitiatan tura Úntaitiatan atumí nawen nijiarchajak. Atumsha núnisrumek nuamtak náwem nijiatnairatarum.¹⁵ Atumin nekaprutsan túramjai. Atumsha núnisrumek túratarum.¹⁶ Ti nekas tajai. Takarniuka ní ununtrí nankaamaschaiti. Akupkamusha akupea nuna nankaamaschaiti.¹⁷ Nu nekaarum túrakrumka shiir átatrume.”

¹⁸ “Tura tájana nuna ashí tátsujrume. Anaikaitiaj núnaka Wi nékajai. Tura Yus-Chicham uminkiatniuiti, nékajai. Ju aarmaiti:

“Wíjjíaj yurumna nu winia nemasur ajasai.”

¹⁹ Nuka túmatsajín ujaajrume. Nuyá túrunamtai Yusa Uchiríntjai nusha paant nekaattarme.

²⁰ Wi tájana nu nekasaiti. Shuar Wi akupeaj nuna shiir itiaakka Winiasha shiir itiaarui. Tura Winia shiir itiaarna nusha Winia Akuptukuncha itiaawai” tímiayi.

Jesus Jútas Nin suruktinian étservi

(Mateu 26.20-25; Márkus 14.17-21; Rúkas 22.21-23)

²¹ Nuna tí, Jesus ní enentáin tí itíurchat enentáimpramiayi. Tura paant tímiayi “Nekas tajai, chíkichik juí atumjai pujana nu Winia surutkattawai.”

²² Tutai ní unuiniamurí nuamtak íniiaisar “¿Yanak ta?” tiarmiayi.²³ Chíkichík unuiniamurí, Jesus tí aneamu, Níjjíaj tsaniñ yurumuk pujumiayi.

²⁴ Tuma asamtai Semuñ Pítíur ní uwejéjaj iniakmas “Aniasta, ¿yanak áujmata?” tímiayi.

²⁵ Tutai Jesusan áyanmatsan aniasmiayi. “¿Yait, Uunta?” tímiayi.

²⁶ Jesusha ayak “Tantan túumnium ajunñkan susattaj núiti” tímiayi. Nújajín tantan túumnium ajun Semuñka uchirín Jútas Iskariútin susamiayi.²⁷ Tura wárik Jútas tantan achikmatai íwianch ní enentáin wayamiayi. Nuyá Jesus tímiayi “Túratamma nu wárik túrata.”

²⁸ Tura ashí ní yurumainiak pujuarmia nusha wariniak ta tusa nekaacharmiayi.

²⁹ “Kuítincha kuit súserta” tátsuash tu enentáimprarmiayi. Tura chíkichcha “nampernum yurumátin atsumajnia nu sumakta” tátsuash, tu enentáimprarmiayi. Jútas kuítian wáinin asamtai tu enentáimprarmiayi.³⁰ Jútas tantan yua kashi ajasmanum jínkimiai.

Yamaram akupkamú

³¹ Jútas jínkimtai Jesus tímiayi “Wi Aents Ajasu asamtai winia kakarmar yamaikia paant átatui. Tura wi túramujaj Yusa kakarmarísha tí paant átatui.³² Wi Yusa kakarmarín paant awajeakui Wisha ní Uchirí asamtai winia kakarmarnasha Yuska wárik paant awajsattawai.³³ Uchichiru, atumjai tí untsurj tsawant pujuschattajai yamaikia. Wi Israershuaran tímiáj nútíksanak atumin tájarme. Atumsha Winia éátkáttarme tura wi wéamunam winishtatrume.³⁴ Ju yamaram akupeamun amaajai nuamtak mai anenai ajatarum tusan. Wi atumin aneajrumna núnisrumek atumsha nuamtak mai anenai ajatniuitrume.³⁵ Anenaiyakrumñkia nujají ashí shuar “Kristu unuiniamurí ániawai” túramartatui.

Pítíur Nin natsantratniun Jesus ujakmiania nu

(Mateu 26.31-35; Márkus 14.27-31; Rúkas 22.33-34)

³⁶ Semuñ Pítíur Jesusan aniasmiayi “Uunta, ¿tua wéam?”

Jesusha tímiayi “Wi wéajna nuí yamaikia winichminiaittrume. Tura ukunam winitíarme.”

³⁷ Nuyá Pítíur tímiayi “Uunta, ¿urukamtai yamaikia winichminiaitiaj? Ámin yáñtájtans jakataj tajai.”

³⁸ Jesusha tímiayi “¿Nekasmek táme? Ti nekas tájame, atash shiniatsajín Winia menáintiú natsantrurtatme” tímiayi.

14

Jesus Yus-jintiaiti

¹ “Kúntuts pujusairap. Yus enentáimtustarum, Winiasha enentáimtustatarum. ² Winia Aparuj átum pujustin ti ankant awai. Tura nuna iwiarataj tusan Aparuj wéajai, nekasaiti. Nekaschaitkiuñkia žitiurak ujakaajrum? ³ Tura iwiaaran amukan ataksha tátatjai. Tura tana yaruaktatjarme, wi pujamunam atumsha pujusúk tusan. ⁴ Wi wéaj nu nékarme tura jintiasha nékarme” tímiayi Jesus.

⁵ Tumas tímiayi “Uunta, Ame weam nu nékatsji. žJintiasha itiuurak nekaattajj?”

⁶ Jesussha tímiayi “Wi nekas jintiaitjai. Wijajinču wekaana nuka winia Aparuj jeatniun penké tujintiai. Tura Wissha tuke nekas tiniu asan nekas ana nuna shuáran nékamtkiajai. Wissha shuáran yamaram iwiaakman tuke amuukashtinian súwitjai. ⁷ Winia nékarkurmeka winia Aparsha nekaawaintrume. Yamaisha Nii wáinkia asarum nékarme” tímiayi.

⁸ Nuiñkia Jiripisha tímiayi “Uunta, Apasha wáinkiaraka maak.”

⁹ Jesussha tímiayi “Jiripi, atumjai ti pujusu aisha žtuke nékartsumek? Winia wáitkia nuka Winia Aparnasha wáinkiaiti. žItiuurak, nuikia, “Apasha wáinkiaraka maak” tame? ¹⁰ Winia Aparjai tsaninjian pujakun tura winia Aparsha Wijjai pujakui tuke chikichkiitji. žNu nékatsrumek? Wi tájarmena nu Winia chichampruchuiti. Yus Apa Winí pujak ni wakeramun takaawai. ¹¹ Nekaatarum. Wissha winia Aparjai tsaninjian pujakur nekas chikichkiitji. “Nu chicham itiuurchataiti” enentáimkiurmeka wi túramu nuikia enentáimpratarum. Wi túramujai chikichik ájiniu na páantchakait. ¹² Wi tájarmena nu ti nekasaiti. Winia enentáimturna nu Wi túrajna nuna túrattawai. Tura winia Aparuj wéakui nuna nankaamas tujintiamun túrattawai. ¹³ Ashí Winia enentáimtursarum seatrumna nuna amastatjai. Nujainkia winia Apar shiir awajnastatui. ¹⁴ Winia enentáimtursarum seakrumniñkia ashí túrattajai” tímiayi.

Jesus Yusa Wakanin akupkattawai

¹⁵ “Atumsha anentkurmeka winia chichamur umiktatum. ¹⁶ Tura wéakun winia Aparun chikichan akupturmakti tusan seattajai. Niisha atumjai tuke pujak atsantamprattatui. ¹⁷ Nusha Yusa Wakanjinti. Yus-shuarcha Nin nekaachmin áiniawai. Tuma asantai ni enentáin wayachminiati. Antsu átumka atumi enentáin pujakui Nii nékarme. Niisha atumi enentáin tuke pujustatui. ¹⁸ Mitiakia áitkiasnak ikiukchattajrume. Atumjin atak tátatjai. ¹⁹ Ishichik tsawant nankaamasmatai chikich shuar irunna nu wáitkiachartatui. Tura Wi iwiaaku asantai átumka nu iwiaakmajai pujustatrum. Tuma asarum wáitkiattarme. ²⁰ Tura nu tsawantaj ju nekaattarme. Wissha winia Aparjai tsaninjian pujakur chikichkiitji. Núnisnak Wissha atumjai tsaninjian pujajai. Tura atumsha Wijjai tsaninjian pujarme. ²¹ Shuar Winia anentuka wi akupkamun nekáa umíawai. Nú shuarnaka winia Aparsha aneawai. Wissha nin aneajai tura nekarati tusan iniaktustatjai.” Jesus nuna tímiayi.

²² Chikich Jútas, Iskariútiču, tímiayi “Uunta, žurukamtai ashí shuarnum iniaktutskesha aya in iniaktustatam?”

²³ Jesus tímiayi “Winia anentuka tájana nuna enentáimtai. Winia Aparsha nu shuaran aneattawai. Tura Wissha winia Aparnum nu shuarjai tsaninjian pujustatui. ²⁴ Antsu Winia anentchaka tájana nuna enentáimtsatui. Átum ántarmena nú chichamka wíniachuiti, antsu Yus Apa Winia akuptukua Núnaiti’ tímiayi.

²⁵ “Atumjai tuke pujakun nuna tájarme. ²⁶ Yus Apa ni Shiir Wakanin atumin yáinmak atsantamprarat tusa akupturmaktatrum. Wi seam túrattawai. Nu Wakanha ashí Wi ujakjarmena nuna atak enentáimtkramprash ashí unuitiampraratui’ tímiayi.

²⁷ Imiatkinchanum pujustatum. Imiatkinchanum pujajna núnisrumek pujustatum tusan amaajai. Jú nunkanmanka warastin wáinkiashtatrum. Antsu itiuurchatnum pujay-atrumkesha Wijjai imiatkinchanum pujustatrum. Ashamsuk pujustatum. Itiuurchat enentáimprairap. ²⁸ Nuik timiaj nu antukmarme. Aparuj wena atak atumjin tátatjai. Winia Aparka Wijjai nankaamas úntaiti. Tuma asantai ti nekas anentkurmeka “Aparuj wéajai” takui ashí warasaarme. ²⁹ Nuka túmatsain ujaajrume. Túrunamtai nuyá Winia enentáimtursattarme” tímiayi.

³⁰ Jú nunkanmayan akupin winiakui atumjai núkap chichaschattajai yamaikia. Winiaka nupettukchamniaiti. ³¹ Tura Wikia winia Aparun aneajai tura Nii akupturkama nuna tuke túrajai. Ashí shuar nuna nekaawarti tusa ashí túrunatniuiti. Wajaktiarum. Juyá wetái’ tímiayi.

15

¹ Winia iwiaakmarun amaakun numi arakma áintsapketjai. Wikia kauptintjai atumsha kanawentrume. Winia Aparsha arakan wáiniua núnisaiiti. ² Winia kanawernasha nereatsna núnaka tsupik ájapeawai. Tura nereana núnaka púruawai nú nukap nerekat tusa. ³ Wi ujakjarmena nujai puruarmaitrume. ⁴ Numi kanawesha kauptin áchitkiachkunka niniki nerechamniaiti. Núnisrumek atumsha Winí áchitkiachkurmeka nerechamniaitrume. Wi atumjai áchitkij núnisrumek atumsha Winí tuke áchitkia atarum' tímiayi.

⁵ 'Wikia kauptintjai atumsha kanawentrume. Kauptinikia kanawen áchitkia núnisnak achiakjarme. Tura kanawe ni kauptinij áchitkia núnisrum Winí áchitkia atarum. Túrakrumka núkap nerektatrume. Antsu Wíjiainchuka péñker túratin péñké tujintiarne. ⁶ Winí áchitkiachuka ajapam kukartatui. Kanawesha kukarmatai shuar irumkar áesawartatui' tímiayi.

⁷ 'Tuke Winí áchitkiaiitkurmeka tura winia chichamprusha kajinmattsuk emetarmeka átum wakerarmena nu seakrumin amastatjai. ⁸ Átum núkap nereakrumninkia ashí shuar "Nekas Jesusa unuiniamurinti" túramartatui tura winia Aparnasha shiir awajstartatui. ⁹ Winia Apar anenna nútiksanak Wisha atumin aneajrume. Winia aneamur tuke atarum. ¹⁰ Winia Aparu akupkamurinj umiakun tuke ni aneamurintjai. Núnisrumek winia akupkamur umiakrumka tuke winia aneamur átatume' tímiayi.

¹¹ 'Wi waraajna áintsarmek warastarum tusan nuna tájarme. Tura ti shiir warastatrume. ¹² Wi akupkamu jüiti: "Wi aneajrumna nútiksarmek ashí anenaitiarum." ¹³ Shuar ni amikrin yáintaj tusa jakañka ti aneñkartichukait. ¹⁴ Wi akupeamu takaakrumka atumsha winia amikruitrume. ¹⁵ Takarniuka ni uuntrj takaana nuna nékatsui. Tuma asamtai "winia takarniuruitrume" tátsujrume. Antsu ashí winia Apar táman ujaku asan "winia amikruitrume" tájarme. ¹⁶ Aya atumi enentáimsamurijjain Wíi shuar ajaschamarme. Antsu akatramur ajastarum tusan atumniaka achikjarme Wi. Winia takatur takastiniaitrume. Túrarum péñker túratniuitrume nerektinia áintsarmek. Tura nu nere amuutsuk tuke átiniaiti. Tuma asamtai winia Apar searmena nuna amastatui. ¹⁷ Júnaka akupeajrume: Nuamtak mai anenai ajatarum' tímiayi.

Yus-shuaracha Jesusnasha Níniuncha nakitiainiawai

¹⁸ Ju nunkanmaya shuar Winia emka nakitrurar atumniasha nakitramarme. ¹⁹ Atumsha ju nunkanmaya shuaraitkiurminkia níniua nútiksap anenmaintrume. Antsu Wíi shuar ajastarum tusan ju nunkanmaya achikmajrume. Túramtai nekas ju nunkanmayanchuitrume yamaikia. Nu asamtai nu shuar nakitramainiawai. ²⁰ "Takarniuka ni uuntrj nankaamaschaiti" tichamkajrum. Shuar Winia yajauch awajtusaru ásar atumniasha yajauch awajtamstartatui. Chikichcha umirtukaru ásar atumniasha umirtamkartatui. ²¹ Winia Akuptukun nékachu ásar Winia enentáimturkurmin yajauch awajtamstartatui' tímiayi.

²² 'Wi tana Yus-Chichaman nin ujakchamtainkia tunaanum sumamacharaayi. Antsu ujakma ásar "Nékachkun túraitjai" tichamin ániawai. ²³ Winia nakitruinia nuka winia Aparnasha nakitiainiawai. ²⁴ Aents péñké túrachman túrachuitkiuñkia tunaanum sumamacharainti. Antsu wi túramun wáinkiaru ániayai Winia shua winia Aparnasha nakitiainiawai. ²⁵ Yaunchu Yus akupkamunam áarmaiti: "Péñké ántar nakitruarmai."

Nu chicham uminkiatu tusa túrunaiti' tímiayi.

²⁶ 'Tura atsanamprattsa yáinmana nuna winia Aparujay akuptuktatjarme. Niisha tuke nekas tiniu Wakaniiti. Niisha Yusajya taa atumin nekamtikramprattarme. ²⁷ Atumsha yaunchu Wíjiaj pujusu asarum nekamtikiattarme' tímiayi.

16

¹ Átum kanartukajrum tusan júna tájarme. ² Israer-shuar iruntainiumia jiki akup-tamkattarme. Nu arantcha mantamainiaksha "Yúsan shiir awajstattsan túrajai" tíartatui. ³ Nu shuar Winiasha tura winia Aparnasha nékachu ásar túrutmawartatui. ⁴ Núnaka yamá tájame. Tura túrunamtai "núnisap átiniaiti" tímij nu nekaarum iturchat enentáimprairap' tímiayi.

Yusa Wakani túrana nu

'Atumjai tuke pujá asan núnaka yaunchu ujakchamajrume. ⁵ Antsu yamaikia wáketjai winia Akuptukmia nujai pujustaj tusan. Tuma áin wéajna nu ininratsrume. ⁶ Antsu nuna takui ti kuntuts enentáimprarme. ⁷ Tura Wi wématai atumjainkia nuna nankaamas péñker átatui. Iis, Wi wéakna atumin yainmaktinia nuna akupkattajai tura wéachkuñkia táchattawai. Nuka ti nekasaiti. ⁸ Yusa Wakani taa ashí jú nunkanmaya aentsun ju menaintiun nekamtikiattawai. Ni tunaari aan nekamtikiattawai. Péñker tunaajainchu wekasamiana nunasha nekamtikiattawai. Tura Yus tunaanum súmamtikiamniana nunasha

nekaamtikiattawai. ⁹ Winia enentáimturainiachu tunáarintin áiniawai. ¹⁰ Winia Aparuŷ wáketkui wáitkiashtatrum. Tuma asamtai ashí shuar wi péŋker tunaajainchu wekaamun nekaawartatui. ¹¹ Tura jú nuŋkanam akupniunka Yus tunaanum súmamtikia asa shuar-nasha súmamtikiamnaiiti. Nuna paant nekaawartatui' tímiayi.

¹² 'Nu arantcha núkap tíntjarme túrasha átumka nekaachaintrume. ¹³ Yusa Wakaní ashí nekas tiniu asa ashí nekas nuna unuítiamprattarme. Ni enentáimmiájai tichattawai antsu winia Aparuŷ antukma nuna ujatmaktatui. Ukunam átatna nunasha ujatmaktatui. ¹⁴ Ashí Winian ujatmak Winia shiir awajtustatui. ¹⁵ Ashí winia Apar takakna nusha Winiaiti. Nu asamtai "ashí Winian ujatmaktatui" tajai' tímiayi.

Kúntuts pujuiniyat ukunam warasartatui

¹⁶ 'Ishichik pujusrum Winia wáitkiashtatrum. Nuyá ataksha ishichik pujusrum ataksha wáitkiattarme. Wisha winia Aparuŷ wéjai' tímiayi.

¹⁷ Nuyá ni unuiniamurí nuamtak aniniaisarmiayi "¿Jú chichamsha warimpait? "Ishichik pujusrum wáitkiashtatrum tura ataksha ishichik pujusrum wáitkiattarme tura Aparuŷ wéjai" tátsuk. ¹⁸ "Ishichik pujusrum" tana nusha ¿warimpait? Nii tana nu ántatsji" tiarmiayi.

¹⁹ Jesusha nin aniaistai táman nekáa tímiayi "Ishichik pujusrum wáitkiashtatrum nuyá ataksha ishichik pujusrum wáitkiattarme" tímiayi. ¿Núchakait átum inintrustin wakerar-mena nu? ²⁰ Ti nekas tájarme: Átumka kúntuts pujusrum úttiatrum tura Yus-shuaracha warásartatui. Tuma ajnki átum kúntuts pujayatrumek ukunam warasartatrum. ²¹ Iis, nuwásha jurertin tsawant jeamtai najaimiak wáitiatsuk. Tura uchin jurerka ti waraak wáitsamunka enentáimsui. ²² Atumsha núnisrumek yamaik kúntuts pujarme. Tura atak ítjjarum tusan winiakui ti shiir atumí enentáin warasartatrum. Nu warastinian jurutram-kichminia áiniawai.'

²³ 'Nu tsawantinkia penké ininsashtatrum. Ti nekas tájarme Winia enentáimtusarum winia Apar searum nuna ashí amastatui. ²⁴ Yamaisha Winia enentáimtusarum winia Apar seachurme. Seakrumniŋkia amastatui ti shiir warasaruk tusa' tímiayi.

Jesus jú nuŋkanmayan nupetkaiti

²⁵ 'Métek-taku chichamjai nakumkan nuna tímiayi. Tura ukunmaŋka nujai chichatsuk winia Aparan paant ujaktatjarme. ²⁶⁻²⁷ Nu tsawantaj átumka Winia enentáimtusarum winia Apar seattarme. Winia Aparsha atumin anea asamtai Wi Nin áujsatin atsumash-tatrum. Winia anentu asarum tura winia Aparuŷya taman enentáimtakrumin Niisha anenmawai. ²⁸ Winia Aparuŷya jíinkin jú nuŋkanam táwitjai. Yamaikia jú nuŋkanmaya jíinkin ataksha Aparuŷ wáketjai' tímiayi.

²⁹ Nuyá ni unuiniamurí tiarmiayi "Yamaikia métek-taku chichamjainchu chichaame. ³⁰ Mash nékaitme. Shuar Ámin ininmatsain péŋker áimkiatin nékame. Nu nekaar Ame nekas Yúsumiáitme tu enentáimtaji" tiarmiayi.

³¹ Tura Jesus tímiayi "¿Nekasash enentáimtarum? ³² Ti warik átumka ashamkarum niisháa tsakinmaktatrum tura Winia ikiurkittiarume. Antsu winia Apar pujaku Wiki pujatsjai. ³³ Winia enentáimturkuram imiatkinchanum pujusarat tusan tájarme. Jú nuŋkanam ti wáitsattarme. Tura Wi jú nuŋkanmayan nupetka asamtai warastarum" tímiayi Jesus.

17

Jesus ni unuiniamurín Yúsan áujtawai

¹ Nuna ti Jesus nayaimpinmaani íimias tímiayi "Aparu, yamá jeayi ame Uchiram shiir awajsatin. Núnsaŋ ame Uchirmisha péŋker awajtamsattawai. ² Ashí shuara Akupniurí najataitme. Nujainkia Winia surusumna nú shuaran yamaram iwiaakman tuke amuukash-tinian súsaitjai. ³ Aparu, chíkich atsawai. Ame nekas Yúsaitme. Wisha Jesuskrúitujai Ame akuptukmamna nu. Nu asamtai ashí shuar nuna enentáimtak yamaram iwiaakman tuke amuukash-tinian takakui.'

⁴ 'Ashí túratniun akuptukmamna nuna amukuitjai. Túran jú nuŋkanam shiir awaj-saitjame. ⁵ Nuna túramtai, Aparu, ti yaunchu jú nuŋka atsaisha Ámijiai pujaku shiir awajtusmamna núnismek yamaisha shiir awajtusta.'

⁶ 'Ashí jú nuŋkanmaya surusmamna nú shuaran Ámin nekamtikiamjai. Áminiu áiniakui surusmame. Niisha ame chichammin umirtámkaruiti. ⁷ Ashí Wi takaajna nu Ame surusuitme. Niisha nuna nékainiawai. ⁸ Ame chichamem surusmam nuna ujakam niisha umirtámkaruiti. Ame akuptukakmin Amjiniya táwitjai. Nu nekasaiti tu enentáimtuiniawai.'

⁹ 'Nin yainkiarta tusan seajme. Jú nuŋkanmaya shuaran Ámin enentáimturmainiatsna nuna seattsujai. Antsu Ame surusmam nuna, Áminiu ajasarmatai, yainkiarta tusan seajme.

¹⁰ Ashí Winia ainia nuka Áminiuiti. Tura ashí Áminiu ainia nuka Winia ániawai. Winia péñkerusha ni túramunam paant awajsaiti.’

¹¹ ‘Wikia yamaikia jú nunkanam pujuschattajai. Tura nu shuarka juǰ pujuartatui. Antsu Ámijijai pujustajtsan winiakui ashí surusumna nuka, Aparu, ti shiir asam ame kakarmarmijijai wáinkia. Wisha Ámijijai chikichik ájiniá núnisañ niisha ashí iruntrar chikichik ajasarti. ¹² Juǰ niijijai pujakun ame kakarmarmijijai ti péñker wáinkiamjai. Antsu Yus-Chichamnum aarma uminkia ti tusa aya chikichik menkakaiti. Niisha tuke emesnartinia nútiti.’

¹³ ‘Yamaikia Amijini winiajai. Tura juǰ tuke pujakun júna tájame. Niisha Wi waraajna núnisar ti shiir warasarat tusan tajai. ¹⁴ Wi jú nunkanmayanchuitjai. Niisha núnisañ jú nunkanmayanchu ániawai. Tuma asamtai ame chichammin Wi susamtaí jú nunkanmayá shuarka nin nakitiainiawai. ¹⁵ Jú nunkanmayá jíiki tusan seatsjame. Antsu íwianch nin nupetkajin tusan seajme. ¹⁶ Wi júyanchuitiaj áintsañ niisha júyanchu ániawai. ¹⁷ Ame chichammin ti nekasa nuna ántuiniakui péñker awajsata. ¹⁸ Júyá shuarnum akuptukmam áintsan Wisha nin chikich shuarnum akupeajai. ¹⁹ Aya Áminiuak takastaj tusan enentáimtimjai. Tura asamtai niisha aya Áminiuak takastinian enentáimpratin ániawai’ áujtak tímiayi.

²⁰ ‘Aya níniunkeka seatsjame antsu ashí ni chichamen antukar Winia enentáimtursartatna nusha ame yáinkiarata tusan seajme. ²¹ Ashí niisha chikichikiniak enentáimtusarti tusan seajme. Wisha Amesha, Aparu, chikichik ájiniá núnisañ niisha Iijijai iruntrar chikichik ajastai tusan seajme. Wíi shuar chikichik najanata tusan seajme. Nuyá juǰ nunkanmayá shuar akuptukuitmena nuna nekaawartatui. ²² Ame shiir awajtursamna núnisnak Wisha nin shiir awajsaitjai. Iikia chikichik ájiniá núnisañ niisha chikichik ajasarti tusan túraitjai. ²³ Wi ni enentáin pujakui Amesha Winin pujakmin penké chikichik ajasarti. Túramtai ashí shuar júna nekaawartatui: Ame akuptukuitme, tura Winia anenmena áintsam nu shuarsha aneame. Wíi shuar chikichik ajasmajai ashí shuar nuna nekaawartatui.’

²⁴ ‘Aparu, shuar surusmam nu, Wi pujustatjana nuǰ pujusarti tusan seajme. Tura ti shiir awajtusamna nuna ísarti tusan nuna seajme. Juǰ nuñka najanchamunmañ tuke anentin asam ti shiir awajtusuitme. ²⁵ Aparu, ti péñker áminin juǰ nunkanmayá shuar nekarmainiatsui. Antsu Wi nékajme. Juǰ shuarsha ame akuptukman nékainiawai. ²⁶ Nú shuaran Ámin nekarmawarti tusan jintintiaitjai. Tura nu arantcha jintintiaitjai. Nujajinikia Wisha ni enentáin pujurkui Winia anenmena áintsañ niisha anenkratin ajasartatui’ áujtak tímiayi Jesus.

18

Suntar Jesusan achikiarmiania nu

(Mateu 26.47-56; Márkas 14.43-50; Rúkas 22.47-53)

¹ Jesússha nuna tinia amuk ni unuiniamurijijai Setrun entsá katiñ numi arakmanum wémiayi. ² Jútassha Nin suruktajtsa pujumia nuka nu ajan nekaamiayi. Untsurí tsawant Jesus ni unuiniamurijijai nuǰ iruntramtaí Jútas Jesusan nuǰ wáinkiatniun enentáimpramiayi. ³ Tura untsurí suntarjajisha Jesusan tariarmiayi. Paríséusha Israer-shuar Patri uuntrisha suntarnasha Yusa Jéen wáiniuncha Jesusan achikiarat tusa akupkarmiayi. Niisha machitniasha nankincha rámparancha jiniasha júkiar weriarmiayi. ⁴ Jesússha ashí átinia nuna neka asa jíintiuki “¿Ya eǵarum?” tímiayi.

⁵ Niisha “Nasarénumia Jesús” tiarmiayi.

Jesússha “Wiitjai” tímiayi.

Jútassha Jesusan surukua nu niijijai pujuarmiayi. ⁶ Tura Jesus “Wiitjai” takui ti ashamkar úkumur waketainiak iniaararmiayi.

⁷ Ataksha Jesus “¿Ya eǵarum?” tímiayi.

Niisha “Nasarénumia Jesús” tiarmiayi.

⁸ Nuñkia Jesus tímiayi “Wiitjai, tájarme. Winia eǵturmeka Wíi shuar ainia júka waketkiarti” tímiayi. ⁹ Jesus nuik aujuk “Winia Apar surusma nu menkakacharai” timia nu uminkia ti tusa Jesus “waketkiarti” tímiayi. ¹⁰ Nuyá Semuñ Pítiur machiatin jusa Marku kuishin untsurnumaanǰ tsupirkamiayi. Markusha Israer-patri uuntri takarniurjyai. ¹¹ Túramtai Jesus Pítrun tímiayi “Machitrumka awainki ikiusta. Winia Apar wáitsatniun surakuñkia ¿wáitsashtinkaitiaj?”

Israer-patri úuntriñiam júkiarmiania nu

(Mateu 26.57-58; Márkas 14.53-54; Rúkas 22.54)

¹² Nuñkia apach suntarsha ni kapitántrisha Yusa Jéen wainniusha Jesusan achikiar jinikiawarmiayi. ¹³ Nuyá Anasa jéen júkiarmiayi. Anassha Kaipiasa wearjyayi. Tura

Kaipias nu uwitin Israer-patri uuntriyayi. ¹⁴ Kaipiaska nuik “¿Ashí Israer-shuar mesertin péñkerkait. Antsu aya chikichik shuar jákatin péñkerchakait?” timia núiti.

Pítur Jesusan natsantramiania nu

(Mateu 26.69-70; Márkus 14.66-68; Rúkas 22.55-57)

¹⁵ Semun Pítur chikich unuiniamujai Jesusa uku weriarmiayi. Israer-patri uuntri nú unuiniamunka nékayayi. Tuma asamtai ni jeen jeawar, suntar Jesusjai aa tanishnum wániakui niisha wayamiayi. ¹⁶ Tura Pítur aa wáitiniam wajaamiayi. Túramtai chikich unuiniamu jiinki wáitin wáinia nú nuwajai chichas Pítrun awayamiayi. Nuj nékanu asa yúpichuch awayamiayi. ¹⁷ Waiti wáinniusha Pítrun aniasmiayi “¿Amesha nuna unuiniamurinchukaitiam?”

Pítrusha “Atsá, núchaitjai” tímiayi. ¹⁸ Tsetsek asamtai suntarsha tura nuj takarniusha jinia ikiapárar ni nawen anaak pujuarmiayi. Pítrusha nuj pachiniak anamuk pujumiayi.

Kaipias Jesusan aniasmiania nu

(Mateu 26.59-66; Márkus 14.55-64; Rúkas 22.66-71)

¹⁹ Israer-patri uuntri Jesusan aniasmiayi “Ame unuiniamurmesha ¿ya ainia. Tura warí nin jintintiaitiam?”

²⁰ Jessussha tímiayi “Ashí íimiainiajn tuke etserniuitjai. Israer-shuar iruntainmasha Yusa Uunt Jeecha Israer-shuar irunainia nuj arantutsuk tuke etserkaitjai. ²¹ ¿Urukamtai Winia inintiam? Winia chichamprun antukua nu aniaстарum. Wi timian nii ujatmakarti. Wi timiancha niisha nékainiatsuk.”

²² Jesus nuna takui Yusa Jee wáiniua nu nuj pujá Jesusan yapiniam awati tímiayi “¿Núnisan nekas úuntnum chichastinkait?”

²³ Jessussha tímiayi “¿Warinmampa yajauch aa? Turuttia. Tura tájana nu péñkeraitkiuinikia ¿urukamtai awattiniam?” ²⁴ Nuyá Anas Jesusan jinkia Kaipias takaamunam akupkamiayi Kaipias Patri uuntri asamtai.

Pítur ataksha Jesusan natsantramiania nu

(Mateu 26.71-75; Márkus 14.69-72; Rúkas 22.58-62)

²⁵ Tuke Anasa jeen chichainiaj Pítur jinia anamuk puján shuar aniak “¿Amesha Jesusa unuiniamurinchukaitiam?” tiarmiayi.

Pítrusha “Atsá, wíchaitjai” tímiayi.

²⁶ Chikich takarin, Marku shuarj, nuj pujumiayi. Pítur Marku kuíshin tsupirkamia nuna shuarj asa tímiayi “¿Ajanam Jesusjai wekaamin wáinkiachmakajam?”

²⁷ Pítrusha ataksha “atsá” taín atash shiniukmiayi.

Piratu Jesusan aniasmiania nu

(Mateu 27.1-2, 11-14; Márkus 15.1-5; Rúkas 23.1-5)

²⁸ Nuyá Kaipiasaiya Jesusan júkiar tsawant tsawaamunam apach kapitían Piratu takatai jeanam ejeniarmiayi. Israer-shuarsha ni uuntri akupkamia nunisar wapik ajasajj tusar nu jeanam wayacharmiayi. Wayawarka paskua nampernum yurumáchmin ármiai. ²⁹ Nu asamtai Piratu niijjai chichastaj tusa jíinki tímiayi “¿Jú áishmansha warí tunáa túrait?”

³⁰ Niisha “Tunaarinchaitkiuinikia amíini itiachaajj” tiarmiayi.

³¹ Tutai Piratu tímiayi “Atumek júkirum atumí akuptammarijijj ni tunaarj nekaatarum.”

Israer-shuarsha tiarmiayi “Antsu iikia Israer-shuartikia tunáa shuarsha máachminiaitji.” ³² Yaunchu Jesus ni jákatniurjn enentáimtus “Wi awajnaíniuitjai” tímiayi. Niisha krúsnum awajnain asamtai apach máataijjai Nii timia nu uminkiamiayi.

³³ Piratusha atak jeá wayá Jesusan untsuk “¿Ámeka Israera Uunt Akupniurinchukaitiam?” tímiayi.

³⁴ Jessussha tímiayi “¿Amekek nu inintram. Kame chikich túramainiatsush?”

³⁵ Piratusha tímiayi “¿Wi Israer-shuarkaitiaj? Amee shuarak Israer-patri uuntrijjai winin itiararai. ¿Warí tunáa túraitiam?”

³⁶ Nuñkia Jesus tímiayi “Wi jú nuñkanam akupniuchuitjai. Juyaitkiuinikia Winia nemartuiniana nu máanaikiaraayi. Túrawarmatai Israer-shuarnum surutkachaarayi. Antsu juyán akupniuchuitjai.”

³⁷ Piratusha “¿Nuikia ame nekas uunt akupniukaitiam?” tímiayi.

Jesussha tímiayi “Ee, ame támena nu nekasaiti. Jú nunkanam akiinian ashí shuaran nekas ana nuna ujaktinian táwitjai. Ashí shuar nekas ana nuna umirniuka Wi táman ántawai.”

³⁸ Tura Piratu “¿Nekasa nusha warimpiait?” tímiayi.

Piratu Jesusan mantannatniun tímiania nu

(Mateu 27.15-31; Márkus 15.6-20; Rúkas 23.13-25)

Piratusha nuna t̄i, atak Israer-shuarjaj̄i chichastajtsa j̄iinki t̄imiayi “J̄u aishman̄ka tunaar̄in penk̄e wáitt̄sujai.”³⁹ Tura ashí uwitin paskua nampernum sepunmaya shuar an̄kant akupkatniuiti. Núnisrum tuke searme. Tuma asamtai, ¿yamaikia Israera Uunt Akupniur̄in an̄kant akupkattajak?” t̄imiayi.

⁴⁰ Nuīnkia ashí kakantar untsumainiak “Ju akupkaip; antsu Parapás akupkatá” tiarmiayi. Nu Parapássha kásauyayi.

19

¹ Nuyá Piratu suntaran akupkamiayi Jesusan asutiáwarat tusa. ² Suntarsha Jesusan wishikrar tawasap jan̄ki najanamun etsenkrumtikiarmiayi. Yamakai pushincha uunt akupniua áintsan áentsrarmiayi. ³ Nuyá “Israera Uuntr̄ia, kakaram ajasta” tiar yapiniam awatiarmiayi. ⁴ Nuyá Piratu atak j̄iinki t̄imiayi “Átum wáinkiarum nekaatarum tusan Jesusan j̄iikt̄iatjai. Wikia tunaar̄inkia penk̄e wáitt̄sujai.” ⁵ T̄imiatai Jesussha jan̄kin etsenkruku tura pushin yamakairman entsaru j̄iinkimiayi. Tura Piratu nūi káunkarun tiarmiayi “Pai j̄uiti, iistarum.”

⁶ Israer-patri uuntr̄isha suntarsha Jesusan íisar ataksha ataksha kakantar untsumainiak “Krus̄num jakati” tiarmiayi.

Piratusha “Átum júkiirum máatarum. Ni tunaar̄in penk̄e wáitt̄sujai” t̄imiayi.

⁷ Tura Israer-shuar tiarmiayi “Nu shuar “Yusa Uchir̄int̄jai” takui jákatniuiti. Iiniu akupeamu aarma nūi núniskete” tiarmiayi. ⁸ Nuna antuk Piratusha nu nan̄kaamas ashamkamiayi. ⁹ Ataksha init wayá Jesusan aniasmiayi “¿Tuyampaitiam?” Tura Jesussha penk̄e áikchamiayi. ¹⁰ Nuyá Piratu t̄imiayi “¿Urukamtia winia áirtsum. Wi jeajna nu nékatsmek? Wakeraknaka krúsnum máatniuncha tura an̄kant akupkatniuncha jeajai.”

¹¹ Tutai Jesussha t̄imiayi “Yus nuna amaschaitkiuinkia penk̄e tujinkiaintme. Nu asamtai am̄in surutka nu ámin nan̄kaamas tunaar̄inniuiti.”

¹² Piratusha nú chichamtaik Jesusan an̄kant akupkattsa wakerimiayi. Antsu Israer-shuar untsumainiak tiarmiayi “Ju an̄kant iníakmeka ame úunt akupniua amikr̄inchuitme. Juka “úunt akupniuit̄jai” taku atumí uunt akupniur̄i nemasrinti” tu untsumkarmiayi.

¹³ Piratusha taman antuk akupin pujutainium pujus Jesusan untsukmiayi. Nūi kaya ukatkamu asamtai Israer-shuara chichamen Kapata anaikiarmiayi. ¹⁴ Paskua jisat jeats̄ain̄ nantu tutupin ajats̄ain̄ Piratu Israer-shuuran t̄imiayi “Uunt akupniuram iistarum.”

¹⁵ Tura ashí “Jakati, jakati, krúsnum máatá” tu untsumkarmiayi.

Tura Piratu “¿Atumí uunt akupniur̄in krúsnum máattajak?” t̄imiayi.

Tura Israer-patri uuntr̄i tiarmiayi “Atumí uunt kapitíánrumek in akuptamji. Chíkichka atsawai.”

¹⁶ Tutai Piratu Jesusan krus̄num mantamnati tusa tsankatkarmiayi. Tutai niisha Jesusan júkiar wearimiayi.

Jesusan krúsnum máawarmiania nu

(Mateu 27.32-34; Márkus 15.21-32; Rúkas 23.26-43)

¹⁷ Jesussha ni krus̄rj yanaki Kúrkuta náinnium wémiayi. Kúrkuta naar̄isha Israer-shuara chichamen “muuka ukunch” tawai. ¹⁸ Nūi krúsnum ajintrurar awajainiarmiayi. Tura mai paḡe jimiará shuuran chikichik chikichik awajainiarmiayi. Tura Jesus ajapén ámiayi.

¹⁹ Piratusha Jesusa krús̄r̄in uunt áarman anujkamiayi. **NASARETNUMIĀ JESUS, ISRAERA UUNT AKUPNIURI**

Tu áarmauyayi. ²⁰ Israer chichamjaj̄isha Kriaku chichamjaj̄isha Rúmanmaya chichamjaj̄isha áarmauyayi. Menaintiu chichamnum aarma asamtai tura Jesusar̄en̄ pepru t̄jiuch asamtai Israer-shuar ti untsur̄i áujiarmiayi. ²¹ Nu asamtai Israer-patri uuntr̄i Piratun jeariar “Israera Uunt Akupniur̄i” áaraip. Antsu “Israera Uunt Akupniur̄int̄jai tawai” tu aarta” tiarmiayi.

²² Tura Piratu nincha áik̄iar “Wi áaraj nuke átatui” t̄imiayi.

²³ Suntarsha Jesusan krúsnum awajainiar ni entsarmar̄in kuátru akankar an̄kant an̄kant júkiarmiayi. Tura ni pushir̄in apatsuk najanamu asamtai jáaktinian nakitarmiayi. Kame yak̄ijā nunkaan̄ apaiyaj̄chma takamtsukuyi. ²⁴ Tuma asamtai suntar tiarmiayi “Juka jáakchatai. Antsu nakurakrin yának ati nu jukiti.” Nújain̄kia yaunchu Yus-Chichamnum aarma nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súsarimiayi” áarmaiti.

²⁵ Krúsnumsha Jesusa nukur̄isha Kriúpasa nuar̄i Marisha tura Máktaranmaya Marisha wajaarmiayi. ²⁶ Jesus ni nukur̄incha tura ni ti aneamu unuiniamur̄incha nūi wajan wáiniak ni nukur̄in̄ t̄imiayi “Nukuru, ju ame uchir̄mea áintsan̄ atí.” ²⁷ Nuyá ni unuiniamur̄incha t̄imiayi “Ju ame nukua áintsan̄ atí.” Nu tsawantaik nu unuiniamur̄i ni j̄ē̄en̄ jukí awayámiayi.

*Jesusa jakamuri**(Mateu 27.45-56; Márkus 15.33-41; Rúkas 23.44-49)*

²⁸ Nuyá ashí uminkiamtai Jesus nuna nekáa yaunchu Yus-Papinium aarma uminkiat tusa “kitiamajai” tímiayi. ²⁹ Nujsha pininum churuín ámiayi. Tura shuar nuna uruchjai ejampar sapapjai ijiu mukunaati tusa susamiayi. ³⁰ Jessusha churuínian najekaa “ashí túrunatniua nu mash uminkiai” tímiayi. Nuna tí, muuken nená jakamiayi.

Suntar Jesusan paenam nanñijajai ijumiania nu

³¹ Nu tsawantaj, kashinkia paskua námper uunt tsawantrj asamtai tura ayampratin tsawant aa asamtai, Israer-shuar jaka ayashí nuj paant ajn tusa nakitrarmiayi. Nu asamtai Piratun seainiak “Krúsnum ajintrurma ainia nuna kanñajin suntar kupirkarti. Nuyá wari jákarmatai krúsnumiá júkiarti” tiarmiayi. ³² Nuyá suntarsha weriar emka krúsnum amia nuna kanñajin kupirkarmiayi. Nuyá chikichnasha Jessujai atsankiar ajintrurma nuna kanñajincha kupirkarmiayi. ³³ Tura Jesusan weantuk yaunchu jákai tusa kanñajin kupirtsuk ³⁴ suntar aya paenam ijumiayi. Ijiumtaisha nu chichamtaik numpu yumiñjai puarmiayi. ³⁵ Wi, Juan, nuna wainkia asan nekas tajai. Atumsha Yus enentáimustarum tusan tí nekas tajai. Wi áarajna nu nekasaiti nekajai. ³⁶ Yaunchu Yus-Chichamnum aarma uminkiat tusa túrunaiti:

“Ni ukunchin kupirkachartatui” tu áarmaiti.

³⁷ Tura chikichcha:

“Ijiuarmiania nuna wáinkartatui” tu áarmaiti.

*Jesus iwiansamu amiania nu**(Mateu 27.57-61; Márkus 15.42-47; Rúkas 23.50-56)*

³⁸ Nuyá Arimatéanmaya Jusé Jesusa ayashín jukitiaj tusa Piratun seamiayi. Nu Jusé Jesusan enentáimtaiat Israer-shuara úuntrin ashamak paant nemarsachmiayi. Niisha seantai Piratu “Jukitia” tímiayi. Tutai Jusé Jesusa ayashín jukimiayi. ³⁹ Nikiutémusha Jessujai chichastaj tusa kashi tarimia nu jimiará kunñuin pachimpramun ti nukap sumak itiamiayi. Mira kunñuiniasha aruí kunñuiniasha sumakmiayi. ⁴⁰ Nuyá Jusé Niki-utémujai Jesusa ayashín júkiar kunñuinián kuérar jaanch esarmajai penuararmiayi. Israer-shuar tuke nunisar ikiúu ármiayi. ⁴¹ Jesus krúsnum maamua nuj aja tíjuch ámiayi. Nu ajanmasha wá náinnium paka taurma ámiayi. Nusha yama taurma asamtai jaka nuj ikuschamuyayi. ⁴² Nu wáasha tíjuch asamtai tura Israer-shuara ayampratin tsawantrj jeatemamtai Jesusa ayashín nuj iwiansarmiayi.

20*Jesus nantakmiania nu**(Mateu 28.1-10; Márkus 16.1-8; Rúkas 24.1-12)*

¹ Tumintincha káshik kirit ajn Máktaranmaya Marí Jesus iwiansamunam ístajtsa wémiayi. Jesusan iwiansar kaya uuntjai wáan atutkarmiayi. Tura Marí nuj jeá nu kaya uraimiun wáinkiamiayi. ² Nuna wáiniak Semun Pítiur pujamunam tsékeñki wémiayi. Chíkich unuini-amurj Jesus ti anemia nusha nujsa pujumiayi. Tura Marí tímiayi “Iwiansamunmaya ii Úuntrin júkiarai. Tura ¿tuínsuk ikisara?” ³ Pítrusha chíkich unuiniamurjijai jíinkiar iwiansamunam iyuwarmiayi. ⁴ Mai métek tsékeñkiar Pítiur jeatsajn chíkich unuiniamurj iwiansamunam emka jeamiayi. ⁵ Niisha wayatsuk tsuntsumá iis penuarmarñkia nuj tepan wáinkiamiayi. ⁶ Nuyá Semun Pítiur ukunam jeá iwiansamunam wayá penuarmarj nuj tepan wáinkiamiayi. ⁷ Chíkich jaanchcha Jesusa muuken penuarma nusha nanerma niisháa tepan wáinkiamiayi. ⁸ Nuyá chíkich unuiniamurj emka tamia nusha iwiansamunam wayamiayi. Niisha túruna wáiniak “Jesus nekas nantakni” tu enentáimpramiayi. ⁹ Nuna wáínsuk Yus-Chichamnum “Jesus jakamunmaya nantaktiniaiti” áarman áusariat nekaacharmiayi. ¹⁰ Nuyá mai ni jeen waketkiarmiayi.

*Máktaranmaya Marincha Jesus wantintiuqmiania nu**(Márkus 16.9-11)*

¹¹ Tura Marikia iwiansamunam juak úutu pujumiayi. Niisha úutiatañ tsuntsumá iwiansamunam ímsamiayi. ¹² Tura Jesusa ayashí nuik tepesmanum nayaimpinmaya suntar puju entsaru jímiar pujan wáinkiamiayi. Chíkichik múuknumaanj tura chíkichka nawenmaanj pujumiayi. ¹³ Nayaimpinmaya suntarsha “¿Urukamtai úutam?” tiarmiayi.

Marísha tímiayi “Winia Úuntrin jurutkiarai tura ¿tuínsuk ikisara?” ¹⁴ Nuna tí ayanmar Jesusan wáiniak Nin nekaachmiayi.

¹⁵ Jesus aniak “¿Urukamtai úutam. Ya eam?” tímiayi.

Marisha ajan wáinnia nui tusa tímiayi “Uunta, ame ni ayashí jukimkia, tui ikusmam ujtakata wi jurunkitiaj” tímiayi.

¹⁶ Nuyá Jesus “Mariya” tímiayi.

Tutai niisha ayanmar “Rapuni” tímiayi. Nusha Israer-chichamnum “Uuntá” tawai.

¹⁷ Jesussha tímiayi “Emetruawaip. Winia Aparuj wáatsjai. Antsu weme Wíi shuar titiá “Winia Aparuj nayaimpiniam wéajai. Niisha atumí Aparinti. Winia Yúsruti tura atumí Yúsrinti” tawai titiá” tímiayi.

¹⁸ Nuyá Máktaranmayá Marisha Jesusa unuiniamurin wáiniak “Wi Úuntan wáinkiajai, tímiayi. Niisha juna mash túrutui” tu ujakarmiayi.

Jesus ni unuiniamurin wantintuikmiania nu

(Mateu 28.16-20; Márkus 16.14-18; Rúkas 24.36-49)

¹⁹ Nu tsawantaj, tumintin, ni unuiniamurj Israer-shuara úuntrin ashamainiak kashi iruntrar waiti epeni pujuarmiayi. Túrasha Jesus áyatik wayamiayi. Tura ajapén wajas “shuir pujustarum” tímiayi. ²⁰ Nuna tí, nuyá ni uwejen ajintruamuncha ni paen ijiumuncha iniakmasmiayi. Ni unuiniamurisha Úuntrin wáinkiar shiir warasarmiayi. ²¹ Ataksha Jesus “Shiir pujustarum, tímiayi. Winia Apar akatar akuptukma núnisnak Wisha akatran akupeajrume” tímiayi. ²² Nuyá ni matsatmanumaanj umpuá tímiayi “Yusa Shiir Wakanj atumí enentáin wayajai. ²³ Shuara tunaarjñkia átum “asakárti” tákurminkia tsanjurnartatui. Tura nu shuar “sumamati” tákurminkia tuke sumama pujawai” tímiayi Jesus.

Tumas Jesus nantakniun wáinkiamiania nu

²⁴ Tura chikichik unuiniamu, Jímiampramu Tumas, Jesus tamia nuj pujuchmiayi. ²⁵ Tura ukunam chikich unuiniamurj ujainiak “Ii Uuntri wáinkiaji” tiarmiayi.

Tura Tumas tímiayi “Ajintruamurj wáinkian uwejrún awáintiuatnuiitjai. Tura paenumsha awáintiuatnuiitjai. Penké jaka asamtai aya nujaí iniantkimiun enentáimtustatjai” tímiayi.

²⁶ Chikich tumintin ataksha Jesusa unuiniamurj iruntrararmiayi. Nuiñkia Tumassha niijjai pujuarmiayi. Tura waiti epenimanan Jesus wayá ajapén wajas “Shiir pujustarum” tímiayi. ²⁷ Nuyá Tumas tímiayi “Winia uwejur ísam ame uwejem awáintiuata. Núnismek winia paeruj uwejem awáintiuam ístá. Tura arantutsuk nekas enentáimtusata.”

²⁸ Nuyá Tumas “Winia Úuntru, nekas winia Yúsrutme” tímiayi.

²⁹ Jesussha tímiayi “Winia wáitkiam nuñ enentáimtusame. Antsu Winia wáittsuk enentáimturaru nekas shiir ániawai” tímiayi.

Shuar Yusa Uchirín enentáimtusarti tusa ju papi áarmaiti

³⁰ Aentsti tujintiamuncha Jesus túramu ti untsurj ju papinium áarchamu ániawai. Tura ni unuiniamurj mash wáinkiarmai. ³¹ Antsu Jesuska Kristu asa Yusa Uchirinti tu enentáimtustarum tusan júnaka áarmajai. Tura enentáimtakmin Jesus ni iwiaakmarin yamarmama nuna amastatui.

21

Entsá yantamnum Jesus siati (7) unuiniamurin wantintuikmiania nu

¹ Tipirias antumianka káanmatkarin Jesus ni unuiniamurin wantintuikmiayi. Júnisan ámiayi. ² Semun Pítrusha Jímiampramu Tumassha Kananmayá Natanaérsha Sepetéu uchirisha tura chikich jímjar unuiniamurisha métek iruntrar pujuarmiayi. ³ Semun Pítrusha “Namakan nekajai nankiattsan wéajai” tímiayi.

Chikich mash “Iisha winittiaji” tiarmiayi.

Wéar uunt kanunam enkemprar nu kashi achitsuk tsawararmiayi. ⁴ Káshik ajñ Jesus entsá káanmatkarin wantinkiamiayi tura ni unuiniamurisha Jesusan nekaacharmiayi.

⁵ Jesussha tímiayi “Uchiru, ¿namak achikiurmek?”

Niisha “Átsá” tiarmiayi.

⁶ Tutai Jesus tímiayi “Neka untsuurnumaanj ajunkatarum. Nuñ achiktatrumé.”

Nii timia núnisan túrawar namakan ti achikiar nekan júsatriun tujinkiarimiayi. ⁷ Nujajñkia Jesusa unuiniamurj Jesus ti aneemia nu Pítrun tímiayi “Ii Úuntrinti.” Takui Pítrusha ámiaku asa ni pushirín entsar entsá inianmiayi yukuak jeataj tusa. ⁸ Chikich unuiniamurisha jeachat pujuiniachuk nekan japiki kanujai káanmatkanam jeawarmiayi. ⁹ Káanmatkanam jeawar ji kajir ámanum namakan jiámun wáinkiarimiayi. Tantanha wáinkiarimiayi. ¹⁰ Jesussha “Átum achikiurmena nuyá jiátin itiatarum” tímiayi. ¹¹ Tutai Semun Pítiur kanunam we nekan nekartiuk káanmataj japiki itiamiayi. Itiar namaknasha siantu senkuenta nuyá tres (153) nekapmararmiayi. Ti untsurj áyat nekasha jáankachmiayi. ¹² Nuyá Jesussha “Yurumáitiarum” tímiayi. Ni unuiniamurisha “aya ii Uuntri áminiaiti” tusar inintrustinian natsantiarmiayi. ¹³ Nuyá Jesus wajaki tantan jukí súsarmiayi. Núnisan namaknasha súsarmiayi.

¹⁴ Jesus jakamunmayá nantaki jujai menaintiu ni unuiniamurin wantintuikarmiayi.

Jesus Semun Pítrujai chichasmiania nu

¹⁵ Nuyá yurumáwar Jesus Semun Pítrun aniasmiayi “Junasa uchirí Semunka, ¿ju shuar nankaamas anentmek?”

Pítrusha tímiayi “Ee, Uunta, wi wakerajam nu Ame nékame.”

Jesussha “Nuiñkia winia murikiur ayuratniua áintsam Winia enentáimturania nu yaintá” tímiayi. ¹⁶ Ataksha aniasmiayi “Junasa uchirí Semunka, ¿Winia anentmek?”

Pítrusha “Ee, Uunta, wi wakerajam nu Ame nékame” tímiayi.

Jesussha “Winia murikiur wáinkiatá” tímiayi. ¹⁷ Nú ataksha aniasmiayi “Junasa uchirí Semunka, ¿winia wakerutamek?”

Pítrusha menaintiu iníam kúntuts enentáimiar tímiayi “Uunta, ashí nékame. Wi wakerajam nu Ame nékame.”

Jesussha tímiayi “Winia murikiur ayurata. ¹⁸ Maa, nekas tájame. Natsa asamka iwiarmampram ame wakeramunam wéuyame. Tura úuntach ajasmeka ame kunturam ayaparakmin chíkich aentstamprattawai tura ame wétin nakitiam nu juramkiartatui.”

¹⁹ Jesus nújainkia Pítiur máatniun ujakmiayi. Tura núnisar jakamtai shuar Yúsan shiir awajsatniun ujakmiayi. Nuyá Pítrun “Nemartusta” tímiayi.

Juan túrunatniun Pítiur Jesusan aniasmiania nu

²⁰ Pítrusha ayanmar chíkich unuiniamurín Jesus ti anea nuna némarun wáinkiamiayi. Kame nu unuiniamuka nuik Jesus jáatsain yurumániakui “Uunta, ¿ya surutmaktata?” timia núiti.

²¹ Nincha Pítiur wáiniak Jesusan aniasmiayi “Uunta, ¿jusha warí urukatniuit?”

²² Jesussha ayak “Wi wakeraknaka iwiaaku pujain tátatjai tminiaitjai. Nuna tákuisha ¿warí itiurtama? Ámeka nemartusta” tímiayi. ²³ Nújainkia “Nu unuiniamurí jákashtatui’ tusa Yus-shuarnum áujmatiamiayi. Túrasha Jesus “jâkashtatui’ tichamiayi antsu áyatik “Wi wakeraknaka iwiaaku pujain tátatjai takuisha ¿warí itiurtama?” tímiayi. ²⁴ Wikia nú unuiniamuríntjai. Ju papincha aaru asan “mash nekasaiti’ tajai. Ashí shuarsha núnisaran tuíniawai.

²⁵ Nu arantcha ju áarchamusha ti awai. Kame ashí áamka ti untsurí papí asa ashí nunkanam ikiuschamnia ainti. Nuke atí.

Jesusa Akatramurj Yusa Wakanjjai **TÚRAMU**

Yusa Wakanjn nákasarmiana nu

¹ Amikiur Tiúpiru:

Nuik akupkamiaj nú papinium ashí Jesus túramia nuna áatramiajme. Tura unuuti-ampramij nunasha áatramiajme. Yámankamtaiknumia, ² nayaimpiniam wétsuk, ashí Nii túramia nuna tímiajme. Jesuska, nayaimpiniam wakétsuk Yusa Wakanj kakarmarjjai túratniua nuna ni akatramurjn jintintiwarmiaji. ³ Tura jaka nantaki, Jesus tímiajalk wantintiuukmiaji ni akatramurjn. Tura kuarenta (40) tsawant nin wantintiuukarmiaji. Nuna tura nekas iwiaakjai tusa iniakmasmiaji, nekaawarat tusa. Tura Yusa akupeamurj urukukit nuna mash ujakmiaji.

⁴ Jesuska ni akatramurjjai tuke pujus, nin chicharuk “Jerusarénumia wéerap, tímiaji. Winia Apar “amastatjai” tímia nuna, paant ujakchamkajrum. Nu túrunat tusarum Jerusarénum nákastarum, tímiaji. ⁵ Tuke enentáimsatarum. Juan entsajaj atumí ayashjn imiatmimiarme. Túrasa warik Yusa Wakanjsha atumniasha tarutmar, atumí enentájn enkemprutmattarme. Nusha enentájn imiantin áintsanжете” tímiaji.

Jesusa nayaimpiniam wakamiania nu

⁶ Tura Jesusaj irunar matsamas anintriarmiaji “Uunta, Israer-shuar ájinia nu, ankant ajasakrin iiniuk Akupin atak naamkatin yamaí jeayash” tiarmiaji. ⁷ Jesus áimiuk tímiaji “Winia Apar túratana nu warí tsawantinik túrunatí nu nekaatniusha atumniachuiti. Apar Niñki neka asa ni kakarmarjjajjn túratawai. ⁸ Tura atumsha Yusa Wakanj kakarmarjn sunastatrum. Nii taa enkemprutmamtaí kakaram ajasrum, Wíi túramu etserkattarme. Emka juí Jerusaréjn péprunam etserkattarme. Nuyá ashí Jutía núnkanam, tura arant Samaria nunkanmasha, tura nú arant ashí núnkanam werum, Wíi túramu etserkattarme” tímiaji Jesus.

⁹ Nuyá chichas amir, ashí ni akatramurj ii wajainiaj, Jesus nayaimpinmaanj junakmi-ayí. Wéa-wéakui yurankim mash Nin amúámiaji. Tuma asamtaí ni akatramurj Nin wáinkiacharmiaji. ¹⁰ Tura Jesus waakkui ni akatramurjsha yakí ii wajainiaj, jimiará áishman paju entsaru nuí wantintiuukarmiaji. Tura ayamach wajattsarmiaji. ¹¹ Nu áishmansha Jesusa akatramurjn tiarmiaji “Kariréanmaya áishmanka, çurukamtaí nayaimpinmaanj imiá ímprum? Ju Jesusak atumiyá nayaimpiniam wea wáinkiarumna núnisan ataksha winitti-awai” tiarmiaji.

Matiasan anaikiarmiania nu

¹² Tuasua amikmataí Jesusa akatramurj Uriwiu náinniumia akaikiar Jerusarénum waketiarmiaji. Uriwiu naincha Jerusarénumsha tjiuchiiti, chikichik kirumitrua núnisan. ¹³ Tura Jerusarénum jeawarmiaji. Nuí jeawar, jeá wayawar yakí wákararmiaji. Nuí Pítrusha, Jakupusha, Juansha, Antressha, Jiripisha, Tumassha, Parturumísha, Mateusha, tura Arpeu uchirj Jakupusha, nuyá ásump Semunsha, Jakupu yachj Jútassha, tímian wayawarmiaji. ¹⁴ Jusha mash tuke iruniarmiaji Jesusa yachjjai. Tura Jesusa nukurj Marijjai, nuyá chikich nuwajajsha tuke iruniarmiaji, Yus áujsataí tusar. ¹⁵ Nuí siántu painti (120) aents iruntrarmia nuí Pítiur chichastaj tusa wajakmiaji.

¹⁶ Pítiur juna tímiaji “Yatsurtírmesha, umarutírmesha antuktarum. Yuska yaunchu ni Papirijn Jutasan áamtikramiaji. Jútas akiintsajn Tawitkia, Yusa Wakanj jintintiam Jutasan áarmiaji. Jesusan achik surukarmia nú shuaran nekapruamia núiti. Kame Tawitia áarmarj Yus-Chicham asa tímianak uminkiatniuyi. ¹⁷ Nú Jutaska ii írutramuitiat, ii takaamurjn páchitkaiiat, ¹⁸ tuná tura nujai kuítian achik nunkan sumakmiarmiaji. Tura piniakum iniaanj tantanę páttimiyi. ¹⁹ Tuma asamtaí ashí Jerusarénum pujuarumia nu, nuna nekaawar nú nunkan “Numpa Nunka” anaikiarmiaji. ²⁰ Kame Sarmu papinium Tawitkia juna áarchamkia:

“Ni jeesha itiarak atí.

Nu jeanmanka penké pujuschartí.” Tura

“Ni takatrj chikich atankiti.”

Tu aarmaiti’ tímiaji.

²¹ “Tuma asamtaí yamaikia chikich anaikiatniuitji. Tura nápkamas achikchatniuitji.

Antsu ii nemartamkau atí. Uunt Jesus iijjai pujumia nuí tuke Nin nemarsamia nu atí.

²² Juan Jesusan imiaimiania nú tsawantnumia jukí, Jesus nayaimpiniam wémiania nú

tsawantan tímianu ejé tuke Nijjaj wekaimia nu atí. Nu shuar enentáimtusar, chikichik achiktai. Iisha iruntrar Jesusa nantakmiarj etserkamí tusar túrami” tímiaiyi Pítur.

²³ Tura nuyá jimiara shuaran anaikiarmiaiyi. Matíasan anaikiarmiaiyi. Tura chikich-nasha Jusen, ni chikich naarij Parsapas, tura apach náarinikia Justu, nunasha anaikiarmiaiyi.

²⁴⁻²⁵ Tura nuyá Yus-shuar Yúsán áujainiak juna tiarmiaiyi “Ii Uuntri, Amesha ashí shuara enentáí nékame. Juí awai jimiara áishman. Jútas tunáa túrak jákatniunam wéak akatramu takatan ikiukmiaiyi. Yamaikia Jútas takatj achikiat tusam, ¿tuá achikium, Uunta? Paant iniakmasta.” Tu aujarmiaiyi.

²⁶ Tura Israer-shuara túrutairj núnisan, wats yaki nupetmakat tusar túrawarmiaiyi. Tura Matías nupetmakmiaiyi. Túrunamta Matíasnak pachikiarmiaiyi.

2

Yusa Wakanj taramiania nu

¹ Pintikiustís náartin jísat jeamtaí, chikichik jeanman nuin Yus-shuar tuakarmiaiyi.

² Tumaj aya aneachma nayaimpinmaya nasea áintsan téter ajaki winian antukarmiaiyi. Ashí mash jeá pujuarmia nuka antukarmiaiyi. ³ Tura nuí pujuiniáj ji wajaí kea áaniun wáinkarmiaiyi. Túruna ankant ankant puunak tarurarmiaiyi. ⁴ Tuma asamtaí Yusa Wakanj ashí ni enentáin pimiutkarmiaiyi. Túram chichasarat tusa Yusa Wakanj ni nekatairj súarmiaiyi. Tuma asamtaí nuaj niisha chikich chichaman chichasararmiaiyi.

⁵ Nuí Jerusareñnum Yus táman umirin Israer-aents ármiaiyi. Ashí nunkanmaya Jerusareñnum taar matsamarmiaiyi. ⁶ Tura túrunamia nuna antukar káunkarmiaiyi. Tura ashí shuar ni chichamejain chichaamun antukarmiaiyi. Tuma ásar, warinkit, tu enentáimsarmiaiyi. ⁷ Nekaachar ashankarmiaiyi. “Warinkit, tunaim ajarmiaiyi. Ju aents chikich chikich chichaman chichainia nu, ashí Kariréanmayanchukait, tiarmiaiyi. ⁸ Tura iisha ankant ankant ii chichamenka ántatsjik. Ausha urukainiakua, nunak chichainiawa, tiarmiaiyi. ⁹ Juí ashí nunkanmaya aents pujuiniatsjik. Partianmaya, Eramnumiasha, Misiputámianmayasha, Puntanmayasha, tura Asia nunkanmayasha, ¹⁰ Prijiannmayasha, Pampirianmayasha, Ejiptunmaya tura Áprikianmaya Serinia nú nankaamasnumiasha pujuiniatsjik, tiarmiaiyi. Nuyasha ii shuarsha Ruma pérunmaya yaunchu taar juí matsataniawai. Chikichcha tuke Israer-shuar áiniawai. Tura chikichcha Israer-shuar ajastaj tusa Israer túrutairin mash túruiniawai. ¹¹ Kritianmayasha Arapiannmaya pujuiniájii. Tura ashí mash ii chichamejajsha Yusa péñker túramurj ántaji” tiarmiaiyi.

¹² Ashí aents nuna nékachu ásar ashankarmiaiyi. Tura nuámtak aniniaysarmiaiyi “¿Warinminiait ju?” ¹³ Tura chikichcha wishikiarmiaiyi. “Nampeku ániatsusash” tiarmiaiyi.

Pítur ujakmia nu

¹⁴ Nuinkia Pítur, chikich áuntse Jesusa akatramurjijaj wajaki, kakantar chichasmiaiyi. Chichaak tímiaiyi “Jutianmaya shuartiram, Jerusareñnumiatirmesha antuktarum. Wi titiatjana nu antukrum péñker enentáimpratarum. ¹⁵ Ju áishman, nampekarai, tárumna nu, nampekarai. Wari, nantu imiá ishichik takuni. ¿Áisha itiuarak?” ¹⁶ Ántsu Yúsnan etserin, ni naari Juér, yaunchu áarmia nu, yamá túrunayi, tímiaiyi.

¹⁷ Juna áarmiaiyi: “Yus tawai “Jú núnka amuukatín jeatemamtaí, winia Wakantrun ashí áentsnum akupkattajai, yumi yaraanua áintsan. Atumí uchirj, atumí nawantrjsha Yusa chichamen áujmatiatatui. Tura nátsaka íimariartatui. Tura uuntka mesekrami-artatui. ¹⁸ Tura áishmansha nuwasha winia takartin ainia núnka winia Wakantrun akuptukartajai. Túram niisha Wíi túramun áujmatiatatui. ¹⁹ Yaki nayaimpiniam, aents túrachminian iniakmastatjai. Tura nunkanmasha winia kakarmarun iniakmastaj tusan numpancha, jiniasha, mukuintioncha yuranmia áintsan akupkattajai. ²⁰ Tura tsawái nantusha jakinkiatawai. Tura nantusha mushatnar numpa núniktatui. Uunt tsawant achikimajna nu jeatsain, túrunattawai. Nú tsawantcha imiá nekas uunt átatui. ²¹ Nuinkia ashí shuar nekas winia kakarmarun seana nuka uwemprartatui” tímiaiyi Yus.”

Núnis Juér áarmiaiyi? tímiaiyi Pítur.

²² Tuke chichaak: “Israernumia shuartiram, wi titiatjana nu antuktarum. Nasarénumia Jesusnan tajai. Nú Jesusan Yus shiir enentáimtaiawai. Yuska, átum ti enentáimprarum ni kakarmarj paant nekaatarum tusa, nú Jesusan ti ikiakármiaiyi. Tura Jesusajai aentsti túrachminian Yuska túramiaiyi, átum íimmianu. Nuka ti paant nékarme, tímiaiyi. ²³ Tura Jesus surunkamia nuna Yuska yaunchu, túruntsain, paant nekaamiyai. Túrasa Yus enentáimmia nuaj métek túrawarmiaiyi. Tura atumek emetarum Jesus jukimiarne. Nú arant, krúsnum máatarum, tunáa shuar tímiarne. ²⁴ Túramunak Yus Jesusan jákatniun nupetmamtik iniantkimiyai, tuke jákachmin asamtaí. ²⁵ Iimiata, ii uuntri Tawit Jesusnan kantamprua juna áarmiaiyi: Úuntan tuke pujurtan wáinniajai. Winia pujurtakuí awajkamú áhattajai.

²⁶ Tuma asamtai winia enentáirjaisha Nin shiir enentáimtusmiyai. Tura wenurjaisha shiir chichaman chichamiyai. Jáaknasha shiir enentáimsan jakattajai, aneantiniapitjia tusan.

²⁷ Winia wakaniur, Yusru, jákatniunam ikiirtuschattame. Wi ame Uchirmetjai, Tunaarincha. Túmaikui anentu asam ayashur káurtin tsankatruckhattame.

²⁸ Tura iwiaaku átin jintinrutamame. Tura tuke pujurtakum waramtikrustatme. Tu áarmiayi Tawit' tímiayi.

²⁹ Pítiur tuke chichaak: 'Páantchakait. Ii uuntri Tawit yaunchu jákai. Tura iwiansamuiti. Ni iwiansamuri iinj pujatsuk. ³⁰ Túrasha Tawitkia Yúsnan etserniuyayi. Tuma asa Yus tímia nuna nekaamiayi. Yus Tawitian chicharuk tímiayi "Ame akupniuitme. Nekas tájame, ukunam ame iniannamurminian Kristu akiiniattawai. Niisha Akupin anainiaktatui, amea áintsan." Nuna Yus táman Tawit nekaamiayi. ³¹ Neka asa, túruntsain Tawit, wainkia nútiksan, Kristu nantaktintri áarmiayi. Kristu túrunatniurin chicharuk tímiayi "ni wakanincha jákatniunam ikiukchatniuyi. Ayashincha káurtinian tsankatshatniuyi." ³² Au Kristun tímia nu Jesusaiti. Nu Jesusnak Yus iniantkimiayi. Nuka iisha neka asar étsereaji. ³³ Yuska, Jesus nankaamantuiti tusa ni untsuurinj apujsaiti. Tura ni Wakanin Jesusan súsaiti, Nii yaunchu tímia nútiksan. Tuma asamtai jusha átum antukurmena nuna, tura ísurmena nunasha Yus suramsaiti. ³⁴ Tawitkia ayashtiuk nayaimpiniam wákachmiayi. Tura nú Tawitiak juna áarmiayi:

"Uunt Yus winia Úntrun tímiayi "akupin pujutainium, winia untsuurujinj pujustá.

³⁵ Ame nemasrumin nupetkattajai. Nu túruntsain juj pujustá' tímiayi."

Nuní áarmaiti Jesusnan, tímiayi. ³⁶ Tura ii, Israer áentsti, Jesus krúsnun maaitji, tímiayi. Jú Jesus máamjinia nuna Yuska Uunt Akupin anaikiamiayi. Túrasha Jesussha in uwentikiartin Kristuiti. Ashí áentstíram nu pénger nekaatarum" tímiayi Pítiur.

³⁷ Nuna antukar wake mesekarmiayi. Tura Pitruncha chíkich akatramuncha aniasarmiayi "Yatsuru, ¿nuñkia iturkatjik?" tiarmiayi. ³⁸ Tutaí Pítrusha chichaak "Atumí tunaarí iki- iuktiaj tusarum Yus nekas enentáimtusarum. Tura ashí shuartíram Jesukristu naarí pachis- rum imiantiarum. Nuñkia atumí tunaarin Yus tsankurtamprattarme. Túrunawakrumin Yuska ni Wakanin suramsattarme, tímiayi. ³⁹ Yus tímia nuka atumin túramprume. Atumí uchirincha tura ashí arant matsatina nunasha tawai. Kame ii Yusri áentsun untsuktaj tusa wakerana nuna tawai" tímiayi.

⁴⁰ Nú chichamjai tura nuyasha Pítiur tuke jintintuik tímiayi "Yajauch shuara asutiátniuri átatna nuyá uwempratarum" tímiayi. ⁴¹ Tuma asamtai nuna antukarmia nuka imian- niarmiayi. Nú tsawantaj menaintiú mir (3000) aents Yus-shuar ajasarmiayi. ⁴² Ashí nu shuar Jesusa akatramurj jintintiarma nuna tímatrusan antukarmiayi. Tura irunar shiir enentáimtusaisar yurumin áarmiayi. Túrawar, Kristu enentáimtustin namperin najanin áarmiayi. Túrawar Yúsan áujiarmiayi.

Yus-shuar pamparamiania nu

⁴³ Tura Yuska aentsti túrachminian Jesusa akatramurjijai túramiayi ni kakarmarin iniak- mastaj tusa. Tuma asamtai ashí aents nuna wáinkiar ashankarmiayi. ⁴⁴ Yúsan umirkaruka ashí métekrak pujuarmiayi. Tura ashí niiniu armia nuna sunaisarmiayi. ⁴⁵ Ni nunken surukar, ni takakmarincha surukar, atsumainia nuna súarmiayi. ⁴⁶ Tuke tsawantak Yusa Uunt Jeeen káuniarmiayi. Tura ni jeeencha iruntrar warainiak Kristu enentáimtustin námper najanin áarmiayi. Tura nankaamantu enentáimtusatsuk, yurumkan ajamnainiarmiayi. ⁴⁷ Túrawar, Yuska ti úuntaiti, tu wearmiayi. Tura ashí aents nin shiir enentáimtiarmiayi. Tura Uunt Yus tuke tsawant shuaran uwentikiar Yus-shuar írunmanum íkaupki wémiayi.

3

Wekaicha wekasamiania nu

¹ Chíkich tsawantaj, nantu nunkaach ajasmatai, Pítiur Juanjai, Yusa Uunt Jeeen Yus áujasatai tusar wearmiayi, Israer-shuar tuke turin armia nútiksaran. ² Tura áishman, ni akiiniamurinjia wekaicha amia nu, nuj aa wáitiniam tuke tsawant pujumiayi. Nu áishmannasha ni shuarj entsakí júkiar nu wáitiniam apujin áarmiayi, nu shuar wayan kúftian seat tusar. Nú wáitisha, Shiir Waiti, tutajyayi. ³ Tura nú shutuapsha Pitrun Juanjai wayan wáinkiamiayi. Wáiniak kúftian seamiai. ⁴ Tura Pítiur Juanjai apajas ísarmiayi. Tura nú áishmannasha chicharuk "Íirsata" tímiayi. ⁵ Aishmannasha, surustatuapi, tu enentáimias, ímsamiayi. ⁶ Nuyá Pítiur chichaak "Kuítrusha atsawai, tímiayi. Kurisha atsawai. Antsu kúftjai nankaamas takakjana nuna amastajai. Wats, Nasarénumia Jesukristu kakarmarijijai wajakim wekasata" tímiayi.

⁷ Tinja iniais, Pítiur ni untsuurinj achik awajkimiai. Túram ni nawesha, wanusesha kakaram ajasmiai. ⁸ Tura niisha wajakí nantent ajakmiayi. Nuyasha wekasamiayi.

Tura Pítrujajsha Juánjajsha Yusa Uunt Jëen wayawarmiayi. Nuik shutuapka wayá nantent nantent ajak Yusa náarin shiir pachimiayi. ⁹ Ashí aents pujuarmia nu, nin wekaan wáinkarmiayi. Tura ni chichamen anturkarmiayi. ¹⁰ Tura chichainiak “Nuik Yusa Uunt Jëen wáitirin, Shiir Waiti tutainium, nu áishman tuke pujuuya núchakit” tiarmiayi. Tura ni túrunamurin nekaawar, ti ashamkar nusháa enentáimsarmiayi.

Pítiur ujakmiania nu

¹¹ Shutuapka pénger ajasu asa Pítrujaj Juánjajsha penké tsurachmiayi. Tura aents nuí pujuarmia nu, warinkit tusar, jeáshkirj tsékenki wearmiayi. Nuka Sarumúgna tiniu ármiai. ¹² Aents káunkarun Pítiur wáiniak, chicharuk “Israer-shuartiram, ¿urukamtai winiasha imiá írum? tiarmiayi. ¿iisha pénger asarik’ tsuarmaj’? ¿Ii kakarmarjijainkik’ ewekamsamaj’? ¹³ Atsá. Antsu Yuska ni Uchirin Jesusan ashí nankaamantu awajsaiti. Ii uuntri Apraamsha, Isaksha tura Jakupsha enentáimtin armia nú Yusan tajai. Átumka Jesus nakitrarum kapitián Piratú surukmarme. Tura Piratu akupkataj tau atumsha suritkiarmarme. ¹⁴ Jesus pénger nákak enentáimniuyana nu “akupnakchati” tímiarme. Antsu shuáran main akupnakat tusarum wakerimarme. ¹⁵ Túrarum iwiiaaku átinian Amaana nu maamarme. Tuma aijn Yuska Nin jakamunmayá iniantkimiai. Nuka iisha neka asar étsereaji. ¹⁶ Tura ju aishman juj wajaana ju tura nékarmena ju, Yusa Uchiri naari enentáimta asa kakaram ajasuiti. Jesus enentáimtusasa asa nekas pénger ajasuiti. Nusha wáinniu asarum nékarme’ tímiayi.

¹⁷ ‘Wats, yatsurtiram, wi nékajai. Atumsha atumí úuntrijjai Jesusan túramarmena nu nékatsuk túramarme. ¹⁸ Tura nu túramurmijjai Yus yaunchu tímia nu tímanak umikiurme. Ni Kristuri wáitsatniuya nuna Yuska ashí ni etserniurjin áamtikramiai. ¹⁹⁻²⁰ Wats, yamaikia tunaaruminiá kanaktiarum. Túrarum Yúsnumaanj ayantártarum, tunaarun asakárat tusarum. Túrunawakrumniákia, atumin uwemtikramprarat tusa Yus yaunchu anaikmiania nuna akupturmaktarume. Nusha Jesukristuuti. Tura Niijjai enentáimin ayampratin átatui. ²¹ Tura yamaikia Jesukristu nayaimpiniam pujustiniaiti, ashí iwiarnatsajin. Yuska ukunam ataksha nunkan shiir awajsattawai. Nuna ni etserniurjin tsáapin enentá takaku armia nuna yaunchu áamtikramiai. ²² Tuma asa Muisais ii aparin wina:

“Atumí Uunt Yusrj ukunam etserniun akupturmaktarume, winia akuptukmia núnisan. Nuámtaktirminiá achik akupturmaktarume. Tura nii títiatna nu umirkatarum” tímiayi. ²³ Náñkamas aents nu etserniun chichamen umiáchkunka emesnartatui. Tura Israer-shuarnum páchitkia áchattawai.

Núnisan áarmiayi Muisaissha’ tímiayi.

²⁴ Pítiur tuke chichaak ‘íimiata, Yúsnan etserin Samuer ju tsawantin túratniuri etserkamiayi. Nuyá ashí Yúsnan etserniusha tuke nuna etseriarmiayi. ²⁵ Etseriarmia nuka atumin túramprume. Tuma asa átum pénger pujustinian Yuska ii uuntri Apráaman ju chichaman susamiayi. “Nekas tájame, ame shuarum akiiniattana nujai ashí áentsnasha shiir awajsattajai’ tímiayi. Tura ii úntrin tímia núnaka incha túramji, tímiayi. ²⁶ Íimiata, Yus ni Uchirin iniantkimia nuí, atumin emka akupturmakmiarme. Atumsha, atumí tunaariya kanaktiarum tusa, tura atumin shiir awajtsatniun wakerak túramiai.” Nunak tímiayi Pítiur.

4

Pitruncha Juánnasha kajerkarmiania nu

¹⁻² Pítrusha Juanjai Yusa chichamen áentsun jintintiainiak pujuarmiayi. Jesus nantakin asantai aencha nantaktin áiniawai, tiarmiayi. Tura chichaak pujuiniá Israer-patri táarmiayi. Tura Yusa Uunt Jëen wáinniu úntrijsha Satuséu aentcha táarmiayi. Taar Pitruncha Juánnasha kajerkarmiayi, niisha Jesusa nantakmarj chichaman jintintinia asantai. ³ Yamaikia kíawai, kashin iismí tusar achik sepunam enkea iniaisarmiayi. ⁴ Tura Pitrun nuik anturkarmia nú aents unsurj Yus-shuar ajasarmiayi. Nuik Yus-shuaraim tura yamaiyaím iruram ti unsurj ajasarmiayi. Aya áishmankak, senku mir (5000) aents ármiai.

⁵ Kashin tsawarmatai Israer-shuara akupniurj, ni úntrijsha, tura ni jintinniurjsha Jerusarénum iruntrarmiayi. ⁶ Nujsha Anassha, Israer-patri uuntri anaikiamu amia nu, tura Kaipiassha, Juansha, Arejantrusha, tura Israer-patri kapitiantri shuarjsha tíman iruntrarmiayi. ⁷ Iruntrar Pitruncha Juánnasha utitiarum tusar akupkarmiayi. Tura itiamatai, ajapén awajsarmiayi. Tura aniasarmiayi “Kame ¿yana kakarmarjijai, yana chichamejai túrarum?” tiarmiayi. ⁸ Tutai nuyá Pítiur, ni enentáin Yusa Wakanj pímiutkamusa asa tímiayi “Akupniutiram, tura úuntirmesha antuktarum. ⁹ Ju áishman nuik shutuap amia nu pénger ajasmari anintrarme. Kame itiuurak pénger ajasuit tátsurmek. ¹⁰ Urukamtia úuktataj. Anintrakrumin iisha paant títiatji, Israerumia shuar ashí nekaawarat tusar. Ju áishman Jesukristu kakarmarjijai pénger ajasuiti. Nasarénumia Jesukristun, átum máamurmena nuna, tura Yus jakamunmayá iniantkimiania nuna tajai, tímiayi. ¹¹ Nú Jesuska kayaa

áintsapkete. Atumsha jeamniutiram, nú kaya yajauchiiti, tímiarme Jesusna. Túrasha túramaitatān Niisha jeānam emka apujsamua núnisan ajasuiti, tímiayi. ¹² Tura chíkichjaj uwempratin penké atsawai. Ju nunkanam ii chíkicha naarj pachisar uwempratin atsaji. Jesuskete ii uwentikrampratniun Yus suramsamij nu” tímiayi Pítur.

¹³ Pítrusha Juānsha nánpkamas shuara áintsān ármiai. Núkap unuimiarcharu ármiai. Tura unuimiarchaitat, arantutsuk etseriarmiai. Aentsu uuntri núnaka nekaawar “Nékachuitiat, itúra sapijmiatskesha chichainia” tiarmiayi. Tura, júsha Jesusa nemanin ármia núiti tiar nekaawarmiai. ¹⁴ Nuyasha áishman péñker ajasmia nu níijjaj nuj wajamiayi. Tuma asamtai, niisha aj wajakui, Israer-shuara úuntriñkia, péñker ajaschaiti titiai tukamá tu-jinkiarmai. ¹⁵ Tuma ásar, iik nuamtak áujmatsatai tusar, Pítrusha Juānsha shutuapsha aa awemartai, tiarmiayi. ¹⁶ Tura áujmatainiak tiarmiayi “Ju Pítrusha ju Juānsha iturkatij. Ju uunt túrunamun Jerusarénnum matsatainia nu ashí nékainiatsuk. Wáitaiiti titin tujintiaji, tiarmiayi. ¹⁷ Tura, ashí aents nekaawarajñ tusar yamaik jiaktai. “Ju Jesusa naarj pachisur penké jintintiarwarairap,” titiai” tiarmiayi.

¹⁸ Tura árusān Pítruncha Juānsha shutuapnasha ataksha untukarmiayi. Tura chicharkarmiayi. “Jesusa naarj penké áujmatsairap. Tura Jesusa túramurj penké jintinti-airap” tiarmiayi. ¹⁹ Tutai Pítur Juanjaj áimkiarmiayi “Enentáimpratarum. ¿Yus warinia waker? ¿Iikia Yus umirtsuk atumj chichamēn umirkatniukaitiaji? tiarmiayi. ²⁰ Nekaatarum. Iisha íisjiniia nu, tura antukjiniia nusha ii etsertsuk puwjint tujintiaji.” Tu áimkiarmiayi.

²¹⁻²² Shutuap péñker ajasmia nu kuarenta (40) uwi nánpkaamas takakuyayi. Ni péñker ajasmariñ aents nekaawar, “júka aentsti túrachminiaitji” tusar Yusa naariñ uunt awajarmiayi. Tuma asamtai aentsu uuntri Pítruncha, Juānsha asutiátai tukamá aentsun ashamainiak áyatik chicharkar iniaisarmiayi.

Yus-shuar Yusa kakarmariñ seawarmiania nu

²³ Pítur Juanjaj ankant ajasar ni íruramurjñ waketiarmiayi. Tura jeawar Israer-patri uuntri tura aentsu úuntriñsha nin tiarmia nuna mash etserkarmiayi. ²⁴ Nu ujakam antukar métekrak Yúsān áujuk tiarmiayi “Winia Uunt Yusrū, Amesha nayaimpisha nunkasha najanaitme. Nayaantsasha tura juj írunna nusha najanamiamē, tiarmiayi. ²⁵ Tura Tawit ámin umirtamin amia nu ju áamtikramiamē:

“¿Urukantai ashí nunkanmayā aents charaatum ajainia? ¿Tura Israer-shuarsha urukantai ántar chichaman enentáimainia?

²⁶ Uunt kapitíān ármia nuka chichaman jurusarmiayi Uunt Yúsān.

Tura pepu úuntriñsha iruntrar Uunt Yúsān kajerkarmiayi. Ni anaikiamurjñ Krístun nútiksān kajerkarmiayi.”

²⁷ Tu áarmaiti, Uunta, tura nekasaiti. Erutis apachi kapitíāntri Punsu Piratujaj jú péprunam iruntrarmai. Niisha yajayā shuarjaj tura Israernumia shuaraim nuim iruntrarmai. Ame Uchirmin Jesusan tunaarinchān kajerkarmiayi. Jesuska Ame anaikiamiamē, winia takatrun túrat tusam. ²⁸ Tura amē enentáimjaj iwiaramamna nu uminkiatniuiti. Tura apachcha Jesusan kajerainia ásar, Ame iwiaramamna tímianak umikiarmiayi. ²⁹ Uunta, iisia kajertamainiaj nu. Jes, Áminiu asakrin áujmatramtsujik. Túmaitkuisha amē chichamēn ii ashamsuk etserkatín amē kakarmaram amasta. ³⁰ Tura amē kakarmarmijjaj jaasha tsuártin amasta. Ame Uchiram Jesus tunaaríncha nujaj ii aentsti túrachmin túratniusha amasta. Aents Yusa kakarmariñ nekaawarat tusam túrata” tiarmiayi.

³¹ Tura Yúsān tú áujas umikmatai nuñ irunar pujuiniañ úurkamiayi. Túrunamtai ashí shuara enentáin Yusa Wakanj pimiutkarmiayi. Túmaitkiui ashamsuk Yusa chichamēn etserkarmiayi.

Wíniakete, tícharmania nu

³² Yus-shuar ajasarmia nu, ti untsuritiat, ashí chíkichík enentainiak enentáimainiak, ni takaku armia nuna, aya wíniakete tútsuk, júsha ashí iiniu ainiawai, tiarmiayi.

³³ Tura Jesusa akatramurjsha, Yus ti yayamu ásar, Yusa kakarmarijñ Uunt Jesusa nantakmariñ tuke etseras pujuarmiayi. ³⁴ Tura ashí Yus-shuarka nunkan takakusha jeān takaku armia nusha, núnaka surukar kuítian itiararmiayi. ³⁵ Tura itiaar Jesusa akatramurjñ súarmiayi. Akatramusha susam, niisha atsumainia nuna súarmiayi. Tuma asamtai shuar atsumaka penké atsuarmiayi. ³⁶ Chíkichík shuar, ni naarj Jusé, nunkan takakuyayi. Jesusa akatramurjsha Jusēn chíkich náariñ apujtusarmiayi, Pirnapín. Nu náariñsha, shiir enentáimtikkiartin tawai. Tura Pirnapisha Riwi áentsuyayi. Tura ni akiiniamurjñ núnpkenka Chípriiyayi. ³⁷ Niisha ni nunken surukmai. Tura nu kuítian itia Jesús akatramurjñ súarmiayi.

5

Ananías tunaari

¹ Tura chíkich áishman, ni naari Ananías, ni nuwe Sapirjai ni nunken surukarmiayi. ² Niisha nunkan suruk kuitian emeenak akanak júki Jesusa akatramurjín weri takamtsukea nútikias susamiayi. Ni nuweshá, Sapir, nuna túran nekaamiayi. ³ Túramtai Pítur chíchaak “Ananías, zurukamtai uunt iwianch enentáimin enkemturmatai, Yusa Wakanjín ananjataj tusam nunka surukam kuit achikiumna nu akankam ikiurmasam? tímiayi. ⁴ Entá, nuñkia nunka áminiuchukait. Surukumna nu kuitcha áminiuchukait. Nusha, zurukataj tusamea tu enentaímpam? Amesha aya áentsnum wáitruachume. Antsu Yusnumsha wáitruame” tímiayi Pítur. ⁵ Tutai Ananías nuna antuk nú chichamaik jakamiayi. Tura ashí shuar nuna antuk nekaawar ti ashamkarmiayi. ⁶ Nú turunamtai áishman tariar Ananías jakan penuararmiayi. Túrawar iwiarsatai tusar júkiarmiayi.

⁷ Tura Ananías nuwe arur, menaintiú ura nankaamasaj támiayi. Túrasha ní áishri jakanka nekaachmiayi. ⁸ Támtai Pítur nuwan tímiayi “Turuttia. Átum nunka surukurmena nuj, ¿kuit itiumna núnikik surukuram?” tímiayi. Tutai nuwá tímiayi “Ee, núnik surukji.” ⁹ Tutai Pítur tímiayi “¿Urukamtai atumsha Uunt Yusa Wakanjín nekapkamsatai tusarum imiá enentaímparum? Pai, iisiá. Ame áishrumin iwiarsatai tusar júkiaria nu wininiawai. Tura yamaikia amincha juramkiartatui” tímiayi. ¹⁰ Tutai nu chichamaik niisha imia Pítur wajanunam jaka iniaantmiayi. Aishman wayaj tukamá jaka tepan wáinkarmiayi. Túramtai júkiar ní áishrinj ayamach iwiarsarmiayi. ¹¹ Tura ashí Yus-shuar armia nu tura ashí aencha nuna antukarmia nu ti ashamkarmiayi.

Yusa kakarmarjijai túrawarmiania nu

¹²⁻¹⁴ Tura ashí Yus-shuar Yusa Uunt Jeen shikirjín irunin ármiayi. Nu shikirjisha, Sarumúnna, tu anaikiamuiti. Tura chíkichmamtinkia nuim iruntratniun ashamiarmiayi. Túmainiyatan, ti pénger áiniawai, tu wearmiayi. Tura Yus-shuar Yusa kakarmarjín iniakmasarmiayi. Túra asamtai imiá untsurj aents Yus-shuar ajasarmiayi. ¹⁵ Tura chíkich aents ni shuarj jainia nuna jintiá amantikiarmiayi. Peakjai júkiar, tampunmasha enkeawar júkiar jintiá ayamach áepsarmiayi. Pítur nankaamak ni wakanjínsha enkemprutmawaiti tusar nu shuar túrawarmiai. ¹⁶ Núnisan arantiá shuarsha ti untsurj ni shuarj jainian tura iwianchrukuncha nuj Jerusarénum itiarimiayi. Tura ashí nuj táaruka tsuámararmiayi.

¹⁷ Israer-patri uuntri, tura Satuséu aencha niijjai pujuarmia nu suir iiniak ¹⁸ Jesusa akatramurjín achikiar enkeawarmiayi. ¹⁹ Túrasha kashi Uunt Yusa suntarij nayaimpinmaya tara sepú wáitirj uraimiayi. Tura Jesusa akatramurjín aq júkiarmiayi. ²⁰ Tura tímiayi “Wetarum. Tura Yusa Uunt Jeen wajasrum Yusjai tuke iwiaaku átinia nu etserkatarum” tímiayi.

²¹ Nuna antukar kashin tsawar káshik Yusa Uunt Jeen wayawar jintintiwarmiayi.

Nu túmainiai Israer-patri uuntri, tura niijjai pujuarmia nusha iruntrarimiayi. Tura Israer-shuara uuntri, naamka armia nuna iruntrami tusa untsukarmiayi. Ashí iruntrar akatar akupkarmiayi, Jesusa akatramurjín sepunmaya itiatarum tusar.

²² Tura suntarsha sepunam jeariar Jesusa akatramurjín wáinkiacharmiayi. Atsawai tukam táarmiayi. ²³ Taar chíchainiak “Sepú waiti asakamua tímianisan aa wáinkiaji, tiarmiayi. Tura suntar wáitin iimpru wajainia wáinkiaji. Tura waiti urair wayaj tukamar atsá wáinkiaji” tiarmiayi.

²⁴ Israer-patri uuntri, tura Yusa Uunt Jeen wainniu úntrisha, nu chichaman antukar, “tsej ausha ¿urutiak nunasha iniaisarat?” tiarmiayi. ²⁵ Nu chichamaik áishman taa tímiayi “Aishman átum sepunam enkeamarmena nu, Yusa Uunt Jeen wajasar áentsun jintintiuik pujuiniawai” tímiayi.

²⁶ Túrunamtai Yusa Uunt Jeen wainniu uuntri ni suntarijiai wear achik itiarimiayi. Túrasha penké aents kayajai tukurmarajj tusar, yajauch awajtsuk itiarimiayi. ²⁷ Tura achik itiaar Israer-shuar naamka pujamunam naka awajsarmiayi. ²⁸ Tura Israer-patri uuntri tímiayi “Iisha atumin chícháa chícharu awajsar, Jesusa naari pachisrum etserkairap tusar akupkachmakajrum. Túrasha, ¿antukurmek? Atsá. Mash Jerusarénum átum etserkamupampaikai. Jes, átum, Jesusan máawarai, in tátsurmek. Nusha in makuutai tusarum tárume” tiarmiayi.

²⁹ Nuyá tutai Pítur chíkich Jesusa akatramurjijai chíchainiak “Iikia aentsjainkia iniañkasar Yus emka umirkatniuitji, tiarmiayi. ³⁰ Jesus atumek krúsnum máamurmena nuna ii iwiaaku Yusri Nin iniantkimiayi. ³¹ Yus ni kakarmarjijai Nin nankaamantu awajsamiayi. Tura nekas Akupniuiti tusa ni untsurjín apujamiayi. Tura áentsun Uwemtikniuiti. Israer-shuar enentái yapajjáwar tunaarjnia uwemprarat tusa Yus túrait. ³² Nu tuma asamtai iisha nu nekaar étsereaji. Tura Yusa Wakanjínsha nuna étsereawai. Túrasha aya Yusa umirkarua nunak ni Wakanjín súsaruiti” tímiayi Pítur.

³³Tutai nuna antukar ti kajerkarmiayi. Túrawar, maatai tusar wakermarmiayi. ³⁴Tura nuɓ Israer-shuara uuntri pujumiayi, ni naari Kamarír. Niisha Pariséunam páchitkiauyayi. Tura akupeamun jintinniuriyayi. Túmakui ashí aents nin shiir enentáimtin ármiai. Tura niisha wajaki tímiayi “Ju áishman qa ishichik wajasarti” tímiayi. ³⁵Nuyásha irunar matsamarmia nuna chicharuk “Israer shuairam, ju áishman tú túratai tu enentáimsarumna nu aneartarum. ³⁶Enentáimsatarum. Nuik áishman Tiútas wantinkiachmaka. Niisha kapitániitjai takui, kuaru siántu (400) shuar nemarkarmiayi. Tura ukunam nin maawarmatai, ni nemarkamurjsha pisarmarmiayi. Túrunawar nuni amuukamiayi. ³⁷Ukunmasha, iruntrar nekapmartin tsawantincha Kariréanmaya Jútas wantinkiachmaka. Tura nincha nútiksang ti untsurj nemarkarmiayi. Túman máawarmiayi. Nu túrunamtaí nútiksang ni nemarkamurjsha pisarmarmiayi. ³⁸Jes, tuma asamtaí nu áishman qa wajainia nu iniaisatarum. Auka pachisairap. Au tumainia nu aya áentsnakekuinkia amuukattawai. ³⁹Tura antsu Yúsnaitkuinkia atumsha amuktaí tukamarum tujinkiatarme. Aneartarum. Iniaiyachkurmeke nu tumá pujusrum Yusjají máanikchattarmeash” tímiayi Kamarír.

⁴⁰Tú tutai tímianak umiarmarmiayi. Túrasha Jesusa akatramurjín untsukar asutiáwarmiayi. Tura chicharuk “Jesusa naari pachisrum penké ishichiksha etserkairap” tiarmiai. Tú tiar akupkarmiayi. ⁴¹Jesusa akatramurjsha Israer-shuara uuntri pujamunmaya jíinkarmiayi. Tura wáitsamniaitume tusa Yuska Jesusa naari pachia asakrin ii natsantin wáitsatniun tsankatramkaitji tusar ti shiir enentáimsar wearmiayi. ⁴²Tura Jesukristunum áujmatsatniun penké iniaisacharmiayi. Antsu tuke tsawant Yusa Uunt Jeecha tura chikich jeanmasha páchitsuk etseriarmiai.

6

Yus-shuaran yainian siati anaikiarmiania nu

¹Nú tsawantin Yusan umirkaru ti kawenkar ármiai. Tura tuke tsawant yurumak súsatin ámiayi. Túmakui Yus-shuar Kriaku chichaman chicharmia nu, Israer-shuaran kajeriarmiai. “Tuke tsawantin yurumak súarmena nuɓ atumí waje ti nukap súarme. Tura íniuka ishichik súarme” tiarmiai. ²Túruinia Jesusa tuse akatramurj ashí Yus-shuaran irurar tiarmiai “Isha Yus-Chicham etserkatin iniaisar yurumak súasachminiaitji. ³Tuma asamtaí yatsurtiram, atumíniá siati áishman eáktárum yurumkan súarat tusarum. Penker wekainia nu, tura neka shuar, Yusa Wakanj pimiutkamu ainia nu achiktarum. ⁴Iikia antsu Yus áujkir unuiniakratkir Yusa chichame etserkir wétati” tiarmiai. ⁵Akatramu tiarmia nuna ashí aents enentáimsar pujuarmiai. Túmainiak Estepañkan anaikiarmiai. Estepañsha Yúsan tuke enentáimtinuyayi. Tura Yusa Wakanjsha pimiutkamuyayi. Chikich áishman kan anaikiarmiai, niisha Jiripi, tura nuyá Purukuru, Nikianúrsha, nuyá Temun, Parmenassha, Nikiurássha. Nikiurássha Antiukia nun kanmayaitiat Israernancha ashí umirniuyayi.

⁶Tura nu siati áishman kan Jesusa akatramurjín itiararmiai. Táarmatai, akatramusha, Yus áujtusar, anaikiayi tusar múkunmsha ni uwejen awantsarmiai. ⁷Túrasha Yusa chichamenka tuke pampanki wemiayi. Nuɓ Jerusarénnumsha Yus-shuar ti kawenkararmiayi. Tura imia Israer-patrisha untsurj Yus-Chichaman umiriarmiai.

Estepañkan Israer-shuara uuntriin júkiarmiania nu

⁸Estepañsha Yusa waitnenkartutairj pimiutkamuyayi. Tura Yusa kakarmarjsha pim-iutkamuyayi. Tuma asa aentsti túrachminian shuar irunmanum túramiayi. Nu shuar Yusa kakarmarjín nekaawarat tusa túramiayi. ⁹Israer-shuar iruntai jea, ni naari Ankantín, ámiayi. Nuyá áishman sha tura Serini nun kanmaya áishman sha, tura chikich nun ka Ar-jiantrjanmayasha, Serisianmayasha, Ásianmayasha, tímian Estepañjai áujmatsatai tusar káutkarmiayi. ¹⁰Estepañ Yusa Wakanj nekatairjijai tímian chicháa asamtaí, nu áishman Estepañjai inkiunaikiar nupetkataj tukamá tujinkiararmiayi. ¹¹Tuma asamtaí suir enentáimtuiniak chikich áentsun Estepañkan tsanumprurarar tusar eákararmiayi. Estepañ Mui-saisnasha Yúsnasha yajauch áujmatui, titiarum tusar akikiarmiai. ¹²Penké áentsun, tura uunt ainia nunasha, jintintin ármia nujajsha chichaman júsar yajauch enentáimtikarmiai. Tura Estepañkan jintia akirtuawar achikiarmiai. Túrawar Israer-shuar naamka matsamarmia nuɓ júkiarmiai. ¹³Tura wait chichamtinian itiararmiai. Niisha taar chicharainiak “Yusa Uunt Jee ti penker ana nu, tura Yusa akupkamurjinchaj ju Estepañ tuke yajauch chicharui, tiarmiai. ¹⁴Nú arantcha ju Estepañ tímia nu antukji, tiarmiai. Estepañ chichaak “Nasarénumija Jesuska Yusa Uunt Jee Jee saáktiatui, tura nuyá Muisais in ikiur-tamkimiaj nunasha yapajíattawai” tímiayi. Nusha Estepañ tímia nu antukji” tiarmiai. Tura nunasha penké ántar tsanumprurararmiayi.

¹⁵Nuyásha ashí Israer-shuar naamka iruntramunam pujuarmia nu Estepañkan iiyaj tukamá ni yapin nayaimpinmaya suntara yapiya nuni íran wáinkiararmiayi.

Estepan etserkamiania nu

¹ Tuma wáiniak Israer-patri uuntri Estepan kan aniasmiayi “¿Ju tuinia nu nekaskait?” tímiayi. ² Tutai niisha áimkiamiayi “Winia úntrutirmesha, yatsurtirmesha anturtuktaram. Ii Waantu Yusrj ii úntrín Apráam wantintiuksiayi. Apráamka Misiuputámia-Kartea nunkanam pujaj, Aran nunkanam wéatsaj, nuj wantintiuksiayi. ³ Tura wantintiuksiayi “Ame nunkemsha áminiurmesha ikiukim nunka Wi iniaktustatjamena nuj wetá” tímiayi Yus. ⁴ Tutai Apráam Misiuputámia-Kartea nunkan ikiuki Aran nunkanam pujustaj tusa wémiayi. Nuyá ni aparj jakamtai “Arant wetá” tímiayi Yus. Nuna taku ju nunkan ii pujajnia juj pujsamiayi. ⁵ Túrayat nunkan ishichkisha súsachmiayi ju nunkanam. Antsu “Ukunam amastatjai. Ame jakakmin ame uchirmin susattajai” tímiayi. Tura Apraama uchirj penké atsan nuní tímiayi Yus. ⁶ Nuyasha Yus tímiayi “Ame uchirmesha írara núnisarañ chíkich nunkanam pujusartatui. Nujsha emetamu itit awajtai pujuartatui. Kuatru shántu (400) uwí, tímianu uwí wáitsartatui, tímiayi. ⁷ Túrasha, Wi asutiáttajai ame shuárumin wáitkia núnaka, tímiayi. Túram nuyá nú nunkanmaya shiákartatui. Tura Winia enentáimtusartatui juj nunkanam” tímiayi. ⁸ Yus tuke Apráamnasha chicharuk ‘Yamaikia Wí-shuar asarum tsupirnaktiniaitrum. Tuma asam amesha uchiram áishmañkach akiini-amtai, Wi tímijna núnismek, sirkunsiúñ tutai, shunichirj nuape tsupirkata, tímiayi. Tura chícham Wi yamaikia ámijjai najanaj nu nekas uminkatniuiti tusam nusha túrata” tímiayi Yus. Tuma asamtai ni uchirj Isak akiiniamtai, uchu tsawant nankaamasmatai, Apráam nin tsupirkamiayi. Tura Isaksha ukunam ni tuse (12) uchirj ii uuntri armia nunasha nútiksaj túramiayi. ⁹ Tura niisha ni yachin Jusen suuir íyarmiayi. Túmainiak Ejiptu nunkanam júkariat tusar surukarmiayi. Túrasha Yus némarkauyayi. ¹⁰ Tuma asa, ashí ni ititurcharjiniá uwentikramiayi. Tura waitnenkartutairincha nekatairincha susamiayi. Tuma asamtai Ejiptunam uunt akupin Paraún Ejiptu nunkaa akupniurj ajasat tura ni jeen wáinniurj ajasat tusa anaikiamiayi.”

¹¹ ‘Tímiatam tsuka tura iturhatcha ámiayi Ejiptu núnkanam. Tura juj Kanaan nunkanmasha núnisarañ ámiayi. Tuma asamtai ii uuntri yurumkan penké wáincharmiayi. ¹² Tura Jakup, Ejiptunam yurumak ikiusma awai taman antuk ni uchirj akupkarmiayi. Túrasha wekaicha wearmiayi. Wats, ii úntriniun ujaajrume. ¹³ Tura ii uuntri atak Ejiptunam wéenak Jusesha, wíttaj takui ni yachj Jusen nekaawarmiayi. Tura Jusé “Yatsur ániawai” takui Paraun, antuk “au shuarapitia” tímiayi. ¹⁴ Nuyanka Jusé ni yachin chicharuk “Apar itiataram uchirtuk” tímiayi. Nu shuarsha untsurj, setenta señku (75) matsamarmiayi. ¹⁵ Nuní tutai Jakupsha ni shuarjjai Ejiptunam pujustai tusar wearmiayi. Tura ukunam nú nunkanmañ jakamiayi. Tura ni uchirjsha ii uuntri ainia nu, núnisarañ nú nunkanmañ jákarmiayi. ¹⁶ Tura atak ukunam ni shuarj Sikiam nunkanam ni ukunchin júkari iwíarsarmiayi. Kame Sikiam nunkanam Apráamka yaunchu játsuk Amura uchirj nunken sumakmiayi. Túramtai nuj iwíarsarmiayi’ tímiayi.

¹⁷ ‘Yus, Apráam kan chicharuk “Nekas wi susattajme” tímiania nú tsawant jeatematai, Ejiptu nunkanam Israer-aents pampanki ti kawenkararmiayi. ¹⁸ Nu tsawantincha Ejiptunam chíkich akupin naamka ámiayi, tura Jusen nekaachmiayi nii. ¹⁹ Nu akupin ii yaunchu úntrín anañkawar yajauch awajjarmiayi. “Atumí uchirj kuírchich ana nu ajapa ikiuktiarum” tu wémiayi. Pampankarañ tusa tímiayi. ²⁰ Tiri iniaisamunam Muisais akiiniamiayi. Muisaisnaka Yus shiir enentáimtimiai. Tura ni nukurj menaintiu nantu takusmiayi. ²¹ Tura nuyá ajapa ikiuktin jeamtai entsá apujsamiayi. Uunt Paraunka nawantri Muisaisan wainiak júkimiayi. Achik, ni uchirjnia tímiatrusañ jukí tsakatmarmiayi. ²² Tuma asa Muisais unuimíatrayayi ashí Ejiptu aents nékarmia nuna. Túramurjsha chichamesha kakarmauyayi.’

²³ Estepan tuke étseruk juna tímiayi: ‘Nuyá Muisais kuarenta (40) uwí takaku asa Israer áentsun iyutaj tusa wakerimiayi, ni shuarj asamtai. ²⁴ Nuyá we Ejiptunmaya áishmañ ni shuarj nímaatasa pujurun wáinkiamiayi. Tura Muisais ni shuarj in ayampaj Ejiptunmaya áishmañkan máamiayi. ²⁵ Wí turamujaj Yuska Israer-aentsun uwentikrattawai, tu nekaamiayi Muisais, Yus timia asamtai. Tura Israer-aencha áintsarañ nékainiawai tu enentáimsamiayi. Túrasha nínkia nekaacharmiayi. ²⁶ Kashin tsawar Muisais ni shuarj jímari maani pujuinian wáinkiamiayi. Tura nawamnaikariat tusa “¿Urukamtai nuamtak yatsumjajsha yajauch awajjarum?” tímiayi. ²⁷ Tutai emka nankaama nu Muisaisan kárut shitiá “¿Ya amincha ii akuptamin tura ii chichartamin anaitiamkamam? ²⁸ ¿Winiasha maantuátaj tusam wakeramek, yañ Ejiptunmaya áishmañ máamamna nútiksamka?” tímiayi. ²⁹ Nuna antuk Muisaiska Matian nunkanam pisar, nú nunkanam kuarenta (40) uwí yajaya áintsarañ pujumiayi. Nú nunkanam pujus, nuatak, jimíaraj uchin yajutmarmiayi.’

³⁰ Kuarenta uwí nan̄kaamas, nu atsamu nun̄kanam Senai náinnium t̄j̄iuch Yusa suntari nayaimpinmaya taa Muisaisan wantintiukmiayi. Numi uchich ukat-ukatin keamunam wantinkiamiayi. ³¹ Muisais, nuna kean wainiak ashamkamiayi. Tura weantuk iistaj tukamá Uunt Yusa chichamen antukmiayi. ³² Yus tímiayi “Wiiitjai Yus. Ame úntrumi Apráama Isaka, Jakupa Yúsr̄intjai” tímiayi. Tutai antuk Muisaiska ti kuraimiayi sapijin. Tura íistinian tujinmiayi. ³³ Nuyá Uunt Yus tímiayi “Úntrun shiir awajsataj tusam, ame sapatrum ukuñkiam ikiuktia, wajamna nuñ Wi pujakui. ³⁴ Nuyá nekaata, tímiayi. Wíi-aents Ejiptunam wáitias pujuinia nuna wáinkiajai. Tura útainia nunasha antukjai. Tuma asamtai uwemtikrataj tusan tarajai. Wats, akupkatjame ámin. Ejiptunam waketkitia” Yus tímiayi Muisaisan.’

³⁵ Estepañ tuke étserek: ‘Ju Muisaisan ni shuari “¿Ya amincha ii akuptamin tura ii chichartamin átinnisha anaitiamkamam?” tiarmia nuna Yuska akupniun anak uwemtikrarat tusa awainki akupkamiayi. Numiniam ni suntari wantintiukmia nuna chichamejai Yuska Muisaisan akupkamiayi, tímiayi. ³⁶ Muisaisaiti Israer-aentsun Ejiptunmayan uwemtikramia nu. Yusa kakarmariñ nekaawarat tusa, aentsti túrachminian untsur̄in túramiayi Ejiptu nun̄kanam. Nuyá Kapaantin Nayaantsanmasha, tura nuyá kuarenta (40) uwitin atsamunam pujuiniajsha ti kakarman iniaktusmiayi. ³⁷ J̄ú Muisaisak Israer-shuaran chicharuk “Atum̄iniñanak etserniun Yus ukunam anaikiattawai, winia anaitiukma áintsap. Tuma asamtai nu shuarsha umirkamniuram” tímiayi. ³⁸ J̄ú Muisais Israer-aentsjai atsamunam pujumiayi. Senái nainnium Yusa suntari níjj̄iajsha pujumiayi. Tura Muisaiska ii úntrij̄ijai pujumiayi. Níyaiti iwiaaku pujustin chichaman sunasmia nu. In ujatmaktinian sunasmiai.’

³⁹ Túrasha ii yaunchu úntri Muisaisan umirkatniun nakitiarmiayi. Áaniuk imiá umirtaint tusar Ejiptunam waketkitniun wakeriarmiayi. ⁴⁰ Túmainiak Muisais Yusjai chichas-tajtsa murá wématai nu shuar Muisaisa yach̄in Arun̄kan tiarmiayi “Ii yusr̄i najanata, ii nemarsatin. Áaniusha Muisaissha Ejiptunmaya in juramkiyatcha tútsuk weruma” tiarmiayi. ⁴¹ Nuyá wáakachia áaniun najanawarmiayi. Túrawar, júiti ii yusr̄i tusar, kuntinian maantuawarmiayi, nu susatai tusar. Tura ni uwejejai najanamun íisar ti wararsarmiayi. ⁴² Nuna túruinian wáiniak Yus, iniaisajai taku, níȳa kanakmiayi. Nii wakerak yaan tikishmatrarti, tímiayi. Tuma asamtai, yaunchu Yusa etserniur̄i juní áarmiayi:

“‘Israer-aentsu, kuarenta (40) uwitin atsamunam wekaimiarmena nuñ, ¿Winiak kuntin maanturuamarum? Winia surustai tusarum penké túrachurme, tímiayi Yus.

⁴³ Antsu, Muruk naartin ántar-yusa pujamur̄in jukimiarme. Tura ch̄ikich ántar-yussha, ni naar̄i Rempañ, yaa ánin najanarum nusha jukimiarme. Júkin asakrumin atumí nun̄keya jukin, tímiayi Papir̄únia nun̄kan nan̄kaiki akupkatjarme” tímiayi Yus.”

Nuní áarmaiti’ tímiayi.

⁴⁴ Estepañ tuke étserek: ‘Yus Muisaisan tímiayi “Wi akupeamu chicham ikiunsatin jeá áaniun Wi iniaktusjamna tímiatrusmek atsamunam najánata” tímiayi. Tutai Muisais Yus tímianak umikmiayi. Nu jean ii untr̄i yaunchu takaku áarmiayi. ⁴⁵ Nu jean ni uchir̄i akintkiar akintkiar wearmiayi. Ukunam, jú nun̄ka achik̄tin jeantai, Yuska kapitán Jusuejai jú nun̄kanmaya aentsun j̄iki akupkarmiayi. Tura ii untr̄i kapitán Jusuejai winiarmia nu, nu jeancha jú nun̄kanam itirmiayi. Tura Tawit uunt akupin náamsaj̄in, ii úntr̄isha nu jean takaku áarmiayi. ⁴⁶ Kame Yusa Tawitinan yáju enentáim̄tichmiayi. Tuma asamtai Tawit Yus shiir pujustinian jean jeamtinian seamiayi. ⁴⁷ Túrasha antsu Tawitia uchir̄i Sarum̄ñ Yusa jeen jeammiayi. ⁴⁸ Túrasha aents jeammanuman Uunt Yus pujuschamniaiti. Jes, yaunchu Yusa etserniur̄i Yus tímia nuna áarchamkia. ⁴⁹ Juna áarmiayi:

“Nayaimpikia winia pujutairuít. Nun̄kanmasha nawer tarimiui.

¿Warí jea najatruatai tusarnea tarum? tímiayi Uunt Yus.

Tura Wi ayampratniusha, ¿t̄uj̄ aa?

⁵⁰ Wiki winia uwejr̄uj̄ain ashí najanachmakiaj” tímiayi.’

⁵¹ Estepañ tuke étserek: ‘Tura átumka Israer-shuarmeka atumí enentájj̄ijai tuke umichuitrume. Atumí kuish̄j̄sha weaktsui tura Yus nékachua núniniaitrume. Yusa Wakan̄jj̄iajsha tuke nemasnaikiatrume. Tura atumí yaunchu úntr̄ij̄ijai métek túarme’ tímiayi.

⁵² ‘Íisia, atumí úntr̄ish̄a Yusa etserniur̄in tuke kajerin áarmiayi, tímiayi. Tura nú arant atumí úntr̄ish̄a Tunaarincha tátatui tu etseru wekaan, máacharmakia. Jes, nútiksarmek yamaisha, Tunaarincha támania nusha atumek anañkarum máachmakuram, tímiayi. ⁵³ Tura Yusa suntari nayaimpinmaya Yusa chichamen susamuitiuram atumsha penké umikchamarme” tímiayi Estepañ.

⁵⁴ Israer-aencha Estepañ tu chichaamu antukar imiá kajerkar nain kátetete awajarmiayi. ⁵⁵ Tura Estepañsha imiá Yusa Wakaní pimiutkamuyayi. Tuma asa nayaimpinmaani ímias, Yusa wincharin, tura Yusa untsuurinini Jesusan wajan wáinkiamiayi. ⁵⁶ Tumá wániak Israer-áentsun tímiayi “Núá ískua, nayaimp uranniun wáinjai. Tura Jesusan, Aents Ajasu tutaiya nuna Yusa untsuurinini wajan wáinjai” tímiayi. ⁵⁷ Támaitiat níisha kuishin akiriarmiayi, tura achiktai tusar charáa tiar ashí wajatkiarmiayi. ⁵⁸ Túratar, péprunmáya arant júkiarmiayi. Tura antuk etserkarmia nu pushirin áikiar, natsa Sauru wajamunam au iisti tusar áepusarmiayi. Tura máawartai tusar kayajai tukurarmiayi Estepañkan.

⁵⁹ Tura Estepañka tukamaitiat Yúsán áujsamiayi. Tura áujuk “Uuntru Jesúsá, winia wakantrusha jurutkitia” tímiayi. ⁶⁰ Tura tikishmar áujuk “Uunta, jú winia túrutainiana jú makuip” tímiayi. Tura nuna tí iniais, jakamiayi.

8

Sauru Yus-shuaran kajerkarmiania nu

¹⁻² Estepañkan máawarmatai Sauru, péñkeraiti, tímiayi. Tura áishman Yúsán péñker enentáimta armiania nu, Estepañka ayashincha iwiarsarmiayi, tura aneek ti uu-tiarmiayi. Tura nú tsawantaj Yus-shuaran Jerusarénum pujuarmia nuna ti kajakatin nanñkamamiayi. ³ Sáuruka Yus-shuaran kajerak ti pataat wémiayi. Túmak núj jeá wayá, núj wayá áishman nasha nuwáncha wáinkianka japiki júki sepunan enkeatai tusa túrimiyai. Tumakui Yus-shuar Jerusarénumia pisarar jútia nuñkanam, tura Samaria nuñkanmasha jeawarmiayi. Jesusa akatramurinkia antsu Jerusarénuman juakarmiayi.

Samaria nuñkanam etserkarmiania nu

⁴ Túrasha Jerusarénumia aents pisararmia nu, arant wénaksha tuke Yusa chichamen etserkini yujarmiayi. ⁵ Tura Jiripi Jerusarénumia we tura chikich péprunam Samaria nuñkanam ámiania núj jeá, chichaak “Yus anaikiamu ana nu Jesuaiti” tu etsermiayi. ⁶ Túrakuí aents iruntrar chikichik enentáijjai Jiripi étsereamun titiú pujusar antukarmiayi. Yusa kakarmarin nekaawarat tusa aentsti túrachminian túrimia nunasha wániarmiayi. ⁷ Ti untsurí aents iwianchruku árma nuna jiripi nu iwianchin júirki akuptiarmiayi. Tura iwianch jiniainiak kakantar charáa tiar júiniarmiayi. Tura ti untsurí emearusha shutuapsha péñker ajasarmiayi. ⁸ Tuma asamtai nú péprunmáyanka ashí shuar ti warasar pujuarmiayi.

⁹ Tura nú nuñkanam uwishin Semuñ pujumiayi. Nuikkia wi ímianaitjai tusa Samarianmáya aentsun ananñuyayi. ¹⁰ Tuma asamtai ashí aents úmamkesar uchichisha, uuntcha, nin anturiarmiayi. Tura tiarmiayi “Jú Semuñsha Yusa kakarmarjijai áitkiawai.”

¹¹ Tura ti untsurí uwí wawekratmarjijai anañkarta asamtai, umirkarmiayi nu aents. ¹² Túrasha Jiripi Yusa akupeamurin, tura Jesukristununcha shiir chichaman etserkamiayi. Tura, nuna antukar nuwasha áishman nasha umikiar imian wearmiayi. ¹³ Semuñsha imia uwishniuitiat Yus-Chichaman enentáimtus imianmiayi. Tura Jiripijjai tsaniú wekaimiyai. Yusa kakarmarin shuar nekaawarat tusa Jiripikia aentsti túrachminian túrimiyai. Nuna wániak Semuñ ti enentáimsamiayi.

¹⁴ Tura Jesusa akatramurisha Jerusarénum pujuarmia núj Samarianmáya aents Yusa chichamen umirainiawai taman nekaawarmiayi. Tuma asamtai Pitruncha Juán nasha nekáa ikiuutarum tusa akupkarmiayi. ¹⁵⁻¹⁶ Tura Samarianmáya Yus-shuarsha aya Uunt Jesusa náarin imianiarmiayi. Yusa Wakaninkia tárachmiayi. Tuma asamtai Pítrusha Juanjai núj jeawar Samarianmáya Yus-shuar aenentáin Yusa Wakaní pimiutkarat tusan Yusan áujtusarmiayi. ¹⁷ Tura áujsa umikiar Pítur Juanjai ni uwején nú Yus-shuaran awantsarmiayi. Nuñkia Yusa Wakaní taramiyai.

¹⁸ Jesusa akatramurí uweje awasmanum Yusa Wakaní taramtai, Semuñsha nuna wániak, kuitjai nu kakarman sumaktaj, tímiayi. ¹⁹ Tura Jesusa akatramurin chicharuk tímiayi “Winiasha kuitjai surustarum nu kakaram. Wisha nútiksanak náñkamamas aentsnum winia uwejur awantsam Yusa Wakaní tarurat tusan tajai” tímiayi. ²⁰ Tutai Pítur tímiayi Semuñkan “Ámeka kuítrumjai métek menñkakatniuitme. Warí, Yus amaana nu ¿kuitjai sumaktinkiait? ²¹ Yus esetram enentáimtachu asam nu túramu pachistincha péñké tujinkiamé, tímiayi. ²² Enentáimprata. Túram Yus seata. Enentáimtamna nuna Yus tsanñkramprashimpiash. ²³ Nékajme, tsaankea áintsan yapá enentáimin pimiutramkaiti. Tura tunaarmuin jinkiamua núniainaitme” tímiayi.

²⁴ Tutai Semuñ áimkiamiayi “Uunt Yus aurtursatarum. Túrutrumna nuna túrunawaj tusan tajai” tímiayi. ²⁵ Nuyasha Jesusa akatramurí Jesusa túramurin nú áentsun ujakarmiayi. Tura wésar Samaria nuñkanam pepu ámunmanka Yus-Chichaman núj etserkiar, núj etserkiar Jerusarénum waketkiarmiayi.

Jiripi Yus-Chichaman etserkamiania nu

²⁶ Tura Yus ni suntarin nayaimpinmayan Jiripincha akuptukmiayi. Niisha chicharuk tímiayi “Wátskea. Juya jínkim Jerusarénumia jintia Enkasa péprunam wea nuní weme, anaraanĭ wetá. Nú jintiaka atsamu nunĭkanam nanĭkaamawai’ tímiayi. ²⁷ Tutai Jiripisha wémiayi. Jintia wesa Itiupianmaya áishmanĭkan wáinkiamiayi. Nú áishmanĭsha Itiupia nunĭka akupniurĭn, ni naariĭ Kantasen takarniuyayi. Kantaseka núwayuyayi. Tura nu áishmanĭ ti neka asa nuna kútrĭn írniuyayi. Nú áishmanĭsha Yúsan áujsataj tusa Jerusarénum wéu wáketmiayi. ²⁸ Karetanam enĭkemar wesa, Yusa etserniurĭ Isayas aarmia nuna aujki wémiayi. ²⁹ Wats, Jiripi nú jintianam wéakui, Yusa Wakanĭ nin tímiayi “Nú kareta amayáŋta.” ³⁰ Tura Jiripisha amayáŋ, Yusa etserniurĭ Isayasa áarmariĭn áujun antuk, chicharuk “¿Aujeamna nu nékamek?” tímiayi.

³¹ Tutai nú áishmanĭ tímiayi “¿Itiurak nekaataj? ¿Yaki jintintruat?” tímiayi. Tura antsu iijĭai wetá tusa, Jiripincha enĭker jukimiayi karetanam.

³² Nu papĭ áarman áujmia nu júuyayi: “Murikiua áitkiasanĭ jákatniunam júkiarmiayi. Tura uchich murik, ure tsúpiram chichaatsna núnisanĭ niisha chichachamiayi. ³³ Nincha iniatsáarmiami. Túrasha penĭké chichamnaka tútsuk tsanĭkamakmiayi. Niisha nunĭkanam iwiaaku pujá maamu asamtai, ¿yaki nuna áujmatkat’?” Nuní aarma ámiayi.

³⁴ Kantase takarniurĭ Jiripin aniasmiayi “Waitneasam turuttia, tu aarma nusha, ¿yana ta? ¿Yusa etserniurĭ níŋkik túmama? ¿Chichichnash ta?” tímiayi. ³⁵ Nuyá Jiripi nu aarman áujtus “Júka Jesusnan tawai” tímiayi. Tura nú arantcha Yus-Chichaman ujakmiayi.

³⁶ Nuyá entsa ámanum nanĭkaamak áishmanĭ Jiripin chicharuk “Jui entsá jeaji. Wikia jui imianchamniakaitaiĭ” tímiayi.

³⁷ Tutai Jiripisha tímiayi “Tuke enentáimĭai Jesus nekas enentáimĭantkinkia túramniatjame.”

Tutai áishmanĭ chichaak “Ee nekasaiti, Jesukristuka Yusa Uchirĭnti tajai” tímiayi. ³⁸ Tura, karetan awajas mai jínkiar entsá wearmiayi. Nuĭ Jiripikia Kantase takarniurĭn imiainmiayi.

³⁹ Tura kukar jínkiarmatai Uunt Yusa Wakanĭ Jiripinkia jukimiayi. Tuma asamtai Kantase takarniurĭsha Jiripin wáinkiachmiayi. Túrasha níŋkia waras wémiayi. ⁴⁰ Jiripisha jeachat Asutu péprunam wantinkiamiayi. Tura nuyá júnki péprunam nuĭ wayá, nuĭ wayá Yus-Chichaman etserki we, Sesaria péprunam jeamiayi.

9

Sauru Jesusan umirkamiayi (Túramurĭ 22.6-16; 26.12-18)

¹ Nuna tumáĭ, Jerusarénum Uunt Jesusan umirkarmia nuna máataj tusa áujmattan Sáuruka penĭké iniaichamiayi. Tuma asa Israer-patri uuntrĭ iyutaj tusa werimiayi. ² Tura jeari tímiayi “Papĭ ame naarmĭjĭai áaram surusta. Wi nuna papĭ jukin timiaĭ Tamasku péprunam jean, Israer-shuar iruntainiam wayattajai. Túran nú papĭjĭai Jesusan umirkaru ainia nuna, náŋkamsan achikiartatjai. Túran áishmanĭnasha nuwanĭcha achikian jinkian, jui Jerusarénum enĭkeataj tusan ikiaankattajai” tímiayi. ³ Tura papĭ susam Sauru jintia wéai, Tamasku péprunam nuntumsai nuĭ aya aneachma nayaimpinmaya tsáapin jiitsumir téntakmiayi nin. ⁴ Túrunamtai Sauru nunĭká iniaarmiayi. Tura nayaimpinmaya chichaamun antukmiayi. “Sauru, Sauru, ¿Urukamtai yajauch awajustaj tusam imiaĭ pataaturam?” tímiayi.

⁵ Táman antuk “¿Amesha, yáitiam, uunta?” tímiayi Sauru. Tutai ataksha áimkiamiayi “Wikia Jesusaitjai. Ame pataaturmena núitjai, tímiayi. Wíi aents pataatamna nuĭ, amek enentáimin yajauch awajmamsame, waaka sanĭkanmiak numin ijiuma núnismek” tímiayi.

⁶ Nuyanka Sauru sapĭjin kuraŋki tímiayi “Nuiŋkia Uunta, ¿wi warinia iturkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nuĭ jeawakmin ame túratamna nuna turamiartatui” tímiayi.

⁷ Tura Sáuruĭai irunar wearmia nu, chichaamun antukarmiayi. Tura áentsnaka penĭké wáinkiacharmiayi. Tuma ásar ti ashamkarmiayi. ⁸ Nuyá Sauru nunĭká tepá nantakmiayi. Tura wáimĭktaj tukamá wáimĭkchamiayi. Tuma asamtai chikich shuar uwejnnum enĭkekiar júkiarmiayi Tamaskunam. ⁹ Nuĭ jeá menaintiu tsawant íimtsuk tura yurumtsuk penĭké úmutsuk pujumiayi.

¹⁰ Nuĭ Tamaskunam Yus-shuar Ananiás ámiayi. Nin mesekranam Uunt Jesús tímiayi “Ananiása.”

Tutai “¿Warĭ wakeram, Uunta?” tímiayi.

¹¹ Nuyá Uunt Jesús tímiayi “Wajakim jintia, Naka tutaiya nuĭ wetá. Nuĭsha Jutasa jeen jeam, Tárunmaya Sárun éaktaj tusan winĭjĭai, titiá, tímiayi. Niisha Yúsan áujuk pujawai.

¹² Tura júna mesekranam ipiatkamjai Sáurun. Aishmañ wayá ni uwejejái ántiawai, ataksha ímit tusa. Nú áishmañka ámetme, Ananíasa” tímiayi Jesus.

¹³ Táman antuk Ananíasa chichaak “Túrasha Uunta, jú áishmañ ame áentsrumin Jerusarénum ti yajauch awajchakait. Ni yajauch túramurín ti untsurí aents ujataniawai, tímiayi. ¹⁴ Tura yamaisha Israer-patri chicharniun papírín takakui. Tura nujaí ame náarmin páchia nuna achik jukitiaj tusa tímiajaisha tarutramji” tímiayi Ananíasa.

¹⁵ Tutaí Uunt Jesus tímiayi “Áankisha wetá. Jú áishmañkan winia etserniur atí tusan achikjai Wi. Niisha Israer-shuarchancha tura kapitiánniasha tura Israer-shuarnasha wínián etserin átatui, tímiayi. ¹⁶ Tura Sauru winia náarun páchia asa ti wáitsattana núnaka nin iniaktustatjai” tímiayi Jesus.

¹⁷ Tura Jesus táman umirak Ananíasa Sauru pujamunam wémiayi. Tura jeari wayá uwejeñ awantas tímiayi “Yatsuru Sauru, Uunt Jesus jintiá wantinturmakmamna nusha ame ataksha ímiat tusa, tura Yusa Wakanísha enentáimin pimiutramkat tusa winia akuptukai” tímiayi.

¹⁸ Nu chichamaik ni jiiya namaká saepeya áanin iniaarmiayi. Túrunamtai ataksha ímmiayi. Túruna wajaki we imianmiayi. ¹⁹ Nuyasha yurumámiayi. Tura yurumásha kakaram ajasmiayi. Tura Yus-shuarjai Tamaskunam wárumchik tsawant pujusmiayi.

Sáuruka Tamasku péprunam Yus-Chichaman etserkamiania nu

²⁰ Nuyanka Sauru Israer-shuara iruntairín wayá Jesusa túramurín etserkamiayi. Etseruk tímiayi “Nekasaiti, jú Jesus Yusa Uchirínti” tímiayi.

²¹ Nuna ashí anturú pujuiniaka “¿Ausha urukakua aania? tiarmiayi. Entá jú áishmañsha Jerusarénum Jesusan enentáimtuinian ti pataatimia núchakait. Tura tímiajaisha nuna achik Israer-patri akupniurín jukitiaj tusa tamia núchakait” tiarmiayi.

²² Tura Sáurusha sapijmiatsuk etsermiayi. “Jú Jesus nekas áentsun Uwemtikniuiti” tu etsermiayi. Tura ti paant etserkui, Tamaskunmayá Israer-aents, nekaschaiti titiaj tukamá tujinkirmiayi.

²³ Tura ukunam, Israer-aents Sáurun maatai tusar chichaman jurusarmiayi. ²⁴ Tura Sáurusha nu chicham jurusman nekamamiayi. Israer-aents pepru jínmanam tuke tsawáisha, káshisha achikiar maatai tusar jintian akirtiarmiayi. ²⁵ Nuna antukar Yus-shuar Sáurun chihknium kashi enkeawar itiararmiayi. Pepru tanishnum itiarar awemarmiayi.

Sáuruka Tamaskunmayá Jerusarénum wémiania nu

²⁶ Tura Sauru Jerusarénum jeá Yus-shuarjai iruntrattsá wakerimiayi túrasha niníka ashamiarmiayi. Sáurusha nekas Yus-shuar ajaschaiti tusar ashamiarmiayi. ²⁷ Túmainiajn Pirnapí Jesusa akatramurí matsatmanam jukimiayi Sáurun. Tura nué jeá tímiayi “Jú Sauru jintiá wesa Uunt Jesusan wáinkiaiti. Tura Yus chicharkaiti. Tuma asa Sauru Tamaskunam sapijmiatsuk Jesusa náarín etserkaiti” tímiayi. ²⁸ Tura Sauru Jerusarénum juákmiayi. Tura Yus-shuarjai irunar pujumiayi. ²⁹ Nuyasha Yus, etserkata tutai, sapijmiatsuk Jesusa túramurín etsermiayi. Tura Israer-shuar Kriaku chichaman chichau ármia nu, nué pujuarmiayi. Sáurusha nu shuarjai áujmatsarmiayi. Túrasha nu shuar Sáurun itíur máatjik tusar chichaman juriarmiayi. ³⁰ Tura Yusaí yachi ármia nu, chicham jurusman nekaawarmiayi. Neka ásar Sáurun Sesaria peprunam júkiarmiayi. Tura nuyasha Tarsu péprunam akupkarmiayi.

³¹ Tura Jútianmayá, Kariréanmayásha, Samarianmayásha Yus-shuar shiir tímiajnisan ajasar kakaram ajasarmiayi. Yusan ashamainia ásar, tura Yusa Wakaní yayamu ásar kawenki kawenki wearmiayi.

Pítíur Eneasan yáimniania nu

³² Tura Pítíur Yusaí yachi armiania nué iráa wekaimiayi. Wekaak Yus-shuar Rítianam matsamarmia nuísha iraumiyai. ³³ Nuísha Rítianam jeá áishmañkan Eneas náartinian wáinkiamiyai. Niisha emearu asa wekaicha uchu uwí aya tépenuyai. ³⁴ Tura Pítíur chicharuk “Eneasa, Jesukrístu tsuármawai. Nantaktia. Tura esekmatairama iwiarata” tímiayi. Tutai Eneas nu chichamaik nantakmiayi. ³⁵ Nuna túman wáinkiar Rítianmayá aents tura Sarunmayá aencha enentáimprar Uunt Yusan nemarsarmiayi.

Nuwá Túrkas nantakmiania nu

³⁶ Túrasha Jupe péprunam nuwá Yus-shuar pujuyayi, ni naari Tapitia. Tura nusha Kriaku chichamjainkia Túrkas tuiniawai. Nu nuwasha nué pujus tuke pépker túriniuyayi. Tura niisha nútksan yaí wémiayi. ³⁷ Nu tsawantinik Túrkas sunkuran jateemak jakamiayi. Túrunamtai ayashín nijjarar yakí tesaamunam áepsarmiayi. ³⁸ Jupe péprusha Rítianmayá tíjüch ámiayi. Júpenmayá Yus-shuar Rítianam Pítíur pujan nekaawar jimiará áishmañkan akatrar akupkarmiayi, Júpenam wari winití tusar. ³⁹ Nué tutai Pítíur níjjai wémiayi. Tura

támatai jaka tepemia nuĵ awayáwarmiayi. Nuĵ wayamtai waje pujuarmia nu útkiar Pítrun téntakarmiayi. Túrawar pushirĵn, Túrkas iwiaaku pujus najankamia nuna iniaktusarmiayi.

⁴⁰ Nuyañka Pítiur aĵ akupkarmiayi ashí. Tura niisha ninĵi tikishmar Yúsan áujsamiayi. Nuyasha nuwañ jaka tepaan iis tímiayi “Tapitia nantaktia.” Tutai niisha ími Pítiur wajaan wáiniak nantaki pujusmiayi. ⁴¹ Tura Pítrusha nuwañ uwejnun achik awajkimiai. Tura ini-ais Yus-shuar ármia nuna tura wajencha untsukar Túrkas iwiaaku ajasun iniaktusarmiayi. ⁴² Nu túrunamun ashí aents Jupe péprunmaya nekaawarmiayi. Túrawar untsurĵ aents Uunt Jesusan umirkarmiayi. ⁴³ Tura Pítruka Jupe péprunam untsurĵ tsawant nuapen-iwiarin Semunĵa jeĵn pujusmiayi.

10

Pítiur Kurniriuĵaj

¹ Sesaria péprunam Kurniriu naartin suntara kapitíántrĵi pujumiayi. Ni suntarĵ Itiaria nunĵkanmaya ármiai. ² Nu kapitíán Kurniriu ni shuarĵĵaj, Yuska nañkaamantuít, tu enentáimtiarmiayi. Tuma ásar Yúsan enentáimtin ármiai. Tura nútiksañ kuítiniasa takachkan yaĵintaj tusa Israer-shuaran súuyayi. Tura tuke tsawant Yúsan áuĵtiniuyayi. ³ Chíkich tsawantaj, nantu aañku ajasaj Kurniriu ímiarmiayi. Yusa suntarĵ Yus nayaimpinmaya akupkamu, ni pujamunam utuá “Kurniriuá” tímiayi.

⁴ Kurniriuá tutai, Yusa suntarĵin ashamak ímia pujumiayi. Tura “¿Warimpiait, Uunta?” tímiayi.

Tutai Yusa suntarĵ tímiayi “Ame seamun Yus anturtamkai. Tura atsumainia nu yayakmin Yus shiir enentáimturmawai’ tímiayi. ⁵ Tura Yusa suntarĵ Kurniriuun tuke chicharuk “Wats, áminiuram Júpenam akupkata. Semun, chíkich naarĵ Pítiur, tatí tusam akuptukta, tímiayi. ⁶ Nu Semunsha chíkich Semunĵaj pujawai. Nuka nuapen-iwiarin Semunĵkaiti. Tura ni jeesha nayaantsanam ayaamach pujawai, tímiayi. Nuĵ jeawakmin, ame túratamna nuna Semun Pítiur turamtatui” tinia ikiukmiayi. ⁷ Tura Yusa suntarĵ waketkimtai, Kurniriuaka ni takarniurĵin jímieran itiamiayi. Tura suntaran chíkichkiniak nemarsat tusa itiamiayi. Nu suntar ni íruramuriyayi. Tura Yúsan enentáimtinuyayi. ⁸ Kurniriuasha ni túrunamurĵin ashí uĵá-já awajas Jupe péprunam akupkarmiayi.

⁹ Kashin tsawantaj Kurniriu suntarĵ Júpenam nuntumsaraj, tutupin aĵ Pítiur jea yakí wáakunam Yúsan áujsatajtsa wakamiayi. ¹⁰ Pítrusha ti tsukamak yurumátaj tusa wakerimi-ayi. Túrasa yurumkan iniarainiĵ Pítiur íkajtiusmak, ¹¹ nayaimp uranmianum wañkaram tarachia áanin tura nuna tsakarĵin jinĵiakman tárún wáinkiamiayi. ¹² Nu tarachnium yajasma irunmiayi. Wekainiusha, nanamtincha, tura napisha enĵkemiarmiayi. ¹³ Tumaj Yus Pitrun chicharuk “Pitru, wajakim maam yuata” tímiayi.

¹⁴ Tutai Pítiur tímiayi “Átsá Uunta. Ii Israer-shuarkia yajauch yajasma áinia nu tura yúatin surimkiamu ana nuka penĵké yúchaitĵi. Tuma asamtai júnaka wikia yuashtatĵaj” tímiayi.

¹⁵ Túrasa Pitrun atak Yus chicharuk “Wi, penĵkeraiti, tájana nu, yajauchiiti, tiip” tímiayi.

¹⁶ Nuka menaintiú túrunamiayi. Tura nuyasha tarach ataksha nayaimpiniam wakamiayi. ¹⁷ Nuna túrunan wáiniak Pítiur wariniak áaniuncha wáinkiaj tusa enentáimia pujaj kapitíán Kurniriu ayakma ármia nu, aninruiniak jeawariayi. ¹⁸ Tura jeawar kakantar untsummiar “¿Semun, Pítiur, juĵn pujá?” tiarmiayi.

¹⁹ Tura Pítruka ímiarmarĵin tuke enentáimia pujaj Yusa Wakanĵ chichaak “Menaintiu áishman untsurmainiawai, tímiayi. ²⁰ Wajakim akaikim arantutsuk au nemariarta, Wi akupkamu asamtai” tímiayi.

²¹ Nuna antuk Pítiur taramiayi. Tura áishmanĵan Kurniriu akupkamia nuna wajainian wáiniak “Wiitĵaj Pítiur. Átum eátrumna núitĵaj. ¿Warĵ tarintrum?” tímiayi.

²² Tutai niisha tiarmiayi “Iisha kapitíán Kurniriu akupkamu taji. Kurniriuaka áishman penĵkeraiti. Yúsan enentáimtiniaiti. Tura Israer-aencha nin shiir enentáimtuiniawai. Nuĵya winiĵaj, tiarmiayi. Kame nuik, Yusa suntarĵ, nayaimpinmaya akupkamu, ii kapitíántrĵin tímiayi “Pitrun untsukát akupkata. Nii tatí. Tura nii tíiatna nu penĵker anturkata” tímiayi. Nuna ii kapitíántrĵin takui iisha winiĵi” tiarmiayi.

²³ Tutai Pítiur jeá awayámiayi. Tura nu kashi nuĵ kanararmiayi.

Kashin tsawarar Pítiur niĵĵaj wearmiayi. Túrasa Júpenmaya Yus-shuarsha nin nemari-armiayi. ²⁴ Nuyá tsawarar Sesaria péprunam, Kurniriu nákamun jeariarmiayi. Kurniriuaka ni shuarĵin tura ni nekas amikrĵin, nekaatarum tusa untsuk íkiaankamiayi. ²⁵ Tura Pítrusha jeamtai Kurniriu aĵ ĵiintiuki Pitrun tikishmatramiayi. ²⁶ Túrasa Pítiur awajki tímiayi “Wajaktia. Wisha aya áentsketĵaj. Ámea núnisketĵaj” tímiayi. ²⁷ Tura chichasar jeá wayawarmiayi. Tura wayá, untsurĵ aents matsatun wáinkiamiayi. ²⁸ Nuyá Pítiur chichaak tímiayi “Amikrua, atumsha nékarme. In Israer áentstinkia, chíkich áentsĵaj pachiniarchatniuitrume, tura

ni jeencha wayashtiniaitruime in jintintramin turamainiaji, tímiayi. Túrasa Yuska ni enentáimsamurjín wíniaka paant iniaktursayi. Túmaitkiui wikia nánkamas áentsun yajauchi-iti, tura auka wapikiaiti, tíchamniaitjai, tímiayi. ²⁹ Tuma asamtai, untsurkurmin, páchitsuk winimjai. Túmaitkiui nekaataj tusan wakerajai. ¿Urukamtai untsurkamarum?” tímiayi.

³⁰ Tutai Kurniriu tímiayi “Kuatru tsawant nankaamasaj tura nantusha juni aj, wikia yurumtsuk Yúsán áujsamjai, kjaraj áujsatín ana nuna. Túran chichaj, áishman, ni entсатаirj wincharpatniun, naka wajatran wáinkiamjai, tímiayi. ³¹ Niisha chichartak turutmiaiyi “Kurniriu, Yus ame áujman anturtamkayi. Tura shuar atsumainia yáinmamna nunasha nekarmayi, turutmiai, tímiayi. ³² Tuma asamtai, Jupe péprunam akatramuram akupkata. Semun Pítrun itiatí. Nu Semun Pítrusha, chíkich Semunjai pujawai. Nuapen-iwiarin Semunkaiti nuka. Tura ni jeesha nayaantsanam ayamach pujawai. Niisha taa ámin chichartamkattawai” turutmiai, tímiayi. ³³ Túrutkui, wi umikian áentsun wárikmasan ámin akuptukjame utitia tusan. Tura nékaseñ taume. Tuma asamtai iisha jui Yus ímmianum pujuiniaji. Tuma asamtai, ashí Uunt Yus ámin au ujakarta túramna nu, iisha antuktai tesar pujaji” tímiayi Kurniriu.

Kurniriu jeñ Pítiur etserkamia nu

³⁴ Nuyá Pítiur chichaak “Ayu. Yus ímmianum ashí aents métekrak ániawai nekas nékajai, tímiayi. ³⁵ Antsu ashí nunkanam nánkamas aents Yúsán umirak péñker tura nuna, Yus nú aentsun shiir enentáimtawai, tímiayi. ³⁶ Yuska shiir chichaman Israer-aentsun akuptukmiaiyi. Nui chichaak “shuar Jesukrístu naarín páchiakka, Yusjai nawamnaikiatin átiniaiti, tímiayi. Nú Jesukrístu ashí shuara Úuntrinti’ tímiayi Yus. ³⁷ Túrasa Kariréa nunkanam nánkamak ashí Israer nunkanam túrunamia nu paant nékarme. Imiakratin Juan imiaak etserak amukmia nú tsawantin nánkamamiayi. ³⁸ Tura jusha nékatsumek, tímiayi. Nasarénumiá Jesús, Yus Anaikiamu asa, Yusa Wakanj kakarmarijjai péñker túrinuiyayi. Iwianchruku wáitias pujuarmia nuna péñker awajsamiayi. Yus Niin pujurma asa ashí nuna túrinuiyayi. ³⁹ Tura Israer-aents matsatkamunam tura imia Jerusaréñ péprunmasha Jesús túramia nu, iisu asar, iisha étsereaji. Tura ayu, Nin achikiar krúsnum máacharmakia, tímiayi. ⁴⁰ Tura menainti tsawant jeamtai Yus Nin iniantkimiayi. Tura ataksha iwiaintiur-tamkachmakaj, tímiayi. ⁴¹ Ashí áentsnumka wantinkiachmiayi. Antsu íniak nuik, etserin atarum tusa Yus achirmakmij nú áentstiniak wantintiumakmijai, tímiayi. Au nekas jakamunmaya nantakmiatai iisha Niijjai tsaniñkiar yurumámji, tímiayi. ⁴² Tura Jesussha in akuptamkajtji. Jesuska “Wíitjai Yus Anaikiamun, tímiayi. Ashí áentsun, juka makuumawai, túrasa juka makuumatsui, Wiki titiniaitjai. Kame ashí áentsun, jaka áinia nuna tura iwiaaku áinia nunasha, Wikíitjai nuna titinian” tímiayi Jesús. Nusha átum werum ujatruktarum, Jesús turammaji, tímiayi. ⁴³ Ya shuarak Jesusa náarín pachia nú shuarnaka tunaarín tsanckurattawai, nuna ashí Yúsán etserniusha yaunchu etseriarmiayi” tímiayi.

Israer-shuarchan Yusa Wakanj tarurarmiania nu

⁴⁴ Tura Pítiur take chichaak pujai, tura chikichcha antúu pujuiniaj Yusa Wakanj tarurarmiaiyi. ⁴⁵⁻⁴⁶ Tuma ásar ankant ankant chíkich chichamjai chichasarmiaiyi. Túmainiak, Yus ti péñkeraiti, tiarmiayi. Tura Israer-shuar, Yus-shuar armia nuka Pítrujai táarmia nu, nuna antukar ti enentáimsarmiaiyi. Maa, Yusa Wakanjsha Israer-shuarcha ainia nunasha tarurcharaik, tu enentáimsarmiaiyi ⁴⁷ Túmakui Pítiur chichaak “¿Yaki surimkiat ju aents imiantinian? Warí nincha ínia áintsan Yusa Wakanj tarurcharaik” tímiayi. ⁴⁸ Nuyá Pítiur, Jesukrístu náarín imiantiarum tusa akupkarmiayi. Tura nuyasha Pitrunka, niijjai ishichik tsawant pujustinian seawarmiaiyi.

11

Ni túrunamurjín Pítiur ujakmiania nu

¹ Israer-shuarchasha Yusa chichamen umirkarai táman Jesusa akatramurjsha tura Jutianmaya Yus-shuarsha antukarmiaiyi. ² Túmainiak Pítiur Jerusaréñnum jeamtai, Israer-shuar Yus-shuar armia nu chichainiak ³ “¿Urukamtai Israer-aents ániachusha iyumam? ¿Tura ujaj tsaniñkiar urukamtai yurumámum?” tiarmiayi.

⁴ Tutai Pítiur ashí yámankamtaiknumiá túrunamun ujakmiayi. ⁵ Chichaak tímiayi “Wikia Jupe péprunam pujumjai. Tura nuj Yusán aju pujusan ímiarmajai. Tura wanckaram tarachia áanin kuatru tsakarín jinñiakma, nayaimpinmaya táarun wáinkiamjai. Tura wi pujamunam jeartimiai, tímiayi. ⁶ Tura nuj iyaj tukaman inít yajasman, napincha, nanamtinniasha enketainian wáinkiamjai, tímiayi. ⁷ Tura chichaman antukmajai “Pítru wajakim maam yuata” túrutun antukmajai, tímiayi. ⁸ Túrutkui “Atsá, Uunta, áanin wapiknaka, Israer-aents yuatin surimkiamu ana núnaka tuke yúchaitjai” tímiajai, tímiayi. ⁹ Atak nuyá túrutuk “Wi, péñkeraiti, tájana nu, ámeke, yajauchiiti, tiip” turutmiai, tímiayi. ¹⁰ Nunasha menaintiú

túrunan wáinkiamjai. Túruna nayaimpiniam mash waketkimiai, tímiayi. ¹¹ Nuí túruna pujaj menaintiú áishman Sesarianmaya akupkamu, winia eatainiak wi pujamunam taru-tiarmiai, tímiayi. ¹² Tura nuí Yusa Wakanj chichartak “Arantutsuk aujaj wetá” túrutkui, wémajai. Tura ju sais Yus-shuarjaj wi wémajai. Túrunar ashinkiar Kurniriu jeen wayamji, tímiayi. ¹³ Niisha chichaak “Jearuj Yusa suntari nayaimpinmaya taa wajan wáinkiamjai, tímiayi. Tura niisha chichartak “Jupe péprunam Semun Pítuir tatí tusam áishman akatram akupkata. ¹⁴ Pítrusha taa, itiura amesha tura áminiurmesha tunaarminiá uwemprattam nuna turamtatui.” Yusa suntari nuni turutmiayi” tu ujatkamiayi Kurniriu’ tímiayi.

¹⁵ “Wi chichastasan júaraj, Yusa Wakanj tarurarmiayi, yámankamtaik in tarutrampramijá nútiksaj, tímiayi. ¹⁶ Nuínkia Uunt Jesus timian enentáimpramjai. Niisha tíchamka “Juan entsajain imiakratmiayi. Tura antsu Yusa Wakanjnia imiantinia áintsaj atumí enentáin enkemprutmattarme.” Nu timian enentáimpramjai, tímiayi. ¹⁷ Atumsha enentáimpratarum. Uunt Jesukristu umirkamijaj nuí, incha Yuska ni Wakanj suramsamijai. Tura in suramsamijaj núnisan Yus nincha ni Wakanj súsarmiayi. Nuna tura asamtai, wikia, túrashtiniati, Yúsán títinkiaitaj” tímiayi Pítuir.

¹⁸ Tura Pítuir taman antukar mitiat wáinkiar “Nekasaiti, Israer-shuarchancha ni enentáin yapajjáwarmatai tuke iwiaaku átinian Yuska nin súsaruiti” tiarmiayi. Tusar Yusa náarin ti shiir awajarmiayi.

Yus-Shuar Antiukia péprunam wearmiania nu

¹⁹ Estepañkan máawarmia nuí, chikich Yus-shuarnasha maatai tusar pataatiarmi-ayi. Túram chikichkia pisarar Pinisia nunkanam, Chipri nunkanmasha, tura Antiukia péprunmasha wearmiai. Tura nuí jeawar Yus-Chichaman chikichnaka ujatsuk aya Israer-aentsnak uwajarmiayi. ²⁰ Tura nijjaj Chipri nunkanmaya pisararmia nu Serini nunkanmayasha Yus-shuar ármiai. Nuka Antiukianam jeawar Israer-shuarchan Uunt Jesusa túramurin ujakarmiayi. ²¹ Tura Uunt Jesus ikiakárma ásar, nuí nunkanmaya aents ti untsurj yaunchu túrutairin iniaisar Jesusan enentáimtuiniak Yus-shuar ajasarmiayi.

²² Tura nu chichaman antukar, Jerusarénumia Yus-shuar, ame iyutá tusar, Pirnapin Antiukianam akupkarmiayi. ²³⁻²⁴ Pirnapísha jeá, Yus nú shuaran uwentikrarma nuna wáiniak warasmiai. Pirnapísha pénger áishmankauyayi. Yusa Wakanjsha pimiutkamuyayi. Tura Yúsán nekas umirkauyayi. Tuma asamtai nu shuaran mash jintintiainiak chicharuk “Tuke enentáimjaj umirkarum Yus nemarsatarum.” Tu chicharak ikiukmiayi. Tura nujsa nú arant untsurj aents Yusaj kawenkarumiayi.

²⁵ Nuna turasua amik Pirnapí Tarsu péprunam wémiayi Sáurun wáinkiataj tusa. Tura wáiniak Antiukia péprunam jukimiayi. ²⁶ Tura nuí jeawar, nú péprunmaya Yus-shuarjaj iruntrar chikichik uwi pujasarmiayi. Yus-Chichaman untsurj shuaran ujaak pujasarmiayi. Tura nuí Antiukia péprunmanka Yus-shuaran émkaka, Kristu shuari, tiarmiayi. ²⁷ Nuyá Yusnan eterin Jerusarénumia táarmiayi Antiukianam. ²⁸⁻³⁰ Túmainiaj chikichik eterin, ni naari Akaapu, Yus-shuar matsatmanum ajapén wajaki chichasmiai. Tura Yusa Wakanj nekatairijaj chichaak “Ti tsuka ashí núnkanam átatui” tímiayi. Tuma asamtai Antiukianmaya Yus-shuar chichainiak “Jutía nunkanmaya Yus-shuar ainia nu yáintai” tiarmiayi. Ankant ankant ni wakariarmia núnik súsarmiayi. Tura nú kuítinasha Jutíanmaya Yus-shuara úntrin akuptukarmiayi. Pirnapísha Sáurusha nú kuítian júkiarmiayi. Tura Akaapu timia núnisan túrunamiayi, akupin Krautiu pujaj.

12

Pitrún sepunam enkeawarmiania nu

¹ Nu tsawantaj akupin Erutis Yus-shuaran máataj tusa chichaman jurus áentsrin ishiak-miai. ² Tura Juangka yachin Jakupun suen tsupirkar máawarmiai. ³ Nuna tura máawarmatai Israer-aents wáinkiar “júka péngeraiti” tiarmiayi. Erutissha nuna antuk, Pítrusha achikrum itiatarum tusa akupkarmiayi. Núnaka wakapruachu tanta yuatin nampertin túrawarmiai. ⁴ Pítruncha achik itíarmatai, Erutis sepunam enkeata tusa akupkamiayi. Tura sepunam suntarsha ankant ankant, kuaru kuaru, ashikia tiasisáis (16) irunar Pitrún téntakarmiayi. Tura, ju jisat nankaasmatai, mantamnatí tusan jüktiatjaj aents iruntramunam, tu enentáimsamiayi Erutis. ⁵ Túramu asa Pítruka sepunam pujumiayi. Tura suntarsha nijjatrusuk iyarmiayi. Túramunak Yus-shuarka, Pitrún yáinkiat tusar iniaitsuk Yúsán ti áujiarmiayi.

Yusa suntari Pitrún uwentikramiania nu

⁶ Wats, Erutis, kashin jüktiatjaj takui, nú kashi Pítruka jimiará suntar wajamunam etema tepes kanarmiayi. Tura jimiará jirujaj jünkiamuyayi. Tura chikich suntarka jünmanum ii wajarmiayi. ⁷ Tumaj aya aneachma Yusa suntari nayaimpinmaya taa ajapén wajasmiai. Túrunamtai jeanmanka tsáapin ajasmiai. Tura Yusa suntarjsha Pitrún

páenum antin ishintiarmiayi. Tura jirusha Pitru uweyéya sayat atiniamiayi. ⁸ Tura Yusa suntarj tîmiayi “Kaki emenmamata. Túram sapatrumsha aweekata” tîmiayi. Tutai Pítiur túramiayi. Nuyá chichaak “Pushiram entsarta. Túram nemartusta” tîmiayi. ⁹ Tutai Pítiur nemarsamiayi. Túrásha Pítruka, mesekranmaapi júniaya, tu enentáimsamiayi. ¹⁰ Túrásha emka suntar ímia wajan nankaikiarmiayi. Tura nuyasha chíchik suntar ímia wajan nunasha nankaikiarmiayi. Tura nuyasha jíintainium jiru waiti ámanum jeawarmatai, nú wáitisha ímia-níñki kuat uranmiayi. Túrunamtai jíinkiarimiayi. Tura jintiá ishíchik wésaq, Yusa suntarj Pitrun níniak ikiukmiayi.

¹¹ Túram Pítiur enentáimiar tîmiayi “Yamaikia nékajai. Mesekranmachuiti. Antsu Uunt Yus ni suntarjñ nekas akupturkayi. Erutis mantuataj tusan pujurtana nuyá Yusa suntarj winia uwemtikrurai. Tura Israer-aents túrutatajtsa wakeriarmia nuyasha uwemtikrurai” tîmiayi. ¹² Nuna tu enentáimias nekáa, Marí jeen wémiayi. Nú Marisha Juan Márkusan nukurjyayi. Nú jeanam untsurj aents irunar Yúsán aju matsatainíaj Pítiur jeamiayi. ¹³ Tura jeá aa wáitin tuntuimiayi, wayataj tusa. Túmakui nuwá uchich, ni naarj Ruti, yákit tusa iyumiayi. ¹⁴ Tura jeari, Pitru chichamen anturak ti shiir enentáimsamiayi. Túmak wáitin urattsuk ikiuki, inít matsatainían werí “Pítiur taa wáitíniam wajaawai” tîmiayi. ¹⁵ Tutai “Wáurtsumek” tiarmiayi.

Tútaisha núwaka “Atsá nekasaiti” tîmiayi.

Tútaisha nú arant “Níchuiti. Antsu ni wakanj túratsuash” tiarmiayi.

¹⁶ Tu chichainíajñ Pítruka tuke tuntuí wajamiayi. Tura wáitin uraj tukamá Pitrun wáinkiar ashamkarmiayi. ¹⁷ Ashamak chichainiakui Pítiur, uweje takuí itiatmamtikiarmiayi. Tura nuyá Uunt Yus sepunmayan uwemtikramun ujakmiayi. Tura “Ju chicham Jakupu tura chíchik Yus-shuarsha ujaktarum” tîmiayi. Nuna tj iníais jíinkí arant wémiayi.

¹⁸ Kashin tsawar suntarsha Pitrun atsá wáinkiar “Chuwa urukakua menkaka. Áyawa urukattajia” tiarmiayi. Pítiur túrunamun nékachu ásar nuna tiarmiayi. ¹⁹⁻²⁰ Túrunamtai Erutis chichaak Pítiur eaktarum tusa akupkarmiayi, túrásha wáinkicharmiayi. Túrunamtai Erutis suntaran untsukar, Pitrun ísarmia nuna aniasarmiayi “¿Pítiur itiaura menkakama?” tîmiayi. Niisha áimiaiñchakui, nu suntaran mantámnatí tusa akupkamiayi.

Erutis jakamiania nu

Erutissha Tirunmayá tura Setúnmayá áentsjajisha nemasnaikiarmiayi. Túmayatan Jutía nunkan ikiuki Sesaria péprunam pujustaj tusa Erutis wémiayi. Sesaria péprusha Tiru péprunam tjíjuchiiti. Setúnmayá aents Tirunmayá áentsjai Erutisa nunkeyan yurumkan súmainia ásar, Erutisjaj nawamnaikiatniun wakeriarmiayi. Tuma asantai métekrak enentáimsar, Erutisa takarniurj penkerj, ni naarj Parastu, níjjíaj emka amikmawar nuyá Erutisan weriar shiir matsamsatniun seawarmiayi. ²¹ Tuma asantai tsawant jeamtai Erutissha akupin entsatai pushin entsarmiayi. Tura akupin pujutainium pujus áentsun ikiaanak áujmatmiayi. ²² Nuñ pujus chichaakui aents untsumainiak tiarmiayi “Ju chichaa pujana júka áenchaiti. Antsu nekaska yúsaiti” tiarmiayi. ²³ Tumaj nuyajk Yusa suntarj nayaimpinmayá tarí Erutisan jaa awajsamíayi. Tuma asantai nusha aka yuam jakamiayi. Erutissha Yusan waantu awajtsuk níñki waantu enentáimtuma asa túruna jakamiayi. ²⁴ Túrunamtaisha Yusa chichamenka nú arant pampanki wémiayi. Túmakj ashí núnkanam anturamiayi.

²⁵ Tura Pirnapísha Sáurusha ni takatrñ amukar Jerusaréñnumíaj Antiukíanam wake-tainiak Juan Márkusan júkiarmiayi.

13

Yus-Shuar Pirnapíncha Sáuruncha Yus-Chichaman etserkarat tuser akupkarmiania nu

¹ Antiukíanmayá Yus-shuarnum Yusnan etserin páchitra ármíayi. Nútiksaj Yus-Chichaman jintinniurjsha ármíayi. Pirnapísha tura Mukusa Semunsha, nuyá chíchik, Serinianmayá Rúsíusha tura akupin Erutisa tsakatqesha, ni naarj Manaen, Sáurusha tímianu ármíayi. ² Tura chíchik tsawantaj niisha yurumtsuk Yúsán áujeak pujuiniáj Yusa Wakanj tîmiayi “Pirnapísha, Sáurusha akanturkítarum, tîmiayi. Wí takatan súsaitjiana nuna takasarat tuserum túratarum” tîmiayi. ³ Tutai ijiarma Yusán ajsua amikiar, shiir wetarum tuser ni uwejeñ Sáurun Pirnapíncha awantkarmiayi. Túrawar Antiukíanmayá akupkarmiayi.

Chipri nunkanam jeawarmiayi

⁴ Tura nuyanka Yusa Wakanj akupkam Pirnapísha Sáurusha jíinkiar Serusia péprunam jeawarmiayi. Tura nuyá uunt kanunam enkemprar Chipri nunkanam jeawarmiayi. ⁵ Juansha yáintaj tusa némarkauyayi. Nuñ Saraminia péprunam jeawar Israer-shuar iruntai jeanam wayawar Yus-Chichaman etseriarmiayi. ⁶ Tura Chipri nunkanam pepru ainia nuñ wájrkutak Papus péprunam jeawarmiayi. Nuñ jeawar Israer-aents uwishin ni naarj

Parjesúsan wáinkiarmaiya. Ni chíkich náarínkia Erimiasauyayi. Niisha uwishniuiat, Yúsna étsereajai, tíniuyayi. ⁷ Akupin Serjiu Páurujai pujuyayi. Nu akupniusha ti pénger enentáimniuyayi. Tura Pirnapín Sáuruncha chichaman akuptukmaiya, taarti tusa. Kame Yús-Chichaman antuktaj tusa wakerak untukmaiya. ⁸ Tura uwishin Erimias nuna nakitiak “Auka péngerchaiti” tímaiya. Akupniusha Yúsna umirkajin tusa nuna tímaiya. ⁹ Nuyanka Sauru, ni chíkich naari Papru, Yusa Wakani pimiutkamú asa, nu uwishniun úmamkemas iis tímaiya ¹⁰ “Ámeke wáitaitme. Anan kartiniaitme. Yajachiiitme. Maaj, iwianchiitme. Tura ashí pénger ana nuka imiá nakitniuitme. Tsej, ¿urukamtaí Yusa jintí naka ana nu emeskim weam? ¹¹ Paij, yamaikia Uunt Yús asutiámattawai. Yamaikia amesha jimi kusurmatai unturí tsawantin penké íschattame” tímaiya. Tura nú chichamaik jii kusurmatai kirit ímiuk chíkichan eámiyai enké jurukit tusa. ¹² Nu túrunamtaí akupin nuna wáinak, ti enentáimpramiya. Túruna Uunt Yusa chichamen enentáimtur umikmaiya.

Chíkich Antiukíanam etserkarmiania nu

¹³ Nuyá Juán waketki Jerusarénum wémaiya. Tura antsu Pápruka ni tsaniakmarijjai kanunam enkemprar Pápus péprunka ikiukiari Pirji péprunam jeawarmiaiya. Nusha amaini Pampiria nuñkanam pujawai. ¹⁴ Nuyá Pirji péprun nankaikiari Antiukia péprunam jeawarmiaiya. Nú Antiukíasha Pisitia nuñkanam pujawai. Nu jéawar Israer-shuar ayampратin tsawantin, nuka sáwartin, Israer-shuar iruntai jeanam wayawar pujusarmiaiya. ¹⁵ Tura nu jéawar Yús-Papiniun yaunchu áarman áujas aminkiamtai, Israer-shuar iruntai jeanam írniuri Páprun tiarmiaiya “Yatsuru, jintiatin chícham takakkurmeka yamaik titiarum. Antukarmi” tiarmiaiya.

¹⁶ Tutai Papru wajaki uweje takuimiya. Tura chichaak “Israer-shuarteram, tura Yúsna umirkataj tusa wakerarmena nu antuktaram, tímaiya. ¹⁷ Ii Yusrí ii yaunchu uuntrin Israer-shuartin achikmaiya. Tura niisha írara núnik Ejiptunam matsatainíak Yuska nin páchiniak uunt awajsarmiaiya. Yús ni kakarmarijjai nuñkanamaya ii yaunchu uuntrin uwemtikrarmiaiya. ¹⁸ Túrasha atsamu nuñkanam ii uuntrin kuarenta (40) uwitin Yuska aya kátsuntramiaiya. ¹⁹ Tura nuyanka siati áentsun mátsatkainian, Kanaan nuñkanam matsamarmia nuna amukarmiaiya. Nú nuñkan ii yaunchu uuntrin susataj tusa Yús túramiaiya. ²⁰ Nuyanka ii uuntri akupniurin, juís tútain, anaikiamiya. Tura chíkichan ukunam anaiki anaiki wémaiya. Nuna tura túraakua kuaru siántu senkuenta (450) uwi ejemaiya. Samuersha Yúsna etserin náamtsáin nuna túrimiaiya Yús. ²¹ Tura nuyanka áencha juisan nakitiainiak, uunt akupin náamkat tusar Yúsna seawarmiaiya. Tuíniakui Yuska Sesa uchirin Sáuran anaikiamiya. Nú Saúra uuntriníak Pinjamínkiauyayi. Tura Saúrsha kuarenta (40) uwi nú áentsun akupkat tusa Yús tsanatkamiaiya. ²² Tura Saúr náamkam ataksha Yús awainkimiya. Tura nuyá iiksan nú nuñkanam uunt akupin atí tusa Tawitain anaikiamiya. Tura Yuska juna Tawitain tímaiya “Isaí uchirin Tawitain winia enentáir jeamtai achirmakjai. Tura Winia umirtin átatui” tímaiya. ²³ Wats, Tawit weeanmaya Jesúsaiti. Tura Yuska Israer-aentsun Uwemtikrartiniyan Jesusan anaitiukmaiya, yaunchu timiariun uminkiat tusa. ²⁴ Jesuska táatsain Juán ashí Israer-shuaran tunaaríniá enentáimtumari imiantianin ujakmaiya. ²⁵ Tura Juansha ni jákatniuri jeatemamtaí, chichaak “Átum enentáimtarmana núchaitjai. Wikia Yusa anaikiamuri, Kristu tutai, náakarmena núchaitjai. Antsu Niñkia winia ukunmaruj winittiwai. Tura Niisha wíjainíak ti nankaamantu asamtai wikia sapatrincha atitratatí tichamniatjai” tímaiya.’

²⁶ ‘Pai, yatsurtiram, Apraám weeatiram, tura ashí Yús ashamkarum umirkaitrumna nu, antuktaram. Ju uwempratin chíchamka íniuiti, tímaiya. ²⁷ Iis, Jesusa túrunatniurin Yuska yaunchu ni etserniurin áamtikrachmakia. Tura ukunam Jerusarénumiá shuar ni akupniurijjai tuke sáwartin nuna áujeatskesha penké nekaacharmiaiya. Tuma ásar Jesuska Yusa Uchirinti ticharmiaiya. Tura, jakatí, tiarmia nu, Jesusa túrunatniurin, Yús yaunchu chíchakmia nuna, tímatrusarun umikiarmiaiya, tímaiya. ²⁸ Jesuska penké tunaamkachunak yamaikia mantamnatí tusar Piratun seawarmiaiya, tímaiya. ²⁹ Tura Yusa Papirjin ashí Jesusnan tímia nuna tímiannak umikiarmiaiya. Tura nuyá krúsumiá itiarar iwíarsarmiaiya. ³⁰ Túramunak Yús jakamunmayan iniantkimiya. ³¹ Jesuska jakamunmaya nantaki, yaunchu Kariréanmaya Jerusarénum Niijjai irutka wéarmia nuna núkap tsawantin pujus wantintukmaiya. Nú shuaraiti yamaikia Jesusa túrunamuri etserania nu’ tímaiya.

³² ‘Iisha núnisrik shiir chíchaman Yús yaunchu ii apachrin tiarmia nu étsereaji. ³³ Iisha Israer-weeá asakrin, Yuska Jesusan iniantkimiya nujai ii apachrin anajmatramia nuna yamá uminkiaiti. Kame Sarmu Jímiar papiniun ju áarmaiti:

“Ámeke winia Uchiruitme.

Túmaikui yamaikia winia iwíakmar susamuitme.”

³⁴ Tura Yuska Jesusa nantakmarin jintintiaik, tura ni ayashí káurchatniun jintintiaik, chíkich Sarmu papiniun juna áamtikramiaiya:

“Nekas péñkeran Tawitian anajmatramaj nuna atumin amastatjai.”

³⁵ Tura nú arant, nú paant atí tusa, chíkich Sarmu papinium jú aarma awai:

“Yusa, ame Uchiram aneamna nuna ayashí káurtincha tsankatkashtatme.”

³⁶ ‘Nekaatarum, yatsurtiram, Yuska Tawitia ayashín tíchamiayi nuna. Tawitkia Yus tímian amuk jakamiayi. Túrasha ní ayashínkia káurmiayi. ³⁷ Tura antsu Yus iniantkímia nuna ayashínkia penké káurchamiayi. ³⁸ Tuma asamtai, yatsurtiram nekaatarum. Jesujainkete tunáa asakártin. ³⁹ Tura Muisais yaunchu akupkamia nujají tunáa tsankurnarhamnia nu, yamaikía Jesujají tsankurnartiniati. ⁴⁰⁻⁴¹ Yúsnan etserin júna áarmiayi:

“Enentáimpratarum wishikkiartintiram. Ashamkatarum. Túruram menkatumpratarum. Wi Yus asan, átum pujarmena nú, aents túrachminian túratajna nusha penkesh nekaashtatrum, chíkich ujatmainiakuisha.” Tu áarmaiti.

Tuma asamtai yatsurtiram, aneartarum atumin nuna túrutmawáirum, Yusnan etserin aarma tana nútiksán.” Nuna chichaak amukmiayi Papru.

⁴² Tura nuyá Papru Pirnapíjjají jíinki wéenakui aents chichainiak “Chíkich sáwartincha jútikarmek etserkatarum” tiarmiayi. ⁴³ Tura nuyá iruntsua tseñkeenan Israer-shuarsha, tura chíkichkia Israer ajasarusha, Yúsan umirkatajtsa wakermia nuka, Páprun Pirnapíncha nemarsarmiayi. Niisha nu áentsun chicharuk “Yusa anenkrattairí enentáimtusrum kakatarum” tiarmiayi.

⁴⁴ Tura chíkich sáwartincha nu péprunmayá ti untsurí aents Yus-Chicham antuktai tusar tuakarmiayi. ⁴⁵ Tura Israer-shuarka ti untsurí áentsun tuakarun wáinkiar, suir íiniak, ti kakerkarmiayi. Tuma asamtai Páprun katsekkar “Jú chichaana júka ántar tawai” tiarmiayi. ⁴⁶ Támaitiat Pápruka Pirnapíjjají arantutsuk chichainiak tiarmiayi “Israer-aentstirmin, atumin emka Yus-Chicham ujaktiniuji. Túrasha átum támaitiatrum nakitramarme. Tura atumsha nakitia asarum, Yúsnun tuke iwiaaku pujuscharmnia ajasurme, tímiayi. Tuma asamtai íikia yamaikía Israer-aencha ujaktai tusar weraji, tiarmiayi. ⁴⁷ Nu túratarum tusa, Uunt Yus akuptamtsujik. Jes, ní Papirín júna tawai:

“Israer-shuarcha Winia nekarawarat tusan anaitiukjame. Tura ashí nunñkanmayá aents uwemprarat tusan akuptajme.”

Tu áarmaiti” tímiayi. ⁴⁸ Nú chichaman antukar Israer-shuarcha ti wararsar “Uunt Yus tana nuka imiá péñkeraiti” tiarmiayi. Tura, tuke iwiaaku pujusmin armia nu Yus-shuar ajasarmiayi. ⁴⁹ Tú tumakí Yus-Chicham nú nunñkanam ashí jamarmiayi. ⁵⁰ Túrasha nuwán, Yúsan péñker enentáimtuinjan tura péñker wekainian, Israer-shuarka yajauch enentáimtikarmiayi. Áishman péñkerí ármia nunasha, yajauch enentáimtikarmiayi. Túram Páprun Pirnapíncha katsekkar, chichaman irunturar najatawarmiayi. Tú-turukiar ní nunkeyá jíiki awemarmiayi. ⁵¹ Túram Papru Pirnapíjjají, jú aentska yajauchiiti tusar, wéenak naweyan nunñkan akakekiar ikiukiarmiayi. Túrawar Ikiuniu péprunam wearmiayi. ⁵² Yusa Wakanísha pimiútkamu ásar Yus-shuarka ti warasarmiayi.

14

Ikiuniu Péprunam túrunamia nu

¹ Ikiuniu péprunam Papru Pirnapíjjají jeawar Israer-shuar iruntai jeanam wayawarmiayi. Túrunawar Yus-Chichaman etserkarmiayi. Túram ti untsurí Israer-shuar ármia nu, Israer-shuarcha ármia nusha Yúsan umirkarmiayi. ² Tura chíkich Israer-shuar, Yúsan umirkacharu ármia nu, Yus-shuaran kakerkarat tusar Israer-shuarchan yajauch enentáimtikarmiayi. ³ Tuma asamtai Papru Pirnapíjjají nú nunñkanam ti nukap tsawant pujusarmiayi. Tura Uunt Yúsan enentáimtuinia ásar, arantutsuk Yusa waitnenkratairín etserkarmiayi. Tura, etserinia nu winia kakarmarjainti tusa, Yuska aents túrachminian najanamtikiawarmiayi. ⁴ Tura Ikiuniunmayá aentska jíimiri kanakarmiayi. Chíkichkia Israer-shuar tuinia nu nekasaiti, tiarmiayi tura chíkichkia Jesusa akatramurí tuinia nu nekasaiti, tiarmiayi. ⁵ Tura nuyá Israer-shuarchajají Israer-shuarka chichasar pepru uuntríjjají chichasarmiayi. Tura Papru Pirnapíjjají katsekkar tura kayajají tukurar, yajauch awajatsniun nanñkamawarmiayi. ⁶ Túrasha Papru Pirnapíjjají nuna anturramkar, Ristra péprunam wearmiayi. Nuyasha Tirpi péprunam wearmiayi. Nu péprusha mai Rikiaunia nunñkanam pujuiniawai. ⁷ Tura Yus-Chichaman etserkarmiayi.

Ristra péprunam Páprun kayajají tukurarmiania nu

⁸ Ristra péprunam tunamaru áishman pujumiayi. Ní akiiniamuriyá tuke wekaichauyayi. ⁹ Nú áishman Papru chichaamun antúu pujumiayi. Túman Papru úmamkemas nin íismiayi. Niisha, Yusa kakarmarjijají tsuamartatjai, tu enentáimiun Papru nekaamiayi. ¹⁰ Tura Pápruka kakantar chicharuk “Wajakim wewe ajasam wajasta” tímiayi. Tutai áishman wiut kutsuár wajakí wekaimiayi. ¹¹ Papru túramia nuna aents wáinkiar Rikiaunia chichamjají untsumainiak “Yuska áishmanka áanin ajasaru in tarutramarjijí” tiarmiayi.

¹² Pirnapínkia, Júpitir náartin yúsaiti, tiarmiayi. Tura Páprunka, Mirkiuriu náartin yúsaiti, tiarmiayi. Pápruka chichau asamtai tu anaikiarmiayi. ¹³ Nú pepru jeamunam Júpitir náartin yusa jeen pujumiayi. Tura Júpitir náartin yusa pátriri kukujin iwiarkamun, wáakajai itiamiayi. Tura niisha ni áentsrijiai wáakan maatai tusar pujuarmiayi. Tura tikishmatrar ajamsatai, tiarmiayi. ¹⁴ Tura Jesusa akatramuri Pirnapísha Páprusha nuna nekaawar, auka nakitaiji tusar, ni pushirin jgararmiayi. Túraraw aents írunmanum pachiniawarmiayi. ¹⁵ Tura tiarmiayi “Shuara, ¿urukamtai áitkiarum? Iisha yúschaitji. Atumea áankiitji, tiarmiayi. Penké ánrarum túrarmena nu ikiukrum, nekas Yus nemarsatarum tusar iisha taji. Nekas Yuska nayaimpincha, nunkancha, nayaantsancha, tura ashí nuji írunna nunasha najanaiti, tiarmiayi. ¹⁶ Jes, aents ni enentáimmarjijaijn wekasarat tusa Yuska yaunchu tsan̄katkamiayi. ¹⁷ Tuma ain shuaran pen̄ker awajsamujai Wiitjai Nekas Yus tusa paant awajmamsamiayi. Kame yumi yutuktinian nayaimpinmayá akupturmaji. Tura ejemamar warasarmi tusa yurumak nerektinniasha súramji” tímiayi.

¹⁸ Túrasha Pápruka tímianu támaitai, nuna anturtsuk wáakan maawar nin tikishmatrar ajamsataitsa wakeriarma nuna suritkiachminiak suritkiarmiayi nu áentsun.

¹⁹ Tura nuyá Antiúkianmayá Ikiuniunmayasha Israer-shuar táarmiayi. Taar nuyá áentsun Páprun yajauch awajsatniun enentáimtikrarmiayi. Tú tutai Páprun kayajai tukurarmiayi. Tura jakayi tiar péprunmayá japiki júkiar arant áepsarmiayi. ²⁰ Túrasha Yus-shuar Páprun tariar téntakarmiayi. Túram nuñkia Papru wajaki wé ataksha péprunam wayamiayi. Tura kashin tsawrar Papru Pirnapíjjai Tirpi péprunam wearmiayi.

²¹ Tírpinium pujusar uwempratin chichaman etserkarmatai untsuri shuar Yúsan umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiúkianmasha waketkiarmiayi. ²² Waketainiak “ashí Yus tana nu tímatrusrumek tuke umirkatarum” tuñiak Yus-shuaran ikiakáramiayi. Tura nin tiarmiayi, “Yusa akupea-murijn pachiinkiataj tákurkia ti wáitsatniuitji.” ²³ Tura Yus-shuar írunmanum Yus-shuaran wáinniu anaikiarmiayi. Yurumtsuk Yúsan áujsar chicharainiak, “umirkarumna nú Yus iirmasarti” tiar ikiukiarmiayi.

Yaunchu júnkiarmia nú Antiúkianam waketkiarmiayi

²⁴ Nuyá Písitia nunkanam nan̄kaamakiar Pampiria nunkanam jeawarmiayi. ²⁵ Nuji jeawar Pirji péprunam Yus-Chichaman etserkar nuyá Ataria péprunam wearmiayi. ²⁶ Nuji kanunam en̄kemprar, yaunchu júnkiarmia nú Antiúkiá péprunam waketkiarmiayi. Páprusha Pirnapísha tuke júntsaijn nú Antiúkianmayá Yus-shuar chichainiak, Yusa takatji túrattarmena nuna Yus waitnentramak yáinmakarti, tiar akupkarmiayi nuik. ²⁷ Nú Antiúkianam jeawar, Yus-shuaran irurar, ashí Yus nin yáin̄kiarmia nuna ujakarmiayi. Tura nútiksaj Israer-shuarchan Uunt Yus uwemtikratay tusa untsukmia nunasha ujakarmiayi. ²⁸ Tura nuyá Yus-shuarjai Papru Pirnapíjjai núkap tsawant pujusarmiayi.

15

Jerusarénum Yus-shuara úntrijiai iruntrarmiania nu

¹ Nu tsawantin áishman Israer nunkanmayá wear, Antiúkianam jeawar Yus-shuaran jintintiainiak “Muisais tímia nútiksarmek tsupirnaktin ana nu túrachkurmeka uwemprash-tatrumé” tiarmiayi. ² Tuma asamtai Papru Pirnapíjjai, núchaiti tusar, nú áishmanjai ti kakaram chicharnaikiarmiayi. Túrasha nuu enentáiniak enentáimsatniun tujinkiarmai-yai. Tuma asamtai Antiúkianmayá Yus-shuar Páprun Pirnapíncha, atumsha chíkich áentsjai Jerusarénum wétarum tusar akupkarmiayi. “Tura nuji Jesusa akatramurjisha Yus-shuaran wáinniusa iniasrum iturmainkit tusarum pen̄ker nekaatarum” tiarmiayi. ³ Papru Pirnapísha akupkamu ásar wéenak Pinisia nunkanam, Samaria nunkanmasha nan̄kaamainiak Israer-shuarcha Yus-shuar ajasman Yus-shuaran ujakarmiayi. Tura Yus-shuarsha nuna antukar ti warasarmiayi.

⁴ Tura Páprusha Pirnapísha Jerusarénum jeawarmatai Jesusa akatramurjisha Yus-shuara wáinnurjisha tura pen̄ké Yus-shuarsha itiwarmiayi. Tura niisha túrunamia nuna mash etserkarmiayi. ⁵ Túrasha Pariséu aencha, Yus-shuar ajasarmiania nu, wajakiar chichainiak “Muisais tsupirnaktinian akupkamia nuna tura nu arant ashí Muisais tímia nunasha Israer-shuarchasha umirkatin áiniawai” tiarmiayi. ⁶ Nuyasha Jesusa akatramurjisha Yus-shuaran wáinniusa nu chichaman nekaatai tusar iruntrarmiayi. ⁷ Chichasua umikiarmatai Pítur wajaki tímiayi, “Yatsurtiram, Yus nuik winia chichartak “Israer-shuarchasha winia chichampnin antukar umikiarat ujakarta” tu anaitiukmia nu nékarme. ⁸ Tura Yus Nin̄ki ashí aentsu enentáin neka asa, Wíi shuar ajasmin áiniawai tusa, ni Wakanin Israer-shuarchancha susamiayi, in suramsamij nútiksaj. ⁹ Yus incha aushatka awajtam-sachmaji, tímiayi. Antsu métekraketji. Tuma asamtai niisha Yúsan enentáimtuiniakui, Yuska enentáiyain ni tunaarin japirarmai, tímiayi. ¹⁰⁻¹¹ Tura ílkia nékaji niya áantsarik Jesukristu

waitnenkartutairjijai uwempraitji. Nuñkia çurukamtia Yus uwempraru áiniawai tajsha, átum Muisais yaunchu akupkamia nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsançhakait. Warí, ii úntrjsha tura iisha ashí Muisais tímia nu umiktin tujinkiamji. Tuma asamtai, çurukamtai nú káarkasha Israer-shuarchasha áentskatin wakerarum?" tímiaiyi Pitiur.

¹² Pitiur nuna tutai Pirnapísha Páprusha chichainiak, "Israer-shuarchasha ni kakarmarjñ nekaawarat tusa aentsti túrachminian túratniun Yuska ti yáinmakmaji" tú ujuam mitiat wáinkiar antúu pujuarmiayi. ¹³ Nuna ujasua amikmatai, Jakupusha tímiaiyi "Yatsurú, antuktarum. ¹⁴ Nuik túrachman Yus túramia nuna ii yachi Semuñ Pitiur ujatmakji. Júiti: Yuska Israer-shuarcha waitentak Winia ajasarat tusa chikishtarchiniak achikiuiti" tímiaiyi. ¹⁵ Jusha Yúsnan etserin yaunchu áarmia nu tímiatrusañ túrunayi. Júiti aarma:

¹⁶ "Israer-aents meserar, jea sáanakniua áintsan áiniawai. Tura ukunam ataksha tana, Tawitia jeen sáanaki ana nuna, ataksha najanattajai. Juakai nuna achikian ataksha awajrattajai. ¹⁷ Ashí nuñkanmayá aents, Israer-shuarcha ainia nu, winia náarun pachinia nu, Winia eçatkarat tusan túrattajai. ¹⁸ Uunt Yus nuna yaunchu ujakmiayi."

Tu áarmaiti' tímiaiyi.

¹⁹ Tuma asamtai, yatsurtiram, wi tájarne: Israer-shuarcha Yus-shuar ajasaru áiniana nu, imiatik awajsachmi. ²⁰⁻²¹ Iimiatarum, ashí péprunam Israer-shuar iruntainiam yáunchuyan tuke sáwartin Muisaisa áarmanjñ jintintiainiatsuk. Tuma asamtai, áyatik áatratai ju "Ántar-yus susamu ana nu iniaisatarum. Ántar-yusan susamu asamtai yajauchiiti. Tura tsanir-mawairap. Tura kajentikramua nu yuawairap. Tura numpasha umairap." Tu áatratai' tímiaiyi Jakupu.

²² Nuyá Jesusa akatramurjsha Yus-shuaran wáinniusha nuyá ashí Yus-shuaraim enentáimsarmiayi. "Papru Pirnapíjijai wéakui, shuar niijijai nenakar Antiukíanam akupkatai" tiarmiayi. Tuma ásar Jútas Parsapasan, Sérasnasha anaikiarmiayi. Niisha mai uunt Yus-shuar áarmiayi. ²³ Tura niijijai ju papin áarman akupkarmiayi:

"Iisha Jesusa akatramurj tura Yus-shuara wáinniurj tura ashí Yus-shuaraitjinia nu, atumin Israer-shuarcha árumna nu, Antiukíanam, Sírianam, tura Sirisianmasha, ju papí akupeaji. ²⁴ Juyá aents ii chichamejainchu atumijn jeartamarai. Túrawar, tsupirnaktin ana nu, tura ashí Muisais akupkamia nu túratarum, turammiarne. Nunasha ni chichamejain turarmayi. Nu chicham atumsha antukrum nushá enentáimprarum "entá nuyañka itiurkatjik" tárume. ²⁵ Tuma asamtai nu nekaar, iisha métekrak enentáimsar, jimiará áishman akupkatin anaikiamji. Ju áishman ii aneamu yachj Páprujai Pirnapíjijajsha atumin írmasarat tusar akupeaji. ²⁶ Papru tura Pirnapísha ii Uuntrj Jesukristunam surumakarmiayi, ni takatrjsha tsumai ain túrami tusar. ²⁷ Niijijai Jútassha tura Sérassha akupeaji. Ii chichajnia nuna niisha ni wengejai atumin ujatmakartatui. ²⁸⁻²⁹ Kame túratin asamtai iisha Yusa Wakanjijai ju áartin enentáimsaji. Naman ántar-yus susamu ana nu yuawairap. Tura numpasha umairap. Kajentikramu ana nusha yuawairap. Tura penké tsanirmawairap. Nuyasha chíkichkia nú nançkaamas tichattaji. Tura antsu nu iniaisarmeka, penker áatrume. Ayu, Yus wáitmakarti." Tu áarman akupkarmiayi.

³⁰ Tura Antiukíanam akupkam wearmiayi. Nuñ jeawar Yus-shuaran irurar, papin súsarmiayi. ³¹ Tura Antiukíanmayá Yus-shuarsha nu papin áusjar, penker jintiamu chichaman áarman wáinkiar, ti shiir enentáimsarmiayi. ³² Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintiawar, Yus-shuaran ikiakáarmiayi. ³³ Tura nuñ ishichik tsawant pujusarmatai, Yus-shuarka, penker waketikiarum, tiar akupkarmiayi. ³⁴ Tura Séras juáktiniam wakerukmiayi. ³⁵ Páprusha Pirnapíjijai juakarmiayi Antiukíanam. Niisha chíchik aentsjai Yus-Chichaman éteruk pujuarmiayi.

Papru atak Yus-Chichaman ipiampártasa wémiania nu

³⁶ Nuyá ukunam Papru tímiaiyi Pirnapín "Ashí péprunam iisha Yus-Chicham etserkamaj nuñ Yusaj ii yachj ainia nusha urukák pujuinia iyutai" tímiaiyi.

³⁷ Pirnapíkia Juan Márkusua iijijai winiti tusa wakerimiayi. ³⁸ Tura Pampiria nuñkanam Juan Márkussha niisháa weu asamtai tura Yusa takatrjñ iniaisa asamtai, Pápruka ayatniun nakitramiayi. ³⁹ Papru Pirnapíjijai ti kakannairar kanakarmiayi. Tura Pirnapíkia Márkusua ayaki Chípriniam wémiayi. ⁴⁰ Pápruka Sérasan ayaki wéakui Yús-shuar Yus yáinmakarti tinia akupkarmiayi. ⁴¹ Tura Siria nuñkanmaani wekaráktak, Yus-shuaran ikiakárkutak Sirisianam jeamiayi.

¹ Papru Sérasjaj Tirpi pepru lírkutak Ristra péprunam jeawarmiaiyi. Tura nuǵ Rístranam Yus-shuaran wáinkiaromiaiyi, ni naarǵ Timiutéu. Ni nukurínkia Israer-shuar Yus-shuarauyayi. Tura ni aparínkia Kriaku áentsuyayi. ² Tura Ristra péprunmaya Ikiuniu péprunmayasha Yus-shuar ármia nu, Timiutéu pépker wekaawai, tiarmiaiyi. ³ Kame Pápruka Timiutéun uyuuntusat tusa wakera asa, Timiutéu aparǵ Kriaku-apachin nekaawarmatai Israer-shuar nuǵ pujuarmia nu yajauch enentáimpraraǵ tusa tsupirmantikiamiaiyi. ⁴ Tura nuyá Papru Timiutéujaj ashí péprunam nuǵ sétur nuǵ sétur wéenak Jesusa akatramurǵsha Yus-shuaran wáinniusha Jerusarénum nuik jintintian umiktarum tusa ujarkutak wearmiaiyi. ⁵ Tu ujamu ásar Yus-shuar nú arant Yúsán enentáimturar kakaromiaiyi. Tura ashí tsawant kawenǵki wearmiaiyi.

Papru iimiarmia nu

⁶ Tura Yusa Wakanǵkia Páprun Yus-Chichaman Asia nuǵkanam ujaktinian tsanǵkatkachomiaiyi. Tuma asamtaí Pirijia nuǵkanam tura Karasea nuǵkanam airkutak, ⁷ Misia nunǵka jeatniunam jeawarmiaiyi. Túrunawar “Pitinia nuǵkanam wetai” tiarmiaiyi. Túrasa Yusa Wakanǵ nuǵsha wétinian suritkiamiaiyi. ⁸ Tuma asamtaí Misia nuǵkanam menantǵki Truas péprunam pachiniawarmiaiyi. ⁹ Nuǵ jeawar Papru kashi iimiarmiaiyi. Masetúnia nuǵkanmaya áishmanǵkan wajan wáinomiaiyi. Nu áishman Páprun chicharuk “Winitritia. Yáinǵkiamnium” tímiaiyi. ¹⁰ Nuyánka tu iimiarmatai, wisha Páprujaj wetai tusa iwiarnarmiaiyi. Tura Yus incha nú nuǵkanam ni chichameǵ etserkat tusa ti nekas untsurmakrin wéaji, tímiaiyi.

Jiripius Péprunam túrunamia nu

¹¹ Tura nuyánka kanunam enǵkemprar Truas péprunmaya jíinkir Samutrásia nuǵkanam jeamiaiyi. Tura kashin tsawar nuyánka katǵjar Niápuris péprunam jeamiaiyi. ¹² Tura Niápurisnumiá náwek Jiripiusnum jeamiaiyi. Nuǵ Jiripius péprunmanka Rúmanmaya aents matsamsa ármiaiyi. Tura nú péprusha Masetúnia nuǵkanam nekas unǵk tu pepruyayi. Tura nuǵsha seturmajai. ¹³ Nuyá sáwartin tsawarmatai pepru ikiukir entsá supichik wémiaiyi. Yus áujsatniun iruntrarmia nuǵ pujusar, nuwá iruntrarmia nu Yus-Chicham ujakarmiaiyi. ¹⁴ Nuǵ Tiatira péprunmaya nuwá, ni naarǵ Ritia wáinkiamiaiyi. Niisha tarach yamakain pépkeran súrinuuyayi. Yúsnasha shiir awajniuuyayi. Yus-Chichaman Papru etserkamia nuna niisha pépker anturkamiaiyi. Túman, Uunt Yus Papru chichaamun umirkat tusa ni enentáin takasmiaiyi. ¹⁵ Túruna nú nuwá níniurǵjaj imianomiaiyi. Tura nuyasha chichaak “Yus-shuar nekas ajasai túruturmeká winia jearuǵ winitiarum” tímiaiyi. Tura nuǵ jeawakrin setumtikrampramiaiyi.

¹⁶ Tura nuyá ukunam Yus aujsatái tusa wekaamar nuwách nekaamin-iwianch enǵkemtuamu ínkinunmakmiaiyi. Nu nuwáchikia misatkauyayi. Niisha nékamkui nérenniurǵsha ti kuitriniawarmiaiyi. ¹⁷ Tura nú nuwách incha Pápruncha pataaturmamiyai. Tura kakantar untsumuk “Ju áishmanǵsha nekas Uunt Yúsán umirkaru ániawai. Tuma asa niisha atumin uwempratin chichaman ujatmarme” tímiaiyi. ¹⁸ Tura nú nuwáchisha ti núkap tsawant tu wekaomiaiyi. Titmakui, Papru ayanmar iwianchin chicharuk “Jesukristu naarǵjaj tájame: jíinkitiá ni enentáiya” tímiaiyi. Tutai íwianchikia nú chichamaik jíinkimiaiyi.

¹⁹ Tura nuwáchi nérenniurǵsha, íwianch jíiki awematniun nekaawar, Páprun Sérasnasha kajerak achikiar pepru uuntrǵ íisarar tusa ajapén júkiarmiaiyi. ²⁰ Tura pepru úuntrǵin ejeniar tiarmiaiyi “Ju áishman Israer-shuar ániawai. Tura in páchim enentáimtikramainiaiyi.” ²¹ Tura iisha Rúmanmaya aents árin, ii túrachminian, iikia asumprachman jintintraimainiaiyi” tiarmiaiyi. ²² Tura nuyánka ashí aents Páprun Sérasnasha kajerarmiaiyi. Túramtai pepru uuntrǵ chichainiak “Pushirǵ áitkiarum numǵjaj asutiátarum” tiarmiaiyi. ²³ Tura nuyá ti asutsua amikiar sepunam enǵkeawarmiaiyi. Tura sepú-iinian chicharuk “Ti pépker iistá pisararajǵ” tiarmiaiyi. ²⁴ Nu chichaman antuk, sepú-iin ti inít awayámiyai, tura nawen numi najanamuǵjaj tee chanuntamiyai. Tú tura ikiukmiaiyi. ²⁵ Tura kashi ajapén Papru Sérasjaj Yusan áujainiak kantampriarmiaiyi. Tura chíkich enǵkeamusha nuna antúu pujuarmiaiyi. ²⁶ Tu pujuiniaj aya aneachma ti kakantar uǵrkamiyai. Tura sepusha muchitramiaiyi. Túrunamtaí sepú wáitirǵsha ashí unrantrarmiaiyi. Tura aents jirujaj enǵkekar jíinkiamusha mash atiniakarmiaiyi. ²⁷ Túrunamtaí sepú-iin shintiarmiaiyi. Tura wáitisha mash unran aan wáiniak, enǵkeamusha jíiniar shiákchariash tusa ni puniariniak ukuiniak máamattsá pujumiyai. ²⁸ Tura Papru untsoak “Amek yajauch awajmamsaip. Ashí pujuiniaji” tímiaiyi.

²⁹ Tutai sepú-iincha jinia ekeemak tsékeǵki wayamiaiyi. Tura Papru Sérasjaj pujunam kuraǵki jearmiaiyi. ³⁰ Tura aa jíiki aniasmiaiyi “Uunta, ǵwarǵ iturkattaj uwemprataj tusana?” tímiaiyi. ³¹ Tutai niisha tiarmiaiyi “Uunt Jesukristu nekas enentáimtustá. Túrakmeká amesha, tura áminiurmesha uwemprattarme” tiarmiaiyi. ³² Tura nuyá ashí ni jeen pujuarmia nunasha Yus-Chichaman ujakarmiaiyi. ³³ Tura tsawant iranǵkai sepú-iincha Páprun Sérasjaj numpamnamurǵin nijiararmiaiyi. Túramtai nuyasha sepú-iincha nuarǵjaj uchrǵjaj

imianiarmiayi. ³⁴ Túramtai nuyasha ni jeen júkiarmiayi. Tura nujšha ayurawarmiayi. Tura sepú-iincha niiniurjijai Yus-shuar ajasu ásar ti shiir warasarmiayi.

³⁵ Kashin tsawar pepru uuntri, Páprun Sérasjai akupkata tusar suntaran sepú-iinian akup-tukarmiayi. ³⁶ Tura nuyanka sepú-iin Páprun tímiayi “Yamaikia pepru uuntri chichaman akupturmakai, átum wétinian. Tuma asamtai yamaikia pépkerak jíinkitiarum” tímiayi. ³⁷ Túrasha Papru suntaran chicharuk tímiayi “Wari, iisha Ruma aents árinin, niisha chichaman iwiartsuk ashí shuar íimiainiain asutiámamji. Túrawar sepunam enketmamji. Tura çurukamtai yamaikia uuk akuptamkataj tusa wakeruinia? Átsá. Antsu uuntcha ninñi taar jüirmaktiai” tímiayi.

³⁸ Tutai suntarsha waketkiar nuna ujakarmiayi pepru úuntri. Tutai niisha ti ashamkarmiayi Ruma aentsun nekaawar. ³⁹ Túmak ashamainiak Páprun Sérasan weri-armiayi tsankurturatum titiai tusar. Nuyasha sepunmaya jíikiar “Yamaikia wáitneasrum wetarum” tiarmiayi. ⁴⁰ Papru Sérasjai nuyá jíinkiar Ritia jeen wearmiayi. Tura Yus-shuaran ikiakárar ikuikiarmiayi.

17

Tisarúnikianam charaatum ajarmia nu

¹ Papru Sérassha wéenak Ampipuris péprunam Apurunia péprunmasha nankaamakutak Tisarúnikia péprunam jeawarmiayi. Nuş Israer-shuara iruntai jeé ámiayi. ² Tura Pápruka nuna tuke túrin asa nu jeanam wémiayi. Tura nujšha menaintiu sáwartin Yus-Chichaman paant etsermiayi. ³ Tura Páprusha Yus-Chicham tana tímiatrusañ jintintiarimiayi. Tura Kristusha wáitias jákatniuyi, tura nuyasha jakayat nantaktiniuyi, tímiayi. Tura nuyasha chicharuk “Wi Jesusnan atumin ujaajrumna nusha Yusa anakiamurin Kristu tútain tájarme” tímiayi Papru.

⁴ Nuna takui Israer-aents chikishtarchik umikiarmiayi. Túrawar Paprujai Sérasjajsha tsaninñiarmiayi. Tura Kriaku aencha ti untsurj Yúsan umirkarmiayi. Tura nuwá pépkerj armia nusha nútiksarañ umikiarmiayi. ⁵ Tura Israer-shuarka Yus-shuar ajascharmia nu, Páprun Sérasnasha suuir íisarmiayi. Túrawar chikich yajauch áishmañ naki yujáu armia nujaj chichasar nu peprunam charáa charáa ajarmiayi. Tura Páprun Sérasnasha achikiar aentsu úuntriñ suruktai tusar Jasunka jeen árenkarmiayi. ⁶ Túrasha Páprun Sérasnasha awetraj, Jasunkan tura chikich Yus-shuarnasha achikiar japirkutak júkiarmiayi. Tura pepru úuntriñ juñiak tiarmiayi “Ju áishmañsha ashí nunkanam charaatum ajá wekarmia nu yamaikia tímiyajai tarutramarji. ⁷ Tura ju Jasun ni jeen itiaarmiayi. Tura niisha ashí mash Rúmanmaya uunt akupniú chichamen nakitiainiawai, tiarmiayi. Tura jes, chikich akupin awai, tuiniawai. Niisha Jesusaiti, turamainiaji” tiarmiayi. ⁸ Nu chichaman antukar, aents nuj pujuarmia nu, úuntriñmiak charaatum ajarmiayi. ⁹ Tura Jasun chikich Yus-shuarjai Papru nekas awemattaji tusar, paij, kuit ikuuji, tiarmiayi. Nuna takui pepru uuntriñ nin akupkarmiayi.

Piríanam

¹⁰ Nuññkia nú kashi Yus-shuar Páprun Sérasnasha Pirja péprunam akupkarmiayi. Tura nuj jeawar Israer-shuar iruntai jeenam wearmiayi. ¹¹ Piríanmaya aentska Tisarúnikianmaya áentsjainñkia nankaamas pépker enentáimkia ármiai. Tuke enentáijjai Yus-Chichaman ántiarimiayi. Túrawar tuke tsawant imia ninñkisha Papru tana nuna nekasashit tusar Yusa papirin ii wearmiayi. ¹² Tuma ásar untsurj shuar Yus-shuar ajasarmiayi. Tura Kriaku aents nuwá pépkerj armia nusha áishmañsha umikiarmiayi. ¹³ Túrasha Tisarúnikianmaya Israer-shuarka Papru Yus-Chichaman Pirja péprunam étsereun antukar nuj weriar charaatum awajiarimiayi. ¹⁴ Túmainiakui Yus-shuar Páprun árutusk nayaantsanam akupkarmiayi. Tura Séraska Timiutéujai nuñ Piríanam juakarmiayi. ¹⁵ Tura Páprun nemariarmia nu Atenas péprunam nin ejeyarmiayi. Tura niisha waketainiakui, Papru chichaman akatar akupkamiayi, Sérassha Timiutéusha wárik winiartí tusa.

Atenasnum

¹⁶ Tura Papru Atenas péprunam pujus Sérasnasha Timiutéuncha nákamiayi. Nuñ nú péprunam ántar-yus ti irunkui Páprusha kúntuts enentáimmiayi. ¹⁷ Tuma asa Israer-shuar iruntai jeenam Israer-shuarjai tura chikich aents Yúsan enentáimtiarmia nujaj chichasmiayi. Tura tuke tsawant pepru ajapén aentsjai inkiunaikiar chichasarmiayi. ¹⁸ Nuyá chichaman jintin chikich naari, ipikiuriu, armia nu, tura chikichcha, ni naari, estuiuku, armia nusha Páprun áujmatsarmiayi. Chikichcha tiarmiayi “Imiá chichamtincha jusha waritramtajik.” Tura chikichcha tiarmiayi “Yajaya yusnan etserniuchuashit.” Páprusha Jesusa túrunamurin tura aents jakamunmaya nantaktinian étserkui nuna tiarmiayi. ¹⁹ Nuyanka aents iruntainiam, naari Ariupaku támanum Páprun júkiarmiayi. Nujšha tuke irunin ármiai. Nuñ Páprun aniasarmiayi “Iisha ame yamaram támema nu nekaatai tusar wakeraji, tiarmiayi.

²⁰ Amesha nusháa chicham jintiniatme. Túmaitkiui ju chichamsha warintuak tusar nekaatai tusar wakeraji” tiarmiayi.

²¹ (Atenasnumiá aencha tura chíkich nunkanmayá shuar nuj pujuarmia nusha aya yamaram chicham amia nunak ántiarmiayi. Tura aya nunak áujmatiararmiayi.) ²² Nuyanka Papru Ariupakunam ajapén wajaki tímiayi “Atenasnumiá áishmantiram, wi nékajai, atumsha atumi yusrj ainia nuyá tsurakchamniatrume, tímiayi. ²³ Kame wi nuik atumi yusrj enentáimutainiam ístaj tukaman nuj jeachin iwiamaram, JU NEKAACHMA YUSNAITI, tu áarman wáinkiamjai. Wátsek, ju Yus átum nékachiatrium tikishmatrumna nuna ujaktajrume’ tímiayi.

²⁴ ‘Nekaatarum, nu Uunt Yuska ashí nunkan tura nuj írunna nuna najanaiti. Tura Niisha nayáimpin nunkancha nérenniurinti. Tura aents najanamu jeenam nú Yuska pujuchuiti. ²⁵ Niisha aents yáinkiat tusa atsumatsui. Warí, imia-nínki Niisha ii iwiaakmarin, ii mayattairincha tura ashí írunna nunasha súramtsujik, tímiayi. ²⁶ Nekaatarum. Nuu numpanmayanak ashí áentsun najanamiayi ashí nunkanam matsamsarat tusa. Tura Yuska ii tsawantarin nekapmaiti; ii pujustiniasha nútiksán nakakmiayi. ²⁷ Winia éatkar wáitkiarar tusa Yus nuna túrayi. Túrusha Yus jeashtaka pujurtamtsuji, tímiayi. ²⁸ Jes, iisha Yusjái iwiaakji. Yusjái muchitajai. Tura Yusjái ii kakamarj takakji. Nútiksán atumi papí-aintri tíchamka “Ashí incha Yus najatmaitji.” ²⁹ Tura iisha Yus najatma asakrin kuri najanamusha, yúsaiti, tu enentáimsashtiniatji, tímiayi. Tura kuit-yussha, kaya-yussha aents enentáimsar najanamuka, yúsaiti tu enentáimsashtiniatji, tímiayi. ³⁰ Aents Yúsan nékainiachuk túrawarmiana nuna Yuska yáunchuka pachischamiayi. Túrusha yamaikia Yus ashí aentsun chicharuk “Tunaaruminiá enentáimpratarum” túramji, tímiayi. ³¹ Yuska áishmankan anaiki-aiti. Nú áishman ashí aentsti, yáki pépkeran túriniait, yáki yajauchin túriniait núnaka nekarmattaji. Nú áishman Yus akupkamun tuke enentáimtakui Yus nin anaikiaiti. Tura tsawant nú túrunatin áatna nuna Yus Nínki achikiuiti. Túrusha nekas anaikajai tusa, tura ashí áentstiram nekaatarum tusa nú áishmankan jakamunmayá iniantkimiayi” tímiayi Papru.

³² Tura nuna jakamunmayá nantaktinian áujmatun antukar chikichcha wishikiarmiayi. Tura chíkich “Yamaikia máakete. Antsu chíkich tsawantin antukmí” tiarmiayi. ³³ Tutai Papru iniaisamiayi. ³⁴ Tura chíkich aentska Papru táman umikar nin nemarsarmiayi. Nujsa Tiuníseu páchitkiauuyai, Niisha Ariupaku áentsuyayi. Tura nuyasha nuwá, ni naari Tamaris, tura chíkich aencha nútiksaran nemariarmiayi Páprun.

18

Kurintiu péprunam

¹ Nuyanka Papru Atenas péprun ikiuki Kurintiu péprunam wémiayi. ² Tura nuj Israer-shuaran ni naari Akiran wáinkiamiayi. Akiraka Puntu nunkanam akiiniauyayi. Tura ukunam Itiaria nunkanam pujaj uunt akupin Krautiu ashí Israer-shuaran Ruma péprunmayá awemarmiayi. Rúmaka Itiaria nunkanmaiti. Nuju awemamu ásar Akira Kurintianam nuik támiayi nuwé Pírisirajai. Tura Pápruka Akiran chichastaj tusa werimiayi. ³ Akirasha Páprusha mai juna takau ármiai, tarach ti núparman jeá najantain najanin ármiai. Tuma asamtai Papru Akiraj seturmiayi nu takat túrawartai tusa. ⁴ Tura tuke sáwartin Papru Israer-shuar iruntai jean wéuyayi. Nujsa Israer-aentsun Kriaku-aentsnasha nútiksaran Yus-Chichaman ujakar enentáimtikrarmiayi.

⁵ Tura nuyá Séras Timiutéujai Masetúnianmayá táarmatai Pápruka mijjatrusuk Yus-Chichaman étserek “Yusa anaikiamurj Kristu, atum nákarmena nu Jesusaiti” tímiayi. ⁶ Tura támaitat nú chichaman nakitiarmiayi. Túmainiak Páprun katsekkarmiayi. Tuma asamtai Papru, nuñkia ikuijume tusa, ni pushirin pear tímiayi “Atumek makuumarme. Tura wikia Yusañ makuumatsjai. Yamaikia Israer-shuarcha ainia nuna Yus-Chichaman ujakar-taj tusan werajai” tímiayi.

⁷ Tura nuyanka Israer-shuar iruntai jeanmayá jünki, Yúsan enentáimtin áishman Justu jeen wémiayi. Ni jeenka Israer-shuara iruntai jeen ayamach pujumiayi. ⁸ Israer-shuar iruntai jea chicharniurj, Krispu, Uunt Jesusan nekas enentáimturmiayi. Túruna nuarjijai uchirjijai iisha Yúsan umirkamiayi. Tura chíkich aencha Kurintianmayá armia nu nútiksaran Yus-Chichaman antukar, Jesusan enentáimtusar imianiarmiayi.

⁹⁻¹⁰ Nuyá Uunt Yus Páprun mesekran ipiatkamiayi. Chicharuk “Peñké ímiatik awajtam-sachartatui Wi ámjijai pujakui. Ju péprunmasha untsurj aents Winia ajasartin írunui. Tuma asamtai ashamsuk winia chichamur tuke etserkata” tímiayi Yus.

¹¹ Tura nuj Kurintiu peprunam jimíará uwi ejesattuk Yus-Chichaman étserek pujumiayi. ¹² Tura Kariun, Akaya nunka akupniurj anaikiamu aj, Israer-aents Páprun kajerarmiayi. Tura kajerainiak akupniunam irunturarmiayi. Túrawar Páprun júkiar ejeniarmiayi. ¹³ Tu

túrawar akupniun chicharainiak “Ju áishman Yúsan umirkatniun Muisais akupkama núnaa íikias ausháa jintiawai” tiarmiayi. ¹⁴ Tura Páprusha chichastaj táunak, Kariunja Israer-shuaran tímiayi “Jusha nekas tunáa túrakuinǵia, tura akupniun umirchakuinǵia, tárumna nuna anturkaintjarme. ¹⁵ Túrasha aya chichamnak tura aya náarjiniak atumí uuntri akupkama nunak tau asantai, atumek nuámtak ístarum tájarme. Wikia nu chichamnum pachinkiatniun nakitajai” tímiayi. ¹⁶ Taku ǵa jiiǵkmiayi. ¹⁷ Tura nuyanka Kriaku aents Israer-shuar iruntai jeǵa úuntrin Sústinisian achikiar awatiarmiayi akupniusha íimnianuma. Túrasha akupin Kariunǵa túranak penǵé pachischamiayi.

Papru Antiukíanam waketǵi, nuyá atak Yus-Chichaman ipiampartasa wémiania nu

¹⁸ Tura ni jeen waketkiarmatai, Papru nu péprunam untsurí tsawant pujusmiayi. Tura nuyasha ukunam Yusǵi yachi ármiania nuna áujas ikiuak Pirisirajǵi ni aishri Aki-rajǵi Senkrea péprunam wearmiayi. Nuǵ Israer-shuar túrutain umiak Papru ni inti-ashin awampriamiayi, nuik Yúsan tímiay nuna yamáí umiǵajai tusa. Nuǵnǵia kanunam enkemprarmiayi Siria nunǵanam waketǵitjai tusa. ¹⁹ Tura nuyá Ipiusiu péprunam jeawar Pápruka Pirisirán tura Akiran ikiukmiayi. Tura Israer-shuar iruntai jeǵanam wayá Israer-shuar irunar pujuarmia nuǵǵi chichasmiayi. ²⁰ Tura niisha Páprun juǵin puǵustá tusa seawarmiayi. Túrasha támaiat, tujintiaǵajai, tímiayi. ²¹ Nuyanka áujas ikiuak “Wisha Jerusarénnum námpér átatna nuna pachiiintuǵitniǵitjai. Tura Yus akuptakuinǵia atak tataǵaj atumín ístaj tusan” tímiayi. Tura kanunam enkemar Ipiusiumaya jiiǵkmiayi.

²² Nuyá Pápruka Sesaria péprunam jeǵa, nuyanka Jerusarénnum wémiai, Yus-shuaran nuǵi áujasata tusa. Tura nuyá Antiukíanam wémiai. ²³ Tura Antiukíanam ishichik pujus ataksha weak Karasa nunǵanam tura Pirijia nunǵanamni wekaráktak wémiai. Tura weak Yus-shuar matsarmia nuna chicharak ikiakáarmiayi.

²⁴ Tumáa puǵǵi Arijiántria péprunmaya Israer-aents Apurus Ipiusiu péprunam jeamiayi. Niisha Yusa yaunchu papirǵin ti péǵker nekaamiayi. Etserkatniuncha ti nékauyayi. ²⁵ Uunt Yus tímia nunasha unuimiátrauyayi. Tura tuke enentáǵiǵaj chichasmiayi. Jesusa túramurǵin péǵker jintinnuuyayi. Túrasha aya Juan imiakratmanak nekaamiayi. ²⁶ Ju Apurus arantusuk Israer-shuar iruntai jeǵanam chichamiayi. Tura Pirisira Akirajǵi ni étserman anturkar, nincha akanki júkiar Yusa chichamen ni nekaachmia nuna núkap jintintrimiayi.

²⁷ Nuyá ukunam Apurus, Akaya nunǵanam wétaj takui, Ipiusiumaya Yus-shuar yáinǵiar papí áarar atakas akupkarmiayi. Nú áentsun péǵkerak jeat tusa túrawarmiayi. Tura Akayanam jeǵa, nú áentsun Yusa waitnenkratairǵiǵaj uwepraru ármia nuna ti yáinǵiarmiayi. ²⁸ Tura Apurus Israer-aentsǵaj paant chichasmiayi. Túrasha Yusa Papirǵiǵaj, Jessusha nekas Yusa anaikiamurǵinti tusa paant jintiǵak nincha nupetkamiayi.

19

Papru Ipiusium jeamiayi

¹ Tura Apuraska Kurintiunam puǵǵi Pápruka náinniumaani wekaráktak, Ipiusium jeamiayi. Tura nuisha Yus-shuaran wáinkiamiayi. ² Tura aniasmiayi “Atumsha Yus-shuar ajasmarmena nuǵi, ¿Yusa Wakanǵi atumí enentáǵin enkemturmakaitrum?”

Tutai niisha tiarmiayi “Atsá. Iikia nuka penǵe áyatǵiksha ántichuitǵi Yusa Wakanǵi awai támaka” tiarmiayi.

³ Tutai Papru aniasmiayi “Entá, ¿nuikia atumsha warí enentáimsarme imianmiarum?” tímiayi.

Tutai niisha tiarmiayi “Juan jintintramamiai nu iisha enentáimsar imianmiami” tiarmiayi.

⁴ Tutai Papru tímiayi “Juansha, tunaarminǵa enentáimprarum imiantiarum, tíchamka. Nuyá tíchamka, winia ukuruǵi winittiana nu nekas enentáimtustarum. Niisha Jesus Yusa anaikiamurǵinti, tu uǵatmakchamka” tímiayi Papru.

⁵ Nuna antukar niisha Uunt Jesusa náarin enentáimtusa ataksháa imianirmiayi. ⁶ Tura Papru ni uwejeǵaj nin antiǵmatai Yusa Wakanǵi tarurarmiayi. Túram chíkich chichamǵaj chichasarmiayi. Túrunawar Yus-Chichaman etseriarmiayi. ⁷ Nusha tuse (12) áishman ármiai.

⁸ Tura nuisha menaintui nantutin Papru Israer-shuar iruntai jeǵanam werí Yusa akupamurǵin pachis arantusuk etsermiayi. Túrak nú áentsun ujaak Yúsnan nekasaiti tu enentáimtikarmiayi. ⁹ Tura chíkichka ni enentáǵin ti ikiatsúáarmiayi. Túrunawar umik-
tinian penǵé nakitiainia ásar aents ántamunam Yusa jintǵin penǵé yajauch chicharkarmiayi. Tuma asantai Papru Yus-shuar naka akanki yaruak Tiranu iskuirarǵin tuke tsawant Yus-Chichaman ujaarmiayi. ¹⁰ Nuna túruki jimiara uwi etserkamiayi. Túramu asantai ashí Asia nunǵanmaya aents Israer-shuar tura Israer-shuarcha Uunt Jesusa túramurǵin antukarmiayi. ¹¹ Tura aentsti túrachminian túrat tusa Yuska ni kakarmarǵin Páprun susamiayi. ¹² Jáanchniasha pushincha Papru antiǵman júkiar, náǵkamas jaa shuaran ejetim, nú jaa

shuarsha nuna antiñkiar péñker ajaarmiayi. Iwianchrुकुशा nuna antiñkiar, iwianch jñinkintai añkant ajaarmiayi.

¹³ Tura chíkich Israer-aents uwishin ármiai. Tura niisha chíkich chíkich péprunam wear iwianchrुकुन iwianchrin jñirki akuptin ármiai. Tuma asa niisha Jesusa náarijñai iwianchin jñiktiai tusar, iwianchin chichartuiniak “Nu Jesus Papru yajaana nuna náarijñai jñinktiarum tájarme” tiarmiayi. ¹⁴ Tura Israer Patri uuntri Esewia náartin, siati uchirj ármia nu, nuna túriarmiayi. ¹⁵ Túrasha Jesusa náarijñai jñinktia, tuiniakui, iwianchcha tímiayi “Jesusnaka nékajai. Tura Pápruncha nékajai. Tura atumsha, zyátsukaitrum?” tímiayi. ¹⁶ Nuna tinia iwianchrुकु áishman tsékenki nú áishmanak kakaram katsumak nupetkarmiayi. Túram ti katsumam niisha misú tura numpamnawar jñinkiar pisarmiayi. ¹⁷ Nusha Ipsiú péprunam túrunamiayi. Túrunamtai Ipsiú péprunmaya Israer-shuarsha tura Israer-shuarshasha nuna túrunamun nekaawar ti ashankarmiayi. Tura Uunt Jesusa náarin shiir awajarmiayi.

¹⁸ Túmainiai untsurj shuar Yúsan umirkaru Yus-shuar ajatsuk tunáa túrawarmia nuna paant ujakarmiayi. ¹⁹ Tura untsurj uwishniunawarmia nu, wawekratai papí ármia nuna itirmiayi. Itiar, júka iniaiyaji tusar, ashí íimiainiain áesawarmiayi. Nú papí áesawarmia nuna kuítrjsha senkuenta mir (50.000) nankaamasauyaji. ²⁰ Tu túrunamtai Uunt Yusa chichame pampañki tura nupetnaki wémiayi.

²¹ Tuma asamtai nuyasha Pápruka Masetúnia nunkanam Akaya nunkanmasha irautjai tu enentáimsamiayi. Tura nuyasha Jerusaréñnum waketkitjai, tímiayi. Tura nuyá ukunam Ruma péprunmasha wetajai, tu enentáimsamiayi. ²² Masetúnia wétin asa Papru ni tsaniak-marjñ Masetúnia nunkanam emka akupkamiai. Timiutéun Erastujai akupkamiai. Tura niñkia Asia nunkanam seturmiayi.

Ipsiunam ti charaatum ámia nua

²³ Pápruka tuke Ipsiunam pujáj, nuyá aents Yus-Chichaman nakitiainiak charaatum ajarmiayi. ²⁴ Iis, nuj Ipsiunam kaya-yusa jee ámiayi. Nu yus núwauyaji, Tiana naartin. Tura áishman, Timitriu naartin, nú jeañ nakumak uchichin najanniuyaji kuitjai. Tura niisha nú takatjai ti kuítrintin ajasmiai. Tura chíkich áishman nú takatan takarmia nunasha ti kuítrintin awajarmiayi. ²⁵ Timitriusha niijñai takarmia nuna ikiaanak, chikichnasha niijñai métek-taku takarmia nunasha ikiaanak niijñai charaatum ajarmiayi. Timitriusha tímiayi “Winia írutramutiram antuktarum. Iisha ju takat takaajnia jujaj ti kuit achíatsjik. ²⁶ Tura atumsha ju Papru wáintrumna nu tura ántarmena nu chichaak “Ashí aents najanam yuska ántar ániawai” tatsuk. Nuna tau asa, juj Ipsiunam, tura arant ashí Asia nunkanam, ni yúsrin iniaisarat tusa enentáimtikrarai. Tuma asamtai untsurj aents, ii yusrj Tiánan ikuiiniak, Papru tana nuna umirainiatsuk. ²⁷ Papru tu étserkui, iisha iturchat pujuschat-tajik. Kuit ii achíaj nuka menkakashtatuak. Tura nú arantcha ii yusrj Tiana jeeñ shuar iniaisachartatuak. Tura nuyá Asia nunkanmayasha tura ashí nunkanmaya aencha, ii yusrj Tiana shiir awajainia nuna yapajíáwar aun nakitrachartatuak” tímiayi Timitriu.

²⁸ Nuna antukar aencha ti kajekar charaatum ajarmiayi. Túmainiak “Ipsiú shuartikia, aya Tianak wakeraji” tu untsunmiarmiayi.

²⁹ Nuñkia aents páchim enentáimprarmiayi. Túmainiak Masetúniannaya Kayuncha Aristárkuncha Páprun nemanjñ ármia nuna achikiar japirkutak iruntai jeñam júkiarmiayi. ³⁰ Tura Pápruka iruntai jeñam wayá chichastaj taun, nuyá Yus-shuar ármia nu, nuna suritkiarmiayi. ³¹ Tura Asia nunkanmaya uuntri, Páprun amikrj ásar, aññkia wayawain tusar chichaman akuptukarmiayi. ³² Túrasha irunar pujuarmia nu, páchim enentáimprar, chíkichka nusháa untsunmiarmiayi. Tura chíkichcha nútiksarañ ausháa untsunmiarmiayi. Tura chíkichka ti untsurj, nekaachar “wariniak iruntara” tiarmiayi. ³³ Chíkich nuj w-jarmia nu charaatum amia nuna Israer-shuaran Arejántun jintinrar eem shitiawarmiayi. Arejántursha Kayun tura Aristárkuncha ayampruktinian wakerak takamatsatarum tusa uwejeñ takuimiayi. ³⁴ Túrasha aents iruntrarmia nu, júka Israer-shuaraiti tusa nekaawar, nú arant charaatum ajainiak “Ipsiú shuartikia aya Tianak wakeraji” ímia-imiainiakua tí nukap pujursarmiayi.

³⁵ Ipsiú pepu papí-aintrjsha áentsun itiatmamtik tímiayi “Ipsiú shuártiram antuktarum. Ii uunt yusrj Tiana jee íistinia íichukaitiaj”. Tura ni nakumkamurisha nayaimpinmaya inirmiania nusha íischatniukaitiaj”. Tura nunasha ashí aents paant nékainiatsuk, tímiayi. ³⁶ Warí, núnaka ashí aents nékainia asamtai atumsha itiatkatarum. Túrum enentáimtsuk yajauch túrawairap, tímiayi. ³⁷ Íimiatarum. Ju áishman átum itiarumna nu, ii yúsrin yajauch chicharkacharai. Tura ni jeeñ yajauch awajacharai. ³⁸ Wats, Timitriu tura niijñai takainiana nu tunáa túramun ujaktai tusar wakeruiniakka pepu penkerin werishtinkiait. Nuñkia máimtek iwiainiakartí. ³⁹ Tura chíkich chicham ákuñkia péñker iruntrarum

iwiaratarum. ⁴⁰ Kame ju yamá túrunamun nekaawar Rúmanmaya kapitián “Ti uunt kapi-tiántri yajauch awajsatai tusarun túrachurmeash” turamchatjiash. Warí, niisha “¿Urukamtai charaatum ajarum?” takuisha, áimkiatin penké tujinkiattaji” tímiayi. ⁴¹ Tura papi-aint nuna tuasua amik “Áukete. Wétarum” tímiayi.

20

Papru Masetúnia nunkanam Krisia nunkanmasha wémiania nu

¹ Charaatum ajasua amikiarmatai Papru Yus-shuaran untsuk Yusnan jintintrataj tusa ikiaankarmiayi. Tura áujas ikiuki Masetúnianam wémiayi. ² Nú nunkanam wekaráktak, Yus-shuaran jintintrar ikiakármiai. Tura nuyasha Krisia nunkanam jeamiayi. ³ Nuñ menaintiu nántuk pujusmiayi. Tura nuyanka kanujai Siria nunkanam wétasa pujus Israer-shuar chícham jurusman anturmamak “antsu nunkan Masetúnianmaanñ wetajai” tímiayi. ⁴ Tura Piríanmaya áishman Súpater naartin Páprun atamprimiayi. Tura Tisarúnikianmaya Aristárkusha Sekuntusha Tírpinmaya Kayusha Timiutéusha Asianmaya Tikikiusha, Trújimiusha ashí nu shuar Jiripius péprunam Páprun atampriarmiayi. ⁵ Túrawar niisha emki wear Trúas péprunam jeawarmiayi. ⁶ Tura iisha wakapruachu tanta yutai jisat amuukamtai, iisha Jiripius péprunmaya jíinkir, kanunam enkemprar Masetúnia nunkanmaya jíinkimji. Tura senku tsawant nankaamasmanum emki wearmia nu amaiyankarmiayi Trúasnum. Tura nujsa siati tsawant pujusarmiayi.

Trúas péprunam túrunamia nu

⁷ Tura tumintin kíarai Jesukrístu enentáimtusar yurumátai tusar iruntrarmiayi. Tura Papru Yus-shuaran jintintramiayi. Kame Pápruka kashinkia wétin asa chichaa-chichaakua kashi ajapén ejemiayi. ⁸ Tura yakí menaintiu pátaranam, tesaamu ámia nuñ iruntrarmiayi. Nujsa ji ekemarma untsurí irunmiayi. ⁹ Tura nujsa natsa Eutikiu, áankamunam ayamas pujusmiayi. Tura Papru ti esaram chichaakui nu nátsasha karí pujumiayi. Tumáa pujus kanaki yakí pátanmaya akaiki iniaamiayi. Tura penké jakan júsarmiayi. ¹⁰ Tura Papru akaatuki tsuntsumprua miniakkamiayi. Tura Yus-shuaran chicharainiak “Ashamkairap. Ataksha iwiaakui” tímiayi. ¹¹ Nuyá ataksha Papru wakamiayi. Tura tantan puukar yurumáwarmatai, tuke chichaa-chichaakua tsawantarmiayi Papru. ¹² Eutikiuncha iwiaakun ni jeen júkiarmiayi. Tura ashí aents shiir enentáimsarmiayi.

Miritiunam wearmiayi

¹³ Wats, Papru Asun péprunam nunkan we jeatajtsa wakerimiayi. Tura incha, átumka kanunam wétarum, turamkurin, iikia emkir wémaji Asunnum. ¹⁴ Nuñ Asunnum inkiunaikiar, Páprusha kanunam enkempramtaí, Mitiríniniam jeamji. ¹⁵ Tura nuyá jíinkir, kashin tsawarar Sámus péprunam jeamji. Tura nuyanka Trujiriunam jear ayampramji. Nuyasha kashin tsawarar Miritiunam jeamji. ¹⁶ Pápruka Jerusarénum wari wétajtsa wakerimiayi, pintikiustís naartin jístatin pachiiinkiataj tusa. Tuma asamtaí, Asia nunkanam ti núkap pujustinian nakitiak “Ipsiunam wéhattajai” tímiayi.

Papru Ipsiunmaya úntrin áusamiania nu

¹⁷ Túrasa Papru tuke Miritiunam pujus, Ipsiunmaya Yus-shuara úntrin winitiarum tusa untsukarmiayi. ¹⁸ Ni taarmatai Papru tímiayi “Atumsha wi Asia nunkanam pujusan itiura túraj nu nékarne. ¹⁹ Atumjai tuke tsawant pujumaj nuñ, nankaamantuchu enentáimtusar, úutchim winia Úntrun takatrin takasmiajai. Tura Israer-shuar yajauch awajustinian wakerutainiajn tuke takasmiajai. ²⁰ Ashí pénger ana nu nekaatarum tusan mijiatrutsuk jintintiamjarme. Iruntramarmena nuñ tura ankant ankant atumí jeen pujumarmena nujsa Yus-Chichaman ujakmajrume, tímiayi. ²¹ Tura Israer-shuarnasha Israer-shuarchancha nútiskanak, enentai yapajíarum Uunt Jesukrístu umirkatarum, tímiajrume. ²² Tura yamá Jerusarénum wéajai, Yusa Wakaní túrutkui. Nujsa túrunatana nunasha nekamatsuk wéajai. ²³ Tura Yusa Wakaní iniakturkui júna nékajai, ashí pepru wi jeattajna nuñ enketátaí tusar nákarainiawai. Tura ti wáitsatniun nekapsattajai. ²⁴ Kame wikia jákashatjash. Túrasa wari winia itiurtawa. Wikia Yusa jintiin warasan wekasataj tusan wakerajai. Yusaj wea-wéakuan jáakun iniaisataj tajai. Tura nuyá takatan Uunt Jesus surusmia nuna pénger amuktaj tusan wakerajai. Jes, Jesus chichartak “Yus wáitnenkartana nú chicham etserkata” turutchamka’ tímiayi.

²⁵ “Tura, yatsurtiram, ashí Yúsna atumin paant ujakjarme. Yamaikia wíniaka atakka wáitkiashtatrume. ²⁶⁻²⁷ Nekaatarum, ashí Yusa wakeramurín wisha penké úurtsuk ujakjarme. Tuma asamtaí atumin títiatjan wakerajrume, chikichik shuara wakaní jinium wéakuisha wikia penké makuumashtajai. ²⁸ Tuma asamtaí emka atumek ímiastarum. Túrarum nuyá chikich Yus-shuar ístarum. Yus-shuaran wáinin ajastarum tusa, Yusa Wakaní achirmakurme. Yus-shuar ainia núnaka ni numpejain Uunt Jesus sumakchakait. ²⁹ Kame

wi wématai, chíkich táartatui. Núnaka nékajai. Tura niisha, Yus-shuaran amukartajtsa wakeriartatui, uunt yawasha murikiun amuinia áintsan. ³⁰ Túrasha nemartusarat tusar wakeruiniak atumjiniñ wait chichaman unuikiartin wantinkiertatui. ³¹ Tuma asamtai yatsurtiram, aneartarum. Wisha menaintiú uwitin tsawajisha káshisha úutchim ankant ankant unuiniamajrumna nu kajinmatkiirap' tímiayi.

³² 'Pai, yamaikia, yatsuru, Yus yáinmakarti. Yusa anenkrattairj nékaitrumna nú chichamsha kakarmaiti. Nú chicham átum katsuagar kakaram wekasatniun yainmakarti. Kame nú chicham atumj enentáin pujakui, Yus ni shuarin matsamsatniun anajmatramia nuj pachiinkiatarme. ³³ Wats, wisha chíkichki shuara kuítrjñ warirjñcha wakerutkachuit-jai. ³⁴ Antsu winia uwejrújai takasan wi atsummiaj nuna sumarmakmajai. Tura winia írútkamuru atsumamurjñcha wiki sumakmiajai. Nuka paant nékarme. ³⁵ Kame átum takasrum, atsumainia nusha yáintarum tusan jintintiajrume. Wats, Uunt Jesusa chichame enentáinsami. "Achána nujainkia nankaamas, súana nuka shiir warawawai" tíchamka" tímiayi.

³⁶ Nuna tuasua amik Papru tikisharmiaiyi. Tura ashí niijjaj iruntrarmia nú shuar Yúsán áujarmiayi. ³⁷⁻³⁸ Tura Papru nuik chichaak "Atakka wáitkiashatrume" tiniu asamtai, ti kúntuts pujuiniak, úutchim Páprun miniaksarmiaiyi. Túrawar kanunam ejeniarmiayi.

21

Papru Jerusaréñnum wémiania nu

¹ Tura nuyá Yus-shuar aujsa ikiukir kanunam enkempramji. Tura ínkiuasmak Kus péprunam jeamji. Tura kashin tsawarar Rútas péprunam jeamji. Tura nuyanka Patara péprunam jeamji. ² Tura nuj Pataranam pujasar, chíkich kanu Pinisia péprunam wea wáinkiamji. Túkakuí nuj enkemprar wémaji. ³ Nuñ wésar Chipri nunkaka wáinkiamji. Chíprikia menanmanñ aa ikiuakur Sírianam jeamji. Kánuka Tiru péprunam jeá pujustiniuyi, káarak núkap ikiuktin akui. Tuma asamtai iisha Tírunam jear kanunmayá jínkir péprunam wayamji. ⁴ Nuñ Yus-shuar wáinkiar nuñ siati tsawant pujusmaji. Tura Yus-shuaran Yusa Wakanj újakam Páprun chicharainiak "Jerusaréñnumka wéchatniuitme" tiarmiayi. ⁵ Tura siati tsawant nankaamasmatai jínkimji. Ashí Yus-shuar ármia nu núwentuk uchirtiuik nemartamkamji, péprunam iniankatmaktiai tusar. Káanmatkanam jear tikishmarar Yus áujsamji. ⁶ Tura nu amikiar nuñkia áujnaisar ikiukiarmaji. Tura iikia kanunam enkemprakrin niñkia ni jeen waketiarmiayi.

⁷ Iisha Tírunmayá entsak wea-wéakuar Turumáitianam nuñ jíntramji. Tura nuñ jearsha Yusañ yachj ármia nu chichasar nuñ chíkichki tsawant pujusmaji. ⁸ Kashin tsawarar nuyá jínkir nunkanj weri Sesaria péprunam jeamji. Nuñ Jiripi jeen jear pujusmaji. Jiripikia Yus-Chichaman etserniuyayi. Nuik Jerusaréñnum siati áishmanñ Yusa takatrjñ wáinkiarat tusar anaikiarmia nú Jiripiiti. ⁹ Jiripisha kuaru nawantrjñ yarumkauyayi nuatnakchan. Niisha Yusa chichamen etserin ármiaiyi. ¹⁰ Tura iisha Jiripi jeen wárum tsawantak pujarin Jutía nunkanmayá aents Yusa etserniurj, Akapu náartin támiayi. ¹¹ Niisha taa Papru emenmamkarjñ achikmiayi. Tura achik niñki ni nawen tura uwejéncha jínkiamamiayi. Nuna tura tímiayi "Yusa Wakanj tawai, juna emenmamka nérenniurjñ Israer-aents jútikia jínkiáwar Israer-shuarchanum surukartatui, tawai" tímiayi. ¹² Iisha nu antukar Papru tímiayi "Jerusaréñnumka weep." Sesarianmayá Yus-shuarsha núnisán Páprun tiarmiayi. ¹³ Tutai Papru tímiayi "¿Urukamtai úutkuram winia enentáiruñ kúntuts awajtarum? tímiayi. Wi Jesusna asamtai Jerusaréñnum jínkiataniakuisha mántuiniakuisha ashamsajai" tímiayi. ¹⁴ Tura iisha Papru emetatai tukamar tujjinkiar "wats, nuñkia Uunt Yus wakera nu tímianak atí" tiarmaji.

¹⁵ Nu tiri iniaisar iwiarnarar Jerusaréñnum wémaji. ¹⁶ Chíprinmayá yaunchu Yus-shuar Manasun ni jeen Jerusaréñnum takakuya nuna ikiatmastinian wakerimiayi. Tuma asamtai Sesarianmayá ishichik Yus-shuar nemartamainiak Manasunnasha júkiarmiayi.

Papru Jakupu jeen irastajtsa wémiania nu

¹⁷ Tura iisha Jerusaréñnum jeawakrin, nuñ warasar Yus-shuar ti shiir áujtamsarmiaiyi. ¹⁸ Tura kashin tsawar Papru ímiak Jakupu jeen wémaji. Nuñsha Yus-shuara uuntrjñ matsarmiaiyi. ¹⁹ Páprusha áujas amik, Israer-shuarchanum ni étsermajai Yus túramia nuna yámankamtaikniumiá júki chíkichkimas ujakar ujakar awajsamiaiyi. ²⁰ Papru taman antukar "Yus ti péñkerchakait" tiarmiayi. Tura Páprun ju chichaman tiarmiayi "Támena nu péñkeraiti, yatsuru, túrasha Israer-shuar timiá untsurj Yus-shuar ajasu áiniayat, "ashí Muisais akupkamia nu umiktiniaitji" tuiniawai. ²¹ Nú arant yajayá aents taar, chichar-tamainiak "Pápruka nusháa jintintui, turamainiawai. Israer-shuar chíkich nunkanam pujuinia nuna Muisaisa akupkamurj umirkashtin Pápruka jintintui, turamainiawai. Israer-shuarti tsupirnaktin ana nu túrashinian tura ashí Israer-shuar túrutai iniaisatniun Papru

imia Israer-shuaran jintintui, turamainiawai.”²² Wátsek, yatsuru, nuñkia itiurmainkit. Ame tátintrumin aents nekaawarka juí kajertamainiak káutramkachartatuak.²³ Wats, antsu nuñkia, ju túrata yatsuru. Juí kuartru áishmañ Yúsan yaunchu tiarmia nuna umiktasa pujuiniawai.²⁴ Nii júkiarta. Túram niisha Muisais akupkamia nuna umikiar nijiaamainiakui, amesha nijiaamarta. Núnismek kuítniasha ni susatin ana nu amesha akikmatkarta. Niisha ashí umikiarmatai, ni intiashñ awampratin áchattawak. Nu áishmañka intiashñ awampran Israer-aents wáinkiar, anturtamkarainia nu, nekaschaiti, turamartatui. Antsu, Pápruka Muisais akupkamia tímianak túrawai, turamartatui.²⁵ Túrasha yatsuru, nekaata, Israer-shuarcha Yus-shuarka papí yaunchu akuptukmiaji. Israer-shuarti túratin ana nu ashí mash túratarum tátsuji, tu áatramji. Tura antsu namanken máawar ántar-yusan susamu yúashtiniaitrume, tímiaji. Tura numpasha umarchatniuitrume, kajemtikramusha yúashtiniaitrume. Tura tsanirmashtiniaitrume. Tu áatramji” tiarmiayi.

Páprun achikiarmiania nu

²⁶ Nuyá tiniu asamtai Papru nú kuartru áishmañkan júkiarmiayi. Tura kashin tsawarar nímiak nijiaamaramiayi, Muisais timia nútiksaran. Tura Yúsan tiarmia nuna wárik umiktinian tura Muisais timia nuna Yus súsatniun ujaktajtsa Papru Yusa Uunt Jeen wayamiayi.²⁷ Túrasha nu siati tsawant amusattuk ajatemsaj, Ásianmaya Israer-aents Paprun Yusa Uunt Jeen pujan wáinkiarimiayi. Túrawar charaatum ajakiar Páprun achikiarmiayi.²⁸ Achikiar untsumainiak “Israer-shuártiram in yáinmaktarum. Ashí nuñkanam Muisais akupkamuríncha Israer-shuarti túrtairíncha, ju Yusa Uunt Jeencha yajauch chicharea nu achikji, tiarmiayi. Warí, Kriaku áentsun awayáshtinia nuna awayá nujaj yamá ju Jeencha yajauch awajturmají” tiarmiayi.

²⁹ Jes, nuik Ipiasiunmaya Trúpimiu Páprujaj péprunam wekaan wáinkiaruyi. Wáinkiaru ásar, Yusa Uunt Jeen wayayi, tu enentáimsar tiarmiayi.³⁰ Tuiniakui aents ashí mash charaatum ajakiar tseke táarmiayi. Túrawar Páprun achikiar japirkutak Yusa Uunt Jeeya júkiarmiayi. Túrawar wáitíncha nú chichamaik epenrarmiayi.³¹ Tura maatai tusar matsamtuiniáj suntara kapitíántrj Jerusaréñnumiá aents ashí charaatum ajainian antukmiayi.³² Kapitíáncha ni suntarjn tura sarjentuncha irur tseke weriarmiayi aents pujuarmia nuj. Aencha suntaran tura kapitíánin wáinkiar, Páprun asutúniayat iniaisarmiayi.³³ Kapitíánka Páprun jeari achikmiayi. Tura jimiará jirujaj jínkiamiaji. Nuyasha aniasmiayi “¿Niisha yait? ¿Warinia túrait?” tímiaji.³⁴ Túrasha aencha untsurj chichaman untsummiarmiayi. Túmainiakui kapitíáncha penké nekaachmiayi. Tuma asamtai Páprunka suntar pujamunam júkiarmiayi.³⁵ Tura suntar pujamunam wáitiniam jeawar Páprun entsaki júkiarmiayi aents imiá kajerainia asamtai.³⁶ Tura aencha ukunmaan j pataakar, mantamnatí, tu untsummiarmiayi.

Papru chichastinian seamiania nu

³⁷ Tura Papru suntarnum awayám, Páprusha kapitíánin Kriaku chichamjaj chichaak “Wi ishichik chichasaintjame” tímiaji.

Tutai kapitíán chichaak “Warí, ¿amesha Kriaku chicham chichastin nékamek? tímiaji.³⁸ Nuñkia amesha ¿Ejiptunmaya shuárchakaitiam? ¿Nuik kuartru mir (4000) aents, mañkartin tutai atsamunam yaruakchamkam? ¿Kapitíánjaj meset najanataj tusa túrachmakum?” tímiaji.

³⁹ Tutai Papru tímiaji “Núchaitjai. Antsu wikia Israer áentsuitjai. Sirisia nuñkanam uunt pepru Tarsu náartin ana nuj akiiniaitjai. Tura waitneasam ju aents chichastin tsañkatrukta” tímiaji.

⁴⁰ Tura kapitíán, ayu, tutai, Papru watainiam wajas, mitiat pujustarum tusa uwején takuimiayi. Tura aents itiatkarmatai Israer-chichamjaj chichasmiayi.

22

Papru áentsun timia nu

¹ Papru chichaak juna tímiaji: “Yatsurtiram, tura úuntur árumna nu antuktarum. Wikia Pápruitjai. Kíshtumaktaj tusan útiatjana nu waitneasrum anturtuktarum” tímiaji.² Tura Papru Israer chichaman chichaakui, aents nuna antukar nú nankaamas itiatkarmiayi.³ Nu j Papru chichaak “Wikia Israer-shuaraitjai. Tarsu pepru Sirisia nuñkanam ana nuj akiini-aitjai. Túmaitiatnak ju j Jerusaréñnum tsakaruitjai. Tura unuikiartin Kamaríran chichamen unuimariuitjai. Tuma asan ii untrj akupkarmia nuna ashí umirkaitjai. Tura átum yamá túrarmena nuna wisha nútiksanan Yusna ana nuna tuke enentáijaj wakerukuitjai.⁴ Tura Jesusan umirkaru ármia nuna máataj tusan pataatukni wekaimiajai. Túran áishmañkan nuwáncha achikian sepunam enkeataj tusan túrimiajai.⁵ Israer-patri uuntrjsha Israer-shuara uuntrjsha Tamaskunam íi-shuar susatá tusar papin ataktusar akuptukarmia nuna

nin̄kia nékainiawai. Jesusan umirkarun achikia ikiaankan juj Jerusarénnun asutniáwarat tusan werimjai' tímiayi.

(*Túramurj 9.1-19; 26.12-18*)

⁶ Tura wi jintiá wéai Tamaskunam jeastatuk ajasaj nantu tutupin ai aya aneachma nayaimpinmaya newaat wajantruntmiayi. ⁷ Túrunamtai wisha nun̄ká iniaarmajai. Nuyanka chichaamun antukmajai. Chichartak “Sauru, Sauru, ¿urukamtia imiá pataatum?” turutmiái.

⁸ Takui wi aniasmajai “¿Amesha yáitiam, Uunta?”

Tutai “Wikia Nasarénumiá Jesusaitjai. Ame pataaturmena núitjai” turutmiái.

⁹ Wijiai pujuarmia nu, newaat wajantun wáinkiar ti ashankarmái. Túrasha nin̄kia túrutun antukcharmai. ¹⁰ Tura wi tímiajai “¿Nuin̄kia, Uunta, warí iturkattaj?” tímiajai.

Tutai Uunt chichartak “Wajakim Tamaskunam wetá. Nujsha ame túratamna nuna ujatmakartatui” turutmiái, tímiayi. ¹¹ Kame wikia nú newaat ajakun ísan jjuur kusurmai. Tuma asamtai winia tsaniakmar en̄keki jurukiar Tamaskunam ejetiarmái' tímiayi.

¹² Papru tuke aujmatki wéawai. Tura nuj Tamaskunam áishmaj Ananiás pujumai. Niisha Yúsán aneak, Muisais akupkamia nuna umirkaui. Tura nú pérunmaya Israer-shuar árma nu nin péñker enentáimtiarmiái. ¹³ Nú Ananiás winia írsataj tusa támai. Taa turutmai “Yatsuru Sauru, péñker iimtia.” Túrutkui nú chichamaik péñker íimtiájai. Túrunan Ananiásnasha wáinkiamjai. ¹⁴ Tura Ananiás chichaak “Iwiaaku Yus, winia wakeramurun nekartat tusa winia Uchirnasha, tunaarincha nuna, ísat tusa, winia chichamprunna antukat tusa ámin yaunchu Yus anaitiamkaiti. ¹⁵ Amesha Papru, Yusna ana nu ísumma nusha antukumna nusha ashí aents ujakartatme. ¹⁶ Tuma asamtai yamaisha ¿warí nákam? Tunaarun asakátrurat tusam Uunt Jesus enentáimtusam weme ni náari pachisam imiantia” turutmai.’

¹⁷ “Tura Jerusarénnun waketkin Yusa Uunt Jeen wémajai Yúsán áujsataj tusan. Nu j imiarmajai. ¹⁸ Nu j Jesus chichartak “Ju j Jerusarénnun Wii túramur etserkattamna nuna antukchartatui. Tuma asamtai warí jinkim wetá” turutmiái.’

¹⁹ “Túrutkui wi tímiajai “Túrasha Uunta, juyá aents wi Israer-shuara iruntai jeen wayan Ámin umirtankarmia nuna nuj matsatun achikian awatin sepunam en̄keawarmia nuna nékainiawai. ²⁰ Tura nuyá Áminiu etserniun Estepankan máiniakuisha wisha wajamjai. Túruniakui, “péñkeraiti” tímiajai. Nú arantcha ni pushir̄in írsamjai” tímiajai.’

²¹ “Túrasha Uunt Jesus winia turutmai “Wetá. Israer-shuarcha matsatainia nu j akupkat-jame” turutmai’ tímiayi Papru.

Suntara kapitíánrīn túrunamia nu

²² Nu j matsamarmia nu, núnaka antukarka untsumtan juáriarmiayi. “Juka mantamnatí. ¿Urukamtaik iwiaakusha pujusat?” tiarmiayi. ²³ Tura aentska Paprun kajerainiak, ti untsumainiak pushir̄in tujaat ajapawar nun̄kancha nan̄kimkiamaikia ajarmiayi. ²⁴ Tura kapitíán nuna wániak Páprun suntar pujamunam awayámiayi. Tura suntaran chicharuk “Átum asutiárum áimtikiatarum. ¿Urukamtaik aents nin kajerainiak imiá untsumainia? Nekaatarum” tímiayi. ²⁵ Tura Páprun asutiátaí tusar jin̄kiárar awajsam Pápruka kapitíánin chicharuk “¿Rúmanmaya aents áyatik asutiáimniakait, ni túramurj nekartsuk?” tímiayi.

²⁶ Nuna táman antuk kapitíáncha uunt kapitíánin ujaktaj tusa werí chichaak “Maaj, túrataj tamena nu anearta. Ju áishmaj Rúmanam pachitkaiti” tímiayi.

²⁷ Nuna antuk uunt kapitíán Páprun werí aniasmiai “¿Amesha nekasmek Rumanam pachitkaitiam?” tímiayi.

Tutai Papru “Ee” tímiayi.

²⁸ Tutai “Wikia ti kuítian akikmakmiájai Rúmanam pachiinkiatniun” uunt kapitíán tímiayi.

Tutai Papru tímiayi “Túrasha winia aparka Rúmanam pachitkia asamtai, wisha Rúmanam pachiinkian akiiniáitjai” tímiayi.

²⁹ Nuna takui Páprun asutiátaí tiarmia nuna wárik iniaisar jiniar wearmiayi. Tura imia uunt kapitíáncha Rúmanam pachitkian jin̄kiá asa ashankamiayi.

³⁰ Tuma asa kashin tsawar uunt kapitíán, urukamtaik Páprun imiá kajerainia, nekaataj tusa wakerak Paprun werí jin̄kiámun atirmiayi. Tura Israer-patr̄j uuntrīn ch̄k̄ich naamka armia nújajsha ikiaankamiayi. Tura nuin̄kia ni matsatmanum Páprun itiar ajapén awajsamiai.

23

Israer-aentsu Úuntrīn Papru timiania nu

¹ Papru Israer-patr̄j naamkar̄in úmamkes iis “Wíi shuartiram antuktarum. Úchichik tuke yamaisha Yus íimnianum péñker wekainuitjai” tímiayi.

² Papru nuna takui Israer-patri uuntri Ananías, ni suntarin Papruj ayamas pujuarmia nuna “Wenunam awatiarum” tímiayi.

³ Tutai Papru tímiayi “Tsej, jimiara chichamtinia ímiatá, Yus amincha asutiámattawai. Muisais akupeana nuna umiatsui tusam yajauch turutattsam pujame. Entá, ¿nuñkia urukamtia Muisais tímia nuka iniaisam ame suntarum winia asutiátarum tame?” tímiayi.

⁴ Tura nuna takui nu jujarmia nu Páprun tiarmiayi “¿Maaj, amesha Patri uuntri imiá yajauchisha chichaream?”

⁵ Tutai Papru tímiayi “Yatsuru, wisha Patri uuntri áutskaitia tíchamjai. Nékaitkiunka núnaka tíchaajai. Kame wisha nékajai, Yus-Chichamnum tawai “Atumí uuntri yajauch chicharkairap” tawai” tímiayi.

⁶⁻⁸ Israer-aentsu úuntriya jimíará írutka ármiai. Satuséu aents tura nuyá Pariséu aents nusháa írutkan Pápruka nekaamiayi. Kame Satuséu aentska, jakamunmayá nantaktincha Yusa suntarisha aentsu wakanísha tura iwianchcha atsawai, tiniu ármiai. Antsu Pariséu aentska, nuka ashí awai, tiniu ármiai. Nuna nekáa Papru kakantar chichaak “Wikia Pariséu áentsuitjai. Wíi shuarsha Pariséu ániawai. Wikia ashí shuar jakamunmayá ukunam nantaktin átatui tu jintiamun, nekaatai tusar itiararmiayi” tímiayi. Tura Papru nuna takui Pariséu aents tura Satuséu aencha nuámtak kajernaikiarmiayi. Túrunawar kánasarañ nusháa nusháa enentáimprarmiayi. ⁹ Nuiñkia ashí aents charaatum ajarmiayi. Tura Israer-shuara jintinniurj Pariséunam írutka armia nu wajakiar tiarmiayi “Ju áishman tunaan penké túrichuiti. Yusa suntarj chíkich wancha nin nekas chichaschamashi. ¿Ya neka?” tiarmiayi. ¹⁰ Ti charaatum ajainiakui suntera kapitíántri Páprun achiaarchartimpiash tusa sunteran untuk, “Jíktiarum, túrarum suntar pujamunam awayátarum” tímiayi. ¹¹ Nuyá kashi Papru Uuntri mesekra ípiatuk “Kakaram ajasta, Papru. Juí Jerusaráñnum winia ujakarumna núnismek Rúmanmasha ujaktatme” tímiayi.

Páprun máatniun wakeriarmiania nu

¹² Nuyá kashin tsawarmatai Israer-aents Páprun maatai tusar chichaman jurusarmiayi. “Papru máachkurkia yurumtsuk tura penké úmutsuk matsamsattaji. Máachrikia yajau-chiniam yumiñkramu atai” tiarmiayi. ¹³ Nuna tiarmia nuka kuarenta (40) nankaamas ármiai. ¹⁴ Tura Israer-patrí úuntriñ tura Israer-aentsu úuntriñcha weriar “Papru máachkurkia penké yurumtsuk pujustatji. Máachrikia yajauchiniam yumiñkramu atai” taji. ¹⁵ Tuma asamtaí ashí Israer-patrj naamkarjjiñ suntera kapitíántri seatarum, Papru tatí tusarum. “Kashin Papru itiatá, titiarum. Papru tana nu iisha nekas nekaatai tusar wakeraji” titiarum. Túrawakrumin iisha maatai tusar niñkia táatsajñ nákkatjaj” tiarmiayi.

¹⁶ Tura Papru awe nú chichaman antuk suntar pujamunam taa Páprun ujakmiayi. ¹⁷ Tuma asamtaí Pápruka suntera kapitíántriñ untuk “Ju uchi uunt kapitíánnum jukitia. Niisha chichaman takakui” tímiayi.

¹⁸ Kapitíáncha uchin uunt kapitíánnum ejé tímiayi “Papru enkeamu pujana nu winia untsurak “Ju uchi uunt kapitíánnum jukitia. Chichaman takakui” túrutui” tímiayi.

¹⁹ Uunt kapitíáncha nú uchin enkeki arantach jukí chicharuk “¿Warí turuttiaj tame?” tímiayi.

²⁰ Tutai uchi tímiayi “Israer-aents Páprun chichaman jurusarai. “Papru túramurj ti paant nekaatai tusar kashin Israer-shuara uuntriñ ejetarum” turamartatui. ²¹ Tura amesha nuna takui anturkaip. Kuarenta (40) nankaamas jintiá akirtua pujurainiawai. Tura “Papru máachkurkia yurumtsuk tura úmutsuk matsamsattaji” tuiniawai. Tuma asamtaí yamaisha ámin tití tusa nákarmaniawai” tímiayi uchi.

²² Tura uunt kapitíáncha uchin chicharuk “Ame túrutmena nu chíkich aents penké ujakaraip’ tímiayi. Nuna tí, uchin akupkamiayi.

Akupin Piriksaí ejetiarmiania nu

²³ Nuyanka uunt kapitíáncha chíkich kapitíánin jimíaran itíá chichaak “Urum, kashi ajapén ajastatuk aj, untsurj suntar ikiaankarta. Jimíará sián (200) aya náwek, setenta (70) kawainium eketka, nuyá chíkich jimíará sián (200) nánkijjiñ Sesaria nunkanam wétin iwiarata. ²⁴ Páprusha kawainium ekemkatin iwiarturta. Túrarum péñkerak ejetarum akupin Piriksaí” tímiayi. ²⁵ Tura niijjaj ju chichaman áatrar akuptukmiayi:

²⁶ “Ti péñker akupin Piriks, wikia Krautiu Rísias ju papin áatjame. ²⁷ Israer-aents ju áishman kan maatai tusar wakeruiniak achikiarmiayi. Tura niisha Rúmanmayá áentsuitkui wikia nuna nekaan suntarjaj werin jukimjai. ²⁸ Wikia ¿urukamtaik achikiaruut? tusan Israer-patri naamkarjñ jukimjai nin. ²⁹ Páprunka ii uuntri akup-kamurjñ umiatsui tusar nin kajeriarmiayi. Pápruka yajauch túrachu asa mantam-nachminiuyayi. Sepunmasha enkemachminiuyayi. ³⁰ Tura wisha Israer-aents nin máatniun chichaman jurusman nekaan amjñ akuptajme. Nuyasha nin kajerainia

nunasha tajai “Atumsha Píriksaj werum átum warinma kajerarum nu títiarum” tajai. Ayu. Júchiniak tájame.” Nuna tu áatar akuptukmiayi.

³¹ Tura suntarsha ni uunt kapitiántrj tímia nútiksaran Páprun kashi júkiarmiayi Antipatris péprunam. ³² Kashin tsawarar suntar aya náwek wearmia nuka waketrarmiayi. Tura kawainium eketrainiaka Páprujaj wearmiayi. ³³ Sesaria péprunam jeawar papin Píriksan súsarmiayi. Tura Pápruncha nuj ejeniarmiayi.

³⁴ Akupniusha papí aujsua amik Páprun aniasmiayi “Amesha, ¿tuí akiiniatiam?”

Tutai “Sirisia nunkanmayaitjai” tímiayi.

³⁵ Nuna takui akupin tímiayi “Wátskea kajertamainia nu taar turamainiakui anturkatjame” tímiayi. Tura nuyanka uunt akupin Erutisa jeen awayá apujsamiai, suntar ísarat tusa.

24

Papru Píriksaj áujmatsamiania nu

¹ Tura senku tsawant nankaamasaj Israer-patri uuntrj, ni naarj Ananías, Sesarianam támiayi. Tura Israer-aentsu uuntrj tura ti unuimiaru chichamtincha, ni naarj Térturu nujaj táarmiayi. Jü aents Páprun kajerainia ásar akupniunam wearmiayi. ² Nuñ Páprun itiarumatai Térturu chichatan juáirmiayi. “Uunt akupin Píriks, amesha yaimiu asakmin iisha shiir matsatainiayi. Tura imía neka asakmin ashí aents tímiatrusrik matsatainiayi. ³ Tuma asakmin iisha ashí matsatmanum tuke tsawant ti shiir yuminsamajme, uunta. ⁴ Tura amesha ti núkap chicham antuktin nakitiatspash. Tuma asamtai antsu ishichik waitneasam anturtukta, tímiayi. ⁵ Jü áishman Papru, sunkura utsukratniua núniniaiti. Niisha ashí nunkanam mesetan najanatniun Israer áentsun ikiakáiniaiti. Tura Jesusa aentsrj, Nasarénu tuinia nuna úntrjnti. ⁶ Nú arantcha Yusa Uunt Jeen yajauch awajsataj tusa pujuru wáinkiar achikmaji. Ii uuntrj tana nujaj métek asutiátai tusar wakerimji. ⁷ Túrarin nuyanka kapitián Rísias taa tapit achik jurutramkimiai. ⁸ Tura atumek akupin Píriksaj werum nuñ aujmatkatarum, turamaji, tímiayi. Tuma asamtai amesha Píriks, Papru aniasta. Nuñkia ii tájania nu nekasaiti, nu nekaattame” tímiayi Térturu.

⁹ Tura Israer-aents pujuarmia nu “Nekasaiti ashí ni tana nu” tiarmiayi.

¹⁰ Nuyá Píriks, uwejejaj, Papru chichasat tusa iniaktusmiayi. Túram Papru tímiayi “Amesha uunta, jü aentsu akupniurj ti untsurj uwitin pujusuitme. Tuma asamtai nuikia shiir enentáinsnum páchitsuk chichastatjai. ¹¹ Wats, wi túramur nekartuata. Yúsan áujsataj tusan Jerusaréngnum wi wémajna nu tuse (12) tsawant nankaamasaj. ¹² Nuñsha yajauch áujmatki weaj wáitkiacharmaj. Yusa Uunt Jeencha tura Israer-shuara aujtai jeencha tura pepu jintianmasha áentsnum charáa ajá wekaaj penké wáitkiacharmaj, tímiayi. ¹³ Jü aents jüi matsatainia nu winiaka penké turutchamnia ániawai. ¹⁴ Túrasha juna paant ujaajme. Jesus yamarman jintíana nuna umíajaj. Kame Israer-aentska wáitaiiti tuinia nuna wikia umíajaj. Túrasha nuna túran ii uuntrj Yusrj akupkamia nunak umiktasan pujajaj. Jes, ashí Muisais aar akupkamia nuna tura ashí Yúsnan yaunchu etserin aar akupkamia nunasha uminiatjai. ¹⁵ Tura jakaasha nantaktin átatui, tajai. Warí, péyker aents nútiksaj yajauch aencha nantakiartatui imia Israer-shuar tuiniatsuk. Tura wisha nútiksanak túrunatniuiti tajai. ¹⁶ Tura wisha tiniu asan, wikia winia enentáiruj Yus ímmianum makuumatsuk wekasataj tajai. Tura áentsnumsha nútiksanan penké makuumatsuk wekaajaj’ tímiayi.

¹⁷ “Tura, uunta, untsurj uwitin chíkich chíkich nunkanam wekaasuan amikian winia shuaruj támajaj. Kuítrinchan kuítian susataj tusan tura Yusa kuítríncha nin susataj tusan támajaj. ¹⁸ Túran wisha, Muisais jintinmia nútiksanan nijiamaran, Yusa Uunt Jeen pujumajaj. Untsurj aents charaatum ajainiasha atsumiayi. Nuñ wiki pujaj Ásianmaya Israer-aents wáitkiarmiayi. ¹⁹ Tura wi yajauch túraitkuñkia winia wáitkiarainia nu táchatniukait ámin ujatmaktasa. ²⁰ Túrachkuñkia jü pujuinia nu, Israer-patrj naamkarj matsatmanum wi pujumajna nuñ yajauch túramun nekainiakka turutiarti. ²¹ Kame, “jakamunmaya nantakminiaiti” tau asamtai makuurtiajtsarum pujarme” matsatmanum tímaj nujaj turutchartimpiash. Nú arantka yajauch túramun penké nekartuacharmaj” tímiayi Papru.

²² Tháran antuk Píriks, Kristu shuarj túramun paant nekáa, áanik iniaiasmiayi. “Antsu kapitián Rísias támatai nuñkia nu chichaman nekaatjai” tímiayi. ²³ Tura nuyá suntara kapitiántrjn chichaak “Jü Pápruka tuke emetnatí. Tura ishichkíkia ankant apujsatarum. Tura nuyá ni amikrj taa yáintaj takui suritkiairap” tímiayi.

²⁴ Tura nuyá chíkich tsawantaj ataksha Píriks ni nuwejejaj Tursirajaj támajaj. Núwenka Israer-shuarauyayi. Pírikska “Papru itiatarum’ tímiayi. Papru Jesukristunum étserkui antimiayi. ²⁵ Tura Pápruka yajauchiniam wekasashtincha naka wekasatniuncha, tura ukunam Yus tunáa áentsnaka asutiátniuiti takui Pírikska ashamak tímiayi “Antsu yamaikia máakete. Tura ataksha wi ankant pujakun untsukmijiam” tímiayi. ²⁶ Tura, ankant ajastaj tusa

Papru kuítan akirkashtimpiash, tu enentáimias, Píríks tuke untsúu wémiayi, chichastai tusa. ²⁷ Tura nuyánka jimiara úwí nankaasmatai Píríks akupin náamkamú ajapnamiayi. Tura chúkích aents, ni naari Pursiu Jistu akupin náamkamiayi. Tura Píríkska, Israer-aents péñker enentáimtursarat tusa wakerak, Páprun sepunam tuke ikiukmiayi.

25

Papru Jístujai áujmatsamiania nu

¹ Jístusha akupkatin takatan nankaamataj tusa Sesaria péprunam támiayi. Tura menaintiú tsawant nankaasmatai nuyá we Jerusaréñnum jeamiayi. ² Nujsha Israer-patri uuntri tura Israer-aentsu penkerisha Páprun tsanumprurtai tusar Jístun weriarmiayi. ³ Tura tiarmiayi “Waitneasam Páprusha Jerusaréñnum akupkata” tiarmiayi. Jintiá maatai tusar wakeruiniak nuna tiarmiayi.

⁴ Tutai Jistu tímiayi “Atsá. Páprusha Sesaria péprunam sepunam enkeamu pujawai. Tura wikia nuj wárik waketkittijai” tímiayi. ⁵ Nuyá nin tímiayi “Atumsha penkeri árumna nu, wíjjaj Sesarianam wétiniaitrumé. Tura nú áishmanka tunaari ákuinikia nujsa titiniaitrumé” tímiayi.

⁶ Jístuka Jerusaréñnum ishichik tsawant pujusmiayi. Kame uchu tsawant tura tias tsawantcha pujuschiawash. Nuyá ataksha Sesarianam waketkimiayi. Tura nuj jeá kashin tsawar, akupin pujutainium pujus “Papru itiatarum” tímiayi. ⁷ Tura Papru wayamtai, Israer-aents Jerusaréñnumiá taarmia nu káunkarmiayi. Túrawar ti nukap chichainiak “Tunáa túraití Pápruka” tu tiarmiayi. Túrasha penké uyumantikiacharmiayi.

⁸ Pápruka chichamprumak tímiayi “Wisha tunaan penké túrachuitjai. Israera uuntri áarmarincha umirkaruítjai. Tura Yusa Uunt Jeencha yajauch awajsachuitjai. Tura uunt kapiitiániasha yajauch penké chicharkachuitjai” tímiayi.

⁹ Jístuka Israer-aents péñker enentáimtursarat tusa wakerak, Páprun tímiayi “Wakerak-minikia Jerusaréñnum wemí. Wisha nuj ame túramurmin nekaatjai” tímiayi.

¹⁰ Tutai Papru tímiayi “Amesha paant nékame, Israer-áentsnum tunaan penké túrachjai. Tuma asamtai Rúmanmaya uunt akupniun wisha winia túramurun ujaktiniaitjai, nekartuati tusan. ¹¹ Wisha jakamnia tímianu tunáa túranka, jákatniuncha ashamsatsjai. Tura antsu turutainia nu nekaschaitkiuinikia wíniaka Israer-shuarnum surunkachminiaitjai tajai. Tuma asamtai seajme, wí túramun uunt akupin Sésar nekartuati” tímiayi.

¹² Tutai, nuyá ni irutramuríjjaj chichasua amik, Jistu Páprun tímiayi “Uunt akupniuj wétaj tusam seame. Tuma asamtai nuj wétatme” tímiayi.

Papru uunt akupniujai áujmatsamiania nu

¹³ Tura ishichik tsawant nankaasmatai akupin Akripia ni nuwejai Pirinisejai Jístun áujsatat tusa Sesarianam wearmiayi. ¹⁴ Tura untsurj tsawant pujusarmiayi. Tura nuj pujuiniáj Jístuka Papru túrunamun akupniun ujaak tímiayi “Juí áishman pujawai. Píríks nin achik enkea ikiukmiayi, tímiayi. ¹⁵ Kame wikia Jerusaréñnum pujaj Israer-patri uuntri tura Israer-aentsu úuntrisha, Papru yajauchin túraití tusar káutrukarmiayi, tímiayi. Mantamnati tusam akupkata, tu seattiarimiayi. ¹⁶ Takui wi tímiajai “Iisha Rúmanmaya áentstikia chícham nékatsuk, mantamnati tusar akupeatsji. Tsanumpruina nu, emka táartin áiniawai. Tura nuyá chichamprumatsajin mantamnati tusar akupeatsji iisha” tímiajai. ¹⁷ Tinu asan, táarmatai, wikia nákatsuk kashin tsawaran akupin pujutainium pujusan, Papru itiatarum tusam akupkamjai. ¹⁸ Tura Páprun tsanumprurtai tusar taar chichainiaksha, wi enentáimmiáj núnaka tícharmiayi. ¹⁹ Antsu áyatik Yus umirkar túmatairin Papru nuna túrachai, tiarmiayi. Tura nuyasha áishman Jesus naartin nantaki iwiakui tawai Pápruka, tiarmiayi. Nunak tiarmiayi. ²⁰ Tura wikia nú chichaman túratniun nékachú asan, Páprun aniasmajai “¿Amesha Jerusaréñnum wétaj tusam wakeramek? Nu j nu chichaman nekartawarti” tímiajai. ²¹ Túrasha “Atsá. Juín pujustajai. Rúmanmaya uunt akupin Akustu Sésar nekartuati” tímiayi Papru. Takui, “nuinikia tuke sepunam pujustá. Tura wi ukunam uunt akupniun akuptuktatjame” tímiajai” tímiayi Jistu.

²² Nuyá Akripia chichaak “Wisha itursanak nu áishman chichaamun anturkaj” tímiayi. Tutai Jistu tímiayi “Amesha kashinka anturkattame”. ²³ Tura kashin tsawar Akripia Pirinisejai taar, iwíaa-iwiarmamu ajas wayawarmiayi. Suntara úntríjjaj tura nú péprunmaya úntríjjaj wayawarmiayi. Tura nuj Jistu, “Papru itiatarum” tímiayi. ²⁴ Tura Papru támatai Jistu tímiayi “Uunt Akripia, tura ashí áentstiram matsatrumna nu, pai, ju áishman íistarum. Ti untsurj Israer-aents Jerusaréñnumsha tura juí Sesarianamsha ju áishmankan Páprun kajarainiak yajauch chichartuiniawai. Tura tuke iniaitsuk, mantamnatiuiti, turutainiawai. ²⁵ Túrasha wíjjajinikia tunáa jakamnianka túrachuiti. Kame niisha “uunt akupin Akustu Sésar nekartuati” takui, wisha nin akupkataj tusan wakerajai. ²⁶ Tura wariniak uunt akupniun áatratat nuna nékachú asan, Páprun atumin itiarjarme. Tura nekaska, Akripia, ame iniaista

tusan itiarjame. Túrawakmin wi wariniak áartaj nuna nekaatjai. ²⁷ Warí wisha, ni yajauch túramurjñ áattsuk, uunt akupniunam akupkashiniatjai” tímiayi.

26

Papru Akripiaj chichamprumakmiania nu

¹ Jistu nuna tutai Akripia Páprun tímiayi “Wats, amesha tu timi chichamprumakta” tímiayi. Tutai Papru uweje takuí chichatan juarmiayi. ²⁻³ Chichaak tímiayi “Uunt Akripia, ii Israer-shuarti túrutai ainia nu amesha nékame. Tura ashí ii chicharnaiyajnia nusha nékame. Tuma asamtai yamá wisha ámin chichamprumaktaj tau asan shiir enentáimjai. Israer-aents turutainia nuna mash ujaktatjame. Waitneasam péñker anturtukta’ tímiayi.

Papru ni yaunchu túrutairjñ ujakmiania nu

⁴ “Wi úchichik winia nunkaruj tura Jerusaréñnumsha pujusan wi túramajna nuna ashí wí aents Israer ainia nu nékainiawai. ⁵ Pariséu ajasan, ni akupeamurjñ itirchat ajñ ashí takamtsuk tuke umirniuitjai. Nunasha nékainiawai tura wakeruiniakka etserkamnia aintui. ⁶ Túrasha wikia, jakamunmayá nantaktin átatai, tiniu asamtai wíniaka emetruawar itiararmiayi. Túrasha núnaka Yúska ii únurjñ yaunchu tímiayi. Yus tímia nuna túrunattawai wisha tiniu asamtai itiararmiayi, tímiayi. ⁷ Tura ashí mash Israer-shuarti, tuse (12) aents matsatka ájiniya nu, ju nantaktin chichaman Yus tímia nuna túrunati tusar nákainiaji. Tuma asar Yus áujkur’, tsawajsha káshisha nú enentáimtuinaiji. Tura wisha nú chichamnak enentáimta asamtai wíniaka jakertuiniawai, uunt Akripia. ⁸ Warí, atumsha “Yus jakancha iniantkimniaiti” tátsurmek’ tímiayi.

⁹ “Tura wisha yáunchuka Nasaréñnumia Jesusan umirkaruka kajerkatniuiti, tu enentáimniuyajai. ¹⁰ Tura Jerusaréñnum Yus-shuar ármia nuna kajerkarmiajai. Israer-patri unurjñ chichamejaj utsurj áentsun Jesusan umirkarmia nuna sepunam enkeamijajai. Tura nú shuaran máiniakuisha wikia péñkeraiti tu wémiajai. ¹¹ Tura Israer-shuara iruntai jeen wayan ti asutiármiajai, Jesusan umirkatniun iniaisarar tusan. Tura imiá kajerkaran chikich nunkanmasha pataatu wearmiajai achiktaj tusan’ tímiayi.

Tamasku jintianam túrunamun ujakmiania nu

(Túramurj 9.1-19; 22.6-16)

¹² “Tura Israer-patri unurjñ tsanekatrukmatatai, papin ni surusarmia nujaj, Tamasku péprunam wétaj tusan jínkimiajai. ¹³ Tura, uunta, nantu tutupin aj, jintiá wéaj newaat ajaki ti tsápin, tsawái nantujaj nankaamas etsantrutramiayi. Tura wijaj wearmia nunasha núnisanarjñ etsantrurarmiayi. ¹⁴ Tura túrunamta ashí nunka tepetar wáinkirmiajai. Wiki Israer-chichamjaj túrutun antukmajai “Sauru, Sauru, zúrukamta imiá pataaturam? Amek enentáimin yajauch awajmamsame, wáaka sankanmiak numin ijiuma núnismek. Wí aents kajera asam túruname” turutmai.’

¹⁵ “Túrutkui wisha “¿Amesha yáitiam, Uunta?” tímiayi.

Tutai Uunt turutmai “Wisha Jesusaitjai, ame pataatamna núitjai. ¹⁶ Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkattame. Tura ukunam wantintiuktatjame. Wáinkiatamna nusha etserkamniun, turutmai. ¹⁷ Tura nuyasha turutmai, Wats yamaisha Israer-shuaranum akupkatjame. Tura Israer-shuar kajertamainiakuisha, tura chikich aents kajertamainiakuisha ayampruktatjame, turutmai. ¹⁸ Péñker jintintiata tusan akupeajme. Kame aencha kiritniumia jínkiar tsáapniunim wekasarat tusan, tura iwianchín umirtsuk Yúsan umirkarat tusan akupeajme. Tura Winia enentáimtursarmatai Wisha ni tunaarjñ tsankurattajai. Nuna túran Yusna ajasaru áiniiana nujaj apujstajjai.” Nuna Jesus turutmai’ tímiayi.

Papru mesekrampra umikman ujakmiania nu

¹⁹ “Tuma asamtai, uunt Akripia, Uunt Jesus nayaimpinmayá wantintiuurak turutmia nuna umirkataj tusan pujajai. ²⁰ Enentai yapajjáwar Yus-shuar ajastinian, emka Tamaskunam pujuarmia nuna ujakarmiajai. Tura nuyasha Jerusaréñnumian, Jutiá nunkanmayancha tura nútiksanak Israer-shuarancha nuna ujakarmiajai. Tura ujainiakun “Yus-shuar ajasmarum paant ajasat tusarum, péñker túratarum” tímiyajai ashí shuaran. ²¹ Tura wi Yusa Uunt Jeen pujaj, Israer-shuar achirkar emetruawar mántuatai tukamá tu-jintrukarmiayi, Yus winia yaintiu asamtai. ²² Yus winia yaintiu asamtai, iniaitsuk tuke Yus-Chichaman ujainiajai. Uunt ainia nunasha, tura péjchach ainia nunasha ujainiajai. Tura Muisaissha, Yúsna etserniusha tiarmia nunak étserajai. Nú arantka tátsujai. ²³ Kristuka wáitsatniuyayi, tura jakasha émak nantaktiniuyayi, ii unurjñ tiniu ármiajai. Tura Kristuka nantaki Yusa chichamen í áentsun tura Israer-shuarancha nútiksajñ ujaktiniuyayi. Nuna tu tiarmiajai. Tura núnaka wisha tu ujainiajai” tímiayi Papru.

Papru Akripian Yus-shuar awajsatat tusa wakerimiania nu

²⁴ Tura nuna takui Jistu kakantar tímiayi “Maaj, Papru, wáurme. Imiá unuimiatu asam wáurkame” tímiayi.

²⁵ Tutai Papru tímiayi “Atsá uunt Jistu, wáurtsujai. Antsu wi tájana nuka ti nekasaiti. ²⁶ Wi tájana nuna, uunt Akripia juí pujana nuka nékawai. Tuma asamtai arantutsuk nin chichareajai. Kame ju túrunamu ti paant asamtai niisha nékawai, tajai” tímiayi.

²⁷ Nuyá Akripian chícharuk “Yaunchu Yúsnan etserin áarmari, nekasapitia tátsumek, uunt Akripia. Wikia nékajme. Nekasaiti, tame” tímiayi.

²⁸ Takui Akripia chichaak “Maaj, ishichik awajtame Papru, Yus-shuar ajastin” tímiayi.

²⁹ Tutai Papru tímiayi “Tura ishichik chichamjajsha untsurí chichamjajsha, amesha uunt Akripia, tura ashí winia anturturkmena nu, wíjjaj métek ajasúk tusan wakerajai. Tura antsu wia núnisan jinkiámua núnaka wakeratsjai” tímiayi.

³⁰ Papru nuna tuasua amikmatai akupniusha, uunt kapitíancha, Pirinísesha, tura nuí ashí pujuarmia nu wajakiarmiayi. ³¹ Tura arant wear, túrunamun chichasarmiayi. Tura tiarmiayi “Ju áishman mantamnamnian tunaamkachuiti tura penksha sepunmasha enkeachminiaiti” tiarmiayi.

³² Tura Akripia Jistun tímiayi “Ju áishman “uunt akupin nekarati” tíchaitkuñkia akupmai makuiti” tímiayi.

27

Páprun Rúmanam akupkarmiania nu

¹ Tura Páprun Ruma péprunam akupkatniun enentáimsarmiayi. Rúmaka tímiai, Itiaria nunkanam pujawai. Wisha Páprujai wémiajai. Pápruncha tura chíkichnasha achikma ármia nunasha Akustunu tutai suntara kapitíántríjjai nenakar akupkarmiayi. Nú kapitíani naari Júriiiti. ² Tura Atramitiunmaya kanu Asia nunkanam pepuru ármia nuí wétasa pujumia nu enkemprarmiayi. Tura Tisarúnikianmaya áishman, ni naari Aristárku, in páchitkiauyayi. Tisarúnikiasha Masetúnia nunkanmaiti. ³ Nuí enkemprar kashin tsawarar Sitiun péprunam jeamiaji. Nuí jeawakrin kapitían Júriu, Páprun waitnentak tímiayi “Ame amikumíin wetá. Au firmasarti” tímiayi. ⁴ Tura Sitiunumia jínkir, kanujai wesar nase tukumpramprakin Chipri núnkaka menanmaani aa ikiukmiaji. ⁵ Tura nayaantsanam wesar Sirisia tura Pampiria nunkanam ayamchik nankamakir Mira péprunam jeamiaji. Nuka Risia nunkanmaiti. ⁶ Nuí jear nú kanu ikiukmiaji tura chíkich kanu Arijiántrianmaya taa Itiaria nunkanam wétasa pujumiayi. Nú kanunam suntara kapitíántri, enkempratarum, turammiaji. ⁷ Tura untsurí tsawant yáitmataik we-wémiaji tura ti wiántkar Nítiunam jeastatuk ajasmiaji. Tura nuísha nase tuke tukumkarta asamtai Sarmun nunkanam ayamchik nankaamakir, Kritia nunkanam áawinini ayamchik wémiaji. ⁸ Tura Kritia nunkanam ayamchik wesar itiuurchat akú wáitsar wea-wéakuar “Shiir Pujutai” tutainium jeamiaji. Nusha Rasea péprunam tíjiuchiiti. ⁹ Yáitmataik wea asar ti táasmaji. Tura yumi yututai jeatema asa ti tsúumainiuyayi nayaantsanam wétin. ¹⁰ Tura Papru chícharuk “Amikru antuktatum. Wi nékajai, yamaí wéakria ti tsúumainti. Kanusha tura káarak kanunam enketainia nusha menkarattawai. Tura iisha núnisrik kajinchatjash” tímiayi. ¹¹ Suntara kapitíántrínkia Páprunka anturtsuk, kanú wianniurín kapitíántríncha tura kanú kapitíántríncha chichamen anturkarmiayi. ¹² Tura nuí Shiir Pujutai tutainium yumitin pujustin pénkerchaitkui “Nuñkia juyanka wéartai. Pinise péprunam jeamainchuashit” ashí tiarmiayi. Nú péprusha Kritia nunkanam nayaants ayamach pujawai. Nú péprunam yumitin pujustinian wakeriarmiayi, arakia nunkaani kakaram nase nú péprunam jeachu asamtai.

Tsúumainium wekasarmiania nu

¹³ Tuma asamtai ukunam nase nunkaaniá tápiriri ajakui, ii wétin yamaikia pénkeraiti, tu enentáimsarmiayi. Túmakui kanu emetai jiru júusar jínkir Kritisian ayamchik wearmiaji. ¹⁴ Túrasha árusaaj arakia kakaram nase, Nuristi tuinia nu tukumpramiayi. ¹⁵ Nase kanun tukumpra asamtai iisha atsantratin penké tujinkiamiaji. Túmakui, áankisha juramkitiai tusar iniaisamiaji. ¹⁶ Tura Kritia nunkanam áawinini nankaamakur nuñkia nase ishichik mijiantmatai, uchich kanu japikir wémiaj nu ti takasar uunt kanunam enkermiaji. ¹⁷ Tura enkerar chapikjai uunt kanun jinjiárarmiayi wewe najanatai tusar. Tura náikim mukutni-unam, Serti tutainium nase juramkishtajash tusar, kanunam yakí tarach aan itiararmiayi. Nu tarach nase útsuktin tusar nenarma ármiaji. Túrawar áyatik nase juramkitiai, tiarmiayi. ¹⁸ Tura kashin tsawarmatai nasesha chíchimisha tímiatrusan kakaram aa asamtai kanunmayan káarak irunmia nuna nayaantsanam ajapawarmiayi. ¹⁹ Menaintiú tsawant nankaasmatai iisha ii uwejjajin kanunam káarak iruniarmia nusha entsá utsankarmiayi. ²⁰ Tura untsurí tsawant tsawajsha etsantrachmiayi tura káshisha yaasha tsaparcharmiaji. Tura nasesha ti kakantar tukumpramkurin “Yamaikia uwempratin atsawai” tiarmiayi. ²¹ Tura iisha ti untsurí tsawant yuruntsuk matsatu asakrin, Papru ajapén wajaki tímiayi.

“Amikru winia nuik Krítianmayaan̄ka jíintsuk anturtukuikturmiñkia yamáí ju itiurchatnum pujuatsuk tura emenkatmatsuk pujuajaí” tímiayi.

²²⁻²⁴ ‘Yamáí kashi winia Yusrú suntarí nayaimpinmaya wantinturkayi. Nú Yúsan umirkaitjiana nu akupturkayi. Tura nu taruti “Ashamkaipia Papru, turutui. Ame-sha Ruma péprunam uunt akupniunam jeattame. Tura chikichnasha ámiijai kanunam enketainia ásmatai uwempratniun Yus tsañkatkarai” turutui. Tuma asamtai, amikru, shiir enentáimsatarum. Atumsha mash uwemprattarme. Túrasha kánuka mesertatui. ²⁵ Wisha winia Yúsrún nekas enentáimtajai. Yusa suntarí turutainia nuna nekas tu túrunattawai, tajai. Tuma asamtai kakartarum. ²⁶ Tura chíchimisha nuñka uchich pújakmanum nuí patatmittiaí” tímiayi.

²⁷ Ayu, katurse (14) tsawant nan̄kaasmatai nú kashi Atria nayaantsanam jeamiayi. Nuí nase náñkamas juram wémiaí. Nuyañka kashi ajapén wiantin armia nu nuñka ámunam jeateman nekaawarmiayi. ²⁸ Tura urutná kúnakit tusa nekapmamiayi. Túram tráinta sais (36) míruuyayi. Nuyasha ékemas̄n ataksha nekapmamiayi. Nuiñkia painti siati (27) míru nekapmamiayi. Tuma asa nuñká anumsatuk ajasun nekaawarmiayi. ²⁹ Tura kayanam ijiukaj tusar ashamainiak kuaru jirun kijinian chapikaj kanú senkarin jin̄kiáwar entsá ajun̄karmiayi. Kijin asamtai, inít tepeámtai nase juramkichmi tusar túrawarmiayi. Tura wake mesekar; tsawarti tusar matsamarmiayi.

³⁰ Tura matsatainai wiantin armia nu, iikia uchich kanunam enkemprar pisarchatjias̄h tu enentáimsarmiayi. Túmainiak kanú nujinia chíkich jirun ajuntai tawa nútiksarañ uchich kanun ajuntai tusar pujuarmiayi. ³¹ Tura tuma wáiniak Papru suntara kapitántrín tura ní suntaríncha ujakmiayi. “Ausha uunt kanunman enketainiachkuñkia atumsha uwemprashtatrumé” tímiayi. ³² Tutai suntarsha uchich kanú chapikrín tsupirkar entsá ajun̄karmiayi.

³³ Tura kashin káshik Papru ikiakártasa wakerak tímiayi “Ishichkisha yurumátarum. Atumsha katurse (14) tsawant kánutsuk yurumtsuk pujarme. ³⁴ Seajrume, ishichkisha yurumárú kakaram ajastarum, uwemprataj tusarum. Iimiata, nekaatarum, imiatkisha túmatsuk péemkattarme” tímiayi.

³⁵ Nuna tuasua amik Papru apatkun achik Yúsan yumínsamiayi ashí ímmianuman̄. Tura puuk yuamiayi. ³⁶ Tura apatkun yuan wáinkiar, ashí aents shiir enentáimsar yurumáwarmiayi. ³⁷ Nusha ashí aents irurmaka jimiará siáñ nuyá ataksha setenta sais (276) ármiai. ³⁸ Yurumáwar ejemakar, yurumkanka entsá utsañkarmiayi, uunt kanu wampú ajasat tusar.

Kanu penké mesermiania nu

³⁹ Tura tsawarmatai wiantin armia nu, nuñkan nekaacharmiayi. Túrasha épkentamunam káanmataak aan wáinkiar “Aj kanu anuntai” tiarmiayi. ⁴⁰ Nuyá jiru entsá ajun̄man chapikrín tsupirkar entsá ikiukiarmiayi. Tura kanait jin̄kiárma ármia nuna chapikrín tsupirkarmiayi. Tura tarach kanú nujijn amia nuna nenakarmiayi. Túram kanu káanmatkanam anumsatuk ajasmiai. ⁴¹ Tura wainchi jímiar ámunam jeá kanu entsá wayá tepeamiayi. Tura kanú senkarínkia chíchimi yakí takuúir ajámu asa kupinrarmiayi. ⁴² Suntarsha, achik júamu armia nú shuaran máataj tusa wakeriarmiayi, yukuak pisararain̄ tusar. ⁴³ Tura kapitáncha Páprun uwemtikrataj tau asa nuna túratniun tsañkatkachmiayi. Antsu chíchaak “Emka yukuaktin nékarmena nu yukuakrum péemkatarum, tímiayi. ⁴⁴ Nuyá chíkichkia kanunmaya nui, kame náñkamas numi achikrum awamkarum péemkatarum” tímiayi. Tu túrawar ashí iwiaakuk jínintrarmiayi.

28

Marta nuñkanam túrunamia nu

¹ Tura ashí iwiaakuk jínintr, nu nuñka Marta naartin nekaamiayi. ² Tura nuí matsamin armia nu, shiir awajtamsarmiayi. Tuma asamtai iisha tsetsema asakrin, tura yumisha yútakuí, uunt jinia ikiapármiai. Tura “anamaitiarum” turammaji. ³ Pápruka jinia kukarun ikiaan̄ak jinium pataamiayi. Túmawaj napí tsuéran ashamak jínki, Papru uwején nemaramiayi. ⁴ Tura nú nuñkanmaya aents, Papru uwején napí nemaran wáinkiar “Ju áishman̄sha shuáran majchuashit, tiarmiayi. Nayaantsanmaya uwempraitatan̄ ní yusrí iwiaaku átinian suritiawai” tiarmiayi. ⁵ Páprusha ní uwején pear napin jinium awañmiayi. Tura penkesha yajauch ajaschamiayi. ⁶ Tura niisha éarchatpiash tusar ii pujuarmiayi. “Túmatskesha jaka inánchatpiash” tiarmiayi. Túrasha tí núkap pujussha penké najaweachmiayi. Túrunamtai, nuñkia nusháa enentáimprar “Pápruka yúschashit” tiarmiayi.

⁷ Nú nuñkanam aentsu penkerí ámiayi ní naarj Pupriu. Nú Pupriu ní jeén in itiaarmiami-aji. Tura menaintiú tsawant yurumkancha suramsarmiayi. ⁸ Tura nuí pujarin Pupriu

aparí tsuer, numpajá ijiarki jáamiayi. Túmakui Papru werí iyumiayi. Tura Yúsan áujtus amik uwején nin awantkamiayi. Túram péñker ajasmiayi. ⁹ Nu túramun nekaawar, nú nunñkanmaya aents jaa armia nu tariar, niisha péñker ajasarmiayi. ¹⁰ Túram incha ti shiir enentáimturmasar núkap ajampramsamiayi. Túram ukunam ii wétin jeamtai ashí ii atsumamun suramsarmiayi.

Rúmanam jeawarmiania nu

¹¹ Ii wétsuk nú nunñkanam menaintiú nantu pujusmiayi. Tura nuyá chíkich kanunam enkempramiayi. Nu kanusha Arijiántrianmaya yaunchu tau menaintiú nantu yumi yútakui nuí pujumiayi. Nú kanu nujiin numi-yus najankamu jímiar ekemiarmiayi, ni náariníka Kástur tura Púruks, ¹² Iisha nuí enkemprar werí Serakúsa péprunam jeamiayi. Nuí menaintiú tsawant pujusarmiayi. ¹³ Tura jíinkir nuyanka nayaantsa ayamach werí Rijii péprunam jeamiayi. Nuí kanarmiayi. Tura kashin anariá nase suut umpuuntí támiayi. Tuma asamtaí nú kashinkia Putiuri péprunam jeamiayi. ¹⁴ Nuí jeawakrin Yus-shuar pujuarmia nu, ni jeén juramkimiayi. Tuma asamtaí nuíñ chíkichkí tumiñ pujusmiayi. Tura nuyanka nunñkan Rúmanmaani wémiayi. ¹⁵ Tura Rúmanmaya Yus-shuar, ii jeatniurín neka ásar jintiá inkiunmaktaí tusar winiarmiayi. Chíkichkia Apiu pepu támanum táarmiayi, tura chíkichkia, Menaintiú Jeá tutainium táarmiayi. Nuna káunkan wáiniak Papru shiir enentáimias Yúsan yumínsamiayi.

¹⁶ Tura ii Rúmanam jeawakrin kapitián Juriu achikia yarumman Rúmanmaya uunt kapitiánin ejetimiayi. Túrasha, Pápruka jeá ikiamas niisháa pujustí, tiarmiayi. Tura Páprun ísat tusa chíkichkí suntarnak ni jeén apujtusarmiayi.

Rúmanam Papru Yus-Chichaman etserkamiania nu

¹⁷ Nuyá menaintiú tsawant nankaamasmatai Pápruka Rúmanmaya Israer-aentsu penkerín unsuk ikiaanak “Yatsurtiram antuktarum. Wisha Israer-áentsun yajauchin penké túrachmiajai. Tura ii untrí akupkarmia nunasha yajutach chícharkachmiajai. Tuma aiñ Jerusarégnun winia achirkar Rúmanmaya áentsnum sarutkarmiayi. ¹⁸ Tura nu aencha winia anintsar, akupkatai, turutiarmiayi, wisha penké yajauchin, mantamnamnia tímianu túrachu asamtaí. ¹⁹ Túrasha Israer-shuarka “Atsá, akupkairap” turutiarmiayi. Nu tuma asamtaí, “antsu uunt akupin nekarati” tímijai. Wikia wíi shuara tunaarín kapitiánin ujaktinian táchaitjai. ²⁰ Tuma asamtaí, yatsurtirmin, atumin untsukjarme chíchastaj tusan. Yusa anaikiamurí, Israer-shuarti náakajnia nu táwiti wi tu étserkui, juí achikiar jiníkiámu pujajai” tímiai Papru.

²¹ Tutai niisha tiarmiayi “Iisha Jutiá nunñkanmaya aentsti, ame yajauch túramu papí penké wáinkichuitji. Tura ii shuar nuyá táarainia nusha “au yajauch túrati” tu ujatmakchar-maji. ²² Túrasha ashí nunñkanam yamaram chíchaman jintinian yajauch chícharainiawai tama antukji. Tuma asamtaí amesha nu warintia enentáimtam nekaatai tusar wakeraji” tiarmiayi.

²³ Nú tsawantaj iruntrami tiarmia nú tsawant jeamtaí, ti untsurí aents Papru pu-jamunam iruntrarmiayi. Papru jintintiainiak Muisais yaunchu aar akupkamia nujai tura chíkich Yúsnan etserniu aarmaríjiaísha, Jesus nekas Yusa Anaikiamurínti tusa paant jintintiawarmiayi. Nuna tura káshik nankaama Yus akupeamunam pachíinkiatniun étse-étserkua kjaraj iniaisamiayi. ²⁴ Tura Papru táman antukarmia nu, chíkichkia, nekasaiti tusar umikiarmiayi. Tura antsu chíkichkia, nekaschaiti tusar umikcharmiai. ²⁵ Chíkichkí enentaik' enentáimsatin atsá asamtaí, jíinki weartasa pujuarmiayi. Túmainiakui Papru chíchaak “Nékaseñ Yusa Wakaní yaunchu Yúsnan etserniu, Isayas naartin áarmaríjiaí ii úntrín chícharuk juna tímiai:

²⁶ “Ame weme ua aents ju titia:

“Ántutka ántakrumsha nekashtatrumé,

Ítkia iyakrumsha wáinkiashtatrumé.

²⁷ Warí, au shuara enentáí katsuarai;

Kuishíjiaí ántaksha ántichua núnin áiniawai,

Jiisha epetkamua áanin áiniawai,

Iyaksha wáinkiañ tusa, ántaksha antukañ tusa

Enentáimkiusha nekaawañ tusa,

Wini uwemprañ tusa, tura Winí tsuamarañ tusa túrunayi”.

Nuní áarmaiti. ²⁸ Tuma asamtaí, nekaatarum. Yamaikia Yusaj uwempratín ana nuna Israer-shuarsha susamuiti. Tura niníka nekas umikiartatui” tímiai. ²⁹ Tura Papru nuna tí iniaisamtaí Israer-shuar nuamtak núkap chícharnaiyasua wearmiayi.

³⁰ Tura Pápruka nuíñ jeá ikiamsamunam jimará uwí pujusmiayi. Tura ashí aents nin iyutaj tusa wearmia nuna ni jeén itiaamiayi. ³¹ Tuma asamtaí Papru arantutsuk

urukuk Yus akupeamunam ati, Uunt Jesukrístu túramuríncha ashí etserkamiayi. Nútiksar etserkatniuncha Páprun penké suritkiacharmiayi.

Papru RÚMANMAYA SHUARAN papi akuptukma

Papru Rúmanmaya Yus-shuaran áatramania nu

¹ Wi Papru Jesukrístu takarniuitjai. Núnisañ Yus achirak ni Shiir Chichamēn etserkat tusa akatar akuptukmiayi.

² Nu Chichamun Yus yaunchu “akupkattajai” tímiayi. Núnaka Yúsna etserin Yus-Papinium paant ujakarmiayi. ³ Nu Chichamnum Yus ní Uchirín áujmatui. Ayashíjiañkia Tawit weeanum akiiniamiayi. ⁴ Tura ni tishiir wakanjiañkia Yusa Uchirínti. Tura ti kakarmaiti. Jakamunmaya nantakmiajajai nekas Yusa Uchiríja nu, paant nekanamiayi. Niisha ii Uuntrí Jesukrístui. ⁵ Ni túramujaj Yus shiir enentáimturuk nu Shiir Chichaman etserkat tusa akuptukmiayi. Núnisañ ashí nunkanmaya shuar nu chichaman umirkar Jesusa náarín shiir awajsarat tusa akuptukmiayi. ⁶ Atumsha nuyá shuaraitrume. Tura Jesukrístunu ajasarat tusa Yus achirmakuitrume.

⁷ Ashí Yus aneamutirmincha Rúmanam matsatrum nuna ju papin áateajrume. Yus ti péñker awajtsatniun wakerutmarme. Ii Aparí Yussa ii Uuntrí Jesukrístusha waitnentrainia ásar imiatkinchanum ti shiir pujustinian yainmakarti.

Papru Ruma péprunam irautinian wakerimiania nu

⁸ Émkasha, átum Yus nekas enentáimtamun ashí nunkanam áujmatenan nekaan Jesukrístun pachisan Yúsna ti shiir yumisajai. ⁹ Tuke enentáirjaj Yusa Uchirín ashí shuarnum etsertajai. Túrakui wi atumin ti Yus aneamutirmincha Rúmanam matsatrum nuna ju papin áateajrume áujtamun Yus nékarui. ¹⁰ Ashí tsawant ni wakerutakuñkia íitjarum tusan Yúsna seajai. ¹¹ Nekas íitniun wakerajrume. Nuj jean wakanmin yainkian Yusjaj kanakchamin ajasok tusan wakerajrume. ¹² Kame atumsha tura wisha Yus nekas enentáimtuinia asar mai ikiakána ajatai tusan wakerajai.

¹³ Yatsurú, tuke íitjarum tusan wakerimjiarme. Túrasa iyatsjarne. Kame Yus-Chichaman ujaakun chíkich shuarnuma áintsañ atumíincha Yus kakaram takasman wáinkiatniun wakerajai. ¹⁴ Wikia Yus akuptuku asamtai ashí shuaran ujákártiniaitjai. Unuimiaruncha tura unuimiaranchacha, ti nékainia nunasha tura nékachuncha, métekrak ujakartiniaitjai. ¹⁵ Tuma asan atumniasha Rúmanam pujarmena nunasha Uwempratin Chichaman ujaitjarum tusan pujajai.

Uwempratin Chicham kakarmaiti

¹⁶ Nu Shiir Chicham Yusa kakarmarijajai ti kakaram asa ashí shuaran uwentikramniaiti. Tuma asamtai natsantatsjai. Nekas Israer-shuarnasha tura chíkich shuarnasha núnisañ uwentikramniaiti. ¹⁷ Nu chichamnum Yus enentáimsamia nu páantaiti. Júiti: Áyatik Yúsna nekas enentáimtuiniakui Yuska “péñkeraitme” tímíniaiti. Yus-Papiniumsha núnisañ tawai: “Yúsna nekas enentáimta nuna Yus “péñkeraitme” tutai tuke Yusjaj shiir wekasattawai.” Tu áarmaiti.

Aentsu tunaarij

¹⁸ Shuar nekas chichaman nakitrar yajauchin túrataj tusar suriimiainiawai. Túrawar tuke tunaarintin áiniawai. Nu shuaran Yus ti kakerkar ti asutiátniun nayaimpinmaya paant awajsaiti. ¹⁹ Tura nu shuarka ashí Yusna nekaamnia nuna Yus paant awajsa asamtai péñker nékainiawai. ²⁰ Kame yámankamtaikniumiá Yus wáinchataiat ni najanamurjijajuka paant nekaamniaiti: Nekas Yus asa tuke kakarmaiti. Nusha ti paant asamtai nu shuar tsañkurnarchartatui. ²¹ Yúsna nékainiyat shiir awajsacharmiayi tura yumisacharmiayi. Tuma ásar aya ánta nunak enentáimtuiniak ni enentáji tunaajaj piakai. ²² Tura ti nekajai tuñiyat enentáimcha núnin ajasarai. ²³ Túmainiak jákachmin Yus imiá shiira nuna iniáisar shuar jakamnia nakumkamun shiir awajenawai. Tura nu arant nanamtinniasha napincha kuntinniasha yajsamancha nakumkar nuna shiir awajenawai.

²⁴ Nu asamtai imiá yajauch enentáimiainiakui “áanik asati” tímiayi Yus. Túramtai ti natsanmainian túrunainiawai. ²⁵ Yusna imiá nekasa nuna nakitrar antsu wait-chichaman anturkar nuna túrin áiniawai. Tuke Yúsak shiir awajtsatniun iniáisar antsu ni najanamun tikishmataniak shiir awajenawai. “Antsu tuke Yúsak shiir awajnasti” tajai.

²⁶ Nuna túrin áarmatai Yus natsanmainia nuna wakeruktinian tsañkatkarmiayi. Túramtai nuwasha áishmanjaj tsaniñtinian nakitrar nuamtak yajauch awajnainiawai.

²⁷ Núnisañ áishmansha nuwajaj tsaninñinian iniaisar nuamtak áishmanñkak tsanirmanainiawai. Ti wakerunainiak ti natsanmainia nuna yajauch túrunainiawai. Tura yajauch túruiniak ni ayashj wáitsatniunak sumamawarmiayi.

²⁸ Tura tuke Yúsan nakitiainia asantai ti yajauch enentáimainiak penké túrachminia nuna túrawarti tusa Yus tsanñkatkarmiayi. ²⁹ Nu shuar ti tunaajaj piaku áiniawai. Tsanirmausha aya kútniak wakerincha tura yajauch awajin áiniawai. Nu arantcha awakmakun kajerniusha manñkartincha tuke máanaincha anañkartincha péñkercha awajkartincha, tsanumniusha áiniawai. ³⁰ Nu arantcha chikichnasha yajauch áujmatin áiniawai. Yúsnasha nakitiainiawai. Áimniusha áiniawai. Tura “péñkeraitjai” tiar nanñaamantu enentáimtumainiawai. Tunáa túratniun eñiniawai. Aparincha nukuríncha umirainiatsui. ³¹ Enentáincha áiniawai. Tana nuna umichu áiniawai. Anenkartichu ásar waitnenkartichu áiniawai. Tsanñkurcha áiniawai. ³² Yuska “Shuar nuna túrinkia jákatniuiti” taman nékainiayat tuke túrukin wénawai. Tura nu arantcha chikich yajauch túramtai ti shiir wararenawai.

2

Shuar tunáa túramun Yus paant nékawai

¹ Amesha enentáimtumastá. “Shuar nu yajauchin túrana nu imiá tunáa shuaraiti” tákumka amesha métek túrakum imiá nekas sumamame. ² Yuska nu tunaan túrin ainia nuna súmamtikiashntinkiait. ³ Amesha nuna túrin “imiá yajauchiiti” táyatam amesha métek túrakminkia Yus sumamtikiattana nuyá ¿itiurak uwemprattam? ⁴ Yus ti waitnentrama asa nu tunáa ikiukim Nin enentáimtustinian katsuntramuk nákarmawai. Tura péñker asa wárik asutiámchakai sumamashñinaitjai ¿tu enentáimtumamek? Tu enentáimkium ni waitnentrammarj ántar awajsaitme. ⁵ Tura tunaarum enentáimtutsuk tuke túrakmeka súmamtikiatin tsawantaj ti tunáa irutmampramujaj ti asutniáttame. ⁶ Nu tsawantaj ni túramujaj métek Yus ashí shuaran akirartatui. ⁷ Shuar tuke péñker túrak ashí shiira nunasha tura tuke amuukachmin ainia nunasha wakeruiniana nuna Yus tuke iwiaaku Nijijaj shiir pujustinian súrsartatui. ⁸ Antsu péñkera nuna wakerutsuk antsu aya yajauchin wakeruiniak Yúsan nakitiainia nuna Yus ti kajerak asutiáwartatui. ⁹ Nekas Israer-shuarsha tura núnisañ Israer-shuarchasha tunaan túrin áiniakka ti wáitsartatui. ¹⁰ Antsu nekas Israer-shuarnasha tura núnisañ Israer-shuarchancho péñker túrin áinia núnaka Yus ti shiir imiatkinchanun apujrsartatui. ¹¹ Yus ashí shuaran akantsuk mai metek iyawai. ¹² Shuar Muisais akupkamun nékatsuk tunaan túraka aya júnisañ sumamawartatui. Tura shuar Muisais akupkamun nékayat tunaan túranka nu akupkamujaj sumamawartatui. ¹³ Akupkamun aya antukarua nuka Yusaj péñker áiniatsui antsu antukar umirainia nuna Yuska “péñkeraiti” tawai. ¹⁴ Israer-shuarchaka Muisais akupkamun takakainiachkusha aya ni enentáijijaj nu akupkamun umirainia ¹⁵ nu umireamujaj Yus nu akupkamun ni enentáin ikiursarua nuka paant nekaamniaiti. Nujaj métek túruiniak shiir enentáimainiawai. Tura métek túruiniachkunka péñkercha enentáimainiawai. ¹⁶ Wi Uwempratín Chichaman étsereaj nu ashí shuar uñkrisha túramun ashí paant awajsartatui. Tura nuna etserkatniun Jesukristun anaitiukmiayi. Nu tsawantaj tunaan túrin sumamawartatui.

Israer-shuarsha Muisais akupkamun umircha áiniawai

¹⁷ Ámeka “Tura Israer-shuaraitjai. Muisais akupkamun takakui winia Yúsraka ti shiir enentáimturui, tátsumeash. ¹⁸ Yus wakeramuncha nékajai. Tura akupkamun nekaan péñkera nuna wakerajai, tátsumeash. ¹⁹ Wakannium kusuraru áinia nunasha jintintiamniaitjai. Tura tsáapninian nekamtikiawarminiaitjai, tátsumeash. ²⁰ Akupkamu ti penker neka asan nekasa nuna unuimiaruitjai. Tuma asan nékachuncha ántuiniachuncha jintintiamniaitjai” tátsumeash. ²¹ Pai, chikichka unuiniaitmesha ¿urukamtai imia ámeka unuimiatsum? “Kasamkashtiniaiti” tu étsereatsmek. Táyatmesha ¿urukamtai ámeka kasamam? ²² “Tsanirmashtiniaiti” tátsumek. Enta, ¿urukamtai ámeka tsanirmam? “Ántar-yusan nakitiajaj” tátsumek. ¿Urukamtai ámeka nu yusa jeeniá kasamam? ²³ Akupkamun takakjai tusam shiir enentáimtumayatam nu akupkamu umireachkum Yus yajauch awajeatsmek. ²⁴ Yus-Papiniunsha núnis áarmaiti: “Átum péñker umirchamujaj Israer-shuarcha Yúsan yajauch chicharainiawai.”

²⁵ Muisais akupkamia nu ashí umireachkumka níi timia núnismek tsupirnaktin péñkeraiti. Tura takamtsuk umireachkumka tsupirnakcha núnisketme. ²⁶ Chikich shuarsha tsupirnakchaitiat Muisais akupkamun umireakka tsupirnatkesha tsupirnakua áintsapketete. ²⁷ Nu shuar tsupirnakchaitiat akupkamun ashí umireak atumin tsupirnakutirmin akupkamu takakuitiatrum umircha asakrumin súmamtikramawartatui. ²⁸⁻²⁹ Kame nekas Israer-shuarka aya pátatkechu antsu tuke enentáijijaj Yúsnan wakera núiti. Núnisañ nekas tsupirnaktkincha aya ayashjñjainchuiti antsu enentáiniam shiir átinia núiti. Nekas akupkamu aya

áarchamuiti antsu nekas enentájjijai umirkamua núiti. Nekas tú tura núnaka aents shiir enentáimtuiniachkuisha Yus shiir enentáimtaiwai.

3

¹ Núnis ajsha Israer-shuar ainia nu ¿warí péñkernak takakainia? Tura tsupirnaktincha ¿wariniak yayá? ² Ti péñkeraiti. Warí, émkaka, Yus ni chichamen Israer-shuaran súsacharmakia. ³ Kame chíkich chíkich umichu ániakui Yus tsan̄katkamia nuna nú shuaran súsachmatañkia nuikia “Yus umichuiti” ¿títinkiait? ⁴ Péñkea. Antsu Yuska nekas túratniua nujaj métek ashí túriniaiti. Shuar umichu ániakuisha ni támarjñ mash umiktatui. Ni tamajaj shuárñ wáitrin awajeacka nusha péñkeraiti. Núnisañ atí. Yus-Papisha métek tawai: “Támena nuna “imiá nekasaiti” tiartatui, tura súmamtikramataj tuíniakuisha nupetmaktatme” tawai.

⁵ Nu arantcha, “Wi tunaan túramujaj Yus imiá péñkera nuna paant awajeacka ¿urukamtai winia asantua? ¿Nuka péñkerkait?” tíchatapash. (Kame aents chichainia núnisnak tajai.)

⁶ Warí, Yus péñkerchaitkiun̄ka ¿itiurak ashí shuara tunaarjñ súmamtikiawarat? Kame imiá péñkeraiti.

⁷ Núnisañ, “Wi umirkachmajaj Yus tuke umiiniana nuna paant awajeacka nuikia nujaj in shiir awajsamtai ¿urukamtai “tunaitme” túruta?” tíchatapash. ⁸ Warí, “tunáa túramujaj Yúsñ péñker awajeajai,” tú nekas enentáimpramniaitkiun̄kia shuar nuñkia “Wats, ashí péñker áti tusar tunáa túratatí” tímín ainti. Kame chíkich shuar in kajertamainiak “nuna jintintiniawai” túramji. Nu shuar sumamawartín ániawai.

Ashí shuar tunáa túraitji

⁹ Nuikia Israer-shuartíkia chikichjaj nan̄kaamas ¿péñkerkaitiaj? Peñkesha. Warí, Israer-shuartisha Israer-shuarchajajisha ashí métekrak tunaan túrin ániawai. Núnaka jú áarmajaj paant awajsaitjai. ¹⁰ Yus-Papisha núnisañ tawai:

“Péñkeran túrin chikichkisha atsawai.

¹¹ Yúsñan nekaatniun nakitiainiawai. Yusnasha eáiniatsui.

¹² Yusnumiá kanakiar men̄kakatniunam wénawai. Chikichkisha péñkeran túrin pen̄ké atsawai.

¹³ Ashí yajauch chichainiak iwíarsamu yama urainiua núnisañ ániawai. Ni chichamejaj tuke anañkartín ániawai. Chichame napia ántsañ najamin ániawai.

¹⁴ Aya yajauchin kakaram áujmatin ániawai.

¹⁵ Máataj tusa wárik yujarín ániawai.

¹⁶ Aya ti itiurchat ti yajauch awajín ániawai.

¹⁷ Shiir pujustinian nékainiatsui.

¹⁸ Ishichkisha Yúsñ ashamenatsui.”

¹⁹ Yaunchu akupkamun umirkatin ainia nú shuar aya

tákamtak umirkatin ániawai. Tuma asamtai ashí shuar umirkachu ásmatai Yus nujaj súmamtikiawartatui. Túrakui niisha pachischamin ániawai. ²⁰ Akupkamuka aya ii tunaarjñ paant awajturmajai. Tuma asamtai akupkamu péñker umirkatniujaj Yus “péñkeraitme” turamchamniaitji.

Aya Yus shiir enentáimtusar uwempramniaitji

²¹ Yus-Chicham yaunchu áarmanum itiuara Yus in “péñkeraitme” túramminiaitaj nuna paant tawai. Kame akupkamujainchuiti. ²² Antsu iisha ashí shuarsha núnisañ aya Jesukristu shiir enentáimtakrin Yus “péñkeraitme” túramminiaitji. ²³ Kame ashí shuarti tunáa túraitji. Tuma asar Yusjaj métek péñker ajastin pen̄ké jeatsji. ²⁴ Tura Yus in waitnentrama asa kuitchajaj “péñkeraitme” túramji. Jesukristujaj uwemtikrampra asa túramji. ²⁵ Tura Kístun akupkamiayi ni jakamujaj ashí tunaan asakátratniun. Túramtai shuar Nin nekas enentáimtuiniakui Yus tsan̄kuramniaiti. Yaunchu tunáa túramun katsunteak enentáimtuschiayi. Yamái tsan̄kuramnia nuna yaunchu nekáa, nuna túramniuyayi. ²⁶ Tura yamaiya tunaancha tsan̄kureak ashí shuar Jesusan nekas enentáimtuinia nuna “péñkeraitme” tuke tímíniati. Kristu jakamujaj nuka paant ajasai.

²⁷ Nújajñkia ii péñker ajasjiniu nu “winia kakarmarjaj túrunajai” tíchamnia asar ¿nan̄kaamantu enentáimtumarminkaitiaj? Peñkesha. Warí, akupkamu umitsuk aya Kristu nekas enentáimtakrin Yus “péñkeraitme” túramji. ²⁸ Nujaj páantaiti. Akupkamu umirtsuk aya Jesukristu shiir enentáimtakrin Yus “péñkeraitme” túramminiaitji.

²⁹ Warí, Yuska Israer-shuarnasha tura núnisañ Israer-shuarchancha mai ni Yúsñinchukait. ³⁰ Kame aya chikichik Yúschakait. Tura tsupirnakuncha tsupirnakchancha mai metek aya Jesukristun nekas enentáimtuiniakui “péñkeraitme” tímíniati. ³¹ Shuar Yúsñ shiir enentáimtamujaj péñker ajastin ániakui nujaj ¿akupkamu ántar awajsamukait? Atsá. Antsu nuna nan̄kaamas umirkatin awajsamuiti.

4

Apraámsha Yúsan shiir enentáimtamujaj péñker ajasmiania nu

¹ Ashí Israer-shuara uuntri Apraám enentáimtustai. Niisha çitiurak Yusjaj péñker ajasma? ²⁻³ Ni péñker takasmajaj Yusjaj péñker ajasuitkiunka nankaamantu enentáimtumarainti. Antsu Yus-Papí tawai: “Apraám Yúsan shiir enentáimtakui Yus “péñkeraitme” tímiayi” tawai. Nu túramu asa Apraámsha Yus íimnianum nankaamantu enentáimprachminiaiti. ⁴ Shuar íniamna nu takasmatai çaya tsanãa asam akiktatmek? Warí, ní takasmanum páchitsuk akikchatniukait. ⁵ Antsu shuar ní péñker turamurj enentaimtsuk áyatik “Yus tunáa shuaran péñker awajniúiti” tu enentáimtakui Yuska tsanãa asa “péñkeraitme” tawai. ⁶ Tura péñker túrachunak Yus “péñkeraitme” takui nu shuar shiir warasminiaiti. Núnisañ tawai uunt akupin Tawit:

⁷ “Shuar ashí ní tunaarín Yus asakátar tsanãuramu ana nuka shiir enentáimpramniaiti.

⁸ Uunt Yus ní tunaarín enentáimtachma asa ti warasminiaiti.” Tu tímiayi Tawit.

⁹ Çaya tsupirnakukeash warasminiaiti? Tura tsupirnakchasha waraschamniakait. Warí, Apraám Yúsan shiir enentáimtakui Yus “péñkeraitme” tímiayi. ¹⁰ Tura Apraám tuke tsupirnasajin Yus nuna tímiayi. Emka Yus “péñkeraitme” timia nú ukunam Apraám tsupirnakmiayi. ¹¹ Apraám tsupirnatuk Yúsan shiir enentáimtusmatai Yus “péñkeraitme” tusa “tsupirnaktiniaitme” tímiayi. Nújajinãia ashí Yúsan shiir enentáimtuinia nú shuar tsupirnatkesha Apraám weeá ániawai. Tura nu shuaran Yus “péñkeraitme” tawai. ¹² Tsupirnakusha aya tsupirnakusa asa Apraám weeá ániatsui antsu nu arant Apraámjaj métek Yúsan shiir enentáimtuinia nuka Apraám weeá ániawai. Kame Apraám tuke tsupirnatuk Yúsan shiir enentáimtusmiayi.

Yus shiir enentáimtamujaj Nii timia nu uminkiattawai

¹³ Yaunchu Apraám Yus chícharuk “Amincha amée weeá shuarnasha jú nunãan susattajaj” tímiayi. Nunasha Apraám Yus akupkamun umireakui tíchamiayi. Antsu Apraám Yúsan nekas enentáimtakui Yus “péñkeraitme” taku nuna tsanãatkamiayi. ¹⁴ Kame aya akupkamun umirniun súsatniuitkiunãia nuikia Yus enentáimtustin ántraiiti. Tura Yus Apraáman timia nusãa ántraiiti. ¹⁵ Akupkamun akui shuar umirkachka ti asutniáshtatuak. Tura atsakuinãia çasutniátniukait? Çitiurak umirtsuk ikiuktin?

¹⁶ Tuma asamtaí Yus ti anenãartin asa Nin nekas enentáimtuinia ashí tsanãatkaiti. Nújajinãia Apraám weeasha Yus Apraáman timia nuna páchitsuk wáinkiártatui. Iisha Apraámjaj métek Yus nekas enentáimtakur ní weeaítji. Tuma asamtaí Muisais akupkamun umirniuncha tura umirniuchuncha mai metek ashí in Yus ashí Apraáman timia nuna tsanãkatramkattajaj. ¹⁷ Kame Yus-Papiniun Apraám áatramuuti: “Untsurí shuarsha amée weeá ajasartatui.” Nu asamtaí iisha Apraámjaj métek Yus shiir enentáimtakrincia Yus inãa Apraám weeá áintsañ íirmajaj. Nú Yuska ti kakaram asa jakancha iwiaaku awajniúiti; tura atsana nunasha ana nútiksañ nájanui.

¹⁸ Yus “ti pampantatme” takui Apraám ti uuntach áyat Yus timian enentáimtak yajutmartinian nákasmiayi. Nujaj untsurí shuar ní weeá ajasarmiayi, Yus timia áintsañ. ¹⁹⁻²⁰ Apraámsha sian (100) uwí takakuitiat tura ní nuwé Sarasha júretsuk uunt ajasmataisha tuke iniaitsuk Yus tímia nuna nekas enentáimtusmiayi. “Yus nekasash ta” tútsuk shiir awajsamiai. Nujajisha nuna nanãaamas kakaram ajasmiai. ²¹ Tuma asa “nekas Yus tana nuna páchitsuk umiktatui” tu enentáimpramiayi. ²² Nu asamtaí Yus “péñkeraitme” tímiayi.

²³ Tura Yus nekas enentáimtamunam Yus “péñkeraitme” tana nu aya Apraámnaã áatrachmaiti. ²⁴⁻²⁵ Antsu inãa túramjaj. Iisha núnisrik ii Uuntri Jesus nekas enentáimtakrincia Yus inãa “péñkeraitme” turamtaíjaj. Jesuska ii tunaarín jarutramkatniun surunkamiayi. Tura nujaj Yus in “péñkeraitme” taku Jesusan ataksha iniantkimiayi.

5

Yus “péñkeraitme” túramkurin shíiraiti

¹ Tuma asamtaí Yus nekas enentáimtakrin Yus “péñkeraitme” túramjaj. Nujaj iisha Yusjaj shiir nawamnaikier pujajaj. Núnaka ii Uuntri Jesukristu ní jakamujaj sumartamkamiayi. ² Tura Nii shiir enentáimtakur Yusaj weankaitjaj. Tura Kristu jarutramkakin Yus ti anenmajaj. Tura tuke anenma asakrin Nijjaj métek shiir ajastin nákakur waraajaj. ³ Nu arantãa yamá iturchat pujayatrik nu iturchatjaj unuimartatjaj tusar waraajaj. Katsuntratniuncha unuitamjaj. ⁴ Tura nu unuimiarar ii katsuntramu paant átatui. Tura nuyá Yus ti shiir awajtamsettajnia nuka shiir enentáimtajaj nákastajaj. ⁵ Nu ti shiir enentáimtar nákamujaj ananmamtsuji. Yuska ní Shiir Wakaniin ii enentáim pujurtamuk ní anenãartutairín ti paant awajturmajaj. Tuma asamtaí Yus túratin nákanjia nu imiá nekas wainkiattajaj.

⁶ Íikkia penké uwemprachmin asakrin tsawant jeamtaí Kristu ashí shuara tunaarín jarukmiayi. ⁷ Shuar chíkich shuaran uwemtikratniun çjaruktatuak? Péñker shuar añ

jarukchattawai. Kame ti penkeraitkiuinikia jarukchaintiash. ⁸ Antsu ii tuke tunáa árinin Kristu jarutramkiamaji. Nujaj in ti anenmajnia nuna ti paant iniakturmaji. ⁹ Tura ni numpejaj tunaarinja awajsamu asar imiá nekas Yus asutiámatniua nuyá uwempraitji. ¹⁰ Yusa nemasrj áyatar Yusa Uchirj jakamujaj yamaikia Yusjaj shiir nawamnaikiar pujaji. Nu arant nujikia Kristu tuke iwiaaku asa iijjaj tsaninikiu asa ashí yajauchinmayá uwemtikramar tuke shiir awajtamsattaji. ¹¹ Ii Uuntrj Jesukristu jakamujaj Yusjaj shiir nawamnaikia asar ti waraaji.

Atansha tura Krístusha túrawarma

¹² Ayu. Yámankamtaik emka áishmaj Atan niniki tunaan túramtai nú tunaajaj ashí shuar tunaarintin ajasarmiayi. Tura ashí tunaarintin ajasar mash jákatin ániawai. ¹³ Akupkamu atsakuinikia umirkachma nekaachminiaiti. Tuma aijn Muisais akupkamu atajasha tuke tunaan túrin ármiai. ¹⁴ Atan pujumia nuyá Muisais tuke akupeatsajin shuara tunaari paantcha aijn ashí shuar tunaan túrawar jákarmiayi. Kame ni tunaari Atanña áintsachuyayi. Atanika Yus akupkamu paant ujakman umirkachmiayi. Antsu nu shuar Yus akupkamu paant nekainiachiatañ tunaan túrin ániak jákarmiayi. Tura Atanika Krístujaj apatkar enentáimpratai.

¹⁵ Atan tunáa túramia nujaj apatka iisam, Yus in tsankatramaj nuka nankaamas penkeraiti. Kame Atan niniki tunaan túramujaj ashí aents untsurj armia nu, tunaarintin ániak, jákarmiayi. Tura Yus in ti anenma asa chikichik áishmajaj nuna nankaamas tí shiiran tsankatramaji. Jesukristujajinikia untsurj shuaran uwemtukrar ti shiiran tsankateawai. ¹⁶ Atanika tunaari imiá yajauch aijn nuna nankaamas penkeran Yus tsankatramkaitji. Iis, aya chikichik tunaan túramujaj aents sumamawarmiayi. Antsu Yus uwempratinun tsankatramaj nujajinikia ti untsurj tunaan asakáruiti, tura “penkeraitme” túramji. ¹⁷ Chikichik áishmaj tunaan túramujaj aents jákatin ániawai. Tura nuna nankaamas chikichik áishmaj Jesukristu túramujaj ti shiir pujustatji. Kame Yus ti anenma asa ii penker túratsrinin “penkeraitrume” túramji. Nu asamtai yamaram iwiaakmanum kakaram ajaji.

¹⁸ Atan tunaan túramujaj ashí tunaarintin ajasar jákarmiayi. Núnisan Jesukristu túramujaj ashí shuar Yus “penkeraitme” timia nuka yamaram iwiaakmajaj tuke pujusartatui. ¹⁹ Núnisan chikichik áishmaj umirkachmajaj untsurj tunaarintin ajasarmiayi. Tura chikichik áishmaj umirkamujaj untsurj shuar penker awajnasarmiayi.

²⁰ Wats, tunáa ti paant atí tusa Yus ni akupkamurin susamiayi. Túrasa ti tunáa pampaakui Yus nuna nankaamas waitnentramak nu tunaan asakátramji. ²¹ Shuar tunaan túrin ásar jákatin ármiai. Tura núnisan ii Uuntrj Jesukristu túramujaj Yus in “penkeraitrume” túramkurin iisha tuke iwiaaku pujustinaiatji.

6

Krístujaj jaka asar tunáa túrachminiaitji tura Krístujaj tsaninikiu asar iwiaakuitji

¹ Núnisaitkiuinikia Yus nankaamas waitnentrampratai tusar ¿tunáa túrattajik? ² Penkea. Wari, iikia tunáa túrashtin jákajitji. Jákaaka ¿itiurak tunaan túramniait? ³ Imianniutikia Krístujaj tsaninikiu asar imianir Niijjaj métek jaka áintsar aji. ⁴ Tura imianir Krístujaj jaka áintsar métek iwiarناسuitji. Tura Yus ti kakaram asa Krístun jakan iniantkimia núnisan incha nu kakarmajaj yamaram enentáijaj penker wekasatniun iniantankimijaj.

⁵ Krístujaj tsaninikiu asar Niijjaj métek jaka áintsanjetji. Tura núnisan Niijjaj métek nantaktiniaitji. ⁶ Yaunchu enentáimtajinikia Krístujaj métek jaka asamtai ii yajauch wakerutain emenkátrutmakuitji. Tuma asamtai yamaikia penké umirkashtiniaitji. ⁷ Kame ¿jákaaka itiuurak tunaan túrat? Yamaikia ankant ajasuítji. ⁸ Iisha nekas Krístujaj jákaitkiurkia Niijjaj métek tuke iwiaaku pujustin enentáimji. ⁹ Kame Krístuka chikichikí jaka nantakin asa atakka jákashtatui. Túmaikui atakka ajakrachminiaiti. ¹⁰ Kristu chikichikí jaka asa ashí tunaajaj itit awajsachmin ajasuíti. Tura yamaikia iwiaaku pujá asa Yúsán shiir awajsatniun pujawai. ¹¹ Atumsha núnisrumek jaka áintsarum tunáa túrachmin enentáimtumastarum. Antsu ii Uuntrj Jesukristujaj tsaninikiu asarum iwiaaku pujakrum Yus shiir awajsatarum.

¹² Nu asamtai tunaaka ayashmjin akuptamkashtiniaitrume. Ayashí wakeramurj umirkashtiniaitrume. Ankantaitrume. ¹³ Atumi ayashí tunaan túrat tusarum ikiasairap. Antsu jakamunmayá nantakin asarum Yus wakeramu túratin surumaktarum. Tura ayashmisha aya penkernak túratí tusarum Yus líktustarum. ¹⁴ Akupkamu umirkatniujaj iwiaaku pujatrsrume. Antsu atumin Yus ti anenma asa yamaram iwiaakman túram-saitrume. Tuma asamtai yamaikia tunaaka nupettamkachminiaiti.

Tuke umireajnia nuna takarniurintji

¹⁵ Nuikia akupkamu umirtsuk antsu Yus ti anenma asakrin iwiaaku pujakur ¿“Páchitsuk tunaan túramniaitjai” títiatjik? Penkea. ¹⁶ Tuke umireajnia nuna takarniurintji. Nuka nékatsrume. Tura ni takarjin ajasam umirkatniuitme. Tuma asamtai tunáa umirkurkia ni

takarniurjntji tura umirkar jakattaji. Tura Yus umirkurkia péñker wekasattaji. ¹⁷ Atumsha yáunchuka tunáa umirniuitiatrum ikiukrum yamaikia nekas chicham antukrumena nu nekas atumí enentáijijai umirkaitrume. Tuma asamtai Yus ti yuminsatniuiti. ¹⁸ Yamaikia tunaanumiá ankant ajasu asarum ti péñker wekasatniunam pachiinkiaitrume. ¹⁹ Paant nekaak tusan takarniun pachisan tájarme. Wats, yaunchu atumí ayashí mujjmianian tura ashí yajauchin túrat tusarum tsankamakmarne. Núnisrumek yamaikia atumí ayashí péñkeran túrat tusarum tura tuke Yusjai shiir wekasat tusarum tsankamaktarum. ²⁰ Atumsha tunáa umirniuyarme nuikia péñker wekaichauyarme. ²¹ Tura nújajsha ¿warí péñkerna yáinmakmarum? Iista, yamá natsanmainchakait. Nusha jákatniunam júawai. ²² Antsu yamaikia, tunaanumiá uwempra asarum Yus umirniuitrum. Antsu júka Yusjai shiir wekasatniunam júawai tura nuyá tuke iwiaaku pujustatrum. ²³ Tunáa takarkumka tuke jákatniun akirmaktatui. Antsu Yuska iikia takaatsriniñ penké ántar tuke iwiaaku pujustinian suramsattaji. Ii Uuntrí Jesukristujai tsaniñkia pujá asakrin nuna túrutmattaji.

7

Akupkamujai ankantaitji

¹ Enentáimpratarum yatsuru. Jáka akupkachminiaiti. Aya iwiaakna nu akupkamniaiti. Nu paant nékatsrumek. ² Wats, nuwá nuátka nu aishrj iwiaakkuí niijjai tsaniñ pujustinaiaiti. Tura aishrj jakamtai ankant ajawai. ³ Tuma asamtai aishrj iwiaakajñ chíkich áishmanjai tsaniakka tsanirmawai. Tura ni aishrj jakamtai chíkich áishmanjai páchitsuk nuatnakminiaiti tura nuikia tsanirmatsui.

⁴ Núnisrumek atumsha, yatsuru, Kristu ayashí muchitmarí ajasu asarum akupkamu emettachmin jáka áintsarum ajasuitrume. Túrakrum Kristujai nuatnaikiatín áintsarum ankantaitrum. Niisha jakamunmaya nantakniuiti. Yamaikia Kristunu ajasu asar Niijjai tsaniñkar Yus wakeramu péñker túratniuitji. ⁵ Yaunchu wakerutai umirniuyaj núj akupkamu enentáimtusar nuna nankaamas yajauchia nu wakerimji tura jákatniunam juramkimji. ⁶ Antsu yamaikia akupkamu emettachmin jáka asar ankant ajasuítji. Túrunar akupkamu yaunchu áarma nu iniaisar yamaikia Yusa Wakanijjai tsaniakur yamaram iwiaakmajai péñker wekasamniaitji.

Winia enentáiruñ tunáa ana nu

⁷ Núnisaitkiuñkia “Akupkamu yajauchiiti” ¿titiyajash? Atsá. Warí, akupkamuka tunaan ti paant awajeawai. Akupkamu “Chíkichna wakerukaip” táchakuñkia wakerukchajjai. ⁸ Tura nu akupkamun enentáimtakui winia enentáiruñ tunáa ana nu ashí yajauchin ti wakerumtikrimiaiyi. Kame akupkamu atsakuí tunaan ti enentáimtachaitjai. ⁹ Yaunchu akupkamun nékachkun nánkamsanak enentáimniuyajai. Tura akupkamun nekaan tunaan nekaanjai tura jáka áintsanak ajasjai. ¹⁰ Tuma asamtai akupkamujai péñker wekasatniuititan umirkatniun tujintiakuí aya jákatniunam jurukni. ¹¹ Kame tunáa wakerutainkia nu akupkamujai anañkra péñker iwiaaku pujustinian surutsuk nu akupkamujai jákatniunam jurukmiaiyi.

¹² Tuma asamtai akupkamuka Yusna asa ti penkeraiti. Yajauchihuiti. ¹³ Nuikia ¿péñkera nu jákatniunam júrawak? Atsá. Antsu tunáa wakeruktin jákatniunam jurukmiaiyi. Nuna tura asa tunáa imiá yajauchia nu nekaamniaiti. Tura tunáa wakerutai péñker akupkamujai jákatniunam jurukmiatai, nujai Yus “tunáa wakerutai imiá yajauchiiti” tusa paant awajsamiyai. ¹⁴ Akupkamuka Yúsnaiti. Nu paant nékajai. Antsu wikia ayashna nuna wakerakun tunaan umireajai. ¹⁵ Kame túrajna nuna itirchat enentáimtajai. Péñker túratniun wakeraj nuna túratsjai. Antsu nakitaj nuna nekaska túriniaitjai. ¹⁶ Akupkamu péñkeran nekaan umirkatniun wakerajai. Túrayatnak umirchaitjai. ¹⁷ Tuma asamtai wíchaitjai tunaan wakerakun túrajna nuka. Antsu winia enentáiruñ tunáa wakerutai pujá asa nu túrumtikriniaiti. ¹⁸ Yaunchu enentáimtai winia enentáiruñ pujana nu penké yajauchiiti. Nuna ti paant nékajai. Tuma asamtai péñker túratniun wakerayatnak penké tujintiajai. ¹⁹ Péñker túratniun wakerayatnak túratsjai. Antsu tunaan nakitaj nuna túrajai. ²⁰ Nu asamtai nakitaj nuna túrakun wíchaitjai antsu winia enentáiruñ tunáa wakerutai pujana nu túriniaiti.

²¹ Júnisaiti. Péñker túratniun wakerakun aya tunaan ínkiuajai. ²² Nekas enentáijijai Yusa akupkamurñ wakerajai. ²³ Tumañ yaunchu enentáimtai winia enentáiruñ pujurtak nupettawai tura nekas wakeraj nuna akirturui.

²⁴ Maa, ti waitiajai. Jú ayash wakeramujai jákatniunmaya ¿yaki uwemtikrur? ²⁵ Yuska ii Uuntrí Jesukristujai túrutmamniaitji. Tuma asamtai Yúsan ti yumíñkiajai. Ayu. Winia enentáirjai Yus akupkamun umirniuitjai. Antsu winia ayashrujai tunaan umireajai.

8

Yusa Wakanjijai péñker wekasatin

¹ Jesukristujai tsaninñiarun Yuska “tunaan túrawar jákatniunam wémin ániawai” tatsui. Nu shuar ni ayashí wakerana nuna umirtsuk Yusa Wakanj wakerana nuna umirainiawai. ² Jesukristujai tsaninñiu asakrin Yusa Wakanj nekas iwiaaku awajtamsaitji. Tuma asamtai tunáa túratniunmayá tura jákatniunmayasha ankant ajasuitji. ³ Ayash wakerutainkia, wi akupkamun enentáimtakui, nuna nankaamas tunaan wakerumtikrimiayi. Tuma asamtai akupkamuka yáinkiachminiuyi. Antsu akupkamu tujinkiamia nuna Yus túraiti. Ni Uchirín ayashtin awajas tunaan jarukat tusa akupkamiayi. Tura nujai ayash tunáa wakeramun nupetkamiayi. ⁴ Túramtai ii yamaikia ayash wakerana nu umirtsuk tura Yusa Wakanj wakeramu túrar akupkamu tana nu umirniuitji. ⁵ Ayash wakeramun umirainia nu, ayashnia nunak enentáimtuiniawai. Antsu Yusa Wakanj wakeramun páchinia nuka Yúsnan enentáimtuiniawai. ⁶ Ayashnia nuna enentáimtuinia nú shuar jákatniunam wénawai. Antsu Yúsnan enentáimtuinia nuka Yusjai shiir nawamnaikiar tuke pujusartatui. ⁷ Aya ayash wakeramun enentáimtuinia nú shuar Yusa nemasrj ániawai. Yus akupeamun nakitiainia ásar ni taman umirkatniun penké jeainiatsui. ⁸ Tuma asamtai shuar ni ayashí wakeramurj warareakka Yusan shiir awajsachminiati.

⁹ Tura átumka ayash wakeramu umirtsuk tura Yusa Wakanj pujurtamkurmin ni wakeramu enentáimtiniaitrueme. Ashí shuar Kristurtin ainia nu ni Wakanj takaku ániawai. Takakchaitkiunka nuikia Kristunuchuiti. ¹⁰ Tura Kristu atumin pujurtamkurminkia atumi ayashí tunaajai jakamnia ajñ Yus “pénkeraitme” túramu asamtai atumi wakanjñkia nekas tuke iwiaakuiti. ¹¹ Yus Jesukristun jakan iniantkimiayi. Tuma asamtai ni Wakanj atumi enentáin pujurtamkurminkia Jesusan iniantkimiunia núnisañ nu Wakanjai yamaram iwiaakmajai iniantamkittiarne.

¹² Tuma asamtai, yatsuru, ayash wakeramu penké umirkashtiniati. ¹³ Ayash wakeramu umirniuitkiurmeka jakattarame. Antsu Yusa Wakanj pujurtamkurmin ayash wakeramu nupetkarmeka péñker wekasarum nekas iwiaaku átrume.

¹⁴ Ashí shuar Yusa Wakanj timiajai métek wekainia nu, nu shuar nekas Yusa uchirinti. ¹⁵ Yusa Wakanj in pujurtamkurin Yusa uchirj ajasar sapijmiatsuk Yusaj weamkar “Aparú” tímimniati. ¹⁶ Nu Wakan “nekas Yusa uchirinne” ii enentáin túramji. ¹⁷ Tura ni uchirj ajasu asakrin Yus tímia núnisañ ashí Níiniun suramsattaji. Kristun ashí susattana núnisañ incha suramsattaji. Yamái Kristunu takaakur wáitiakrikia ukunam Kristujai métek ti shiir awajnstattaji.

¹⁸ Maa, yamá ti wáitiakrishia ukunmanka nayaimpiniam ti shiir pujakur nu wáitsamu kajinmatkittiaji. ¹⁹ Tsawant jeamtai Yus ashí ni shuarin Nijijai métek ti shiir awajstattui. Nuñ nekas Yusa uchirj ainia nu ti paant nekanattawai. Nu tsawantan wáinkiatniun ashí Yus najanamu írunga nu ti nákaianiawai. ²⁰ Ashí Yus najanamia nuna yámankamtaik ti péñker najanamiayi. Túrasa yajauach ajasmiai. Nusha ni neaskeka túrunachmiayi. Antsu Yus ukunam ataksha iwiarnartin atí tusa tunáa wayamunam yajauach ajasat tusa tsanñkatkamiayi. Tuma asamtai iwiarnartin tsawantan nákawai. ²¹ Nu tsawantaji ashí Yus najanamu emesnartinniumiá uwemprattatui. Tura ashí Yus najanamuka shuar Yusa uchirj ajasarua nujai métek shiir awajnsar ankant ajasartatui. ²² Yamaisha ashí Yus najanamu ainia nu, nuwá jatema wáitia núnis ti wáitiainiawai. ²³ Yus najanamuka ashí wáitiainiawai. Iisha Yusa Wakanj takakiatar ti wáitai. Tura Yusa Wakanj takakur ashí Yus suramsattajnia nu nékaji achiktin. Tuma asar nekas Yusa uchirj paant awajnstin tsawant nákaji. Nuñsha ii ayashísha ankant awajnstattui. ²⁴ Nu tuke enentáimtuki wéakur takamtsuk uwemprattaji. Yamái nu wáinchiatar tuke nákaji. Warí, ¿wáinjinia nu nákajik? ²⁵ Tuma asar tuke waincha asar katsuntrar nákaji.

²⁶ Nu arantcha ii kakarmachu nekapeakrin Yusa Wakanj yáinmaji. Kame Yus áusatniusha nékachkurin in yáinmaji. ¿Warí seattaj' tura itiu seattjik? Nu nékatsji. Tura itiuatn pujakur ti wáitiakrincha Yusa Wakanj in áujurmaji. ²⁷ Tura Yus ii enentáin enentáimtaj nuna nékati. Tuma asa ni shuarj asakrin ni Wakanj ni wakeramujai métek seatramkurin ántawai.

Ti nupetmakuitji

²⁸ Yus anea asakrin ashí nankaatamjinia nujai Yus pujurtamji. Tura nujai péñker awajtamji. Nu paant nékaji. Tura Ni wakerimia núnisañ Ní shuar awajtamsaitji. ²⁹ Yámankamtaiknumiá in nekarmak ni Uchirj Jesukristujai métek ajasat tusa achirmakmiayi. Nujai Yusa uchirj untsurj ajasji. Tura Kristu ii iwiajrinti. ³⁰ Tura Yus achikmia nuna Niiniu awajsmiai. Tura nu shuaran “pénkeraitrueme” tímiayi. Tura ti shiir awajsmiai.

³¹ Wats, nuikia Yus in yáinmakrin ¿yaki in nupettamkattaj'? ³² Ni Uchiríncha suritramkachmijai antsu in jarutramkat tusa akupturmakmijai. Tura asa ni Uchirijjai métek ti shiira nuna ashí suramsashtatjik. ³³ Yus achikmia nú shuaran ¿yaki sumamtkiatj'?

Yus Ápaka “pénkeraitrume” tiniu asa penké túrashtatui. ³⁴ Tura zyaki “jiniun apenáti” titi? Warí, Kristu penké túrashtatui. Antsu nu shuaran jarukmiayi. Tura nantaki Yusa untsuurinj ekemas in áujturmajai. ³⁵ Kristu ti anenma asakrin in akantamkitin atsawai. Wáitiakrishá, itiuarchat ínkiuakrishá, shuar áinframkurnisha, tsukamakrishá, entsatai atsakuisha, tsúumainjajishá, tura mantamnakrishá, nujaj “Kristu anentsui” tíchamniatiji. Nuka Kristu anenkrattairiya akantamkitin jeatsui. ³⁶ Yus-Papiniumshá júnis áarmaiti: “Amée-shuar asar tuke mantamnatin pujaji. Murik máatniua áintsan enentáimturmajai.”

Tu áarmaiti.

³⁷ Tuma ajn Kristu in anenma asakrin Nijjaj ti nupetmakuitiji. ³⁸ Kristu anenkrattairiya akantamkitin penké atsawai. Nuna ti paant nékajai. Jákatniusha, iwiaakmasha, nayaimpinmaya suntarsha, ashí nayaimpinmasha tura nunkanmasha akupin ainia nusha, yamá írunna nusha, ukunam átatna nusha, ³⁹ yakí írunna nusha, nunká írunna nusha, kame ashí Yus najanmu írunna nusha Yusa anenkrattairiya penké akantamkichminiatiji. Yusa anenkrattajsha ii Uuntrj Jesukristu túrunamujaj paant wainji.

9

Yus Israer-shuaran ni shuarj arti tusa achikiarmiania nu

¹ Yamá tájana nu Kristu shuarj asan imiá nekasan wáitrusuk tájai. Winia enentáirsha tura Yusa Wakanjsha “nekas tawai” turutainiawai. ² Israer-shuaran waitnentakun ti kuntuts enentáimjai. ³ Wíshuar áiniakui Kristumaya kanakin yuminnarantjai nujaj wíshuaran yáimniatkiunka. ⁴ Israer weeá shuar áiniawai. Tura ni uchirjá áinis Yus achikiaruiti. Yusa wincharjsha níjjaj pujumiayi. Yaunchu Chicham ni weatríjjaj iwiamuncha tura Muisais akupkamuncha sasumiayi. Tura Yusa Jeeñ Nin shiir awajsatniun jintintiamiayi. Tura ukunam shiir tsankatkattana nunasha ujakmiayi. ⁵ Ni weatrín Yusan ti pénger enentáimtin irunmiayi. Krístusha aents ajas nú shuarum akiiniamiayi. Krístuka Uunt Yus asa tura ashí akupin asa Nínki tuke shiir awájnastí. Núnisan atí.

⁶ Kame Yus ashí Nii timia nuna Israer-shuaran súdachmataisha nujaj “Yus timia nu uminkiachuiti” tíchamniati. Antsu junis enentáimpratniuiti: ashí Israer weeá áiniayatan Yusjaj íismaka ashí nekas Israer-shuar áiniatsui. ⁷ Núnisan Apraám weeá shuarsha ashí nekas ni shuar áiniatsui. Iis, Yus Apraáman tímiayi “Aya Isak pampañma amee shuarum ártatui.” ⁸ Nujaj páantaiti. Shuar aya Apraam weeá akiinia asa Yus timian wáinkiashtiniati. Antsu Yus tímiyajaj métek akiinia nu nekas Apraám weeá shuar áiniak Yus timian wainkiattawai. ⁹ Kame Yus Apraáman tímia nu júiti: “Tsawant jeamtai jeartiatjame, tura ame nuwem Sara uchin takustatui.” Tu tímiayi.

¹⁰ Nu arantcha, ii weatrj Isaka nuwe Ripikia jimiampramiayi. ¹¹⁻¹³ Nu uchisha akiini-ainiatsaj pékernasha tura yajauchincha túruiniatsaj Yus Ripikian tímiayi: “Iwiajria nu ni patajn umirkattawai.” Ataksha núnisan Yus ni Papirijn chichak “Jakupan aneakun Esaun nakitramjai” tímiayi. Nujajnkia páantaiti. Yus wakerak aya ni enentáijjaj shuaran achikminiati. Nu shuar túrunamu enentáimtusuk túramniati.

¹⁴ Túrianiatkiui “Yus péngerchaiti” ¿titiyajsh? Atsá. ¹⁵ Yus Muisaisan júnis tímiayi:

“Wi wakerajna nunak waitnentrattajai.”

¹⁶ Tuma asamtai shuar ti wakerakuisha tura kakaram takaakuisha aya nujaj Yus waitnentatsui. Antsu aya ní enentáijjaj wakerak waitnentawai. ¹⁷ Ataksha Yus-Papinium tawai “Yus Ejiptu nunka akupniurjn tímiayi

“Ámijjaj ashí nunkanam winia kakarmarun nekaawart tusan uunt akupniun awajsam-jame” tímiayi” tawai.

¹⁸ Tuma asamtai Yus Nii wakera nuna waitnentawai. Túrusha Ejiptu akupniurjn túramia núnisan Nii wakera nú shuaran enentájn kátsuram awajtawai.

¹⁹ Tura “Núnisaitkiunkia ¿urukamtai shuaran Yawámtakia? turutchatapash. Nii wakerakuinkia ¿itirukattajik?” turutchatapash. ²⁰ Warí, aents asam Yusjaj ¿tunaiminkiaitiam? Nuwá piniñkian nájankui núweka “¿urukamtai júnis najatam?” tíminkiait. ²¹ Nuwá wakerakka nu nuwejaj amamkuncha tura yukunnasha nusháa takakmastinian mai najanachminkait.

²² Yajauch shuar ti asutiátin áiniak emesnartinnium wétin áiniawai. Yus nu shuaran asutiá ni kakarmarjn iniaktustaj tayat ti katsuntramiayi. ²³ Tura katsunteak ni anenkrattairjn iniakmasmiayi. Nú arant nuikia in waitnentramak shiir enentáijjaj pénger awajtamkur ni anenkrattairj ti paantchakait. Nekas shiir enentáijjaj pénger ajasat tusa yaunchu iwíartampramiayi. ²⁴ Tura incha, Israer-shuarumijasha Israer-shuarhanumijasha, ni shuarj ajasat tusa achirmakmiayi. ²⁵ Núnisan yaunchu Yúsnan etserin Useas Yus-Papinium tawai:

“Wíshuarchan Wíshuar awajsettajai. Aneachmancha aneamu awajsettajai.

²⁶ Tura Yus “Wíishuarchaitrume” tímia nú shuaran “Nekas iwiaaku Yusa uchiríníuitrume” ukunam títiatui.”

Tu áarmaiti. ²⁷ Antsu Isayas Israer-shuaran páchis tímiayi:

“Israer weeá ti nankaamas untsurj áiniyat penké ishichik uwemprattatui. ²⁸ Kame Yus yajauchin akupkataj timia nuna takamtsuk wárik umiktatui.”

²⁹ Núnisan Isayas ataksha tawai:

“Ashí akupeana nú Yus in waiwentramachkurninikia Sutuma péprusha Kumura péprusha takamtsuk jákarmia núnisan jákaaji.”

Israer-shuar uwempratin chichamjai tujinkiarmaniania nu

³⁰ Wátsek, Israer-shuarcha, Yus iisam ni túramurjijai “pénkeraitji” tu enentáimtumainiachunak, Yuska, Nii enentáimtusam, “pénkeraitrume” tímiayi. ³¹ Antsu Israer-shuarka pénger akupkamun umiktinian wakeruiniayatan tujintiainiakui nujai pénger ajastinian tujinkiarmaniania. ³² ¿Urukamta tujinkiarmaniania? Yúsan enentáimtusuk aya ni pénger túramujai pénger ajastinian enentáimtuiniak tujinkiarmaniania. Kristun enentáimtusinian nakitiainiak shuar kankapen awankekemtuktinia núnisan iniararmai. ³³ Tura kaya tukumkar iniarmanianiak. Nu asantai Yus-Papinium Kristun pachis tímiayi: ““Seun péprunam kayan ikuajai, tawai Yus. Nu kayanam Israer-shuar tukumkar iniarattatui. Antsu Nin shiir enentáimtuinia nú shuar natsaarchchartatui” tawai.” Tu áarmaiti.

10

¹ Yatsuru, Israer-shuar uwemprattatui tusan ti wakerakun Yúsan áujtajai. ² Maa, uwempratinian nékachiatan Yúsan shiir awajatsatniun ti wakeruiniawai. ³ Túmaitiat shuaran Yus pénger awajatsatniun nékachu ásar aya ni pénger túramujain pénger ajastinian wakeruiniawai. Tuma ásar Yus pénger enentáimtamujai pénger ajastinian jeacharai. ⁴ Aya Kristu enentáimtamujai pénger ajastin asantai akupkamun umirkatniujai pénger ajastin ántaiti.

⁵ Akupkamujai pénger ajastinian pachis Muisais tímiayi: “Nuna takamtsuk umirniuka nujai pénger pujustatui.” Tu áarmaiti. ⁶ Antsu Kristun enentáimtus pénger pujustinian pachis shuar juna tímiainiati: “Ti itiuarchata áinis “¿Yaki nayaimpiniam waka Kristun itiarat?” tiirap,” tawai. ⁷ Tura ¿Yaki jakamunam we Kristun iniantkit?” tiirap” tawai. ⁸ Tura junasha tawai: “Yus-Chicham yúpichuch umirkamniati. Aya enentáimjai enentáimtakun wenumjai ujaktiniaime.” Nu Chicham “Yus enentáimtusiniati” tawai. Nu Chicham tuke étsereaj núiti. ⁹ Yus Jesusan jakan iniantkimia nu enentáimtakun tura wenumjai “Jesus winia Úuntruiti” takun uwemprattame. ¹⁰ Kame Kristu enentáimtakmin Yus “pénkeraitme” turamttatui nuyá wenumjai “Jesukristun enentáimtajai” takun uwemprattame.

¹¹ Ataksha Yus-Papinium tawai: “Nin shiir enentáimtuinia nú shuar natsaarchchartatui.”

¹² Tuma asantai ashí shuar, Israertisha Israerchasha, mai metek Yúsan shiir enentáimtuinia nuna Yus ti aneak ashí péngeran súawai. Tura ashí métek ni Úuntrinti. ¹³ Nu arantcha “Ashí shuar Uuntan áujea nu uwemprattawai” yáunchu Kristunun tu áatramuiti. ¹⁴ Tura Kristun enentáimtuiniachusha ¿itiurak Nin áusarat? Tura Kristun nékainiachusha ¿itiurak Nin enentáimtusarat? Tura Yus-Chicham ujaachmasha ¿itiurak nekaawarat? Shuar Yus-Chichaman ujaktiniaiti. ¹⁵ Tura akupkachmasha ¿itiurak Yus-Chichaman ujarakat? Tura shuar Yus-Chichaman etserkataj tusa wéana nuna Yus-Papinium tawai:

“Shuar Yusa Shiir Chichamen etserki weana nu ti shírchakait.”

¹⁶ Tura ashí shuar uwempratin chichaman ántuiniayatan umirrainiatsui. Isayassha yaunchu aak tímiayi:

“Uuntá, ¿yaki ii étserman antukaruit?”

¹⁷ Paantchakait. Kristu túramu ujakam antuktiniaiti. Tura antukar Kristun shiir enentáimtusiniati.

¹⁸ Tura ¿Israer-shuar Yus-Chichaman antukcharu ásaraj Yúsan enentáimtuscharma? Atsá. Warí, Yus-Papí tawai:

“Ashí nunkanam ni chichame antunkaiti.”

¹⁹ Tura “Israer-shuar nu chichaman antukariat ¿paant nekaawarmaashi?” inintrusiniati. Tura nekas nekaawarmai. Tuma asantai Muisais tawai:

“Israer-shuarman nékachu ainiana nuna shiir awajeakun akajkattajrume.”

²⁰ Nuyá Isayas ashamtsuk áarmiai:

“Eatkacharua nu wáitkiarmiayi. Inintruiniatsajin wantintukmiajai.”

²¹ Tura Israer-shuaran áujmatuk tímiayi:

“Tuke iniaitsuk Winin winiarti tusan nu shuaran untsúajai. Tura nakitrurar umirtuiniatsui.”

11

Chíkich Israer-shuarsha uwemprartatui

¹ Tura Israer-shuar Yúsán umiiniachkui ¿Yus nin iniaisaashit? Péñkea. Warí, wí Israer-shuarchakaitaj. Wí Apraámsha tura Pinjamiñ weeá akiiniachukaitaj. ² Yámankamtaiknumiá Yus Israer-shuaran ni shuar arti tusa achikiu asa yamaikia iniaisashtatui.

Ti yaunchu Yúsán etserin Eriás Israer-shuaran pachis Yúsán áujtak tímiayi: ³ “Uuntrú, namañ awaşar Yus sútaincha mash saǵkiarai. Áminiun etserniuncha mash máawarai. Tura wiki juakjai. Tura winiasha “mantuatai” turutainiawai.” Tu áujsamiayi.

⁴ Tura Yus ayak tímiayi “Siati mir (7000) áishmanǵan Israer-shuarnumiá apujtumsaruitjai. Nu shuar ántar-yus Páaran tikishmatrachu áiniawai” tímiayi Yus.

⁵ Núnisan yamaisha Yus ti waitnentainia asa ashí Israer-shuarnumiá ni shuarin achikui. ⁶ Yus ni enentájjijn waitnentak túrait. Nú shuar péñker tura asamtai waitnentatsui. Yus aya péñkernak waitnentakka nuikia waitneñkratchainti.

⁷ Ayu. Nuikia ashí Israer-shuar péñkeran eǵkaru aǵn aya Yus achikmia nú shuar wainkiarmiayi. Antsu ni achikchamuka nuna nañkaamas nekaachmin ajasar kusurua núnin awajnasarmiayi. ⁸ Yus-Chichamsha núnisan tawai: “Yus enentáimchatai enentáin súsarimiayi. Wáinmashtai jijncha tura ántushtai kuishniasha súsarimiayi. Yamaisha núniskete.”

⁹ Tawitcha yaunchu aak tímiayi:

“Tuke tunáa túrin ásar namperan najanainiaksha achinkiar ti asutniáwarti.

¹⁰ Ni enentájn kusurarti tura wainmakcharti. Itiurchat ana nusha, káarak kijinia áintsan, tuke áentskatá.” Tu áarmiayi.

Israer-shuarsha uwempramin áiniawai

¹¹ Wasek, Israer-shuar kayá tukumkar ¿tuke iniaararuk áinia? Atsá. Antsu Israer-shuar umirkachmajaj Israer-shuarsha yamaikia uwempratin jeainiawai. Nujaj Israer-shuarsha nujaj métek uwempratinu enentáimsartatui. ¹² Israer-shuar umirkachmajaj ashí shuar, Israercha ainia nusha, uwempramnia ajasarmiayi. Nuna nañkaamas Israer-shuar atak Yúsán enentáimtuiniak uwemprarmatai nujaj ashí shuar ti penker ajasartatui.

¹³ Israer-shuarchatirmea, atumin uwempratin chichaman etserkatniun Yus akupkamu asan nu takatan ti takaajai. ¹⁴ Nuna túrakun átum uwemprarmena núnisan niisha, wíshuar ainia nu, nuna ísar uwemprarat tusan wakerajai. ¹⁵ Kame Israer-shuaran iniaisamujaj ashí shuar Yusjaj shiir nawamnaikiarmatainǵkia nuikia atak nin achikmajaj jakamunmayá nantaktinia áintsan ti shiir átatui. ¹⁶ Emka apatuk ana nu Yus súakur yumínsamuitkuñka nuikia ashí apatkunam Yus yumínsamuiti. Núnisan numí kanǵkapé péñkeraitkuñka numi takamsuk péñkeraiti.

¹⁷ Yuska chíkich chíkich Israer-shuaran, numí kanawen tsupik ajapniua áinis, iniaisamiayi. Tura nuyá atumin niisháa numinmayá árumniñ nu numiniám anujtamkamarme. Nujaj péñker numijaj tsaninkrum nu kakarmajaj iwiaakrume. ¹⁸ Tura kanawé tsupikmajaj nañkaamantu enentáimtumasaip. Warí, ame kakarmarmijaj numi wajatsui antsu ni kakarmarjjaj iwiaakme.

¹⁹ “Túrasha wí anujnaktiniam kanawen tsupikchamka” tíchainmeash. ²⁰ Nekasaiti, túmaitiat niisha Yúsán enentáimtuiniachu ásar tsupinkiarimiayi. Atumsha aya Yus nekas enentáimta asam anujnakuitme. Tuma asamtai nañkaamantu enentáimtumatsuk aya anearta. ²¹ Yus nekas kanawé péñkercha túrawarun tsupikkia páchitsuk amincha tsupirmakchamniakait. ²² Iista, Yus atumjaj ti tsáñkaiti tura Israer-shuar umichua nuna ti wari asutiaiti. Tura péñker wáinmankata. Yus tuke nekas enentáimtachkurminkia atumniasha páchitsuk tsupirmaktatrum. ²³ Núnisan Israer-shuar ataksha Yúsán enentáimtuiniakui páchitsuk ataksha anujkachminkait. Nekas túrattawai. ²⁴ Túram Israer-shuarsha asam niisháa numinmayá tsupikiar penké numiniám anujnakuitrum. Nuna tura asa nekas ni kanawé tsupikia ajapamun páchitsuk atak anujkamniaiti.

Israer-shuarsha uwempratin áiniawai

²⁵ Yatsurú, nañkaamantu enentáimtumarajrum tusan yaunchu nekaachman ujaajrume. Júi: Israer-shuarnumiáñka chíkich chíkich Yúsán nekas enentáimtustinian nakitiainiawai. Tura aya Israer-shuarchasha Yus-shuar ajasarat tusa túrunamiayi. ²⁶ Tura Israer-shuarchasha ti untsurj Yus-shuar ajasarmatai nuyá Israer-shuarsha ashí uwemprartatui. Tuma asamtai Yus-Papí tawai:

“Seúnnumiá Uwemtikkiartin tátatui. Israernumiá tunaan asakátrattawai.

²⁷ Jj Chichamnasha nijjaj najanattajai: ni tunaarin asakturtatjai.”

²⁸ Uwempratin chicham atumsha nekaatarum tusa Israer-shuaran Yus ni nemasrj awajsaruiti. Tura yaunchu ni weatrin achikiu asa nincha tuke anenawai. ²⁹ Kame Yus

amáa nuna ataksha ataqtusui. Shuáran achiksha atak iniaiyatsui. ³⁰ Átumka yaunchu Yus umirchayarme. Tura yamaikia Israer-shuar umirainiachkuui Yus atumin waitnentrarmarme. ³¹ Núnisan nii yamaikia Yúsan umirainiatsui. Tura atumin waitnentrampromarum núnisan nincha waitnentrattawai. ³² Nujaj ashí métek sumamtiak métek waitnentrar uwentkrattawai.

³³ Maa, Yus imiá shiirchakait. Tí nekachukait. Ni túramu penké nekaachminiaitji.

³⁴ “Uunt Yus enentáimian zyaki neka? Tura zyá Nin unuiniaruut. ³⁵ Yaki Nin péñkeran susa shiira nujaj yapajniuit?” Tu áarmaiti.

³⁶ Ashí najanamu ainia nu Yus najanamu ániak Niiniu ániawai. Tura Nin shiir awajsatniun najanawarma ániawai. Yus tuke iniaitsuk shiir awájnástí. Núnisan atí.

12

Yusaj surumaktarum

¹ Atumsha Yus-shuar árumna nu, atumek Yusaj surumaktarum. Yus ti anenma asakrumin nuna seajrume. Yaunchu Israer-shuar ni waakarjín maa Yúsan suu ármiai. Atumsha núnisrumek iwiaaku árumna nuññ Nii túrutataj taku túrutati tusarum tuke enentáijjaj Yusaj tsanċkamaktarum. Yusaj íisam tí shiir atí tusarum túratarum. Nu túrakrumka pátatkechu antsu ti nekas enentáimjaj Yus shiir awajin átratume.

² Chíkich shuar aya jú nuñkanmaya ana nuna enentáimtusar wekainiawai. Tura átumka nu túrawairap. Antsu Yus winia enentáimmarun yapajtiurat tusarum tsanċkatkarum. Nu túrakrumka Yus wakera nu nekaattarme. Ni wakeramusha yajauchichuui antsu imiá nekas péñkeraiti.

³ Yus winia waitnentrak akatar akuptuku asamtai júna tájarme. Atumek wíkitiajtai tu enentáimtumatsuk jeamna nujaj métek enentáimtumasta. Yus enentáimta asakmin takastinian suramsana nujaj apatkam nekaamata. ⁴ Ii ayashí chikichkiitiat ii muchitmarj untsurjinti. Tura métekrak muchitiániatsui. ⁵ Núnisrik iisha, Yus-shuarti, ayashí muchitmarjya áintsarik untsurjitiatar chikichik ayashťinia áintsar takaaji. Nusha Kristujaj tsaninċkiu asar áitkiamuitji. Túramu asar nuamtak atsumnaiyaji.

⁶ Ii túratniun Yus nusháa nusháa súramji Nii wakera nujaj métek. Wats, Yus ámin suramsamna nu túratniuitme. Yus ni chíchamen etserkatniun suramsaitkiuñkia Yus enentáimtakum unuimiamam nujaj métek etserkata. ⁷ Chíkich shuar yáintinian Yus suramsaitkiuñkia nekas enentáimjaj yáintá. Unuiniartiniatkiumka yawetsuk unuiniarta. ⁸ Chíkich shuar ikiakártiniatkiumka nekas péñker ikiakárta. Súsatniuitkiumka shiir enentáijjaj ementutsuk súarta. Shuaran wáinin atí tusa Yus apujtamaitkiuñkia ti enentáimsam túratá. Tura shuar itirchat pujuinia nu yáintinian Yus suramsaitkiuñkia shiir enentáimsam túratá.

Yus-shuar túratniua nu

⁹ Nekas enentáijjaj mai anenai ajatarum. Yajauch nakitrarum péñkera nu túratarum. ¹⁰ Nuamtak yachí asarum núnisrum mai anenai ajatarum. Chíkich wijjaj nanċkaamas úuntaiti tu enentáimtunastarum.

¹¹ Nakittsuk kakaram ajasrum ashí enentáimjaj ii Uuntrj wakera nu túratarum.

¹² Ukunam Yus tsanċkatramkattajnia nu enentáimtusum warastarum. Wáitiakrumsha katsuntratarum. Tuke iniaitsuk ashí túrunamujaj Yus áusjatarum.

¹³ Yus-shuar atsumainia nujaj yáintarum. Írarsha péñker itiaatarum. ¹⁴ Yajauch awajtamainia nu shiir awajsatarum. Yus yajauch yumintsuk nu shuaran péñker túrawarat tusarum seattiarum.

¹⁵ Warainia nujaj warastarum. Kúntuts pujuinia nujajsha úuttiarum.

¹⁶ Chikichik enentáijjaj métekrak shiir enentáimtuaitiarum. Nanċkaamantu enentáimtusairap. Antsu péjchach ajastarum. “Ti nekajai” tu enentáimtusairap.

¹⁷ Shuar ámin yajauch awajtamkuisha nincha yapajkiataj tu enentáimsáip. Aents íisam péñker áminia nu amesha tuke túratá. ¹⁸ Ame jeamna nujaj ashí shuarjaj nawamnaikiam wekasata. ¹⁹ Yuska ni Papirjín júna áamtikramiayi: “Wíitjai tunaan asutiátniun. Wisha yapajkiattajai” tawai Uunt Yus. Tuma asamtai yatsuru, kajertamkuisha atumsha yapajkiarap. Antsu yajauch awajtamkana nuna Yus íistí. Yus asutiáti. ²⁰ Tura nu arantcha tawai: “Ame nemasrum tsukamakuisha ayurata. Kitiamakuiisha umartin susata. Nu túrakum péñker ajachua nu iniaitsartatme.” ²¹ Yajauch nupettamkajñ. Antsu péñker túrakum yajauchia nu nupetkata.

13

¹ Akupniunka ashí shuar umirkatniuiti. Akupniuka Yus apujsamuiti. Yus apuj-sachma akupin atsawai. ² Tuma asamtai shuar akupniun umirtsuna nu, Yus apu-jsamun umireachu asa nekas asutniátniuiti. ³ Kame akupniuka péñker shuar sapijmi-akarar tusar apuj-sachma ániawai. Antsu yajauch shuar ashamkarar tusar apuj-samu ániawai. Nii ashamsuk pujustin wakerakmeke péñker túratá. Túrakminkia akupin shiir enentáimturmartatui. ⁴ Yainmakat tusa Yus apuj-samuiti. Antsu yajauch túrakmeke akupin nekas ashamkatniuitme. Warí, Yus ántar apuj-sachmaiti. Tunáa shuaran asutiátniun Yus apuj-saiti. ⁵ Nu asamtai akupin tuke umirkatniuiti. Aya asutiáwain tusar umirkashtini-aitji. Antsu shiir enentáijjaj wekasatin umirkatniuiti. ⁶ Tuma asamtai núnisañ akupniun kuit súsatniua nu páchitsuk susatarum. Nu takatan pujursarat tusa Yus apuj-saruiti.

⁷ Ashí túratniua nu túratarum. Akiktiniaitkiunka páchitsuk akikta. Akupniusha uuntcha ashí núnisañ írúnna nusha shiir enentáimtkratarum. ⁸ Kuitjaj tumashrintin airap. Antsu mai anenai tuke ajatarum. Chikich shuar aneakum nin péñker túratame. Túram ashí akup-kamu páchitsuk umirkattame. ⁹ Akupkamusha tawai: “Tsanirmawaip, mankartuawaip, kasamkaip, chikich shuar tsanumpurraip, chikichna wakerutkaip” tawai. Tura nusha ashí chikichik chichamjain tóminiaiti: “Ame ayashim aneam núnismek ashí shuar aneata.” ¹⁰ Shuar chikich shuaran aneakka yajauch awaj-sashtatui. Tuma asa akupkamun ti shiir umirkattawai.

¹¹ Ii yámankamtaik Yus nekas enentáimtusmiaj nuñ “Ii ti shiir ajasar tuke uwempratin ukunam átatui” tu enentáimprachmashiaj¹. Antsu yamaikia nu tsawant yuntumsamtaí ashí túrajnia nuñaj shintiarar enentáimpratniuitji. ¹² Tuke káshiiat tsawaqtemprai. Ii Uuntrj Kristu jú tunáa nuñkanam tátin ishichik ajasai. Tuma asamtai ii túrutairj kiritniua núnisañ yajauch túrutai ana nuka túrutsuk tsáapniunium péñker wekasatin kakaram ajastai. ¹³ Túratniua nuñaj métek wekasatai. Tsawaj wekaakur kiritniunam yumkar tunáa túrutai túrashai. Nampetsuk, yajauch warartsuk, tsanirmatsuk, jianaitsuk, tura kajernaitsuk aya péñker túratái. ¹⁴ Ii Uuntrj Jesukristu túramia núnisrik túratái. Tura ii ayashí wakeramu umikiat tusar tsañkatkashtiniaitji.

14

Ame yatum kakantraip

¹ Shuar Yúsán ishichik enentáimtana nu itiaatarum tura kakantrairap. ² Iis, chikichka ashí yuamniaiti tuiniawai. Tura chikichcha, Yúsán awajirar, naman yúashtiniiaiti tuiniawai. ³ Tura ashí yúa nuka namanken yúatsna nuna wishikrashtiniiaiti. Núnisañ ashí yucha nu ashí yuun kakantrashtiniiaiti. Warí, núnaka Yus ni shuarñ awaj-sachukait. ⁴ ¿Ámeke timiataash péñkeraitiam chikich shuar kakantiniá? Antsu ni uuntrñ ni péñker túramuncha tura yajauch túramuncha íschatniukait. Enentáimpratá. Yus kakaram asa nin péñker awaj-samniaiti.

⁵ Chikichcha enentáimpratai. Chikich shuar tsawantan achikiar “Jú tsawantaj Yus nankaamas shiir awaj-satniuiti” tuiniawai. Chikichcha ashí tsawantan métek enentáimtuiniawai. Ayu, tura ni enentáimtamun nekas paant nekaatniuiti. ⁶ Chikichik tsawantan enentáimtakka Yusan shiir awaj-satniun túrawai. Tura ashí métekrak enentáimtakka Yúsán shiir awaj-sataj tusa túrawai. Yurumkajajsha ashí yúana nu Yúsán yumñkias shiir awaj-sataj tusa túrawai. Núnisañ ashí yúatsna nusha Yúsán yumñkias shiir awaj-sataj tusa túrawai.

⁷ Iikka ii enentáijjain iwiaaktsuji. Tura jáakrishá ii enentáijjain jaatsji. ⁸ Kame iwiaaku pujakrishá ii Uuntrj Kristu shiir awaj-satai tusar pujurji. Tura jáakrishá tuke Níiniuitji. Nu asamtai iwiaaku pujakrishá tura jakarsha tuke Kíristunuitji. ⁹ Kame jakancha iwiaakuncha ashí ni Uuntrj ajastaj tusa Kristu jaka nantakmiayi.

¹⁰ Tura ¿urukamtaí ame yatum “yajauchiiti” tame. Urukamtaí nakitiam? Warí, ashí iikia ii túramu paant awajnasat tusar Kristuj naka wajastatji. ¹¹ Nu asamtai Yus-Papiniun tawai: “Wí nekas iwiaaku pujá asan ashí Wini tikishmatrurartatui. Tura ashí “Yus asa tuke péñker túriniaiti” túrutiatatui” tawai.” Tu áarmaiti.

¹² Tuma asamtai iisha chikichik chikichik ashí ii túramu Yus paant ujakartatji.

Ame yatum tunaanum ajuarai

¹³ Nu asamtai “yajauch túriniaiti” tu áujmatnaisashtiniiaiti. Antsu ii yachj tunaanum ajuarchatin ti enentáimturiniiaiti. ¹⁴ Jesukristu jintintiamu asan juna nékajai: Yus najana-muka péñkerchaka atsawai. Ashí túramniaitjai. Túrashá shuar chichaak “Nu túrushtainti” táyat nuna túrakka niijjaj tunaiti. ¹⁵ Tuma asamtai shuar chichartamuk “Nu yúakminkia Yusjaj péñkerchaiti” taj, ame yúakminkia nu shuar itiurchat enentáimsashtatua. Tura niisha tunaanum iniaar menkakamniaiti. Nu shuar aneakum túratsme. Enentáimpratá. Aya

ame yuamna nujaj ame yatsum Kristu jarukmia nu emenkákaip. ¹⁶ Tura “yuamnaitjai” táyatam wi yúaku yajauch áujmatrusaraj tusam iniaisata. ¹⁷ Kame Yus umirkatin yurumátnuujajsha umartinajisha enentáimtuschatniuiti. Antsu Yusa Wakanújjaj shiir wekasar Yusjaj tura shuaraj nawamnaikiar ti pénger wekasatniuiti. ¹⁸ Ashí shuar Krístun núnis umireakui Yussa tura chíkich shuarsha pénger enentáimtuiniawai.

¹⁹ Nu asantai tuke shiir pujusmia nu túrakur Yusjaj kakaram ajastin yáiniaikai. ²⁰ Yus iisam ashí yuamnaitjai. Antsu ame yuamna nujaj chíkich shuar tunaanum ajuartin tunaiti. Tuma asantai ame yuam nujaj Yus nu shuara enentáin takarsamu emesraip. ²¹ Nu túrashtin nuikia naman yúashtincha karia umarchatniusha péngeraiti. Warí, túrushtajijaj ame yatsum itirchat enentáimtikram tunaanum ajuarchatapash. Tura nu shuar Yúsán nekas enentáimtuschania ajastatui. Nuka atsutí. ²² Ame Yus nekas enentáimtakum ashí túramniaitkiunka Yúsak wararsata. Shuar Yus ímmianum shiir enentáijijaj mash túramnia nu nekas shíraití. ²³ Tura araantushim yua nuka Yúsán shiir enentáimtusuk yua asa sumamattawai. Kame ashí Yus shiir enentáimtusuk túramu tunaiti.

15

Chíkich shuar wakeramuk enentáimtustiniati

¹ Yusjaj katsuaru ájinia nu iik enentáimtumatsuk kakarmachu ainia nu yáintiniatjai. ² Chíkich shuar wakeramu enentáimtustiniatjai. Tura Yusjaj nu nankaamas shiir wekasatniun yáinminiatkiui túratniuiti. ³ Krístusha ní wakeramun túrachmiayi. Antsu Yus-Chicham tana núnisan chíkichnan enentáimtusmiayi. Nu asantai Yúsán umirin asa wáitiak timia nu áarmaiti: “Ámin katsekramainiak Winiaja katsekrukarmiayi.” ⁴ Núnisan ashí yaunchu Yus-Papiniun aarma in jintinratmatniun áararmiayi. Nujaj atsantamkurin shiir wáinkiatjajnia nuka katsuntrar nákastatjai. ⁵ Yus atsantamar katsuntratniun jintinratmaji. Tuma asa Jesukrístu túramia áinsan atumniaasha chíkichik enentáijijaj enentáimtusaisar pujustinian yáinmakartí. ⁶ Nujaj ashí métekrak Yus shiir awajsattarme. Niisha ii Uuntrí Jesukrístuncha Aparínti.

Israer-shuarchanmasha Uwempratin Chicham etserkamu

⁷ Tuma asantai chíkich shuarjajsha shiir awajnisatarum. Kristu núnisan Yúsán shiir awajsat tusa incha shiir awajtamsamajai. ⁸ Juna tajai. Kristu Israer-shuarchan yáintaj tusa támiayi. Tura Yus ti yaunchu nuna weatrin “túrataj” timia nu uminkiat tusa támiayi. Nujaj Yus timia nuna umikmia nu nekaamniaiti. ⁹ Tura nu arantcha Israer-shuarchasha Yus waitnentratin áarmatai nin shiir awajsarat tusa támiayi. Tura Yus-Papisha tawai: “Ámin kantamprakun ashí shuarnum shiir awajsattajme.”

¹⁰ Tura nu arantcha tawai: “Ashí nunkanmaja shuartiram ashí Israer-shuar Yúsna ainia nujaj warastarum.”

¹¹ Tura ataksha tawai: “Ashí aents ii Úuntrin shiir awajsarti. Tura ashí shuarsha Nin “Ti úuntaiti” tiarti” tawai.

¹² Isayassha áarmiayi: “Tawitia aparí Isai weatriya akupin akiinkiatstawai. Niisha ashí nunkan akupeakui ashí shuar niiniak shiir enentáimtusartatui.” Tu áarmaiti.

¹³ Yus ashí shíran suramsattakin nu shiir náka. Tuma asantai Nii nekas enentáimtakrumin warasa shiir pujustinian yamá suramsati. Nuyá Yusa Wakaní kakarmaríjjaj ti shiir enentáijijaj katsuntrarum, nu nákastarum.

¹⁴ Yatsurú, atumsha anenainaitrume. Tura ashí Yusna nekaarum nuamtak chicharnaikiatin nékarme. ¹⁵ Tuma ajn kajinmatkijirum tusan ataksha ti paant áakun jú enentáimtakeajrume. Yus winia waitnentrak ní Chichamen etserkat tusa akuptakui nuna áatjarne. ¹⁶ Kame Jesukrístu Israer-shuarchanum Yusa shiir chichamen etserkat tusa akuptakui. Nuna túrakun Israer-shuarchan Yusa Wakanújjaj shiir awajsamu áarmatai Yusaj juinijajai. Tura Yussa shiir enentáijijaj itianiawai.

¹⁷ Jesukrístu yaintiu asantai Yusna takarsamaj nuna wararsamniaitjai. ¹⁸ Tura chíkich shuarjaj Kristu túramun pachischattajai. Aya wi chichasmajajsha tura wi túramujajsha Israer-shuarchan Kristu umimtikiamia nunak áujmatsattajai. ¹⁹ Yusa Shiir Wakaní kakarmaríjjaj aents tujintiamun túran ashí shuarchan Jerusarén péprunam nanakan etserkin Iririkiu nunkanam ejakmajai. Kristu-chichaman ashí nu nunkanam etserkaitjai. ²⁰ Nuna túrakun chíkich shuar etserkachmanum Krístunun ántichu áiniamunam Uwempratin Chichaman etserkaitjai. Nujaj chíkich takasmanum takarsachuitjai. ²¹ Yus-Papisha núnisan tawai:

“Chichaman penké antukcharuka nekaawartatui. Nin áujmatman anturkacharusha unimiarartatui.”

²² Nuna pujuru asan ítjarum táyatan íchmajrume. ²³ Tura yamaikia juyá takatrun umikian tura yáunchusha tuke ítjarum tiniu asan ²⁴ Ispania nukanam wéakun ístatjarne. Tura atumjín shiir irasan Ispanianam wéakui atumsha yáintkiarum shiir akuptukchat-tarpash. ²⁵ Tura yamaikia kuitjaj Jerusarénumiá Yus-shuaran yáintjaj tusan wéajaj. ²⁶ Masetúnianmaya shuarsha tura Akayanmaya shuarsha kuitian irurar Jerusarénumiá Yus-shuaran atsumainia nuna akuptuktai tuiniawai. ²⁷ Ti wakeruiniak túrawarmiayi. Nu nekas túrashtinkiait. Israer-shuarnumiá Yus-Chichaman antukaru ásar yamaikia ni kuitrijaj páchitsuk yáinchatniukait. ²⁸ Tuma asamtai jú kuitian súsan umiran nuikia Ispanianam wéakun íktiatjarne. ²⁹ Tura nuj winiakun Kristu Shiir Chichamen nuaj shiir yáintjarum tusan ejeettitjarume.

³⁰ Yatsurú, ii Uuntrj Jesukristunu asarum tura ni Wakanj pujurtamkurmin anenia asarum Yus áujtursatarum. Núnisrum wijiáj métek Yusna takastin yaintkiattarme. ³¹ Jutia nunkanmaya Israer-shuarnumiá uwentikrat tusarum Yus áujtursatarum. Tura jú kuitian júajna nunasha Jerusarénumiá Yus-shuar shiir achikiartí tusarum Yus áujtursatarum. ³² Nujaj, Yus wakerakuinúa, péñker wampú enentáimsan warasan íttitjarume. ³³ Yus ti shiir pujustinian súana nu atumjaj tsanin pujurtamsati. Núnisañ atí.

16

Amikmaamun akupramiania nu

¹ Ii umai Jépeka Senkrea péprunmaya Yus-shuaran yáiniati. Ti péñker Yus-shuaraiti. ² Kristu náarijn shiir wáinkiatarum. Nuamtak yachí wáinkiatniua núnisrum wáinkiatarum. Niisha chikichnasha tura winiasha ti péñker wáitin asamtai atumsha ni atsumamusha yáintarum.

³ Pirisirasha Akirasha wijiáj métek Jesukristunun takasaru ásar amikmaatainijaj. ⁴ Niisha winia uwentikrurtai tusar jániñkiarmiayi. Tuma asamtai yumiñkiniyaj. Tura aya wikichu antsu ashí Israer-shuarchanumiá Yus-shuar áinia nusha yumiñkiniawai. ⁵ Núnisañ ashí Yus-shuar Pirisiran tura Akira jeen irunainia nusha amikmaatarum. Tura winia aneamu amikiur Epenetu amikmaatruatarum. Niisha Akaya nunkanam emka Kástun nekas enentáimtusmiayi. ⁶ Marisha, atumjaj ti takasua nu amikmaatruatarum. ⁷ Tura wí shuarsha Antrunikiusha Júniassha amikmaatruatarum. Niisha wijiáj sepunam pujusar-mai. Wijiáj emka Kástun shiir enentáimtusar chikich akatramujaj nankaamas takasaru áiniawai.

⁸ Ámpriassha Kástunam winia aneamu amikiur asamtai amikmaatruatarum. ⁹ Urpanujajsha Jesukristu katatrj tsaninñiuiti. Niisha tura aneamu Estakishsha amikmaatruatarum. ¹⁰ Apirishsha amikmaatruatarum. Niisha Kástun ti shiir enentáimtam ti páantaiti. Núnisañ Aristúpuru shuarsha amikmaatruatarum. ¹¹ Wíshuar Erutiúnsha tura Narsisu shuarsha Kristu shuarj ásar matai amikmaatruawarta. ¹² Tripiniasha tura Tripiusasha Yúsnan takainia ásar matai amikmaatruatarum. Núnisañ ii umai Pírstitia Yúsnan ti takasu asamtai amikmaatruatarum. ¹³ Rúpusha, nusha ti péñker Yus-shuar, tura nukurjsha amikmaatruatarum. Niisha wijiáj nekas winia nukurua núnisaiti. ¹⁴ Asinikritiusha, Pirikiuntisha, Érmassha, Patrupalasha, Érmessha, tura ashí niijijaj Yús-shuar ainia nu amikmaatruatarum. ¹⁵ Núnisañ Jirurukusha, Júriasha, Néreusha, ni umajijajsha, Urimpiassha, tura ashí Yus-shuar niijijaj pujuinia nu amikmaatruatarum.

¹⁶ Nuámtaksha shiir aujnaisatarum. Ashí juyá Kristu shuarj amikmaatmainiawai. ¹⁷ Yatsurú, shuar nusháa enentáimtuiniak Yus-shuaran akanainiak itiurchat awajenawai. Nu shuar wáinkiarum kanaktiarum. Ni yajauch túramu átum péñker takastin unuimiar-mena núnischaiti. ¹⁸ Nu shuar ii Uuntrj Jesukristunun takainiatu. Antsu ni wakeramun uminiawai. Tura ti shiir chichasar nékachun anañkenawai. ¹⁹ Átum umirma ashí shuar nékainiakur ti waraaji. Yajauch túrutsuk aya péñker túratin enentáimsarum pujustarum. ²⁰ Yus tuke shiir pujustinian amawa nu ti wárik uunt iwianchin nupetturmaktatui. Tura ii Uuntrj Jesukristu shiir yainmakarti.

²¹ Timiutéusha, wijiáj takau, amikmaatmarme. Núnisañ Rúsiusha, Jasunsha, Susipatresha, mash wíshuar ainia nu amikmaatmarme. ²² Wí, Tersiu asan, Papru chichamen ju pap-inium áateakun Kristu náarijn amikmaajrume.

²³ Káyusha amikmaatmarme. Ni jeen pujaji tura jujsha ashí Yus-shuar irunainiawai. Erastusha ju pepru kuítrjn wáinniuiti. Niisha ii yachí Kuártujaj amikmaatmarme.

²⁴ Ii Uuntrj Jesukristu ti shiir yainmakarti. Núnisañ atí.

Yus shiir awajsatai

²⁵ Watsek, Yus shiir awajsatai. Niñki nekas kakaram awajtamsamniati. Wí Uwempratín Chichannum Jesukristunun étsereaj nuajj iikiantamp Prattawai. Nu chicham

yámankamtaiknumiá nekaachmanak Yus yamaikia paant awajsaiti. ²⁶ Yaunchu Yúsnan etserin ni áarmanum nu chichaman etserkarmiayi. Tura yamaikia Yus wakerak ashí nunkanmaya shuar Nii enentáimtusar umirkarat tusa nu Chichaman yamaikia paant awajsaiti. Yus amuutsuk tuke pjuwiti.

²⁷ Yúsak Niñki ti neka asa tura Jesukristu ti penker tura asamtai Niñki tuke shiir awájnástí. Nuke atí.

Papru KURINTIUNMAYA SHUARAN Emka papin aar akuptukma

Kurintiumaya Yus-shuaran Papru áatramiania nu

¹ Wi Pápruitjai, Jesukristu akatramu. Yus nuna wakerak, ni akatramurj atí tusa anaitiukmai. Wi, ii yachí Sústinisjai, ju papí akupeaji. ² Ashí Yus-shuar Kurintiu péprunam iruntrumna nu ju papí akupeaji. Átumka Jesukristujai tsanin'kiu asarum Yusna árume. Atumsha tura ashí shuar Jesukristun enentáimtuiniana nunasha Yus ti penker awajsatniun wakerawai. Nincha incha Jesukristu mai metek Úuntrinti. ³ Yus ii Aparj tura ii Úuntri Jesukristusha waitnentramainia ásar yainmakarti imiatkinchanum tuke shiir pujustinian.

Ii Uuntri Jesukristujai tsanin'kia pujustin

⁴ Yusan áujkun yumin'san atumin shiir enentáimtajrume. Jesukristujai tsanin'kia pu-jakrumin Yus shiir enentáimturmawai. ⁵ Jesukristujai tsanin'kia pu-jakrumin Yus atumin ti yáinmawai ashí pénger ana nu enentáimtakrum tuke shiir chichastinian. ⁶ Kristu juna túramniaiti tichamkaj'. Ashí yamaikia uminkiyai. ⁷ Tuma asamtai ashí Yus súramma nu atumatsrume. Nu túrakrum ii Uuntri Jesukristu tatin tuke nákarne. ⁸ Tura iniaitsuk tuke emettamattawai ii Uuntri Jesukristu támatai atumi tunaarjin pachischatin. ⁹ Jesukristu ii Uuntrinti. Niijjai tsanin'kia pujusúk tusa Yus achirmakmarme. Tura Nii tana nuna tuke umiktatui.

Yus-shuar akantramu

¹⁰ Yatsuru, ii Uuntri Jesukristu naari pachisan, seajrume métek enentáimpratarum tusan. Nísháa nísháa enentáimprairap antsu chikichik enentáijjai métek enentáimsa pujustarum. ¹¹ Átum yajauch chicharnaisarum pujarme. Kruí shuarj tu ujatkmatai tájarme. ¹² Kame júnis awai: Chíkich "Wi Páprunuitjai" tuiniawai. Chíkich "Apurusnaitjai" tuiniawai. Chikichcha "Wi Pitrunuitjai" tuiniawai. Chikichcha "Wi Kristu-shuaritjai" tuiniawai. ¹³ ¿Wari, nuinkia, Kristu akantramukait. Páprusha krúsnum jarutramkamaashi. Tura Papru naari pachisa imiaimiukaitrum? ¹⁴ Atumin untsurj imiaichu asa shiir enentáimjai. Aya Krispu Káyujai jímíarchiniak imiaimjai. ¹⁵ Nújain'kia shuar "Papru náarjin imiaimiuitjai" tichamniaiti. ¹⁶ Maa, nekas, Estepanasa shuarincha imiaimjai tura chíkich wi imiaimiun nékatsjai. ¹⁷ Kristu imiakrattia tusa akuptukchamai antsu uwempratin chichaman etserkat tusa akuptukmai. Tura ti neka chichainia núnisan chichaatsjai shuar wi shiir chichaamun enentáimprarañ tusan. Antsu yúpichuch chichaajai Kristu krúsnum jakamuk paant atí tusan.

Kristu Yusa kakarmaríncha ni nekatairíncha paant iniakmasmiania nu

¹⁸ Kristu krúsnum jarutramkamu étsereaji. Antsu Yus-shuarchaka menkaakatniunam wéana nu, "ántrai ti chicham" tu enentáimainiawai. Antsu Yus-shuarti, uwempratniunam wéakur, "nu chichamjai Yusa kakarmari takusminiaiti" tu enentáimji. ¹⁹ Núnisañ tawai Yus-Chicham yaunchu aarma: "Ju nunkanmayan ti neka áiniana nuna chichamen emesrattajai; ti unuimiararu áinianak ántar awajsatatai" tawai Yus ni chichamen. ²⁰ Iis, ju nunkanam uwempratin chicham íruntuk. Nu chichaman ashí mash Yus ántar awajsaíti. Ti neka áiniana nusha, jintinkiertin áiniana nusha, ashí ju nunkanmayan unuimiar ti chichastinian nékana nusha, nu shuar mash "wi tájana nujai pénger pujusam uwempratame" tu enentáimainiawai. Tura núnaka mash Yus penké ántar najanaiti. ²¹ Aya ni nékamujai aents Yúsán nekaacharmiayi. Núnisañ atí tusa Yus túramiyai, timiá neka asa. Antsu ashí aentsun Yus ni chichamejai uwemtikratniun wakerimiayi. Chíkich "ántrai" tuiniana nu chichamjain'k' Yus Nin enentáimtuinia núnaka uwemtikratniun wakerak túramiyai. ²² Israer-shuar "aentsti túrachminian iniakmasta, wi nekaataj" tuiniawai. Kriaku shuarsha "ti enentáimsam, mash pénger jíkim turuttia wisha métek enentáimprataj" tuiniawai. ²³ Iikia antsu Kristu krúsnum jarutramkamuk étsereaji. Israer-shuarsha "ju chicham natsantaiti" tu enentáimainiawai. Israer-shuarchasha "ju chicham ánttrai" tu enentáimainiawai. ²⁴ Tura Yus achikiarma, Niiniu ajasarat tusa, Israer-shuarsha Israer-shuarchasha mai metek "Kristu krúsnum jarutramak Yusa kakarmaríncha ni nekatairíncha paant iniakmasmiayi" tu enentáimji. ²⁵ "Yusa nekatairj ánttrai" tuiniawai aents, túrasha imiá nekas péngeraiti. "Yusa kakarmarjsha jeatsui" tuiniawai aents, túrasha imiá nekas kakarmaiti. ²⁶ Enentáimtumastarum yatsuru. Yus achirmakmarme Niiniu ajastinian, tura ju nunkanam ti neka áinia núnisañ atumujin ti neka íruntusui. Ti akupniusha ti nan'kaamakusha

atumin íruntui. ²⁷ Antsu ju nuŋkanam nékachua núnis ana nuna Yus achikiuiti ti neka nuna iniatsáartinian. Tura ju nuŋkanam kakarmachua núnis ana nunasha Yus achikiuiti kakarma nuna iniatsáartinian. ²⁸ Péejchachincha, nakitsamuncha, ánrachincha, Yus achikiuiti ashí naŋkaamantu írunka nuna amuktinian. ²⁹ Nújajŋkia chikichkisha Yusjaj waantu enentáimprachminiati. ³⁰ Tura Yus atumin Krístujaj tsaniŋ apujtamsaiti. Tura Kristu enentáimtusar Yus nekas nekataiŋkia nekaattaji. Kristu enentáimtakrin Yus shiir enentáimturmaj, péŋker awajtamji, tura uwemtikramji. ³¹ Yus-Papinium yaunchu aarma núnikete: “Shuar naŋkaamantu enentáimprataj tákuŋka ii Uuntrj Yus túramun wararsati.”

2

Kristu krúsnum jakamu etserkamu

¹ Wisha, yatsuru, atumin jeamaj nuj Yus-chichaman ti neka chichainia áintsan tura íwasanak ujakchamajrume. ² Tura atumjaj pujakun aya chikichkiniak nekaatniun enentáimpramjai. Júiti: Jesukrístu, tura Jesukrístu krúsnum jakamu. ³ Né kayatan kakarmachua sapíjmiashím jearmiajrume. ⁴ Yus-Chichaman ujaakun ti neka chichainia áintsan nupetkataj tu enentáimturhamajrume. Antsu Yusa kakarmaríncha tura ni Wakaníncha paant iniakmasan Yus-Chichaman ujakmajrume. ⁵ Aentsu nekatairjijaj Yus enentáimtuschatniuiti antsu Yusa kakarmarj paant nekaarum Yus enentáimtustiniaitrume. Nuní asantai Yus-Chichaman tu ujakmajrume.

Aya Yusa Wakaníjaj Yúsna nekaamniati

⁶ Túmaitiat Yusa nekatairj átsuk. Yúsna unuimiararujaj Yusa nekatairjín áujmatji. Tura Yusa nekatairjínkia aentsu nekatairjín áintsachuiti. Ju nuŋkanam akupin ainia nuna nekatairjínchuiti Yúsna. Ju nuŋkanam akupniuka ishichik pujus amuukachartatuak. ⁷ Yaunchu ju nuŋka atsajín Yus in uwemtikrampratniun enentáimpramiayi ti shiir pujusarmi tusa. Ju Yusa enentáimmiari yaunchu nekanachmiayi, tura yamaikia nu nekaar áujmatji. ⁸ Ju nuŋkanam akupniuka nuna penké nekaacharmiayi. Né kainiakka ii Uuntrj timiá shiira nuna, krúsnum máacharu ayaj. ⁹ Yaunchu Yus-Papinium árchamukait: “Shuar Yúsna aneana nuna Yus ti shiiran susattawai. Susattana nuka timiá péŋker asantai shuar wáinkichman, antukchamuncha, enentáimtachmancha Yus susattawai” tu áarmaiti. ¹⁰ Tura Yusa Wakaníj ii enentáim pujuatamuk Yus suramsattajnia nuna yamá paant jintinramji. Nu Wakancha imia Yus enentáimmiaincha mash nékawai.

¹¹ Shuar enentáimna nuna chíkich shuar nekaamniakait. Antsu aya ní enentáimjajin nékatsuk. Núnisaj aya Yusa Wakaníj Yúsna paant nékawai. ¹² Ju nuŋkanmayaj aents enentáimmiainia nuujaj Yúsna nekaachminiati. Antsu Yusa Wakanín in súramaj nuujaj Yus shiir tsanekatramajnia nu nekaamniatj. ¹³ Yusa Wakaníj jintinramji Yúsna chichastinian Nii wakera áintsaj. Ni chichamen súramji. Túramtai ii nékamujaj Yúsna étsertsuji. Tuma asantai imia Yúsna nuka Yusjaj péŋker wekainia nu jintíaj.

¹⁴ Yus-shuarcha Yusa Wakaníniun ántatsui ánratri tusa. Aya Yusa Wakaníj jintintiamniatkiui Yus-shuarcha nuna penké nekaachmin áiniawai. ¹⁵ Antsu Yusa Wakanín takaku ashí mash iis, péŋkera nuna nekaamniati. Nii túrana nunasha chíkich shuar súmamtikiachminiati. ¹⁶ Yus-Papinium yaunchu áarmaiti: “¿Yusa enentáimmiari ya neka. Tura Yúsna ya jintintiamniat?” tu áarmaiti. Tuma ajj ii ikia Yus-shuar ájini nu, Kristu enentáimna núnisrik enentáimji.

3

Páprusha Apurussha Yusa takatrjín mai tsaniŋkiar takainiawai

¹ Tura wikia, yatsuru, nuik aj atumjaj pujakun Yusa Wakanín umirniun chichastinian áintsanak atumjaj chichastinian tujinkiamjai. Antsu ayash wakeramu umirin asakrumin Krístunam katsuarcharujaj chichastinia áintsanak atumjaj chichasmaj. ² Uchi kuírach namaŋ ayurachminiati antsu aya umuntsatniuiti. Núnisaj aya yúpichuchin ujakmajrume, iturchat ana nu tujintiakrumin. Tura yamaisha iturchat ana nu tuke tujintiarme. ³ Tuke ayash wakeramu umirniuitrume. Yajauch enentáimtuaiyakrum tura katsu-naiyakrum akanramuitrume. Nuujaj páantaiti átum ayash wakeramu umirniuitrume. Yúsna enentáimticharujaj métek wekainiuitrume. ⁴ Atumjaj shuar “wi Páprunuitjaj” tuiniatsuk. Chikichcha “wi Apurusnaitjaj” tuiniatsuk. Tu chichaakrum ayash wakeramu umirniuitrume. ⁵ Wátsek. Wí Papru ti péŋkeraashitaj. Apurussha ti péŋkeraashit. Antsu iisha aya Yusa takarniurjntj. Yus-Chicham étserkurin ii Uuntrj enentáimtusochamkum. Ii Uuntrj takatan chíkich chíkich suramsamajnia nuke takasmaj. ⁶ Wi Yus-Chichaman étserkun arakan araktinia áinis takasmaj. Apurussha entsan ukatramai. Tura Yus nu arakan tsakatmarmaj. ⁷ Arakan araana nusha, entsan ukatna nusha ánrachukait. Antsu Yusak arakan tsakatmaru asa ashí túrachukait. ⁸ Arakan araana nusha, entsan ukatna

nusha métek ániawai. Túmaitkiuisha takasmajají métek Yus akiktatui. Pénker takasmatain⁹kia péñker akiktatui. ⁹Wisha Apurussha Yusa takat⁹ri mai tsanin⁹kiar takaaji. Tura Yus atumí enentáin takaakui atumsha Yusa núñ⁹ka áintsaitrume.

Jeasha enentáimprammiaiti. Yus atum⁹jají takaak jeá jeam⁹tinia áintsan takaawai. ¹⁰⁻¹¹Jeá jeamainiak, emka uunt kaya nun⁹ká inít ikiursar kaki awajsatin ániawai. Tura nuyanka nu kayanam ekeniar júkitniuiti jeá wewe atí tusa. Wikia jeá jeammin ti unuiniamiarua áintsanak uunt kaya nun⁹ká emka ikiustinian nekaan, núnisnak Jesukristunun emka ujakmajrume. Tura Jesukristu uunt kaya kaki ikiusma áinis asa Nin⁹kiti nu⁹ jeá ekenkatin. Iis, ashí enentáimtustinia nan⁹kaamas Jesukristu enentáimtustiniaiti. Nu asamtai Jesukristunun emka ujakmajrume, Yus nuna etserkatniun tsan⁹katrukuiti. Wi emka, uunt kaya ikiursatniua áintsan, Jesukristunun ujakmajrume. Tura nuyanka chíkich shuar ekeniar jeammin ániawai. Tura anearti péñker jeam⁹tinian. ¹²Tura jeá jeamainiak níi wakerak péñker ana nu⁹jají jeamminiaiti. Níi péñker jeam⁹tinian wakerak kurij⁹jajísha, kuít⁹jajísha, shírmach kayaj⁹jajísha jeamminiaiti. Chíkich jeamkuka numij⁹jajísha, ken⁹kuj⁹jajísha, nukaj⁹jajísha jeamminiaiti. Núnis⁹an shuar Yúsnan takaak péñker takasminiaiti túrasha náñ⁹kamas takasminiaiti. ¹³Tura amuukatin tsawant jeakui ashí níi takat⁹ri paant átatui. Nu tsawantaj⁹sha Yúsai⁹ya jí átatui tura nu jisha níi takat⁹ri péñkera nunasha tura yajaucha nunasha nekapsattawai. ¹⁴Tura shiir jeamuka tura nu jeasha esaachmatain⁹kia shiir akinkiat⁹tawai. ¹⁵Antsu náñ⁹kamas jeamuka imianin⁹ki jiniumi⁹á uwemprattawai, tura níi jeamma esaa pen⁹ké atsuttawai.

¹⁶Enentáimpratarum. Yusa Wakan⁹í atum⁹ín pujá asamtai Yusa Jeé ajasuram nu nékatsrumek. ¹⁷Shuar Yusa Jeen émeseku⁹in⁹kia Yus nu shuaran emesrattawai. Yusa Jeen⁹ka timiá shiir asamtai túrattawai. Nu Jeá atum⁹ketrume.

¹⁸Ju nun⁹kanmayan unuimiarua núnisrum “ti nekait⁹jai” tu enentáimtumasrum anan⁹mamawairap. Antsu ju nun⁹kanmayan nékachu áinis ajas Yúsnan tíi shiir unuimiártiniaiti. ¹⁹Ju nun⁹kanmayá aents nékainia nuna Yus “ántrai⁹ti” tawai. Yus-Papinium áarmaiti:

“Ju nun⁹kanmayan unuimiarun níi enentáimmia⁹jají Yus sumantkiattawai.”

²⁰Tura nu arantcha áarmaiti:

“Uunt Yuska “unuimiaru enentáimmian⁹cha pen⁹ké ántrai⁹ti” tawai.”

²¹Tuma asamtai “Páprunuit⁹jai tárumna nusha, “Apurusnait⁹jai”, tura “Pítrunuit⁹jai” tárumna nusha ántar enentáimprume, níi aya aents ásarmatai. Tu enentáimpraru warasairap. Antsu nekaatarum. Ashí írúnna nu atumin yainmaktiniaiti. ²²Páprusha, Apurussha, Pítrusha, ju nun⁹kanmayasha, iwiaakmasha, jákatniusha, yamáí írúnna nusha, ukunam átatna nusha, mash atumniaiti shiir yainmaktin. ²³Atumsha Kristunuitrume, tura Kristusha Yúsnaiti.

4

Yus akatramu takat⁹ri

¹Júnisan⁹ ashí shuar enentáimturmastiniaiti. Iikia aya Kristu yáin⁹trint⁹ji. Kristu akatramurint⁹ji Yusna yaunchu nekaachma ana nu yamáí etserkatin. ²Wátsek, akatramuka tána nu⁹jají métek umiktiniaiti. ³⁻⁴Wi umikmancha umikchamun⁹cha ii Uuntr⁹ri Kristu nékawai. Átum enentáimturarmena nusha tura chíkich aents enentáimturainia nusha wíj⁹jají⁹in⁹kia ántrai⁹ti. Imia wíkisha nekamatsjai. Kame winia tunaarun pen⁹ké wáintsujai tura aya nu⁹jají “pén⁹kerait⁹jai” tíchamniaitjai. Nin⁹ki Yus iirui. ⁵Tsawant jeamtai ii Uuntr⁹ri Kristu atak tátatui. Tura ashí yamáí kiritniunam u⁹ukma nuna tura shuar ashí enentáimprama nunasha paant awajsattawai. Nu tsawant jeats⁹in⁹ shuar umikiushit tusarum enentáimtusairap. Tura nu tsawant⁹ai Yus ashí péñker umikiarun shiir awajsattawai. Péñker umikiun⁹cha ishichik umikiun⁹cha takasmajají métek Yus shiir awajsattawai.

⁶Átum “Ju shuar péñkeraiti tura chíkich péñkerchaiti” tu akannáirarum pen⁹ké tíchatniuitrume, yatsuru. Nuka paant atí tusan “Átum “Wi Páprunuit⁹jai” tura “Wi Apurusnait⁹jai” tírap” tajai. Antsu aya Yus-Papinium áarmajají métek enentáimsatarum.

⁷Ámeka chíkich shuar⁹jají méteketme. Tura ashí takakmena nusha Yus amasmaiti. Tura Yus amasu asamtai ⁸zitiurak áminiukea áintsam nu⁹jají nan⁹kaamantu ajai tu enentáimtumam?

⁸¿Tíi kuítrinnia áintsan tura ashí takakua áintsan enentáimtsurmek? Nekas uunt kapitán ajasua áintsan enentáimtsurmek? Nekas uunt kapitán ajasuramka maak. Nuñ⁹kia iisha atum⁹jají akupkaint⁹ji. ⁹Chíkich shuar mash nan⁹kaamantu áinis áiniakuisha Yus in níi akatramur⁹in ashí amúamunam apujtamsait⁹ji. Tu enentáimprammiaiti. “Yajauch ániawai, máatái” tu pujurtam⁹ji shuar. Tura Yusa suntar⁹isha ashí juyá shuarsha in ístai tusar káutramkait⁹ji. ¹⁰Iikia atum⁹jají jeats⁹ji. Kristu shuar⁹í asakrin nékachu⁹a áinis enentáimturmaj⁹ shuar. Átum antsu Kristunam tíi nékachuashitrum. Iikia kakarmachuit⁹ji. Átum timiá kakarmaitrume. Átumka tíi pen⁹keraitrume. Antsu iikia mu⁹jtiaint⁹ji. ¹¹Tuke yamaisha

tsukamaji, kitiamaji, entsartin atsumaji. Katsumpramji. Jeasha atsumaji. ¹² Ii ewejéjaj takaakur ti pimpíajai. Shuar katsekramainiaji túrasha iikia shiir chichamjai aiyajai. Itiurchat awajtamainiakuissha katsunteaji. ¹³ Tsanumprutmakrincha tuke shiir chichaaji. Tsuata áintsarik tuke yamaisha ashí yajauchia núnisaj ajapramatniun enentáimturmainiaji.

¹⁴ Atumín aya iniatsaartajtsan juní áattsujrume. Antsu winia aneamu uchirua áintsan jintintjarme. ¹⁵ Atumín Yus-Chichaman ujaakun Yus-shuar ajastinian unuiniamjarme. Nujaj Jesukristu enentáimtakrumin atumí aparíja áintsan ajasmajai. Chíkich shuar Kristunun jintintrámatin timiá untsurj ákuisha aya wiki atumí aparíntjai. ¹⁶ Tuma asamtai wi wekaajna áintsan wekasatarum atumsha.

¹⁷ Nu túratarum tusan winia aneamu uchirun Timiutéun akuptukmajrume. Niisha ii Uuntrj Kristun enentáimtamunam winia uchiruiti tura Kristun enentáimtak tuke shiir wekaawai. Túrasha wi Kristujaj wekaamun ataksha enentáimtikramprattawai. Núiti ashí Yus-shuarnum wena jintúajna nuka. ¹⁸ Papru yamaikia iraishtatui enentáimturainiak chíkich chíkich nankaamantuijai tu enentáimtumainiawai. ¹⁹ Antsu Yus wakerakuñkia wárik íitjam tusan wakerajai. Nuñkia nankaamantu chichamen antukchattajai antsu wátskea, ni túramurjsha íistái. ²⁰ Yus akupeana nú shuar aya chíchainiatsui antsu Yusa kakarmarjin iniaktuiniawai. ²¹ Wátsek, ¿warí enentáimprum? Átum tuke núnisaj enentáimkiurminkia wi winin asutiátniuitjarme. Tura péñker enentáimkiurminkia, aneaun shiir chichasminiaitjarme. ¿Atumsha túa wakerarum?

5

Tsanirmamu ti tunaiti

¹ Atumín shuar ti tunáa tura awai. Ju yamá ashí nekanaiti. Nu shuar ni aparí nuwé achikiuítii. Timia tunaaka nu tsanirmamu Yus-shuarchanumsha atsawai. ² ¿Nu tunaajajsha tuke nankaamantu enentáimprumek? Antsu úttiniaitrumé. Nu shuar tunáa túraka atumíniá akankatniuiti. ³ Ayashur pujachkuisha wi nuj pujáa áintsan nuna tunaarjin paant nekamajai, tura asutiátniuiti tajai. ⁴ Tuma asamtai átum ákunkakrumin ii Uuntrj Jesukristu kakarmarjijaj tura wi nuj pujáa áintsanak, ii Uuntrj Jesukristu kakarmarjijaj ⁵ nu shuar uunt iwianchnum surunkatniuiti ni ayashi wakeramurj amukati tusa. Nujaj ni wakanj uwemprattawai ii Uuntrj Jesukristu támatái.

⁶ “Íikia péñkeraitji” tárumna nu ántrai, tunáa atumín tuke akui. Iis, “Karíia ishichik yuminnium enketam mash karimtiktsuk” tiniú áiniawai. Núnis átatui ju tunaajaj. ⁷ Tuma asamtai nu karíia ukartarum yajauch awajturmasajj tusarum. Núnisrum ju tunaanumiá kanakrum péñker átratume. Yaunchu enentái karíia núnis amuukatniuiti. Ashí yamarmak yuminiá áintsan ajasuítrome. Tanta wakapruachusha enentáimpratai. Israer-shuar paskua nampernum aya wakapruachu tantan yuu áiniawai. Atumí tunaarj atsakuí atumsha nu námper-tantaa áintsar péñker ajasuítrome. Paskua nampertincha Israer-shuar murikiun main áiniawai. Núnisaj Kristu jaka ii murikrjá áinis ajasuítii. ⁸ Tuma asamtai iisha paskua námper nájanku pujakur tuke núnisaj shiir wekasatniuiti. Tuma asamtai ashí yajauch tunaasha írumba nuka karíia yaunchu nawamua áintsan ketete. Nuka atsutniuiti. Antsu nekas ana nuka shiir enentáimsar wekasatniuitji. Nuka yuminiá áintsan ketete.

⁹ Nuik papin áatramajrumna nuj “Tsanirma shuarjainkia íischatniuitrome” tímiajrume. ¹⁰ Ju nunkanam Yus-shuar chaka aya tsanirma, aya kuitniak ikiauwín, aya kasak, aya ántaryusan tikishmatin áiniatsuk. Nú shuarjainkia penké íischatniuitkiurmeka ju nunkanmaya jünkintrume. Núnaka tátsujai. ¹¹ Antsu wi tájana nu júiti, Shuar “Yus-shuaraitjai” tákunka tura tunáa túriniaitkuñkia niijijaj íischatniuitrome. Tsanirmasha, kúitjan ikiauwíncha, ántaryusan tikishmatniusha, tsanumniusha, nampencha, kasasha “Yus-shuaraitjai” tákuñkia íischatniuitrome. Penké niijijaj yurumashtiniaitrome. ¹²⁻¹³ Yus-shuar tumaarj pachischatniuitjai. Yus núnaka íistatui. Átumka antsu atumín Yus-shuar ainia nuna tunaarj íistiniaitrome. Tuma asamtai nu shuar tunaarintin atumíyaja akankatarum.

6

Yus-shuar nuámtak itiurchat awajnaisarka Yus-shuarhajaj nuna iwarashtin áiniawai

¹ Yus-shuarka chíkich Yus-shuarjaj itiurchat pujakka kapitíanjaj chichas iwarashtinaiti Yus-shuar chaka asamtai. Antsu Yus-shuar írumba nujaj iwarati. ² Enentáimpratarum. Amuukatin tsawantaj Yus-shuarka ashí ju nunkanmaya shuara tunaarj mash nekaawartui. Tura ashí tunáa nekaatniuitkiurmeka itiu yúpichuchia nu nekaashtatrum. ³ Nu arantcha Yusa suntarj túramurjsha nekaattajai péñkerashit tusar. Nayaimpiniam túrawarma nekaatniuitkiurmeka itiuura ju nunkanmaya nu tujinkiattaj. ⁴ Pai, itiurchat ákuñkia Yus-shuar penké tujintiaianiana nujaj iwaratarum antsu. ⁵ Natsaruk tusan nuna tájarme. Warí, ¿atumíni chikichkisha atsawak ni yachj itiuurchatj péñker iwiararnia? ⁶ ¿Urukamtai

Yus-shuar ni yachijjaj itiuurchat pujakka Yus-shuarchanum wea iwiaratniun? ⁷ Atumí itiuurchatrj kapitiannium jukirmeka nuwjainkia átum tujinkiamu páantaiti. Natsantchakait. Itiuurchat ana nusha çurukamtai antsu katsuntram asakáatsum? Kasamkamusha çurukamtai katsuntram asakáatsum? ⁸ Antsu átumka nuámtak yachijjaj itiuurchat awajnáiyarme tura kasárnáiyarme.

⁹ Tunáa túrunkia Yus akupeamunam pachiinkiachmin ainia nu nékatsrumek. Ananawairap. Ashí tsanirma nusha, ántar-yusan tikishmatniusha, nuamtak áishmajaj tsanirmasha, ¹⁰ kasasha, ashí kuitian ikiauwincha, nampencha, tsanumniusha, yajauch chichainia nusha, chikich shuaran ananawar atantin ainia nusha Yus akupeamunma nuj penké wayashin ániawai. ¹¹ Atumjyasha chikich chikich nuna túrin armai. Tura yamaikia ii Uuntrj Jesusa kakarmarijjajasha tura ii Yusrj Wakanj kakarmarijjaj atumi enentái shiir ajasuiti, atumsha Yusna ajasurme, tura tuke pénger ajasurme.

Ii ayashj yajauch áchatniuiti

¹² “Ashí túramnaitjai” tiniu ániawai tura nekasaiti. Tuma ajñ mash yáinkiashtatui pénger wekasatniun. Nekas ashí túramnaitjai tura nánkamas túratniujaj nupetnakchat-tajai. ¹³ Junasha tiniu ániawai: “Apatuk wakejainchu tura wake apatkujainchu mai ántraitai.” Apatkujaj wakesha nekas mai metek enentáimpratin ániawai tura Yus mai metek amuktatui. Núnisan ii ayashj ii Uuntrj Krístunuiti tura Krístu ii ayashj nérenniuiti. Tuma asamtai ii ayashjaj tsanirmashtiniaiti. ¹⁴ Tura Yus ii Uuntrj Jesusan iniantkímia núnisan ii ayashjíncha nu kakarmarijjaj iniantkittiwai.

¹⁵ Ashí ii ayashjin Krístu ayashjímkiati. ÇNu átumka nékatsrumek? Winia ayashrusha Krístu ayashjya asamtai çitiurak nuna tsanirj ayashjn najanattaj? Penké túrachminaitjai. ¹⁶ Kame çjusha nékatsrumek? Áishmaj tsanirjjaj tsaninjar chikichik ayashtinia áinis ajainiwai. Núnisan Yus-Papinium áarmaiti: Mai chikichik ayashtinia áinis ajasartatui. ¹⁷ Tura shuar ii Uuntrj Krístujaj tsaninkia mai chikichik wakantin ajainiwai.

¹⁸ Tuma asamtai tsanirmatniunmayajayájan wainkiarum tséqentiurum. Chikich tunáa írumba nu ii ayashjínkia ti yajauch awajeatsui. Túrasha shuar tsanirmakka ní ayashiniak yajauch awajeawai. ¹⁹ Yusa Wakanj ame enentáimin pujurtamu asamtai, ame ayashim ni jeente. Nu Wakanjnkia Yus amasuít. ÇNuka nékatsrumek? Tuma asamtai ame ayashmi nérenchaitme. ²⁰ Krístu numpejjaj sumakma asamtai, ayashmisha wakanmisha Yusna ániawai. Yusna asamtai ayashmijaj pénger túratniuitme, Yus shiir awájnásti tusam.

7

Nuatkatniusha péngeraiti, nuatkashtincha péngeraiti

¹ Ayu. Átum áaturmarmena nuna yamaikia ujaktajrume. Shuar nuatteachkusha péngeraiti. ² Tura ti tsanirmatniun enentáimtuinia ásar ashí áishmaj ní nuwenak nuatkati tura ashí nuwa ní áishrjin iniumkati. ³ Áishmajsha ni áishrj asa nuwen túratniua nuna umiktiniaiti. Núnisan nuwasha ni nuwe asa ni áishrjn túratniua nuna umiktiniaiti. ⁴ Núwaka ninji ni ayashj nérenniuchuiti, antsu ni ayashjínuiti. Núnisan áishmajsha ninji ni ayashj nérenniuchuiti, antsu ni nuwenuíti. ⁵ Ni ayashj suritnaikiashtin ániawai. Tura mai itit awajnaitsuk Yus áujsatin wakeruiniak ishichik tsawant kanakmin ániawai. Tura nuinkia atak tsanin pujustin ániawai. Túracharmatainkia uunt iwianch, Satanás, tunaanum iniantinian úsutkattawai katsuntratniun tujintiakui.

⁶ Ayu. Tura nuna áarayatan nújainkia “ashí shuar páchitsuk nuatkatniuiti” tátsujai. Nuatkatniuitkiunka péngeraiti. ⁷ Túramtai “ashí wijjaj métek nuatkachuitkiunkia maak ainti” tajai. Tura Yus ashí shuaran imía métek najanachuiti. Chikichan nuatkatniun súsaiti, tura chikichan yúpichuch katsuntratniun súsaiti.

⁸ Natsancha wajencha juna tájai, “Wijjaj métek nuattsuk pujusrumka péngeraiti.” ⁹ Tura katsuntratniun tujinkiaruka nuatkarti. Ti katsuntrachmin nekapeakum nuatkatni péngeraiti.

¹⁰ Nuatnaikiarun antsu tájai, “Nuwa nuatkamuka ni áishrjn ikiukchatniuiti” tajai. Núnaka ii Uuntrj Krístu akupkaiti aya winia chichampruchuiti. ¹¹ Túramtai ni áishrjn ikiukkia ninji atak nuatnatsuk pujustí tura tsanin pujustinian wakerakka ataksha ni áishrjn wakеткиti. Núnisan áishmajsha ni nuwen ajapashtiniaiti.

¹² Chikich shuaran juna tájai wikia, ii Uuntrj Krístu juna akupkachuiti. Yus-shuara nuwenka Yus-shuarchaitkiunka tura ni áishrjjaj pujustinian wakerakka péngeraiti; ajapashtiniaiti, tájai. ¹³ Núnisan Yus-shuara aishrj Yus-shuarchaitkiunka tura ni nuwejjaj pujustinian wakerakka péngeraiti; ikiukchatniuiti. ¹⁴ Nu nuwaka “Yus-shuarchajaj tsanin pujakun Yusjjaj yajauch ajastatjai” tu enentáimprashtiniaiti. Antsu nii Yus-shuar asamtai ni aishrj nijjaj pujá asa pénger ajasminiaiti Yusjjaj. Núnisan núwaka Yus-shuarchaitiat ní

aishrj Yus-shuaraitkiuñkia niijjaj tsanin pujaj asa péñker ajasminiaiti Yusjaj. Núnisan ni uchrjsha péñker ajasmin ániawai Yusjaj. Núnischaitkiuñkia ni uchrj Yus-shuarcha uchrja áintsar ainti. ¹⁵ Tura áishmansha nuwasha Yus-shuarcha ana nu kanaktinian wakerakka túrati. Yus-shuar nujaj ankantaiti. Núnisan asati. Tuke máaniaktinian Yus nakitramaji. ¹⁶ ¿Núwaka ni aishrj Yus-shuar ajastatna nuna nekas nékawak? Tura áishmansha ni nuwe Yus-shuar ajastatna nuna nekas nékawak? Yus-shuarcha nuka wétinia wakerakka weti.

¹⁷ Wátsek. Shuarka Yus-shuar ajaska Yus nin najanama áintsan tuke átiniaiti. Pujumia áintsan pujusminiaiti. Núnaka ashí Yus-shuarnum akupeajai. ¹⁸ Iis, Yus-shuar ajasuka Israer-shuaraitkiuñka tuke Israer-shuar atí. Tura Israer-shuaraitkiuñka Israer-shuar ajastin enentáimprashiniaiti. ¹⁹ Israer-shuaraitkiuñka tura Israer-shuaraitkiuñka nuka enentáimtuschatniuiiti. Aya Yus tana nu umirkatin nekas enentáimtustiniaiti. ²⁰ Yus-shuar ajasuka nuik pujumia áintsan pujusminiaiti. ²¹ Chíkich shuara takarniurj asam ti iturchat pujakmesha iturchat enentáimpráip. Tura ankant jínkimniaitkiuñka jínkitiá. ²² Ankantchaitkiuñka ankantaitkiuñka ju enentáimpratá. Takarniuka Yus-shuar ajas tuke chíkich shuara takarniurjinkiusha shiir enentáimpratniuiiti Kristu nin tunaanumiá ankant awajsamtai. Tura shuar takarniuchua nu, Yus-shuar ajas Kristu takarjñ ajasuiti. ²³ Ti wáitsamiayi Kristu in ankant awajtsatniun. Ni numpejaj sumakna asarum shuar emetamu áirap. ²⁴ Tuma asamtai shuar Yus-shuar ajas nuik pujumia áintsan yamaisha pujústí tura Yusaj enentáimtus wekasati.

²⁵ Nuwá natsa túratniua nuna yamaikia áujmatjai. Kristu juna akupkachmai tura Kristu anekkratmarj ti nekapsa asamtai wi tájana nu antukminiaiti. ²⁶ Tuma asamtai juna tájai. Ti iturchatnu pujaj asakrin shuar aya júnisan nuattsuk pujustin péñkeraiti. ²⁷ Nuatkaitkiuñka núwem ikiukip. Nátsaitkiuñka nuwá eakaip. ²⁸ Tura nuatkumka tunáa túratsme. Nuwasha iniurtukka niisha tunáa túrachuiti. Túrasa nuatnaikiaru iturchatan ti wáinkartatui ju nuñkanam. Nú iturchatnumiá wi uwentikraintjai.

²⁹ Yatsuru, juna tájarme. Ishchik tsawant taasai. Juyañka nuatkaru ainia nuka aya ni nuarjñ enentáimprashiniaiti antsu Yúsna enentáimtustiniaiti. ³⁰ Núnisan tuke Yúsna enentáimsar útainia nusha uutcha áintsar pujustin ániawai. Warainia nusha warascharua áintsar pujustin ániawai. Súmainia nusha sumakcharua áintsar pujustin ániawai. Ju nuñkanmayajainkia itit awajmamsashiniaiti. ³¹ Núnisan aya ju nuñkanam péñker pujustin ti takaschatniuiiti. Ashí ju nuñkanmayañka amuukatniuiiti.

³² Ju nuñkanmayajain itit ajaschak tusan wakerajrume. Nátsaka Yúsna enentáimtai ni wakera nuna umiktinian. ³³ Túrasa nuatkaka ju nuñkanman enentáimtai ni nuarjñ shiir enentáimtiksa. ³⁴ Núnisan nuwá nátsasha nuatkamusha niisháa enentáimainiaiti. Nuwá natsa Yúsna enentáimtai ni ayashjsha ni wakanjsha tuke Yúsaj shiir atí tusa. Tura nuatkamuka ju nuñkanmayan enentáimtai ni áishrjñ shiir enentáimtiksa.

³⁵ Atumin yáintajtsan juna tájarme. Iturchat awajtsatsan wakeratsjai antsu shiir wekaakrum itit awajtsuk Yus shiir enentáimtusarum tusan wakerajrume.

³⁶ Tura shuar ni nawantrj natsan nuatnaikiati tákuñka péñkeraiti. Nawantrjñ natsa tuke apujtsatniun nakitiakka surukminiaiti. Nusha tunaachuiti. ³⁷ Tura chíkichka tuke natsan apujtsatj tákuñka nekas péñkeraiti. Apujtsatin iturchatchaitkiuñkia tura ni nawantrj nuatnakchatniuitkiuñkia apujtsatniuiiti. Apujsañka nekas péñker túrati. ³⁸ Tuma asamtai nuatmamtikiñka péñker túrayi tura apujsañka nu nankaamas péñker túrayi.

³⁹ Nuwá aishrj iwiaaku pujakuñkia tuke niijjaj tsanin pujustiniaiti. Tura ni aishrj jakamtai ankant ajas ni wakera nujaj Yus-shuaran iis nuatnaikiamniaiti, ⁴⁰ tura tuke nuatnatskesha nu nankaamas nekas shiir pujustatui. Tú enentáimjai wikia tura Yusa Wakanjsha métek tátsuash.

8

Yurumkasha namansha ántar-yusnum susamu

¹ Ayu. Yamaikia yurumkasha namansha ántar-yusnum susamun áujmatsattajai. Jujaj túratniua nuka mash nékaji. Tura shuar “ti nékaitjai” enentáimkiuñka nujajñkia “neka asan nankaamantuitjai” tu enentáimui. Antsu shuar chíkich shuaran aneakka nin péñker atí tusa yayawai. ² Shuar “ti nékaitjai” tákuñka nekas nekaatniua núnaka unuimiarchaiti. ³ Tura Yúsna aneana núnaka Yus péñker nékawai.

⁴ Wátsek. Ántar-yus susamu yúatin junis enentáimpratniuiiti. Yuska aya chikichkiiti. Tura chíkich Yus atsakuí, ⁵ aentsu yusrj yawaimpinmasha nuñkasha íranna nuka penké ántar ániawai. Kame aentsu yusrjsha tura úntrjsha ti írannui. ⁶ Tura iikia nékaji, aya chikichik Yus awai, nusha ii Aparjñti. Ashí íranna nuna najanaiti tura ni wakera nuna umikiat tusa najatmamji in. Ii úntrjsha chikichkiiti, Jesukristu. Niijjainkia ashí najanamuiti. Tura iisha ni kakarmarjijaj iwiaaku pujajai.

⁷ Tuma asamtai ántar-yus susamu yuamniaiti tura Yus-shuar awai júna nékainiatsna nu. Nu shuar ántar-yusan yaunchu tikishmatraru ásar nú yusan susamun yuawarka itiuurchat enentáimprar “enentáiruí yajauch ajasjai” tiartatui. ⁸ Watsek, yuamujai Yus in shiir enentáimtikrampratniun jeatsui. Yuarkia nujai péñker áhattaji tura yúachrikia yajauch áhattaji. ⁹ Ankantaitme yúatin wakerakmeka. Tura anearta. Ame yúakmin chíkich shuar itiuurchat enentáimna nusha ámin wáitmak yúanka ni enentáin tunáa ajastatui. ¹⁰ Ístá. Ámeka neka asam ántar-yusa jeen wayam tura nuí yúakminkia ame yatsum nuí wáitmakchanpiash. Tura niisha itiuurchat enentáimiat ántar-yus susamun yúashtimpiash. ¹¹ Nújainkia ame nékamujai ame yatsum Kristu jaka uwemtikramia nu yajauch ajastatui. ¹² Túramtai ame yatsum itiuurchat enentáimna nu yajauch awajeakum Kristunmasha tunáa túraitme. ¹³ Nu asamtai winia yatsurun wi yúajna nujai yajauch awajeaknaka namañnaka penké yuash-tatjai nii tunáa ajasajñ tusan.

9

Kristu akatramu túramnia nu

¹ Ashí Kristu akatramurj túratniua nuna wisha túramniaitjai ni akatramurj asan. Iis, wisha ii Uuntrj Jesusan wáinkiaitjai tura wisha Jesukrístu takatrñ takaajai. Winia takatrujajñ átumka winia takatrujajñ Yus-shuar ajasu asakrumin nujai wi nekas Kristu akatramurñtiaj nu paant nekaamniaiti. Tura tu enentáimtursatniuitrume.

³ Ashí shuar “Kristu akatramurñchuiti” túrutainia nuna júna tájai. ⁴ Wisha Yus-Chichaman etserkataj tusan shuárnum iraaakun ashí ajampruinia nuna yuamniaitjai tura umarminiaitjai. ⁵ Tura Pítrusha, Jesusa yachjsha, tura chíkich akatramusha irainiak ni nuwen Yus-shuar ainia nuna jukimnia áiniawai. Wisha núnisnak túramniaitjai. ⁶ Chíkich akatramuka kuit susamujajñ Yus-Chichaman etserainiawai. Wisha Pirnapísha núnisrik túramniaitjai. Kame ¿aya íchikik takastiniaitjai? ⁷ Suntarka ¿ní kuítrijajñimpiash takaa? ¿Tsan-impian aráa nu nuna neren yúatsuk. Wáakan wainiua nusha muntsurñ úmatsuk? Núnisajñ Yus-Chichaman étsera nusha nú takasmanumia yurumámniaiti. ⁸ Aya aents enentáimmian chichaatsjai. Muisais akupkamunmasha métek tawai. ⁹ Muisais akupkamunam áarmaiti: “Turu takaak jiníkaia saepen pakartaj tusa nájakui ni nuí jiníkiatáshtiniati. Antsu ni wakerak yuati.” Tu áarmaiti.

Tura Yus aya túrunak enentáimprachmiayi jujaj. ¹⁰ Antsu in jujaj nekaawarat tusa túmiayi. Jiníkaian araana nusha tura júukmatai saepen pakaana nusha nuna jiníkaian mai yurumáin áiniawai. Paant atí tusa Yus nuna áarmiyai. ¹¹ Tuma asamtai Yus-Chicham atumjñ etserkakrin nuyá átum takakrumna nujaj in ajamsatniuitrume. ¿Nusha itiuurchatkai? ¹² Chíkich akatramu atumjñ irutainiak ajamsamun yuamniaitkuiníka iikia nekas túramniaitjai ii etserkamujajñ Yus-shuar ajasakrumin.

Tura wikia antsu túrachuijai. Atsumaknasha ashí itiuurchat ana nuna katsuntramjai Kristu shiir chichamen étserkui shuar itiuurchat enentáimturarajñ tusan. ¹³ Ashí shuar ni yúsrñiun tuke pujurin ainia nu, ni yusrj jeen írúna nuyajñ yurumáiniawai. Tura yus-sutai namañken maawar nuyá yurumáiniawai. ¹⁴ Núnisajñ Yus-Chichaman etserniua nuka Yúsnan takasu asamtai péñker ajamsatniuiti. Nuna Kristu akupkamiayi. ¹⁵ Tura wisha ajamsamun yuamniaitiatan tuke winia kuítrujajñ yurumámjai. Tura yamaisha surúsuk tusan áattsujrume. Antsu nuna túrutsuk jakañka maak aintjai.

¹⁶ Uwempratín chichaman wi étserkun aya nújajñ “ti penkeraitjai” enentáimtumatsjai. Kame Yus nuna túratniun surusuncha itiuurkatjak. Nuna túrachkunka ti itiuurchat pujusaintjai. ¹⁷ Wakerakun étserkunka, warasminiaitjai. Tura nakitiaknasha tuke Yus surusmanka umiktiniaitjai. ¹⁸ Tura jujajñ antsu nekas warasminiaitjai: Wi túramnian iniaisan chíkichnan takatsuk aya winia kuítrujajñ uwempratín chichaman étserjai. Nujajñ waraakun akikma áintsangete.

¹⁹ Chíkich shuara takarniuchuitiatan ashí shuara takarniurjya áintsangetjai Kristu shuarjñ untsurjñ ajasarat tusan. ²⁰ Israer-shuarjajñ pujakun niisha Yus-shuar ajasarti tusan Israer-shuara áintsan ajai. Kame Muisaisa akupkamurj umirkatin áiniakui wisha aun umirkash-tiniatiatnak umirniuitjai. ²¹ Tura Israer-shuararchasha Yus-shuar ajasarti tusan, nu shuar Muisaisa akupkamurñ umirkash-tin áiniakui, wisha nuna umirkash-tinia áintsan ajai. Tura Kristu akupeana nuna umirkatin asan nekas Yus akupkamun umirniuitjai. ²² Yusjajñ katsuarchasha ti penker Yus-shuar ajasarti tusan wisha katsuarcha áintsan ajai. Chíkich chíkich shuarjajñ métek ajajai ishichkisha Yus-shuar ajasarti tusan. ²³ Ashí wi túrajñ núnaka uwempratín chicham tuke shiir atí tusan túrajai. Tura nu chichamjajñ wisha atsumtsuk shiir wekaajai.

²⁴ Shuar nekapnaisatniusha untsurí tsékeñtin átsuk tura aya chikichik awakmatsuk. Niñki, awakmakun súsatniua nú shiirmachin achiktatui. Núnisrum kakarum ajasrum awakmak shiirmachin achiktinia áintsarum Yusna takastarum. ²⁵ Shuar nakurak nekapnaisatin ainia nuka nupetmaktaj tákunka ashí itit awajea nuna ikiuniawai. Iisha núnisrik nu enentájjaj Yusna nu takastiniaitji. Nakuruinia nu shuar awakmakun tawasap súsatniua nuna achikiarsha nú tawaspan wárik kajinmatkimniaiti. Antsu Yus in amastatjinia nú tawasap tuke amuukashtatui. ²⁶ Wikia aya náñkamsan tsékeatsjai. Nasejaj maania áintsan máaniatsjai. ²⁷ Antsu winia ayashrun awatinia áitkiasnak umimtkiajai. Túrachkunka chikichan ununiariatan winiasha awakmakun súsatniua nú shiirmachin Yus surustinian nakitrurainti.

10

Ántar-Yus tikishmatrashtiniaiti

¹ Enentáimpratarum, yatsuru. Yus yaunchu ii úuntriñ ashí métek yáñmiiyi. Nusháa yurañmijjaj jintian nekapruamiayi. Tura ashí ii uuntriñ nu yurañmin apapekar wearmiayi. Ashí núnisar Kapaáku Nayaantsan Yus akankamunam wekasar katikarmiayi. ² Tura Muisaisan umirkar yurañminiam tura nayaantsanam ashí imiaimiu áintsan ajasarmiayi. ³ Núnisan ashí mash Yusnumjá yurumkan yuawarmiayi. ⁴ Entsancha ashí mash Yus susamunak umararmiayi. Kame Yus kayanmayá entsan akupkamtai ashí umararmiayi. Kristusha, nú kaya áintsan, niijjaj tuke weakui ni wakaní atsumamurin Kristunmayan takusarmiayi. ⁵ Tuma aññ Yus ti yáñmaitiat ni wakeramun umikcharmiayi. Tura ásar ni nunkeñ jeatsuk atsamu nunkanam ti untsurj jákarmiayi.

⁶ Iisha nujaj unuimiartiniaitji. Iikia ni wakeriarmia áintsar¹ yajauchia nu wakerukchatniuitji. ⁷ Nu asamtai ántar-yus ni túrawarmia áintsarum tikishmatraitap. Iis, jiru yusrj shiir awajenakuí Yus-Papinium áarmaiti,

“Nu shuar yurumáwar nampekar námper ti najanawarmiayi.” Tu áarmaiti.

⁸ Nii túrawarmia núnisrik iikia tsanirmashtiniaitji. Nuna túrawar paintitres mir (23.000) chikichik tsawantaj jákarmiayi. ⁹ Iisha tunáa túrar “Yus asutiúashtatui” tu enentáimprashtiniaitji. Niisha nuna túrawar napijjaj esaim untsurj jákarmiayi. ¹⁰ Yussha yajauch áujmatsashtiniaiti. Nuna túrawarmatai Yus ni suntarñ akupak untsurñ maawarmiayi.

¹¹ Yaunchu ii úuntrijjaj túrunamu in amúamu tsawantnum pujajnia nuna jintinramat tusa áarmaiti. ¹² Tuma asamtai shuar “Tunaanum iniaarchattajai” tákunka anearti. Anearchamka iniaarminiaitme. ¹³ Tura ame iturchatrumka aya amek nekapeatsme. Chikich shuarsha nu iturchatjaj métek nekapsatin áiniawai. Jusha ti enentáimpramniaiti. Ame katsuntratin tujintiamna nuna nañkamaas iturchatan Yuska péñker asa tsañkatramatsui. Antsu iturchat tarutramatai, nu iturchatnum pujamin Yuska uwempratniun jintintra-mattawai. Nújajñkia katsuntrattame.

¹⁴ Nu asamtai aneamu yatsuru penke ishichkisha ántar-yus enentaimtusairap. ¹⁵ Atumsha nekatsrumek. Wí tájana nu nekaschakait. ¹⁶ Kristu jakamu enentáimtustin námper najanar Yus áujeaji Kristu numpen nakumea nu shiir atú tusar. Tura métek umarar nujaj Kristu numpé métek enentáimtaji taji. Tura apatkusha púurar¹ tura métek yuar¹ nujaj Kristu ayashñ in jarutramkamu métek enentáimtaji taji. ¹⁷ Apatkusha chikichkiitiat púuram untsurj ajatsuk. Iisha núnisrik untsurjitiatar nu apatuk métek yuar¹ métek enentáimprar chikichik ayashtinia áintsar aji.

¹⁸ Israer-shuartsisha enentáimpratai. Yus-sutai namañken yuinia nu, métek yuawar Yusan métek enentáimtuiniatsuk. ¹⁹⁻²⁰ Núnisan Yus-shuarcha ántar-yus sutai namañken suiniak nekas-Yusan suiniatsui antsu yajauch wakanin suiniawai. Kame ántar-yus ániak penké ántar áiniawai, iwiaakuchu áiniawai. Nu namañsha sutai namañketiat péñker namañkete, yajauchichuiti. Aya junak taji. Yus-shuarcha ántar-yus sutai namañken suiniakuí amesha nijjaj métek yuamka yajauch wakanniasha nijjaj métek enentáimtaji tame. Nu antsu yajauchiiti. ²¹ Kristu numpen nakumea nu úmakrum íwianch susamua nuka umarchatniuitrume. Kristu ayashñ nakumea nu yúakrumka íwianch susamua nuka yúashtiniaitrame. ²² ¿Warí, Yus akajkatin wakeramek. Iisha nin nupetkamniashitiaj’?

Aya aneakur takastiniaitji

²³ “Ashí túramniaitjai” tiniu áiniawai. Ayu, tura mash yáintkiashtatui péñker wekasatniun. Nekas ashí túramniaitjai tura mash yáintkiashtatui wakaniur kakaram ajastin. ²⁴ Nú arantcha chikich yáinttinha enentáimpratniuitji. Aya íniuk pachischatniuitji.

²⁵ Namañ súmakum inintrutsuk sumakta. Tura ántar-yusan susamusha yajauchichuashit enentáimsuk páchitsuk yuata. ²⁶ Ashí ju nunkasha tura ashí írúnna nusha Yúsachuk ainia. Tuma asamtai péñker áiniawai.

²⁷ Yus-shuarchasha yurumkan ajampramkuisha ashí mash yajauchichuashit tu enentáimtsuk páchitsuk yuamniaitme. ²⁸ Tura chíkich chichaak “Juka ántar-yus susamu namañkete” túramkuinikia nuikia yuawaip. Yúakminkia nu shuar itiuurchat enentáimprattawai. ²⁹ Ame páchitsuk yuamniaitkiumnisha nii antsu yúachmin asa itiuurchat enentáimprattawai.

Tura amesha tichatameash “¿Urukamtia nii tujintiakuwi wi yúachminiaitaj. ³⁰ Wi Yúsan yumiñsan yúakuisha urukamtia itiuurchat enentáimturainia. Yus yumiñsachmakait?” tichatameash. ³¹ Ayu, yúakmesha úmakmesha ashí túramna nusha ashí shuar Yúsan shiir enentáimtusarti tusam túratá. ³² Tuma asamtai ii túramujaj chíkich shuar tunaanum ajuashtiniaitji. Israer-shuarsha, Israer-shuarchasha, Yus-shuarsha ashí yáintiiniaitji. ³³ Wissha ashí shuaran yáintiñian tuke enentáimjai. Ashí shuar uwemprarti tusan wi wakeraj nuna enentáimtsuk nin yáintiñian tuke pujurjai.

11

¹ Kristu turamia áintsan takaajai wissha. Atumsha núnisrum wi takaajna áintsarum takas-tarum.

Nuwa Yusa jeen túratin

² Yatsuru, átum winia tuke enentáimturarum wi tímiajrumna nu umirniuirume. Tuma asakrumin shiir enentáimtajrume. ³ Nu arantcha ujaajrume. Yus Apa Kristun akupea áintsan Kristu ashí áishmañkan akupeawai. Núnisañ áishmañsha ni nuwen akupeawai. ⁴⁻⁵ Íjiañkia shuar Yus áujenak tura núnisañ Yus-Chichaman étserainiak áishmañ etsenkruckchatniuiti antsu nuwa múuknum nukumaktiniaiti. Tuma asamtai áishmañ nuñ etsenkrakka natsantaiti. Tura nuwa múuknum nukumakchañka natsantaiti. Intiashin tsupimiarua áintsanñkete. ⁶ Nuwa múuknum nukumaktinian nakitiakka intiashin tsupírti nuikia. Watsek, nuwa ni intiashin tsupirtinian nakitiakka, tura awampratniun natsamakka múuknum nukumakti nuikia. ⁷ Áishmañkka Yúsan nakumeawai. Yusna shiir ana nuna nakúmkañtsa Yus áishmañkan najanamiayi. Tuma asamtai áishmañkka etsenkruckchatniuiti. Antsu nuwanñka áishmañna shiir ana nuna nakúmkañtsa Yus najanamiayi. ⁸ Iis, Yus áentsun najaneak nuwanmayan áishmañkan najanachmiayi antsu áishmañka ukunchíjiañ nuwan najanamiayi. ⁹ Nuwañ yáinñkiát tusa áishmañkan najanachmiayi antsu áishmañkan yáinñkiát tusa nuwan najanamiayi. ¹⁰ Tuma asamtai núwaka múuknum nukumaktiniaiti, nayaimpimaya aencha ísarti tusa. ¹¹ Ayu, tura áishmañ nuwajainchu atsuinti tura nuwasha núnisañ áishmañjainchu atsuinti. Yus ju nuñkan núwasañ atí tusa najanaiti. ¹² Iis, Yus nuwañ áishmañnumiá najanamiayi tura áishmañsha nuwañmayá akiiniaiti. Tura Yus mai najanaiti.

¹³ Enentáimpratarum atumsha. Nuwa múuknum nukumatsuk Yus áujsatin ¿pénkerkakit? ¹⁴ Ii shuártinkia áishmañ intiash ajakin natsantchakait. ¹⁵ Antsu núwaka intiash ajakin pénkerchakait. Múuknum nukumaktinian susamuiti. ¹⁶ Watsek, shuar tuke umiktinian nakitiakka juna nekaati, iisha tura ashí Yus-shuártisha aya tu enentáimji.

Kristu jakamu enentaimtustin nampernum yajauch túramu

¹⁷ Yamái áarattajrumna nujaññ shiir enentáimtatsjarne. Atum irunkuram yáiniaiktiniaitrum tuke pénker wekasatin. Átum antsu iruntrarum yajauch awajnaiyarme. ¹⁸ Wats, Yusa Jeen irunkuram atumsháa enentáimprarum kanakurme. Kame tu ujatkarmai. Nekaschashit. ¹⁹ Tuke tupartatrumek Yúsnan ti nekana nu shuar paant nekanat tusarnea. Antsu kajernaikiar kanakin pénkerchaiti. ²⁰ Kanakin asarum Kristu jakamu enentaimtustin nampernum atum iruntrarum yúrmena nu nekas Yúsnachuiti. ²¹ Iis, ashí ní yurumken itiaawai añ yurumáñtsa tura chíkichan nákatsuk niá niá wari yuattsá wakerawai. Chíkichkia ishichik itiaana nu tsukamawai tura chíkichcha nampekarai. ²² Yurumkan ishichik itiaana nu iniatsáarchame. Atum áitkiarum núnisañ Yusa jeen yurumáshtiniaiti. Natsantaiti. Warí, chíkich jea átsuk añ yurumáñtin. ¿Warimpait. Jujaj shúirash áujsatjarum? Átsá. Jujaj shiir áujsachminiaitjarne.

Kristu jakamu enentaimtustin námper

²³ Ii Uuntrí Kristu jintintruama núnaka ujakmajrume. Jútas tuke súratsañ, nu kashi ii Uuntrí Jesus apatkun júkí ²⁴ Yusan yumiñsamiayi. Nuyá puur tímiaiyi “Yuatarum. Jusha winia ayashruiti; atumin jarutramkatta núiti. Ju yúakrum Winia enentáimtusatarum” tímiaiyi. ²⁵ Núnisañ yurumá umik pininñasha achik tímiaiyi “Ju pinin Yamaram Chichamaiti. Tura winia numpar puármatai Yamaram Chicham nekas uminkiatstawai tawai. Ju tuke úmakrum Winia enentáimtusatarum’ tímiaiyi. ²⁶ Tuma asamtai ju apatuk yúakrum tura pininñsha úmakrum ii Uuntrí Kristu jakamurí enentáimtarme. Kristu táatsañ ju tuke túratniuirume.

Shiir enentáijijai Kristu jakamu enentáimtustin nampernum yuatnuuiti

²⁷ Tuma asamtai shuar Yusan enentáimtutsuk ju apatkun yuawar tura ju pininnumiancha umarar Kristu ayashincha ni numpencha yajauch enentáimta asa tunáa túraiti. ²⁸ Nu asamtai ashí shuar ju apatkun yútsuk tura ju pininnumiancha úmutsuk ni enentáin iwiaratnuuiti Yusjai. ²⁹ Kristu ayashí jakamu enentáimtutsuk yúakka tura úmakka nuna tura asa asutniáttawai. ³⁰ Atumsha tura asarum jaarme tura pimpiruitrume. Chikichcha jákaru ániawai. ³¹ Ímia-iik ímiakrinkia Yus in asutiámachaintji. ³² Tura ii enentáin Yus yajauchia nuna wáiniuk asutiámji. Túrachkunka ashí Yus-shuarchajai súmamtikramawaintji.

³³ Tuma asamtai, yatsuru, iruntrar yurumátsa matsatkurmeka nákastarum métek yurumáin. ³⁴ Shuar tsukamakka ni jéenjink' yurumáti. Nujainkia yajauchijjai irunchakrumin Yus asutiámashatrum. Ayu, chikich áatrururmena núnaka wi aj jean iwiarattajai.

12

Yusa Wakaní ni shuarin susamu

¹ Yusa Wakaní ashí ni shuarin súana nuna yamáí ujaktatjarme. Nekaatarum, yatsuru. Yus-shuar shiir takasarti tusa Yusa Wakaní juna súsaiti.

² Yaunchu átum Yus-shuar tuke ajatsuk chikich shuarjai métek ántar-yus tikishmatrarmarme. Niisha ántar-yus ásar áujmatrarmsachmin ármiai. ³ Tura jújain shuar Yusa Wakaní kakarmarjijai chichaana nu nekaamniaiti. Yusa Wakaníjainkia shuar “Jesus yajauchi-iti” tíchamniaiti. Núnisan aya Yusa Wakaníjain “Jesus winia Úuntur asa akuptuktiniaiti” tímniaiti.

⁴⁻⁵ Yusa takatjí írunttsuk. Tura Yusa Wakanínk' ashí nuna takastinian súsaiti. Tura shuar Yus-shuara Úuntrí chikichik ajn ashí Yusa takatrin métek takaatsui. Antsu chikichkin ashí nankaamas pénger takaawai. Yusa Wakanísha nuna shiir takasat tusa súawai. Tura Nii wakera nuna Nínki ni shuarin chikichik chikichik niisháa niisháa súawai. ⁶ Yúskete ashí ni shuarin niisháa takamtikeana nu. Nínki ashí ni shuarí enentáin takaak takatnasha shiir takamtikeawai. ⁷ Yusak túratin súam Yusa Wakaní kakarmarí paant átatui nu takasmanum. Tura ashí shuar ní takatrijjai yáiniaiktin ániawai. ⁸ Júnaka Yus takamtikeawai. Nékana nu shuarnasha, unuimiarua nunasha Yúsnan ujaktinian súawai. Tura mai shuaran Yusa Wakaní kakarmarjijai nuna túratniun súsaiti. ⁹ Chikichnasha Yúsnan áujenak Yúsnan ti enentáimtusar nekas ituirchat ana nuna iwiaratniun súawai. Nincha Yusa Wakaní kakarmarjijai nuna takastinian súsaiti. Chikichnasha jaan tsuártinian súawai. ¹⁰ Chikichnasha aents nínki túrachminian túratniun súawai. Chikichnasha Yúsnan etserkatniun súawai. Chikichnasha shuar wari yajauch wakannia pénger wakanniasha apatka nekaatniun súawai. Chikichnasha niisháa chichaman chichastinian súawai. Chikichnasha niisháa chichasman jintíatniun súawai. ¹¹ Tura ashí shuara enentáin nu Wakanik takaawai. Tura Nii wakera nuna ankant ankant súawai takastinian.

Ashí Yus-shuar Kristu ayashía áintsan ajainiawai

¹² Iikia Kristu ayashía áintsar⁴ ayashímkiaitji. Kristu ayashí muchitmarísha írunui. Niisha tímniaiti chikichik ayashíniaiti. ¹³ Tura imianiakrin Yusa Wakaní chikichik awajtam-samji, Kristu ayashía áintsan. Israer-shuarsha, Israer-shuarchasha, ti ituirchat takaana nusha, ankant ainia nusha, ashí yamáí chikichik ajasuitji. Tura Yusa Wakaní pimiutkamuitji Niijjai tsanínkia pujakar.

¹⁴ Ayashi muchitmarí aya chikichkhuiti. ¹⁵ Tuma asamtai, winia nawer uwejruchuitiat tuke winia ayashrunuiti. ¹⁶ Winia kuishrusha jíruchuitiat tuke winia ayashrunuiti. ¹⁷ Wátsék winia ayashur aya jíkítikiuin¹kia çitiurak antukaintiaj? Winia ayashrusha aya kuishkítikiuin¹kia çwarijain¹ nekapsaintiaj? ¹⁸ Nu asamtai Yus winia ayashru muchitmarí ni wakeramunam ikisuuti. ¹⁹ Chikichik muchitmajain çayash áminkiait? ²⁰ Antsu untсурí muchitma akuisha chikichik ayashkiiti. Iisha núnisrik chikich chikich iisháa takayatrik métek takasar Yus wakeramu takamtsuk umíaji.

²¹ Winia jírur pénger ajn winia uwejrúncha wakerishtatjak. Winia muukarsha pénger ajn winia nawernasha wakerishtatjak. Núnisan Yus-shuar shiir enentáimtumak ni yachin “atsumatsjame” tíchamniaiti. ²² Antsu ii muchitmarí ishichik enentáimtajnia nu atsakuínkia ti atsumawaintji. ²³⁻²⁴ Chikich muchitmasha, ímiancha nu, shiir iwiarmamtaji. Tura nu muchitmaka shiir ísminia nujai nankaamas pénger wainji. Iis, shiircha nu antsu pénger wainji. Yus ii ayashin núnisan at tusa najanamiayi. ²⁵ Nujainkia ayashí muchitmarí máanaitsuk métek yáiniainiawai. ²⁶ Chikichik muchitmaram najaimiakum ashí ayashniun wáitiatmek. Núnisan chikichik muchitmaram ayap ajakum ashí ayashniun shiir átsmek.

²⁷ Núniskete Kristu ayashíjijai ayashímkiaj¹ nu. Tura chikich chikich ni muchitmarí ají. ²⁸ Ayashniun muchitma írunna áintsan Yus ni shuarin untсурí takatan súsaiti. Emka Yus

akatramu, nuyá ni chichamen etserin, nuyá jintinkiartin, nuyá aents túrachminian túrin, nuyá tsuákratin, nuyá yáinkratin, nuyá akupin, nuyá niisháa chichamjai chicharin, mash írunui. ²⁹ Ashí Yus akatramuk ainia. Ashí Yus-Chichaman etserniuk ainia. Ashí jintinkratniuk ainia. Aents túrachminian ashí túriniak ainia. ³⁰ Ashí tsuákratniuk ainia. Ashí niisháa chichamjai chichamtiniak ainia. Ashí niisháa chichamjai chichasman jintinkratniuk ainia? Atsá. Túmachuiti. ³¹ Túmaikkuinkia péñkera nu takastin wakeruktarum. Tura imiá péñkera nuna ju j tintintiatjarme.

13

Aneatin

¹ Ju nunkanmaya aentsu chichamen untsurí chichayatnak tura nayaimpinmaya aentsu chichamencha chichayatnak anenkratchaknaka tampur meserua áintsanak aya ten-ten ajajai. Penké ántranak chichajai. ² Yus-Chichamnasha ti shiir étseriatnak, túrasha ashí uukmancha tura ashí nekaamniancha nékayatnak, túrasha Yúsan ti enentáimtusan murá umochiyatnak, anenkratchaknaka penké ántraitjai. ³ Ashí wi takakjana nuna atsumainian súayatnak tura Yus shiir awajsattsan winia ayashrúncha áesawarti tusan surumayatnak tura anenkratchaknaka ántranak túraitjai.

⁴ Aneñkartaka wari kajeatsui, tsápkaiti, chíkich shuaran shiir awajniuiti, péejchach asa waantu enentáimtumatsui. ⁵ Aneñkartaka natsanta nuna túrichuiti, níiniunak enentáimchaiti, kajechuiti, páchichuiti. ⁶ Chíkicha tunaarín wararchaiti antsu péñker shuaran wararniuiti. ⁷ Aneñkartaka aya katsunteawai. Tsanú chichamnasha nakitiawai antsu aya péñker ana nuna nákwai. Tunáa shuar shiir ajastí tusa tuke nákwai.

⁸ Aneñkrattainkia tuke amuukashiniaiti. Antsu ju nunka amuukmataisha Yus-Chicham etserkatín atsuttawai, tura niisháa chichamjai unuimiatsuk chichastincha amuukattawai, tura ashí nekanamtaí unuimiartincha atsuttawai. ⁹ Kame yamaikia aya ishichik nékaji. Yus-Chichamnasha amutsuk étserajai. ¹⁰ Túra ukunam mash nekanamtaí yámankamtaik nekaamuka ántar átatui.

¹¹ Yaunchu wi uchich asan uchichia áintsan enentáimkiun chichasmajai. Antsu yamaikia uunt ajasan uchiniun iniaisaitjai. ¹² Núnisrik yamáí ju nunkanam Yus paant wáintsuji. Íspik kusurunam ímsatniua áintsan ketete. Antsu ukunam mai métek paant wainniaikiattaji. Yamaikia aya ishichik nékajai. Nu j antsu Yus winia nékara áintsanak nekaattajai. ¹³ Watsek, menaintiu amuukashin áiniawai. Ju áiniawai: Yus shiir enentáimtustin, shiir ana nu nákastin, tura anenkrattai. Ju menaintiunmasha anenkrattainkia ashí nankaamakuíti.

14

Niisháa chicham unuimiatsuk chichastin

¹ Nu asamtaí, anenkratin atarum. Tura núnisrumek Yúsnan péñkera nu takastin wakeruktarum. Imiankaska Yus-Chicham etserkatín péñkeraiti. ² Nújainkia niisháa chichamjai unuimiatsuk chichastin péñkerchaiti. Iis, nu shuar chíkich shuarjai chichatsuk aya Yusjai chichaawai. Ni chichame penké antukchamniaiti. Yusa Wakanj nin chichastinian súawai túrasha tana nu nekaachminiaiti. ³ Antsu Yus-Chichaman étsera nuka shuaran yayawai. Shuaran ikiatsuártasa, tura ikiakártasa, túrasha atsankrattsa yayawai. ⁴ Niisháa chichamjai unuimiatsuk chichaana nuka aya níñki katsuártinian yáinmamui. Antsu Yus-Chichaman étsera nuka ashí Yus-shuaran ikiatsuawai.

⁵ Atumsha ashí mash niisháa chichamjai chichastinian wakerajrume. Túrasha nuna nankaamas Yus-Chicham etserkatniun wakerajrume. Aya chichastinjinikia ju imiá péñkerchakait. Kame chichasma jintákmeka maak. Nujai Yus-shuar tsakarartatui. ⁶ Enentaimpratarum, yatsuru. Nu j iraa kun aya niisháa chichamjai chichaaknaka çitiura yáintatjarum? Antsu Yus winia jintinruamuncha tura wi nékajna nunasha étserkunka yáintatjarme. Yus-Chichamnasha tura ashí Yúsnan cha jintinkinucha yáintatjarme.

⁷ Peemsha tura tumánsha wi tájana áintsan áiniawai. Péñker tuntuíyamuka paant nekaamniaiti. Tura péñker tuntuíyachuinkia, nu tuntuíyamu nekaachminiaiti. ⁸ Sutarsha mesetnum wéenakui ni kapitíántri ni wakeramun ujaktinian kachun umpuawai. Paant umpuachuinkia suntarsha ni wakeramun nekaawartatui. Tura paant umpuachuinkia suntarsha çitiurak mesetnum wétinian iwiarat? ⁹ Atumjaisha núniskete. Nekaachmin chichamjai chichaakminkia çtámena nuna itiu nekaawartata? Nase chichartsumeash. ¹⁰ Ju nunkanmaya chichamka ti untsurí írunui. Nu chichaman nékaka ashí antukmin áiniawai. ¹¹ Tura chíkich shuara chichamen ántachunka níjjainkia yajaya apachia áintsanak ajajai. Niisha wíjjainkia yajaya apachia áintsan ketete. ¹² Tuma asamtaí, Yusa takatrí ti wakera asarum ashí Yus-shuaran ikjarartatna nú takat nekas wakeruktarum.

¹³ Nu asamtai niisháa chichamjaj chichaitkiumka chichasumna nu jintiartin Yus seata. ¹⁴ Niisháa chichamjaj Yusan áujeaknaka nekas winia wakantrujaj áujeajai tura áujajna nuna nékatsjai. ¹⁵ Antsu wikia júnisan enentáimjai. Yúsan áujeakun winia wakantrujajsha áujattajai tura enentáimtsuk áujashtatjai. Kantamkuncha kantamaj nuna enentáimkiun winia wakantrujajsha kantamattajai. ¹⁶ Amesha shuar iruntramunam aya wakanmijaj niisháa chichamjaj Yus shiir yumiñsamkincha nekaachmin asamtai nékachuka ámijaj métek áujatniun jeatsui. ¹⁷ Ti shiir Yus yumiñsam áujeatsmeash tura chikichka Yusjaj ikiakáatsme. ¹⁸ Ashí átum nusháa chichamjaj chicharmena nuna nankaamas wikia chichajai. Nuna Yusan yumiñsajai. ¹⁹ Túmaitiatnak untsurj chichamjaj chichasan ántumtikiashtinjainkia nankaamas Yus-shuar iruntramunmanka aya senku chichamchijaj tiintjai, paant jintintiwartaj tusan.

²⁰ Yatsuru, uchía áintsarum enentáimprairap. Kuirchia áintsarum tunáa túrashtin enentáimpratarum tura chikich írurna nujaj uunt enentáimpratniua áintsarum enentáimpratarum. ²¹ Yus-Papiniun áarmaiti:

“Yajaya shuaran akupkan niisháa chichamjaj chichastatjai. Tura nújajsha anturtukchar-tatui” tawai Yus.” Tu áarmaiti.

²² Nújajnia páantaiti, nusháa chichamjaj chichastinkia Yus-shuarchan ashantikiar enentáimtkratniun Yus súsaiti. Yus-shuaran tu enentáimtkratniun súsachuiti. Antsu Yus-Chichaman etserkatniunka Yus-shuarchan enentáimtktsuk Yus-shuaran yáintinian súsaiti. ²³ Tuma ajn, nékachusha tura Yus-shuarchasha Yus-shuar iruntramunam wayanka tura ashí niisháa chichamjaj chichainianak wáinkianka “mash waurka ajasarai” enentáimturmarchartuak. ²⁴ Tura Yus-Chicham éterkurminkia nékachusha tura Yus-shuarchasha nuj wayanka ashí tárumna nujaj ni tunaarjn ímias enentáimturatui. ²⁵ Nújajnia ni enentáin úmak ana nuna paant wáiniak tikishmatar Yusan shiir awajstatawai. Tura “nekas Yus atumjaj pujawai” títiatui.

Ashí tuke shiir takastarum

²⁶ Ayu, júnisaiti, yatsuru. Átum irunkurmin shuar takastinian Yus nin susamu túratí. Kantamátiniuncha, jintintiatniuncha, Yus iwaiainiakman ujaktinniasha, nusháa chichamjaj chichastinniasha, nusháa chichasman jintiatniuncha, ashí Yus-shuar Yusjaj tsakararti tusar juna mash takasarti. ²⁷ Nusháa chichamjaj chichainiakka chikichik chikichik chichasarti. Tura jimiarchik menaintiuchiksha chichasarti. Tura ni timianka jintiartiniaiti. ²⁸ Jintiartin atsakuinikia nusháa chichamjaj iruntramunam chichaschatniuiti. Antsu ninjki Yusjaj chichasti. ²⁹ Núnisan jimiarchiksha menaintiuchiksha Yus-Chichaman etserkarti. Tura chikich shuar nuj iruntrar ni etserkamun enentáimprarti péñkerashit tusar. ³⁰ Tura chikich chichaakui Yus chikichan nuj pujana nuna yamaram chichaman súakuinikia emka chichaa nu iniáisati. ³¹ Núnisrum Yus-Chicham etserkatin wakerarmena nu chikichik chikichik chichasrum ashí jeattarme. Nújajsha Yus-shuar unuimiarar kakarartatui. ³² Yúsnan éterainia nuka tuke enentáimprar chichastin ániawai. Enentáimtsuk nánkamsaj chichasmin ániatsui. ³³ Yuska pachimtak chichaman nakitiak shiir chichasmanak wakerawai.

Chikich nunkanmasha ashí Yus-shuar iruntramunam túrainia áintsarum túratniuitrume atumsha. ³⁴ Yus-shuar iruntramunam nuwá chichastin surimkiamuiti. Yus akupea núnisan núwaka chichatsuk umin átin ániawai. ³⁵ Inintrustinian wakerakka ni jéñ wawetkin ni aishrin nuj aniasti. Ashí iruntramunam nuwá chichastin natsantaiti.

³⁶ Jusha enentáimpratarum. Yus-Chicham atumjaj nankamnachmai. Núnisan aya atumjiniñ Yus-Chicham jeartamchaiti. Chikich nunkanmasha Yus-shuarti túrutai enentáimpratniuitrume atumsha. ³⁷ Atumjín shuar “Yus-Chichaman tuke etserniuitjai” enentáimtumatsuash. Tura chikich shuarsha “Yusa Wakanj tuke winia akuptaiti” enentáimtumatsuash. Nu shuarka wi áatjarmena nuna enentáimprar “nekas Yúsnan tíniuiti” tiartí. ³⁸ Tu táchakuinikia niisha ántar ániawai.

³⁹ Nu asamtai, yatsuru, Yus-Chicham etserkatin wakerukturum. Nusháa chichamjaj unuimiatsuk chichastincha surimkiarap. ⁴⁰ Túmaitiat antukchamin awajtsuk ashí shiir túratarum.

15

Kristu nantakmia

¹ Ataksha, yatsuru, uwempratin chichaman wi etserkamaj nuna atumin enentáimtkratsan wakerajrume. Nu chichamsha atumsha enentáimturarum tariarurme. ² Nu chichamsha átum ántar enentáimtachkurmeka uwempraitrume. Wi ujakmajrum nu tuke enentáimtaikurmeka nekas uwempraitrume.

³ Winia ujatkamunak ujakmajrume. Nu chichamsha ashí nankaamas úuntaiti. Júiti nu chicham: Ii tunaarjn asakártasa Kristu jarutramkamiaj, Yus-Papiniun tana núnisan. ⁴ Tura

jakamtai iwiarsarmiayi. Nuyá menaintiú tsawant tsawarmanum Yus Nin iniantkimiayi, Yus-Papinium tana núnisan. ⁵ Nantakisha Pitrún wantintiukmiayi, nuyá ni akatramurín wantintiukmiayi. ⁶ Nuyañka kiniantusa (500) nankaamas Yus-shuaran wantintiukmiayi. Nú shuarnumiqsha ishichik jákaru ániawai tura untsurí tuke pujuiniawai. ⁷ Nuyasha Sántiakun tura nuyá ashí ni akatramurín wantintiukmiayi.

⁸ Ashí amúamunmasha winiasha wantintiurkamiayi, wi yajauch wekaa ain. ⁹ Wisha Yus-shuaran ti yajauch awajsa asan chikich Yus-akatramujai imianchaitjai. Nekas winia péñkerujai ni akatramuríntjai tichamniaitjai. ¹⁰ Antsu Yus ti shiir anentak winia enentáirui pujurtus péñker najataiti. Nu asamtai winia kakarmarjai takaschaitjai, antsu Yus, anenkartin asa, winia enentáirui takaakui ashí ni akatramurín nankaamas takasuitjai. ¹¹ Tura wi takaakuisha tura ni takainiakuisha mai péñkerkete. Nu chichamka mash étsereaji tura nu chichamsha átum enentáimtusarme.

Jákaru nantakiartatui

¹² Iisha “Kristu jakamunmaya nantakniuiti” tu étsereaji. ¿Itiur nuikia shuar jakamunmaya nantakchatniuiti tuinia? ¹³ Jakamunmaya nantakchatniuitkiuñkia nuikia Kristusha nantakchaiti. ¹⁴ Tura Kristu nantakchaitkiuñkia ii uajania nu penké ántrai, atumsha Kristu enentáimtarmenta nusha ántrai. ¹⁵ Núnisaitkiuñkia iisha “Yus Kristun iniantkimiayi” tákur waitruamji. Iis, nekas jakamunmaya nantakchamniaitkiuñkia nuikia nekas Yus Kristun iniantkichiuiti. ¹⁶ Jaka nantakchatniuitkiuñkia imia Kristusha iniantkichmaiti. ¹⁷ Tura Kristu iniantkichmaitkiuñkia átum Kristu enentáimtamusha penké ántrai. Tunaarmisha asakárchamu ániawai. ¹⁸ Núnisaitkiuñkia Yus-shuar jákaru ainia nu tuke meñkakarú ániawai. ¹⁹ Iikia Kristu enentáimtusar tuke Niijjai shiir pujustin náka. Tura aya jú nunkanam pujustiniatkiurkia Kristu ántar enentáimtakrin ashí nankaamas waitnen-trampratniuitji.

²⁰ Antsu imiankas Kristu jakamunmaya nantakniuiti. Ashí ukunam jakamunmaya tuke jákashinian nantakiartatna nuna Nii émtukuí. ²¹⁻²² Yaunchu Atañ tuná túramtai ashí shuar jákatin ániawai. Núnisan yamaikia Kristujain tuke atakka jákashinian nantakiartiniati. Iis, chikichik áishmanjain jákatin nankamnamiayi. Nuka Atañkauyani. Núnisan chikichik áishmanjai nantaktin nankamnamiayi. Nuka Kristuiti. ²³ Yus wakerana nuj Yusna nu mash nantakiartatui: Kristu emka-juukma áintsan émtukim nantakniuiti tura atak jú nunkanam tara ashí ni shuarín júuktinia áintsan iniantkittiawai. ²⁴ Nuñkia mash amuakattawai. Nuj Kristu ashí kapitánniasha, ashí akupniuncha, ashí núnisan jú nunkanam írúnna nunasha nupetak emesrattawai. Kristusha ashí mash ni Aparín susattawai. Tura Yus Apa ashí akupin átatui nuikia. ²⁵ Iis, júnsan átatui. Emka Yus Apa ashí ni nemasrín nupetak Kristun susattawai akupin atí tusa. ²⁶ Tura ni nemasrín nupetak ashí amúamunmasha jákatinuncha nupetakattawai. ²⁷ Yus Apa ashí Kristun súsaiti ashí akupin atí tusa. Yus-Papinium tu áarmaiti. Tura “ashí Kristun súsaiti” táyat Yus Apancha susamuiti tátsui. Antsu Yus Apa ashí Nin susa asa Niñki súsachmaiti. ²⁸ Tura Yus Apa ashí mash ni Uchirín Kristun nekas susamtai Kristu nuikia ashí akupin ajas atak ni Aparín mash awañtuki núnisan surumaktatui. Nuñkia Yuska tuke ashí nankaamantu átatui.

²⁹ Ayu. Tura shuar jakan enentáimtusar imiantinniasha ¿urukamtia nuna túruinia? Jákaru nantakchatniuncha ¿urukamtai imianainia?

³⁰ Iikia ¿urukamtai tuke jániñkiaruitiaj? Nantakchatniuitkiuñkia ántar waítsaintji. ³¹ Atsá, penké áintsachuít. Nu asamtai átum ii Uuntri Jesukristu enentáimtakrumin wi shiir enentáimtajrume. Tura wisha tuke tsawantín ti itiurchat pujakun jákatniua áintsan pujajai. ³² Jakamunmaya nantakchatniuitkiuñkia wi ántanak kajen shuarjai Ipiasiunam máaniakuitjai. Maa, uunt yawáa áinis kajen áрмаi. Wats, núnisaitkiuñkia antsu “yurumár nampektai, kashin jákashtatjik” titiai nuikia.

³³ Ananawairap. “Péñkeraitiatam yajauch shuarjai tsanñkia wekakmeka yajauch máatrattame” tiniu ániawai. ³⁴ Tunáa ikiuakrum péñker wekasatin shiir enentáimpratarum. Iis, shuar Yúsán nekainiachu tuke awai. Atumin natsaagruk tusan tájarme.

Iniantkimiú ayash átatna nu

³⁵ Shuarsha inintruschaimpiash ¿jákarusha itiurak nantakiarat. Nantakiarsha warí ayashniak takusarat? ³⁶ Enentáimtsuk inintraui. Jínkiaí araamsha jaka áintsan amúatsuk. Túrayat tsapaatsuk. ³⁷ Tsapaitniurjsha araatsme antsu triku jínkiaichisha chikich áraaka jínkiaichirjsha araame. ³⁸ Nuyá tsapaakuisha Yus wakerana núnisan ní tsapaitniuríncha súawai. Tura ankant ankant tsapaitniurínkia súsaiti. ³⁹ Núnisan ashí ayash métecha ániawai. Áentsnaka niishaaiti. Kuntinniasha niishaaiti. Nanamtinniasha namaknasha niisháa ániawai. ⁴⁰ Nayaimpiniam yaa írui tura jú nunkanam írúnna nujai nusháa ímín ániawai. Nayaimpinmayasha nunkeyasha shírmari nushaiti. ⁴¹ Etsá wincharjsha nantunusha yáanusha mash nushaaiti. Nuamtak yaaksha chikicha wincharjñkia chikichnajañkia

nushaaiti. ⁴² Núniskete jaka nantaktincha. Káurtinnium iwiarsam jákashtinnium nantaawai. ⁴³ Antra nu iwiarnawai, shiira nu nantaawai. Kakarmachua nu iwiarnawai, kakarma nu nantaawai. ⁴⁴ Juyá ayash iwiarnawai, nayaimpinmaya ayash nantaawai. Juyá ayash átsuk. Núnisañ nayaimpinmaya ayashsha awai.

⁴⁵ Yus-Papinium nuní áarmaiti:

“Emka áishmañ ni naari Atañ, aents ajas iwiaaku ajasmiayi.” Tu áarmaiti. Ukunmañka, yamaram Atañka áintsañ, Kristu, wakan asa, ashí áentsun nekas iwiaaku átinian susamniaiti. ⁴⁶ Nayaimpinmaya ayashkia émkachuiti antsu juyá ayash émkaiti tura nuyá nayaimpinmaya nu. ⁴⁷ Emka áishmañ nun~~ka~~jajai najanamu asa nun~~ka~~yajaiti. Ukunmaya áishmañsha ii Uuntrj Kristu asa nayaimpinmayajaiti. ⁴⁸ Atañka áintsañ ainia nusha juyá ayash~~tin~~ áiniawai. Kristu áintsañ ainia nusha nayaimpinmaya ayash~~tin~~ áiniawai. ⁴⁹ Yamái juyá áiniakur ukunam nayaimpinmaya ayash~~tin~~ ajastatji.

⁵⁰ Juna tájarme, yatsuru. Ayash númpentin asa nayaimpiniam, Yus akupeana nuj, wayachminiaiti. Iis, káutañkia káurchatniunam wayachminiaiti. ⁵¹ Yaunchu uukma nu yamá nekaatarum. Ashí jákashtatji, túmaitiatar ashí yapajniáttaji. ⁵² Tura pusar^l muítsarniñ ti wárik yapajniáttaji. Tura ashí amuukai tusa umpuariatui. Nú umpúamunmasha Yus-shuar jákaru ainia nu atak jákashtinian nantakiartatui. Iisha nuñ yapajniáttaji. ⁵³⁻⁵⁴ Jú kautaiñkia yamá jákatniuitiat káurchannia ajastiniaiti. Túrasha jákachmin átatui. Nu túrunamtaisha Yus-Papinium aarma uminkiatstawai:

“Jákatniun Yus nupetak amukuíti. ⁵⁵ ¿Itiur jákatjik yamaikia. Jákatniusha itiur nupettamkan mantamataj?” Tu áarmaiti.

⁵⁶ Yaunchu Yus akupkamu tiniu asamtaí shuar tunáa tura jákatniuiti. ⁵⁷ Yamái antsu ii Uuntrj Jesukristu túramujaj jákatniunka Yus nupetkaiti. Tura incha nujaj uwempratniun amaakui shiir yúmiñkiaji.

⁵⁸ Nu asamtaí, aneamu yatsuru, kakaram ajasrum yawetsuk nan~~ka~~amas Yusa takat~~rj~~ takastarum. Ii Uuntrj Kristujaj tsaniñkia takaarum nuka pen~~ké~~ ánrachuiti. Nu paant nékarme.

16

Yusa kuit~~rj~~ irurtin

¹ Yusa kuit~~rj~~ irurtinkia, Yus-shuaran Karasea nun~~kan~~am tímiaj núnisnak atumniasha tájarme. ² Ashí tumiñtin, Yus súramna áintsam akankam ikiusta. Nújaj~~ñ~~kia wi jeattaj nuj yaunchu akankamu mash irurmin átatui. ³ Nuj jeancha átum anaiyarmena nu shuaran papijaj Jerusarénnum akupkattajai. Tura atumí kuítrumin aj~~ñ~~sha ii yachin sústartatui. ⁴ Wisha wéminiaitkiuñkia wijaj wéartatui.

Papru irastatna nuj

⁵ Wi Masetúnia nun~~kan~~am wétiniaitjai tura nuyá Kurintiunam jeattajai. ⁶ Nuñsha untsurj tsawant pujuschatjash. Ishichik nantusha wéchanianum pujuschatjash. Tura wi atak wéakui atumsha yáintkiarum shiir akuptukchattarpash. ⁷ Aya wárik nan~~ka~~amaktinian nakitiajai. Antsu Yus wakerakuñkia untsurj tsawant atumjaj pujustaj tajai. ⁸ Tura juñ Ipsiunam pintikustis nampernum pujustajai. ⁹ Juñ~~ñ~~kia Yusa takat~~rj~~ ti shiir takastin awai. Tura untsurj shuar wi takaamun nakitiainiawai.

¹⁰ Timiutéu nuj jeamtaj~~ñ~~kia, shiir awajsatarum; sapijmiakaj~~ñ~~. Niisha wijaj métek Yusa takat~~rj~~in takaawiti. ¹¹ Nu asamtaí nakitirairap. Antsu yáin~~kr~~um wini shiir akupkatarum. Chikich yach~~ñ~~jaj tatí tusan nákajai.

¹² Apurusnasha chikich yach~~ñ~~jaj wini írmasartí tusan ti seamjai tura pen~~k~~esha nakiarmai. Kame nii an~~ka~~nt aku nuj winishtimpiash.

Áujmamsamu

¹³ Aneara tariarum Yus nekas enentáimtustarum. Áishmañchakaitrum, kakaram ajastarum. ¹⁴ Anen~~ka~~rtamujaj mash túratarum.

¹⁵ Ayu, yatsuru. Estepanasa shuarj ashí emka Akaya nun~~kan~~am Yus-shuar ajasarman nékarme. Niisha Yus-shuaran yáin~~ta~~jtars tuke takainiawai. ¹⁶ Niisha tura ashí niijaj métek yáin~~ki~~ar takainia nú shuar seatmana nu tuke túratarum. ¹⁷ Estepanassha Jurtunátusha Akaikiusha atum~~ñ~~yá táarmatai shiir waraajai. Átum yajá pujakrum tujintiarmena nuna túrawarmai. ¹⁸ Niisha winia shiir enentáimtikrurarai. Núnisañ shiir enentáimtikramprattarme. Nuní aents tuke shiir enentáimtustiniaiti.

¹⁹ Asia nun~~kan~~maya Yus-shuar amikmáatmainiawai. Akirasha ni nuwé Prisirajaj~~ñ~~sha ashí Yus-shuar ni jeen Yus-Chichaman irunturarusha Jesusa náar~~ñ~~in amikmáatmainiawai. ²⁰ Ashí ii yachisha amikmáatmainiawai. Nuámtaksha shiir awaj~~n~~aisrum amikmáaniatarum.

²¹ Wi Papru asan ju~~ch~~iniak winia uwe~~ñ~~rujaj áaran amikmaajrume.

²² Ii Uuntri Jesukristun aneachuka yajauchiniam yumin²³kramu atí. “Ii Úuntri, wari tatá.”

²³ Ii Uuntri Jesukristu yainmakarti. ²⁴ Jesukristunu asakrumin atumin ashí ti aneajrume. Nu atí.

Papru KURINTIUNMAYA SHUARAN Ataksha papin aar akuptukma

Kurintiunmayq Yus-shuaran Papru áatramiania nu

¹ Wi Pápruitjai Jesukristu akatramu. Yus nuna wakerakui ni akatramurj anaikiamuitjai. Ii yachj Timiutéujai Yus-shuar Kurintiu péprunam írurtrumna nuna áatjarne. Kame ashí Akaya nunkanam Yusna ajasurmena nunasha áatjarne. ² Apa Yussha, ii Uuntrj Jesukristusha shiir enentáimturma ásar imiatkinchanum tuke shiir pujustinian yáinmakarat tusan wakerajrume.

Papru wáitsamuri

³ Ii Uuntrj Jesukristu Aparj, ii Yusrj ana nuna naarj uunt awajsatai. Niisha ii Aparjnti. In waitnentramaji. Tura Niisha ii Yúsrnti. Tuma asa in tuke atsantamji. ⁴ Ii wáitajnia nuj Yuska in atsantamji. Tura in atsantamjinya nútiksarik iisha chíkich shuar wáitajnia nuna atsankrarat tusa túrutmaji. ⁵ Warí, Kristu wáitsamuri núkap pachiinkiaitjinya núnisrik ni atsankramurj núkap pachiinkiaitji. ⁶ Tuma asamtai, wáitajnia nu, Yusa uwentikrampratniurj tura ni atsankratniurj atumsha takustarum tusar wáitajni. Tura Yus in atsantampramjinya nu, Yusa uwentikrampratniurj tura ni atsankratniurj átum takustarum tusar atsankramuitji. Wats, átum uwentikramu tura atsankramu asarum, ii wáitsajnia nútiksarmek wáitajnyarum shiir enentáimturma katsuntramniaitrum. ⁷ Tura “túrtawai” tu enentáimtajrume. Warí, átum iijjai métek wáitsaitrume. Núnisanj iijjai métek Yus atsantamsurmek.

⁸ Yatsurtiram, iikia Asia nunkanam ti itiurchat wáinkiamjinya nu nekaatarum tusar wakeraji. Imiá itiurchat wáinkiar iikia katsuntratin jeachmaji. ⁹ Nu itiurchatnumiá “iwiaaku jíinkishtatji” tu enentáimsamji. Túrusha “iikia tujinchaitji” tu enentáimtumatsuk, antsu jakamunmayan iniannua nú Yúsan enentáimtusarat tusa nu túrunamji. ¹⁰⁻¹¹ Jakamnia itiurchatnumiá Yuska uwentikrampramji. Tura yamaisha uwentikrampratajtsa pujurtamji. Tura atumsha in Yus áujtakrumniqkia “Yuska tuke uwentikramprataji” taji. Tura unsurj shuar Yus aujsa asakrumin, ii uwempra asakrin untsurj shuar Yúsan yumjnsartatui.

Kurintiunam wau wéchatniun Papru ujakmiania nu

¹² Yatsurtiram, ju nekaatarum tusar wakeraji. Ju nunkanam pujusar tura nekaska atumjai pujusar anañtsuk tura Yus umirkar wekaimji. Aya ii nekatairjijain wekaichamji. Antsu Yus in waitnentrama asa péñker wekasatniun yainmakmaji. Nu nekaar shiir enentáimji. ¹³ Áatjarne nu páantaiti. Átum áusjarum nekaatin jearmena nunak aarjai. Chikichan nekaachminian aatsaji. Péñker nekaatarum tusan wakerajrume. ¹⁴ Ishichik nékayatrumek nú núkap tuke nekaki wetarum tusan wakerajrume. Nuñkia Jesukristu tátinia nú tsawantaj átum winia shiir enentáimtursattarme. Tura átum péñker wekasa asakrumin shiir enentáimtustatjarne. ¹⁵ Tura ii shiir enentáimtunij nuna nékakun ataksha Yusá waitnenkartutairj nekapsak tusan ataksha atumjin irastinian wakerimjai. ¹⁶ Masetúnia nunkanmaani wéakun írurka nankaikitjarum tusan enentáimmajai. Tura wáketkuncha ataksha listajrum tusan wakerimjai. Túramtai wi Jutía nunkanam weakui átum yáintkiatarum tusan atumín listinian wakerimjai. ¹⁷ Nuñkia çurukamtai túrachmaj? ¿Péñker enentáimtsukek “wetajai” tímiaj? ¿Wi Yus-shuarcha nunisanj, jimiará chichamntinaiiti, tú enentáimtusarumek? ¹⁸ Núchaiti. Yus tana nuna tímiatrusanj umiana nútiksarik iikia ii chichame umiktai tusar wakeraji. Jú chichamaik, “Ee, atsa” tátsuji. ¹⁹ Wisha Serpanujai Timiutéujai Yusa Uchirj Jesukristunum ujakmajrume. Niisha ju chichamaik, “Ee, atsa” tíchaiti. Antsu nii tana nuna tuke umíawai. ²⁰ Niijjaishia Yus tana nu tímiatrusanj uminiui. Tuma asamtai Jesukristu enentáimtakur “nii tana nuna nekas túrtawai” tu enentáimji. Tu enentáimtar Yusna naarj shiir awajeaji. ²¹ Atumniasha incha ikiakátmajnia nu Yúsaiti. Kristunu ajasu asakrin túrutmaji. Tura anaitiamak Niiniu awajtamji. ²² Tura ukunam ii achiktatjinya nuna, nekas amatatjai tusa Yus ni Wakanj in enentáin apujturmajai. Nujai Niiniuitji tusar paant nékaji.

²³ Atumjin itiurchatan wáinkiajj tusan nakitiakun atumj péprurj Kurintiunam jeachmaji. Wáitrakuñkia “Yus iirsati” taji. ²⁴ “Aya wi tájana nútiksarmek Yus enentáimtusarum” waantu enentáimtusar nu titin nakitajai. Yus nekas enentáimtusarum kakaarume. Antsu nekas warastarum tusar wakeraji.

2

¹ Tuma asamtai, atak kúntuts awajsajjrum tusan nakitiakun, “atumí tunaarj íwiartsurminij jeashtatjai” tímiajai. ² Wí atumin kúntuts awajkuncha, ¿yaki winia waramtikrusat? Aya atumek, wi nuik kúntuts awajsamjarmena nuke waramtikrusminiaitrum. ³ Wi jeakun atumí tunaarj íwiartsurminij kúntuts enentáimsajj tusan nakitiakun, nu papin áarmaj nútiksanak áarmajai. Warí, atumketrum winia waramtikrustin. ⁴ Nekaatarum. Nu papin áarmiajai. Kúntuts awajsatjarum tusan áarchamjai; antsu ti aneajrumna nu nekaatarum tusan wakerakun áatramajrume.

Yajauchin túrana nu tsanukuratin

⁵ Túrasha kúntuts awajtusmia nu, aya wíniak kúntuts awajtuschamai. Antsu atumni-asha ishichik kúntuts awajtamsayi. Patasa chichasajj tusan “ishichik” tajai. ⁶ Kame nu áishmañkan iruntra chicharkarum wáitkiasmarum nuke máakete. ⁷ Antsu yamaikia tsanukuratniuitrum. Shiir enentáimtikratniuitrum. Niisha imiá kúntuts pujus nú arant ajasájin tusarum túratniuitrum. ⁸ Túrakrum nii nekas anearmena nu paant iniaktustarum tusan seajrume. ⁹ Kame “aajna nuna umirtukartimpiash” tímiajai. Kame nuna nekaataj tusan wakerakun nu papin nuik áatramjarme. ¹⁰ Átum tsanukurearmena nú shuaran wisha núnisan tsanukureajai. Tura tsanukuratin ákuinjia, wi tsanukurajna nu ashí atumnia enentáimtusan, Kristu íimmianum túrajai. ¹¹ Kame uunt iwianch Satanás in emestamprata-jtsa wakerana nusha nékaji. Tuma asamtai, túrawajin tusar tsanukuratniuitj.

Trúas péprunam Papru juákchamiania nu

¹² Kristunu shiir chichaman Trúas péprunam etserkatajtsan jean, ti péñker takastinian wáinkiamjai. ¹³ Túrasha ii yachí Titium wáinkiachu asan, shiir enentáimsatniun tujinkiamjai. Tura asamtai Trúasnumiá aentsun áujsan ikiukiaran Masetúnia nuñkanam wémiajai.

Kristujaj nupetkamniaitji

¹⁴ Kristu Jesusajj Yuska incha nupetmamtikramak ewekatmasuitji. Tuma asamtai Nincha ti shiir yúminsa pujajai. Tura kukuj' kunjúakui, ashí nékainia núnisan ii etserkamujaj Kristu shiir chichamen Yuska ashí aentsun nekamtikiainiawai. ¹⁵ Kristu in pujurtamu asamtai Yusajj nekapsamka iikia kunjúaji. Ii kunjúajnia nuna uwemtikramu ainia nusha tura uwemtikrachma ainia nusha nekapramnia ainiawai. ¹⁶ Menkakatniunam weena nuka ii kunjúajnia nuna jakamnia mejea nekapramji. Tura iwiaaku átinnium weena nuka iwiaaku átin kunjúa nekapramji. Maa, nu túratniuncha ¿yaki jeá?

¹⁷ Kame uuntsurj aents kuítian achiktaj tusar Yusa chichamen yapajinia núniskechuitji. Antsu Kristunu ajasu asar, Yus akupkamu asar, Yus íimmianum anantsuk esetsar étsereajai.

3

Yamaram chícham najanamu

¹ ¿Nu tákurninjia, “ataksha ninji waantu enentáimtumainiawai,” tu enentáimsarmek? ¿Chíkich túruinia núnisrik, “Ju áishman nekas Yus-Chichaman etserin áiniawai” tusa papí aarma atumin iniaktustinkiaitjai? ¿Chíkich iniaktustin nú papí atumin seatniukaitjai? ² Atsá. Átumka ii papirja núniskechukaitrum. Ii enentáin nu papí áarmaiti. Tura nú papí áujsatniua núnisan ashí aents atumí túramurj wáinkiar ii etserkamaj nu, Papru nekas Yusa katakrinj takaanai tura nekaamnia áiniawai. ³ Iis, tátsujak. Papí aarma núnisketrum. Nu papí Kristu áarmaiti tura iisha nú papí atumin súaji. Tíntiajajincha antsu iwiaaku Yusa Wakanjijaj áarmaiti. Kayanmasha áarchamuiti; antsu shuara enentáin, auka, áarmaiti.

⁴ Kame Kristunu asar, Yus enentáimta asar, nusha tímniaitji, taji. ⁵ Ju nékaji; imia iik penké tujinkiaitji. Antsu ii túrajnia nu Yus ni kakarmarjin súramkurin túrajni.

⁶ Yamaram chichaman Yus najanania nuna, incha péñker etserkatniun suramsaitji. Yaunchu aarma chichamnum, ashí takamtsuk umirkachrikia tuke jakamniuyaji. Antsu yamaram chichamnum, Yuska ni Wakanjijaj yamaram wekasatniun súramji. Yusa kakarmarjijaj nu chicham étserji. ⁷ Yaunchu chichamnaka kayanam aar Yus Muisaisan susamiayi. Susamia nuj, Muisaisa yapi ti wincha ajasmiayi. Túrunamtai Israer-shuar ni yapin íistinian tujinkiarimiayi. (Túrasha nu wincha mushatmaki wémiai.) Túrasha nu chichaman shuar umirkatniun tujintiakui, nu chichamsha aya tuke jákatniunam shuáran ejemiayi. Túmayatañ winchajaj susamuyayi. ⁸ Tura yamaram chichaman Yusa Wakanjijaj súramna nu, nujaj nankaamas shíiraiti. ⁹ Kame mesertinnium ejeana nú chicham winchajaj susamuyayi. Tura nujaj nankaamas Yúsnum ejeana nú chichamka Yus íimmianum péñkeraiti. ¹⁰ Iista; yamaram ana nu imiá shiir asa, yaunchu wincha amia núnaka mushatmamtkiui. ¹¹ Núkap arur pujuschamnia nu wincha áchamkia. Kame tuke átinia nuke nujaj nankaamas shíiraiti.

¹² Nu nékakuur ti paant étserji. ¹³ Muisais túramia nútiksarik túratsji. Ii uuntri Israer-shuar ni yapin wincha ajas menkaan wáinkiaráin tusa tarachjái ni yapin Muisaiska nukumakmiayi. ¹⁴ Tura nu arantcha Muisaisan anturkarmia nuna enentáisha nukukmauyayi. Nekaatniun tujinkiarimiayi. Tura yamaisha núnisan yaunchu aarma chichaman áujsam antukar nekaatniun tujintiainiawai. Kristu enentáimtuschatin ni enentáin nukukma nu yapajjáchmaiti. Aya Kristujái nuka yapajjáimniati. ¹⁵ Yamaisha Muisaisa áarmanin áujsar nékainiatsui, ni enentáimmiari nukurkamu asa. ¹⁶ Tura aencha ni enentáí yapajjá Uuntna ajasmataikia ni enentáimmiariya nukurkamu ana nu jusamuuti. ¹⁷ “Uunt” tájinia nu, Yusa Wakanjiti. Uunt Yusa Wakanj pujana nu ankant ajastiniati. ¹⁸ Nuke asantai, iisha ii yapí tarachjái nukukchamu asar íspikia núnisketji. Uunt Kristu péngerj iniakmaji. Kristu péngerj nú nukap takaki wéakuur, Kristujái métek ajastasa pujaji. Yusa Wakanjia nuna túrawai.

4

¹ Yus in waitnentrama asa ni chichamen etserkatniun ataktamsaitji. Tuma asantai yawetsuk takaaji. ² Uuka túratin ana nuyá tura natsanmaj ana nuyasha kanakmiaji. Anankatai tusar wekaatsuji. Tura Yus-Chichamjái nakuratsji. Étserkur aya Yus-Chicham tana núchik étserji. Ashí aents nuna antukar, “nekas núiti Yus-Chicham” tiarat tusar túraji. Wi tájana nuna Yus nékawai. ³ Uwempratin Chicham ii étserjinia nu páantaiti. Áyatik menkakatniunam weena nu “páantchaiti” tuiniawai. ⁴ Uunt iwianch, ju nuñká uuntri ana nu, nu aentsu enentáin ukusturuiti. Uunt Kristunu shiir chichaman ii étsermajai tsáapnin enentáimpraráin tusa ukustawai. Nu Kristu Yúsán ímiatrusan nakumui. ⁵ Iisha étserkur, Jesukristu ii Uuntriñti tu étseréaji. Iikia atumí úntriñtji tátsuji. Antsu, Jesus ii uuntri asantai, atumj yáintriñtji, taji. ⁶ Yaunchu kiritin aan Yus tsáapin ati tusa tsáapnin awajsachmakia. Nú Yúsaiti ii enentáin tsaapnin awajtamsamia nu. Nu tsaapnijai ni shiirmarjñ, Jesukristu iniakmia nuna, ashí aents nekaawarat tusar Jesukristunun étseréaji.

Yusak enentáimtusar wekasatin

⁷ Nu tsáapin imiá pénger ana nuna ii ayashjñ Yus ikiusuiti. Tura ii ayashj kakarmachu, nuwe najanamua áanin asantai, warí, kakaram ájinia nu Yúsnumiachukait. Ii ái nuna nekaawarat tusa Yuska ni tsáapnintriñ ii ayashjñ ikiusuiti. ⁸ Tuma asantai ii itiuurchatrj árentmaku árinñ tuke jñinkimniati. “Itiuurkatjñk” taji, túrasha Yus yáinmaji. ⁹ Aents pataatur-mainiakrincha Yus ikiurmatsji. Emesrataj tukamá tujintiainiawai. ¹⁰ Kame Kristun máataj tusa tuke wakariarmia núnisan incha tuke mantamataj turamainiaji. Túrasha jákachu asar Kristu kakarmarj ii ayashjñ iniakmaji. ¹¹ Iisha Jesusna ajasu asar wekaajnia nu tuke tsawant tsúumainiun jasattuk ajaji. Túrar ii ayashj jakamniatiat nu ayashñium Jesusa iwiaakmarj paant iniakmaji. ¹² Iisha Yus-Chicham étserkur ii ayashjñ jasattuk ajaji, tuma ajñ atumsha umikiu asarum nekas iwiaaku atin wáinkiarne.

¹³ Yus-Papinium yaunchu áarmanum: “Yúsán enentáimtusmajai, tuma asan etserkamjai” tátsuk. Iisha núnisrik Yus enentáimtusar wekaaji. Tuma asar étserji. ¹⁴ Yus kakarmaiti. Uunt Jesusan jakamunmayan iniantkimiayi. Incha núnisan Jesusjai iniantamkittiaji. Tura atumjai métek ni pujamunam juramkittiaji. Nusha paant nékaji. ¹⁵ Atumsha unturj aencha Yus-Chicham antukakrumin, Yus yáinmakurme. Tuma asantai atumsha nútiksarmek Yus yumñsarum pujarme. Nujai Yusa naarj uunt awajsamuuti. Nu nekaar wáitsatin ashamatsji. ¹⁶ Tura yawéatsji. Ii ayashj amuiki wéakuisha ii enentáinjkia yamaram ajaki wéawai. ¹⁷ Warí, ukunam tuke shiir pujustajinia nu enentáimtakrikia, ju nuñkanan wáitiajnia nu, ti itiuurchatiait, aya yamaiya asa tiikia itiuurchatiait, tura wárik nankaamawai. Túrasha ii itiuurcharijjai Yuska ti shiir ana nuna amuukachmin ana nuna nukap suramsattaji. ¹⁸ Tuma asantai wáinjinia nu ti enentáimtatsji. Antsu wáintsujnia nu nekas enentáimtaji. Wáinjinia nusha aya yamaiyáiti. Antsu wáintsujnia nuka tuke amuukachminiaiti.

5

¹ Wats ju nékaji. Nayaimpiniam ii shiir pujustinian amuukachmin ayashin Yus najanamun ikiurtamsaitji. Aents najanachmaiti nu. Tuma asantai ii ayashj emesnakuisha warí itiuurtamajia. Nuka aaka núnisan amuukamniati. ² Ju ayashñium pujusar wáitiaji, taji. Yamaram ayash nayaimpiniam pujana nu achiktai tusar wakeraji. ³ Ayashñichu ajasajj tusar, yamaram ayashñin ajastaisar wakeraji. Pushia núnik yamaram ayash in nukurmaktai tusar wakeraji. ⁴ Tura ju ayashjai pujusar wáitsar pujakur shiir enentáimtusaji. Arut pushi áiktinia núnisrik ju ayash ikiuktiaitsar tátsuji. Antsu yamaram pushi entsartinia núnisrik yamaram ayashñium tuke pujusmí tusar taji. Iista, ju ayash amuukachminkiat. Yamaram ayashñium pujusar tuke iwiaaku pujustaji. ⁵ Yamaram ayashñin ajastinian iwiarturmaruitjinia nu Yúsaiti. Tura nekas túrattajai tusa ni Wakanjñ suramsaitji.

⁶⁻⁷ Ju nékaji. Ju ayashnium pujajnia juínkia Uunt Jesusjaj pujatsji. Tuma asantai, wáinjinia nu ti enentáimtutsuk Yus enentáimtusar tuke shiir enentáimsar wekaaji. ⁸ Tura ju ayashniumia jíinkir Uunt Jesusjaj tuke pujustaitсар wakeraji. Tura túrattaji tu nékaji. ⁹ Tuma asantai ju ayashnium pujakrishá tura ju ayash ikiukrishá Uunt Jesus tuke waramtikсатаi taji. ¹⁰ Warí, ju ayashjaj ii túramajnia nu ujakam, “pénkeraiti”, “yajauchiiti” Kristu turutit tusar, ashí iisha Uunt Kristuj jeatnuiitji. Tura ii túramujaj métek akirmaktatji.

Kristun waramtikсатаj taji

¹¹ Tuma asantai ju nékaji: Uunt umirkashtin ti tsúumainti. Nu nekaar ashí shuar Yus-shuaran awajсатаj tusar ti takaaji. Tura incha Yus nékarmaji. Tura ii túramurj átumka atumí enentáin paant nékarme, taji. ¹² Ataksha, “wi pénkeraitjaj” tusar nu tátsuji. Antsu, ii túramu nekáa asakrumin enentáiniam ana nuna enentáimtsuk aya páatkea nuaj warainia nú shuar tsanumprutmainiakui yaintkiatarum tusar taji. ¹³ “Wáurkaiti” turamainiajias. Nusha warí, itiuertamajia. Ashí túrajnia nu, Yus aneakur tura atumín yáintai tusar túraj. ¹⁴ Kame ashí ii túrajnia nu Kristu anenkrattairjjaj túraj. Kame ju nékaji: Kristu ashí shuaran jaruku asantai, Yus íimianum ashí iisha jaka núnisaitji. ¹⁵ Kristu ashí shuaran jaruk nantarkimiayi. Tuma asantai Kristunam iisha iwiaaku pujajnia juí, iik wararmamtsuk, Kristu umirkatnuiitji. ¹⁶ Tura yamaisha aya ni ayashj írsar, “nu shuar pénkeraiti” tura “nu shuar yajauchiiti,” titin tujintiaji. Kame yaunchu aya ni ayashj írsar “Kristu yajauchiiti” tu enentáimsamijai. Tura yamaikia yapajjár, esetsar enentáimkiur “Kristu Yusa Uchirjinti” taji.

Kristujaj yamarmaitji

¹⁷ Tuma asantai, Kristunu ajasúka yamaram najanamuiti. Yaunchu enentáimtaiirj menkakayi. Antsu núnaka íkias ni enentáimtaiirj nekas yamarmaiti yamaikia. ¹⁸ Nunasha Yus túrait. In nawampramkattsa Kristun akupturmakuitji. Tura nu etserkatniun incha ataktamsaitji. ¹⁹ Yuska in tunaarjinniutin asutiámatniun nakitiak Kristujaj nawampramkamijai. Tura incha Yus-shuartin nu ujaktinian ataktamsaitji. ²⁰ Kristunu ataksamu asar, Yuska “winia Uchirjaj nawamnaikiatarum” tusa ii wenejaj atumin seatmarme. Tuma asakrin, Kristu náarjin “túratarum” tájarme. ²¹ Kristuka tunaan penké túrachmiayi. Túmanak ii tunaarjin Yus Kristun makuumiayi. Nuna tura Kristunam makuuchmin awajtamsamijai.

6

¹⁻² Ni Papirjin Yus yaunchu Isayasan juna tímiayi:

Tsawant jeamtai, ame seatmena nuna anturkamjame. Uwempratín tsawant jeamtaisha yainmajme.

Wats yamaikia Yus seatin jeayi. Yamái Yúsnum uwempratín jeayi. Tuma asantai, iikia Yusa takatrin pachitkijania nu, Yusa anenkrattairj pénker achiktaram tusar sea-jrume. ³ Tura “Papru etserkamurj ántrai” tíarain tusar chikich yajauch enentáimtiktsuk pénker wekaaji. ⁴ Nekas Yusa takarniurjntji nuna paant nekaawarat tusar wáitayatrik, atsumayatrik, itiuachatnum pujayatrik shiir katsuntauji. ⁵ Ju itiuachat wáinkiamji: katsumpramkarmaji; sepunam enketmáwarmijai; charáa-charáa awajtamiarmijai; takatcha ti itiuachat takasmijai; kanutsuk pujumijai; tura tsukasha ti tsukammijai. ⁶ Tunáa nakitrar wekaaji; Yus-Chicham unuimiátraitji; shiir enentáijaj katsuntrar wekaaji. Chikich shuar pénker awajeaji; Yusa Wakanj pujurtamkurin shuar nekas aneaji; ⁷ nekas chicham ana nu étsereaji; tura Yusa kakarmarjsha nú paant iniakmaji. Tura ni nemasrin nupettukain tusa suntar ni tantarin júana núnisrik iisha ii nemasri íwianch nupettamkajj tusar ii Yusri tuke umirkar wekaaji. ⁸ Shuar shiir enentáimturmainiakrincha, yajauch enentáimturmainiakrincha, pénker chichartamainiakrincha, yajauch chichartamainiakrincha tuke Yusjaj shiir wekaaji. “Wáitruiniawai” turamainiakrincha tuke nekas chichaaaji. ⁹ “Nu aents nékatsji” turamainiakrincha Yusnumka nékanji; jákatin tsúumainnium wekayatrik tuke iwiaaku pujaji; asutiámuitiatrik mantamnatsji. Yusa takarniurjntiaj nu ashí nuajaj paant nekaamniaiti. ¹⁰ Kúntuts pujayatrik ii enentáinkia waraaji; kuítrinchaitiatrik chikich shuar kuítrintin awajeaji; penké takakchiatrik ashí wáinj.

¹¹ Yatsurtiram, Kurintiunam pujarmena nu, ashí paant ujakchamkajrum. Ti aneajrumna nu nékarme. ¹² Wikia atumin paant chichastajtsan wakerajrume; antsu átumka anenttsuk paant chichastin nakitarme. ¹³ Winia uchirua núnisnak chichaaajrume; wi tuke paant chichaaarjarmena núnisrumek atumsha atumí enentáin ana nu, paant ujakatarum tusan seaajrume.

Yusa jeentji

¹⁴ Yus-shuar Yus-shuarchajaj tsaninktinian enentáimsashtiniaiti. Warí, ¿Yusan umirna nú shuar, iwianchin umirna nú shuarjaj métek enentáimiainiawak? ¿Tsáapnisha kiritjaj máimtek ámkiait? ¹⁵ ¿Kristuka uunt iwianchajaj nawamnaikiamniakait? ¿Yus-shuar Yus-shuarchajaj

tsanin shiir pujusminkiait? ¹⁶ ¿Iwiaaku Yusa jeencha ántar-yus pujustinkiait? Tura atumsha iwiaaku Yusa jéntrome. Yus Niñki ni Papirjin juna tíchamka: Niiijai tsaninkia pujusan, niiijai wekasartatjai tura ni Yusri átatjai; tura niisha Wíi aents ajasartatui.

¹⁷ Tuma asamtai junasha tímiyai:

Nii matsatainia nuyá jínkitiarum, tura niija kanaktiarum, tawai Uunt Yus; tura yajauch ana nu antiñkiairap. Túrakrumninkia awayattajrume.

¹⁸ Tura atumí Aparj átatjai; átumka winia uchir átatrume. Nuna Wi imiá kakaram uunt Yus asan tajai. Tu áarmaiti.

7

¹ Tuma asamtai aneamur yatsurtiram, nusha, Yus tímia nu, in túramji. Nu tuma asamtai ii ayashí tura ii enentáisha yajauch ajasain tusar, ashí tunáa ana nuyá kanaktinaiitji. Túrar “Yusak nekasa ii úntrinti” takur, ii ayashísha, ii enentáisha takamtsuk tuke tsawant Yus íktustinaiitji.

Kurintiumaya shuar enentáimprarmatai Papru warasmiai

² Ataksha nawamnaikiatai. Iikia shuar yajauch awajsachmaji; yajauch jintinrachmaji; anañkachmaji. ³ Makuutai tusan nuna tátsujai. Antsu nuik tíchamkajrum, iwiaaku pujakrishajakarsha átumka ii enentáin áchitkiarme. ⁴ Araantusuk áatjarome; shiir enentáimjai. Itiurchatnum pujayatnak, atumin enentáimtusana enentairuj kakaram enentáimsan waraajai.

⁵ Jui Masetúnianum penké ayamprachmaji. Antsu ti wáitsamji. Áentsnumia itiurchat wáinkiamji, tura ii enentáijainkia ashamkamji. ⁶ Tura kúntuts pujakrincha Yus ikiakátmartinian nékawai. Tuma asamtai Titiún akupturkamai. Nujai winia enentáirun ikiakármái. ⁷ Tura átum níi ikiakármarmna nuna Titiu ujatkamai. Nuna antukan ti warasmajai. Títiuka átum írsatin wakerarmena nuna ujatkamai; túrunamia nuna kúntuts enentáimmarumna nusha, tura winia anentu asarum enentáimturumna nuna ujatkamai. Nuna antukan nú nankaamas warasmajai.

⁸ Papi nuik akupkamaj nu áujсарum kúntuts enentáimprarme; núnaka nékajai. Túrasha ii akupmainchu túraitjai tátsujai. Eta, nuikkia tímiajai, túrasha yamaikia tátsujai. Papi áujсарum ishichik kúntuts enentáimprarmna nuna nekaan waraajai. ⁹ Kame kúntuts enentáimprakrumin waraatsjai. Antsu atumí tunaarij nekaarum kúntuts enentáimprarm atumí enentáij Yusaj yapajjá asakrumin nuna nekaan waraajai. Kame Yus wakerana nútiksarmek kúntutsrum katsuntearme; tuma asamtai iikia nu papijjai yajauch awajsachji. ¹⁰ Nekaatarum. Yus wakerana nútiksaj kúntuts katsunteakka ni enentáij Yúsnun yapajjáwái. Nuñkia ni tunaarija uwempraiti. Nuka “túrmainchu túraitjai” tíchamniaiti. Antsu Yusana enentáimtusuk kúntuts pujakka ni enentáij yapajjáshatui; yapajítsuk ni tunaarija uwemtusuk jakattawai. ¹¹ Tura iistarum; Yus wakerana nútiksarmek atumí kúntutsrj katsuntearme. Tuma asarum wi áatjarmena nu esetsarum enentáimtusurme. Atumí túramurj ujatkatajtsa wakerimiarme. Tura nu tunáa nakitramarme; tura ashamkarumarme. Tura yajauchin túramia nu asutiáarmarme. Tura winia anentu asarum wi tímia tímiatrusumek turatai tusarum ti wakerimiarme. Nu tura asakrumin péñker túrarmena nu, paant iniakarmarme. ¹² Kame yajauchin túramia nuna ni tunaarijn iniaisat tusan wakerakum, tura wáitias pujumia nu atak shiir enentáimsati tusan wakerakum nu papin áatramjarome. Tura nú nankaamas átum Yúsnun in anearmena nu nekamarum tusan áatramjarome. ¹³ Atum umikiu asarum waraakrumin iisha shiir enentáimji. Tura shiir itiaamarumna nuna Titiu waraak ujatkamtai nú nankaamas shiir waraajai. ¹⁴ Atumin shiir enentáimtajrumna nuna Titiun ujakmajai. Tura nuna nekasa aan Titiu nekamai. Tuma asamtai atumin natsantrachmarjume. Kame atumin tuke nekasa ana nuna tímiajrumme. Núnisan atumnian Titiun tímiaj nusha nekasaui. ¹⁵ Tura Títiuka atumin enentáimturmas ti waraawai. “Jiatmaktajtsa winiatsush” tusarum ti ashamkachurmek. Túmayatrum, níi péñker tati tusarum pachischarme. Tura níi taa seatmarmu nu umikiume. Títiuka nuna enentáimias waraawai. ¹⁶ Tura wikia, átum péñker túramurmin nekaan tura péñker túrawartatui tu enentáimsan waraajai.

8

Yus-shuarti ii kuítri súsatin

¹ Yatsurtiram, Masetúnia núñkanmaya Yus-shuaran Yus waitnentainia nuna yamá ujaktajarme. ² Ti itiurchatnum nekapsamu ainiawai. Túmayatañ warainiawai. Tura ti kuítrincha áiniayatañ emeentusuk kuítrinnia núnisan suiniawai. ³ Juna wi paant nekaan ujaajrume. Niisha wakeramujai súsatinuun jeainia nuna súniawai; tura nú nankaamassa súniawai. ⁴ Yus-shuaran kuítrinchan súsartaitsa ti wakeruiniak, nu túratniun ti seatmarmaji. ⁵ Tura ii enentáimmiáj nú nankaamas túrawarmiai. Emka Yúsnun niñki sumamawarmiai.

Tura Yusa wakeramurj túrattaji tusar incha “yáingtajrume” turammiaji. ⁶ Tuma asamtai, “Masetúnia nunkanam kuit júuktin nankamamamna nu, Kurintiu peprunmasha amukta” tusar Titiu seamiaji. ⁷ Atumsha ashí péñker túratin ti nékarme. Yus enentáimustincha, unuiniartintcha, ju nunkanmaya nekaatniusha, in aneatniusha nuka ashí nékarme. Wats, júsha túratarum. Yus-shuar kuítríncha ainia nu achikiarat tusarum Titiu támatai núkap susatarum.

⁸ Kame atumí úuntria núnisnak akupeatsjarme, túratnuiutrume tusan. Antsu chíkich shuar ni kuítrin susartasa ti wakeruinia nuna atumin ujakan, atumí anenkrattairj nekaspashi tusan nekapsatajtsa pujajai. ⁹ Li uuntri Jesukristu waitnenkartutairj nékarme. Ashí takakuyayi, tura atumin anenma asa kuítríncha núnisaj ajasmiaji. Ju nunkanam kuítríncha núnis ajasmatai átum nayaimpiniam kuítriniak tusa túramiaji.

¹⁰ Júná enentáimjai. Nuik uwitin, “yáingtaji” tíchamkarum. Tura nu túratin ti wakerimiarme. ¹¹ Nankamamarmena nu yamaikia amuktarum. Nuik ti wakerimiarmena núnisrumek yamaisha súsatin jearmena nu susatarum. ¹² Iistarum. Ni kuítrin Yúsán nekas susatajtsa wakerakuñkia, ni jeana nuna susat tusa Yus wakerawai. “Jeana nú nankaamas susati” tátsui Yus.

¹³ Chíkich ti núkap susarum atumnia táasat tusan tátsujai. ¹⁴ Antsu ashí métek takusarat tusan tajai. Iis atumsha yamaikia ti nukap takakrume; nujaí atuma nu súsatnuiutrume. Ukunam chíkich tsawantaj átum atumasharmeash. Nuñkia niisha atumin suramsarti. Nu túratin ákuñkia ashí métek takustin átatui. ¹⁵ Yusa Papirjin yaunchu áarman núnis tátsuk: Núkap takusmia nu ampírchamiyai; tura ishichik takusmia nu atsumachmiyai.

Titiu chíkich Yus-shuarjaj Kurintianam wetin ármiaji

¹⁶ Tura wi aneajrumna núnisaj atumin aneatniun Yus Titian susamiyai. Tuma asamtai Yúsán yuminsan pujajai. ¹⁷ Iis, wi takui wétinian wakerimiyai. Tura nú nankaamas, atumin anenma asa, ni enentáijjajin wéawai.

¹⁸ Tura chíkich Yus-shuar Titijaj akupkatajtsa pujaji. Nu shuar Yusa Chichamen ti penker etserainakui, ashí Yus-shuar iruntramunam nin péñker áujmatainiawai. ¹⁹ Tura nú shuarnaka ii tsaniakmarj atí tusar ashí Yus-shuar iruntramunam nuna anaikiarmiiai. Iijjaj kuítian jukiarti tusar anaikiarmiiai. Iis Yusa náarjin ashí aents uunt najanawarat tusar tura ashí shuar atumí tsankarjin nekaawarat tusar nu takat túratsjik. ²⁰ Iis, ju kuit ii jukittiajnua nu, núkap asamtai, aents tsanumprutmawarajj tusar, Titijaj tura ju shuarjajsha wéajai. ²¹ Yus ímmianumsha, aents ímmianumsha ii naka wekaajnia nuna nekaawarat tusar túrajai.

²² Nu jimiará shuarjaj chíkich Yus-shuar akupeaji. Yusa takatrin takastasa ti wakerana nu nekas nékaji. Tura átum yáingtin ti wakerarmena nuna nekáa niisha atumjin jeataj tusa ti wakerawai. Nuna túmak Yusa takatrin takastinian wakerana nuna paant iniakmawai. ²³ Tura ajsha chíkich shuar Titian nekaataitsar aninruiniakuisha, “Titian Papru saniakmarjnti. Incha yáinmaktajtsa Páprujaj takaawai” titiarum. Chíkich Yus-shuaran nekaataitsar aninruiniakuisha, “Yus-shuar akupkamu áiniawai, tura Kristu náarjin shiir awajin áiniawai” titiarum. ²⁴ Tura atumí anenkrattairj ashí Yus-shuar nekaawarat tusarum, nu shuar péñker itiaatarum. Nu túrakrum, atumnia ii shiir tímiaj nu nekasaiti tu iniakustatrum.

9

Yus-shuaran kuítrínchan súsamia nu

¹⁻² Kame átum Yus-shuar kuítríncha súsatin wakerarme; nuna nékajai. Tuma asan núnaka áatrachminiaitjarme. Atumsha súsatin wakera asakrumin wi nunasha shiir enentáimsan, “Akaya nunkanmaya shuar nuik uwitinia wakerusmataj yáingtinian wakeruniawai” tusan Masetúnianmaya shuáran ujaajai. ³ Tura “kuítniasha súsatniun ti wakeruniawai” tímiaj nuna, “wáitaiiti” tíarajin tusan nakitijajai. Tuma asan, kuit susatajtsa wakerarum nu iwiaratarum tusan nu menaintiu Yus-shuaran nuna yáinmakarat tusan emka akupenajai. ⁴ Wi ukunam Masetúnianmaya shuarjaj atumjin jean, kuit súsatin tímiamena nuna iwiarachman wáinkian natsarajj tusan, tura atumsha natsarajrum tusan túrajai. Warí, “súsatniun ti wakeruniawai” tuke tu wéatsjak. ⁵ Nu tuma asamtai, au takui súarme tu enentáimsarajin tusan ju Yus-shuaran emka akupenajai. Niisha nu kuítian iwiaratniun yáinmakarti, tajai. Nuñkia wisha Masetúnianmaya shuarjaj ukunam jeawakrin, nu kuit atumsha nekas atumí enentáijjajin k' súsatin wakerarmena nu nekaamnia átatui.

⁶ Tura junasha paant tájarme: ishichik araana nu ishichik júuktatui. Núkap araana nusha núkap júuktatui. Kuit súsatniusha núnikete. ⁷ Tura ashí shuar ni enentáin enentáimsana nunak susati. “Nakitiyatnak susatjai” tíchamniaiti. “Turutainiakui susatjai” tíchamniaiti.

Shiir enentáimias súana nuna Yuska shiir enentáimtawai. ⁸ Ashí péñker ana nuna suramsatniun Yus tujintiatsui. Nujaj átum atsumashtatrumé. Tura chikichan yáñtin núkap takustatrumé. ⁹ Yus-Papinium jü aarma awai:

Kuítrinchán núkap susayi;
nuna tura, tuke túratin átatu.

¹⁰ Arakmaun arakaan súana nussha Yúsaiti. Tura yurumkan súana nussha Yúsaiti. Niisha átum péñker araaniun suramsattarme. Tura araarumna nujaj péñker túratarum tusa araakrumin ipiampartatui. ¹¹ Tuma asantai núkap juukma takaku asarum, núkap súsatín jeattarme. Nuñkia súarmena nuna ii uwejeýan chíkich Yus-shuar achikiar Yúsán yumínsartatui. ¹² Warí, jü kúit Yus-shuar kuítríncha súakrin ni atsumamuríncha atsumachartatui. Tura nú nankaamas Yúsán ti yumínsartatui. ¹³ Nu shuar yáñtai tusarum tura ashí Yus-shuar yáñtai tusarum súatsrumek. Nujaj Kristu shiir chichamen umiarmena nuna nékainiawai. Tura kuítrum emeentutsuk sua asakrumin niisha Yusa náarín uunt awajrsartatui. ¹⁴ Kame Yus atumin ti waitnentrainiakuí kuítrum súatsrumek. Sua asakrumin nu shuar atumin ti anenmainiak Yúsán áujturmasartatui. ¹⁵ ¡Tura ashí iisha ii Yusrj ti yumínsatniuiti! ¿In súramjinia nuna yakí jintíartínia jeá?

10

Papru nekas jintintiamniati

¹ Wats, “Papru iijjaj pujak péjchach ajawai, tura yajá pujak kakaram chichaawai” chíkich shuar turutainiatsuk. Kame imia wiki Papru Kristu anenkartutairijjaj juna seatjarum tusan pujajaj. ² Atumí weatkamuriya shuar chichainiak “Papru ni tsaniakmarijjaj jü nunkanam akupin ajastai tusar wakeruiniak jintintiainiawai” turutainia nuna kíishtumaktajtsan enentáimjai. Wisha atumíin jean kakaram chichaschataj tusan, nu antukairap tu seajrume. ³ Áentstánka nunkanmayá áentsuitji, túrasha jú áents maania aintsar máaniatsji. ⁴ Jü nunkanmayá nanjijjaj máaniatsji antsu ii nankirj Yusa kakarmarjinti. Nujaj iwianchi kakarmari núpeteaji. ⁵ Jü nunkanmayá aentsu jintiamurínkia tura wauntu enentáimtumamurínkia, Yus nekaatniun itit awajea nuka, nu nanjijjaj núpeteaji. Tura ashí jü nunkanmayá enentáimsatin yapajniak, emetamu áintsan, Kristun umirkarat tusar nu nanjijjaj núpeteaji. ⁶ Nekas umirkatin átum jeawakrumínkia nuñkia umirkatniun tuke nakitiainia nu, Yusa kakarmarijjaj asutiáttaji, tajaj.

⁷ Atumsha aya páatek ana nu iiyarme. Wats, shuar nekas Kristunu ajasman nekamaka, núnisán winiasha Kristunuiti tu enentáimtursatniuiti. ⁸ Yusa kakarmarijjaj akupeaji tuke tákuncha natsaamatsjai. Nu kakarman atumin péñker jintintiatarum tusa Kristu suramsatjaj. Kame atumin emesratniun suramsachuitji. ⁹ “Ni áarmarijjaj awaktamkatajtsa wakerutmajjaj” tátsurpash. Núchaiti. ¹⁰ “Papru áarmarj ti kakaram áiniawai, tura jüj pujak kakarmachuiti; tura etserkatniuncha nékatsui” turutainiawai. ¹¹ Wats, tuinia nuka junasha nekaawarti. Yajá pujakur kakaram áajinia núnisrik atumjaj pujakrishá kakaram túratjaj.

¹² “Wiki imiá péñkeraitjai” tuinia nujaj méteketji tátsuji. Ní shuaraitji tátsuji. Warí, niisha imia niniki nekappamainiawai. Tura ni aj íisar “nu nankaamas péñkeraitjai” tu wéanawai. Nuna túruiniak netse túruiniawai. ¹³ Antsu iikia, ii nekamatin jeajnia nú nankaamas wauntu ajaschattajaj. Ii takastatjina nuj Yus Niniki jintintramjaj. Nu arant wéatsji. Kame atumíin takastinian Yus tsankatramkaitji. ¹⁴ Tuma asantai, tájinia nu Yus tsankatramka nú iniankas túratsji. Warí, iisha emka Kristu chichamejaj atumíin jeachmakajjaj. “Emka jeamjaj” tájinia nu ánrar tátsuji. Kame Yus tsankatramakrin jeamjaj. ¹⁵ Chíkich takasmanum iikia wauntu enentáimtumasar, “ii takatrínti” tátsuji. Antsu yamá enentáimtarumena nú nankaamas Yus enentáimtustarum tusar wakerajaj. Nu túrakrumínkia atumíin tuke takasminiaitjaj. ¹⁶ Nuyasha chíkich takaana nuj takatsuk átum pujarmena nú arant pujuinia nussha Yus-Chicham ujaktaj tusar wakerajaj. Nu túrar chíkich shuar takasma “íiniuiti” tíchattajaj.

¹⁷ Tura péñker enentáimtumastaj tusa wakerakka, Yúsaitjai tusa péñker enentáimtumastaj. ¹⁸ Warí, niniki “péñkeraitjai” tumamna nuka anturkachminiaitjaj. Antsu Uunt “péñkeraitjaj” tana nú shuar nekas péñkeraitjaj.

11

Ántar etserniun Papru áujmateawai

¹ Waurua núnisnak chichastatjana nu anturtukaintrumeash. Ee, anturtuktarum tusan seajrume. ² Atumniasha Kristunak anajmamtikrajrume. Tura nuwá chíkich áishmañkan nékatsuk ni áishrijjajnk' nuatnaiya núnisrumek átum chikicha chichame umirtsuk aya ni chichameñk' umiakrumin Kristúf ejetaj tusan wakerajrume. Nuna túrataj tusan atumin

akasmatajrume. Nu akasmaktinian Yus surusuiti. ³ Túrasha íwianch ni nekatairjijai emka nuwá Epan anan̄kamaia nútiksán atumniasha Yusa jintíyá awajimtikramar Kristu aneashstinian enentáimtikramprarmatai anan̄kamu ajrum tusan tsuutajrume. ⁴ Warí, chíkich shuar Jesusnan nusháa étserkamujai táiniakuisha péñker ántarme. Tura nusháa wakan achikiam, nusháa chichamjai uwempramniaiti tu etserrainiakuisha, nekasapitia tárume. ⁵ Kame “Yúsnumiá akatramu asar etserkatin imiá nékaiitj” tuinia nujai nan̄kaamas nékaijai, tu enentáimjai. ⁶ Ti péñker chichastinian nékachiatsnak winia nekaatairsha taamtsui. Núnaka ii túramurijjai tuke paant iniakmajj.

⁷ “Akirkata” tútsuk Yus-Chichaman atumin ujakmajrumna nuí ¿tunáa túrajak? Átum an̄kant ajastarum tusan wikia pééjchach ajasu asan, “etserkamunam akirkata” tíchamjarne. ⁸ Antsu atumin yáintaj tusan pujakun chíkich Yus-shuarnumiá kuítian suruiniakuia achikimajai. Nuna túran ni kultrín emeentukmajai. ⁹ Tura atumjai pujusan atsumaknasha atumniaka seachjarne. Masetúnianmayá Yus-shuar taar, wi atsummiajna nuna surusarmiaiyi. Nu tuma asamtaí tájarme, seachjarne tura seashtatjarne. ¹⁰ Ashí Akaya nun̄kanam nuna ujaktinian suritrukchartatui. Nuna tákun Kristu nekasrjijai tajai. ¹¹ ¿Urukamtaí nuna taja? ¿Atumin aneachu asanak taja? Atsá. Aneajrumna nuna Yus nékawai.

¹² Túrasha wi túrajna nuna tuke turu wétatjai. “Papru túrana núnisrik túrají” tuinia nuna tíarají tusan túrattajai. ¹³ Warí, niisha Yúsnumiá akatrachma ániawai. Anan̄kartin ániawai. “Kristu akatramurjntj” tumá átaj túsar wekainiawai. ¹⁴ Nusha urukaku túmait tíchammiaiti. Warí, imia Satanáskesha “nayaimpinmayá akatramuitjai” tumá átaj tusa wekaatsuk. ¹⁵ Nuñkia imia ni suntarjsha péñkeran túrawai tumá atai túsar wekaschartinkiait; túrasha ni amuamurjnkia tunáa túriarma nujai métek nekapmá asutiátin átatui.

Papru wáitsamia nu

¹⁶ Ataksha tájarme “wáurkaiti” tu enentáimtursacharti. Kame “wáurkaiti” tu enentáimturiatrumek, chichastin tsan̄katruktratum. Ishichik waantu enentáimtumastaj tusan wakerajai. ¹⁷ Tura waantu enentáimtumastaj tájana nu, Uunta tsan̄katramurijjai tátsujai. Antsu waurka núnisnak chichaaajai. ¹⁸ Untsurí ju nun̄kanam uunt ajasar ti waantu enentáimtumainiakui wisha ishichik waantu enentáimtumastajjai. ¹⁹ Imiá nékayatrum waurka ainia nu shiir enentáimtusurum ánturearme. ²⁰ Niisha atumin takamtiramainiakuisha, kasartamainiakuisha, atumi nérenniurj ajainiakuisha, yajauch chichartamainiakuisha, yapimin awattamainiakuisha ashí nu katsuntearme. ²¹ Natsamayatnak tájarme jikia nu túratin kakarmachuují! Wats, niisha araanainiatsna nuna wisha araantatsjai. (Waurka núnisnak chichaaajai.) ²² Niisha Ipríu-shuar ániakuisha wisha núnisnak Ipríu-shuaritjai. Israer-shuar ániakuisha wisha núnisnak Israer-shuaritjai. Apráma weeatrj ániakuisha pai, wisha núnisnak. ²³ Kristu takarniurjntj, tuiniawai. Wikia aujai nan̄kaamasaitjai. Kame nuna tákun waurka núnisnak chichaaajai. Kame niijjai nan̄kaamas takasuitjai; niijjai nan̄kaamas asutiáimuitjai; niijjai nan̄kaamas sepunam en̄keamuitjai; ti nukap jániñkiamjai. ²⁴ Israer-shuar chíkichí achirkacharmai. Antsu tímiajni señku jea achirkarmai. Tura emka achirkarmia nuí awa-awatatkuwa trainta nuiwi ejeyarmiayí. Tura nu tímiajni señku jea achirkarmia nujsha nútiksán nujai métek awatturarmiayí. ²⁵ Numijjai menaintiú awatturarmai. Kayajajsha mantuatai túsar chíkichí tukurarmaj, kanusha menaintiú wayamá wi en̄kempran wekaimiaj nuí. Tura nayaantsanam ajapén chíkichik kashi nuí pujusan tsawarmajai tura nu tsawantcha tuke pujusmajai. ²⁶ Ti nukap wekasaitjai. Tura entsá wekasán tsúumainian wáinkiaitjai. Tura kasa shuarjajsha, wí shuarjajsha tura yajaya shuarjajsha tsúumainian wáinkiaitjai. Péprunmasha, kampuniunmasha, nayaantsanmasha tsúumainian wáinkiaitjai. Wait Yus-shuarsha yajauch awajustaj túsar wakerarmai. ²⁷ Itiurchatnasha ti wáinkiaitjai; takatnasha ti takasuitjai. Ti untsurí kánutsuk pujusuitjai. Tsukamaknasha, kitiamaknasha wáitsaitjai. Ti ijiarmaitjai. Pushír tásmatai tsetsekrú wáitsaitjai.

²⁸ Tura nuna nan̄kaamas, kaarka kijin júkitniua núnisnak Yus-shuar péñker wekainiawash tusan ashí tsawant ti enentáimsan pujajai. ²⁹ Chikichik Yus-shuar kakarmachu pujakui wisha kakarmachu nekapeajai. Shuar chíkichan tunaanum ajawarmatainkia wisha natsamakun kajekan wáitajai. ³⁰ Maa, waantu chichastin ákuñkia, antsu winia kakarmachu awajtuinia nuna ujakan waantu ajasaintjai. ³¹ Yus, ii Uuntrj Jesukristu Aparí ana nu (ni naarj tuke shiir awajsamu atí) wi wáitratsjana nuna nékawai. ³² Tamasku péprunam pujai nu nun̄kanmayá akupin winia jinkíá juruktiaj tusa wakerak pepru tanish téntakma wáitirjín suntaran apujsamiaiyi. Aretas uunt kapitíán pujai túramiaiyi. ³³ Túrasha uunt chankinnium en̄ketawar pepru aa tanishrj áan̄kamunam jiki itiararmiayí. Tu uwempramajjai.

12

Papru wáinkiamia nu

¹ Kame wiki shiir chicharmamsatniun nakitiajai. Túmayatnak íimiarjana nuna tura uunt Yus iniaktursamia nuna ujaktiniaitjarne. ² Kristun umirin ana nú áishmaṅkan nékajai. Nu áishmaṅ jimiará nayaimpin naṅkaikin menaintiú nayaimpiniam junakniuiti. Nusha katurse uwí naṅkaamasuiti. Kame ayashtiuk wakaashit, tura ayashtichu wakaashit. Núnaka nékatsjai; aya Yúsak nékawai. ³ Tura nekas junakniua núnaka nékajai. Ayashtiuk wakaashit, ayashtichu wakaashit, núnaka aya Yúsak nékawai. ⁴ Yus-shuara wakaní shiir pujutainium junakmiayi. Nujsha paant awajsachmin ana nuna antukmiayi. Nii antukmia nú chicham paant awajsatniun suritkiamuiti. ⁵ Nu áishmaṅka túrunamurí nankaamakuiti tajai. Tura wikia nankaamakuitjai túmamtsuk, kakarmachuitjana nuna paant ujaajai. ⁶ Nankaamakuitjai túmamtiáj tusan wakeraknaka nekas tíminiaitjai, ántran tichaintjai. Túrashá túratsjai. Winia túramuruk wáinkiarum winia chichampruk antukrum, waritia enentáimsarum nujaj métek enentáimtsaratum tusan wakerajai.

⁷ Wi nayaimpiniam wáinkiamajna nu timiá péñker asamtai ántar waantu enentáimtumashatniun, jañki mesertinia núnisaṅ winia ayashruj najaimiatniun sunasmiajai. Nuka wi wáitsatin Satanásnumiá akupkamuiti. ⁸ Nuka jurutkitia tusan Úuntan menaintiú seamjai. ⁹ Tuma aiñ Uunt winia turutmiayi “Atsá. Jaa pujayatmek winia waitnenkartutairjai shiir pujame. Shuar kakarmachun winia kakarmarun Wi suakuí ashí aents nu shuara ayashíin winia kakarmarun wáiniainiawai.” Tuma asamtai, Kristu kakarmarí winia ayashruj paant atí tusan kakarmachuitiatnak araantatsjai. ¹⁰ Tuma asamtai, wi Kristun aneakuí shuar katsekruniakuisha, kajertuiniakuisha, winia kuítrusha, kakarmarsha atsáin waraajai. Kame ashí itirchat ana nuj kakarmachuitiatnak kakaram nekapeajai.

¹¹ Wi “péñkeraitjai” túmamkun waurua núnisnak chichaaajai. Tura atumsha winia péñker chichartusminiaitiatrumek, túrachu asakrumin tu chichasjai. Warí, wi penké ántraitiatnak, “tí péñker akatramuitji” tumamainia nú nuṅkaachichuitjai. ¹² Atumjai pujumiaj nuj, itirchat ámanmaṅ katsuṅtran takasmiajai. Yuska ni kakarmarín iniakmastaj tusa tí uuntan aents tujintiamun túratniun surusmiayi. Nujaj “Papru nekas winia akatramuruiti” tusa paant iniakmasmiayi. ¹³ Warí, chíkich Yus-shuaran yáinmij núnisnak atumniasha yáinmajrume. Ayatik atumin “kuít surusta” tichamjarne. ¡Nu yajauchiitkiuinjia tsanjkurturatum!

Papru atak tátinrín ujakmiania nu

¹⁴ Jújajnkia menaintiú iwiarnarjai atumin íistaj tusan. Tura jeaknaka, “etserkamun akirkatarum” tichattajrume. Atumí kuítrín wakeratsjai. Antsu atumin wakerajrume. Warí, winia uchirchakaitrum. Uchisha aparín kuítian ikiauntukchatniuiti. Antsu aparí ni uchirín kuítian ikiauntuktiniaiti. ¹⁵ Atumniasha yáinraj tusan ashí takakjana juna ajapawaintjai, tura winia kakarmarasha ashí emenjkakaintjai. Wi ti wakeramaitiatrum átumka ishichik wakerutarmínin túrawaintjai.

¹⁶ Túrashá chíkich shuar chichainiak “Nekasaiti; Papru niñki ii kuítrín jurutramkích-maji. Túrashá anañkartuatniun neka asa in anañkramachmishia” turutainiatsuk. ¹⁷ ¿Nusha itiuara? ¿Shuáran wi akupkamaj nujaj kuítrumin achikjak? ¹⁸ Atumin íirmasat tusan Titiun “wetá” tímiajai. Tura nin atamprít tusan chíkich Yus-shuaran akupkamjai. ¿Titiusha kuítrumin jurutramkímkiarum? ¿Wisha niisha mai metek enentáimsar métek takaschamkaj?

¹⁹ ¿Warí enentáimsarum? ¿Átum péñker ániawai turutik tusan nu tájij? Antsu, aneamu yatsurtiram, ii tájijna nu atumin Yúsnum ikiakártajrum tusan taji. ²⁰ Wi atumíin jeaknasha, wi wáitkiatj tusan wakeraj nuna wáinkiashtajai, tu enentáimsan itirchat enentáimjai. Tura atumsha wakerarmena núnisrumek wáinkiashtatrum, tu enentáimjai. Yajauch chicharnaikiatniuncha, yajauch enentáimtunaistinniaasha, kajernaikiatniuncha, niñki enentáimtumastinniaasha, tsanumpratniuncha, mái-tunai ajatniuncha, waantu enentáimtumastinniaasha, yajauch wekasatniuncha, ashí nuna wáinkiashtajash tusan itirchat enentáimjai. ²¹ Tura wi jeaknasha, átum yajauch túratniusha, tsanirmatniusha tura yajauch tí wakerarmena nu, yaunchu túrinarmena nu, untsurí shuurtiram iniaisharumena nuna nekashajash. Tura enentáim yapajitsuk tuka tura asakrumin úutchatjash tajai. Kame wi átum umikchamun nekaamtai Yus winia iniatsátrattawai tusan tsúumajai.

13

¹ Jujaj menaintiú íistajrum tusan winiajai. Ashí iwiaratin ana nu, jimiará tura menaintiú shuara chichamejai iwiarnartatui. ² Wi atumjai pujachiatnak, atumjai pujáa núnisnak

áatjarme. Yaunchu tunáa túrimiarmana nuna tura ashí shuártirmin wi nuik tímiajrumna nuna ataksha tájarme, wi atak tana tunaarum iwiareachkurminkia iniaisashtatjarme. ³ Nuiñkia wi Kristu kakarmaríjjaj chichaajna nu nekaattarme. Nu nekaataj tusarum wakeratsrumek. Tura Krístuka kakarmachuchuiti. Antsu atumí enentájn kakaram takaawai. ⁴ Kristu nekas kakarmachua nútiksaj krúsnum máamuitiat, Yusa kakarmaríjjaj iwiaakuiti. Ayashnium Kristu kakarmachu nekapmia núnisrik iikia kakarmachuitji. Túrasa Yusa kakarmaríjjaj ni takatřj takaaji. Nu atumin iniakmstatjji.

⁵ “Nekas Yúsan umirniuashitiaj” tusarum nekamatarum. Íimiastarum. Ántar Yushuarchaitkiurmeka Jesukřistu atumí enentájn pujurtama nu nekaattarme. ⁶ Tura iikia ántar Yushuarchaitji nu nekaatarum tusan wakerajai. ⁷ Tura átum tunáa túrawájrurum tusar Yús seaji. Aents in péñker enentáimtikramprat tusar tátsuji. “Ántar áiniawai” túramprinin, átum péñker wekasatarum tusar wakerajai. ⁸ Warí, Yusa nekas chichame emesratin tujintiaji. Antsu ii túrajnia nu Yusa nekas chichamejjaj túrajai. ⁹ Tuma asamtai, átum kakarmaitkiurminkia iikia kakarmachuitiatar shiir enentáimji. Atumsha nekas kakaram ajasúk tusar Yús tuke seaji. ¹⁰ Atumin emesratin Yuska winia akuptatsui. Antsu Yús akuptukuiti atumin ikiakártinian. Tuma asamtai, wi atumíjn jeaknaka kakaram chicharkajjrum tusan winitsuk ju papin áatjarme.

Amikmaawai

¹¹ Ayu, yatsurtiram, shiir pujustarum. Krístunam tuke kakaram ajastarum. Yús shiir enentáimtikramparti. Chikichík enentáik enentáimsatarum. Shiir awajnisarum pujustarum. Tura Yús anenmarmena nu, shiir enentáimtikramna nu atumjjaj pujurtamsattarme. ¹² Yúsnum shiir enentáimtunaisrum amikmaanisatarum. ¹³ Ashí Yús-shuar ainia nu amikmaatnarme. ¹⁴ Uunt Jesukřistu waitnenkartutairj, Yusa anenkrtattairjša atumíjn pujurtamsati. Tura Yusa Wakanjšha tuke nemartamsarti. Nu atí.

Papru KARASEANMAYA SHUARAN Papi aar akuptukma

Karaseamaya Yus-shuaran Papru áatramiania nu

¹ Wi Pápruitjai, Yus akatramu. Yúsak winia akatturuuti. Shuarka akatturchamai. Yussha chíkich shuáran akupturak akatturchamai, antsu Nunki, Yus Apa, Jesusan jakamunmaya iniantkimia nu, tura Jessussha winia akatturarmai Yusa shiir chichamen etserkatniun.

² Wisha, ashí Yus-shuar wijjai pujuinia nusha, ju papi akupeaji. Ashí Yus-shuar Karasea nunkanam pujarmena nu áusatarum tusan ju papin akuptajrume.

³ Yus Apa tura ii Uuntri Jesukristusha waitnentrainia ásar yainmakarti imiatkinchanum tuke shiir pujustinian. ⁴ Yus ii Aparí nuna wakera asamtai, Jesus ni ayashin surumak waítsamiayi ii tunaari asakárтинian. Nuna tura ashí tunáa ju nunkanam ana nuyá ankan awajtamsatai tusa in yáinmaji. ⁵ Tuma asamtai tuke Yus shiir atí. Ayu.

Chíkich uwempratin chichamka atsawai

⁶ Maa, nekasaash timiá wárik Yus ikiukmiarum. Kristu in ti anenma asamtai Yus ni shuari ajastinian in anaitiamkamji. Urukamtaitasuk nuikia imiá wárik ni chichame inaisamarum nusháa chicham umikrum uwemprataj tusarum. ⁷ Wátsek, nekas chíkich chicham penké atsawai shuar umikar uwempratin. Antsu yajaya shuar atumjin taar penkercha awajtamainiawai. Tura nusháa chichaman etserkar Yusa shiir chichamen yapajilatniun wakeruinaiwai. ⁸ Tuma asamtai Yus nin yajauchiniam yuminkrattawai. Wisha Yus-Chicham yapajiamun etserkamtaínkia Yus winia yuminkrurtatui. Nayaimpimaya suntarsha nusháa chichaman wi etserkachmaj nuna éterkuínkia nunsha yuminkrattawai. ⁹ Paant ujakjarne túmaitiatnak ataksha ujaajrume: Nánkamas shuar niisháa uwempratin chichaman, wi etserkachmaj nuna éterkuínkia Yus yuminkrattawai.

¹⁰ Ti kakaram chichaatsjak. Nuna chichaakun shuar shiir enentáimtursarti tusan chichaatsjai. Antsu Yus shiir enentáimtursati tusan nuna taji. ¿Shuar wakeruinia nuna enentáimsan chichaajak? Nuna enentáimkiunka Kristu wakera nuna umirkachaintjai.

Papru júnis Yus akatramu ajasmiai

¹¹ Antsu nekaatarum, yatsuru. Uwempratin chichaman wi éterjana nuka áentsnumianchuiti. ¹² Aentska ujatkachmai. Unuitiutnasha unuitiurchamai. Antsu Jesukristuk winia paant jintinruamai.

¹³ Tura wi yaunchu ti yajauchin túramiaj nuka antukchakaitrum. Israer-shuar Yúsna takainia nútiksanak wisha takasmajai. Tuma asan Yus-shuaran ti kajerkan tuke pataatukmajai amuktaj tusan. Nusha nékarme. ¹⁴ Tura kakaram ajasan, ii uuntri yaunchu tiarmia nuna yawetsuk umikintian ti enentáimpramjai. Tura untsurí shuaran wijjai métek uunt armia nuna nankaamas Yúsna takasmajai. Túmaitiatan aya winia úntrun chichamen ti umirniuyajai. ¹⁵ Túrasha wikia akiintsaj Yus winia achirkamiayi, tura ti anenkratmarijjai winia anaitiukmiayi. ¹⁶ Nuikia shiir enentáimiuk ni Uchirín paant nekamtikruamai. Tura Israer-shuaranum ni shiir chichamen etserkat tusa akuptukmiayi. Tuma asamtai chíkich shuaran aniaschamjai. ¹⁷ Uunt péprunmasha, Jerusarénumka, wéchamjai wini emkaru Yus akatramujai chichastinian. Antsu wárik Arapia nunkanam wémajai. Tura nuí Yúsna enentáimtasuan atak Tamasku péprunam waketkimjai. ¹⁸ Tura menaintiú uwi nankaamasmatai, nuyá Pítrujai áujmattsataj tusan Jerusarénum jeamjai. Tura jimiará semanachik pujasmajai Pítrujai. ¹⁹ Tura Jakupuncha, ii Uuntri Jesusa yachia nuna, wáinkiamjai. Nú arantka chikichnaka Yus akatramunka wáinkiachmajai. ²⁰ Yus iirui. Wi tájana nu nekasaiti, wáitchaiti.

²¹ Nú ukunmasha Siria nunkanmasha, Sirisia nunkanmasha wémajai. ²² Tuma asamtai ashí Yus-shuar Jútia nunkanam pujuarmia nu winia nekaracharmai. ²³ Aya antukarmai. “Yaunchu in ti áintramiaj nu yamaikia Yus-Chichaman éteruk wekaawai. Yaunchuka in amutmaktinian wakeriniatiat yamaikia iniaisaiti” tiarmai. ²⁴ Túrawar winia enentáimtursar Yúsna shiir yuminsarmai.

2

Chíkich Yus akatramu Paprun shiir enentáimtuiniawai

¹ Tura katurse uwi nankaamasmatai wisha Pírnapijaj Jerusarénum wémajai. Titiuncha jukimjai wijjai. ² Yus akupta asamtai Jerusarénum wémajai. Tura nuí jean aya Yus-shuara úntrijajin áujmattsamjai. “Júnisnak ashí Israer-shuaran Yus-Chichaman ujainiajai”

tímiajai. Takasmajna nusha tura tuke takastin enentáimjiana nusha ántar aijn tusan tu áujmattsamjai. ³ Niisha Yus-shuara úuntriñtiat itiuurchat enentáimpracharmai. Antsu chíkích shuarka Títu Israer-shuarchaitiat wíjjaj pujakui niisha Israer-shuar ajastí tusa tsupimi-antikiatniun wakeriarmai. Túrasha tujinkiarmai. ⁴ Tura nu shuar ántar yachi ániak antuk-tai tusar wayáwarmai. Tura ii chichameñ antukar itiuurchat awájtámsatai tusar wakeriarmai. Iis, Kristu Jesus in uwemtikrampra asamtai ti shiir iisha Yus úpúichu umáji. Tura nuna nekaawar, atakka, aya yáunchu akupkamu itiuurchat ana nujaj uwemtikrampratniun wakerutmakarmaji. ⁵ Túrasha penké ishichkisha umikchamji. Antsu atumíjn Yus-Chicham yapajniátsuk métek jeartamat tusar ni chichame penké anturkachmaji. ⁶ Nu arantcha Yus akatramu uuntriñkia yamaram túratniunka suruscharmaj. Nincha ashí aents ti neka ainiawai tu enentáimtuiniawai. Kame nu shuar ti nékainiakuisha ti enentáimtatsjai. Yus ashí shuaran mash métek iyatsuk. ⁷ Yus akatramu uuntriñsha Yus winia Israer-shuarchan Yus-chicham ujaktinian akuptukma nuna nekarawarmaj. Tura Pítruncha akupkamai Israer-shuaran Yus-Chicham ujaktinian. ⁸ Pítrun Israer-shuarnum akupkama nu Yusak winiasha akuptukmai Israer-shuarchanum. ⁹ Tuma asamtai Jakupusha, Pítrusha, Juansha, Yus akatramu uuntri ásar, Yus winia ti paant akuptan nekaawar, winiasha Pírnapiñsha, “Ayu, átum, Israer-shuarchanum Yus-Chicham etserkatarum, tiarmaj. Iisha Israer-shuarnum Yus-Chicham etserkattaji” tiarmaj. Túrawarmatai shiir áujnaisar ii uwejejai achirnaikiamji métek enentáimji tusar. ¹⁰ Áyatik “Kuítrincha enentáimtusurum tuke yáñtarum” tiarmaj. Wisha núnaka ti wakerakun tuke túrniaitjai.

Papru Pítrun chicharkamaj

¹¹ Tura nú ukunam wi Antiukía péprunam pujajñ Pítur tamaj. Tura nuñ yajauch túramtai, Yus-shuara úuntriñiak chicharkamjai. ¹² Iis, Israer-shuar tuiniawai, “Israer-shuarcha Muisais tímia núnisan tsupirnakcha asamtai, nu shuarjai yurumáshntiniati” tuiniawai. Túmaitiat Pítur yurumámñian nékak, emka Sántiak shuar táatsajñ Israer-shuarchajaj yurumámaj. Tura nuyá Sántiak shuar Jerusaréñnumiá Antiukíanam jeawarmatai Pítur ashamak tsupirnakcha shuarnumiá kanakin yurumáchmaj. “Tsupirnaktniatme” tiniu ainia nuna ashamak túramaj.

¹³ Tuma asamtai chíkích Yus-shuar, Israer-shuar armia nu, Pítrujaj métek emka yurumáwaru ániayat jimiará enentai takusar ukunam iniaisarmaj. Pírnapiñsha neka áyat nútksañ nupetnakmaj. ¹⁴ Tura nuna ísan ashí ímiainiain Pítrun chícharkamjai. Yus Shiir Chicham tana nujaj métek wekasachu ásarumatai tímiajai “Ame Israer-shuaraitiatam Israer-shuarti ikiukim tsupirnakchajaj yurumám Israer-shuarcha áintsamek túrame, tímiajai. Nuikia “Israer-shuarcha Israer-shuartíjjaj métek wekasatin ániawai” tíip” tímiajai.

Israer-shuarsha Israer-shuarchasha mai métek Yúsan enentáimtusar uwemprartatui

¹⁵ Iikia nekas Israer-shuaraitji. Israer-shuarcha, tunáa ainia ániuchuitji. ¹⁶ Túmaitiat ju nékaji. Akupkamu umíamujaj uwemprachminiatji antsu Jesukrístu nekas enentáimtakum uwemprattame. Nu nekaar iisha Jesukrístu nekas enentáimtusamaji tunaajainchu atai tusar. Aya Kristu nekas enentáimtusar péñker átatji. Akupkamu takasar umirkarsha tuke nujaj péñker ajaschattaji. Akupkamunka shuar umiktaj táyat, chíkíchki shuarke-sha nujaj péñker ajaschamniaiti. Nu nekaar antsu Jesukrístu nekas enentáimtusamaji péñker ajastai tusar. ¹⁷ Tura Israer-shuar enentáimprashtimpiash, “Wátsek, núnisaitkiupñkia wisha Krístun enentáimtustaj tákunka, emka tunáa shuaraitjai tu enentáimtumastiniatjai” tíchanpiash. Nuka nekasaiti tura nuyá “Nu asamtai Kristu winia tunáa shuaran najataiti” penké tu enentáimprashtiniati. ¹⁸ Antsu yaunchu, wi túrashtiniatjai tímiaj nuna awainkin túratniitjai tákunka nuikia nekas tunaitjai. ¹⁹ Iista, akupeamun umiktaj tukaman penké tujinkiamjai. Umiktinian tujinkian jaka áintsanak ajasmajaj akupeamunam. Antsu Yusjaj iwiaaku pujajaj ni wakera nuna umiktinian. ²⁰ Wisha Krístujaj krúsnum jákaitjai. Tuma asamtai yamaikia wikia iwiaaktsujaj wi wakerañ nuna túratniun antsu Kristu wini iwiaaku ni wakera nuna túratniun. Tura ju ayashniun pujayatan aya Kristu enentáimtakun iwiaakjai. Krístusha Yusa Uchiríntiat winia ti anentuk jarutkamiayi. ²¹ Yus ti péñker asamtai itiuurak “Kristu ántar jakamiayi” títiáj. Iis, aya akupkamun umirkan péñker ajasminiatki- iuñkia, nuikia Kristu ántar jákajaj.

3

Yus akupkamu tura Yus enentáimtusar

¹ ¿Wariñ aa Karaseanmayatirmea. Waweamukaitrum netse enentáimprarum Yus tama umirkashtin. Kristu krúsnum máamun ti paant éterkun atumin iniaktuscharmakajrum?
² Wátsek, aniatatjarme, enentáimpratarum. ¿Warijjajñ Yusa Wakaní atumí enentáin achikmarum. Akupkamu umirkarmek enentáimin achikmarum, antsu Yus enentáimtusurum ni

Wakaní achikchamkuram? ³ ¿Tuke nétsekaitrum. Yusa Wakaní emka atumí enentáin wayá takasmatai atumek yamaikia nu takat aya ayashí kakarmarijajai umiktin enentáimprarmek. ⁴ Penké ánrarmek wáitsamarum tura antsu ishichkisha unuimiarchamkarum? ⁵ Naka enentáimpratarum. Yus ni Wakanín sūramtsuk tura aents túrachminian atumjín ti takaatsuk. Átum aya akupkamun umirkurmin Yus nuna túrachuiti. Antsu ni chichame antukrum Yus enentáimtakrumin Yus nuna túraití.

⁶ Yaunchu ii uuntrj Apraám enentáimpratai. Yus-Chicham nin tawai:

“Apraám Yúsan enentáimtusmatai Yus “Ayu, péñkeraitme” tímiayi” tawai.

⁷ Iis, nujai páantchakait. Ashí shuar Yúsan enentáimtuinia nuka Apraámjai métek enentáimpraru ásar, ni uchirja áintsan ajasaru áiniawai. ⁸ Yamái páantaiti. Yus ashí Israer-shuarchancha tawai “Aya winia enentáimtusarum péñker átratume”. Israer-shuarchasha nujai péñker ajastinia nuna ti yaunchu neka asa, Apraáman ukajmiayi, “Ámijjajai ashí aents ti shiir ajasartatui.”

Tu ukajmiayi. ⁹ Tuma asamtai ashí shuar Yúsan enentáimtuinia nuke Apraámjai métek péñker ajasar shiir warasartatui.

¹⁰ Antsu ashí shuar “akupkamun umirkan uwemprattajai” tuinia nuka yajauchiniam yumin̄kramu áiniawai. Yus-Papinium áarchamukait

“Ashí shuar Yus akupkamun ashí aarma nuna takamtsuk umirkachka yajauchiniam yumin̄kramu áiniawai.” Tu áarmaiti.

¹¹ Nújainkia páantaiti. Akupkamun umirkatnuijai péñker ajaschamniaiti Yusjai, antsu aya Yus enentáimtusam péñker ajasam uwemprattame. ¹² Shuar akupkamun umirkatniun enentáimna nuka aya nujai péñker ajastinian enentáimui; Yúsan enentáimtak péñker ajastinian enentáimtsui.

¹³ Tura Kristu yamaikia uwentikrampramji. Akupkamun umirkachu yumin̄kramu tana nuka in túramtsuji. Antsu Kristu in yainmaktin krúsnum jaka yumin̄kramu ajasmiayi. Kame áarmaiti:

Shuar jakati tusa numiniam nenasma yumin̄kramu tana.

¹⁴ Tuma asamtai Jesukristu jakamujai ashí Israer-shuarchasha Apraámjai métek péñker shiir warasartatui. Iisha núnisrik nu shuarjai Yusa Wakaní, Yus akupkataj timia nusha, achiktatji Yus enentáimtusar.

Yus akupkamun tura Yus túrattana nu anajmarma

¹⁵⁻¹⁶ Iis, yatsuru, Yus Apraáman Chichaman najana anajmatuk,

“Ámijjajai tura amée weeá akiinkiatana nujajisha ashí aents ti shiir ajasartatui” tímiayi.

Kame “amée weeá akiinkiatatna nujai” tíchamiayi, antsu “akiintiatta nujai” tímiayi. Nuna taku chikichik átinia nuna enentáimpramiayi. Nusha Krístu. Aentstisha enentáimpratai. Shuar chichaman najana tura papinium aar nuyá ni naari apujas nuikia nekas yapajítsuk umiktiniati. Umitsuk iniaisachminiaiti. Patattasha patattsachminiaiti. ¹⁷ Wátsek, Yus núnisan Chichaman Apraámjai najana, ukunam umitsuk iniaisachminiaiti. Tura Chichaman najanania nú ukunam, kuaru sian̄tu nuyá trainta (430) uwí nan̄kaasmatai, Yus ni akupkamurjín Muisaisan susamiayi. Túramaitai nujai Yusa yaunchu Chichamen yapajíachmiayi iniaisatniun. ¹⁸ Tuma asamtai Yus timia nuka tuke uminkiatatawaj, Yus yaunchu Apraámjai Chichaman najana asamtai. Nújainkia páantaiti, péñker ajastajsar akupkamun umirkakia shiir pujuschartatji antsu Yus timia nujai iikia takatsuk shiir pujustatji. Nuna tsan̄katkamiayi Yus Apraámjai Chichaman najaneak..

¹⁹ “¿Nuikia Yus urukamtai akupkamun susamia?” tíchaintmeash. Ayu, Apraám weean, Kristu táatsain̄ Yus timia nu uminkiaminiuyayi. Tuma asamtai nii táatsain̄ ashí tunain̄ túrawarmia nu timia yajauchiiti tusa Yus akupkamun susamiayi. Tura Yusa suntarī ju akupkamun ashí iwiarar Muisaisan susar akatramiayi Israer-shuaran susárti tusar.

²⁰ Antsu chikichik shuar n̄n̄ki takastinian enentáimkiun̄ka chikichan atsumatsui. Tura Yus aya chikichkiiiti. Niñki chikichan akatsuk ashí aentsun Apraámjai péñker awajastniun Apraáma anajmatar niijjajai Chichaman najanamiayi.

Yus akupkamun itúrkátin

²¹ “¿Tura Yus jimiará chichamjai chichaawak, tíchaintmeash. Emka Apraáman “Jujai uwemprattame” tíchamkia, nuyá Muisaisan ni akupkamurjín súsachmakia?” tíchaintmeash. Tura áintsachuiti. Nekaata, akupkamun umirkatnuijai Yusjai tuke péñker pujusmini-aikiumka nuyá aya akupkamujai uwempram tunaajain̄chu ajasaintme. ²² Tura Yus-Chicham paant “Ashí tunáa áiniawai” tawai. Nu asamtai yamaikia ashí Jesukristu enentáimtuinia nú shuar, aya Yus timia asamtai, uwemprattatui. ²³ Tura Kristu táatsain̄ Nin enentáimtusachminiauyayi. Tuma asamtai Nii táatsain̄ akupkamun in emettama pujurtamji aya akupkamun tana nu umirkatin. Tura ukunam ju nekanayi: Kristu enentáimtusar

uwempratniuitji. ²⁴ Akupkamu, nuika, in waitmakmaji uchin kuírchin wainnia áintsan. Kristu tatí tusa waitmakmaji. Tura Kristu támetai ashí nekas Nin enentáimtuinia nuka Yúsajai péñker áiniawai. ²⁵ Yamái Kristu nekas enentáimtustiniaiti tuma asamtai yamaikia akupkamu kuírchia áintsan wáitmtsaji. ²⁶ Antsu Jesukristu enentáimtusar, nujaj Yusa uchirí úuntmaru ajasuitji. ²⁷ Ashí Kristu náarjin imiaimiutirmeka Kristu áintsan ajasuitrume. ²⁸ Jesukristujai tsaninjuá asar¹ imiá métek aji. Israer-shuar, Israer-shuarcha, ankant ainia nu, ankantcha ainia nu, áishman, nuwá, ashí mash Jesukristunuitkiuinikia yamaikia “ni-ishaaiti” tu enentáimprashiniaiti. Ni shuarj mash chikichik áinijai. ²⁹ Tura Kristunuitkiurmeka Apraám weeá áintsan ajasurme atumsha. Tuma asarum, Yus Apraáman anajmatramia nu atumsha jurumkítniuitrume.

4

¹ Kuírinniu uchirí ashí ni aparj takakna nuna niiniu áhattawak ukunam. Tura uchichitk-iunka ni aparj takarniurjya núkete. ² Tuke uunt ajatsuk ni wáinnia nuna umirkatniuiti. Tura uunt ajasmatai tura ni aparj “Ayu” takui nuyá nii antsu ni aparjniu ashí wáinkiatniuiti. ³ Núnisrik iisha úchichik asarkia ashí aentsu akupkamurj umirkatniuij. ⁴ Tura tsawant jeamtai, Yus ni Uchirín akupkamiyai ju nunkanam. Niisha Yúsaitai nuwanam akiini-amiyai. Tura aents ajasmiyai. Tura aents ajas yaunchu akupkamuncha umirkatniuyayi. ⁵ Nujaj ashí aents akupkamun umirkatin armia nuna uwemtikrataj tusa támiyai. Tura iisha yamaikia nujaj ni uchirí uunt ajasminiaitji. ⁶ Atumsha nekas ni uchirí ajasakrumin Yus ni Uchirí Wakanjin atumi enentáin akupturmakuiti. Tura nu Wakan atumi enentáiyá Yúsán “Aparú” tawai. ⁷ Tuma asamtai yamaikia aya takarniuchuitme antsu Yus ni uchirín najatmaiti ámin. Tura ni uchirj asakmin ashí Yus takakna nuna amastatui Krístuiyan.

Papru nu Yus-shuaran yáintinian wakerawai

⁸ Yaunchu átum nekas Yus nékachkuram, ántar-yus írúnna nu umirkamarme nekascha yúsak. ⁹ Tura yamaikia nekas Yus nékarme, kame Yus atumin nekarmarme. Núnis asamtai itiuirtsuk atak aentsu akupkamurj umirkatin enentáimprum. Nujaj kakaram ajaschamniatme tura umikmesha yainmakchattawai uwempratín. ¹⁰ Átumka jísat ti najanearme. Yaunchu jísat najanatin amia nú tsawantcha, nantusha, uwisha, jísat tuke najanearme Yus shiir enentáimtusar túsarum. ¹¹ Ashamajai, atumjín ántankeash takasmaj tusan. ¹² Yatsuru, wi atumea áintsanak ajaschamkaj; atumsha yamaikia wi wekaajna áintsarmek wekasatarum. Wi nuj pujakui ishichiksha yajauch awajtuschamarme. ¹³ Antsu nekarmarme ayashruj itiuirchat pujayatan Yusa shiir chichamen emka ujakmajrume. ¹⁴ Tura winia sunkur ti yajauch awajtajn atum winia nakitrurum mujrukchamarme, antsu Yusa suntarja áintsarmek itiararmarme. Jesukristu anturkatniua áintsarum anturtukmarme. ¹⁵ Maa, wi nékajai, nuik atumi jimi ukuinkiarum surusaarme, túramniatkiurmeka. Tura shiir enentáimpramarmena nusha itiuirtsukait yamaisha. ¹⁶ Yamaikia nekas chichaman éterkerun zatumi nemasrj ajasjak? ¹⁷ Chikich yajaya taaru ti shiir awajtamainiawai tura atumin yainmaktasa áitkiarmainiatsui. Aya winiya akantamkítiai tusa wakerutmainiawai, winia antsu shiir enentáimtusar túsar. ¹⁸ Niisha nekas yainmaktinian wakerutmainiikka atumin shiir awajtamsatin tuke péñker ainti, wi atumjai pujajnsa tura pujatsajnsa. ¹⁹ Uchirú, nuwá jurertaj tana núnisnak ataksha wáitajai Kristu atumjín paant atí tusan. ²⁰ Atumjai pujaknaka maak aintjai. Yamái pujaknaka nekas nusháa chichasaintjarne. Itiurkatjarmetsuk nékatsjai.

Akarsha, Sarasha jimiará Chichaman nakumainiawai

²¹ Ayu, “akupkamu umirkatniuiti” táména nu nekaata; akupkamuka júnisaiti. ²²⁻²³ Aarma awai: Apraám jimiará uchirtiniuyayi. Emka ni takarniurj jurermiayi Ismaeran. Nuyá Apraáma nuwe jurermiayi Isakan. Ismaera nukurj Apraáma takarniurjyayi. Tura Apraám Yusán enentáimtusuk niijjai kanarmatai, ni takarniurj jurermiayi. Tura antsu Isaka nukurinkia takarniurinchuyayi, antsu nekas ni nuwe áuyayi. Niisha ti úntchiniak, Yus “jurertatme” timiayi. Tuma asamtai Yus timiajai Isakan jurermiayi. ²⁴ Ayu. Yamái tájana nuka Yusa Chichamen jimiaran nakumui. Ismaera nukurj Akar chikichik Chichaman nakumui. Yaunchu Senái muranum Yus ni akupkamurjín áarmiyai Israer-shuar, takarniua áintsan, umirkarti tusa. ²⁵ Senái murasha Akara nunke Arapiaman wajaawai. Akarsha Senái muran nakumak, ashí Israer-shuaran “Akupkamujaj uwempramniaiti” tuinia nuna nakumui. Yamaisha Israer-shuara uuntrj Jerusarégnum pujuinia nuka tu chichainiawai. Tuma asamtai Akarsha, ashí nu shuarsha núnisar, akupkamu umirkatin ásar, ti takarniu áintsan wáitsar takainiawai. ²⁶ Antsu ashí Yus-shuarti uwempra asar imiankas ankant pujaji. Nayaimpinmaya Jerusarégnumiá áentsuitji. Nuyá áentsti tuke ankant pujuinijai. Nuyá aents asakrin, nu yakiya Jerusaréngka ii nukurja áintsan enentáimpramniaiti. ²⁷ Júnis áarmaiti:

Warasta, misurma, uchi takakchiatmek;
Ti shiir warasta, uchi najawe nekachiatmek.
Nuwa ajapamu uchin jurertatui;

Nuwa áishrinnia núnaka nankaamas uchirtin átatui.

²⁸ Iisha, yatsuru, Isaka áintsar¹, Yus timiajaj akiiniaitji. ²⁹ Yaunchu Ismaer Isakan kajerak iturchat awajsamiayi. Núnisañ yamaisha Ismaera áintsañ aya ayashnumia ainia nú aents Yusa Wakanjya akiinia nuna yajauch awajenawai. ³⁰ Tura Yus-Papinium áarmaiti:

“Takarniusha, ni uchirjijaj, ajapam awemata. Nekas péñker nuwa uchirijaj tsanin pujuschamniaiti. Apari kuitrincha achikchamniaiti,” tawai Yus-Papi.

³¹ Ayu, yatsuru, nekaatarum. Takarni uchirin chuitji antsu ankant pujaji nekas péñker nuwa uchiri asar¹.

5

Yusjaj tuke ankant atarum

¹ Kristu uwentikrampramijaj tuke ankant átinian. Tuma asantai kakaram ajasam tuke ankant pujustá. Ataksha nu iturchatnum waketkip.

² Wi Papru asan ujaajrume. Átum Muisais timia núnisrumek tsupirnakrumninkia ¿Kristu nuikia warí itiertamkamniait? ³ Ataksha tájarme, ashí tsupirnakua nu shuar ashí Muisais timia nuna takamtuk umirkatniuiti. ⁴ Átum “Akupkamu umiakmin Yus shiir enentáimturmastatui” tárumna nu, nu shuartiram Kristuiya tupanniitrum. Yusa anenkrattairiya kanakniurme. ⁵ Iikia, antsu, Yusa Wakanjijaj tura Yus enentáimtakrin Yus shiir enentáimturmatatji, tu enentáimji. ⁶ Nekas Kristunuitkiurkia tsupirnaktin atsumatsji. Antsu aya Yus nekas enentáimtakur ashí anenaitniuitji.

⁷ Átumsha Kristujaj péñker wekamiarme. ¿Urukamta nekas Yus timia nu iniaisatin enentáimprum ataksha akupkamunam waketkitin? ⁸ Nú enentai Yúsaiyanchuiti. Nijijaj wekasatniunka Yus achirmakuitrum. ⁹ Ju enentáimpratarum: Karia ishichik yuminnium enketam mash¹ karimiktisuk. Aneartarum átumsha. ¹⁰ Ayu, Yus yáinmakrumin wi tájana nu nusháa enentáimprashatrume, nekajai. Tura átumin yajauch áujmatramainia nuna Yus asutiáttawai páchitsuk.

¹¹ Wikia, yatsuru, yamaisha “tsupirnaktiniaiti” tuke tákuinkia Israer-shuar yajauch awajtuscharainti. Antsu Kristu jakamun étsereatnak “tsupirnaktiniaiti” tákuinkia kajertukcharainti. ¹² Átumin yajauch awajtamsatin wakeruiniana nú shuar antsu niniki tsupimiakar yajauch awajmamsarti.

¹³ Átumniasha, yatsuru, Kristu tuke ankant awajtamsarme. Tura ankant ajasrum, “Aya wi wakerajna nuna túramniaitjai” tu enentáimprairap. Antsu nuámtak aneniakrum péñker yáiniáktarum. ¹⁴ Ju chichamjaj ashí akupkamu mash uminkiatatawai: Ame ayashim aneamna áintsamek chikich shuarsha aneata. ¹⁵ Tura aneartarum. Aneniachkurme, antsu esanairum mai yunai ajakrumka nuámtak amunaiktatrum.

Ayash wakeramu tura Yusa Wakanj wakeramu

¹⁶ Juna tájarme: Átumí ayashj wakerana nu umikjaj tusarum Yusa Wakanj kakarmarjijaj wekasatarum. ¹⁷ Yusa Wakanj wakerana nuna ame ayashim nakitiawai. Tura ame ayashim wakerana núnaka Yusa Wakanj nakitiawai. Mai maanai ajainiawai. Túmaitkui péñker wekasataj tukamam tujintiame. Páantchakait. ¹⁸ Tura Yusa Wakanj jintinramkuinkia, aentsu akupkamurjijaj itit áchattame.

¹⁹ Wats, ayash túramu ti paant áiniawai. Ju áiniawai: tsanirmatin, wapik túratin, yajauch túratin, ²⁰ ántar-yus ainia nu tikishmatratin, wawekratatin, nemasnaikiatin, katsumnaikiatin, akasmaktin, wari kajektin, nankaamantu enentáimtumastin, aya niisháa niisháa enentáimmartin, níniunak listin, ²¹ yajauch enentáimtunaistin, mankartuatin, nampektin, nampernum aya ti yurumin, tura ti nampen átin. Chikich nujaj métek áiniawai. Nuik ujakmajrumna núnisnak ataksha tájarme: Shuar nuna túrakka Yusaj pujustinian penké tujinkiatatawai.

²² Ayu, yamaikia Yusa Wakanj kakarmarjijaj túratin enentáimsatai. Yusa Wakanj ii enentáin pujak, péñker túratniun nerektinia áintsañ neremtikramji. Ju áiniawai: aneatin, shiir enentáimsatin, Yusjaj tura shuarjaj nawamnaikiar wekasatin, shiir enentáijaj katsuntratatin, chikich shuar shiir awajsatatin, tsanka átin, tana nuna tímiatrusañ umiktin, ²³ péjchach ajastin, iik límiasar tunáa túrashtin. ¿Ju túratniuncha yaki surimia? ²⁴ Shuar Jesukristunu ainia nu, ni ayashj wakeramurjincha tura nunisañ ní túramurjincha surimiak wekaawai. Ni ayashj krúsnum maatniua áintsañ túrait.

²⁵ Yusa Wakanj kakarmarjijaj Yus-shuar ajasu asar, núnisrik Yusa Wakanj kakarmarjijaj wekasatai. ²⁶ “Wats, nekapanisatai. Wi imiá péñkeraitjai” nuámtak túnaituk, yajauch enentáimnunáischatniuiti.

6

Yáinniaiktaram

¹ Túrasha, yatsuru, Yus-shuar tunáa túrashtimpiash. Atumsha nekas Yusjaj wekaarumna nu, nu wáinkiumeka, yátsum Yusjaj iwíarat tusarum yáíntárum. Tura nan̄kaamantu enentáimtumatsuk túrataram. Tura amesha nekamata. Tunaanum iniarajj tusam anearam wekasata. ² Káarak kijin akui nuámtak yáiniaiktin átsuk. Núnisrumek atumsha, itiurchatj akui nuámtak yáiniaáiktaram. Túrakrumka Kristu akupeamurj umíarme.

³ Shuar tujintiayat “nan̄kaamantuitjai” tákuŋka anaŋmamui. ⁴ Shuar ní túramurjiaik enentáimtumastiniaiti. Níniunak enentáimtumakuŋkia tura péŋkeraitkiuŋkia chikicha túramurj iirtsuk, antsu níniun péŋker iis wararsattawai. ⁵ Iis, ashí ní káarkariniaik júkishtinkiait.

⁶ Shuar Yus-Chichaman unuimiatna nu, nu shuar nin jintiana nuna ashí takakna nujaj yáíntí.

⁷ Anaŋmamawairap. Shuar Yúsan anaŋkatniun tujintiawai. Ame araamna nuna neren̄ júuktatme. Chíkich nere áhattawai. Atumi enentáincha núniskete. ⁸ Iista. Shuar ní ayashj wakeramunak tuke enentáimtakka, jataj nereja áintsan̄ araaiti. Nerekmataj jákatniun júuktatui. Tura Yusa Wakanj wakerana nuna tuke enentáimtakka Yusjaj tuke shiir pujustinian júuktatui. ⁹ Nu asamtai péŋker túratin yawetkishtiniaiti. Tura pimpitsuk takasar júuktin tsawant jeamtai, páchitsuk júuktajj. ¹⁰ Tuma asamtai yáin̄min̄ ákuŋkia ii jeajnia nu túratniuitj nekaska ii yachj yáin̄kiartin, Yus-shuar ainia nu. Tura ashí shuarsha yáíntinaiti.

Jesukristunu ajaras yamaram akiiniatin nekas péŋkeraiti

¹¹ Ímsakua, winia uwejrujaj urutá uuntna áatjarum. ¹² “Nekas tuke tsupirnakiniaitme” tuinia nuka áyatik shuar shiir enentáimtursarti tusa tuiniawai. Kristu krúsnum jakamun étsereakuŋkia itiurchat awajtusarajj tusar “tsupirnakiniaitme” tuiniawai. Shuar “ashí akupkamun umiktajaj” tusa, Muisais timia núnisan̄ tsupirnakiniaiti. ¹³ Pai. Tura nú shuar tsupirnakua áiniayat ashí akupkamun umiiniatsui. Muisais timia nuna ajapén ikiuiniawai. Túmaitiat tsupirnakuk tusa wakerutmainiawai. Áyatik atumin “Pai, niisha tsupimiatkiakji” titiai tusar wakerutmainiawai. ¹⁴ Wikia, antsu, aya ii uuntrj Jesukristu krúsnum jakamunak wararsatniun enentáimjai. Tu enentáimkiun Kristu krúsnum jakamia áintsanak ju nunkanmayá ana nuna jaka áintsan páchiatsjai; tunaanum winia útsukatin atsawai. ¹⁵ Kristunu ajarasrika tsupirnaktincha tsupirnakchaitkiursha mai ántraiit antsu yamaram akiiniatin nekas péŋkeraiti. ¹⁶ Ashí nekas Yus-shuaran, wi tájana nujaj métek wekainia nuna, Yus shiir enentáimias yáíntí tuke shiir pujustinian.

¹⁷ Yamaikia itiurchat najatawarajj. Jesusa takatj takaakui asutiuawarma paant ayashruj chimikma írunui.

¹⁸ Yatsuru, ii uuntrj Jesukristu atumin shiir yainmakarti. Nuke atí.

Papru IPISIUNMAYA SHUARAN papi akuptukma

Ipisiunmaya Yus-shuaran Papru áatramiania nu

¹ Yus nuna wakerakui Jesukristu akatramuitjai. Jesukristu nekas enentáimtusrum Yus-shuar ajasrum Ipisiunam pujarmena nuna ju papin áatjarme. ² Yus ii Aparísha tura ii Uuntrj Jesukristusha waitnentramainia ásar imiatkinchanum shiir pujustinian yainmakarti.

Krístujai tsanin̄kiu asakrin Yus ti shiira nuna tsan̄katramji

³ Ii Uuntrj Jesukristu Aparj Yus nekas shiir awajtustiniati. Iisha Krístujai tsan̄nkiu asar ii enentáin ashí nayaimpinmaya ana nujai warasminiaitji. Túmaitkiui Yus nu waratain ashí suramsaitji. ⁴ Krístujai uwemprar ti shiir tunaajainchu Niijjai pujusarat tusa Yus, ju nun̄ka atsajsha, anaitiamkamiaji. ⁵ Yámankamtaiksha incha ti anenmak Jesukristu túrunamujai ni uchirj ajasat tusa wakerutmakmiaji. ⁶ Ni aneamu Uchirjjai tsan̄nkiu asakrin nekas ti anenmaji. Nu enentáimsar ti shiir awajsatniuitji. ⁷ Yus ti anenmakrin ni aneamu Uchirj numpé puarmatai, nu jakamujai ii tunaar̄in akikmatramak uwentikrampraitji. ⁸ Tura ti anenmak ni enentáimtir̄in tura nekatair̄incha suramsamiai. ⁹ Nujai shiir enentáimturmak in uwentikrampratniun wakerutmakmij nuna, yaunchu nekaachman, yamá paant awajturmaji. ¹⁰ Ashí jú nun̄kanam ír̄unna nunasha tura nayaimpiniam ír̄unna nunasha Kristu ashí akupin ati tusa Yus tsan̄katkattawai. Nunasha Yus yaunchu enentáimtur̄u asamtai tsawant jeamtai ashí uminkíattawai.

¹¹ Iisha Krístujai tsan̄nkiu asakrin Yus yaunchu achirmakmiaji ashí Niiniu ana nuna tsan̄katramkatniun. Nunasha, ashí Nii túrana núnisan, aya Nii wakera asa túramiai.

¹² Iikia Israer-shuar asar Kristu emka umirkakrin in imiá péñker túrutmamun nekaawar ashí shuar Yúsan ti shiir awajsam̄in ániawai. ¹³ Núnisan atumsha nekas uwempratin chicham antukrum Kristu nekas enentáimtusurme. Túrarum Kristu-shuar ajasakrumin Yus ni shiir Wakan̄in akuptuktaj timia nuna akupturmakmai. Nuna tura “nekas Wíi shuaraitrume” tawai. ¹⁴ Yamá Yusa Wakan̄j ii enentáin pujuruk tuke uwentikramji. Tura takas umik ni sawantaj ashí tsan̄katramkattaji. Tura ii enentáin pujá asamtai Yus ukunam Niijjaisha ashí tsan̄katramkattaj nu paant nékaji. Maa, Yus ti péñker asamtai Nin ashí ti shiir awajsar̄ti.

Papru Yus-shuaran áujtustumiania nu

¹⁵ Átum ii Uuntrj Jesukristu nekas enentáimtamuncha tura ashí Yus-shuarjai shiir awajnyayamuncha antukjai. ¹⁶ Túran shiir enentáimkiun Yúsan ájukun tuke yúmin̄kíajai. ¹⁷ Ii Uuntrj Jesukristu Aparj Yus ti shiir asamtai Nin áujeakun ni Wakan̄j ni nekatair̄in suramas ashí jintinramawarti tusan seajai. Nujai nuna nan̄kaamas Yus nekaattarme. ¹⁸ Tura enentáimn̄cha paant enentáimtikramprarti tusan seajai. Nujai shiir túrutmataj tusa achirmakuitrum nu nekaattarme. Nu arantcha imiá shiira nu, Yus ni shuar̄in ashí tsan̄katkattana nusha nekaattarme. ¹⁹ Nu arantcha Yus umirkurin ti kakaram tujincha asa in yáinmaj nu nekaattarme. Tura nu kakaram ti kakaram asamtai ²⁰ nujai Krístun jakamunmaya iniantkimiayi. Tura nayaimpiniam júki ni untsuurinḡi akupin pujutainium apujsamiai. ²¹ Tura ashí ju nun̄kanam akupin ainia nujajisha tura ukunam nun̄ka átatna nu akupin áminia nujajisha tura ashí akupin ainia nujajisha tura ashí naar̄j nékamu ainia nujajisha Yus Kristun ashí nan̄kaamas akupin najanamiai. ²² Tura ashí ír̄unna nu, Kristun umirkartin ániawai. Tura Yuska Krístunak ashí Yus-shuara Akupniur̄j awajsamiai. Túramtai Kristu ni shuar̄j muuké áintsan̄kete. ²³ Tura ashí nun̄kanam Yus-shuar ainia nu Kristu ayash̄j najanainiawai. Tura Kristu ashí ni ayash̄j̄in pimiutkaiti tura nu arantcha ashí ír̄unna nunasha pimiutkaiti.

2

Yus anenma asa uwentikramji

¹ Átum yajauch túrakrum tunaanum tuke wekaakrum Yúsn̄m̄iá kanakin asarum jákauyarme. ² Nu tunaanum jú nun̄kanam pujuinia nujaj métek tuke wekainiuyarme. Túrarum uunt iwianchi wakeramur̄j umirniuyarme. Uunt iwianch ashí Yúsan umirainiatsna nuna akatenawai. ³ Ashí iisha núnisrik yaunchu nu shuarjai métek ii ayash̄j̄ wakerakmu umirniuyaji. Tura íi enentáj wakeramusha umirniuyaji. Tuma asar tura tunaajaj akiinia asar chíkich shuarjai métek ti kajernakmiaji. ⁴ Antsu Yus ti waitnen̄kartin asa in ti anenmamiai. ⁵ Tuma asa ii tunaanum tuke jaka pujarin̄j Krístujai métek iwiaaku

awajtamsamijai. Aya ti aneñkartin asa uwentikrampramijai. ⁶ Tura Krístujaj métek iniantamkimiayi. Nuyaj Jesukrístujaj métek, akupin pujutainium yamaisha apujtamas tuke nupetkatniun tsanekatramkaitji. ⁷ Nujaj ni ti aneñkratmarincha tura Kristu túrunamujaj waitnentrampramuncha tuke iniaktusmin átatui. ⁸ Jesukrístu nekas enentáimta asakrumin Yus waitnentramar uwentikrampraiti. Juka átumkeka túrunachuitrume. Antsu Yuska Niñki kuitchajaj suramsaitrume. ⁹ Shuar ni takatríjjaj uwempratniuitkiñka nankaamantu enentáimsainti winia kakarmarjaj uwemprajaj tusa. Nu enentáimsatniuka atsutí tusa Yuska átumka takaatsrumniñ uwempratniun suramsamiarme. ¹⁰ Yus najanamuitji. Kame Jesukrístujaj tsaniákrin yamaram iwiaakman suramas tuke péñker túratniun najatnmaji. Yáunchuk nuna enentáimturmasmijai.

Krístujaj tsaniñkiu asar shiir nawamnaikiar pujaj

¹¹ Nuik ámarum nu enentáimpratarum. Ashí Israer-shuar ni ayashín tsupirnaku ásar ashí Israer-shuarchan, tsupirnakcha ániakui, penké Yúsnachua núnis enentáimtuiniawai. Tura atumsha Israer-shuarcha asakrumin “tsupirnakcha” turamniuyarme. ¹² Nuñk Kristurtinchauyarme. Israer-shuarcha asarum ashí ni túrutairisha tura ashí Yus nin tsanekatmasha nekaachuyarme. Tura jú nuñkanmayá asarum nekas Yusa nu enentáimtichuyarme tura shiir pujustin nanksamсарum enentáimpramarme. ¹³ Antsu yamaikia Krístujaj tsaniñkiu asarum, yaunchu Yusajya yajá pujuwitiatrum, yamaikia Kristu numpé puármatai ni jarutramkamujaj tántaitrume. ¹⁴ Israer-shuarjaj Israer-shuarchajaj nemasmaniakiar ajapén péñkramu ámijai. Tura Kristu nuna sáaki nawamnaittikramkamijai. Tura chikichik shuar najatnmamijai. ¹⁵ Nuik aya Israer-shuar Muisais akupkamu untsurí armia nuna umirkatin ániak nujaj chikich shuarjaj nemasmanainiarmiayi. Tura Kristu jaka nu akupkamun ántar awajas chikichik shuar yamaram awajtamsamijai. ¹⁶ Núnisaj ámijai. Kristu krúsum jaka nemasjaj mai apattamak chikichik awajtamamas Yusjajisha nawamnaittikramkamijai.

¹⁷ Kristu taa nawamnaikiatniun chichaman Israer-shuaran ujakmiayi. Tura nu chichamnak atumin Yus nékachuyarmena nunasha ujaktinian akupkamijai. ¹⁸ Yamaikia Israer-shuartisha tura Israer-shuarchasha mai metek Kristu túrunamujaj tura Yusa Wakanj takaku asar Yusaj jeatniuitji. ¹⁹ Tuma asantai yamaikia chikich shuarchaitrume, antsu ashí Yus-shuarjaj métek ajasuitrume. Nekas Yusa shuarintrume.

²⁰ Átum uunt jea jeamma núnisaitrume. Uunt jea jeamtin, emka kaya apujtuktiniaiti jea ti wewe atí tusa. Núnisaj yaunchu Yúsnan etserniusha tura Kristu akatramurisha Yus-Chichaman etserainiak imiá nekas enentáimtustinia nuna apujtuktarmiayi. Tura ashí nujaj nankaamas Jesukrístu enentáimtustiniaiti. ²¹ Jea apujtuktmarj Kristu asantai Nijj ti penker ekeniar jea jeamnaki wéawai. Tura ii Uuntrj Krístujaj Yusa Jee ti shiir átatui. ²² Núnisrumek atumsha Krístujaj tsaniñkiu asarum átum ashí Yus-shuarjaj Yusa Jeeja áimsanj ajasuitrume. Tura Yusa Wakanj ashí Yus-shuara enentáin pujú asantai nekas Yusa Jeeñte.

3

Papru Israer-shuarchanum Yus-chichaman etserkatniuya nu

¹ Nu asantai atumin Israer-shuarchatirmin yáintaj tusan Jesukrístunu étserkun sepunam pujajaj. ² Yus anentak Yus-Chichaman atumin etserkatniun akatar akuptukuiti. Nu nékatsrumek. ³ Yus nuna túrutak yaunchu nekaachmancha paant awajtursamiayi. Núnaka ishichik átraitjarme. ⁴ Nu áujsarum Krístunu yaunchu nekaachman yamaikia paant nékajna nu nekaatarme. ⁵ Nú chichaman yáunchusha chikichinkesha ujanekchamijai. Túrasha yamaikia Yusa Wakanj Kristu akatramurincha etserniurincha nu chichaman paant awajtsarai. ⁶ Nu chicham juiti: Uwempratín chichaman umirkar Israer-shuarcha Israer-shuarjaj métek Krístujaj tsaniñkiaru ásar chikichik shuar ajasartatui. Tura nu arantcha Yus ni shuarin ashí shíran tsanekatkatniun anajmatrama nuñ métek pachiinkiaratui. ⁷ Yus ni kakarmaríjjaj winia yáintiuk tura ti anentu asa nu uwempratín chichaman etserkat tusa akatturmiayi. ⁸ Ashí Yus-shuarjaj nankaamas wi péñkercha añ Israer-shuarchanum shiir chichaman etserkat tusa Yus tsanekatrukmiayi. Krístujajñkia kuitjaj nankaamas péñker, enentáimtustín jeatsjinia nu, takakji. Nusha ti shiir chichamaiti. ⁹ Yuska, ashí najana nu, nu enentáimmmian yáunchusha etsertsuk yamaikia ashí shuar nu chichaman nekaawarat tusa winia akatturmiayi. ¹⁰ Yamaikia ashí nayaimpiniam pujuinia nuka Yus ni shuarin túrunamun ísar Yuska imiá neka asa ashí enentáimniua nuna paant nékainiawai. ¹¹ Yus júnis túratniun yáunchuk enentáimpramijai. Tura ii Uuntrj Jesukrístujaj mash uminkiamijai. ¹² Tura Krístujaj Yusaj yúpichuch jeaji. Tura Nin nekas enentáimtusar sapijmiatsuk Niñ tantamniaitji. ¹³ Tuma asantai tájarme, atumin yáintaj tusan sepunam pujakui kúntuts enentáimprairap. Antsu nujaj Yus atumin ti shiir awajtamkurmin átum warasuk tusan wakerajrume.

Kristu ti aneņkratniuiti

¹⁴ Nu asamtai ii Uuntrj Jesukřistu Aparin tikishmatran aųtajrume. ¹⁵ Ashi nayaimpin-masha tura nuņkasha Yus-shuar ajinia nu nekas ni shuarj ainiaji. ¹⁶ Yus ti kakaram asa ni Wakanjijaj atumi enentain pujureak ashí ni kakarmariyan atumin suramsarat tusan aųtajrume. ¹⁷ Yus nekas enentaimtakrumin Kristu atumi enentain pujusat tusan aųtajrume. Tuke yapajitsuk aneņkratin atarum tusan aųtajrume. ¹⁸ Turakur ashí Yus-shuarjaj Kristu aneņkrattairj nekaattarme. Imia uunt asa nuņkantsuk tuke amuukachminiaiti. ¹⁹ Nu aneņkrattai ashí takamtsuk nekaachmin ajn nekaatarum tusan aųtajrume. Nujaj Yus takamtsuk pimiutramkattarme.

²⁰ Nekas Yus shiir awajnasti. Ni ti kakaram asa ii seajnia nuna nuņkaamas tura enentaimprachminia nunasha nuņkaamas jin pujurtamuk ashí turamniaiti. ²¹ Ashí Yus-shuarjajsha tura Kristujajsha Yusa penkerj tuke paant wantinin atí. Yus tuke iniaitsuk shiir awajnasti. Nunisan atí.

4*Yusa Wakanjijaj tsaninkiar pujakur turatin*

¹ Atumsha ni shuarj ajastin Yus achikma asarum penker wekasatarum tajarme. Ii Uuntrinuiun etserkun sepunam pujakun seajrume. ² Nekasmiancha ajasrum aneniakrum katsunnairatarum. ³ Yusa Wakanj chikichik shuar awajtamkurmin shiir awajnaisarum pujustarum. ⁴ Yusa Wakanjinka chikichkiiti. Tura ashí metek Yus achikma asar metek Nijijaj shiir pujustin enentaimji. Iisha Kristu ayashí ayashimkia asar chikichik ayashkiitji. ⁵ Ii Uuntrj chikichkiiti. Niņki nekas enentaimtusar metek imiantiniaitji. ⁶ Chikichkiiti Yus, ashí Yus-shuarti ii Aparinti. Ashí akuptamniuitji. Ashí ni shuarjin pujak ii enentain pujurtamji. Ti nekas ashí mash, Israer-shuartisha Israer-shuarchasha, imia chikichik ajasuitji.

⁷ Tura chikichik chikichik niishaa shiir takastinian suramsaitji. Tura Kristu wakerimia nunisan suramsaji. ⁸ Nu asamtai Yus-Papiniumsha tawai:

“Achikman juki nayaimpiniam wakamiayi. Tura shuaran shiran susamiayi.”
Tu aramaiti.

⁹ Tura “wakamiayi” tana nu zarintuia? Kristu nayaimpiniam pujá asa yakí wakanka emka tarashinkiait. Nekas nuņka taramiayi. ¹⁰ Niņki ataksha nekas nayaimpiniam wakamiayi. Nuna tura asa ashí ni shuarin pimiutkarmiayi. ¹¹ Tura nujaj chikichan akatramun awajsamiayi. Chikichnasha Yusan etserniun awajsamiayi. Chikichnasha uwempratin chichaman etserniun awajsamiayi. Chikichnasha Yus-shuara wainniun awajsamiayi. Tura chikichnasha unuikiartinian awajsamiayi. ¹² Turamta ashí Yus-shuar ni takatrijaj yainiaikar ti penker shuar ajainiakui Kristu ayashí takamtsuk katsuaratatui. ¹³ Nujaj Yus nekas enentaimtamunam Yusa Uchirj ashí metekrak penker nekaattaji. Nu turakur katsukur Kristujaj metek penker ajastatji. ¹⁴ Tura uchía aintsar achattaji. Uchikia ashí yamaram chichaman antukar wari yapajiniawai. Tura anankartinia chichamen antukar waaku ainiai. Kame nu anankartin shuar ti paant chichayatan ni shiir chichamejaj anankatniun pujurenawai. ¹⁵ Antsu nekas aneniakur nekas chicham ujanaktiniaitji. Turar Kristujaj tsaninkiar tuke tsakakar ashí penker turatnuijaj Nijijaj metek ajastatji. Kristuka ashí ni shuarj muuké aintsankete. ¹⁶ Tuma asa ni ayashin wainkiui ashí nuna muchitmarj penker yainiaikar ashí ni turatniurjn shiir takasartatui. Nujaj nu ayashniun muchitmarj chikich chikich penker takainiak metekrak shiir tsakartatui. Tura anenainiakui nu ayashsha penker untmartatui.

Kristujaj tsaninkiu asar yamaram iwiakmanum wekaaji

¹⁷ Ii Uuntrj Kristu immianum juna akatjarne: Chikich aents Yusan nekachu asar antar ni enentaimmijajin wekainia nunisrum wekasairap. ¹⁸ Ni enentain kusuru ainia Yusna nuna nekaatniun wakeruiniatsui. Tuma asar shiir wekasatniun, Yus amaana nuna, nekainiatsui. ¹⁹ Nu arantcha, ni turamurijaj natsamtichu asar ti yajauchiniam surumakar ashí tunaan wararainiak turin ainiai. ²⁰ Antsu atumka nunisrum enentaimtustin unuimiar-chamarme. ²¹ Nekas Nii anturkaitkiurmeka tura Jesus nekas tama Kristu unuiniar-maitkiurmeka Nin shiir enentaimtustin unuimiar-marme. ²² Yaunchu enentaimtairmeka ayash wakeramu anankramin ainia nujaj piaku asa imia yajauchiiti. Nu enentaimtairmeshu yaunchu turutairmeha ajapa iniaisarum. ²³ Turarum penker enentaimsarum wakannium yapajatarum. ²⁴ Tura yamaram enentaimtairam emetatarum. Nuka Yusjaj metek najanamu asa nekas penker tura shiira nuna tuke turiniaiti.

²⁵ Nu asamtai chikichik ayashi muchitmarj asarum wairutsuk nekas chicham chichar-naisatarum.

²⁶ Kajeakrum tunáa túrawairap. Tura nu kajeqmasha tsawant takamtsuk áchatniuiti. ²⁷ Uunt iwianch yajauch awajtamtsatin tsan̄katkaip.

²⁸ Kasasha kasamtsuk kakaram takakmasti. Tura ni uwejējai péñker takaak atsumainia nú shuarnasha susati.

²⁹ Muijmiai chicham chichasairap. Antsu chichastin akui péñker chicham, chíkich shuar péñker awajsamnia nu chichastarum. Anturtuinia nuna yáingtaj tusarum nu chicham ujaktarum. ³⁰ Yusa Shiir Wakan̄j kúntuts awajsaairap. Warí, Yúsnaiti tusa pujurtamji. Tura pujurtamuk takamtsuk uwentikramprattaji.

³¹ Ashí yajauch ana nuyá kanaktiarum. Nakitratniusha, kajernaikiatniusha, tura kakantrar charáa charáa ajatniusha, katsekmaktincha, tsanumpratniusha mash atsutí. ³² Antsu shiir awajkartin ajasrum waitnennairarum, Kristu jakamujaj̄ Yus atumí tunaar̄in tsan̄kurtampra nútiksarmek tsan̄kurnairatarum.

5

Yus-shuar túratin

¹ Nekas Yusa Uchir̄j aneamu asarum Nii tura núnis túratin wakeruktarum. ² Kristu in anenmaj núnisrum anenaitiarum. Kame ii tunaar̄in akikmaktaj tusa jákatniunam surumakmiayi. Túramtai Yus shiir enentáimtusmiayi.

³ Yusna asarum tsanirmatniusha yajauch túratniusha tura jú nun̄kanmayaan̄ iki-aun̄katniusha ishichkisha enentáimtuschatniuitrume. ⁴ Natsanmaincha, ántar chichamsha yainmakchamnia asamtai chichaschatniuitrume. Antsu Yus shiir yuminsatniuiti. ⁵ Shuar chíkich nuwajaj̄ tsanirimakka tura ashí yajauchin wakerakka tura jú nun̄kanmayaan̄ iki-aun̄katniun wakerakka Yusaj̄ Kristu akupea nūj pen̄ké pachíinkiachminiaiiti. Kame jú nun̄kanmayaan̄ ikiaun̄katin ántar-yus tikishmatratniua nujaj̄ méteketete. ⁶ Nu túramniaiti tusar ántar chichamjaj̄ anan̄kramacharti. Warí, nuna túruiniakui Yúsna umirainiachun Yus ti asutiáwartatui. ⁷ Tuma asamtai nu shuar pen̄ké pachischatniuitrume.

⁸ Yáunchuka atumsha kiritniunam wekainiuyarme. Tura yamaikia Krístujaj̄ tsan̄n̄kiu asarum péñker tsáapninium wekaarme. Shuar tsáapninium wekainia nujaj̄ métek wekasatarum. ⁹ Tsáapninium wekainiaka shiir awajkartincha tura nekas chichamtincha tura péñker túrin áiniawai. ¹⁰ Ii Uuntr̄j Kristu wakeramu nekaatin wakeruktarum. ¹¹ Kiritniunam wekainia nu túramu pachisairap. Antsu nu shuar tsáapninium en̄keatarum. ¹² Ni uuk túruinia nu áujmatsatin natsanmajniiaiiti. ¹³ Tura ashí tsáapninium itiamu ashí paant ajawai. Tsáapnikia ashí paant awajeatsuk. ¹⁴ Nu asamtai Yus-Papinium tawai: “Kananuitme nu shintiártá. Jakamunmaȳ nantáktiá. Tura Kristu tsáapin awajturmastatui.”

Tu áarmaiti.

¹⁵ Nu asamtai átum túramu ímiastarum. Nékachu áintsarum pujusairap. Antsu péñker enentáimprarum wekasatarum. ¹⁶ Péñker túratin tsawant wasúrkáip. Tunáa ti pampaatsuk. ¹⁷ Enentáincha áirap. Ii Uuntr̄j Kristu warinia wakera nu enentáimtustarum. ¹⁸ Nampekairap. Nampeakmeka aya yajauch ajame. Antsu Yusa Wakan̄j winia enentáirūj takamtsuk pujurtusti, tu enentáimsatarum. ¹⁹ Túrarum Yus shiir enentáimtakrum Yus-kanta kantamkirum shiir áujnaisatarum. ²⁰ Ii Uuntr̄j Jesukristu náar̄ijaj̄ ashí irunna nu Yus Apa tuke yuminsatarum.

Yus-shuar túratin

²¹ Yus-shuar asarum nuámtak umirnaikiatarum. Túrakrum Kristu shiir awajsattarme.

²² Núwaka Krístun umirna núnisañ ni áishr̄incha umirkatniuiti. ²³ Kristu ni shuar̄in akupeana núnisañ áishman̄sha ni nuwen̄ akupkatniuiti. Kristu ni shuar̄in ayashimiak ni muuké áintsan̄kete. Tura nin uwemtikiartiniiaiiti. ²⁴ Nu asamtai Yus-shuar Krístun umirin áiniawai. Núnisañ ashí ana nuwaj̄ nuwaj̄ ni áishr̄in umirkatniuiti.

²⁵ Kristu ni shuar̄in ti aneak nin yáingtaj tusa jákatniun surumakmiayi. Núnisrumek áishman̄tirmesha atumí nuwé aneatniuitrume. ²⁶ Kristu ashí ni shuar̄in ni Chichamejaj̄ tura entsajaj̄ nijjar ní shuar péñker árat tusa jakamiayi. ²⁷ Nujaj̄ ashí ni shuar̄in tunaar̄in-niuchu tura yajauch máatrachu antsu ti pen̄ker shiir awajas Niiní ejetaj tusa túramiayi. ²⁸ Núnisañ áishman̄ ni ayash̄in̄ anea núnisañ ni nuwen̄ aneatniuiti. Shuar ni nuwen̄ aneak nujaj̄ ni ayash̄in̄cha aneawai. ²⁹ ¿Yaki ni ayash̄in̄ nakitniuit? Antsu péñker wáiniuk áyureatsuk. Kristu núnisañ ni shuar̄in wainiui ³⁰ ni ayash̄in̄ asamtai. Kame ni ayash̄in̄ muchitmarintji. ³¹ “Tuma asamtai áishman̄ ni apar̄incha nukur̄incha ikiukin ni nuwejaj̄ tsan̄in̄kiar chíkichik ayash̄tin ajainiawai.” Tu áarmaiti. ³² Nusha Kristu ni shuar̄ijaj̄ tsan̄in̄mán tawai. Nuka yaunchu nekaachma yamaikia nekanaiti, tura ti enentáimtur̄tiniiaiiti. ³³ Tura núnisañ ashí áishman̄tiram atumí nuwé atumí ayash̄in̄ nútiksarmek aneatniuitrume. Nuwasha ni áishr̄in umirkatniuiti.

6

¹ Uchitirmesha, Yus-shuar asarum apasha nukusha umirkatarum. Nuka ti péŋkeraiti.

² Emka akupkamu “umirkam nekas shiir átatme” tana nu júiti:

“Apasha nukusha umirkata.

³ Túrakmeka shiir átatme tura jú nunŋkanam untsurj tsawant pujustatme” tawai.

⁴ Atumsha, uchirtintirmesha, atumí uchirj ánrarum akajkairap. Antsu Yúsan shiir enentáimtusarat tusarum ti péŋker jintinkirum tsakatmartarum.

⁵ Takakmautirmesha, atumí uuntrj ju nunŋkanam pujuinia nu ti peŋker umirkatarum. Kristu umirkatniua áintsarum wishiktsuk ashamakrum tuke enentáijjai takarsatarum.

⁶ Aya wáitmakui shiir enentáimtursat tusarum péŋker takarsairap. Antsu Kristu takarniurja núnisrum ashí ame enentáimjai Yus wakera nu túratarum. ⁷ Aya shuárnak yayá nútiksarum takasairap. Antsu ii Uuntrj Kristu takarsatniua nútiksarmek ásump enentáijjai takastarum.

⁸ Kame chíkich chíkich ni takasmajaj métek akinkiartatui. Ii Uuntrj Kristu nu shuar péŋker túramujaj métek akiktatui.

⁹ Tura atumsha, iniamniutirmesha, atumí takartamu wakanj mántutsuk shiir enentáijjai iniartarum. Nekas enentáimpratarum. Ii Uuntrj nayaimpiniam pujana nuna niisha atumjai métek umirainiawai. Tura Yuska ashí shuaran akantsuk métek iyawai.

Yusa kakarmarijaj iwianch taritratarum

¹⁰ Wátsek, yatsuru, ii Uuntrj Yusjai tsaniŋkiu asarum ni ti kakarmarijaj iwianchjai máanaiktin kakaram ajastarum. ¹¹ Apach máanainiak jiru entsarua núnisrum Yus susamujaj entsartarum. Nujaj iwianch nupettamkui tariartatme. ¹² Kame Yusna takáa asar peŋké áentsjai máaniatsji antsu yajauch wakan kakaram írunna nujaj máaniaji. Niisha ju nunŋkanam, kiritniunma áintsan, tunaanum wekainia nuna akupin áiniawai. ¹³ Jiru entsartinia áintsarum Yus súramna nu entsartarum. Nu entsarmajaj itiurchat tsawant taritra nupetkarum tuke tariarum wajastatume. ¹⁴ Wats, nekas tariartin nekas chicham emenmamatarum. Tura péŋker túratniujaj jatairum ajaktarum. ¹⁵ Suntar iwiarnak sapatan aweá áintsarum Yusa shiir chichame etserkatin iwiarnartarum. ¹⁶ Nuyasha ashí nanŋkaamas, tantar takustinia áintsan, Yus tuke nekas enentáimtustarum. Nujaj iwianch eketrámkamusha uwemturtatme. ¹⁷ Múukem ajaktincha Kristu uwentikrampramu múukmijn etsenŋkruktarum. Tura Yus-Chicham puniáa áintsan achiktarum. Nuka nekas Yusa Wakanj puniarjinti. ¹⁸ Yusa Wakanjjaj Yus áujeakrum tuke seatniuitrume. Tura tuke aneara pujustarum wake mesetsuk, tura ashí Yus-shuar ainia nusha Yus áujtustarum. ¹⁹ Núnisaj winiasha áujtursatarum. Wi sepunam pujayatan Yus winia chichastinian surusat tusarum seatritiarum. Tura wi chichaakun sapijmiatsuk Shiir-chichaman yaunchu nekaachma paant awajsat tusarum áujtursatarum. ²⁰ Yus nu chichaman etserkatniun akup-tukuiti. Nuna túrakun sepunam pujajaj. Sapijmiatsuk etserkat tusarum Yus áujtursatarum.

Amikmaamu

²¹ Ii aneamu yachi, Tikikiu, ashí wi túramun ujatmaktatui. Niisha Ii Uuntrj Krístonu etserkatniun ti peŋker yáinniuiti. ²² Tuma asamtai ii juj pujamun ujatmak ikiantamprarat tusan akuptajrume.

²³ Yus Apasha tura ii Uuntrj Jesukrístusha ashí Yus-shuartirmin anenmak shiir imiatkinchanum pujustinian suramsarti. Tura Nin tuke nekas enentáimustinian suramsarti. ²⁴ Ashí ii Uuntrj Jesukrístun tuke enentáijjai aneana nuna Yus shiir yáŋtí.

Nuke atí.

Papru JIRIPIUSNUMIA SHUARAN papi akuptukma

Papru sepunam pujus Jiripiusnumia Yus-shuaran áatramiania nu

¹ Wi Papru Timiutéujai Jesuskristu takarín asar ashí Yus-shuar Jiripius péprunam pujar-mena nu ju papi akuptaji. Yus-shuaran wainin árumna nusha tura Yus-shuaran yain árumna nusha ashí Yus-shuarsha nunisan Yusna asarum tura Jesukristujai tsanínkiu asakrumin ju papi áateajrume. ² Yus ii Aparísha Jesukristu ii Úuntrísha atumin waitnentramainia ásar imiatkinchanum tuke shiir pujustinian yainmakarti.

Papru Yus-shuaran Yúsan áujtawai

³ Ashí tsawant atumin enentáimtakun Yúsan tuke shiir yúminkiajai. ⁴ Yúsan áujeaknasha ti warasan seatjarne. ⁵ Kame iikia yámankamtaiknumia Yus-Chicham méték yáiniáikiar iniatsuk takasuitji. ⁶ Yus atumín ti pénger awajstaniun nan̄kama asa núnisan Jesuskristu táatsain̄ tuke shiir awájtámki nekas pénger najatmattarme. Nuka ti nekasaiti. ⁷ Atumin ashí ti aneajrume. Kame wi sepunam pujakun Yus-Chichaman akasmatkun tura Yus-shuar kakararti tusan takaakui átum yáintiarme. Yus ti aneñkartin asa nu túratniun mai metek tsañkatrámkaitji. Tuma asamtai atumin júnisan enentáimtustin ti penkeraiti. ⁸ Jesukristu aneñkrattairíjjai wi atumin aneamun Yussha paant nékarui. ⁹ Yúsan áujeakun anearmena nú nan̄kaamas aneak tusan seatjarne. Tura nújjajisha ti neka ajasrum ¹⁰ ashí péngera nu achikiuk tusan Yúsan áujtajrume. Atumin nu túrunamtaíñkia yamaisha tunájain̄chu pujustarume tura Kristu támtai sumamashtatrome. ¹¹ Núnisan̄ Jesukristu kakarmaríjjai ashí pénger túrin átatrume. Tura nújjai ashí shuar Yúsan ti shiir enentáimturartatui.

Wi ju nun̄kanam aya Kristunak enentáimtakun pujajai

¹² Winin túrunamu itirchat ain̄ nujai uwempratin chicham nekas pampaawai. Nu nekaatarum tusan wakerajrume, yatsuru. ¹³ Iis, uunt akupniu suntarísha tura ashí shuarsha wi Kristunun etseru asan sepunam pujamun paant nékainiawai. ¹⁴ Ti untsurj Yus-shuar wi sepunam enketman nekaawar ii Uuntri Jesusan nekas enentáimtusar sapijmiatsuk Yus-Chichaman etserainiawai.

¹⁵ Kame shuar awai winia kajertuiniak tura nan̄kaamantu enentáimtumainiak Kristun páchiniawai. Antsu chíchik shuarka nekas enentáijjai Kristun etserainiawai. ¹⁶ Yajauch shuarka Kristun shiir enentáimtusuk antsu ashí shuar ní chichamenak anturkar wí shuar ajasarat tusar etserainiawai. Túruiniak wisha sepunam pujakui nu arant itit awajstunian wakerutainiawai. ¹⁷ Antsu pénger shuar Kristun nekas aneenak etserainiawai. Nu uwempratin chicham imiá penkeraiti wi titin asamtai winiasha anentainiak shiir etserainiawai. ¹⁸ Wats, mai metek chíchik yajauch enentáijjai tura chíchik shiir enentáijjai Kristun etserainiakui shiir enentáimjai.

Tura nuna nan̄kaamas shiir enentáimprattajai. ¹⁹ Kame Yus áujtursa asakrumin tura Jesukristu Wakánísha yaintiu asamtai ti pénger uwempran jíinkittiajai. ²⁰ Nekas juna wakerajai: Natsamtsuk uunt akupniu Jesukristun paant újaktarinian wakerajai. Nujai wini Kristu kakarmarj pujamu ti paant nekanattawai. Mántuiniakuisha tura mántuiniachkuisha ashamatsjai. Aya Kristu kakarmarín wini nan̄kaamas nekaawarat tusan wakerajai. ²¹ Wíjjain̄kia ju nun̄kanam iwiaaku pujakun aya Kristunak enentáimtakun pujajai. Tura jákatniusha juí pujajnia nuna nan̄kaamas péngeraiti. ²² Ju nun̄kanam pujakun Uunt Jesusnan takasminiatjai. Nu asamtai tunatsuk achiktaj nékatsjai. ²³ Wíjjain̄kia itirchataiti mai achiktin. Jákatniuncha wakerajai Kristujai tsanínkian pujustaj tusan. Wíjjain̄kia nu imiá péngeraiti. ²⁴ Túrashá atumin yáintaj tusan tuke ju nun̄kanam iwiaaku pujusminiatjai. ²⁵ Kame tuke pujustajtai nékajai. Núnisan̄ atumjai pujakun Yus nekas enentáimtakrum nan̄kaamas waraakrum tuke katsuarkum tusan yáintajjarne. ²⁶ Nu asamtai wi atumjai pujakui Jesukristu yuminsarum shiir warastatrome.

²⁷ Kristu chichame ti penker asamtai atumsha aya péngera nuke túratarum. Wi atumjai pujaknasha tura yajá pujaknasha átum ti shiir túrarmena nuna antuktinian wakerajai. Ashí shuar uwempratin chichaman nekaawar umirkarat tusarum chíchik enentáijjai kakaram ajastarum. ²⁸ Atumí nemasrísha ishichkisha sapijmi-antikramkarajín. Nu túrakrumin nu shuar emesratniunam weena nusha tura átum uwempratniusha paant nekanattawai. Núnisan̄ atí tusa Yus túraiti. ²⁹ Kristunu asarum Nii nekas enentáimtustinniusha tura Niiniu asarum wáitsatniusha Yus anenma asa

tsaṅkatramkairume. ³⁰ Yus-Chicham pamparat tusar maimetek ti takáa asar wáitíaji. Wi nuik ti takasmaj nu nekamarme. Tura yamá tuke takaaḡ nusha ántarme.

2

Kristu péjchach ajasmatai Yus ti uunt awajsamiayi

¹ Kristu ikiantamkuisha, ni aneṅkrattairḡ atsaṅtamkuisha, ni Wakanḡ atumḡai pu-jakuisha, aneṅkratniuitkiurmesha, waitneṅkratniuitkiurmesha ² waramtikrustarum. Métekrak takastarum. Mai metek anenaitiarum. Yusa Wakanḡ atumḡi enentáin pujá asamtai chikichik enentáik enentáimsatarum. ³ Átum wakeramuk túrawairap. Naṅkaamantu ajastaj tírap. Antsu péjchach ajasrum chikich shuar atumḡai naṅkaamas péṅker enentáimtusta. ⁴ Aya níniak péṅker átatna nunak shuar túrashti. Antsu chikich shuar yáinminia nuna túrati. ⁵ Kristu Jesus enentáimpramia núnisrum enentáimpratarum. ⁶ Niisha Yúsaitiḡ ju nunkanam winiak tuke Yusḡai métek átinian emettsuk ⁷⁻⁸ antsu nuna ikiuak aents ajas péjchach asa ashí aents takarḡin ajasmiai. Tura aentsu ayashḡin ayashimiak tura Yúsán umireak jákatniuncha surimiakchamiayi. Maa, imiá tunaarinnia áintsan krúsrum natsanmainium jakamiayi. ⁹ Túramtai Yus nekas naṅkaamantu awajsamiayi. Ni náarḡincha ashí paant awajsamiayi. ¹⁰ Tuma asamtai ashí nayaimpiniam írúnna nusha, nuṅká írúnna nusha, tura iwiarsamusha Jesusa náarḡin antukar tikishmatrartatui. ¹¹ Tura ashí shuar Jesukristu ashí akupin ajasman paant nekaawartatui. Núḡainkia Yus Apá kakarmarḡsha paant nekanattawai.

Yus-shuar kiritniunam keeák tsápin awajeana áintsan áiniawai

¹²⁻¹³ Nu asamtai, aneamam yatsuru, wi atumḡai pujáik umirtukmarmena nuna naṅkaamas yamaikia arant pujakuisha umirtuktarum. Iis, Yus atumḡi enentáin takaak ni shiir wakeramu wakeruktinniasha tura umiktinniasha pujurtamprume. Nu asamtai atumsha kakaram ajastarum Yus ti péṅker awajtamsatniun wakera nu túrunati tusarum. Tura péjchach enentáimprarum awajirminiaitḡai tusarum aneara wekasatarum.

¹⁴ Ashí yajauch tunaitsuk tura jianaitsuk wekasatarum. ¹⁵ Túrakrum makuumatsuk tunaajainchu átratume. Antsu Yusa uchiḡ átratume. Ju nuṅkanmasha shuar imiá tunaan túrinḡaisha máatrachu asarum kiritniunam ji keeá áintsanḡetrume ¹⁶ iwiaaku pujustin chicham paant awajeakrum. Núḡai Kristu támatái atumḡin ántan takascha asan ti shiir wararsattajrume. ¹⁷ Winia takatruḡai Yus-shuar ajasakrumin wi jákatniuitkiuncha núḡaisha warasaitḡai. Atumsha wi waraajna juḡ núnisrumek warastarum tusan wakerajrume. ¹⁸ Atumsha waraakrumin métek wararnaisatai.

Timiutéuncha Epaprutíiuncha Papru ujakamiania nu

¹⁹ Ii Uuntrḡ Jesus wakerakuṅkia Timiutéun firmainiarat tusan ti warik akuptuktatjarme. Tura átum shiir pujamu ujateakui warastatḡai. ²⁰ Kame Timiutéu wíḡai métek enentáimna ánis chikich shuar atsawai. Niisha átum shiir pujusuk tusa ti nekas enentáimturmarme. ²¹ Chikichka Kristu wakeramun iniaisar ní wakeramunak páchiniaiwai. ²² Túrasha átumka Timiutéu tuke péṅker túramu nékarme. Uchi ni aparḡḡai takaana ánis Yusa shiir chichame etserkatniun yáintkiai. ²³ Winia itiurtukartinḡ nuna nekaan Timiutéu firmainiarat tusan akuptuktatjarme. ²⁴ Kame Kristu yáintkiui wíkisha wárik ínniaitjarme.

²⁵ Wi atsumaj nuna írsati tusarum Epaprutítiu akupturkamarme. Wíḡai métek tsanḡin takasu. Tura métek wáitsaitḡi. Áunkesha akupkamnia enentáimḡai. ²⁶ Nii jaawai taman átum antukman nekáa, íрмаitniun ti wakerutmarme. ²⁷ Maa, nekas ti janiṅkiamai. Túrasha Yus nin waitnentramai. Kame winiaasha wi juḡ wáitiakun nii jakamtai nu arant ti kuntuts pujuschatniun waitnentrurmai. ²⁸ Tuma asamtai akuptuktiniam wakerajrume. Tura atumsha ataksha wáinkiarum waraakrumin wisha ti kuntuts enentáimchakun akuptuktatjarme. ²⁹ Kristu yumḡsarum ti shiir warasrum wáinkiatarum. Chikich shuar niḡḡai métek péṅker Yus-shuar ainia nusha shiir enentáimtustarum. ³⁰ Kristu takatḡin takaak ti janiṅkiamai. Átum yáintkiachminia nuna winia yáintkiataḡ tusa pujus jániṅkiamai.

3

Kristu nekaatin ashí naṅkaamas péṅkeraiti

¹ Ayu. Warastarum, yatsurtiram, ii Uuntrḡ Kristu ti péṅker asamtai nuik átramajrum nuna ataksha títiatjarme. Ataksha ujam yainmakminiaitkiuṅkia wḡaiḡainkia itirchatchaiti atak enentáimtikratin. ² Yajauch shuarḡai aneartarum. Nu shuar Muisais timia núnis tuke yamaisha tsupirnaktiniaitrumé tuiniawai. ³ Antsu iikia ayash tsupirnakmajai péṅker átiniaitḡi tu enentáimtsatḡi. Iikia antsu ii wakanḡḡai Yus shiir awajeaji tura Jesukristunu asar Niṅki shiir wararḡi. Nu túrakur Muisais timia nu umintikia itḡi. ⁴ Ju nuṅkanam írúnna nuḡai waantu enentáimpramniaitkiuṅkia ashí shuarḡai naṅkaamas wikia waantu enentáimtumaraḡitai. ⁵⁻⁶ Israer-shuar asan Muisais timia núnisaṅ wi akiiniamtai uchu (8)

tsawant nan̄kaasmatai tsupirtukarmiayi. Israer-shuarnum Pinjamín weeitjai. Winia aparsha nukursha mai Israer-shuar ániakui wi imiá Israer-shuaraitjai. Wisha Pariséu tuinia núnisan Muisais akupkamun ti umirin asamtai chíkichka winia sumamtikiatniun tujintrin ármiai. Tura Pariséu asan Kristu-shuarin ti kajerkan ánttramjai. ⁷ Ashí nujáinkia waantu enentáimtumayujai. Antsu yamaikia Kristujáinkia penké ántar ániawai tajai. ⁸ Ashí enentáimpramnia ákuisha winia Úntur Jesukrístu shiir enentáimtustin nekas péñkeraiti. Nu asamtai Kristunu ajakun wi takusmaj nu muijmiai ajasmatai núnaka iniaisamjai. ⁹ Nuna túran Niijjaj tsanínkian pujajai. Tura akupkamu umirkatniujaj péñker ajaschaitjai antsu Kristun enentáimtakui Yus “péñkeraitme” túrutui. ¹⁰ Tuma asamtai ashí nan̄kaamas wakeraj nu júiti: Kristun péñker nekan nekas enentáimtustinniasha tura ni iniantkimiu kakaram takustinniasha wakerajai. Tura Niijjaj métek ajastinian wakerakun ni wáitkiamunam tsanintinniasha tura Nii jakamia núnisan jákatniuncha wakerajai. ¹¹ Túraknaka Kristujaj métek jakamunmayg nantaktij tusan wakerajai.

Papru kakaram ajasmiai Kristu wakeramun umiktinian

¹² Kame wakerukuitja nuna mash umirkachuitjai. Kristujaj métek nekas péñker shuar ajaschaitjai. Túrasa Kristu Jesus “nuj ejetajam” emka túrutkui, wisha nuj jeataj tusan kakaram ajasan pimpitsuk takaajai. ¹³ Yatsuru, wisha nuj jeajai tátsujai. Antsu yaunchu túrutain kajinmatkin kakaram ajasan Kristu wakeramunam jeatniun takaajai. ¹⁴ Tura nuna umikmatai nayaimpiniam Jesukristujaj tsanínkian shiir pujustinian Yus surustatui.

¹⁵ Ashí shuar Yusjaj katsuaru ájnia nu wi tájana núnis “jeachuitjai” tu enentáimpratniuitji. Tura “jeaitjai” enentáimkiurminkia Yus nunasha atak enentáimtikramprattarme. ¹⁶ Tura aneartarum. Naki pujutsuk jeajnia nujaj métek umirkatin pimpitsuk takastiniatji. ¹⁷ Yatsuru, wisha tura chikichcha wijjaj métek péñker túrajnia nu wáinkiumar atumsha núnisrumek túratarum. ¹⁸ Tura yajauch shuarsha írunui. Wi nuiksha ti ujakmajrume tura ataksha úutkun ujaajrume, nu shuar Kristu krúsnum jakamun mujjiainiawai. ¹⁹ Tuma ásar emesratniunam akupnakartatui. Ni ayashí wakeramun, ni yusrja áintsan, tuke umirainiawai. Natsanmainian túruinayat wararainiawai. Tura ju nun̄kanmayanak enentáimtuiniawai. ²⁰ Antsu iikia nayaimpinmaya shuar asar ii Uuntrj Jesukrístu in uwemtikrampra asamtai nayaimpinmaya tati tusan náakaji. ²¹ Nii taa, ii yajauch ayashin yapajai ni ayashíjjaj métek ti shiir awajsattawai. Ashí uunt akupin ajas nu kakarmajaj túrutmattaji.

4

Kristujaj tsanínkia wekáa asarum warastarum

¹ Nu asamtai, aneamu yatsuru, ii Uuntrj Kristujaj tsanínkiu asarum kakaram ajastarum. Maa, ti aneakun atumin enentáimtakun ti waraajai tura ístajrum tusan wakerajrume. Tawasap achikiar shiir enentáimsatniua núnisnak shiir enentáimtajrume.

² Ewautiancha tura Séntikincha, ii Uuntrj Kristu shuarj ásar, mai metek enentáimsarat tusan seajai. ³ Amincha, winia ajrú, nu nuwá yáinkta tusan seajme. Niisha wi iwiaaku chichaman étsereakui wijjaj métek takasarmai. Tura Krimintisha tura chikichcha wijjaj métek takasarmai. Nuna náarjn iwaaku átinnium Yus áatrait.

⁴ Nu asamtai Uunt Jesusjaj tsanínkia pujá asarum warastarum. Ataksha “warastarum” tájarne. ⁵ Uunt Jesus tátin ishichik ajasai. Tuma asamtai tsánka enentái takakrum nu paant nekanati.

⁶ Itiurchat enentáimsatin atumjaj penké atsutí. Antsu tuke Yus áujkum ashí itiurchatrum ujakta. Atsumamuram Yus seata. Túram Yus yumínsata. ⁷ Nuiñkia atumí enentái an̄kant átinian, áentstikia penké nekaachminia nuna, Yus amastatui. Yus atumin an̄kant awajtamsa asa atumí enentáin tura atumí enentáimsamuríncha yajauch wayawáin tusa shiir waitmaktatrumé Jesukristujaj tsanínkiu asakrumin.

Ashí péñker ana nu enentáimsatarum

⁸ Yamaisha yatsuru, júchiniak títiatjai. Yus-shuarti enentáimsatniun chichastatjai yamaikia. Ashí nekas ana nu enentáimsatarum. Tura ashí anturkamnia ana nusha, naka chicham ana nusha enentáimsatarum. Tura yajauch chichamsha enentáimsairap. Tura antsu ashí shiir ana nusha, chíkich shuarnasha péñker enentáimtusminia nusha, kame ashí péñker ana nu enentáimsatarum. Nuyásha chíkich shiir anturkamnia ana nusha enentáimsatarum.

⁹ Wi ununiarmajrumna nu umiktarum. Tura wi túramur ísurména nu tura antukurmena nusha umiktarum. Túrakrumniñkia Yuska an̄kant átinian amastaj tusa pujurtamsattarme.

Jiripiusnumia Yus-shuar Páprun kúitjan akuptukarmiania nu

¹⁰ Ii Uuntri Kristu anea asarum winiasha ataksha enentáimturú asakrumin ti waraa-jai. Kame kajinmatrukmiarme tátsujai antsu kuítrum atsakui yáintkiatin tujinkiamarme. ¹¹ Tura kuítian atsumakun tátsujai. Antsu wi takakjana nujaiñ warastinian unuimiáruitjai. ¹² Kuítrinchatí pujustinia nuna nékajai tura ti nukap takustinia nunasha nékajai. Tsukamknasha jéemarnasha, itiarar takustinniasha tura penké takutsuk pujustinniasha unuimiáruitjai. ¹³ Kristu ni kakarmarñ surakui ashí túramnaitjai. ¹⁴ Tuma aijn atumsha wi atsumamu akupturkarum ti péñker túramarme.

¹⁵ Jiripiusnumiá shuartiram, ju ti penker nékarme. Masetunia nunkanam Yus-Chichaman etserumtai aya atumek kuit akupturkamiarme. Wi etserkamujai atumí wakanñ yáinma asamtai yumñsarum akupturkamiarme. ¹⁶ Atumek wi Tisarúnika nunkanam atsumakun pujaisha kuit akupturkamiarme. ¹⁷ Aya kuit akupturkakrumin tu enentáimtsujai. Antsu nu kuit Yusai kawentramkaku tusan wakerajrume. ¹⁸ Epaprutítijai akupturkamarum nujai sha atsumamaj nuna nankaamas tiaruncha wáinkiajai. Akupturkamarum nusha ti kuñkuin Yus susamua áinis ti shiir auyi. ¹⁹ Winia Yúsrusha ti péñkeran núkap takakui. Atumsha Jesukristunu ajasu asarum Yus seamniaitrume. Tura Yuska ti takakna nujai ashí atsumarmena nuna suramsattarme. ²⁰ Ii Apari Yus tuke shiir atí. Nuke atí.

Amikmaamu

²¹ Winia náaruisha tura Jesukristu náarñcha ashí Yus-shuar ainia nu chícham ujatruk-tarum. Niisha shiir pujusarti. Wi írutramusha núnisañ shiir pujusarti tusa akupturmainiawai. ²² Tura ashí akupin Sésarai pujuinia nuyá Yusna ajasaruka tura chíkich Yus-shuarsha shiir pujusarti tusa chíchaman akupturmainiawai.

²³ Ii Uuntri Jesukristu atumniasha ti shiir yainmakarti. Nuke atí.

Papru KURUSENMAYA SHUARAN papi akuptukma

Kurusenmayq Yus-shuaran Papru áatramiania nu

¹ Wi Pápruitjai. Yus wakerutak Jesukristunun etserkat tusa akatra akupkamuitjai. Wisha ii yachi Timiutéujai ² ju papi áarar nuĵ Kuruse péprunam Kristu péñker umirkarum Yusna ajasuitrumna nu akuptajai. Yus ii Aparĵ atumin wáitnentaimturma asa yainmakarti imiatk-inchanum tuke shiir pujustinian.

Papru Yus-shuaran Yúsan áujtushmanis nu

³ Iisha atumin Yus áujtakur ii Uuntrĵ Jesukristu Aparĵ Yus ashí tsawant yúminĵkiai. ⁴ Atumsha Jesukristu ti shiir enentáimtamusha tura ashí Yus-shuar aneamusha antukĵi. ⁵ Uwempratin chicham nekasa nu antukrum atumsha nayaimpiniam atumnian Yus ti shiir ikiusnam wáinkiatiai tusarum nákarne. ⁶ Nu chicham ashí nunĵkanam pampaakui shuara enentáin nerea áinis nusháa ajarar yamaikia péñker túrin áiniawai. Núnisan atumĵincha túrunaiti. Yus ti nekas anenĵkartiniaiti tu etserkamu ántakrumin nu chicham atumĵi enentáincha nerekmiayi. ⁷ Nu chichaman Épapas ujatmakmarne. Niisha iĵĵai métek takasu asamtai ti aneamuiti. Atumniasha Kristu takatrĵn ti shiir takartamsaiti. ⁸ Niisha átum Yus-shuar asarum mai anenai ajamun ujatmakmaji.

⁹ Iisha nu antukar Yus ashí tsawant áujtajrume. Yus ni wakeramun ti paant nekaprut-mawarat tusar seaji. Ashí Yúsnan ni enentáimtaiĵĵai ashí Níniun paant nekaatniun Yus ĵintinramat tusar seaji. ¹⁰ Atumsha Kristunu ainia núnisrum péñker túrutak tusar seaji. Tura ashí ni wakerana nu umiakrum ashí péñker ana nu, nerektinia áintsarmek, túratarme. Núnis túrarum Yus unuimiatiĵi wéakrum Nín ti péñker nekaak tusar seaji. ¹¹ Yus ti kakaram asa ikiantamprat tusar seaji. Nujai ashí itiurchat ákuisha páchitsuk ti shiir warasrum katsuntratarme. ¹² Yus ni shuarĵn tsáapninia nuĵ ashí péñkeran susattawai. Tura incha nuĵ pachinkiatniun tsanĵkatramka asakrin Yus Apa yuminsamniaitrumne. ¹³ Yus iwianĵchin nupetak iwianĵchu akupeana nú kiritniunmaya uwentikramar ni aneamu Uchirĵ akupeana nuĵ wearmakmaji. ¹⁴ Ni Uchirĵ krúsnum jaka ii tunaarĵn nijjar tsanĵkurtamar uwentikram-pramaji.

Kristu jakamujai Yusĵai nawamnaikiar shiir pujustin

¹⁵ Yus wáinkiachminiaitai ni Uchirĵ akiiniamai tura ayashimkiamiayi. Túmaitiat ashí najanamua nuna yaunchu puĵú asa ashí akupniuiti. ¹⁶ Niĵĵai Yus ashí nayaimpiniam írrunna nunasha nunĵká írrunna nunasha, ashí wáiniaĵ nunasha núnisan wáintsuj nunasha mashi najanamiai. Nu arantcha ashí akupin ju nunĵkanam írrunna nusha, nayaimpiniam írrunna nusha, iwianĵchnium írrunna nusha, ashí Niĵĵai najanamua ániak Nín umirkarti tusa najanamu áiniawai. ¹⁷ Ashí najanamua nuna yaunchu, Kristuka tuke puĵuwiti. Ashí najanamua írrunna nuna emestsuk wáinniuiti. ¹⁸ Ashí Yus-shuar métekrak chikichik ayashtinia áinis enentáimkiumka nuna muuke Kristuuti. Tura nu ayashĵn ni iwiaakmarĵĵai iwiaaku átinian súsaiti. Niisha ashí jakamunmaya nantakniujai imia nanĵkaamantuiĵi. Nujainĵkia ashí enentáimpramnia írrunna nunasha akupniuiti. ¹⁹ Yus ashí takamtsuk Kristuĵ shiir puĵumiayi. ²⁰ Núnisan Yus Kristu krúsnum jakamujai ashí nayaimpinmasha tura ju nunĵkanmasha írrunna nuna Niĵĵai nawamnaikiar shiir puĵusarat tusa wakerukmiayi.

²¹⁻²² Atumsha nuik tunáa túrin asarum atumĵi enentáin Yus nemasrĵ ámarne. Tuma asarum yajá wekaimiarne. Antsu Kristu, aentsu ayashĵn ayashimiak, krúsnum wáitias jakamujai ii tunaarĵ asakármatai yamaikia Yusĵai nawamnaikiar shiir puĵaji. Nujai Kristu in péñker ajasuncha tunaan máatrachmancha tura sumamachuncha Yúsai ejetamatĵi. ²³ Tuma asamtai Jesukristu shiir enentáimtusrum kakaram ajasrum katsuartiniatrumne. Tura uwempratin chicham antukuitrum nuyá kanakhatniuitrumne. Ju uwempratin chichaman ashí nunĵkanam etsernakuiti. Wisha, Papru asan, etserkatniun yaimjai.

Papru ashí Yus-shuaran yáinĵkratniuiti

²⁴ Atumin wáitiaknasha ti shiir waraajai. Kristu ni shuarĵn nekas péñker awajsat tusa wáitiana nuĵ pachinkia asan waraajai. Ashí Yus-shuar Kristu ayashĵn áintsan áiniakui Yus-shuaran yáintajtsan ayashrujai wáitiakun shiir enentáimjai. ²⁵ Atumin yáinĵkiai tusa Yus akattur Yus-Chichaman takamtsuk ujakai tusa akuptukmai. Nuna takaakun ashí Yus-shuara yáinĵtrintjai. ²⁶ Yámankamtaiknumĵa nekaachman Yus yamaikia ni shuarĵn paant awajsaiti. Nu chichamnasha ujakarai tusa winia akatar akuptukuiti. ²⁷ Nu chichamsha ĵúiti: Kristu atumĵi enentáin puĵak Niĵĵai métek ti shiiram awajtamsettawai. Nu imia

shiiir chichamnum Israer-shuarchasha pachiiniainian Yus ashí ni shuarj nekawaarat tusa wakerimiayi.

²⁸ Iisha Kristu étseraeji. Túrar ashí enentáimtikrar péñker nekaawarat tusar jintintiainiaji. Nujaj Krístujaj tsaniñkiar ashí péñker tsakararatatui. ²⁹ Tuma asamtai Kristu ni kakarmarín tí surakui nekas kakaram takaajai.

2

¹ Nekaatarum, yatsuru. Yus-shuaran yáintaj tusan ti takaajai. Tura atumíncha, Rautiséanmayá shuarnasha, tura ashí winia waitcha ainia nunasha yáintaj tusan ti takaitjai. ² Ashí shiiir enentáimtikratniun ti takaajai. Núnisan aneniarum chikichik enentáijjai métékrak wekasatarum tusan wakerajrume. Nu arantcha, ashí Yusna ti péñker nekaarum tuke katsuaruk tusan takaajai. Nujaj Kristu ti péñker nekaattarme. Tura yaunchu nekaachman Yus yamá paant awajsaiti. Nuka Krístuiti. Tura Nii nekaatin nekas shíiraiti. ³ Tura kakaram ajasam Kristu péñker nekaam ashí shiiir enentáimprammia nusha tura ashí Yusna nekaammia nusha nekaattarme. ⁴ Atumin chíkich shuar niisháa chichamjai shiiir chichartamas anañkramawarain tusan nuna tájarme. ⁵ Wi nuj atumjai pujachkuncha nuj pujajna áintsanek enentáimtajrume. Tuma asan átum méték enentáimprarum tura kakaram ajasrum Kristu nekas enentáimturumena nuna ísnaka shiiir enentáimjai. ⁶⁻⁷ Nu asamtai átum ii Uuntri Jesukristu nekas enentáimtusrum Yus-shuar ajasmarmena núnisrum yamaisha Nii nekas enentáimtusrum Niijjai tsaniñkrum ashí túratarum. Nu túrakrum Nii enentáimtakrum tuke tsakaki wétatrume. Tura te tariara wajasrum Yusjai kanakchattarme. Yus-Chicham núnisan etsernakmatai nekamarme. Tuma asarum Yus tuke yumiñsarum, núnisan péñker wekasatarum.

Krístujaj yamaram iwiaakma takakji

⁸ Aneartarum atumsha. Shuar aentsti enentáimmiyajain ashí ju nuñkanmayan enentáimprar tura Krístun enentáimtusuk niisháa chichaman áujtamainiak nekaschajaj anañkramataj tusa wakerutmainiawai.

⁹ Krístunam Yus ashí takamtsuk pujuwiti. ¹⁰ Túmakui atumsha Krístujaj tsaniñkiu asarum ni iwiaakmarj takamtsuk takakuitrume. Krístusha ashí akupniun akupniuiti. Áentsnumsha iwianchniumsha tura nayaimpinmasha ashí akupin írrunna nuna akupniuiti. ¹¹ Nu arant átum ayashnium tsupirnatesha Kristu shuarj ajasakrumin ashí ayash wakeramun, tsupirkatniua áintsan, Kristu ajapamiayi. ¹² Tura atumsha Yus ni kakarmarjijaj Kristu jakan iniantkimia nu enentáimtusrum imianmiarme. Túrarum Krístujaj méték iwiarnasmarne. Tura núnisrumek Krístujaj méték nantakmiarme. ¹³ Nuikkia átumsha tsupirnatsuk atumí tunaarj tuke akui atumí wakanñin jákayarme. Tura yamaikia Jesukrístujaj tsaniñkiu asakrumin Yuska atumí tunaarj tsanñkur yamaram iwiaakman suramsaitrume. ¹⁴ Tura ashí ii tumashrñin sumamtikramatin amia nuna japiruiti. Kristu krúsnum jakamtai ashí akupkamujaj sumamtikramamun tsanñkurtampramijai. ¹⁵ Núnisan Kristu krúsnum jaka, iwianchnium ashí akupin ainia nuna nupetak ashí íimiainainj iniatсарmiayi.

Nayaimpiniam írrunna nu enentáimtustarum

¹⁶ Akupkamunmayá Yus ankant awajtamsamtai chíkich shuar ame túramujaj yajauch enentáimturmarain. Yúamna nujaj, úamna nujaj, uwitíncha, nantutíncha, tura sawantíncha namperman nujaj chíkich shuar yajauch áujmatramkuisha ¿warí urukatñ? ¹⁷ Nu nampernum Israer-shuar Kristu túrattana nuna nakumainiak túrin ármiai. Tura Kristu taa imia Niñki pujá asamtai nakumkamuka ántrai. ¹⁸ Tura shuar “Péjchach ajasam Yus ájtsuk aya Yusa suntari shiiir awajsatniuiti” túramkuñkia anturkairap. Nu shuar mesekranam wáinkiamun áujmatenak ántar nañkaamantu enentáimtumainiawai. Aya aentsti enentáimian chichainiawai. ¹⁹ Tuma ásar Krístujaj tsaniñkiar wekainiatsui. Kristu ashí akupin asa ni shuarñ Yúsnan jintintia shiiir tsakarata tusa péñker wáiniui. Nu arantcha ashí ápateak Yus wakerana áintsan chíkichik awajeawai.

²⁰ Atumsha Krístujaj jaka asarum aya aentsti enentáimtai ikiukniuitrume. Nuikia ¿urukamtai ju nuñkanmayá ana nu tuke páchiarum? Nii tuinia nu umirkashtiniaiti. ²¹ “Ju antichatniuiti, tuiniawai. Ju yúashiniaiti. Tura ju achikchatniuiti” tuiniawai. ²² Nusha ¿warí, takasam amuukashtatuak? Kame áyatik aents akupkamu áiniawai. ²³ Shuar nu akupkamu umiiniak Yúsnan ti nékaitjai tura Yus shiiir enentáimturui tu enentáimtumainiawai. Nu arantcha péjchach ajasan winia ayashrun ti asutiájai tu enentáimtumainiawai. Túrasha ayash wakeramunka nupeteatsui.

3

¹ Nuikia Krístujaj nantakin asarum nayaimpinmayá írrunna nu wakeruktarum. Nuñ Krístu pujawai Yusa untsuurñin. ² Ju nuñkanam ana nu enentáimtsuk aya nayaimpinmayá ana

nu enentáimtustarum. ³ Atumsha Krístujaj tsaninkrum jakamarme. Tuma asarum Krístujaj tsaninkrum Yusjaj iwiaaku pujarme. ⁴ Krístukete ii iwiaakmari. Nii nayaimpinmaya wantinkuiusha atumsha Niijjaj métek wantinkiatarme. Tura Niijjaj métek ti penker áatrume.

Yaunchu iwiaakmasha tura yamaram iwiaakmasha

⁵ Tuma asamtai ju nunkanmaya ana nu ajakratniua áintsarum iniaisatarum. Tsanir-matniusha, tunáa wakeruktincha, tura takakna nujaj nankaamas wakeruktincha ántar-yus tikishmatratniua áintsar asamtai iniaisatarum. ⁶ Shuar Yúsan umirtsuk aya nuna túrin ásarumatai Yus nin kakerak ti asutiáttawai. ⁷ Atumsha núnisrumek túrinuiyarme. ⁸ Tura yamaikia jusha iniaisatarum: kajektincha, yajauch wakeruktincha, yajauch túratniusha, katsekmaktincha, yajauch chicham chichastincha, mash iniaisatarum. ⁹ Yus-shuar ajas-rum yaunchu enentáimtaim iniaisamarume. Tura yaunchu túrutairmesha iniaisaitrume. Tuma asarum nuamtak tsanumprunairairap tura wáitruawairap. ¹⁰ Yaunchu enentai, pushi mamuru áiktinia áintsarum, iniaisaitrume. Núnisrum yamaram enentái, shiir pushi entsartinia áintsarmek, wekasaitrume. Tura Yus nu yamaram enentáin najana asa ashí tsawant pujurtawai nuna nankaamas Niijjaj métek shiir ati tusa. Túramtai Yus ti penker nekaki wéaji. ¹¹ Krístuka ashí írumba nujaj nankaamas ashiyaiti. Niiniun pujuruí. Tuma asamtai ashí ni shuarj enentáin pujá asamtai nusháa enentáimtunairchatin áiniawai. Kriaku-shuarsha tura Israer-shuarsha, tsupirnakusha tura tsupirnakchasha, apachcha tura yajaya shuarsha, takarin ainia nusha tura ankant ainia nusha, Kristu ashí ni enentáin pujakuí nusháa enentáimtunairchatniuiti.

¹² Yus atumin anenmak Niiniu arti tusa achirmakmarme. Túrutma asamtai jujjaj shiir iwiampranpran nua áintsarum tuke túrin atarum: waitnenkartin, shiir awajkartin, péechach átin, émtin áchatin, tura katsuntin átin. ¹³ Kristu atumí tunaarjin tsankuramia núnisrumek nuamtak tsankúrnáiratarum. Chíkich yajauch awajtamkuisha shiir katsuntram yapajni-aituk tsankúrnáiratarum. ¹⁴ Tura ashí nankaamas anenaitiarum. Túrakrumka chikichik ajasrum mash penker túrattarme. ¹⁵ Kame chikichik ayashtinia áintsarum ajastarum tusa Yus ni shuarj ajasat tusa achirmakmarme. Tuma asamtai Yusa shiirj atumí enentáin pujurtamsati. Nujaj Yus yuminsatarum.

¹⁶ Kristu shiir chichame atumí enentáin piakti. Nekas naka enentáimprarum jintinniaiyarum mai ikiakána ajatarum. Yus kanta kantamárum tuke enentáijijaj Yus yuminsarum shiir awajstarum. ¹⁷ Tura takaakmesha, chichaakmesha, kame ashí túramna nuka Jesukrístu shiir awajstataj tusam ni kakarmarjijain túrata. Túrakum Krístujaj Yus Apa yuminsata.

Yus-shuar túratniua nu

¹⁸ Nuwatiram, atumí aishrj umirkatarum Uunt Yus nuna wakerakui. ¹⁹ Áishmantiram, atumí nuwé anearum. Atumí nuwejjaj kajernaikiarap. ²⁰ Uchitiram, ame apa nukusha tuke umirkatarum. Nu túrakrum Yus shiir enentáimtiksatarme. ²¹ Uchirtintiram, atumí uchirj ti kakantrairap. Ti kakanteamka uchisha ti kuntuts pujus penker wekasatniun nakitchanpiash. Nu túrunawain tusarum ánrarum atumí uchirj kakantrairap. ²² Takarniutiram, atumí uuntrj shiir umirkatarum. Ju nunkanmaya uuntrj ain aya nii iimkiui shiir enentáimturati tusarum takaschatniuitrume. Antsu Yus enentáimtakrum tuke penker takastiniaitrume. ²³ Ashí túramna nu asump enentáijijaj takakmasta. Aya aentsuk yáigtinia áintsachu antsu nayaimpinmaya Úuntrum yayá áitkiasrum takastarum. ²⁴ Ame Úuntrum Kristu asa nayaimpiniam ashí shiir takustinian tsankatramkattawai. ²⁵ Antsu tunáa túrin ni yajauch túramujaj métek akinkiáttawai. Yus ashí áentsun métek iyawai.

4

¹ Úunttirmesha, atumí Uuntrj atumin wáiniuk nayaimpiniam pujatsuk. Tuma asamtai atumí yáinma jiatsuk penker inartiniaitrume.

² Yus áujkuram Nii yuminsarum asummiarum iniaitsuk áujstarum. ³ Incha Yus áujtustarum. Kristu-chicham yaunchu nekaachman yamáí éterkun sepunam pujajaj. Tuma asamtai nuna shiir ankant etserkat tusarum áujtustarum. ⁴ Tura wi paant etserkatniuitiaj núnisan etserkat tusarum áujtustarum.

⁵ Yus-shuarchajaj shiir túratarum Yus-Chichaman yajauch enentáimturain. Kakaram ajasrum tsawant ánrarum iniañkasairap. ⁶ Ti shiir chichamtin átiniaitrume tura an-turújamin átiniaitrume. Núnisrum chíkich chíkich Yus-chicham paant ujaktin nekaattarme.

Amikmaamu

⁷ Ii aneamu yachj Tikikiu ashí wínian ujatmaktatrume. Niisha wijjaj métek Yúsnan pimpitsuk ti penker takasuíti. ⁸ Nu asamtai ii juí pujajnia nuna ujatmak ikiantamprarat

tusan akuptajrume. ⁹ Núnisaṅ ii aneamu yachi Unisemu niijjaj winiawai. Niisha atum weeaiti, tura Yusjaj shiir wekaawai. Nu shuar ashí juí túrunamun ujatmaktatrume.

¹⁰ Aristarku wi sepunam tsaniṅkia pujamur amikmaatmarme. Núnisaṅ Markus, Pirnapí kaná yachja nu, amikmaatmawai. Niisha nuḡ jeamtaí antukmarum núnisrum péṅker wáinkiatarum. ¹¹ Justu Jesus náartin amikmaatmarme. Júchik ániawai Rúmanmaya Israer-shuar winia Yúsnaṅ etserkatín atutkaru ainia nu. Túmainiak ti shiir ayamtikruiniawai.

¹² Épaprassha, atum weeá, Krístunun etserín asa atumin amikmaatmarme. Niisha ashí tsawant Yúsan áujeak Yusjaj kakaṅarum tuke shiir Yus wakera nu túrak tusa seatramprume.

¹³ Wisha Épapras atumin ti enentáimturman nékajai. Núnisaṅ Rautiséanmaya shuarnasha tura Iarapurisnumiḡ shuarnasha ti páchiniawai. ¹⁴ Rukas, aneamu tsuákratin, núnisaṅ Témassha amikmaatmarme.

¹⁵ Tura Rautiséanam pujuinia nú Yus-shuarsha amikmaatruatarum. Núnisaṅ Nímpiassha tura ni jeḡ irunainia nú Yus-shuarsha amikmaatruatarum. ¹⁶ Átum ju papí áujсарum umikrum Rautiséanmasha nuyá Yus-shuar áujсарti tusarum akupkatarum. Tura atumsha núnisaṅ Rautiséanmaya papí támatái atumsha áujсарarum. ¹⁷ Tura ju Arkipiu titiarum: “Íi Uuntrj Jesus ni takatrjṅ suramsa nu péṅker umikta” tawai, titiarum.

¹⁸ Wí, Papru, winia uwejrújaj júchiniak áatkun amikmaajrume. Sepunam pujajna ju enentáimturatarum. Yus shiir yainmakarti.

Nuke atí.

Papru

TISARÚNIKIANMAYA SHUARAN

Emka papín aar akuptukma

Papru ni tsaniakmarijjaj Yus-shuaran áatramiania nu

¹ Wikia Pápruitjaj. Wisha Serpanujaj tura Timiutéujaj Tisarúnikianmaya Yus-shuar aja-suitrumna nuna áatjarme. Atumsha Yus-shuar asarum Apa Yúsnaitrume, tura Uunt Jesukristunuitrume. Ii Aparj Yus, tura ii Uuntrj Jesukristu waitnentrana ásarmatai, ti shiir imiatkinchanum pujustarum, tu wakerajrume.

Tisarúnikianmaya shuar Yus nekas enentáimtusar umirkatniun jintintiarmiania nu

² Iisha Yus áujkurkia atumniasha tuke enentáimtusar Yus shiir yuminsaji. ³ Atumsha Yus nekas enentáimtakrum umirkarumna nu nékaji. Núnisrumek, Yus aneakrum takaarme. Tura Jesukristu tatí tusarum tuke tsawant nákarne. Nu neka asar, ii Aparj Yus áujkur, nusha ashí enentáimsar áujtajrume. ⁴ Yatsurú, Yus anenmarme. Anenma asa Winia arti tusa achirmakurmena nusha nékaji. ⁵ Enentáimpratarum. Iisha Yúsaj Uwempratin Chicham atumin ujakmajnia nusha aya chíchamjaj tichamji. Antsu nú arant, nu chicham nekasaiti tusar Yusa Wakanj kakarmarjijaj tímiaji. Tura átum péñker matsamsarat tusar atumjaj pujusar shiir iruntrar wekasarmiaji. Nusha paant nékarne.

⁶ Atumsha yamaikia íksarmek ii túramiaj nu, tura ii Uuntrj Jesukristu túramia nu túrarme. Itiurchat ajñ Yus-Chicham umikiurme. Tura wáitiatrumek Yusa Wakanj shiir enentáimtikramkui warasum pujarme. ⁷ Nu túrakrum ashí Masetúnia tura Akaya nunñanmaya Yus-shuarsha shiir wekasatin jintintiarme. ⁸ Tuma asarum Uunt Yusa chíchame ti ípiamparurme. Tuma asamtai Masetúnia tura Akaya nunñanmaya shuar nuna nékainiawai. Tura nú nanñkaamas Yus nekas umirkarumna nuna ashí aents nékainiawai. Nuna nékainia ásar ii étserran atsumainiatsui. ⁹ Antsu átum in péñker itiaamun nii íksan ujatmainiaji. Tura nuyasha ántar-yus enentáimtustin iniaisarum nekas iwiaaku Yus nekas enentáimtusarum umirkarumna nunasha ujatmainiaji. ¹⁰ Tura nuyasha Yusa Uchirj Jesus jakamunmayan Yus iniantkimia nu, nayaimpinimaya tatí tusarum átum nákamuncha ujatmainiaji. Iis, Jesus Nínkiti Yusa kajetáirj tsawantrj jeattana nuyá uwemtikrampatin.

2

Yus-chichaman paant ujakarmiania nu

¹ Atumsha nékarne, yatsurú, iisha ántar atumjaj jeachmaji. ² Antsu itiurchat wáinkiaitatar arantutsuk shiir Uwempratin Chichaman ujakmajrume. Iis, nuik Jiripius péprunam incha katsekramkarmiaji. Tura nú arant, ti itiurchat wáinkiamiajai. Túmaitiatan Yus yáintkiui Yusa chichamen ujakmajrume. Nuka atumsha ti penker nékarne. ³ Warí, iisha Yus-Chicham atumin ujakmaj nu nekasauyi. Tura yajauch enentáimsan, anankatjarum tusan tichamjarme. ⁴ Antsu Yus in péñker enentaimturmas Uwempratin Chicham et-serkatarum tusa akatrampramiaji. Tuma asamtai núnisrik étsereaji. Túrasha aya aents waramtiksatai tusar étsertsuji. Antsu Nínki Yúsak ii enentáin nekartamin asamtai, shiir enentáimtiksatatsar túraji. ⁵ Átumka nékarne, penkeshá shírmach chichasan anankachjarme. Nuyasha, kuit achiktai tusar ántar chichaschamji. Núnaka Yus nékawai. ⁶ Iisha Kristu akatramurintji. Tuma asar ni kakarmarjijaj akupkatin takakuji. Páchitsuk túramniauji. Túrasha waantu ajastaj tichamji. Nuyá atumsha tura chikichcha in waantu awajtamsataj tákuisha iikia nakitmiaji. ⁷ Antsu uchi kuírchin ni nukurj péñker iis tsakatmana áintsarik iikia atumniaka shiir ísmajrume. ⁸ Iisha ti shiir aneajrume. Tuma asar Yus-Chicham ujaktai tusar ti wakerukmaji. Tura aya ujakar iniaisatin wakerukchamji. Antsu ii jákatniuitkiursha iniaisachgaji, atumín ti anea asar. ⁹ Yatsurú, ii atumaj nu sumarmaktai tusar kakaram takakmasmaj nu çkajinmatkinrumek? Atsá. Nékarne. Iis, Yus-Chicham étserkur, tsawajsha káshisha takasmiaji. Nusha, akirkata, tíj tusar takakmasmiaji.

¹⁰ Yatsurú, atumjaj pujumiaj nu iisha Yus wakerana nu túrimiaji, tura yajauch túrutsuk shiir wekasamiaji. Nujaj incha chikichkisha yajauch chichartamkatniusha atumiaji. Nuka atumsha nékarne tura nú arant Yus nékawai. ¹¹ Tura atumniasha ankant ankant Yúsnunm íkiakármajrumna nu nékarne. Tura uchin ni aparj átsapkeana nútiksarik shiir enentáimtikramajrumna nusha nékarne. ¹² Tura Yúsaj shiir wekasatarum tímiajrume. Yus nanñkaamas uunt asa ashí akupeawai. Tura Yus-shuaraitrumna nuna, Winin pachinñkarat tusa, Yus untsurmarme. Yus untsurma asamtai Níniuitrume. Niiniu asarum Yusa uchirja núnisrumek wekasatniuitrume.

¹³Yus-Chicham ii éterma antukrum, aya áentsnumiñchaiti túmiarme. Yúsnumiñiti túmiarme. Nu tiniu asarum umirkamarme. Kame nekas tárume. Ii éterjiniá nu nekas Yusa chichamente. Átum nu chicham umirka asakrumin, atumí enentáin kakaram ajastinian amaawai, Yus-Chicham asa. Átum Yus-Chicham umirkaru asakrumin iisha tuke tsawant Yus yúmiñkijai. ¹⁴Yatsurú, ju nekaatarum. Aya atumek wáitiatrume. Ashí Jutía nunkanam Israer-shuar, ni shuarinñketiat, Yus-shuaran wáitkiascharmakia. Iis, Yus-shuaran Kristu Jesusan umirkaru ásarматаi wáitkiasarmiayi. Yamaikia atumniasha atumí shuarin wáitkiarmainiawai. Nujaj Jutía nunkanmaya Yus-shuarajai métekrak ajasurme. ¹⁵Niisha Israer-shuaraitiatan Yus-Chichaman eterin armia nuna nuamtaketiat máawarmiayi. Tura nú weeák Uunt Jesusnasha máawarmiayi. Tura incha aa jijií akuptamkarmiaji. Maaj, niisha Yúsan shiir enentáimtikiainiatsui. Tura núnisan ashí áentsnu kajerainiawai. ¹⁶Warí, Israer-shuarcha Uwempratin Chicham ujaktaj tákurnisha niisha suritramainiaji. Nuna túruiniak yaunchu tunaan túriarmia nújainkia nankaamas yamaikia túrawarai. Pai, túrasha yamaikia Yusa kajetairijí imiá tsumají ana nuj pujusarai.

Papru ataksha Tisarúnikianam irautajtsa wakerimiania nu

¹⁷Iisha, yatsuru, ishichik tsawant atumíyá kanakir jeachat pujayatrik, atumjajisha wáinniayachiatrik tuke ii enentáinkia enentáimtimjarme. Tuma asar ataksha atumin iistai tusar ti wakerimji. ¹⁸Nekas winitiatisar wakerimji. Imiá wíikisha winitniun ti nukap enentáimsamjai. Tura iwianchi uuntrj Satanás tuke nuna suritrammijai. ¹⁹⁻²⁰Atumsha shiir wekasa asakrumin iisha ti shiir enentáimsar waraaji. Nu tuma asar Uunt Jesukristu tátintrj shiir enentáimsar nákJai. Nii támatai imiá warastatji. Atumin Yus-shuar awajsa asar, Nii támatai atumsha iijjají Jesus shiir inkiuntatji. Tuma asamtai nu enentáimsar tawasap achiktinia áintsar waraaji.

3

¹⁻²Iisha ataksha atumin iistaisar ti wakerimji. Tura tujintiakur iikia Atenas péprunam juákur ii yachi Timiutéu atumin íirmainiarat tusar akupkatai, timiaji. Iisha Kristují Uwempratin Chicham etermijají nuj, Timiutéuka iijjají métek takasui. Tuma asa niisha Yusa takatrjñ takáa asa atumniasha Yusaj kakartarum turamarti tusar akupkamji. ³Tura nú arant, itiuurchatan wáiniuk iniaisarajñ tusa ikiakátmararti tusar Timiutéu akupkamji. Yatsurú, átumka nékarme, ashí Yus-shuaraitjinia nuka páchitsuk wáitsatniuitji. Iis, tuma asamtai atumsha ti nekas itiuurchatnum pujarme, Yus-Chicham umirka asarum. ⁴Iimiatarum, atumjají nuik tuke pujumjinia nuj “iisha wáitsartatji” tíchamkajrum. Iis, túrunachaik. Nuka nékarme. ⁵Tura átnin iwianch tunaanum ajunmarchariash tusan, wisha kúntuts enentáimsamijai. Tura átnin takaschajish tu enentáimsamijai. Tuma asamtai nekaataj tusan ti wakerakun, wisha ti nukap tsawant nákaschamijai. Antsu wárik Timiutéun akupkamijai. Yúsají péñkerash wekainia tusan, “nu inintrusam ikiuuta” timiajai.

⁶Tura yamaikia Timiutéu Tisarúnikianmaya waketki tayi. Niisha taa, átum Yus aneakrum shiir enentáimtamuncha ujatmaji. Tura átum in anenma asarum tuke enentáimsar pujamuncha tura ii atumin iistaisar wakerajnia núnisrumek atumsha incha firmaitai tusarum wakeramuncha Timiutéu ujatmaji. ⁷Tuma asamtai, yatsuru, ashí itiuurchat tura wáitsatin wáiniatrik átum Yus shiir enentáimta asakrumin iisha shiir enentáimji. ⁸Atumsha Yúsají tariara weká asakrumin, shuar jaa péñker ajas enentáí chinkiana áintsarik enentáimji. ⁹Yus péñker umirka asakrumin, iisha shiir waraaji. Warasu asar ii Yusrj ti yúmiñkijai. ¹⁰Incha Yus akuptamkurniñkia atumíin túmiajaik jeartiai tusar wakeraji. Túrar Yusna nekaatin mash nékatsrum nu jintintiatai tusar tuke ti seaji.

¹¹Atumíin weri íistinian ii Aparj Yussa tura ii Uuntrj Jesukristusha in yáinmaktai tusar wakeraji. ¹²Atumin ii aneajnia núnisan Yus atumniasha mai anenai ajatniun tura chikichcha aneastinian enentáimtikramprartí. Tura nú nukap anenkrattain Yus amasartí tusar wakeraji. ¹³Yus ikiakátmakui átum tunáa túrutsuk Yus umirkarum wekasatarum tusar ii Aparj Yus seaji. Ii Uuntrj Jesus Níiniurijjají winiak péñker wekaarmin tati tusar taji.

4

Péñker túratniun Yus wakerana nu

¹Iikia Uunt Jesus akupkamuitji. Tuma asar nu kakarmajají atumniasha ju túratarum tusan akupeajrume. Atumsha iwiaaku pujarmena nuj Yus shiir waramtiksatarum tura tuke péñker túrukum wetarum tura seajrume. Iisha nuik atumin unuiniarmajrumna nútiksarmek túratarum. ²Uunt Jesusa akupeamurjijají tura nu kakarmajají atumniasha nuik unuiniarmajrumna nu átumka nékarme. ³Atumin Yus wakerutmarmena nu júiti: “Shuar aya Winjñ sumama pujusat tusan chikichkinkesha shuar tsanirmaashti”. ⁴⁻⁵Yus-shuarcha ainia nu, Yúsan nékainiachu ásar, aya niñkí enentáimtumasar aya ni ayashj wakeramunak

umiktinian wakeruiniak nuwan enentáimtuiniawai. Atumsha núnisrumek túrawairap. Antsu atumsha atumí nuarj péŋker enentáimtusurum shiir aneasrum ayastarum. ⁶ Nú arant, amesha ame yatsum ananċkam ni nuarj yajauch awajtusaip. Nu túrakrumniċkia ii tímiajrumna nútiksarj Uunt Yus ti kakaram asutiámawartatui. ⁷ Warí, Yus incha péŋkercha yajauch túrataram turamchaitji. Antsu aya péŋkerak túrataram turamji. ⁸ Tuma asamtai shuar jŋ chicham nakitiakka áentsun nakitiatsui, antsu Yúsán nakitraití. Tura nu Yussaha ni Wakanċin amaawiti tunaan túrashtinian.

⁹ Tura yamaikia nuamtak Yus-shuar aneniastin ana nuna ti neka asakrumin áatrashtatjarme. Warí, imia Niċki Yus atumin mai anenai ajatniun jintinramawarmatai nékarme. ¹⁰ Iis nútiksarmek aneniastinrumek ashí Masetúnianam matsatainia nujai. Túrasaha, yatsuru, atumí anenċkrattairj nú nukap ajasti tusan, seajrume. ¹¹ Yamaikia tímiaj nútiksarmek, yayauchin túruinia nuj wekatsuk, chíkich shuarna pachittsuk, atumí takatrinj shiir anċkant pujusrum atumí uwejejaċ takakmá pujutarum. ¹² Átum táasaċrum tusan tájarme. Túrakrumniċkia atumniaasha chíkich shuar péŋker enentáimturmasartatui.

Kristu tátintri

¹³ Yatsuru, Yus-shuarcha ni shuarj jakamtaí “atakká wáinkiashtatjai” tusa ti kuntuts enentáimainiawai. Tuma asamtaí atumsha nútiksarmek kúntuts enentáimsaċrum tusan juna tájarme. Jákaru áinia nu urukawartinkit paant nekaatarum. ¹⁴ Jesus jákayat nantakċhamkia. Núnisaċ Yus Jesusan iniantċin Nin umírkar jákaru áiniana nunasha iniantċittiawai. Paant nékaji nusha. ¹⁵ Tuma asamtaí Yus-Chicham nekaprutamnia nuna atumniaasha jintintiajrum. Iisha tuke iwiaaku pujarin Kristu táakuisha jákaru áinia nuka ikiuakur émkishtatji. ¹⁶ Antsu Yus akupeakui, Yusa suntarj uuntri untsumkui tura Yusa kachurċin umpuarmataí Uunt Jesukrístu untsumuk Yus pujamunmayá tarattawai. Nuċkia Kristunu ajasar jákaru áiniana nu iwarsumunmayá nantakiartatui emka. ¹⁷ Tura nuyá iisha Yus-shuar tuke iwiaaku pujajnia nu Krístujai yuranċminiam ajapén inċiunaikiartatji. Nuní ashí nayaċimpiniam ii Uuntri Jesukristujai tuke iwiaaku pujusartatji. ¹⁸ Tuma asamtaí jŋ shiir chicham atumin ujakjana jujai mai ikiakánai ajatarum.

5

¹ Túrasaha, yatsuru, ni tátintri waritċin tura warí tsawantaj, nuka áatratin atsumatsrume. ² Ni tátintri júnis átin nékarme. Kiritniunam kasá shuar kasamkajat tusa tátatna nu nekaċhminiaiti. Núnisaċ nákatuk pujuiniaċ Uunt Kristu tsawantj jeattawai. ³ Ashí shuar “Pai, yamaikia ti nekas shiir péŋker pujuiniaċi” tu matsatainiaċ, aya aneachma nuċka mesertin tsawant jeattawai. Nuwá ajamtin aya aneachma jatema áintsar, nékachmanum átatui. Túmakui pisartin penċé atsutawai. ⁴ Túrasaha, yatsuru, átumka ujakmaitrume. Nu tsawant atumsha aneara pujarmin jeattawai. Atumsha aneara pujá asakrumin kasá áintsar tarutrámashatui. ⁵ Enta, átumka tsáapninium wekáa asarum Yus-shuartirmeka nékaitrume. Iikia kiritniumianċhuitji. ⁶ Nu tuma asar, chíkich uruka núnisrik, ii enentáin kanartinia núnisrik “Warí, winia itiuirtawa” tíchami. Antsu naka enentáimsar anearmi. ⁷ Iis, kashi kanarċhatniukait. Tura nampeena nu kashi nampeenawai. ⁸ Túrasaha iikia shiir tsáapninium wekainiaċ nuka naka enentáimprar tuke nampetsuk pujustiniaitji. Suntar ni nemasri ananċkruawáċin tusa anear wekasatniuiti. Tura iisha núnisrik íwianċ yajauch awajtamsaċj tusar anearmi. Yus enentáimtusar aneetniuitji. Tura núnisrik iisha, jŋ nuċkanmayá uwemprar Yúsaj tuke pujustatji, tu enentáimprar wetái. ⁹ Páantċhakait. “Jinium wéchatniuitrume” Yus incha túramji. Antsu ii Uuntri Jesukristujai uwempratniun tsanċkatramkaitji. ¹⁰ Niijjai métekrak iwiaaku ami tusa Jesukrístu in jarutramkamiaċi. Nu tuma asamtaí iisha ii ayashijjai iwiaaku pujakrishá Niijjai iwiaakji, tura ii ayashijjai jáakrishá Niijjai tuke iwiaakji. ¹¹ Tuma asamtaí tuke túrarmena núnisrumek, shiir enentáimtiknaisarum mai ikiakánai ajatarum.

Papru Yus-shuaran jintintiamiania nu

¹² Yatsurú, juna seajrume. Atumjai pujuinia nú shuar Yúsán takakmainiakui shiir enentáimtustarum. Jintinramuk chichartamainiakui umirkatarum. ¹³ Yúsán takainia ásar matai ti péŋker enentáimtusurum aneestarum. Tura yajauch awajnaitsuk ti shiir nawamnaikiarum matsamsatarum. ¹⁴ Tura júnasha seajrume, yatsuru. Takastinian nakitiana nusha chicharkatarum. Tura yaweena nusha ataksha enentáimtikrarum ikiakártarum. Kakarmachu ana nusha yáċntarum. Tura ashí shuarjai kajetsuk katsuntrarum wekasatarum.

¹⁵ Aneartarum, yatsuru. Chíkich yajauch túrutmamtaí amesha nútiksarmek yapajki-aip. Antsu nuka túrutsuk átumka mai péŋker awajnai ajatarum. Tura nú arant, ashí nuċkanmasha ashí shuarsha nútiksarmek túrataram. ¹⁶ Tuke shiir warasrum pujustarum. ¹⁷ Tuke tsawant iniaitsuk Yus áujsatarum. ¹⁸ Péŋker pujakmesha, itiuċhat pujakmesha ashí

warí wáiniam nuḡsha Yus shiir yumḡsatarum. Kristu Jesusaj Yus-shuar ajasutiram nu túratniun Yus wakerawai.

¹⁹Ji ikiajniaktinia núnisaj Yusa Wakaní enentáimin keana nuka tunaajaj téenmamtikiarum ikiajniakairap.

²⁰Yus jintinrar akupkamu asa péḡker chichaman etserainia nu nakitirairap.

²¹Ashí etserkamu ana nu nekasashit tusarum nekaatarum. Túrarum aya péḡker ana nuke achiktarum. ²²Ashí yajauch ana nuyanjka kanaktiarum.

²³Yuska, imiatkinchanum wekasatin amaana nu, atumin takamtsuk shiir awajtamsartí. Tura ii Uuntrj Jesukristu táatsaj, atumí wakaní atumí enentaj tura atumí ayashḡsha mash métek tunaajajinchu awajtamsati. ²⁴Yus atumin untsurmakmarumna nu tímianak uminiaiti. Nii tana nuna yawḡtsuk túrattawai.

Amuamunam amikmaatin

²⁵Ashí yatsurtiram winiasha Yus áujtursatarum. ²⁶Ashí Yus-shuar árum nu, amikmaaniatarum. ²⁷Winia Uuntru Jesukristu chichamejaj juna tájarne. Ju papí ashí Yus-shuar antukarti tusarum ashí iruntramunam áujtsatarum. ²⁸Ii Uuntrj Jesukristu atumin yáinmákartí. Nu atí.

Papru TISARÚNIKIANMAYA SHUARAN Ataksha papin aar akuptukma

Papru ni tsaniakmarjijai Yus-shuaran áatramania nu

¹ Wikia Pápruitjai. Wisha Serpanujai tura Timiutéujai iruntran atumin Tisarúnikianmaya Yus-shuar árumna nuna ju papin áatjarme. Atumsha ii Aparj Yusna tura Uunt Jesukristunu ajasuitrume. ² Tuma asakrumin ii Aparj Yus tura ii Uuntri Jesukristusha waitnentrama áarmatai yáinmakar pénger awajtamsarat tusan wakerajrume.

Kristu támatai tunáa shuáran Yus asutiáttawai

³ Yatsurú, átum pénger matsatu asakrumin iisha Yus tuke yúmiñkijai. Átumka Yus nekas enentáimtustin nú núkap nekaakrum wéarme. Tura nuamtak aneniastincha nú núkap nékarme. Nu tuma asamtai Yus yumiñsatnuiitji. ⁴ Átum Yus-shuar asakrumin chíkich shuar atumin yajauch awajtamainiawai. Tura itiurchat wainiu asarum ti wáitiarme. Nu tuma aju átumka katsuntearme, tuke Yus enentáimta asarum. Nu tuma asakrumin, iisha Yus-shuar matsatainía nuka warasar ujainiaji. ⁵ “Yusa akupeamurin pachiinkiamniaitrume” Yus túramprume. Nuju pachiinkiatari tau asarum ju nuñkamaj wáitiarme. Tura wáitiakrumsha nuna nankaamas iwianaruitrume nuju pachiinkiatin. Kame nujuñkia Yus atumin achirmak pénger túraití, nuka páantaiti. ⁶ Núnisañ atumin wáitkiarmainia nunasha Yus tímiatrusañ wáitkiastincha nekas péngeraiti. ⁷ Tura wáitiarmena nusha Yus íijijasha ayamtikramprartin péngeraiti. Ii Uuntri Jesukristu ji keana ímianisañ kakaram suntarjijai nayaimpimmaya tara wantinkiamtai, nu tsawantaj Yus ayampratniun suramsartatji. ⁸ Tura nú tsawantajsha Yúsán nékaniatsna núnaka ii Uuntri Jesukristu ti asutiátajtsa tátatui. ⁹ Taa, nincha menkakatniunam akupkartatui. Chichaak “Wi pujajna juyá akupeajrume” titiatui. Tura winia ti kakarmar atsana nuju akupeajrume, átum winia umirtukcha asakrumin” nin tiartatui. ¹⁰ Kame Uunt Jesukristu tátin tsawantri jeamtai, ni shuarj, ni enentaj pénger awajrsaru áinia nu, ni náarín shiir pachisartatui. Tura Yúsán umikiaru ásar, ti shiir enentáimsar Jesukristun íisartatui. Ii ujakmajrumna nu antukrum umirka asarum atumsha nuju pachiinkiatarme. ¹¹ Nu tuma asamtai ii Yusrín atumin tuke áujtajrume. Yus atumin achirmakuitrume. Nuñkia Yuska atumí enentáin takas Nii wakera nujaj métek awajtamsati, taji. Yus umirka asarum pénger wekasataj tusarum wakerarme. Túrarum Yus enentáimtusurum pénger túratin wakerarme. Tura wakerarmena nu umiktin Yuska ni kakarmarjijai yáinti, tu áujtaji. ¹² Átum pénger wekasa asakrumin chíkich shuarsha ii Uuntri Jesukristu náarín nankaamantu enentáimtusartatui. Nusha auka ii Yusrj tura ii Uuntri Jesukristu waitnentáimturmasar pénger wekasatniun yáinmakui túrarme. Túramtai chíkich shuar shiir enentáimturmasartatui.

2

Tuke Tunaarintin wantinkiattana nu

¹ Tura, yatsuru, ii Uuntri Jesukristu tátatna nuna tura Niijjai inkiunaiktatjinia nunasha ujaktinian wakerajrume. ² Chíkich shuar anañkramawar “Uunt Jesukristu tsawantri jeyai” tu ujmaktaj tusar wakeruiniawai. “Iimiarmañ nujaj nékajai” turamainiakuiasha, “chícham étserman antukmaj nujaj nékajai” turamainiakuiasha, tura “Papru papí áarmari nuna takui nékajai” turamainiakuiasha, páchim enentáimprairap. Tura sapijmiakairap tusan seajrume. ³ Penké anañnawairap. Nekaatarum. Nu tsawant jeatsajñ Yúsnumia kanaktin átatui. Tura nú arant, Tuke Tunaarintin, emesnartatna nu wantinkiattawai. ⁴ Niisha aya wíniak enentáimtursarat tusa wakerak, ántar-yusnasha tura nekas Yúsasha shuar tikishmatrarajñ tusa ti nakitrattawai. Niñki ti nankaamantu enentáimtumás, Yusa nuke ajas, Uunt Yusa Jeeñ wayáa pujustatui. “Júiti Yus” shuar turutiarat tusa mash túrittiawai. ⁵ Yatsuriram, wi atumjai pujakun nuna ashí ujakmajrume. ¿Nusha kajinmakniurmek? ⁶ Yámaiikikia, ni tsawantri jeatsajñ, Tuke Tunaarintin wantinkiañ tusa surimia nu nékarme. ⁷ Tunaasha yamaisha awai, tura paantcha. Túrasa tunaan surimia nu juramkitniuk taasai nu tunaaka paant átin. ⁸ Nuñkia nu Tuke Tunaarintin wantinkiattawai. Tura Uunt Jesus ni wenejai umpuñ aun máattawai. Tara ni wincharijjai nuna amuktatui. ⁹ Nu Tuke Tunaarintin, iwianchi uuntri Satanás akupkam tátatui. Ni kakarmari iniakmastaj tusa, aentsti túrachminian túrak anañkawartatui. ¹⁰ Jinium wémin áinia nú shuaran ashí tunáa ana nujaj anañkawartatui. Nu shuar Yus-Chíchaman nekas ana núnaka nakitraru ásar uwemprachmin áiniawai. ¹¹ Iis, nekas ana nuna nakitia áarmatai, ti anañmamawar

wait-chichaman umirkarat tusa Yuska tsan̄katkattawai. ¹² Warí, niisha ni tunaarj̄n wararainiak, nekas ana nuna nakitraru ásar matai, Yuska “j̄nium wétatrumé” tiartatui nuna.

Uwempramin ainia nu

¹³ Tura, yatsuru, Uunt Jesus aneamu árumna nu, iisha atumin enentáimtusar ii Yusr̄j̄ yuminsaji. Átum nekas ana nuka umikiurme. Tuma asakrumin Yusa Wakan̄j̄ atumí enentájn̄ p̄nker awajtamsaitrumé. Nu tuma asamtai yámankamtaikniumiá Yuska “átum uwempramniaitrumé” túramprume. ¹⁴ Nu túrunat tusa Yus wakerutmarme. Kr̄stuj̄j̄ Uwempratin Chicham ii ujakj̄nia nuj̄j̄ Yus untsurmakmarme. II Uuntr̄j̄ Jesukr̄stu ti p̄nker pujana nuj̄ pachiinkiamniuram tusan ujakmajrume, nú chichaman.

¹⁵ Wátsek, yatsuru, Yusr̄j̄j̄ katsuartarum. Yus-Chicham etserkamu antukurmena nu, tura wisha áaran akuptukjarmena nusha kajinmatkiirap. ¹⁶ II Uuntr̄j̄ Jesukr̄stusha tura ii Apar̄j̄ Yussha ti p̄nker ásar incha anenmatsjik. Tura waitnentrama ásar incha shiir enentáimtikramji. Tura nú nan̄kaamas ii tuke p̄nker pujustinian ikiurtamsaitji. ¹⁷ Nu tuma asamtai, p̄nker chichastarum tusa, tura p̄nker takastarum tusa Jesukr̄stuka shiir enentáimtikramar ikiakátmaratí.

3

Papru “ájutrsatarum” tímiania nu

¹ Nuyá, yatsurú, Yusa chichame shiir pampartí tusarum Yus áujtursatarum. Átum Yus-Chicham wakerukmarmena áintsan̄ ashí nun̄kanam wakerukartí tusarum Yus seatarum. ² Tura yajauch shuar, p̄nker ana nuna ti nakitiainia nu, incha yajauch awajtamsachartí tusarum Yus áujkartustarum. Kame ch̄kich aents Yús̄an umirkacharu áiniawai. ³ Túras̄ha Uunt Jesusak atumin iniaitsuk wáitmaktatrumé. Tura atumin ikiakátmartatrumé. Tura íwianch anañkramataj takui k̄ishturmaktatrumé. ⁴ Kame Yus atumin yainmaktatrumé, taji. II táj̄nia nu yamá umiarme. Tura tuke umirkattarme. Nusha nekaar shiir enentáimji. ⁵ Uunt Yus yainmakartí ni anenkrattair̄jn̄ nekaatniun. Kr̄stu itiurchatan katsuntramia núnisan̄ atumniasha katsuntratniun Yus yainmaktí.

Takastinaitji

⁶ Yatsurtiram, antuktarum. II Uuntr̄j̄ Jesukr̄stu chichamej̄j̄ ju taji: “Nuyá Yus-shuar wi jintintram̄n nakitiak aya wékana nu ikiuktiarum.” ⁷⁻⁸ II túraj̄nia núnisrumek túratin nékarme. Júiti: atumj̄j̄ pujusmaj nuj̄ tuke takakmasm̄iaji. Atumí yurumkar̄j̄ iisha akikmakar yurumm̄iaji. Atumj̄j̄j̄ itiurchat áchatí tusar tsawaish̄a káshisha tuke takakmasm̄iaji. ⁹ Kame iisha, Kr̄stu akatramu asar “yáintkiatarum” tíminiuj̄j̄; túras̄ha nu tútsuk, ii túraj̄nia núnisrumek túratin nekaatarum tusar, iisha tuke tsawant takaam̄iaji. ¹⁰ Warí, atumj̄j̄j̄ pujum̄iaj̄ nuj̄ “Takastinian nakitiana nuka yurumáshti” tíchamkaj̄. ¹¹ Iis, atum̄j̄j̄niá weeá, nánkamas enentáimiainiak tura nánkamas túruiniak pen̄ké takatsuk pujuiniawai, túramainiaji. ¹² Nú shuáran ii Uuntr̄j̄ Jesukr̄stu chichamej̄j̄ “Tákamtak shiir takakmasartí” taji.

¹³ Yatsurtiram, yawetsuk shiir túratarum. ¹⁴ Ju papinium ii táj̄nia nuna, shuar umiktinian nakitiakuñkia “umichuiti” tákuram, ni nats̄arat tusarum ikiuktiarum. ¹⁵ Túras̄ha “Yus-shuara nemasr̄inti” tiip. Áyatik jintintrata, tura Yús̄aj̄ enentáimtikrata, ame nekas yatsum̄eá áitkiasmek.

Papru aajsua ikiumu

¹⁶ Uunt Yuska, imiatkichu enentá susamniaiti. Jú Yus, itiurchatnum pujarmin̄j̄ atumin tuke imiatkichu enentáimtikramsartí. Uunt Yuska atumin pujurtamsartí, taji.

¹⁷ Ju wi Papru juna aajai. Wi papin akupeaj nuj̄ j̄j̄nisnak winia náarun áaran apujeajai, wíniaiti tusan. ¹⁸ II Uuntr̄j̄ Jesukr̄stu atumin ashí yainmakarat tusan wakerajrume. Nu atí.

Papru TIMIUTÉUN Emka papin aar akuptukma

¹ Wi Papru Jesukristu akatramurintjai. In uwemtikkiartin Yussha tura ii Uuntrj Jesukristusha winia akuptuku ániawai. Jesukristujai métek ti shiir ajastai tusar nákaji. ² Timiutéu, ju papin áateajme. Wi ujakam Yus-shuar ajasu asam nekas winia uchirua áinkiaitme. Tuma asakmin Yus Apasha tura ii Uuntrj Jesukristusha ti anenma ásar waitnen-tramainiak imiatkinchanum ti shiir pujustinian yainmakarti.

Wait chichamjai anearta

³ Masetúnia nunkanam wéakun “Ipisiu péprunam pujuuta” timiaj núnisnak tájame. Shuar nuĵ wait-chichaman jintin ainia nu suritkiarta. ⁴ Niisha Israer-shuara weątrĵn áujmatsamunak tura ni weątrĵ naarĵ ti untsurĵ irurtinniak Yus-Chichamjai nanĵkaamas enentáimtuiniawai. Nunak áujmatsar tuke ántar tuiniawai. Nu túramuka Yus enentáimtusar Nin shiir umirkatniun yáinmatsji. Tuma asamtai nusha suritkiatá.

⁵ Yus-shuar tuke enentáijjai Yúsan shiir enentáimtusar tura tunáa túrutsuk aya péńkera nuna wakerukar anenkartin ajastin ániawai. Núnisan péńker ajasat tusar Yus-Chicham étsereaji. ⁶ Chíkich shuar juna iniaisar ántar chichaman áujmatainiawai. ⁷ Yúsnan nékachiat “jintinniuitjai” tuiniawai. Tura unuiniainia nuna nékainiatsui.

⁸ Yus wakeramun nekaatin tura tunaan suritkiatin akupkamuka nekas péńkeraiti. Nu paant nékaji. ⁹ Kame akupniuka péńker shuaran itit awajsatniun akupenatsui. Antsu yajauch shuar juna túrin ainia nuna itit awajsatniun akupenawai: Tunáa shuar-nasha, umichuncha, Yúsnasha tura ashí Yúsnancha nakitiainia nunasha, aparĵn máinniasha, nukurĵn máinniasha, kame mańkartinniasha, ¹⁰ nuwancha tura áishmańnasha tsanirma áinia nunasha, shuaran kasamak juu ainia nunasha, waírinniasha, tsanumniuncha, ashí nuna itit awajsatniun akupenawai. Kame ashí péńkercha nuna iwiaratniun akupenawai. ¹¹ Núnisan tawai ti shiir uwempratin chicham Yus suramsajnia nu. Nu chichamnaka etserkatniun Yus péńker asa tsanĵkatrukuiti.

Yus waitnenkartin asamtai Papru yumınsamiayi

¹² Ii Uuntrj Jesukristu shiir enentáimturu asa Níiniun etserturkat tusa kakarman surusuiti. Túruta asamtai yúmıńkijajai. ¹³ Wi Yúsan imiá yajauch chicharniuyajai. Yus-shuarnasha áintrarmijajai. Yusnasha katseknuiyajai. Túrin aĵn Yus winia waitnentrurmiayi. Kame Jesuska Yus Anaikiamun nékachu asan wi túramu yajauchiiti tu enentáimchauiyajai. ¹⁴ Tura ii Uuntrj Jesukristu ti nekas waitnentrurmiayi. Tura Jesukristujai tsanıńkia pujakuı Yus nekas enentáimtustinniasha tura anenkartin ajastinniasha surusuiti.

¹⁵ Ju chicham ti nekasaiti. Tunáa shuáran uwemtikiartaj tusa Jesukristu ju nunkanam taramiayi. Nunasha ashí shuar nekaatin ániawai. Tura wikia ashí shuarjai nanĵkaamas tunáan túriniaitjai. ¹⁶ Ti tunáa aĵn Jesukristu ti anenkartin ana nu paant nekanati tusa Yus winia waitnentrurmiayi Tuma asamtai chíkich shuar, wıjĵai métek, Yúsan nekas enentáimtusar Niıjĵai tuke iwıaaku pujusartatui. ¹⁷ Yus tuke jacha asa tuke iniaitsuk akupniuiti. Wáinchataitai imiá nanĵkaamas nékaiti. imia Nińki Yúsaiti. Tuma asamtai imia Nińki tuke iniaitsuk ti shiir awajsatniuiti. Núnisan tuke atı.

¹⁸ Uchiru, Timiutéu, yáunchuyá Yus-shuar ámin “Ju shuar péńkeran túrattawai” túramarmia nútıksam yamaıkia kakaram ajástá. Nii timia enentáimksam suntara áıntsam Yúna kakaram takastin asumprurta. Nuna tájame. Tura Yus tuke nekas enentáimtusam tura tunaan túrawajĵ tusam anearam túrata. ¹⁹ Chíkich shuar tunaajaj anearcharu ásar Yúsan ikıuiarmai. ²⁰ Iminúsha tura Arejántrusha núnisan Yúsan ikiuiarmatai uunt iwianchnium surukarmajai. Nuĵai Yúsan ti yajauch chicharsacharat tusan túraitjai.

2

Yus áujsatın

¹ Wátsek, emka seajrume Yus áujeakum Yus yumınsam ashí shuar yaıńkiat tusam áujtusarta. ² Imiatkinchanum pujusar Yusĵajsha tura áentsjaısha shiir túratai tusar tura ashí akupin ainia nusha péńker akupkarat tusar Yus áujtustiniaitji. ³ Áitkiasar seatin péńker asamtai, uwemtikramajnia nú Yus wakerawai. ⁴ Ashí shuar nekas chichaman nekaawar uwemprarat tusar wakerawai Yus. ⁵ Aya chikichik Yus awai. Tura Jesukristu aents ajas Yusĵaj áentsun nawamnaimtikartiainiati. ⁶ Ashí shuara tunaarĵn akikmatkataj tusa jákatniunam Jesukristu surumakmiayi. Tura tsawant jeamtai nu chicham ashí shuarum

etsernaktiniuyi. ⁷ Nuna túratniun Yus winia akatar akuptukuiti. Israer-shuarcha nekas chichaman enentáimtusarti tusa Yus akuptukmiayi. Krístunu asan wáitrusuk nekas tajai.

⁸ Nu asamtai áishmaṅka kajetsuk yajauch tunaitsuk antsu péṅker enentáijjai uweje takuniar Yúsan áujisarti. ⁹⁻¹⁰ Núnisaṅ núwaka iwiarmamuk nekasmiancha péṅker enentáijjai entsararti. Chíkich shuar nu nuwaṅ iis temashmarmaríncha, sháukríncha, kurímkiamuncha, iwiarmampramuríncha núnaka enentáimtutuk antsu ni péṅker túrunamun enentáimtusarti. Núnisaṅ áchatniukait nuwá Yús-shuar ainia nujai. Ni péṅker túramujai nekas shiir awajmamsashtinkiait. ¹¹ Núwaka takamtak pujusar umiiniak unuimiararti. ¹² Nuwáṅka ashí iruntramunam unuiniartinniasha tura ni áishrin akupkatniuncha suritiyajai. Antsu takamtak pujustiniarti. ¹³ Yus emka áishmaṅkan Ataṅkan najanamiayi. Nuyá nuwaṅ Épan najanamiayi. ¹⁴ Tura Yus timian umirkach Ataṅka ananṅnachiayi. Antsu Épa ananṅna asa tunaan túramiayi. ¹⁵ Túmaitiat jurertin asa, emesnartinniumiá uwempraiti. Tura Yúsan nekas enentáimtak aneṅkartiniarti tura esetar enentáimiuk péṅker wekasatniuiti.

3

Yus-shuaran wáinin

¹ Shuar Yus-shuaran wáinkiatniun wakerakka péṅker takatan achikiuiti. Nuka nekasaiti. ² Tura Yus-shuaran wáinin ajastinian wakerakka chíkich shuar nin yajauch áujmattsachmin átiniaiti. Nuwá apatka áchatniuiti. Niisha péṅker esetar enentáimin naka wekasatniuiti. Íranan ni jeen ti shiir itiaatniuiti. Péṅker jintinkratin átiniaiti. ³ Nampechusha tura suiir enentáimtichusha átiniaiti. Aya kuítian ikiaṅkatniun enentáimtuschatniuiti. Antsu tsaṅka átiniaiti. Kajechusha átiniaiti. Chíkichnancha wakerutkashtiniarti. ⁴ Ni shuarin shiir akupeaku ni uchirísha umin tura shiir awajkartin ártiniarti. ⁵ Kame ni shuarin akupkachmini-aitkiunṅka jitiurak Yus-shuaran wáinkiat? ⁶ Yus-shuaran wáinniuka yama Yus-shuar ajasu áchatniuiti. Túmaitkiunṅka ti naṅkaamantu enentáimtumak iwianchjai métek tunaan túrak sumamattawai. ⁷ Yus-shuarchasha nin shiir enentáimtustin ániawai. Núnischaitkiunṅka nin yajauch chicharainiakui iwianch wárik tunaanum ajuartatui.

Yus-shuaran yain

⁸ Núnisaṅ Yus-shuaran yaincha péṅker asamtai ashí shuar nin shiir enentáimtustin ániawai. Nii tana nuna tímatrusaṅ umin átiniaiti. Nampechu átiniaiti. Aya kuítian ikiaṅkatniun enentáimtuschatniuiti. ⁹ Yúsnan ti péṅker nekaatniuiti. Tura esetar enentáimsatniuiti. ¹⁰ Emka péṅker ístiniarti nuyá péṅker wekaakka Yus-shuaran yain átiniaiti. ¹¹ Nuwásha péṅker asamtai ashí shuarsha nin shiir enentáimtustin ániawai. Tsanumniuchu antsu esetar enentáimiar nii chichaa ímiatrusaṅ umin átiniaiti. ¹² Yus-shuaran yainkia nuwaṅ apatkachu átiniaiti. Tura ni uchiríncha ni shuaríncha ashí shiir akupin átiniaiti. ¹³ Yus-shuaran yayak nekas péṅker takaakka shiir enentáimtusmin asa páchitsuk Krístu Jesus enentáimtamun arantsuk etserkamniarti.

Yusna ana nu imiá naṅkaamas péṅkeraiti

¹⁴⁻¹⁵ Wárik ítniun wakerajme. Túmaitiatnak sétaknasha Yus-shuarjai takastin nekaak tusan juna áatjame. Ashí Yus-shuar, iwiaaku Yusna ainia nu, nekas chichaman tuke emetawar akasmatainiawai. ¹⁶ Maa, imiá nekasaiti, Yus iwiainturmakma ashí naṅkaamas ti péṅkeraiti. Tura júiti:

Yuska aents ajas jú nuṅkanam paant wantinkiamiayi.

Yus Wakancha “ti shiiraiti” Nin tímiayi.

Yusa suntarísha Nin wáinkiarimiayi.

Ashí nuṅkanam nu etsernakmiayi.

Túramtai ashí nuṅkanmaya shuar umirkarmiayi.

Tura nayaimpiniam waketkimiayi.

4

Amuukatin tsawantin

¹ Yusa Wakanj ti paant tawai, amuukatin tsawant jeaakuí untsurj aents Yus enentáimtustinian iniáisar antsu yajauch wakanin nemarsar iwianch jintiamun anturkartatui. ² Yajauch shuaran anturkartatui. Nu shuar ni enentáj narúa áinin ásar ni tunáa túramun péṅké enentáimtichu ániawai. Tuma asa shiir chichainiyatan wáittrin ániawai. ³ Nu shuar nuatnaikiatniun suritiainiawai. Núnisaṅ chíkich chíkich yurumak yúatniuncha suritiainiawai. Warí, Yus ashí yurumkan najana asamtai Yus-shuar nekas chichaman nékainia ásar Yúsan yumínsar páchitsuk yuámin ániawai. ⁴ Ashí Yus najanamu

pénker asamtai nakittsuk antsu Yusan yuminsar yúatniuiti. ⁵ Yus-Chicham tana nújajisha tura yuiniak Yúsan yuminkias ájsamujají ashí pénker ajasuiti.

Jesukrístu pénker takarín

⁶ Wí tájamna nu chíkich Yus-shuar jintintiakmeka Jesukrístu pénker takarín átatme. Tura ashí Yus-Chicham pénker jintíamu unuimiaru asam nujají kakaram ajastatme. ⁷ Ántar chichamsha tura netse chichamsha enentáimtutsuk nekas Yúsna ana nu túratin kakaram ajasta. ⁸ Kame ayash kakaram awajsatniusha ishichik pénkeraiti. Antsu Yúsna nu túratin kakaram ajastinkia imiá pénkeraiti. Yamái jü nunkanmasha yáinmaji tura ukunmasha Yusjají pujustin asakrin nankaamas pénkeraiti. ⁹ Nu imiá nekas asamtai ashí shuar nuna enentáimtustiniaiti. ¹⁰ Nekas iwiaaku Yus ashí shuaran uwentikramniaiti, tura ashí Nin enentáimtuinia nú shuaran nekas uwentikratniuiti. Nu chicham imiá nekasaiti tu enentáimtakur katsekramainiakrincha kakaram takaaji.

¹¹ Nuka ashí ame jintiakum akupkatniuitme. ¹² Ti úuntchaitkiumnisha nakitram-prarajín. Antsu pénker túrakum Yus-shuar unuiniarta. Chichammijajisha, túramurmijajisha, anenkratmarmijajisha, nekas Yus enentáimtamujajisha, tura esetra enentáimsam Yúsna pénker túramujajisha niisha túrawarat tusam iniaktusarta. ¹³ Wí jeatsajín Yus-Chicham áujeakum shuar jintintiata. Túram Yus-shuar ikiakárarta. ¹⁴ Yus-shuara uuntri Yúsna takastin anaitiamak uwején awantramsarmai. Nuna túramainiak “Jü shuar kakarman Yúsnumian takustatui” túramarmia nu, kakaram ajasam tímatrusam túratá.

¹⁵ Tuke enentáimjají wí tájamna nu enentáimtakmin ame pénger túruki wéamun nekaawartatui. ¹⁶ Túramna nusha tura unuiniamna nusha pénker wáinmamkata. Nu túratin pimpikiip. Nu túrakmeka uwemprattame amesha tura ujainiam nusha uwentikrattame.

5

Yus-shuarjají itiur túratniuit

¹ Uunta nu kakantraip. Antsu nekas ame apa nútiksamek chicharkata. Nátsasha nekas ame yátsumea nútiksamek shiir awajarsarta. ² Nuwá úuntchisha nekas ame núkua nútiksamek shiir awajarsarta. Nuwá nátsasha nekas ame umaimia nútiksam shiir enentáimjají pénker awajarsarta.

³ Wajé nekas atsumin ainia nusha yáinkíarta. ⁴ Tura wajé uchirtiniaitkiuñkia tura tirankrinniuitkiuñkia, nu shuar wajén wáinkíarti. Emka ni shuarjín pénker wáinkiatniun unuimiararti. Ni aparí anemia núnis awantuiniak shiir wáinkíarti. Núnaka Yus ti shiir enentáimtaiwai. ⁵ Nekas wajé niñki pujana nu Yúsan enentáimtak tsawajisha káshisha iniaitsuk Yúsan áujeawai. ⁶ Antsu aya wárastiniak wakera nuka iwiaakiat jaka áintsankete. ⁷ Tura wajenka ni shuarjín wáinkíarti. Yus-shuaran yajauch chicharnaktin atsutí tusam wí tájamna nu ashí Yus-shuar ujakarta. ⁸ Shuar ni jéen pujuinia nuna nekaska wáinkiatniuiti. Tura nuyá chíkich shuárnasha yáintiniaiti. Túrachkuñka Yus tana nuna umiatsui, tura Yus-shuarcha nujají nankaamas yajauchiiti.

⁹ Yusa kuitrijají yáinniaiktiniaitkiuñka wajé sesenta (60) uwí nankaamas takustiniaiti. Tura chíkichik aishriniak takusu átiniaiti. ¹⁰ Ti paant pénker túrin átiniaiti. Ni uchirín pénker tsakatmaashit, iraran pénker táata tñiuashit, nekasmiancha enentáimtumar Yus-shuaran yáiniaashit, wáitainia nuna waitnenniuashit, tura chíkichnasha pénker túriniaitkiuñka maak.

¹¹ Tura sesenta (60) uwí takakchaka chíkich wajejají iruraip. Ni ayashjí wakeramurjí Kristuyá kanantikiainiawai tura ataksha nuatnaikiatniun wakeruiniawai. ¹² Tura emka enentáimtiarmia nuna iniaisar sumamainiawai. ¹³ Nu arantcha nakimiainiak ántar irauwear chíkich iturchatrín áujmatsachminia nunasha áujmatin áiniawai. ¹⁴ Nu asamtai wajé úchipiak ainia nuka uyurturak uchin takusarti. Tura nuwá nuatkamu takastinia nuna túrawarti. Tura ni túramamurijají in kajertamainiaj nú shuar yajauch enentáimturmarsharti. ¹⁵ Kame nuik chíkich chíkich wajé Kristuyá kanakiar iwianchin nemarsaru ásarmatai nuna tájai.

¹⁶ Áishmansha nuwásha Yus-shuar ainia nu ni shuarjín wajé ákuñkia Yusa kuitrín seatsuk níi yáintí. Nujají chíkich wajén nekas atsumainia nuna Yusa kuitrjín yáintatui.

¹⁷ Yus-shuara uuntri Yus-shuaran pénker wáinkiarua nu, nekas shiir enentáimtustin áiniawai. Tura akinkiamniasha áiniawai. Nekaska Yus-Chichaman etserkatniuncha tura unuiniartinnisha tuke takaaka imiá shiir enentáimtustinaiti. ¹⁸ Yus-Papiniumsha núnisan áarmaiti:

Jiníkaia saepen pakartaj tusa turu takaak nájakui ni nují jiníkiatáshtiniaiti. Antsu ni wakerak yuati. Tu áarmaiti.

Tura nu arantcha áarmaiti:

Takakmasua nu nekas akinkiatniuiti. Tu áarmaiti.

¹⁹ Chíkichik shuarak Yus-shuara uuntrj tunaarjn etsertukmatañkia anturkaip. Antsu jmiarsha menaintiusha tsanumsuk métek tuiniakui anturkata. ²⁰ Chíkich shuарsha ni tunaarjn ikiuktinian nakitiainia nu, ashí iruntramunam chicharkarta. Chíkichcha, nuna ísar, ashamkarti. ²¹ Yussha ii Uuntrj Jesukrístusha tura nayaimpinmaya suntarsha ímiainiamunam “túrata” tájame. Ashí shuarjaj niisháa enentáimtutuk métekrak túrata. ²² Yus-shuara uuntrj atí tusam wárik anaikiaip. Wárik túramka chíkicha tunaarjn sumamattame. Ashí tunaanum penké pachiinkiaip.

²³ Wakemjaj jau asam aya éntsak úmutsuk karía ishichik pachimpram umarta.

²⁴ Chíkich shuara tunaarj wáitsatin imiá paant ániawai wáitsatin tsawant jeatsajñ. Tura chíkich shuara tunaarñkia paantcha ániawai antsu ukunam paant nekanawartatui. ²⁵ Núnisan penker túramusha ti paant ániawai. Tura yamá páantchaitiat tuke paantcha áchamniaiti. Páchitsuk nekanattawai.

6

¹ Takarniutirmesha, atumí uuntrj ti shiir umirkatarum. Túrachkumñkia chíkich shuar Yushasha ii unuiniamuncha yajauch áujmattsartatui. ² Atumí uuntrj Yus-shuar ániakka aya Yusjaj yatsum asamtai nakiarchatniutrume. Antsu nuna nankaamas penker takarsatniutrume. Wari, ame yayamna nu Yus-shuarchak ainia, tura ame aneamu yatsumchak ainia. Ame, Timiutéu, tu jintintiata.

Yusna wakeruktincha tura kuit wakeruktincha

³ Shuar ti shiir naka chichaman ii Uuntrj Jesukrístunu ana nuna nakitiak antsu niisháa chichaman étserkunka ⁴ nu shuar nankaamantu enentáimtumayat ántraiti. Ni enentáimmianak chichaak aya ántar chichaman antumtiknaikiatniun chichaawai. Tura nu chichamjaj nupetmaktaj tusar nankaamas áujmatainiak kajernaikiar tura katseknaikiar penker enentáimtainitsuk ⁵ tuke kakannainiawai. Tura tu aujmatnaisatniun wakeruini ana nú shuar nekas-chichaman nékachu ásar aya tunaan enentáimtin ániawai. “Yusna ana nujaj kuítrintin ajasminiaiti” tuiniawai. Nu shuar pachisaip. ⁶ Shuar takakna nujajñ waraakka Yusna ana nujajsha waraak ju nunkanmasha tura nayaimpinmasha nekas kuítrinniuiti. ⁷ Iis, ju nunkanam misuk támaji; núnisan misuk jiinkittiaji. ⁸ Tuma asamtai yurumkasha tura entsataisha takakkurkia nujajñ warasa pujustiniaiti. ⁹ Antsu kuítrintin ajastaj tuinia nu, tunaanum awankekmar iniainiawai. Tura antra nuna wakerukar itirchatan wáiniainiawai. Nujajñ emesratniunmasha jeainiawai. ¹⁰ Kame kuit aneatniuka ashí tunáanum útsutmakminiaiti. Chíkich shuar nuna wakerukar Yus enentáimustinian iniaisar ti itirchataj yajauch awajmansarai.

Yusna nu túrunat tusam kakaram ajástá

¹¹ Antsu ame Yus-shuar asam nuyá pisarta. Yus nekas enentáimtakum penker túrata. Waantu enentáimtsuk Yus penker umirkata. Aneakum katsunrata. ¹² Yusna nu túrunat tusam kakaram ajástá. Tuke amuicha iwiaakma emetata. Nu túratniun Yus anaitiamkaiti, tura ame Yus nekas enentáimtamú untsurj shuar iruntramunam etserkaitme. ¹³ Yuska ashí iwiaaku átinian súwiti. Jesukrístusha Punsu Piratuj nekasa nuna ti paant ujakmiayi. Tuma asamtai Yussha Jesukrístusha írainiamunam nuna tájame. ¹⁴ Ii Uuntrj Jesukrístu táatsajñ wi tájama nu yapajitsuk tura yajauch chicharnakchamnia penker umiktá, tájame. ¹⁵ Tsawant jeamtai Jesukrístu tatí tusa Uunt Yus, imiá penker asa, akupkattawai. Niñkiti Yus. Akupniuncha Akupniuiti. Uuntjajñ nankaamas Úuntaiti. ¹⁶ Iwiaaku átinia nérenniurj Niñkiti. Ti tsáapninnium pujakui nuntumtuachminiaiti. Wáinchatai asamtai shuar penké wáinkiacharu ániawai. Niñki ashí shiir awajsatniuiti tura Niñki tuke ashí akupin atí. Núnisan atí.

¹⁷ Jú nunkanam kuítrintin ainia nusha nankaamantu enentáimtumasharti. Kuitcha yúpichuch menkakamnia asamtai kuítniak enentáimtusar pujuscharti. Antsu iwiaaku Yus ashí in ti penkeran nukap súramaj nuna nekas enentáimtusarti. ¹⁸ “Penker túrataram” tiarta. Tákumin niisha shiir enentáijajñ ni takakman ajasarti. Nuyá nú penker túramujaj Yusaj ikiáunkarti. ¹⁹ Nuna túruiniak kuítriniawartatui. Núnisan tuke iwiaaku átinian wáinkiaratui.

Amuak Timiutéun akatramu

²⁰ Timiutéu, ashí ame túratniua nu tuke enentáimturta. Jú nunkanmaya ántar chichainia nu anturkaip. Tura wáitruiniak “wi imiá nékajai” tuinia nusha anturkaip. ²¹ Chíkich shuar nuna umirkar Yusajya kanakiarai.

Wátsek, Timiutéu, Yus shiir yainmakti.

Nuke atí.

Papru TIMIUTÉUN Ataksha papin aar akuptukma

Papru Timiutéun áatramiania nu

¹ Wi Pápruitjai. Yus wakerakuí Jesukrístu akatramurí ajasuitjai. Ashí Jesukrístujai tsaniñkiarun “Nekas iwiaaku átinian susattajai” tñiuiti Yus. Tuma asa nuna etserkat tusa akuptukuiti. ² Aneamu uchíru, Timiutéu, ju papín áateajme. Yus Apasha tura ii Uuntrí Jesukrístusha ti anenma ásar waitnentrainiak imiatkinchanum shiir pujustinian yainmakarti.

Krístunu takastiniaitjinia nu

³ Tsawajsha káshisha Yúsan áujeakun ámin tuke enentáimtusán ti shiir Yúsan yúmiñkíajai. Winia weatur túrawarmia nútiksanak Yúsan enentáimtakun ti shiir awajeajai. ⁴ Kanakmíaj nuj eantramiam nuna tuke enentáimtajme. Ataksha wararnaisatai tusan litniun wakerajme. ⁵ Yus nekas shiir enentáimtiniaitmena nuna nékajai. Nukuchrum Ruftiasha tura ame nuku Eunisiasha emka Yúsan nekas enentáimtin ármiai. Amesha núnisketme.

⁶ Tuma asakmin tájame: Yusna takasái tusan winia uwejrún ámin awanteakuí Yus kakarman suramsamía nujaj atak kakaram takasta. ⁷ Yus sápij enentáin suramsachuitji. Antsu kakaram ajastiniasha anenaitniuncha péñker wekasatniuncha suramsaitji. ⁸ Ii Uuntrí Jesukrístunu etserkatin natsantraip. Níniun étserkun sepunam pujamusha étserkun natsantruraip. Antsu Yus kakaram awajtamkuí ame étseream nujaj shuar yajauch túramainiakú surimiamtsuk wáitsatin enentáimtumarta. ⁹ Ii péñker túrichu áriníj Yus in anenma asa uwentikramar péñker túratniunam apujtamsaitji. Iisha Jesukrístujai tsaniñkiaru asakrin tura Yus nuna túratniun wakerak túramiai. Yaunchu ju nunka atsajsha in tuke waitnentrampriamíaj. ¹⁰ Turá yamá in Uwentikkiartin Jesukrístu támatai nu anenamu paant ajasuiti. Niisha jákatniun nupetak emesramiai. Tura uwempratin chichamíaj jáchatai iwiaakman paant awajturmai.

¹¹ Nuna etserkat tusa Yus anaitiukmíayi. Tura akattur Israer-shuarchanum akuptukmíayi. ¹² Túruta asamtai ti wáitíajai. Túrusha Yúsan nekas enentáimta asan natsamatsjai. Imiá kakaram asa amuukatin tsawant jeatsajin ashí winian susamaj nuna ti péñker waitruktatui.

¹³ Shiir chichaman jintintiamajmena nuke emetata. Jesukrístujai tsaniñkiu asar Yus nekas enentáimtají tura nujaj aneñkratniuitji. Tuke núnismek túrata. ¹⁴ Yus ámin takasat tusa suramsamu shiir takasta. Tura Yusa Wakaní in pujurtamaj nuna kakarmarijijai túrata.

¹⁵ Asia nunkanmayá shuar mash iniaitiusarmái. Nu nekaachmaashum. Nu shuarnumíá Pijirusha Ermujenessha armái. ¹⁶ Antsu Unisépuru niisháa shuar amai. Ti nukap shiir enentáimtkurmai. Tura wi sepunam pujamuncha natsantruchamai. Ii Uuntrí Krístu ni shuaríncha waitnentrarti. ¹⁷ Rúmanam taasha natsantrutsuk eatak wáittsuk iniaitíuschamiayi. ¹⁸ Ipiisú péprunam pujarin ti yainmakmíaj nu paant nékame. Tuma asamtai amuukatin tsawant jeamtai nincha Uunt Yus waitnentrati.

2

Kakaram ajasta

¹ Amesha, uchírú, Jesukrístujai tsaniñkiu asam nu kakarmajaj kakaram ajasta. ² Untsurí ántuiniamunam wi etserkamaj nu, shuar umikmin ainia nu jintintiwaram chikichnasha jintintíawarat tusam akupkarta.

³ Ame ti péñker Jesukrístu suntarí asam wáitsatin katsuntrata. ⁴ Suntarka ni uuntrí tana nunak umiktin asa chikich takatan pachintiukchatniuiti. ⁵ Núnisan nakuríncha nakurustinia nujaj métek nakurachkunka nekas péñkeran awakmakun súsatniua nuna achikchamniaiti. ⁶ Ataksha núnisan shuar ajan takaana nu, ashí shuara nankaamas nuyán yúashtinkiait. ⁷ Wats, ju menaintiu métek-taku chicham ániawai. Péñker enentáimtakmin ii Uuntrí Krístu paant awajturmastatui.

⁸ Jesukrístu jaka nantakmia nu enentáimprata. Tura Uunt akupin Tawit ni weatjí asamtai Jessusha uunt akupin átiniaiti. Núiti wi uwempratin chichaman étsereaj nu. ⁹ Nuna étsereakun sepunam jirujaj jiníkiamu pujakun wáitíajai. Túrusha Yus-Chicham jiníkiachminiaiti. ¹⁰ Ashí shuar ni shuarí arti tusa Yus achikiarua nuna yáintajtsan ashí iturchatan katsunteajai. Nujaj Jesukrístujai tsaniñkiaru ásar uwemprar tuke shiir pujusartatui Yusjaj.

¹¹ Ju imiá nekasaiti:

Jesukristujaj jákai kuriakia Nijijajisha tuke iwiaku pujustaji.

¹² Wáitakrishia Nijijaj akupkattaji.

Natsantakrinkia Niisha natsantramprattaji.

¹³ Umichuitkiurniisha Niñkia tuke uminiaiti. Warí, Yuska ni enentáimmiajajin yapajniátsuk tuke umiktiniaiti.

Yusaj natsaqarajj tusam ashi túrata

¹⁴ Shuar jintintiakum ju enentáimtikrata. Ii Uuntrj Yus ímmianum chichamjaj yajauch tunaiyarajin tusam chicharkarta. Nu tunaitin penké áantrai tantsu ántuiniana nuna yajauch awajenawai. ¹⁵ Yus-Chicham tuke enentáimjaj penker unuimiátram shiir jintintiwarta. Túrakum Yus penker írsat tusam penker takarin atá. Túramka Yusaj natsaqarchattame. ¹⁶ Jú nunkanmayanak ántar áujmatin ainia nujaj kanaktia. Shuar nuna áujmatainiak tunaanum nuna nankaamas wáiniawai. ¹⁷ Ni jintiniamusha sunkurjaj métek pampaawai. Iminíusha tura Piritiusha nu shuar áiniawai. ¹⁸ Niisha nekas chichaman iniaisar tura ashí Yus-shuar nantaktincha nankaamasai tuíniakui chikich chikich shuar Yúsan naka enentáimtuiniatsui yamaikia. ¹⁹ Túrasha Yus ashí nankaamas enentáimtustinia nuna paant awajsaiti. Júnisaiti: “Uunt Yus ni shuarin nékainiawai,” tura nuyá “Ashí Kristu shuarj ainia nu tunaanumia kanakiarti.”

²⁰ Kuítrinniu jeen kurijajj najanamusha kuitjaj najanamusha írunui. Nújajnkia ti shiira nu takastin áiniawai. Tura numijajj najanamusha nuwejjaj najanamusha írunui. Antsu nújajnkia nekasmiancha ainia nu takastin áiniawai. ²¹ Núniskete Yusa takatrijajj. Ashí tunaanumia kanakir penker wekasar shiira nu takasmin átatji. Kame ashí penkera nu takasmin asakrin ii Uuntrj Jesukristu wakerak penker takata nuj apujtamsamniaitji.

²² Natsá wakerutai iniaisam esetram penker wekasata. Amesha ashí shuar shiir enentáijajj Yúsan áujena nujaj Yus nekas enentáimtakum aneniakum ti shiir pujustá. ²³ Enentáimtsuk chichainiak aya ántar tunaitinian chichainia nu pachisáirap. Nusha aya némasmanaiawai. ²⁴ Ii uuntrj Jesukristu takarniuka chikich shuarjaj nemasmanaikiash-tiniaiti, antsu ashí shuarjaj penker nawamnaikiatniuiti. Tura waitnentáimturar penker jintintiatniuiti. ²⁵ Tura umircha shuarnasha Yus ni enentáin yapajtiakui nekas chichaman shiir enentáimturarat tusa penker enentáijajj jintintiatniuiti. ²⁶ Nujaj íwianch ni wakeramu túrawarat tusa achikmaitiatjan uwemprartatui.

3

Amuukatin tsawant jeatemamtai aents ti tunaan túrawartatui

¹ Amuukatin tsawant jeakui ti itiurchat átatui. ² Shuar aya niñki enentáimtusartatui. Kuítian ti wakeriartatui. Nankaamantu enentáimtumaratatui. Yúsnasha yajauch chicharsartatui. Aparincha umirkachartatui. Yumiñsatniuncha nékachu ártatui. Ashí Yúsnanacha enentáimtuschartatui. ³ Aneetsuk waitnenkartichu ártatui. Tsanumin ártatui. Ni ayashí wakeramun katsuncha ártatui. Aya kajen ártatui. Ashí penker túrinia nuna nemasrj ártatui. ⁴ Amikrincha surukartatui. Arantsuk tunaan túrawartatui. Waantu enentáimin ártatui. Yúsan nakitrar aya ni wakeramunak enentáimtusartatui. ⁵ Yusa kakarmarj “ántrai” tuíniak penker umirkachartatui. Túrasha Yúsan umirua núnisar túrawartatui.

Nu shuar penké pachisáip. ⁶ Nu shuarsha shiir chichayatan anañkawar jeá wáiniawai. Tura nuwá esetar enentáimchan nekas tunaarinniu anañkainiawai. Nu nuwá ashí yajauch wakeramujaj anañnainiawai. ⁷ Tuma ásar ashí shuara chichamen tuke ántuiniaiyatan nekas-chichaman nekaatniun tujintiainiawai. ⁸ Yaunchu Ejiptu nunkanam Muisais uunt akupniujaj chichaakui jimiará iwishin, Jánissha Jámprijsa, Muisaisan kajerainiak “ántar tawai” tiarniayi. Núnisan ju shuar nekas-chichaman nakitiainiawai. Naka enentáimainiachu ásar Yúsan naka jintiatniun penké tujintiainiawai. ⁹ Túrasha nuna nankaamas kuakchartatui. Shuar ti paant ni netse túruiniamurj nekarawartatui. Núnisan nu jimiará iwishniujaj túrunamiayi.

Amúak Papru Timiutéun akatramiania nu

¹⁰⁻¹¹ Tura ámeke wi tímaj nu umireame. Wi Yusjaj shiir wekaamusha métek túriniaitme. Wi enentáimmiasha nékaitme. Aintruiniakui wáitsamaj nu nékame. Tura Yúsan enentáimtakun tura anekratkun shiir enentáijajj katsuntramjaj. Antiukia péprunmasha, Ikiuniu péprunmasha, Ristra péprunmasha ashí yajauch túrutawarmatai wáitsamaj nu paant nékame. Túrasha ii Uuntrj uwemtikrurmiayi. ¹² Nekasaiti, shuar Jesukristujaj shiir túratay tákupka ni nemasrj ántiam ti wáitsatniuiti. ¹³ Tura ashí anañkartin ainia nusha kame ashí yajauch shuarsha nu yajauch túrukiar wétatui. Iwianchjaj anañkamu ásar chikichnasha anañkiar weartatui.

¹⁴Antsu ámeke unuimiam nu imiá nekasaiti tu enentáimtakum tuke emetata. Jintintra-mawarmia nú shuarsha wáitrichua nu nékame. ¹⁵Úchichinmayan Yus-Chicham nékame. Yus-Chichamka uwempratniun jintintramamniaiti. Nusha “Jesukristu nekas enentáimtakum uwemprattame” tawai. ¹⁶⁻¹⁷Ni Papirín áarat tusa Yus ni shuarín áamtikramiayi. Ashí shuar ni Chichamen nekaawar péñker túrawarat tusa túramiayi. Tuma asamtai Yus-Papí shuartin unuiniakartin asa imiá penkeraiti. Tunáa túrajnia nu Yus-Papíjjai nekamatniuitji. Tura awajiakrincha Yus-Papí núnaka paant jintintramji. Nuyá naka wekasatniun jintintramji.

4

¹Ii Uuntrj Jesukristu amuukatin tsawantaj Uunt Akupin ajas iwiaakuncha tura jákaruncha ashí péñker túramuncha tura yajauch túramuncha nekaattawai. Tuma asamtai Niisha tura Yus Apasha ímiainiamunam juna akateajme. ²Uwempratín chicham etserkata. Yúpichuchia nujsa tura itirchata nujsa tuke etserkata. Yus-Chicham nekas enentáimtikrarta. Tura shiir enentáimtusam chicharkam yáitaj tusam unuinirarta. ³Ukunmañka péñker chichaman nakitrar ii wakeraj núchik nekaatai tusar, shuar teremak péñker pujuschamnia nekapea áintsan, nankaamas unuimiaru atai tusar, nánkamas unuikiartinián ti untsurj eakartatui. ⁴Nekas shiir chichaman iniaisar ikiuniak ántar áujmatsamun enentáimtusartatui. ⁵Antsu ámeke tuke péñker túratin wakerakum ashí itirchat katsunrata. Uwempratín chicham etserkum takatrum péñker umikta.

⁶Ishichik ajasai winia iwiaakmar Yusaj surumaktin. Mantamnan nayimpiniam wétin jeatimiai. ⁷Shuar kakaram maanainia núnisnak tuke kakaram takasmajai. Tséken péñker tseke áintsanak yawetsuk takasmajai. Tura Yus-Chichaman nekas akasmatkun péñker wáinkiaitjai. ⁸Tuma asamtai tawasap nukajaj najanamu tsékena susamua áintsan wisha péñker túramunam akinkiatatai. Tura aya wíniak akirkashatui. Antsu ashí ni tátinian shiir enentáijjjai nákinia nunasha nekas péñkera nuna akikiartatui.

Tímiutéu túratin akatmamturma

⁹Wárik íiraitin enentáimturata. ¹⁰Témas aya jú nuñkanmayan wakerak ajapa ikiuruk Tisarúnikia péprunam weyi. Tura Kresentisha Karasea nuñkanam weyi. Núnisan Títiusa Tarmasia nuñkanam weyi. ¹¹Túrawarmatai aya Rúkas wijjaj pujawai. Márkus eaka wáinkiam ame itartitia. Jui ti penker yainkiamniaiti. ¹²Tura Tikikiunka Ipisu péprunam akupkamjai. ¹³Tura winiakum nuparam pushí Trúas péprunam Karpu jeen ikiukmiaj nu takurtuktia. Núnisan nuparam papísha tura nekaska penké papí takurtuktia.

¹⁴Arejánruka jirujaj takawa nu ti yajauch awajtsuítii. Túrutaitkiuisha ni túramujaj métek Yus akiktí. ¹⁵Nu amesha péñker wáinkiatá. Ii étsereamun penké nakitiawai.

¹⁶Emka akupniunam ayamprumaktaj tusan chichaakui chikichkisha yáintkiacharmiayi. Antsu sapijmiainiak ikiurkiarmiayi. Yus nu shuaran yajauch enentáimturcharka maak. ¹⁷Tura ii Uuntrj Jesukristu ni kakarmarín surus yaintkiamiayi. Nujaj uwempratín chichaman ashí nuñkanam Israer-shuarcha antukarti tusan etserkamjai. Tura núnisan akupniunmayasha ii Uuntrj uwemtikrurmiayi. ¹⁸Tura núnisan ashí yajauchia nuyá uwemtikrurmatai Nii akupeana nuñ nayaimpiniam jeattajai. Niñki tuke shiir awajnasti. Núnisan atí.

Amikmaamiania nu

¹⁹Piriskancha ni áishri Akirancha amikmainiajai. Núnisnak Unisépuru shuaríncha amik-mainiajai. ²⁰Erastu Kurintiu péprunam juakmai. Tura Trúpimiunka Miritiu péprunam jaan ikiukmiajai. ²¹Michá nantu jeatsain íiraitin enentáimturata. Tura Eupurusha Putentesha Ríniusha Kráutiasha tura ashí Yus-shuarsha amikmaatmainiawai.

²²Ii Uuntrj Jesukristu ámiijjaj tsanin pujustí. Tura Yus ashí péñker waitmakarti. Nuke atí.

Papru TITIUN papi áatramu

Papru Titiun áatramiania nu

¹ Wikia Pápruitjai Yusa takarniurj. Tura Jesukrístu akatramurjntjai. Yus achikma ainia nú shuar niisha antukar Yúsan umirkarat tusan akatramuitjai. Shuar nuna nekaawar pépker wekasartatui. ² Tura nú arant, nú shuarsha tuke iwiaaku pujusarat tusan étserejai. Nú shuarnasha, nunñan najantsuk, “uwemtikrattajai” Yus tímiyai. Tura Niisha wáitruatniun tujintiawai. ³ Tura yamaikia, tsawant jeamtaí, nuna nekaawarat tusa ii Yusrj uwemtikkiartinia nu, winia chichamur ujakarta tusa, winia akatturmiyai.

⁴ Titiu, wi Yusna éterma umikiu asakmin winia uchirua áitkiasnak papin áateajme. Iis, iijjai métek Yus nekas enentáimtatsjik. Yus waitnentrama asa shiir awajtamsati tusan wakerajme. Tura ii Aparj Yussa, ii Uuntrj Jesukristusha, Uwemtikkiartin ana nu, enentáimin imiatkincha awajtamsati, tajai.

⁵ Wats, wi iwiarachmajna nu ame iwiarata tusan Kreta nunñanam ikiukchamkajam. Tura “ashí péprunam Yus-shuar írunmanum, Yus-shuaran wáinkiarat tusam shuar anaikiarta” tíchamkajam.

Yus-shuaran wáinin

⁶ Yus-shuaran wáinin júnis atí. Niisha makuuchmin ti pépker wekasatí. Tura chikichik nuwentin átiniaiti. Tura ni uchirisha Yusna ártiniaiti. Tura shuar yajauch chicharsachmin niisha tutupnisan wekain ártiniaiti. ⁷ Enentáimprata. Yus-shuaran wáinin Yusna ana nuna wáinkiat tusa anaikiamuiti. Tuma asamtai nekas makuuchmin wekasatniuiti. Waantu enentáimtumatsuk, kajetsuk, tura nampechu átiniaiti. Chikichan waitkiau áchatniuiti. Tura anañma kuítrintin ajastaj tusa wakerukchatniuiti. ⁸ Antsu shuar ni jeen írar winiana nuna itiaatniuiti. Tura ashí pépker ana nuna wakerin, esetas enentáimin átiniaiti. Tura ju nunñanmayá akupeamuncha, núnisan Yús akupeamuncha umirkatniuiti. Tura niñki ímiastiniaiti. ⁹ Tura nú arantcha, chikich shuáran pépker jintintrataj tusa tura Yus-Chichaman nakitin áinia nuna nupetkataj tusa, Yúsnumiá nekas chichaman, nii unuimiátramiania nuyá kanakchatniuiti. ¹⁰ Nekaata. Umichu ti irunui. Niisha ántar chichau ásar anañmau ániawai. Israer-shuar weeanam ti irunui nú shuar. ¹¹ Niisha kuftian achiktaj tusa wakeruiniak, yajauch unuiniarchatniua nuna unuiniainiawai. Nuna túruiniak untsurj shuáran, ni írutkamurijjai yajauch enentáimtikiainiawai. Tuma asamtai auka, ni wenę epetkatniuiti, ántar chichainiakui. ¹² Warí, imia Krétanmayá chichaman etserin juna tíchamka: “Krétanmayá aentska tuke wáitrin ániawai. Tura nákitiat ti yurumin ániawai. Yajasma núnisan ániawai.” Nuna tíchamka. ¹³⁻¹⁴ Maa, niisha nékasaj tímiyai. Nu tuma asamtai, Titiu, Israer-shuar ántar tuinia nuna, Yus-shuar anturkachartí tusam, tura nekas chichaman nakitiana nuna akupeamurjñ umirkachartí tusam, antsu Yúsan nekas umirkarat tusam, umichu shuar kakaram chicharkarta.

¹⁵ Enentáimprata. Yus-shuarka, ni enentáí chamir ajasu ana nuka, ashí ni wainnia nuna pépkernek enentáimtai. Tura chikich shuar, Yúsan umirkachu asa, ni enentáí wapik asa, pépker ana nuna enentáimtustinian tujintiawai. Achapai enentáimiuk, pépkercha ana nuna “pépkeraiti” tawai. ¹⁶ Tura niisha “Yus-shuaraitjai” tuñiyatán, Yúsan umirtsuk niisháa túruiniawai. Tuma ásar mujmiáí ániawai niisha. Umichu ásar pépkeran túratniun penké tujintiainiawai.

2

Pépker jintintiatin

¹ Tura amesha, Titiu, pépker chicham etserkata. Yus-Chicham tátsuna nu etserkaip. ² Antsu áishmaj katsunt Yusna ainia nu, ju jintintrata. Nampechu, nánkamas enentáimcha, esetas enentáimin arti. Yus tana nuna umirin tura anenain arti. Ni itiruchatrjñ Yúsan enentáimtusar katsuntin arti. ³ Tura núnismek nuwá katsunt Yusna ainia nusha ju jintintrata. Niisha núnisan Yus-shuarti túramnia nuna pépker túrawartí. Tsanumin tura nampen áchartí. Antsu pépker wekasatniun unuinin arti. ⁴ Niisha yama nuatnakua nuna ni áishrjñ ni uchiríncha nekas aneetniun unuiniarartí. ⁵ Junasha jintintrartí. Esetas enentáimin, pépker wekain ártiniaiti. Ni takatrjñ pépker takastin ániawai. Ni áishrjñ umirin ártiniaiti. Tura waitnentin ártiniaiti. Yus-shuarcha Yus-Chichaman yajauch chichakarajñ tusa túrawartiniiaiti. “Tu jintintrarta” titiá.

⁶ Nuyá, Titíu, natsa áinia nu “nánkamsar enentáimsarum wekasairap” titiá. ⁷⁻⁸ Tura amesha, Titíu, ashí tsawant péñker wekasatá. Nu natsa wi túramun júkiar nunak túrawarmi tusam, nu túrata. Tura anturtamna nu “nekaschapitia” tíin tusam, esetsam enentáimsam, Yus-Chicham tana nu ímiatrusmek jintintiata. Nú túrakmiñkia, Yus-Chichaman nakitiana nu shuar “Titíu nánkamas chichaawai” títiaj tukamá, natsaamak tujintramkattawai.

⁹ Takarin ainia nu, ni takartairin umirkarat tusam jintintrata. “Shiir enentáimsarum, yajauch áimsuk shiir umirkatarum” titiá. ¹⁰ “Kasamkairap, tura anañkawairap. Iis, péñker túrakrumka, takarniuitiatrum, shiir tura asarum ii Uwemtikramin Yusri chichamen shíiraiti, tu enentáimtikrattarme” titiá.

¹¹ Yus in waitnentrana asa ashí áentstin uwemtikramprataj tusa wakerutmaji. ¹² Kame Yus waitnentrana asamtai, tunáa ana nu iniaisatniuitji, nu nékaji. Tura ju nunkanmaya yajauch ana nu wakerukchatniuitji. Tura antsu ju nunkanam pujayatrik esetsar enentáimsar anañma wekatsuk tuke tsawant Yus anear wekasatniuitji. ¹³ Túrar ii Yusri Jesukristu, uwemtikramajnia nu, imiá shiir iwiarnar tatí tusar nákastiniaitji. ¹⁴ Jesukristuka in jaru-tramkamiaji, ii tunaariniá uwemtikrampratajtsa. Tura, Winia ajasar tuke enentáijiaj péñker túrawarat tusa, ii tunaarjin japirtampramiaji.

¹⁵ Titíu, anaikiamu asam arantutsuk nu jintintrata. Yajauch ana nuna túrawarjin tusam chicharkarta. Péñkeran túruinia nu ikiakárta. Tura yajauch chichartukarjin tusam tuke péñker wekasata.

3

Yus-shuarti túratin

¹ Titíu, shuar enentáimtikrarta. “Ashí akupin ainia nusha tura chikich uunt akupena nusha antukrum umirkatarum” titiá. “Péñkeran túratin ana nuna páchitsuk túrattajai” titiniatruma” titiá. ² “Tsanumprairap, kajernaikiarap, antsu shiir enentáimtunaistarum” titiá. Nankaamantu enentáimtumatsuk ashí shuar péñker awajsatarum tusam tu jintintrata. ³ Wari, iisha núnisrik Yus-shuar ajatsuk nánkamsar wekaimji, Yuska umirtsuk. Tura íwianch emetamu pempée wekaimji. Tura ii ayashí wakeramu tuke túriniuyaji. Tunaasha túriniuyaji. Chikich atankittsar wakeriniuyaji. Chikich shuar kajerkar tura nuamtaksha kajernainiuyaji. ⁴ Túrasa Yus in uwemtikiartin ana nu, anenkratín asa, ni anenkrattairin ashí áentsun iniaktus in uwemtikrampramiaji. ⁵ Yus in waitnentrana asa, iikia júkeshá péñker túrachma ajin uwemtikrampramiaji. ¿Itiurak uwemtikrampramiaji? Ii tunaarjin asakátrampramiaji, niijaaktinia áintsan. Tura Yusa Wakanj pujurtamkurin, ii iwiakmarjin yamarman amasmaji. ⁶ Jesukristu jakamujai Yus in emeenturmatsuk ni Wakanjin suramsamaji. ⁷ In anenma asa nuna túramiayi. Nuñkia iisha yamaran awajamsu asar tuke iwiaku átin, ti wakerimiaj nu íiniuiti. ⁸ Nuka ti nekasaiti. Tuma asamtai Yúsán umirkarmia nu, péñker túratniun tuke wakerukarat tusam tuke jintinki wetá. Wi tímiajna nu, péñker asamtai, ashí aents nuna nekaatniun atsumainiawai. ⁹ Shuar netse áujmatainiakui amēja pachisaip. Tura “aya winia úntruk péñker áiniawai” tu chichasaip. Tura Israer-shuara akupkamurj ititurkit tusa shuar ti áujmatainiakui nusha pachisaip. Ántrai tuka. Péñker wekasatniun yayatsui.

¹⁰ Shuar tsanumprur yajauch enentáimtumaimtikiana nu chicharkata. Ántachkuñkia ataksha chicharkata. Tura penké tujinkiamka jiki akupkata. ¹¹ Nujai juna nekaamniaitme: nuna tura asa awajiruiti. Tura ni tunaarjin jakattui.

Papru wakerana nu

¹² Wisha Artemasan akatran akuptukchatjameash. Nin akupeachkunka Tikikiun akuptuktajame. Nii jeamtaí amesha wari winitritia Nekapuris péprunam. Jui Nekapurisnum yumí nantu asamtai seturan pujuttajai. ¹³ Senas, chichaman ti unuimiaru pujana nu, amikiur Apurusjai jeamtaí, nii atsumtsuk shiir weartí tusam, ame túratin jeamna nu yainta. ¹⁴ Íini Yus-shuar ainia nusha péñker túratniun tura atsumainia nunasha yáingtinian nekaawartí. Ántar pujusarjin tusan nuna tajai.

¹⁵ Ashí wijiaj pujuinia nu amikmaatmainiawai. Tura ii amikri Yus-shuar ainia nu amikmaatruata. Atumniasha Yus shiir yainmakat tusan wakerajrume. Nuke atí.

Papru JIRIMÍŪŅKAN papí áatramu

Papru JirimiŭŅkan papin áatramiania nu

¹ Wi Papru jŭ papin áaran akuptajme ámin, JirimiŭŅká. Ii yachi Timiutéusha juna akup-turmawai. Wi Jesukristu takaru asan sepunam pujajai. Ame iijjaj tsaniŭŅkia takáa asakmin jŭ papin akuptajme. ² Núnisanj ame jeemijn Yus-shuar irunainia nunasha tura ii umaj Apiancha tura Arkipiuncha iijjaj ti kakaram takasu asamtai jŭ papin akuptajrume. ³ Yus ii Aparj tura ii Uuntrj Jesukristu shiir enentáimturma ásar yainmakarti imiatkinchanum tuke shiir pujustinian.

JirimiŭŅ pėŅker Yus-shuar ámiayi

⁴⁻⁵ Ame Uunt Jesus shiir enentáimtakum ashí Yus-shuar ainia nusha aneamun antuk-jai. Nuna antukan ámin ti shiir enentáimtakun Yŭsan áujeakun yŭmiŭŅkijai. ⁶ Áujeakun chŭkich shuarsha ámijjaj métek Yŭsan nekas enentáimtuiniak ashí pėŅker ana nuna ti paant nekaawarat tusan seajai. Ashí pėŅker ana nuka Jesukristu shiir awajsamujaj takakji. ⁷ Wisha ame anenkratmajaj ti shiir enentáimtakun waraajai. Yatsurú, ámijjaj ashí Yus-shuarsha shiir enentáimiainiawai.

Papru Unisemun waitnentratniun JirimiŭŅkan seamiani nu

⁸ Nu asamtai kakaram tátsujme. Kame wakeraknaka Kristu akatramu asan “Jŭ túrata” tímíniatjame. ⁹ Antsu aneakun aya júnisan tájame. Wi Papru úuntach asan tura Křstun takarkun sepunam pujakun ¹⁰ Unisemu waitnentrai tusan seajme. Niisha wi ujakmajj Yus-shuar ajasu asa winia uchirua áintsanĳete. Sepunam pujayatan ni aparjya áintsanak ajasjai.

¹¹ Nuikkia Unisemu ántrauyi antsu yamaikia aminiisha winiisha yáimniuiti. ¹² Ataksha awantajme. Wi ti pėŅker aneamu asamtai pėŅker itiaata. ¹³ Wi Yus-Chichaman étserkun sepunam pujajai. Túmakun ame yajá pujakum yáintkiatin tujintiakmin nii antsu wíjjaj pujus yáintkiat tusan wakerimjai. ¹⁴ Túrasha ámin ujatsuk túrachmin enentáimpramjai. Kame ame wakerakum útsukchamujaj “pujusti” tákumniŭŅkia maak. ¹⁵ Júnissha enentáimpramniaiti. Unisemu ishichik tsawant meŭkakamai tura yamaikia waketki ámijjaj tuke pujustatui. ¹⁶ Kame yamaikia emetachma antsu ame aneamu yátsume áinis átatui. Nuka ti pėŅkerchakait. Wisha nin ti aneajai. Tura yainmakmin asamtai tura Křstunam ame yatsum ajasu asamtai winia iniankattsam aneashtapash.

¹⁷ Wisha ti pėŅker amikrumchakaitaj. Tuma asam winia itiaarua nútksam shiir awayáta. ¹⁸ Yajauch awajtamakaitkiuŭŅkia tura ámijjaj tumashitkiuisha wi akiktatjai. ¹⁹ Wi Papru nekas winia uwejrujjaj juna áaran ti nekas akiktatjame tájame. Túrasha winia tumashitmena nuna páchittsujme. Kame wi ujakam Yus-shuar ajaschamkum. ²⁰ Wátsek, yatsurú, amesha Yus-shuar asam wi seajme jŭ túrutata. Křstun enentáimtakum shiir enentáimtikurta.

²¹ Ti pėŅker umíniatme nuna nékakun júnisan áatjame. Tura wi seajmena nuna nanĳaamas túrattamna nuna nékajai. ²² Ayu. Átum Yus áujturkurmin Yus winia tsanĳkatruktatui atumjŭŭŭ iraitniun. Tuma asamtai wi nuj jean pujustin iwiarturata.

Amikmaamiania nu

²³ Épaprassha niisha Jesukřstunu étserek sepunam wíjjaj pujus amikmaatmarme. ²⁴ Núnisanj Márkussa Aristárkusha Témassha tura Rúkassa Yus-Chichaman etserkatniun yáintiainia nusha amikmaatmainiawai.

²⁵ Ii Uuntrj Jesukřstun atumniasha ti shiir yainmakarti.

Nuke atí.

ISRAER-SHUARAN papi akuptukma

Yus ni Uchiríjjaí ni chichamen ujatmakji

¹ Yáunchuka Yúsnan etserniuajaj chichas Yus ni enentáimnian ii úuntrjñ ujakmiayi. Tura untsurí nunñanmasha tura untsurí uwitincha niisháa niisháa chichas ujakmiayi. ² Antsu ju amúamu tsawantajkia ni Uchirí Jesukristujajñ ashí Niiniu ana nuna ujatmakji. Yus Niijjaj ashí írúnna nuna najana asa mash Nin súsaiti. ³ Niyaiti Yúsan imiá métek nakumeana nu. Tura Niyaiti Yus nanñkaamas shiira nuna paant awajeana nu. Niisha aya ni chichamejaj kakarma nujaj ashí írúnna nuna wáiniuk emeta pujurui. Tura ii tunaarjñ nijiatramak akupin pujutainium, Yusa untsuurinjñ, pujusmiayi.

Nayaimpinmayá suntarjaj Kristu nanñkaamantuiti

⁴ Yusa Uchirí nayaimpinmayá suntarjaj imiá nanñkaamantu awajnasuiti. Tura ti nanñkaamantu asamtai Yus nayaimpinmayá suntar nanñkaamas Nin ti shiir awajtai. ⁵ Wátsek, nayaimpinmayá suntaran chikichkinkesha juna tútsuk Kristun tímiayi: “Ame winia Uchiruitme. Túmaitkiui yamáikia winia kakarmarun átakeajme.”

Tura núnisañ tímiayi:

“Wi ni aparí átatjai, tura Nii winia uchir átatui.”

⁶ Tura jú nunñanam ni Iwiajññ akupeak tímiayi:

“Ashí Yusa suntarj tikishmatrarti.”

⁷ Nayaimpinmayá suntarnan júnis chicharui:

“Nayaimpinmayá suntarjñ takartursarat tusa nasea áintsañ awajnsaiti. Ni suntarjñ chárpia áinis akupeawai.”

⁸ Antsu ni Uchiríññun tímiayi:

“Ame, Yusá, tuke akupniuitme. Ame akuptairmesha aya péñkeraiti. ⁹ Péñkera nu ane-naitme, tura yajauchia nu mujññiuitme. Tuma asamtai ashí shuar shiir warartamu asamtai Yus, ame Yúsrum, ashí akupniujaj nanñkaamas uunt awajntamsaiti.”

¹⁰ Nu arantcha tawai:

“Uuntá, yámankamtaik Ame ju nunñka najanamiamme. Túram ame uwejmijjajñ nayaimpisha najanaitme. ¹¹ Nusha mai amuukarmataisha Ame tuke pujuttame. Tarachjajñ métek mamurartatui. ¹² Tura ipijram ikiustatme. Pushiya áintsam yapajjattame. Túrasha Ámeka núnismek átatme. Játsuk tuke pujuttame.”

¹³ Ataksha tímiayi:

“Akupin pujutainium, winia untsuurujñ, pujusam nákarsatá. Ame nemasrumin nupetkan Ámin umirtamkarti tusan amastatjai.”

Núnisañ nayaimpinmayá suntaran penké tíchamiayi. ¹⁴ Antsu Yusa suntarj wakan áiniak ashí shuar uwemprartatna nuna yáññkiarat tusar Yus akupkamu áiniawai.

2

Anearta. Uwempratin Chicham nakitrashtiniaiti.

¹ Nuikia Kristu ti uunt asamtai ashí Niiniu antukajnia nujaj kanakchatin ti enentáimtustiniaitji. ² Yaunchu nayaimpinmayá suntar Muisaisan súsarmia nú akupkamu nekas uminkiatniuyayi. Shuar umitsuk tunaan túramtai ti kakaram asutniáwarmiayi. ³ Antsu ii Uuntrj Krístuka Uwempratin Chichaman emka itiamiayi. Tura imiá nekas tuíniak Nin anturkaru in ujatmakarmaji. Tuma asamtai Uwempratin Chicham nakitiakrikia nuna nanñkaamas uwemtsuk asutniáttaji. ⁴ Kame nu arantcha, Uwempratin Chicham ujatmainiakrin imiá nekas tuíniawai tusa aents túrachminian kakarman Yus iniakmasmiayi. Núnisañ ni Shiir Wakanj ni wakerana núnisañ niisháa niisháa kakarmajajñ takamtikeawai. Nujaj Yus-Chichama nu paant nekanamniaiti.

Jesukristu aents ajasmiania nu

⁵ Ayu. Nuik áujmatkur “jú nunñka amuukattawai” taji. Tura yamaram nunñanam nayaimpinmayá suntar akupkachartatui. ⁶ Antsu ii akupkattajnia nu, Yus-Papinium áarmaiti:

“¿Shuarti warimpiaitaj ame imiá enentáimtitniusha? Kame, ¿shuar warí asamtai pujursataj tamea? ⁷ Ishichik sawant nayaimpinmayá suntarjajñ péejchach awajnsamiamme. Túram ti shiir nanñkaamas uunt awajnsattame. Ame najanamun ashí akupkati tusam tsañkatkattame. ⁸ Ashí nin umirkarti tusam susattame.” Tu áarmaiti.

Yus “ashí nin umirkarti” takui nin umirkashtinkia atsawai. Túrasha yamaikia ashí umirainiaka wáintsuji. ⁹ Tura wáinjinia nu Krístuuti. Niisha aents ajas ishichik tsawant nayaimpinmaya suntarjai péjchach ajasmiayi. Yus ni shuarin ti aneak jarukarti tusa wakerimiayi. Tura ni wáitias jakamujaj yamaikia ti shiir nankaamas Uunt awajsamuiti.

¹⁰ Ashí írúnna nu Yus najanamu ásar ni wakeramun umiktin ainiawai. Tura ashí ni uchirjsha ni shímarin pachiinkiarat tusa wakerawai. Tuma asa Yuska Jesukrístun, nu shuaran Uwemtiknia nuna, ni waitsmujaj nekas Uwemtikkiartin awajsamiai. ¹¹ Yusna atí tusa shiir awajsamuncha tura Krístu nin shiir awajea nunasha Yuska mai metek ni Aparinti. Nu asantai Yusa Uchirj nu shuaran “yatsur” titinian natsantatsui. ¹² Yus-Papinium núnisañ tawai:

“Ame náarmin winia yatsurun ujakartatjai. Ashí iruntramunam kantampruattajme.”

¹³ Ataksha ni shuarijaj métek enentáimtamun tawai:

“Yúsán ti shiir enentáimtustatjai.”

Tura ataksha:

“Yus surusmia nú uchirjai Yúsán umirkun pujajai” tawai.

¹⁴ Tura nu uchi aents áarmatai núnisañ Jessusha aents ajasmiayi. Tura aents ajas jaka, iwianchin, jatai nérenniurin, ashí emesramiayi. ¹⁵ Tura ti untsurj shuaran uwemtikrarmiayi. Nu shuar yaunchu jákatniun ashamainiak tuke wáitin ármiai. Antsu ni jakamujaj yamá ankant áiniawai. ¹⁶ Maa, imiá nekasaiti, nayaimpinmaya suntaran yáintaj tusa táchamiayi. Antsu ashí Apraám weean, ashí Yus-shuar ainia nuna yáintajtsa támiayi. ¹⁷ Túratin asa penké métek ni yachía áinis ajasmiayi. Nujaj in tuke waitntrampramniaitji. Tuma asa Yúsán pujurniu uuntrj ajas Yúsán tuke penker chichartamsamniaitji. Núnisañ murikiun maa Yus súsatniua áintsañ ni jakamujaj ashí shuara tunaarin tsankurniuiti. ¹⁸ Tura imia niniki waitsa asa tura íwianch nekapsamu asa yamaikia iisha wáitiakrincha tura íwianch nekaprakurnisha yainmakminiaitji.

3

Jesus Muisaisjaisha nankaamantuiti

¹ Tuma asantai, penker yatsuru, atumniasha Niiniu atí tusa Yus achirmakuitrume. Tuma asarum Krístu Jesus penker enentáimtustarum. Niisha Yus nekas Akatramuyayi. Tura ashí Yus-shuar ajaruwa nujaj Yúsán pujurniu uuntrja núnisaiti. ² Nu atí tusa Yus anaikiamiayi. Túramtai Krístu nuna ti penker takasuiti. Núnisañ Muisais ashí Yusa aentsrin, Israer-shuar armia nuna ti shiir wainkiamiayi. ³ Túrasha Muisaisjai nankaamas Krístu ti shiir awajnasuiti. Jeajaj nankaamas jea jeamniuka nekas penkerchakait. Núnisañ Krístu Muisaisjai nankaamas penkeraiti. ⁴ Kame ashí jean shuar jeamtuk. Tura Yus ashí írúnna nuna najanaiti. ⁵ Wats. Muisais Israer-shuaran wáiniuk Yusa Jeen takastinia áintsañ penker takarniuyayi. Tura ni takaak ukunam Yus titiatna nuna etserkatniuyayi. ⁶ Túrasha Krístu Yusa Jeen takarniuchu asa antsu Yusa Uchirj asa nuí ashí akupeawai. Nu jeasha iitji. Tura tuke iniaitsuk kakaram ajaras Yus suramsattaj nu wararsar nákastiniaitji.

Yusa shuari shiir pujustin

⁷ Nu asantai, Yusa Shiir Wakanj Yus-Papinium tawai:

“Yamaikia, Yus tana nu ántakrumka ⁸ nakittsuk shiir anturkatarum. Israer-shuar yaunchu aents atsamunam wekainiak Yus taman nakitrar Yúsán nekapsar akajkarmiayi. ⁹ Túramtai Yus tímiayi “Nuí atumí uuntrj nekaprusar akajtkarmiayi. Kuarenta (40) uwitin wi kakaram túramun ísarsha nakitrurarmiayi. ¹⁰ Tuma áarmatai nu shuaran kajerkan tiarmajai “Nu shuar ni enentáin tuke awajiniawai. Tura Wi taman umirkatniun nakitiainiawai” tímiyajai. ¹¹ Tura kajerkan nekas tákun “Wijijaj shiir pujustinian penké tsankatkachartatjai” tímiyajai” tímiayi Yús.”

Tu áarmaiti.

¹² Anearta, yatsuru. Yajauch enentáimsarum tuke iwiaaku Yus enentáimtutsuk kanakirap. ¹³ Kame kashinkia tunaajaj ananmam enentáimin Yúsna nakitrashtapash. Tuma asantai yamaik tura ashí tsawant ikiakánairatarum. ¹⁴ Yámankamtaik Krístu shiir enentáimtusmaj núnisrik tuke iniaitsuk émeteakrikia Krístujaj shiir tsaninkiar pujustatji. ¹⁵ Nu asantai Yus-Papí tawai:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap.”

¹⁶ Muisais Ejiptu nunkanmaya jikmia nú shuar Yusa chichamen anturkariat nakitrarmiayi. ¹⁷ Tura umiiniachkui kuarenta uwi kajerkarmiayi. Tunaan túrawaru ásar untsurj shuar aents atsamunam kajinkarmiayi. ¹⁸ Kame umirkacharunka Yus “Wijijaj shiir pujustinian penké tsankatkachartatjai” tímiayi. ¹⁹ Iis, Yúsán enentáimtachu ásar Niijaj shiir pujustinnium wayatniun tujinkarmiayi.

4

¹ Nu asamtai, ii wayatin tsankatkamu áyatar Yusjaj shiir pujustinnium páchitkiachu aij tusar aneartiniaitji. ² Yaunchu nu shuaran ujakarmia núnisañ incha Uwempratin Chichaman ujatmakuitji. Nu shuar Yúsán enentáimtutsuk antukaru ásar matai nu chicham yáincharmiayi. ³ Antsu iikia ni chichame enentáimta asar Yusjaj shiir pujustinnium nekas wayaji. Tura chikichan Yus tímiayi:

“Nu asamtai kajerkan nekas takun “Wijjaj shiir pujustinian penké tsankatkachartatjai” tímiyai” tímiayi. Kame Yus jú nunñkan najana umik nuyá shiir pujus ayampramiayi.

⁴ Yus-Chichamnum ayampramun júnis tawai.

“Yus sais tsawant takamas nuyá tsawantaj ayampramiayi.”

⁵ Tura ataksha tawai:

“Wijjaj shiir pujustinnium wayá ayamprashtatui.”

⁶ Shuar nuñ wayawar ayampratin tuke awai. Tura emka Uwempratin Chichaman antukarmia nuka umichu ásar wayacharmiayi. ⁷ Nu asamtai ataksha Yus wayatin tsawantan áagturmaiditji. Nusha yamá tsawantaiti. Wats, Israer-shuar ni nunñké Yus susamunam wayáwarmiayi. Tura nuna ukunam Uunt Tawit timiajaj Yus ni chichamen ujatmajj:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap” tímiayi.

⁸ Kame ni kapitíántrj Jusué Israer-shuaran ni nunñken awayá ayamtikraitkiuinñkia Yus ukunam ataksha tsawantan áagturmachajj. ⁹ Nujaj páantaiti, ashí Yus-shuar Yusjaj shiir pujusar ayampratin tuke awai. ¹⁰ Yusjaj ayampra nu, ni kakarmarjijaj takastinian ayampraiti Yus ni takatrjijaj ayampramia núnisañ. ¹¹ Nu asamtai iisha Yusjaj shiir pujustinnium pachiinkia chajj tusar Yus shiir enentáimtusar kakaram ajastiniaitji. Israer-shuar yaunchu Yus taman nakitrarua núnis ajaschatniuitji.

¹² Yusa chichame iwiaaku chichamaiti, imiá kakarmaiti. Puniá mai érea núniniait. Tuma asa shuara enentáim inít wayá ashí ni enentáimmián tura wakeramurjñ ti paant awajatawai.

¹³ Yus najanamuka penké Nin umprukchamniait. Ashí írúnna nu Yus fimmianum misúa áintsañ paant ániawai. Tura ii túramu ashí paant ujakartatji.

Jesus nekas Yúsán pujurniu úuntrñti

¹⁴ Jesus Yusa Uchirj nekas Yúsán pujurniu uuntrj ajas Yusaj wayá iiniun chichartamji. Nu asamtai iniaitsuk tuke nekas enentáimtustiniaitji. ¹⁵ Niisha iijjaj métek ashí tunaanum nekapsamuít. Túrasha tunaan túrachmiayi. Tuma asa ii tujintiaj nuna paant nékak ii iturchatrñ waitnentramniuitji. Tura Yúsán pujurniu uuntrj asamtai ¹⁶ Yús-akuptainium shiir enentáijjaj sapijmiatsuk jeamniaitji. Tura Yus in anenma asa waitnentramak iturchat pujajnia nuñ yainmaktatji.

5

¹ Tura Yúsán pujurniu úuntrñkia shuar anaikiamuiti tura ni takatrj jímiaraiti. Yusaj shuáran chicharsatniuiti. Nuyasha Yus suñiamun súsatniuiti tura núnisañ namanñen maa Yúsán súsatniuiti shuara tunaarñ asakátratniun. ² Tura Yúsán pujurniu uuntrj niisha shuar asa ni tujintiamun nékak shuar nékachuncha tura waak yujainia nunasha waitnentramniait. ³ Tura niisha tujintia asa ni tunaarñincha chikichnajañ métek tsankurnarat namanñen maa Yúsán súsatniuiti.

⁴ Shuar ni enentáijjainñkia Yúsán pujurniu uuntrj ajaschamniait. Antsu Yus nu shuaran anaikiatniuiti. Núnisañ Arunñkan anaikiamiai. ⁵ Núniskete Krístujaj. Niisha ni enentáijjaj Yúsán pujurniu uuntrj ajaschamiayi. Antsu Yus Nin anaik nujaj shiir awajsamiayi. Tura tímiayi:

“Ame winia Uchiruitme. Túmaitkui yamaikia winia kakarmarun átakejajme.”

⁶ Tura ataksha Yus-Papinium júnis tawai:

“Mirkisetéka Yúsán pujurin amia núnismek Amesha tuke Yúsán pujurin átatme.”

⁷ Krístu jú nunñkanam pujak kakantar úutuk Yúsán ti seamiayi. Nin jákatniunmaja uwemtikramnia asamtai seamiayi. Tura Yusa wakeramurjñ tuke enentáijjaj enentáimtakui Yus anturak ti yáinñmiayi. ⁸ Nujaj Krístu Yusa Uchirñtiat ni waítsatniujaj umirkatniun unuimiarmiayi. ⁹ Nujaj ti nekas Uwentikin ajasmiayi. Tura shuar umirainia nuna tuke uwem ataksha Yus-Papinium júnis tawai:

“Mirkisetéka Yúsántrkrarmiñiait. ¹⁰ Túramtai Yus Nin Yúsán pujurniu uuntrj Mirkisetékaj métek awajsamiayi.

Anearta. Yusjaj kanakchatniuiti.

¹¹ Jú ti nukap áujmatsatin awai. Túrasha ántichu asakrumin mashi ujakchamniaitjarme.

¹² Átumka yaunchu mash nekaamaintrume. Túmaitiatrum ataksha yaitiás Yúsán jintin-truat tusarum atsumarme. Warí, kuirchia núniniaitrum. Kátsuram yútsuk muntsu

muntsúatniuitrume. ¹³ Kuírchikia Uwempratin Chichaman áujenak péñker unuimiainiatsui. Tíñkiamnuniá ásar tujintiainiawai. ¹⁴ Apatuk kátсурman aya uunt yuámniaiti. Uunt ainia nuka péñkernasha tura yajauchincha apatkar paant nékainiawai.

6

¹ Uunt ajastai. Krístunu ana nuyá aya yúpichuchia nuke enentáimtutuk nu arantcha unuimiartai. Kame emka unuimiartinia nu ju ániawai: shuar ní tunaarjín jákatniunam júana nuna kúntuts enentáimtur Yúsan shiir enentáimtustincha, ² imiantinnium nekaatniuswai:

“Mirkisetéka Yúsnanha, Yus-shuar yainmanum uweje awantsatniusha, jakamunmayá nantaktincha, tura sumantikiatin tsawanta nu nekaatniusha. ³ Tura Yus yáinmakrin nuna nankaamas nekaattaji.

⁴ Shuar Yusna nuna nekaan̄ka tura Yus susamun takakkun̄ka tura Yusa Shiir Wakan̄j kakarmarj̄ nekapsaitkiun̄ka ⁵ tura Yusa chichameñcha péñkeraiti nekaan̄ka tura Yusa kakarmarj̄ ukunam nun̄ka yamarmanum takastatna nuna yamáí nekaapeakka, ⁶ nu shuar nuna nakitiak kanakniaka atak ní tunaarjín enentáimtak ikiuktinian wakerachuk tujinkiat-tawai. Warí, ní enentáij̄jaj̄ Yusa Uchirjín krúsnum máiniaiti túrak ashí íimiaiñiaj̄ natsanmain awajeawai. ⁷ Nu shuar yajauch nun̄ka áintsañ ániawai. Yumi yútakai péñker nun̄ka arakan péñker tsapatmakka arakmaun yayawai. Túramtai Yus shiir enentáimui. ⁸ Antsu jan̄kí nupan tsapatmakka nu nun̄ka yajauchiiti. Yus áseak emesrattawai.

Yus tsan̄katramkattajnia nu enentáimtakur kakaram ajaji

⁹ Aneamu yatsurú, tu chicharkursha, nú shuarchaitrum nu nékaji. Antsu uwempra asarum nú péñker túrattarme. ¹⁰ Yus ti péñker asa átum takasmancha tura ni aneakrum Yus-shuar yainmancha kajinmatkishtatui. Tura yamaisha tuke túrarme. ¹¹ Tura nuik túrarmena núnisrumek tuke iniaitsuk kakaram takasrum ashí Yus tsan̄katramkatta nu wáinkiatarme. Núnisan̄ atí tusar wakeraji. ¹² Nakimtsuk kakaram ajastarum. Niiniua nuna Yus ní shuarjín susattawai. Tura shuar Yúsan enentáimtak shiir enentáij̄jaj̄ nákkaka nuna wainkiattawai. Tu takastarum tusar wakeraji.

¹³⁻¹⁴ Yus yaunchu Apraámj̄jaj̄ chichaak “Ti nekas shiir awajsattajme tura ti nukap pamptikrattajme” tímiayi. Nuna taku imiá nekas tajai tusa tura chíkich Niij̄jaj̄ nankaamas uunt atsakuí imia Niñki pachiiimas tumammiayi. ¹⁵ Tutai Apraám yáitmataik nákas Yus timia nuna wáinkiamiayi. ¹⁶ Shuar “nekas tajai Yus írui” tákun̄ka chíkich niij̄jaj̄ nankaamas úntan páchiawai. Tura tu chichasmatain̄kia nuyán̄ka imiá nekas tana nu nekaamniaiti. ¹⁷ Tuma asantai Yuska “ti nekas yan̄páj̄tsuk túrattajai” tusa imia Niñki pachiiimas tumammiayi. Nuj̄aj̄ ní tsan̄katkamun júkiartatna nu shuar Yus ti nekas umíktatna nuna nékainiawai. ¹⁸ Yus pen̄ké wáitruachmin asa áyatik ní tamaj̄jaj̄ nekasaiti. Nuna arant nuikia imia Niñki pachiiimas ti ikiakátmaji in. Nuj̄aj̄ iisha uwempratai tusar Niini weamkatikia tsan̄katramkattajnia nu ti shiir enentáimsar wáinkiatin nákaji. ¹⁹ Nu enentáimsar kakaram ajaji. Yusaiya in umuchtiamkamnia pen̄ké atsawai. Yusaj̄ áchitkia asakrin ti kakaram emettamji. ²⁰ Jesussha emka Yusaj̄ wayá mash iwiarturmaji. Tura Mirkiseték amia núnisan̄ Niisha yamáí tuke amuukashtinian Yúsnan pujurniu uuntr̄j̄ ajasuiti.

7

Mirkiseték amia núnisan̄ Jesussha Yúsnan pujurniu uuntr̄j̄ ajasuiti

¹ Nu Mirkisetéksha Sarem nunkanam akupniuyayi. Tura ashí nan̄kamas kakaram Yúsnan pujurniuyayi. Apraám chíkich akupniun mesetj̄jaj̄ awakak támatai Mirkiseték j̄iintiuki in̄kiun̄ ti shiir awájsámiayi. ² Túramtai Apraám nupetmakar kuit jukimiun tias (10) akantuk susamiayi. Mirkisetéka naarj̄ tana júka “ti pen̄ker uunt akupin” tawai. Tura Saremka “ti shiir imiatkincha” tawai. Tura Mirkiseték Sarema akupniur̄j̄ asa “ti shiir imiatkinchanum akupín” tawai. ³ Nukurj̄sha aparj̄sha Yus-Chichamnum atsawai. Núnisan̄ ní uuntr̄j̄sha atsawai. Ni akiiniamur̄incha ní jakamur̄incha ujaatsui. Tuma asantai Yusa Uchirj̄a áintsañ tuke iniañnakchatniun Yúsnan pujurniu uuntr̄j̄ ajasuiti.

⁴ Mirkiseték tímiá uuntauya nu enentáimprata. Íi uuntr̄j̄ Apraámsha nupetmakar kuit jukimiun tias akantuk susamiayi. ⁵ Tuma asantai Apraám nan̄kaamas úntaiti. Muisais akupkamuj̄aj̄ Riwi weeáka Yúsnan pujurin ániawai. Niisha ashí Israer-shuarj̄jaj̄ métek Apraám weeá ániawai. Túmaitiat pen̄ké Israer-shuar ní warir̄in tias akantuk Riwi shuaran suu ármiayi. Muisais tu akupkamiayi. ⁶ Túrashá Mirkiseték Riwi weeachunak Apraám tiásan akantuk nin susamiayi. Apraám Yus shiira nuna tsan̄katkamuitiat Mirkisetékan niij̄jaj̄ uunt asantai susamiayi. Túram Mirkiseték Apraáman shiir awajsamiayi. ⁷ Imiá nekas Mirkiseték Apraáma nan̄kaamas páantin asa Apraáman shiir awajsamiayi. ⁸ Israer-shuarti tias akankamun súajnia nú shuar aya aents ásar tuke pujuschamin ániawai. Antsu

Mirkiseték jakamun Yus-Chicham penké ujaatsui. ⁹ Yamái Riwi weeá shuar kuit akakamun achiktin ániawai. Túrasha Apraám Mirkisetékan súakui Riwi weeá nujaj susa ániawai. ¹⁰ Apraám weeá ániak ni ayashúa áinis enentáimtusmin ániawai.

¹¹ Muisais akupkamunam Riwi-shuarnumiá aya Aruñ weeá shuar Yúsnan pujurin ármiai. Niisha Muisais akupkamu timia nujaj métek penké shuarjaj takasarmiai. Tura Riwi-shuarnumiá Yúsnan pujurniu takatríjjaj tunáa nekas asakárminiaitkiuñkia Yúsnan pujurin yamarmak, Aruñ weeachu, anaikiashtin ainti. Túrasha Yus Jesusan, Mirkiseték amia áinis, Yúsnan pujurniun anaikiaiiti. Nusha Aruñ weeachuiti. ¹² Tura Yúsnan pujurin yapajniámtai Muisais akupkamusha yapajniátniuiti. ¹³⁻¹⁴ Nu arantcha, ii Uuntrí Jesukrístu Riwi-shuarcha antsu Jutá-shuarauyayi. Tura Muisais akupkamujaj Jutá-shuarnumiá Yúsnan pujurin atsutniuiti. Antsu nuna takatrín penké túrashtiniuyi. Tuma asamtai nújajsha Muisais akupkamu yapajniátniuiti.

¹⁵ Nú páantcha awajsamniiaiti. Wats, Yúsnan pujurin yamarna nuka Mirkisetékaj méteketé. ¹⁶ Niñkia Riwi shuar asa Yúsnan pujurin ajaschamiayi, antsu jákashtin asa nu kakarmajaj Yúsnan pujurin ajasmiai. ¹⁷ Tuma asamtai juna Yus Jesusan áujmatui: “Mirkisetéka Yúsnan pujurin amia núnismek Amesha iniañnatsuk Yúsnan tuke pujurin átatme.”

¹⁸ Nujaj yaunchu akupkamu péñkercha ajasmatai japirmaiti. ¹⁹ Muisais akupkamuka shuáran péñker awajschminiuyayi. Antsu Yus in ti shiir awajtamsattajnia nu nákjaj. Nujaj Yusaj ti shiir jeeáitji.

²⁰ Nunasha Yus “nekas tajaj” tusa Niñki pachiimias tumammiai. ²¹ Riwi-shuarnumiá Yúsnan pujurin Yusa naarí pachtisuk anaikiamu ármiai. Antsu jú Yúsnan pujurniunka Yus imia Niñki pachiimias anaikiamiai. Tura Nin júnis tímiayi:

“Uuntka imia Niñki pachiimias tiniu asa penké yapajáshtatui. Niisha “Mirkisetéka Yúsnan pujurin amia núnismek Amesha tuke Yúsnan pujurin átatme” tímiayi.”

²² Tuma asamtai Jesuska nekas uwentikrattajaj tusa yaunchu amia nujaj nankaamas péñker Chichaman iwiarturui. ²³ Yaunchu Yúsnan pujurin untsurí ármiai. Chikich jakamtai chikich tuke takaarmiai. ²⁴ Antsu Jesus tuke jákashtin asa chikichan ikiurkishtatui.

²⁵ Tuma asa tuke iwiaaku pujak ni shuarín tuke Yúsnan áujtusminiiaiti. Tuma asa shuar Nin enentáimtusar Yusaj weankarun tuke uwentikramniiaiti.

²⁶ Tuma asa Jesu Yúsnan péñker pujurin asa ii atsumajnia núkete niisha. Niisha ti shiir asa penké tunaarinchaiti. Ashí tunaariniunmayá kanakniuiti. Tura Yusjaj métek Uunt ajasuiti. ²⁷ Niisha yaunchu Yúsnan pujurniu uuntrí armia núnikchaiti. Yaunchua nuka murikiun máawar ashí tsawant Yúsnan suu ármiai. Nujaj emka ni tunaarín nuyá ashí shuara tunaarín asakáatin ármiai. Tura Jesuska jákatniunam chikichí surumak ashí shuara tunaarín asakátramiayi. ²⁸ Muisais akupkamuka penké shuarnak tuke péñkercha ajñ Yúsnan pujurniu úuntrín anaikiaiiti. Tura nu ukunmañka Yus, nekas niñki pachiimias, ni Uchirín, tuke péñkera nuna, Yúsnan pujurniu úuntrín anaikiaiiti.

8

Nankaamas péñker Chichaman Jesus takartamji

¹ Nekas juna tájame: Yúsnan pujurniu uuntrí Jesus in ti shiir yainma asa akupin pujutainium Yusa untsuurinjí nayaimpiniam pujusuiti. ² Nekas Yusa Jee nayaimpinma nu aents najanachma antsu Yus najanamuiti. Nu Jesús Yúsnan pujurui. ³ Ashí Yúsnan pujurniu uuntrí ainia nu, shuar Yúsnan susamuncha tura naman maar Yus sútaincha Yúsnan ashí súsatin ániawai. Núnisan Jesukrístusha Yúsnan súsatniuiti. ⁴ Juyá Yúsnan pujurin Muisais timia nuna Yúsnan yamaisha susamin akui Jesús ju nunkanam pujakka Yúsnan pujurin áchainti. Antsu nayaimpiniam takaawai. ⁵ Yus yaunchu Muisaisan nayaimpiniam írúnna nuna iniaktus tímiayi “Ame wáinkiamna nujaj métek ashí najanata.” Túramu asamtai ashí yaunchu Yúsnan pujurin Muisais najanamujaj takainia nu aya nayaimpiniam ana nuna nakumkamujaj takainiawai. ⁶ Antsu Jesús ti nekasa nujaj nayaimpiniam takaawai. Muisais akupkamuka shuáran péñker awajschminiiaiti. Antsu Yus in ti péñker awajtamsattajjaj. Kame Yamaram Chichamun Yus ashí túrutmattajnia nu Muisais akupkamunam ana nuna nankaamas ti péñker ániawai. Tuma asamtai nankaamas péñker Chichaman Jesus takartamji.

⁷ Kame Emka Chicham, Yus Muisaisjaj yaunchu najanamia nu, nekas péñkeraitkiuñkia Yamaram Chichaman najanachaayi. ⁸ Antsu péñkercha áiniakui Israer-shuaran tímiayi:

“Uunt Yus tawai: “Tsawant jeamtai ashí Israer-shuarjaj Yamaram Chichaman najanattajaj. ⁹ Yaunchu jú shuara uuntrín Ejiptunmayá yaruakmijaj nuj Emka Chichaman najanamjai. Tura Yamaram Chichaman najanattaj nu núnischa átatui. Emka nuna uminiachkui ajapan iniaisarmajaj.” Núnis tawai Uunt Yus. ¹⁰ Tura nu arantcha tawai: “Tsawant jeamtai Israer-shuarjaj Yamaram Chichaman najanattaj nuka

júnis átatui. Wi akupeajna nuna enentáin paant enentáimtikrartatjai. Nuyá ni Yusrj ártatjai tura niisha Wíi shuar ártatui. ¹¹ Nujsha Yúsan nekaat tusa jintinnaiy-achartatui. Kame ni ajsha ni yachisha kame ashí shuar, uchisha uuntcha, ashí nekarawartatui. ¹² Tura ashí ni tunaaríncha tsan̄kuraran ni yajauchirín atak pen̄ké enentáimtuschartatjai” túmiayi.” Tu áarmaiti.

¹³ Wats, Emka Chicham yajauch ajakui Yus Yamaram Chichaman nájaneak pujuru. Tura yajauch ajasua nuka wárik ajapnattawai.

9

Yusa Jee nayaimpinmasha tura ju nun̄kanmasha

¹ Ayu. Yus shiir awajsatniuka Emka Chicham timia nujaj métek túratniuyayi. Tura ju nun̄kanmaya Yusa Jee weriar Yús shiir awajsatniuyayi. ² Nu Jeeasha júnis tesakmauyayi. Nékatka Shiir Tesaamu tutainti. Nūj asuitin ekeemakar tsáapin awajtaisha tura misasha Yus iniaktusma tantajaj pujuyayi. ³ Nuyá-tesaamuka Imiá Shiir Tesaamu tutainti. ⁴ Nūj kūnkuin ekeemataisha kurijajai kuerma tura Chicham Aarma Chumpitiaisha pujuyayi. Nusha ashí kurijajai kuérmauyayi. Tura inít kurijajaj najanamu ichin̄kian maná yurumak en̄kemniuyayi. Nuyá Yúsnan pujurniu uuntri Arun̄ka ushukrutairi yaunchu tsapaak jan̄kukmia nusha en̄kemniuyayi. Nuyá Yus najanamu Chicham Muisais kayanam aarmasha en̄kemniuyayi. ⁵ Nuna úkurin Kirupín, nayaimpinmaya suntara nu, kurijajaj nakumkamu wajarmiayi. Nusha Yusa shiirmarín nakumarmiayi. Tura ni nanapéjaj shuara tunaarín ayamprutain nukúakuyayi. Nuna arantka yamá etserkatin atsumatsji.

⁶ Núnis aa asantai Shiir Tesaamunam ashí Yúsnan pujurin tuke wáiniak Yúsnan takasarmiayi. ⁷ Tura Imiá Shiir Tesaamunman̄ka aya ni uuntriin wáiniayayi. Tura niisha ashí uwitin aya chikichik tsawant wayamiayi. Wayak ni tunaarínsha tura ashí shuara tunaarj tsan̄kurnarat tusa Yus súsatniu naman̄ké numpen juu ámiayi. ⁸ Yusa Wakanj núnis atí tusa nuna mash iwiarmiayi. Tura asa juna paant awajturmaj. Jú nun̄kanmaya Yusa Jee pujakui tura aya niui Yus shiir awajsamniaitkiuin̄kia nekas Imiá Shiira nūj Yus pujamunam wayatin tuke itirchat ainti. ⁹ Nusha yamá pjuuiniaj nuna enentáimtikrampratniuitji. Shuar Yus shiir enentáimtikratniun naman̄ken maa súniaksha nu shuar ni tunaarjijaj tuke itit enentáimtumainiawai. ¹⁰ Warí, aya yurumátniusha umartincha nijlartincha tura ashí núnisan túratniujaj aya pátatek asantai enentáiniam ana nuna iwarachmin áiniawai. Antsu Yus nú túratniunka yapajjátniuyayi. Tuma asantai yapajjátsajin túratin áiniawai.

¹¹ Tura yamaikía Kristu táwiti tura Yúsnan pujurniu uuntri ajas Yamaram Chichamnum Yus ti pen̄keran túrutman̄nia nuna pujurturmaj. Niisha ti shiir Yus Jee aents najanachmanum takaawai. Nu Jee ju nun̄kanmayanchu. ¹² Tura Kristu Imiá Shiir Tesaamunam naman̄ke numpéjaj wayachu. Antsu ni numpéjain̄k wayaiti. Tura aya chikichí wayá ii tunaarín asakturmar tuke uwentikrampramijai. ¹³ Nekas naman̄ké numpesha tura áisamu yun̄kunmirisha tunáa shuarnum pátatek ukatkamun aya pátatek shiir awajsamniuyi. ¹⁴ Túrasha Kristu numpé ii tunaarín pen̄ké asakáruiti. Túramtai yamaikía tunáa jákatniunam júana nujaj itit enentáimtumatsuk nekas iwaaku Yus shiir umirkamniaitji. Kristu pen̄ké tunaaríncha asa tuke jákashtin Wakanj kakarmarjijaj jákatniunam Yusaj surumakmiayi.

¹⁵ Nu asantai Jesukristu Yamaram Chichaman shiir takarniuiti. Yaunchu Chichamjaj tunáa nekas tsan̄kurachma asantai Kristu jaka nu tunaan̄cha tsan̄kurarmiayi. Nujaj ashí Yus-shuarti Yus achikma asar Yus tsan̄katramajnia nu wáinkiar tuke wararsattaj. ¹⁶⁻¹⁷ Shuar ni kūtrin akantrattak chichaman najanatniuiti. Tura jáatsajin nu kuit akantrash-tiniaiti. Aya ni jakamtai nu chicham najanamun uminkiatniuiti. ¹⁸ Nu asantai Emka Chicham Muisaisjaj najanamusha maamu numpé ukatramujaj akupkamuyayi. Nujajsha naman̄ máatniuyayi. ¹⁹ Muisais nu akupkamun ashí shuáran ujakarmiayi. Nuyá ure kapaakujaj tura nupajajisha naman̄ké numpé entsajaj pachimpramujaj ayak akupkamu papincha ashí shuarnasha ukatarmiayi. ²⁰ Tura tiarmiayi “Ju numpajaj “Chicham Yus akupturmarmena nu nekas umikiniaiti” tawai.” ²¹ Nuyá nu numpajaj Yusa Jeecha ashí nūj takastin irun̄mia nunasha ukatarmiayi. ²² Nu akupkamujaj pen̄ké ishichik numpajain̄chu shiir awajsamniaiti. Túrasha numpajain̄chu tunáa pen̄ké asakárchamniaiti.

Kristu jakamujaj tunáa asakármianiiti

²³ Tuma asantai Muisais najanamun nayaimpiniam ana nuna aya nakumkamu ásar naman̄ké numpéjaj shiir awajsamun ármiai. Antsu nayaimpiniam nekas irunna nu, nan̄kaamas kakaram numpajaj shiir awajsatin áiniawai. ²⁴ Kristuka yaunchu Yusa Jee aents najanamunam takastaj tusa wayachmiayi. Nuka nayaimpinmayan aya nakumkamuiti. Antsu nekas nayaimpiniam Yus pujamunam wayá asa in ájurturmaj. ²⁵ Yaunchu Yúsnan pujurniu uuntri ni numpéjain̄chu ashí uwitin Imiá Shiir Tesaamunam wajin ármiai. Tura Kristuka untsurj wayachu. ²⁶ Kame untsurj wayatniuitkiuin̄kia ni numpéjain̄k

wayá asa yámankamtaiknumiá untsurj jákaayi. Antsu yamaikia ju nunka amúamunam Kristu chikichkí jákatniunam surumak tunaan ashí asakáruiti. ²⁷ Ashí shuar chikichkí jakar nuyá ni túramun Yusaj nekamatniun nantaktin áiniawai. ²⁸ Núnisan Kristu chikichkí jákatniunam surumak shuara tunaarín asakáruiti. Tura atakka tunaan asakártnian wantinkiashtatui. Antsu ni tátinrín nákainia nuna uwentikkrattsá wantinkiattawai.

10

¹ Muisais akupkamuka ukunam ti penker átatna núchaiti. Antsu nuna aya nakumeawai. Tuma asa ashí uwitin naman maar Yus sútaijajsha shuara tunaarín asakátrachminiaiiti. ² Kame asakátraka shuar nekas shiir awajsamniaitkiunkia Yus naman maar súsatniun atsumachuk iniaisarayai. Iis, mash tsanukuramuitkiunka ni tunaaríjaj itit enentáimtumashcharainti. Túrawar naman maar Yus súsatniun iniaisarainti. ³ Antsu namanen maar ashí uwitin tuke suíniak nujai ni tunaarín tuke enentáimtuiniawai. ⁴ Warí, namanke numpejai ii tunaarj penké asakárchamniaiiti.

⁵ Nu asamtai Kristu jú nunkanam taa Yúsan chicharuk tímiayi:

“Naman maar sútai sha penké nakitráme. Antsu ayash iwíaram surusuitme. ⁶ Naman áesamusha tura tunaan asakártn naman susamusha wakeratsme. ⁷ Tuma asamtai “Yusrú, tímiajai. Winia áatrurma núnisnak ame wakeramurmin umiktajtsan táwitjai” tímiajai” tímiayi.

⁸ Emka, Muisais akupkamu ajn, naman susamuncha, tunaan asakarat tusa naman maar susamuncha, naman áesamuncha Yus ashí nakitraitit tawai Kristu. ⁹ Nuyá “Yusrú, ame wakeramurmin umiktajtsan táwitjai” tawai. Nuna taku naman maar sútain “Asakáiniati” tawai. Tura chikichan ikiuawai. ¹⁰ Jesukristu Yúsan umiruk jákatniun chikichkí surumakmatai Yus in tunaarincha shiir awajtsamitjai.

¹¹ Tura Israer-shuarnumia Yúsan pujurin ashí tsawantaj nú namanak máawar tunaan asakáchunak Yúsan ti suu áiniawai. ¹² Antsu Jesukristuka jákatniunam chikichkí surumak ashí shuara tunaarín asakár atakka penké jákashtiniati. Nuna tura Yusa untsuuriní nekas akupin pujutainium pujusuiti. ¹³ Tura Yus ni nemasrín nupetak nin umirkarti tusa súsartatna nuna nákwai. ¹⁴ Chikichkí jakamujai ni shuarín tuke tunaarincha awajsaruiti. ¹⁵ Yusa Wakanjsha núnisan tawai. Emka tímiayi:

¹⁶ “Yamaram Chichaman najanattaj nuka júnisan átatui: Wi akupeaj nuna ni enentáin paant enentáimtikrattajai.” ¹⁷ Nuyásha tawai: “Ni yajauch tunáa túramurín penké enentáimtuschattajai.”

¹⁸ Tuma asamtai, ii tunaarj tsanukuramu asamtai atak in jarutramkatin atsumatsji.

Yus tuke shiir enentáimtusar Yusaj jeartai

¹⁹ Tuma asamtai, yatsurú, Jesukristu numpejai penker awajsamu asar sapijmiatsuk shiir enentáijaj Imiá Shiira nuj, nekas Yus pujamunam wayamniaitji. ²⁰ Nuj wayatniuka Kristu jaka Yusa Jēen tesaamun júsatniua áintsan ánturmamiai. Yamaisha tura tuke wayamnia átatui. ²¹ Jesus Yúsan pujurniu untrj asa ashí Yus-shuartin wáitmak pujurtamji. ²² Tuma asamtai, tuke enentáijaj Yus imiá nekas enentáimtusar Yusaj jeartai. Ii enentá Kristu numpejai nijiarma asamtai nekas enentáimtakur ii tunaarjaj itit enentáimtumashatniuitji. Tura ii ayashjsha penker entsajaj imianniuitji. ²³ Yus tsankatramkattajnia nu shiir enentáimtu iniaitsuk kakaram ajasar tuke emetatniuitji. Yus tsankatramkaitji nuna umiktatui. ²⁴ Penker anenain tura penker túrin ajasartai tusar mai yainiaikiartiniati. ²⁵ Yusa Jēen Yus-shuarjaj tuke iruntratín iniaisashiniati. Chikich iniainiakuisha iikia tuke iruntratniuitji. Nuj irunkurkia iikiakánairtiniati. Tura Kristu tátin tsawantrj ishichik ajasu asamtai nú nukap túratniuitji.

Anearta. Ti tsúumainti iwiaaku Yusa kakarmaríjaj asutniátin.

²⁶ Túrasa shuar nekas chichaman nekayat wakeramurjijaj tunaanum wekaakka Kristu jakamun nakitia asamtai chikich atsawai ni tunaarín asakátratniun. ²⁷ Áyatik ashamak ti tsumai sumamatin tsawantan nákasminiaiiti. Nu tsawantaj Yus ni nemasrín ti kakerak asutiak mash emesrattawai. ²⁸ Shuar Muisais akupkamun umikhamtai tura jímjar shuar nainiatsusha etserkarmatai waitnentsuk máatniuyayi. ²⁹ Núnisaitkiunkia shuar Yusa Uchirín wishikiainiakka ni numpencha nakitiainiakka tura Yus nin anea nuna Wakanjsha katekainiakka nuna nankaamas asutniáchartauak. Warí, nii nakitiana nu numpajaj Yamaram Chicham nekas umirkatin awajsamuyayi. Tura nújajsha nii ti penker awajnastiniuyayi. ³⁰ Ii Uuntrj Yus júnis tímiayi “Wi asutiáitniuitjai. Wi yapajkiattajai.” Nuyásha tímiayi “Wí shuara tunaarín ti paant nekarattajai.” ³¹ Ti tsúumainti iwiaaku Yusa kakarmaríjaj asutniátin.

³² Tura atumsha yámankamtaik Yusna nekaarum Yus-shuar ajasmarum nu enentáimsatarum. Kakaram ajasrum ashí itiuurchat katsuntramarme. ³³ Chikichirmeka

katseknakmarme tura ashí íimiainiamunam yajauch awajnasmarme. Chikichcha nu shuarnum pachitkia asarum íitit awajnasmarme. ³⁴ Atumsha sepunam pujuinia nusha waitnentramarme. Tura shiir warasrum kuítrumin atantramainiakuisa katsuntramarme. Nayaimpiniam tuke amuukashstin kuit pachiktin asarum túramarme. ³⁵ Tuma asarum yawetsuk Yus tuke enentáimtusrum kakaram ajastarum. Túrakrum nankaamas akinkiatarme. ³⁶ Atumsha esetra enentáimसारum Yus wakera nu túrakrum Yus atumin amastinia nu wainkiattarme. ³⁷ Kame Yus-Chichamnum áarmaiti: “Tátinia nu ishichik ajasai. Wárik tátatui. ³⁸ Shuar Yúsán nekas enentáimtak péñker wekaak uwemprattawai. Tura iniaiyakuñkia nin wararsashtatjai.” ³⁹ Tura iikia iniaisar mesena nú shuarchaitji. Antsu Yus shiir enentáimtusar uwempraitji.

11

Yus nekas enentáimtustin

¹ Yus nekas enentáimtakur “nákajnia nuna, Yus nekas suramsattaji” taji. Tura wáinchaitiatar “nekas wainkiattaji” taji. ² Yaunchu ii uuntrí Yúsán nekas enentáimtuiniakui Yus “péñkeraitme” tiarmiayi.

³ Aya Yus enentáimtakur ju nékaji: Yus aya ni chichamejain ashí nunkan najanamiayi. Túramtai ashí wáiniainiaj nu wáinchataijjai najanamu áiniawai.

⁴ Apir Yúsán nekas enentáimtak Kañjai nankaamas péñkera nuna Yúsán susamiayi. Túramtai Yus “péñkeraitme” taku shiir yuminsamiayi. Tuma asamtai Apir jákaiatit tuke enentáimtikramji.

⁵ Enuksa Yúsán nekas enentáimtak iwiaakuk nayaimpiniam junakmiayi. Yus jukimiu asamtai wáinkiacharmiayi. Tura Yus-Chichamnum aarma “Eruk júnatsuk Yúsán ti shiir enentáimtikniuyayi” tawai. ⁶ Tura Yus nekas enentáimtachkumka ñitiurak Nii shiir enentáimtiksatam? Nekas enentáimjai Yúsán weantuktaj tusam wakerakmekka, emka, Yus iwiaaku pujawai, tu enentáimpratniuitme. Nuyásha, Wi Yúsán eakuñkia Yuska winia yáintkiattawai, tu enentáimsatniuitme.

⁷ Yus, ‘amaarkatniun akupkattajai” tiniu asamtai, Nuaisha Yúsán nekas enentáimtak, amaarun wáinchaitiat, “túrunattawai” tímiayi. Túrak Yus timiajai métek uunt kanun najana ni shuarincha uwentikramiayi. Tura Yúsán nekas enentáimta asamtai Yus “péñkeraitme” tímiayi. Tura ni umirkamujai chikich shuar Yúsán enentáimtachun sümamtkiawarmiayi.

⁸ Tura Apraámsha Yúsán nekas enentáimtak Yus “núñkem ikiikum wetá” tutai shiir umikmiayi. Yus tuke nin súsatniua nú nunkanam wémiayi. Turasha ni nunken ikiuak ni jeatniun nékatsuk jiiinkimiayi. ⁹ Yúsán shiir enentáimtak nú nunkanam Yus nin tsankatkamuitiat írara áinis pujusmiayi. Nuap jeanam pujuyayi. Núnisan ni uchirí Isaksha tura ni tirankí Jakupsha nuñ tsankatkamuitiatan írara núnisar pujuarmiayi. ¹⁰ Kame Apraámka nayaimpinmayá ashirchamin péprunam pujustinian nákasmiayi. Yus nu pepu péñker iwiar jeamka asamtai umuchkiachminiati.

¹¹ Apraáma nuwé Sarasha Yúsán shiir enentáimta asa úuntach áyat ajaprukmiayi. Yus timia nuna umiktatui tau asa uchin takusmiayi. ¹² Tura nujai Apraám ti úuntchitiat ti pampanmiayi. Nii chikichkitiat ni pampanmarí ti untsurí ajasar yaajai métek tura náikmijjai métek nekapmarchamnia ajasarmiayi.

¹³ Ashí nu shuar Yus tsankatkamun wáintsuk jákarmiayi. Túrasha Yúsán nekas enentáimtuiniak arantiá wáinkiar warasar shiir enentáimtiarmiayi. Túrawar “ju nunkanam nekas aya íraraítji” tiarmiayi. ¹⁴ Íraraítji” tu chichainiak chikich nuñka eamun páant awajainiawai. ¹⁵ Niisha matsatu winíarmia nuñ atak waketkitniun wakeruiniakka páchitsuk waketkiaraayai. ¹⁶ Tura antsu niisha nuna nankaamas péñker nunkan nayaimpinmayá nuna enentáimtiarmiayi. Túmainiakui Yuska péprun iwiartur susa asa “wi ni Yusríntjai” títinian natsantsatsui.

¹⁷ Ataksha Apraám Yúsán nekas enentáimtak “chikichik uchi amasmaj nu, namankea áitkiasmek maam surusta” takui Apraám Isakan ni uchirín Yus susatniun peñké suritkiachmiayi. ¹⁸ Kame Yus “Isakjai ti pampanatme” tau asamtai ¹⁹ Apraám “máamtaisha Yus iniantkittiawai” tu enentáimpramiayi. Tura Yus ukunam máatiun suritkiamtai Isakan máachiat nekas jákatniunmayá uwempran nantakniua áintsan wáinkiamiayi.

²⁰ Isaksha Yúsán nekas enentáimtak ni uchirín Jakupnasha Esauncha ukunam ni túrunattana nuna ujakarmiayi. ²¹ Núnisan Jakup Yúsán nekas enentáimtak jatsuk ni tirankín, Jusé uchirín, shiir túrunattana nuna ujakarmiayi. Tura ti uuntach asa máshtupkrín ushukruma Yúsán shiir awajsamiayi. ²² Tura Jusesha jákatniurí ishichik ajatesmatai Yúsán nekas enentáimtak Yus ukunam Israer-shuaran Ejiptu nunkanmayá júkiartatna nuna ujakarmiayi. Tura jíiniainiak ni ukunchín júkiar Yus tsankatkamu nunkanam iwiarsarat tusa akupkamiayi.

²³ Muisaisa aparjsha nukurjsha Yúsan nekas enentáimtuiniak Muisais ti shírmach asamtai suntar máawarajin tusa akiiniamunmaya menaintiu nantu úkarmiayi. Tura uunt akupin akupkamun ashamkacharmiayi. ²⁴ Muisaissha Yúsan shiir enentáimtak uunt ajas Ejiptunmaya uunt akupniu nawantrí uchirí ajastinian nakitramiayi. ²⁵ Antsu Ejiptu nunkanam ishichkisha tunaan waratsuk Yusa shuarjijaj métek wáitsatniun nankaamas wakerukmiayi. ²⁶ Nujaj Kristun yajauch awajsarmia núnisan niisha wáitsatniuyu. Túrasa ashí Ejiptu nunkanam péñker irunmia nuna nankaamas Yus nin ukunam tsan̄katkatta nuna shiir enentáimtusmiayi. ²⁷ Niisha Yúsan shiir enentáimtak uunt akupin kajeramu ajin ashamsuk Ejiptu nunkanmaya jinki wémiayi. Yúsan wáinchiat shiir enentáimtamujaj wainiua áinis kakaram ajas ashí katsuntramiayi.

²⁸ Muisais Yúsan shiir enentáimtak yámankamtaik paskua namperan najaneak ashí Israer-shuaran numpajaj ni wáitirin kuérat tusa akupkarmiayi. Nujaj Yus timia núnisan nayaimpinmaya suntar nuna iis nu jeanam iwiarjin máatsuk nan̄kaikit tusa tímiayi.

²⁹ Israer-shuarsha Yúsan shiir enentáimtuinia ásar Kapaantin Entsa nakaakamtai ajapén ti péñker kukarnum katiñkiarmiayi. Ejiptunmaya suntarsha núnisan katiñtai tukamá jakerarmiayi.

³⁰ Israer-shuarsha Yúsan shiir enentáimtuinia ásar Yus timian umirkar siati tsawant Jerikiú péprun téntakarmatai aa tanish sánákmiayi. Nujaj ti yúpichuch nupetkarmiayi. ³¹ Raapsha nu péprunam pujak, Yúsan nekas enentáimtak tsanirmataj áyat Israera suntarin mamikmak wekaan ti péñker itiaá asa chíkich shuar Jerikiúnam matsatua nujaj jákachmiayi.

³² Nu arantcha Yúsan shiir enentáimtin ti írunui. Jeteúnsha, Paraksha, Sañsunsha, Jiptísha, Tawitsha, Samuershá, Yúsnan etserniusha nu shuar ármiai. Mash ujaktinian jeatsjai. ³³ Niisha ashí Yúsan nekas enentáimtuinia ásar Yusa kakarmarjin niisháa niisháa iniaktusarmiayi. Nuna túruiniak chíkich chíkich nunkanmaya aentsun nupetkarmiayi, nujsha péñker akupkarmiayi, tura Yussha ni timia núnisan yaiñkiarmiayi. Uunt yawancha kajechu awajsarmiayi, ³⁴ uunt jiniasha ikiajniakarmiayi, puniajaj mantamnatniuncha uwemprarmiayi. Kakarmachusha kakaram ajasar mesetnumsha ni nemasrjncha nupetkarmiayi. ³⁵ Nuwasha ni uchirj jakan iniantkimiun wáinkiararmiayi.

Chikichcha wáitias mantamawarmiayi. Ti shiir pujustinnium nantaktiai tusar nú tsawantaj uwempratniu nakitramiayi. ³⁶ Chikichcha katseknakarmiayi, asutniáwarmiayi, jirujaj jin̄kiawar sepunam enkenawarmiayi. ³⁷ Kayajaj tukú mantamawarmiayi, jímiapetek tsupinkiararmiayi, Yúsan iniaisarar tusa nekapnasarmiayi, puniajaj mantamawarmiayi. Aya wékainiararmiayi, kuítrinchá ásar nuapen entsararmiayi, shuar nincha áintra wáitnenmai awajiararmiayi. ³⁸ Atsamunmasha, naincha, wañmasha, ashí nunkanam wekain ármiai. Nu shuarjain̄kia ju nunkanmaya shuar imiá yajauch ásar niijaj pujumainchu áiniawai. ³⁹ Nu shuar Yúsan shiir enentáimtuiniakui Yus “péñkeraitrume” tiarmiayi. Túmaitiat ni tsan̄katkamun wáinkicharmiayi. ⁴⁰ Yuska nuna nankaamas péñkeran iwiarturaru asa tura in yamá pujajnia juna enentáimturma asa niisha iisha mai metek tsan̄kiar ti péñker ajasarti tu enentáimsamiayi.

12

Jesus tuke enentáimtusar tséquentiai

¹ Ashí ju nunkanam túrajnia nuka shuar nakuruiniak tsékena nujaj nakumkamniaiti. Ashí shuar yaunchu Yúsan shiir enentáimtusaruka téntakar írmainiaji. Tuma asamtai ashí kijin ana nusha tura ashí tunaaka itit awajtamaj nusha ajapa iniaisar tura katsuntrar tséken̄kir jeatai. ² Túmakur Jesus tuke enentáimtusar tséquentiai. Ashí shuarjaj nankaamas Jesus Yúsan ti nekas enentáimtak aya péñkernak túramiayi. Tuke nekas awakmakmiayi. Imiá tunáa shuáran krusnum máatin ajin núnisan natsanmainium jákatniun surimikchamiayi. Antsu ukunam ti shiir warastin áatna nuna enentáimtak nuna ashí katsuntramiayi tura nuyá Yusa untsuurinj akupin pujutainium pujusuiti.

³ Tunáa shuar Jesusan wáitkiasarmia nu enentáimpratarum. Túrarum pimpitsuk katsuntratarum. ⁴ Átum tunaajaj máaniakrum Jesus túramia áintsarum numpemsha puárchaitrume tura jákachuitrume. Nujsha katsuntrarum jeatniuitrume. ⁵⁻⁶ Yus nekas ni uchirjin chicharkatniua áinis túramprum nu kajinmatkichmashuram. Júnis tawai:

“Uchirú, wí jintinramajmena nu kajinmatkip. Asutiámkuisha kúntuts pujusaip. Kame Uuntka Nii aneana nuna jintintiawai. Tura ni uchirj ajasat tusa achiana nuna asutiawai.”

⁷ Tuma asamtai Yus ni uchirja áinis asutiámkuisha katsuntratarum. Warí, ashí apa ni uchirjin chicharkashatuaak. ⁸ Tura ashí uchich chicharkatniua núnis Yus atumin chichartamchakrumniñkia nekas ni uchirjinchuitrume. Antsu chikichnaitrume. ⁹ Nu arantcha ii aparj uchich árinj chichartamkurin umirniuyaji. Nu arant nuikia nekas ii Aparj

nayaimpiniam pujana nu shiir umirkar tuke shiir pujustin wakerishtatjik. ¹⁰ Ii aparj ishichik ni enentájjaj wakeramu chichartamniuyaji. Antsu Yuska ti penker awajtamsataj tusa nekas atsumajnia nujaj métek chichartamji. ¹¹ Kame nekasaiti, ashí asutiámu ya-maikikia waraschamniaiti, antsu kúntuts enentáimtikramji. Túrasha ukunam nu asutiámujaj unuimij nuka péñker túratniun tura shiir pujustinian yáinmaj.

Anearta. Yus tana nu nekas antuktiniaiti.

¹² Nujaj pimpirarusha tura kakarmachu ainia nusha ikiakártarum. ¹³ Túrurum péñker es-etsa enentáimsarum wekasatarum. Túrurum tujintiainia nusha shiir wekasatin yáinjarum.

¹⁴ Ashí péñker túrakrum ashí shuarjaj nawamnaikiarum péñker wekasatarum. Tunaan túrinkia Yusaj penké jeashtatui. ¹⁵ Aneartarum. Shuar nakitiakuñkia Yus nu shuáran shiir yáinjinian tujinkiatlawai. Nu shuar yajauch enentáimiuk chíkich shuárnasha itit awajas tunaanum útsukartawai.

¹⁶ Tsanirmawairap.

Yusna nusha nakitirairap. Isaka uchirj Esau péñkera nuna nakitramiayi. Yus “iwiajrin núkap súsatniuiti” timia nuna enentáimtuschamiayi. Tura asa aya ishichik yurumkajaj yapajjamiayi. ¹⁷ Tura nuyá ni aparj ukunam túrunattana nuna takui Esau ti penkeran wakerimiayi. Tura ti útkuisha ni aparj nin nakitramiayi tura ni chichasman yapajjatinian tujinkiamiayi.

¹⁸ Atumjainkia Yusna enentáimtusminia nuka yaunchu Israer-shuarjaj ashammain amia núnischaiti. Yáunchuka Yus ni akupkamurj Israer-shuaran súakui Senai muranam jeeármiai. Muranam uunt jisha kiritniusha teesha nasesha ajamiayi. ¹⁹ Tura kachu kakaram umpúamusha ámiayi. Tura Yus kakaram nin chichaream antukar ashamkar atakka chichaschati tu searmiayi. ²⁰ Kame Yus chichaak “Shuarsha tanjasha ishichiksha nú muranam najarmatai nuka kayajaj tukurar tura nanjijajisha máatniuiti” tímiayi. Nu akupkamu ti ashammai asamtai “chichaschati” tiarmiayi. ²¹ Wáinkiarimia nu ti tsuumai asamtai imia Muisaissha “Ashamakun kurajaj” tímiayi.

²² Antsu atumjainkia Yusna enentáimtustin nujaj nankaamas péñkeraiti. Átumka nayaimpinmaya Seun náinnium, Jerusarén iwiaaku Yus pujatai péprun nakumeana nu jeeáitrum. Nujsa ti untsurj nayaimpinmaya suntarsha ²³ ashí Yus-shuarsha shiir irun-traru ániawai. Yus-shuaraka ashí nayaimpiniam ni naarj aujtuksa ásar ni uchirj ániawai. Nujsa Yus, ashí shuaran ti nékana nu, pujawai. Niisha shuáran ti penker awajsamtai nu shuar jákar ni wakanj nuj shiir pujuiniawai. ²⁴ Nujsa Yamaram Chichaman in takartamajnia nu, Jesus, pujawai. Nuna numpé ukatramujaj ashí shiir awajsaiti. Nu numpasha Apira numpējaj nankaamas péñkeraiti. Kame Apir ántar máamu asamtai yapajmiatrukta titinia áintsan enentáimtaji. Antsu Jesus tunáa shuáran péñker awajstartaj tusa jakamiayi.

²⁵ Nuka ti penker asamtai Yus chichartamprumna nu nekas anturkatniuitrum. Yaunchu Yus jú nunkanam murá chichaamun anturkachar asutniátiniunam uwem-pracharmiayi. Nuikia Yus nayaimpinmaya chichartamkurin ántachkurkia ishichiksha uwemprashatjaj. ²⁶ Yaunchu Yus chichamejaj nunkan úrmamtikarmiayi. Tura ya-maisha tawai “Ataksha aya núnkankechu antsu nayaimpinmasha úrmamtikiatjaj.” ²⁷ “Ataksha” tana nujaj “ashí muchitránia nu amuukartatui” tawai. Tura muchitrach-minia nu juakartatui. ²⁸ Yus in akupkatniun tsankatramaj nuka umuchnakchattawai. Tuma asamtai Yus yuminsatniuitjaj. Yus wakerana núnisrik wishiksuk shiir enentáimtusar Yus shiir awajsatniuitjaj. ²⁹ Maa, ii Yúsriñkia kajerkanjka uunt já nuke áesaa mash emesram-niaiti.

13

Yus shiir enentáimtiksatin

¹ Nuamtak yachja núnisrum tuke mai anenai ajatarum. ² Tuke írar shiir itiaatarum. Nuna túruiniak shuar nékachminiak nayaimpinmaya suntaran itiaawaruuti.

³ Sepunam pujuinia nusha atumsha niijaj pujáa núnisrumek waitnentrarta. Wáitkiasarma nusha wisha núnisnak wáitsamniapitjia tusarum waitnentratarum.

⁴ Nuatnaikiatin péñkeraiti. Shuar ni nuwejjaj tsanin pujustin péñkeraiti. Tura nuatkamu ainia nusha chikichan eakchatniuiti. Tsanirmana núnaka Yus asutiáttawai.

⁵ Aya kuítiak enentáimtusam pujasaip. Yuska “Kanakchattaj tura penké ikiukchattajme” túramui. Tuma asamtai ame takakmena nujaj shiir enentáimsam “maaketé” titiá. ⁶ Tiniu asamtai arantutsuk ju tíminiaitjaj: “Winia yainnia nuka Uunt Yúsaiti. Nu asamtai shuar túrutamnia nuna ashamkashtatjaj.”

⁷ Atumin Yus-Chichaman jintintramawarmia nu enentáimtusarum. Yúsan shiir enentáimtuiniak péñker wekasarmia núnisrumek atumsha túratarum.

⁸ Jesukristuka tuke yapajítsuk nuikiya núnisañ tura ukunmasha tuke núnisañ átatui. ⁹ Chíkich chicham niisháa írúnna nu anturkairap. Yus in anenma asakrin kakaram ajasartai. Shuar niisháa yurumkajaj enentáiruñ kakaram ajastaj táyat penké yáinçhaiti. Yurumeaj nújainchu antsu Yusa anenkrattairjijaj ii enentáin kakaram ajasminiatiji.

¹⁰ Yáunchu Yúsnañ pujurin namañ maar Yus susamunmayañ yuu ármiayi. Tura iikia Yus-sutaj nusháa ana nu súaji. Nusha Kristu jakamu asamtai yaunchua nu Yúsnañ pujurin nuñ pachiinkiachmin áiniawai. ¹¹ Israer-shuarnumiá Yúsnañ pujurniu uuntrj tunaan asakártaj tusa namañké numpen júkiar Imiá Shiir Tesaamunam wañ ármiayi. Tura nu namañ arant áesatniuyayi. ¹² Núnisañ Jesussha péprunam arant wáitkianas mantamnamiayi. Nujaj ashí shuara tunaarjñ ni numpejaj nijiatkai. ¹³ Núnisrik iisha péprunmaya arant wétinia núnisrik Jesusaj weri Niijjaj métek wishikmain katsuntutai. ¹⁴ Kame ju nunkanam amuukachmin pepru atsawai. Antsu ukunam ti shiir pepru átatna nu nákaji. ¹⁵ Tuma asar namañ maar Yus sútsuk antsu shiir chicham súakur tuke Yus shiir yúmiñkiaji. Tuke núnisar túratui. ¹⁶ Péñker túrakrum takakrum nu ajamnaisatin kajinmatnaikiirap. Nusha ti shiir Yus sútainti.

¹⁷ Yus-shuaran akupin ainia nu umirkarum shiir enentáimtikratarum. Ni takatrjñ Yúsnañ ujaktin ásar atumí wakanjñ shiir wainiainiawai. Niisha itiuurchatcha antsu wakeru-mainian túrawarat tusarum shiir yáinçtarum. Nu túrachkumka çitiurak yainmakarat?

¹⁸ Incha Yus áujsatarum. Iisha ashí péñker túratin wakeraji. Túraji enentáimji. ¹⁹ Tura Yus áujkuram Yus ataksha atumjaj wainniaikiatniun wari tsankatrukak tusarum seatritiarum.

Amúak shiir chichaawai

²⁰⁻²¹ Imiatkinchanum apujkartinia nú Yus, Jesukristun jakamunmaya iniantkimia nuka, ni numpé kakarmarjijaj ashí péñker ana nuna suramsarti. Nujaj ni wakeramu túrattarme. Tura Jesukristu kakarmarjijaj ashí ni wakeramun in pujurtamas takasti. Ii Uuntrj Jesukristu ashí Yus-shuaran ti penker Wáinniuiti. Tura ni numpejaj Yamaram Chichaman kakaram awajsamiayi. Nu Chichamsha tuke menkakashtatui. Aya Kristu tuke shiir awajnasti. Núnisañ atí.

²² Yatsurú, kakaram chicharkajrumna ju shiir enentáimjaj anturkatarum. Kame ti wárik áatrajrume. ²³ Yamaikia ii yachi Timiutéu sepunmaya jiinki ankant ajasai. Nuna ujaajrume. Wárik támatañkia atumin íitij tusan winiakun niijjaj winittijaj.

²⁴ Atumí úuntrjsha tura ashí Yus-shuarsha amikmaatarum. Itiaria nunkanmaya shuarsha amikmatmainiawai.

²⁵ Ashí Yus ti shiir yainmakarti. Nuke atí.

SÁNTIAK papin áarar akuptukma

Sántiak aarmiania nu

¹ Wi Sántiak Uunt Yúsan tura núnisañ ii Uuntrj Jesukrístun umirin asan ju papin aajai. Ashí Yus-shuarterimin ashí nuñkanam tsakinmakarum matsatrumna nuna amikmaajrume.

Nekatainkia Yúsnumiáiti

² Yatsuru, ashí ititurchat wáinkiumesha tuke warastarum. ³ Iis, ititurchatnum pujakrum nekas Yus enentáimtaikiurmeka katsuntratin unuimiartatrum. ⁴ Tura tuke páchiachkuram, tuke katsunteakrum, nuikia Yúsaj ti penker katsuqartatrum. Penké atumashtatrum.

⁵ Átum nápkamsarmek nekaatin tujintiakrumka Yusa nekatairj seata. Shuar seakuj Yuska kajetsuk tura ementutsuk antu patatas súawai. Tuma asamtai seakminkia suramsattawai. ⁶ Túrasha Yus nekas enentáimtusam, “túratpiash” tútsuk seata. “Cha, nékatsjai surustimpiash” tu seakmeka ántram seame. Nayaantsa tsukaturj juní taa, atúu waketki ajatsuk. Amesha áintsamek túmame. ⁷ Enentáimjin núnisketkuinkia, seamna nuna Yus penké suramsashatui. ⁸ Shuar jimiara enentáimna nuka shiir wekasatniun tujintiawai.

⁹ Yus-shuar, ju nuñkanam kuítríncha ainia nu, Yus shiir awajsamu nujaj warasti. ¹⁰⁻¹¹ Tura Yus-shuar kuítrinniitkuisha péejchach enentáimtikramsha warasti. Iis, nupa kuáñkam tura nantu ti sukuam kaar miniatsuk. Kuítrinniuka ántska ántram seame. Nayaantsa tsukaturj juní taa, atúu waketki ajatsuk. Amesha áintsamek táñkete. Tuke súrutnak pujurkusha ititurchat wáiniuk wárik amuukattawai.

Ii ititurchatrj ana nu

¹² Shíiraiti shuar ni ititurchatrin nekas katsunteana nuka. Nekapsam jiiinkuñka akinkiatniun wáinkiatawai. Iwiiaaku átinian, tawasap achiktinia núnisan, wáinkiatawai Yus ni aneam tsañkatka nuna. ¹³ Shuar tunáa túramnia nekapeakka “Yus nuna útsutrutui” tu enentáimprashiniati. Yuska yajauch túramnia enentáimtsui túrasha Niisha penké chikichkinkesha tunaanum útsuchuiti. ¹⁴ Antsu ni wakeramurjijaj aents tunaan niniki ikiatmamkaiti yajauch túratniun. Nújajnkia tunaanum útsukmaiti. ¹⁵ Nu yajauch wakera-munmayá tunáa akiiniui. Tura nu tunáa mash amuukamtai jákatin akiiniui.

¹⁶ Yatsuru, aneakun tájarme, anañmamawairap. ¹⁷ Ashí péñker ana nu, ashí shiir ana nusha nayaimpinmayá Yusak amasuít. Yus ashí tsáapninia nuna najanaiti. Tura Niin kiritin atsañ yapajjtsuk tuke tsáapniiti. ¹⁸ Ni wakera asa ni nekas chichamea nujaj ni uchirj najatmamji. Tura ashí ukunam áatna nujaj ii émkaitji.

Yus nekas shiir awajsatin

¹⁹ Tuma asamtai aneamu yatsuru, wárik chichastin enentáimprairap antsu antuktin emka enentáimprata. Núnisañ wárik kajekaip. ²⁰ Kajena nuka Yus péñker wakeramun túratsui. ²¹ Nu asamtai, ashí péñkercha nu tura ashí yajauch írrunna nusha iniaisata. Tura tuke enentáijaj Yus-Chicham ame enentáimin araamu anturkata. Tura nu Chicham kakarmaiti uwemtikrampratniun.

²² Yus-Chicham umikta. Aya ántukaip. Aya ántakmeka amek anañmamattame. ²³⁻²⁴ Shuar íspikia ímiak ni yapin wapikian wáiniak tura nuyá jáupmitsuk we, ni urukuit nuna wárik kajinmatkishtimpiash. Shuar Yus-Chicham umitsuk aya ántana nuka nujaj méteketete. ²⁵ Yus tana nujaj ankañ ajasminiaiti. Shuar íspikia íimia áintsan nekas Yus péñker táman tuke iniaitsuk enentáimtus, nu shuar kajinmattsuk aya antukchattawai antsu tuke umiktatui. Tura ti shiir waras pujustatui.

²⁶ “Nekas Yúsan shiir umirjai” tana nu tura eeer chichaachkuñka imia niniki anañmamui tura “Yúsan shiir umirjai” tana nuna ántar tawai. ²⁷ Nekas Yus Apa awajjtsuk shiir umirkatin júiti: mitaikiasha wajesha ititurchatnum pujuiniakuisha yañtiniaiti tura ju nuñkanam ashí tunáa ana nújajsha máatrashtiniati.

2

Shuar antra akantrashtin

¹ Yatsuru, ii Uuntrj Jesukrístu ti shiir nañkaamantua nu enentaimtatirmeka shuar akantratin enentáimsairap. Shuara enentáim enentáimtsuk antsu aya pátatke wáinmena nujaj aents akantram niisháa enentáimturairap. ² Iis, iruntrumna nuj shuar kuítrintin kurí aniyu aweera tura péñker iwiarmampra wayashtimpiash. Tura núnisañ chikich kuítríncha aruta entsaru wayashtimpiash. ³ Tura kuítrinnia nu “Péñkera juí pujusta” tichatameash. Tura

kuítrinchaka “Atu wajaute, túrachkumsha juí nuñkansha pujusta” tíchatameash. ⁴ Nu tákumka yajauch enentáimpram jimiara enentáijíají aents enentáimtame.

⁵ Aneamu yatsuru, antuktarum. Ju nuñkanam kuítrinchaka ainia nuna Yus achikiuiti Ní shuar ajasar Nin nekas enentáimtin ajasartinian. Tura ashí nayaimpiniam írúnna nunasha Yus nin tsañkatkattawai. Ashí shuar Yúsán aneena nuna anajmatra asa nin tsañkatkattawai. ⁶ Átum antsu kuítrinchaka natsant awajearme. Iista, kuítrinnia nuka timiá itirchat awajtmainitsuk. ¿Nuikia níchuk ainia achirmak kapitiánnium japiki júramprumna nu? ⁷ ¿Nínkíchuk ainia Kristu naari shiira nuna ántar pachikiar penké yajauch áujmatainia nu? Tura átumka nuna naari tuke shiir awajkurmin, ashí shuar “Kristu shuari” túramainiawai.

⁸ Yus-Chichamnum ju akupeamu nekas péñkeraiti:

“Ame ayashim aneamna núnismek ame írútramuram aneeta.”

Nu nekas umírniuitkiurmeka maak. ⁹ Nú enentáijíají kuítrinniuají chichasminiaiti. Tura nuyá kuítrinchají shiir chichaachkumka, niisháa enentáimta asam, nu akupkamu umirkachuitme. Tunáa túrame. Núnismek Yusa akupeamuríjají amek sumamame. ¹⁰ Chíkích akupkamu írúnna nu ashí umikiam tura aya chíkíchik akupkamu umikchamka nuikia ashí akupkamu umircha ajasume. ¹¹ Iis, Nínki Yúsak chichaak tíchamka “tsanirmawaip.” Tura chíkíchnasha “mañkartuawaip” tímiayi. Nu asantai, shuar tsanirmsatsuk túrasha mañkartakka ni wakeramun umirtsui. ¹² Kristu ankant awajtamsantai ii yamá ni akupeamurí yúpíchuch umirkamniaiti. Nu asantai nu akupkamujá métek wekakurnínia Yus “pénker túraitme” turamatáji. Tura umikchakrínkia “pénker umikchaitme” turamatáji. Tura nu enentáimsar péñker chichasar takasar wekasatniuiti. ¹³ Chíkíchán waitnentshukúka waitnentsuk asutniáttawai. Tura waitnékratniuitkiurnínia tsawant jeamta Yus in waitnentramp Prattaji.

Yus enentáimtustin tura umirkatniusha

¹⁴ Yatsuru, shuar “Yusan shiir enentáimtajai” táyat tura péñker túrachkuínia péñkerashit. Nujá uwemprattawak. ¹⁵ Wátskea, Yus-shuar, áishmansha nuwasha, entsátáirín tura yurumken atsumashtimpiash. ¹⁶ Tura ame nékayatmek ayashí atsumana nu sútsuk tíchatapash “Pénker wetá, entsatai entsaram túram péñker yurumáta.” ¿Nu sútsuk tákum péñkerkait? ¹⁷ Núnisañ takatsuk Yus enentáimtustin ántraití.

¹⁸ Tura shuar tíchanpiash, “Chíkích takaawai tura chíkíchcha Yúsán shiir enentáimtai. Maí péñkerchakait” tíchanpiash. Wats, ame Yus enentáimtamú takatsuk paant inaktusminishitiám. Tura wi antsu péñker takatrujají Yus enentáimtamun paant inaktustatjai. ¹⁹ Nekas Yus chíkíchkiiti nu enentáimtame. Nuka péñker túrame. Túrasha iwianchcha nunasha nékainiawai. Tura umircha ásar ashamainiawai. ²⁰ Netse enentáimpraip. Ashí Yus wakera nu takaachkumka, Yus enentáimtustin ántraití. ¿Nu nekaatin wakeramek? Iista. ²¹ Apráámán Yus chicharuk “Winia ti shiir awajtusat tusam ame uchiram Isak maam surusta” tutai suritkiachmiayi. Máachiat suritkiachmiayi. Tura suritkiacham Yus “Pénkeraitme” tímiayi Apráámán. ²² Páantchakait. Apráám Yus shiir enentáimtak umirkamiayi. Umirtsuk Yúsán enentáimtakka nuikia ántar enentáimtiaayi. Tura umirak Yus enentáimtamun umikmiayi. ²³ Nujá Yus-Chicham aarma nu uminkiamiayi. Juiti:

Apráám Yúsán shiir enentáimtusmiayi tura Yus chicharuk tímiayi “Máakete. Nújájínia tuke péñker túraitme Wijíají” tímiayi. Apráámsha nekas “Yusa Amikrí” tu náamkamiayi.

²⁴ Páantchakait. Shuar aya Yúsán shiir enentáimtamujáinchuk tura péñker takasamajásha Yus nin shiir enentáimtai. ²⁵ Núnisañ Raap tsanirmatájayayi. Túmaitiat Israeran suntarín mamíkmauta tusar akupkamun ni jeén itiaawar tura úkar chíkích jintianam akupak uwemtikrarmiayi. Nuna túramtai Yus “pénkeraitme” tímiayi nincha. ²⁶ Ayash wakan-tichuka jákachukait. Núnisañ Yus enentáimtustin tura ni wakeramu takaachkurkia, jaka ántisañ ántraití.

3

Ii iniaí

¹ Átum untsurj jintínkiartin ajastin wakerukairap. Yus in, jintínkiartin ájnia núnaka, nankaamas neka asar, awajjakrin nankaamas Yus asutiámmattaji. ² Iis, ashí mash ti awajjatsjik. Tura shuar chichaak, aya péñkernak chichaakka, nu shuar tuke eseer enentáimniuiti. Tura ayashísha tuke péñker ana nuna túriniaiti. ³ Kawaisha enentáimpratai. Jiru wenuchiniam ikiursam ni ayashí ashí ayantaatsuk. ⁴ Kanusha ti úuntaitiat tura kakaram wéayat ishitiapach wiantáijíají shuar wakera nuj ayantarminiaiti. ⁵ Núniskete ii iniaí. Timiá ishitiapchítat awakmaktinia tímianu chichaatsuk. Ji ishíchik kapaajají ashí numi tsaruaku ekeemakhamniakait. ⁶ Ii iniaísha jijíají métekete. Ashí tunáa piákuiti. Tura ii ayashíin tunáa túratniun útsutmaji. Túñkuranmaya jijíají ikiapármaiti tura ashí ii wekajnia

nuj émesewai. ⁷ Shuar ashí yajasman nawamkamin ániawai. Ashí kajen írunga nunasha, nanamtincha, napincha, tura entsayancha ashí nawamkaruiti. ⁸ Tura iniaikia penké nawamkachminiaiti. Ti yajauch asa penké nupetkachminiaiti. Iniaikia ti taráa tseasaiti. ⁹ Nu iniaijjaj Yus Apa shiir awajeaji tura nu iniaijjaj aentsti yajauch chichárnaiyaji. Áentsun Yus Nijjaj métek-taku najanamaitiatar yajauch chichárnaiyaji. ¹⁰ Nu iniaijjaj penkersha tura yajauchisha chichaaji. Yatsuru, nuka penké atstuniuti. ¹¹ ¿Púkuniinmaya entsa sáawijjaj kusuku jíinkimnakaik? ¹² Yatsuru, ¿Kushinjiapi shuinian nereawak. Munchisha kushinjiapen nerekatuak? Núnisan púkuniinmaya entsa sáawijjaj kusuku jíinkichminiaiti. Ii iniaijjaj núnisan aya penkera nu chichastiniaiti.

Yusa nekatairi

¹³ Shuar ti neka enentái takakna nu, penker túrattawai. Nekas nékaitkiunka péechachia núnis tuke penker ana nuna túrattawai. ¹⁴ Antsu atumí enentáijjaj penké yajauch enentáimtarum tura atumek penker pujustin enentáimtarum, nékaitiam penker túrachiatam “penkeraitjaj” tiip. Nuka wáitrame. Nekaska núchaiti. ¹⁵ Nú enentaikia Yúsajyanchuiti. Antsu ju nunkanmayaiti, shuara enentáiyaiti, núnisan iwianchnumiaiti nú enentaikia. ¹⁶ Shuarsha yajauch enentáimtarum tura níngi enentáimtumainiakui, nujaj ashí mesewai tura ashí yajauch ti awai. ¹⁷ Antsu Yusaiya enentái takakna nu júnisaiti: ashí nankaamas emka eseeratin, nuyá nawamkartin, shiir ajá, penker anturnain, waitnenkratin, ashí penker takáa tura anantsuk naka chichamtin. ¹⁸ Eseera enentáimsatniusha shiir takawai ashí shuar penker ana nuna túrawarti tusa.

4

Ju nunkanam írunga nu aneashtin

¹ ¿Urukamtisuk tuke kajernaikarum ti máanaisrum pujarum. Mesetnumsha urukamtaí wéarum? Júnisaiti: Atumin yajauch enentái katsuntrachmin útsutmakrumin tuke máaniarme. ² Wakerarmena nu takustin wakerarme tura nu wakeramu takustin jeachkura mérentin maarme juruktiaj tusam. Chikich takakna nujaj itit enentáimtarum tura atáitin tujinkiam máanaitrume. Wakerarmena nusha Yus seachu asarum wáintsurme. ³ Tura seakrumsha yajauch searme. Atumí penkerijjaj warastin enentáimtu asarum searmena nusha wáintsurme. ⁴ Jú nunkanmaya wakerakum Yusa nemasrjjaj tsanirma áintsanketrume. Nékatrumek atumsha. ⁵ Ju nunkanmayan wakerakria Yusa nemasrntji. Shuar ju nunkanmayan wakerakka Yusa nemasrj ajawai. ⁶ Yus-Chicham juna tawai: Yus ni Wakanj ii enentáin apujturmasuitji. Nu Wakan in anenma asa ti akasmatramaji, táwai.

Tura nuna ¿ántrankeash ta? ⁶ Tura anenma asa ti yáinmaji. Tuma asantai Yus-Chicham tawai:

Kajemtinian Yus listatui tura péechachin Yus nin aneak ti shiir yáintatui, tawai.

⁷ Yusaj ikiumastarum, tura iwianch taritratum. Túrakrumin iwianch ikiumaktiatui. ⁸ Yúsajni weamkata tura Nii atumin wearaktatume. Tunáa shuarteram Kristu numpejaj nijiamartum. Tura átum, Yussa tura ju nunkanmayasha mai métek wakerarmena nu, atumí enentái naka eseeratarum. ⁹ Atumí tunaarj enentáimsarum kúntuts enentáimpratarum. Nu kúntutsaj ti úttiarum. Nuik shiir enentáimprarum wishikmiarumna nuka iniaisarum kúntuts enentáimprarum úttiarum. ¹⁰ Yusajj péechach ajasta, túrakmin shiir awajtamsattawai.

“Yajauchiitme” tunaichatin

¹¹ Yatsuru, yajauch áujmatnaisairap. Yus-shuar ni yachin yajauch áujmatas tura yachj tunaarj tuke áujmatuk Yus “aneniatarum” tana nuna umichuiti. Antsu umichu asa “nu akupkamu ántrai, umirkashiniaiti” tawai nu shuar. Nujaj nu shuar umirtsuk Yus akupkamu nankaamas enentáimtumawai. ¹² Yus Nínki akupkamu najana asa Nínki nu akupkamu umirkamun nekas nekaamniaiti tunaashit tusa. Nínkiti uwentikratniun tura emesratniunam akupkatin jea nu. Amesha yáitiam chikicha tunaarj ístincha.

Kashin átatna nuna Yusak nékawai

¹³ Watsek, átum áujmateakrum “Arumsha kashincha nu péprunam weri nuj chikichik uwi takasar kuit achiktatji” tichattarpash. ¹⁴ Ishichiksha penké nékatrumek kashin átatna nu. Ju nunkanam ii iwiaakmarj wárik amúatsuk. Yuranjim utsanar tura nantu sukum mash wárik menkaatsuk. Núnisketji. ¹⁵ Antsu júnis tminiaitrume: “Yus wakerakuinka iwiaaku pujakria nusha túrattaji” titiarum. ¹⁶ Túrachkurmeka átumka Yusajj nankaamantu enentáimprume. Tura ashí nu enentáikia yajauchiiti. ¹⁷ Shuar penker túratniun nékayat, túrachkuinka, nuka tunaiti.

5

Kuítrintin enentáimpratniua nu

¹ Kuítrinniutiram ju antuktarum. Ti úuttiarum. Ti wáitsatin asarum ti kakantra úuttiarum. ² Kuítrum mash mamukarai tura iwiarmampramurmesha mash tĩnkishap yúkayi. ³ Kurirmesha tura kuítrumsha ashí ijiakmamkarai. Ijiakmampramurjsha ame péñkercha túram nuna paant iniakmawai. Tura jinium áesamua áintsan ame kuítrum yajauch awajtamsattawai ayashmjin. Amuukatin tsawant jeamunam anearchamame antsu ame kuítrum ikaiaũkamame. ⁴ Ame takat iniararam ementushim akirarmamna nu “akirkati” turamainiawai. Anearta. Yakjyá Yus, nayaimpinmaya suntara uuntri, nu takartamni chichamen antukai. ⁵ Ashí ju nunkanam írunna nu wararsaruitrume. Tuma asarum kapũka nuke macharame tura yamaikia máatin tsawant jeayi. ⁶ “Nu shuar tunaiti” túrum tunaachu tsanumprurum máamarme, tura niñkia surimiakcharmai.

Yawetsuk takastin tura Yus áujsatin

⁷ Nu asantai, yatsuru, nu páchitsuk ii Uuntri Kristu tatin nákastarum. Arakmausha ni arakri péñker tsapaiti tusa yumi yutuktinian shiir enentáijjaj nákatsuk. Yútasua umirmatai esatrurmatai júuktajai tusa nákatsuk. Tura júurmaksha ti waraatsuk. ⁸ Núnisan atumsha kat-suntsatarum tura yaweķiirap. Kristu tatin yuntumtemayi. ⁹ Yatsuru, nuámtak “ju yajauch túrutui” tunainirap. Tákurminkia Yus írmastatrume. Nĩnkichukait nuna íistin tura anearta nu Yúsak tĩjyich wajatramui. ¹⁰ Yatsuru, yaunchu Yúsan etserin enentáimpratarum. Tuke ii Uuntri Yus timia nuna shiir etserkarmiayi. Túmaitiat wáitsarmiayi túrasha pachischarmiai. Núnisrumek enentáimsatarum. ¹¹ Itiurchatan katsuntainia nuka nekas shíiraiti, tu enentáimji. Shuar itiuurchatan ti katsuntin ámiayi, ni naarj Jup. Tura ni itiuurchatřj nanķaamasmatai Yus ti núkap kuítrin susamiayi. Nu nekatsrumek. Ii Uuntri Yus ti waitnenķratčakait.

¹² Ju ashí nanķaamas enentáimtustiniati, yatsuru. Ame “ee” tákumka nekas titiá. Tura “atsá” tákumka nusha nekas titiá. Nekas chicham chichaachkumniñkia Yus írmastatui. Nu asantai nayaimsha nunķasha ashí írunna nusha páchitsuk, aya támena nu tuke nekas atí.

¹³ Wáitakmeka Yus áujsata. Waraakmeka, warasam kantamám Yus shiir awajsata. ¹⁴ Yus-shuartiram, shuar jáakka, Yus-shuara úuntrin untsukti. Tura niisha taarti. Tura Jesusa naarj pachikiar asuitijjaj jaa shuaran ishichik kuerarti. Túrawar Yúsan áujtusarti nu shuaran. ¹⁵ Tura “Yus nuna nekas anturtamkattaji” tu enentáimsar áujsarti. Túrawarmatai jaa shuar péñker ajastatui. Yus nin tsuártatui. Tura tunaan tura asa jáakuĩñkia Yus nu tunaan tsanķurattawai. ¹⁶ Nu asantai, atumi tunaarj paant etsertunaiktarum. Túrarum Yus áujtunaistarum atumi tunaarj tsanķurnarat tusarum. Péñker shuar Yúsan tuke enentáijjaj áujeamurĩñkia ti kakarmaiti. ¹⁷ Yaunchu Yus-Chichaman etserin ámiayi, ni naarj Eriás. Niisha iijjaj méteketiat yumi yutukaj tusa Yusa áujsantai menaintiu uwi nuyá nanķaamas yutukchamiayi. ¹⁸ Ataksha yutukti tu áujsantai ataksha yutukmiayi tura araksha ataksha tsapainiarmiayi.

¹⁹ Yatsuru, shuar eseera weketailmaya kanaakuĩñkia chĩkich nin waketkitniun yainți. ²⁰ Shuar tunáa shuaran yajauch wekaan awakeakka jákatniunmaya uwentikrattawai tura ti untsurj tunaarj tsanķurnartatui.

PÍTIUR Emka papin aar akupkamu

Pítuur Yus-shuaran áatramiania nu

¹ Wisha ju papin aajna nu Pítruitjai. Wisha Jesukrístu akatramurintjai. Israer-shuar Yus-shuar árum nuna atumin ankant ankant tsakinmakarum chikich chikich nunkanam matsatrumna nuna áatjarme. Puntu nunkanmasha, Karasea nunkanmasha, Kapatúsea nunkanmasha, Asia nunkanmasha, Pítinia nunkanmasha pujarmena nuna áatjarme. ² Yaunchu Apa Yus, “uwemtikrataj” tímia núnisañ achikmaitrume. Tura, Winia ajasat tusa ni Wakanijjají akantamkamiarme. Umirtukat tusa nuna túramiayi. Tura Jesukrístu numpejajisha atumí enentáin atsajkir chamir awajturmasmiarme. Wats, Yus tuke waitnentramar ti shiir awajtamsarat tusan wakerajrume.

Shiir enentáimsar pujustin

³ Wats, Yus, ii Uuntri Jesukrístu Aparj ana nuna naari shiir awajsatai. Yussa ti waitnentrama asa, atak akiiniatniun suramsaitji. Jesukrístu jakamunmaya nantakin asamtai, iikia atak akiiniar tuke iwiaaku pujustiniatijnia nu arutramji. ⁴ Tura nayaimpiniam ikiurtamsamu ana nuna achikmintrum tusa Yus wakerawai. Nu ikiurtamsamu meserchamnia amuukachminiati. Tura nusha yajauchichuiti. ⁵ Yus nekas enentáimta asakrumin ni kakarmarjijají wearmarme. Tura tuke uwemtikrampratniun, nunka amuuamunam paant iniakmastatna nu achikmintrum tusa tuke tsawant ni kakarmarjijají wáitarmarme.

⁶ Nu enentáimsarum wararme. Kame ju nunkanam pujakrum itiuurchat wáinkiashtarmeash. Tura ju nunkanam pujustin ishichkichukait. Ukunam pénger pujustaj tu enentáimsarum wararme. ⁷ Enentáimsatarum. Shuar kurin wakerana núnisañ atumniasha umirtukat tusa Yus wakerutarmarme. Aents kurin jinium áesainiawai, aya kurik juakat tusar. Kurin ti wakeruinia ásar, amuukamnia ajñ túruiniawai. Atumsha, itiuurchat wáinkiarmana nujaj, Yusan nekas enentáimtusartimpiash tusa nekapsamuitrume. Nu enentáimtamu kurijjají nankaamas péngeraiti. Ukunam, Jesukrístu támatai, Yuska atumin “pénger túraitrume” turamtajtsa wakerittiawai. Tura “Ashí shuar nuna nekaawar winia naarun uunt awajrsarat” tusa túrutmattarme. Nu tuma asamtai ju nunkanam nekapsamuitrume, itiuurchat wáintrumna nujaj.

⁸ Jesukrístu wáinchaitiatrum anearme. Tura yamá wáinchiatrumek nekas enentáimtarume. Tuma asarum ti wararme. Nu warastin nayaimpiniam warastatjina núniskete; nuka paant titin jeatsji. ⁹ Iimiatarum. Uwemtikrurat tusarum Yus umirkachurmek. Nu uwempratrin wainiu asarum waraarme.

Krístujaj ii uwempratniun yaunchu etserkarmiayi

¹⁰⁻¹¹ Yus áentsun waitnanta asa, uwemtikrataj tusa tuke wakerimiayi. Núnaka Yúsnan etserin etseriarmiayi. Kristu Wakaní ni enentáin pujuriarmia nu, túrunsañ Kristu wáitsatniurin jintiarmiayi. Tura ukunam ni ti shiir pujustinrincha etseriarmiayi. Túrasa “tuu áishmankait Kristu tutaí, tura urutiák túrunat” tusar nu etserin émamkesar anin-trusarmiayi. ¹² Tura nii pujuiniainkia túrunashtinian, antsu ti ukunam, ii pujajnia jui túrunatniun Yus nekaamtikiarmiayi. Núnaka Yusa shiir chichamen ujatmakarmia nú shuar nekaprutarmarme. Nú shuar Yusa Wakaní, nayaimpinimaya akupkamu ana nuna nekatairijjají ujatmakurme. Maa, nu uwempratniun tájana nuna, nayaimpinimaya suntar nekaatai tusar wakeruiniawai, túrasa tujintiainiawai.

Pénger wekasatin

¹³ Tuma asamtai, pénger enentáimsarum tura pénger íimiasrum wekasatarum. Tura Jesukrístu ukunam wantiniak waitnentramprattana nu yawetsuk nákastarum. ¹⁴ Umin uchi áintsarmek yaunchu nékachu asarum wakerimiarmena nu iniaisarum Yus umirin atarum. ¹⁵ Ashí túramurmijjají tímia pénger wekasatarum. Yus, untsurmakuana nu, pénger asamtai, átumka ni shuarj asarum pénger wekasatarum. ¹⁶ “Wi pénger asamtai atumsha pénger wekasatarum” Yus tana nu ni Papirijn áarchamukait.

¹⁷ “Yus winia Aparuiti” tárumna nu aneatarum. Ashí aentsu túrutairin métek Yus nekaattawai. Nu neka asarum, ju nunkanam pujarmena jui Yus ashamkatarum. ¹⁸ Warí, ánta wekasatniun atumí uuntri jintinramarmena nuyá Yus uwemtikramprarme. Túrasa kurisha kuitcha amuukamnia ainia nujaj uwemtikrachmaitrume. ¹⁹ Antsu Kristu numpe ti shiira nujaj uwemtikramuitrume. Nu nékarme. Yaunchu, shuar tunáa túrakui, Yus tímiai, “murik yajauchichu tunamarcha maarum, Yus sútaniam ikiustarum. Nuna numpen wáinkian, atumí tunaarjn tsankurattajají” tuiuyayi. Núnisañ Kristu in jarutramka asa ii

tunaaríniã uwemtikrampraitji. ²⁰ Nunkan nájantsuk áentsun jaruktinian Krístun anaiki-amiaiyi Yus. Tura wárik akupkachmiayi. Antsu yamá tsawantin, átum pujarmín, péñker pujusúk tusa wakerak, atumin jarutramkat tusa Krístun akupkamiayi. ²¹ Niijjaj átumka Yus umiirume. Yuska Krístun jakamunmayan iniantki nankaamantu awajsamiaiyi. Yus nekas enentáimtakrum, aya péñkernak túrawai titiarum tusa túrait. ²² Yus nekas tana nuna, Yusa Wakanj yainmakui, umirka asarum atumí wakanjin péñker ajasuitrume. Yus-shuarjaj yajauch enentáimtunaisuk mai anenai ajatai tusarum tura asarum, nekas shiir enentáimtunaisrum mai anenai ajatarum. ²³ Nekaatarum. Yusa chichame umirka asarum atak akiiniaitrum nuka ju nunkanmayanchuuti. Antsu Yusa chichame iwiaaku tuke amuukachmin ana nú chichamjaj tuke iwiaaku átiniaitrum.

²⁴ Ju ayash tuke pujuschamniaiti. Yusa Papirijn junis áarmaiti:

Ashí aentsti nupáa áaniuitji. Ii péñkerjsha kukujja áaniuiti. Nupa wárik kaawai. Kukujsha núnisan wárik iniaawai. ²⁵ Tura Yusa chichamesha tuke amuukachminiaiti. Nu Chichamjaj uwempramnia asamtai atumin etsernakuiti.

2

¹ Tuma asamtai, ashí yajauch ana nu iniaisatarum. Anan̄katin, ántar-chichamtin átin, chikichna wakeruktin, ashí tsanumpratniusha iniaisatarum. ²⁻³ Antsu, Uunt Jesukrístu waitnenkartutairj nekapsa asarum, uchi yama akiinia muntsun ti wakeruinia áintsarmek, Yusa chichame aya péñkerkea nu ti wakeruktatum. Yusa chichamejaj tuke tsawant tsakakrum tuke uwemprami tusarum túratatum.

Iwiaaku kaya

⁴ Ii Uuntri Krístu kayaá áantsan̄kete. Tura shuar kayan yajauchin nakitiainia núnisan Jesukrístun nakitrarmiaiyi. Tura kayan ti péñkeran wakeruinia núnisan, Yuska, “wínia Uchir ti péñkeraiti” tusa Jesukrístun achikmiayi. Atumsha Jesukrístu weantuktatum. Nii iwiaaku kayaiti. ⁵ Atumsha iwiaaku kaya áantsan̄ketrum. Tuma asarum Yus wíjjaj ni jeen jeamti tusarum tsan̄kamaktatum. Tura nútiksarmek Jesukrístuj atumí iwiaakmarj tsan̄kamaktatum, Yus wakera nuna túrutati tusarum. Jesukrístujaj tura asarum Yus shiir enentáimtikrume. ⁶ Jesukrístunun Yusa Papirijn júnis áarmaiti:

“Iistarum. Kayan ti péñkeran achikjaj” Yus tímiayi. Jeñ emka apujtuamurj atí tusan Seun̄num apujejai.

Nin enentáimtana nu ántar enentáimtatsui. Aarma ana nu péñké kayan chichaatsui. Antsu Jesukrístun tawai. ⁷ Yus umirkaitrumna nu, “kaya ti péñkeraiti” tarume. Tura Yúsan umirainiatsna nuka Yusa Papirijn tana nujaj métek ániawai. Ju áarmaiti:

Jeñ jeamin nakitrarmia nú kaya jeñ emka apujtuamurj atí tusa apujamuiti.

⁸ Tura jusha aarma awai:
Tukumak iniaartin kayaiti.

Kame shuar Jesukrístunun etserkamun nakitiakka, ¿enentáinium itiu péñker wekasat?
Wats, nú shuar, Krístun umirainiachú ásar, tuke túrunatin asamtai tukumainiawai.

Yusna ajasaru ainia nu

⁹ Tura átumka Yus achikmaitrum. Tura, wíniã pujurtursarat tusa yajauchinmaja Uunt Yus akantamkairume. Yusna asarum péñker enentáimin ajasurme. Tura Yus sumakmaitrum. Niisha winia péñkerun etserturkarat tusa túrait. Kame kiritniunmaja jinkirum ni tsáapnintrin wekasatniun achirmakurme. ¹⁰ Yaunchu nusháa shuar áuyarme. Tura antsu yamaikia Yus-shuar ajasrum, Niiniu ajasurme. Yus-shuar ajatsrumnín, ¿ya waitnentrampramía? Antsu yamaikia Yus waitnentramuitrum.

“Yúsnaitjai” tu enentáimsatin

¹¹ Yatsurtirmin tájarme, Yusna ajasrum, ju nunkanam írar matsatu asarum, atumí ayashj wakerana nu tsan̄katkairap. Ayashim wakerana nu túrakmiñkia ame enentáim nujaj yajauch ajastatui. ¹² Yus-shuarchanum péñker wekasatarum. Túrakrumniñkia niisha yamá “Yus-shuar yajauch túruiniawai” ántar tuíniayatã, ukunman̄ka, Yusjaj in̄kiunaiktin tsawant jeamtaí, péñker wekarmena nuna enentáimturmasar, nú shuarsha Yúsan shiir awajstartatui.

¹³ Krístu atumí Uuntri asamtai, ju nunkanam akupin áiniã nusha umirkatniuitrum. Uunt akupin ashí akupin asamtai umirkatarum. ¹⁴ Tura ni akupeamurj ainia nusha tunaan túruinia núnaka asutiãti tura péñkeran túruinia núnaka shiir awajsatí tusa uunt akupin akupkamu ásarumatai umirkatarum. ¹⁵ Nekas péñker wekaamurmíjjaj enentáimcha ainia nu netse chichaamurj itiatmamtikiatarum tusa Yus wakerawai.

¹⁶ Tunaanumiã an̄kant ajasu asarum péñker wekasatarum. Túrusha wi an̄kant ajaschajak tusarum nánkamsarum yajauch túrawairap. Antsu Yusna asarum, ni wakera nuna

umirkatjai tusarum anearum wekasatarum. ¹⁷ Chíkichcha shiir enentáimtustarum. Yus-shuar ainia nusha aneatarum. Yus péñker asamtai ashamkatarum. Uunt akupin shiir awajsatarum.

Yus-shuarti katsuntratin

¹⁸ Takarniutirmesha ame úntrum péñker shiir enentáimturmakui sha tura yajauchi-itkuisha umirkatarum. ¹⁹ Nekaatarum. Antar wáitkiarmainia nuĵ, “Yus iirui” tu enentáimsa katsunteakrumka, ti penkeraiti. ²⁰ Yajauch túrawakmin asutiámamtai katsunteakmeke nuĵsha warin ati. Antsu péñker túrawakmin asutiámamtai katsunteakmeke juka ti penker túrame Yusaj. ²¹ Núnisan túrunatin achikmaitrume. Kristu waitrutmasmiarme nuĵ, Wi túraj núnisan túrawarmi tusar wáitsamiayi. ²² Krístuka tunaan penké túrachmiayi. Tura chikichkinesha penké anankachmiayi. ²³ Kátsekeamsha Niñkia katsekachmiayi. Wáitkiamsha “yapajmiaktaj” tichamiayi. Antsu “winia Apar Yus iisti’ tiamiyi, Yus péñker túrin asamtai. ²⁴ Kristu Niñki ni ayashjin ii tunaarjin entsaki krúsnum jarutramkamiayi. Tunáa enentáimtusarum tusa, antsu Yusaj péñker wekasamniuram tusa jarutramkamiayi. Atumí enentáin tsuártaj tusa Kristu asutniámiai. ²⁵ Murik ni pujutairjin waketkitniun nékatsna ántsarmek atumsha menkaka wekaimiarme. Tura yamaikia atumí wáitmaurjin waketkitn-trume. Atumí wáitmau Krístuiti, atumí enentáin wáinnia nu.

3

Nuatnaikiaru itiur túratniuit

¹⁻² Tuma asamtai, nuwátiram atumí áishri umirkatarum. Amesha péñker, Yus umirka weká asakmin, áishrum Yus-Chichaman umirchaitiat, ame túramurmin nekáa, ámeke chichaatsminin, niisha Yus-shuar ajastinian wakerittiawai. ³ Nu asamtai aya pátatek iwiarmampratniusha ti enentáimtusairap. Intiash ti penker iwiartatniusha, kurijjai iwiarmampratniusha, pushí ti kuitjai entsatintcha ti enentáimtusairap. ⁴ Antsu, “nekas shírmach ajastaj” tákumka, enentáimin “shiir kajeche átajai” tu enentáimsatarum. Nuka sakarchattawai. Tura nuka Yúsnumka ti penkeraiti. ⁵ Yaunchu núnisaraĵ nuwá Yúsan enentáimtusarmia nu, tura Yúsan shiir enentáimtikratniun wakeriarmia nu, ni áishrin umirka nujai ni enentáin shírmach ajasar pujuarmiayi. ⁶ Atumí weatři Sara ni áishrin Apráaman umirmiayi. Umirin asa, “winia uuntru” tñiuyayi nin. Atumsha péñker túrakrumka tura sapijmiatsuk wekaakrumka, Sarajaj métek átrume.

⁷ Tura áishmantirmesha Yus wakerana nu nekaarum atumí nuwe shiir enentáimtusurum tsaniitarum. Nuwemsha, nuwá asa, áishmanjai métek katsuntrachminiati. Tura niisha, ámijjai métek Yusa waitnenkartutairijjai tuke iwiaaku átinian takusminiati. Tu enentáimta asam ame núwem shiir enentáimtustá. Yus áujkuram itirchat atsuti tusarum túratarum.

Yúsnum péñker wekasatin

⁸ Nuyasha ashí Yús-shuirtirmin tájarne, aya chikichik enentaik ati. Waitnennairatarum. Nekas yatsum aneam núnisrumeke anenaitiarum. Aya áminiuk enentáimtutsuk chikichan yáintaj tu enentáimsatarum. ⁹ Yajauch turamainiakuisha “yapajkiataj” tiirap. Katsekramainiakuisha “iikkiataj” tiirap. Antsu “Yus winia shiir awajtsuuti” tu enentáimsarum, yajauch turamainiana nu péñker awajsatarum. ¹⁰⁻¹² Yus-Chichamnum júnis aarna asamtai nu túratarum:

Uunt Yus péñker wekaana nuna wainiui, tura ni áujmancha ántawai. Tura yajauchin túrana nuna nakitrawai. Tuma asamtai, shiir pujustaj tákunka tura tuke tsawant warastinian wakerana nu, péñker íimiasí, yajauch chichakaj tusa tura wáitruawaj tusa. Tunaanumiá kanakí péñkeran túratí. Tuke enentáijjai shiir átinian eakti.

Tu áarmaiti.

Itiurchat aĵn péñker túratin

¹³ ¿Yaki yajauch túrutmat péñker turamnisha? ¹⁴ Túrasa péñker túrayatmek wáitkiaminkia Yus shiir enentáimtikramprattarme. Tuma asamtai ashamkartutsuk, sapijmiatsuk wekasatniuitrume. ¹⁵ Tura “Kristu winia Úntruiti” tu enentáimtustarum. Tura “¿urukamtia Yus-shuar ajasuitiam?” turamainiakuisha, péñker áimkiannium iwiarnarum pujustarum. Waantu enentáimtumatsuk, nin péñker enentáimtikrataj tusam túrata. ¹⁶ “Yúsaj péñker wekasataj” tu enentáimsarum wekasatarum. Yus-shuar asakrumin chíkich shuar ántar áujmatramainia nu ni ántar áujmatramsamun nekaawar natsaararat tusarum Yusaj péñker wekasatarum. ¹⁷ Yajauch túrakur wáitsatniujajniakia nankaamas, Yus wakerakuinikia péñker túrakur wáitsatniuka ti penkeraiti.

¹⁸ Kristu ii tunaarjin asakártaj tusa jarutramkamiayi. Ashí asakárma asamtai atak tunaan jarukchatniuiti. Niisha tunaan penké túrchuitiat, ii tunáa asakrin wáitrutmasmiayi, Yúsnum ejetamtai tusa. Ayashjinkia jakayat ni wakanjijai ni ayashj ataksha iwiaaku ajasmiai.

¹⁹ Ni wakanjijai jakáa wakanjin emetamu armia nuna etserkataj tusa wémiayi. ²⁰ Nusha yaunchu Nuai uunt kanun nájanuk siañtu painiti (120) uwi pujurmia nuj Yuska umirtukarat tusa ti nákamaitiat Nuai étserman umikcharmiayi. Nú kanunmasha ishichik, uchu, aents kanunam pujuinian yumijijai uwemtikrarmiayi. ²¹ Nu yumi Yus-shuarti imiantinian nakumui. Ii ayashj chamir awajsatai tusar imiantsuji. Antsu ii enentáij péñker atí tusar Yus sear imianji. Nujai iisha uwemji. Jesukristu nantakin asamtai, nujai uwempraitji. ²² Tura Niisha nayaimpiniam we akupin pujutajinium Yusa untsuurjini apujsamuiti. Túramtai nayaimpinmayá suntarsha, tura ashí kakaram akupin áiniana nusha Jesukristun umirainiawai.

4

Ju nunkanam wáitsatin

¹ Kristu ni ayashjin wáitsa asamtai atumsha núnisrumek wáitsatin ákuisha, katsuntratjai titiarum. Ni ayashjin wáitiana nú shuar yajauchin páchiatsui. ² Antsu “iwiakjana nujka Yusa wakeramurjin tuke umirkatjai” tu enentáimui. Ni ayashj wakerana nuna yamaikia páchiatsui. ³ Warí, Yúsán nekainiatsna nú shuar túruiniana nu atumsha núkap túrichmakuram. Yus-shuar ajatsuk tsanirmatin wakerimiarme. Yajauch túratniusha, nampernum nampekum ti yurumárum, enentáincha ajasrum charaatum ajatniusha, ántar-yusa namperjin yajauch ana nu najanatniusha nusha ashí wakerimiarme. ⁴ Tura surimiatsuk yajauch túrimarmena nu iniaisa asakrumin, yaunchu atumjai nuna túrin armia nu, “urukamtai iniaisara?” tusar yajauch áujmatramprume. ⁵ Túrásha ukunam nu aents ni túramurjin etserkartatui. Iwiaaku ainia nunasha tura jákaru ainia nunasha Neka awai. Nii nu aentsun sumamtikiawartatui. ⁶ Túrásha jaka armia nu Yusa shiir chichamej ujankarmiayi. Ni ayashjin ashí shuarjai métek jakamniaitiatan Yus iwiaaku pujana núnisán ni wakanji iwiaaku pujusarat tusa ujankarmiayi.

Shuar yáintiniatji

⁷ Ashí amuukatin jeatemayi. Tuma asamtai péñker enentáimsatarum; túrarum anearum Yus auju pujutarum. ⁸ Aneniamujai untsurj tunaasha tsanjuratin awai. Tuma asamtai ashí nankaamas nuamtak anenistatum. ⁹ Kajé-kajejainchu atumí jeen itiaaniátatum. ¹⁰ In ankant ankant shiir awajtamsatniun Yus ti núkap takakui. Tura in shiir awajtam-samujai chikich shuarsha shiir awajsatarum tusa chikich chikich túratniun suramsaitji. Tuma asamtai péñker takaawa áintsarmek Yus amasmania nujai ame írutramuram yaintá. ¹¹ Etserkatniun Yus amasuitkiuinjka ame tamena nu, Yus tana nujai métek atí. Chikich shuar yáintiniatkiunkma Yus amaana nú kakarmajai túrata. Ashí túramna nu Yusa naarj shiir atí tusam Jesukristu náarjijai túrata. Jesukristun ashí aents shiir enentáimtusartí. Tura ashí áentsnum ni kakarmarj tuke atí. Nuna tajai.

Yus-shuarti wáitsatin

¹² Aneamu yatsurtiram, ti waitsatin nekapramsartin jeartampramna nu nusháa enentáimprairap. Wáitsatin támatá, “¿urukamtai waitsa pujaj?” tu enentáimsairap. Kame túrunamniati. ¹³ Tuma ajn shiir enentáimsatarum. “Kristu wáitsamurjin métek-taku wáitakun péñkeraiti” tu enentáimsatarum. Ukunam Kristu wincharj wáinkiarum timiá warasmi tusarum túratatum. ¹⁴ Kristunu asakrumin katsekkramkachartimpiash. Túmaitkiuisha Yusa Wakanj shiir ana nu atumjin pujurtamkui shiir awajsamuitrume. Katsekkramainia nú shuar imia Yusa Wakanjin yajauch áujmatainiawai. Tura átumka Yusa Wakanj shiir awajearme. ¹⁵ Túra atumsha yajauch túrawairum aneartatum. Mankartana nu, kasamkana nu, tunáa túrana nu, tura chikichna páchiana nusha ni wáitsatniurinkete. Atumjainjka nu wáitsatniuka atsutí. ¹⁶ Tura antsu Kristunuiti tusar wishikramuk wáitkiarmainiakui natsagarairap. Kristunu asam wáitiatymek, natsamtsuk Kristu naarj shiir awajsata.

¹⁷ Yuska ni shuarjin nekapsatajtsa nanksamatiuiti. Tura nu tsawantcha jeayi. Yus imia in nekapramkuisha Yus-Chichaman umirainiatsna nú shuarsha urukawartin. Ti asutniáwartatui. ¹⁸ Imia Yus umirjinia nu uwempratniurj itiurchataitkiuisha tunaan túruiniana nusha urukawartin. ¹⁹ Tuma asamtai Yus wakeramujai wáitiana nu, niisha Yus najanamu asa Yus iirsatí tusa tuke péñker túratí. Warí, Yuska tuke péñker túrichukait.

5

Yus-shuara uuntrj túratin

¹ Yamaikia Yus-shuara úuntrjtiram, jintintjiarme. Wisha núnisnak Yus-shuara úuntrjntjai. Kristu wáitsamurjin wáinkiaitjai wisha. Tura ukunam ti shiir átatna nuj chikich Yus-shuara uuntrja núnisnak wisha pachinkiatatajai. ² Yus-shuar ame ístiniatmena nu, péñker iistá, murikiu wáinin ni murikrin wainnia áintsamek. Nakittsuk, shiir enentáimsam túrata, Yus wakerana nuke. “Chikich akupta asamtai túratatajai” tútsuk tura nujai kufrintin ajastin

enentáimtsuk nekas wakeritia, Yusa takatrĭ asamtai. ³ Turasha, “Yús-shuara uuntrĭ ajasan, Yus-shuaran akuptiaj” tu enentáimsaip. Antsu shiir túramurmijĭaj Yusa murikĭrĭ jintintiata. ⁴ Nuĩnkĭa murikĭu wainniu Uuntrĭ taa wantiniak iwiarmamtai tawasap ti shĭfirmachia núninian suramsattawai. Aents súana nú shĭfirmach wari mamurtiniaiti. Tura Úuntrum ámin suramsattana nuka penĭké mamurchattawai.

Yus-shuarti umirnaikiatin

⁵ Tura natsatirmesha atumĭ uuntrĭ umirkatarum. Kame yaunchu Yús-Papinium aarma asamtai ashĭ Yus-shuartiram nanĭkaamantu enentáimtumatsuk umirnaikiatarum. Waantu enentáimtuma núnaka Yus nakittiwai. Antsu nanĭkaamantuchu enentáimtuma nuna Yus waitnentak yayawai. Tu aarmaiti.

⁶ Wats, Yus timiá kakaram asamtai, amek nekamam, péejchach enentáijĭaj enentáimtumasta. Nuĩnkĭa tsawant jeantai ni wakerak Yus ámin penĭkerĭ awajtamsattawai. ⁷ Yus ámin ti enentáimturmakui ame itiurchatrum ainia nu Yus ashĭ iiktusta.

⁸ Aneartarum tura ímiastarum. Íwianch atumĭ nemasrĭ ana nu, uunt yawáa nuke, yanak emesraintiaj tusa eak tentaa wekaawai. ⁹ Tura tuke Yus nekas enentáimtusrum surimiaktarum. Ashĭ nuĩnkanam Yusnum atumĭ yachĭ ainia nu átum wáitiarmena núnisaraĩ wáitiainiwai. Nusha kajinmakchatniuitrume. ¹⁰ Wats, ishichik tsawant wáitsarmena nu nanĭkaasmatai Yus ataksha penĭker awajtamsattarme. Tura numi wewe wajana núnisaraĩ ikiakátmartatrume. Tura Yus ikiakárma asarum ni jintiĩn tuke penĭker wekasattarme. Ju Yus tuke in waitnentrantsujik. Tura iisha Jesukristunu asakrin Niijĭaj métek Yus ni shiir pujutainium tuke shiir pujusmintrum tusa achirmakuitĭi. ¹¹ Nú Yúsnasha ashĭ aents shiir enentáimtusartĭ. Tura ashĭ áentsnum ni kakarmarĭ tuke atĭ. Nuke atĭ.

Amĭak áujmamsamu

¹² Serpanujĭ ju papin ishichik áarmaj nuna akupeajai. Serpanu Yusajĭ penĭker wekaak Yusnum winia yatsur ajasuĩti; núnaka nékajai. Yus waitnentrana asa ti yainmakmania nuna enentáimtikeajrume ju papijĭaj. Tura tuke ni waitnenkartutairiĩn wekasatarum tájarne.

¹³ Papirúnianmaya atumajĭ métek Yus achikma áinia nu amikmaatmarme. Winia uchir Markus núnisaraĩ amikmaatmawai.

¹⁴ Yusaj yachĭ ajasu asarum anenaisrum shiir awajnaistarum. Jesukristunu ajasuĩtrumna nuna Yus imiatkinchanum pujustinian suramsarat tusan wakerajai.

Nu atĭ.

PÍTIUR Ataksha papin áarar akupkamu

Pítíur Yus-shuaran áatramiania nu

¹ Wikia ju papin aajna ju Semuñ Pítíruitjai. Jesukrístu akatramu asan ni takarniuríntjai. Ii Yusrj tura in Uwentikramin Jesukrístu umírumsa nuna atumniasha juna áatjarme. Niisha ashí áentsun métekrak enentáimtin asamtai atumsha iijjaj métek Niiniu ajasurme. Nuka ti penkeraiti. ² Yus, tura ii Uuntrj Jesussa nékarmena nú nukap nekaki wéakrumin, Yuska atumin ti nukap yáinmaktatrumé tura ti nekas imiatkinchanum pujustinian suramsattarme. Nuna nekaan tuke núnisan atí tusan wakerajrume.

Yusaj páchitkia atin

³ Yus uunt asa tura ashí túramnia asa, umirtukat tusa achirmakuitji. Nii neka asar atsumajnia nu wáinkiaitji. Yus-shuarti wekasatniusha, tura Nin aneatniusha ii atsumajnia nuna Yuska kakaram asa suramsaitji. ⁴ Niisha uunt asa tura tujinkiachu asa ni chichamén suramsaitji. Nu chichamsha ti kakarmaiti tura ti penkeraiti. Nu chichamjaj atumsha atumí ayashj yajauch wakerana nuyá uwemprarum, Yusaj páchitkia átinian suramsaitrume. ⁵ Yus umirkarme. Yamaikia juna túrataj tusarum kakartiniaitrumé. Ti penker wekasatniuitrumé. Nuyá Yusna nekaatniuitrumé. ⁶ Nuyá yayauch túrashtin íimiashtiniaitrumé. Nuyá katsuñratniuitrumé. Nuyá Yus shiir enentáimtusum wekasatniuitrumé. ⁷ Tura nuyá ashí shuar shiir enentáimtushtiniaitrumé. Tura nu nankaamas ashí shuar aneatniuitrumé.

⁸ Ashí nu túrakrumka, tura tuke túrukum wéakrumka, nakiarchattarme. Túrarum ni takatřj émamkesrum takastatrumé. Tura ii Uuntrj Jesukrístu nekas nekaattarme. ⁹ Tura nuna túruiniatsna nuka, kusurua áanin ániawai. Jesukrístu wakeramurj enentáimtuiniatsui. Ni tunaariya uwemprarmia nuna kajinmatainiawai. ¹⁰ Tuma asamtai yatsurtiram, Yus atumin anaítiamak achirmakurmena nu tuke enentáimsarum wetarum. Túrakrumka penké iniarchattarme. ¹¹ Tura ii Uuntrj Jesukrístu uwentikramprajnia nu, Nii tuke akupeana nuj, nakittsuk shiir awaintiamattarme.

¹² Tuma asamtai nékarminij tura Yusna nekas ana nuyá kanaatsrumniñ tuke enentáimtikratjarme. ¹³⁻¹⁴ Nekaatarum. Winia jákatniurun jeatema nuna ii Uuntrj Jesukrístu ujat kayi. Tuma asamtai iwiaaku pujajna juik atumin tuke enentáimpratarum tusan jintinratniuitjarme, tu enentáimsajai. ¹⁵ Tura wi jakamtai, wi aajna juna tuke kajinmatkijrum tusan, wi jeajna nuna túrattajai.

Kristu waantu ajasun wáinkiarminia nu

¹⁶ Ii Uuntrj Jesukrístu kakarmari tura ni táratniurj etserkamajnia nu, aya áentsnumia ántar chichamchayui. Antsu imia ii jijjaj Uunt Jesukrístu waantu ajasu wáinkia asar ujakmajrume. ¹⁷ Tura Apa Yus Jesukrístun shiir waantu awajsamia nuj, ni imiá shiir pujutairiya chichaak tmiayi, “Juika winia ti aneamur Uchiruiti. Nin ti wararjai.” ¹⁸ Iisha naint “Yusna” tájnia nuj Niijjaj pujá asar nu nayaimpinmaya chichaamu paant antukmaji.

¹⁹ Tura nuna nankaamas ti nekasa nu, Yúsnan etserin yaunchu etserkarmia nusha nékaji. Ju étserma jusha, tsawant tsawaatsain kiritniunam ji keak tsáapin awajeana áintsan asamtai, péñker enentáimta asarum péñker túrarme. Tura Kristu taa, yánkuam etsantea núnisan atumí enentáin ashí paant awajsattawai. Tura nu tsawant jeatsain nu étserma tuke péñker enentáimtustarum. ²⁰ Tura ju emka nekaatarum. Shuar aya ni enentáimmiarijijain, Yusa Wakanijjainchu, Yus-Chicham urukamtai tu chicháa nuna nekaatniun jeatsui. ²¹ Warí, Yúsnan etserin yaunchu etserkarmia nu, aya ni wakeramurijijain tícharmiayi. Nu áishmankan enentáin Yus pujursarmiyai. Tuma asa ni tiarmia nuna Yusa Wakanj jintintiam tiarmiayi.

2

*Wait chichaman unuiniainia nu
(Jútas 4-13)*

¹ Tura Israer-shuarnum wait chichaman etserniusha páchitkiarmiayi. Atumijncha wait chichaman unuiniaw páchitkia ártatui. Niisha awajimtikrampratniun wakeruiniak wáitian ti yajauchin úkar unuiniarartatui. Tura “Uunt Jesus uwentikrumia nusha ántraití” tiartatui. Nuna takui ni amuukatniurjisha wárik jeartiatui. ² Tura untsurj shuar ni yajauch túruiniamurj in sar métek túrawartatui. Iis, “Yus-Chichaman unuiniatjai” tuñniayatán imiá yajauch túruiniakui untsurj aents “Yus-Chicham ántraití” tiartatui. ³ Kuítian ti wakeruiniá ásar, wait chichaman unuiniarar akiam kuítriniawartatui. Tura nú shuar yaunchu

Yus jákatniunam sumamtikiawarma ásar, ni amuukatin tsawantri jeatemayi. ⁴ ¿Warí? Yuska ni suntari nayaimpiniam pujuarmia nunasha penké tsankurachmiayi. Antsu nayaimpinmaya jinium akupkarmiayi. Tura nekapsatin tsawant jeatsajin kiritniunam jinkiamu emetamu pujuiniawai. ⁵ Yáunchuya shuarnasha Yus tsankurachmiayi. Antsu amuukarat tusa amaarkatniun akuptukarmiayi. Antsu aya Nuain, Yusjaj wekasatniun etserin asantai ni shuarj siasi armia nujaj uwentikramiayi. ⁶ Enentáimpratarum. Sutuma pépruncha tura Kumura pépruncha nayaimpinmaya jin akuptuk Yus mash amukmiayi. Aya yúnkunmik awajsamiayi. Ukunam nu túrunamun nekaawar, shuar tunáa túratin tsúumainian nekaawarat tusa túramiayi. ⁷ Tura Yus Ráutan uwentikramiayi. Péñker shuar asa, Sutumanmaya shuar imiá yajauch ásar tunáa túruiniakui, Raut kúntuts enentáimsamiayi. ⁸ Péñker áishman asa, nuyá shuara yajauchirin wáitaiiniak, ni enentáim péñker asantai tuke tsawant kúntuts enentáimiuk wáitmiayi. ⁹ Tura incha tunaan iniakturmakrin, nu tunaanum nupetnakchati tusa Uunt Yus uwentikrampramniatiji, ni umirka asakrin. Túrasa yajauch shuárnaka nekapsatin tsawant jeakui ti asutniáwarat tusa Yus yámaiikia apujeawai.

¹⁰ Tura Yus akupeana nuna umirkatniun nakitrar ni yajauch wakeramurjin túruinia nunasha Yuska nekas asutiáttawai. Enentáimcha áiniawai. Tura ni wakeramurjinak wakeruiniawai. Niijjaj nankaamas akupin ainia nuna yajauch áujmatainiawai. ¹¹ Warí, imia Yusa suntari Yusaj matsatainia nu, nuna túratniun tsúumainiawai. Nankaamas kakaram tura nankaamas uunt áiniayat nu akupniun katsekainiatsui.

¹² Nu áishmansha enentáincha yajasma núnin áiniawai. Achikiar mantamnatniuk akiinia áiniawai. Enentáimtsuk nánkamsar yajauchin chichainiawai. Tuma ásar yajasma núnisaj jákartatui. ¹³ Chikichan wáitkiamia áintsaj wáitsartatui. Tuke tsawant ni wakeramunak túruiniak “waraajaj” tuiniawai. Tura atumjaj írnan yurumáiniayataj atumin anankramawar warainiawai. Nuka natsantaiti.

¹⁴ Nuwan wakerutskeka íiniatsui. Tunaan yawetainiatsui. Yúpichuch ainia nú shuaran netse túratniun wakerumtikiainiawai. Kuítian wakeruktinniasa ti nékainiawai. Jákatniunam sumamawaru áiniawai. ¹⁵ Yúsnumaanj naka wétsuk awajirara. Peura uchrirj Paraam Yúsnan etserniuitiat yaunchu awajimia núnisaraj awajiniawai ju shuar. Paraamka tunaan tura, kuítian achikiniian ti wakerukmiayi. ¹⁶ Tura niisha tunáa túratajtsa weaj Yuska umpuun chichachun aents chichaana nujaj métek chichamtikiamiayi. Nuñkia umpuuru timia nujaj Yúsnan etserin ni netse túratniurjin enentáimiar iniaismamiayi.

¹⁷ Nu áishmansha yumirmat kuyua núnis áiniawai. Tura núnisaj yuranmisha kjarat nase umpuim menkaana nu, yumi ajuarcha ásar, penké ántar áiniawai. Warí, Yus-Chichamjaj áentsun yainiainiatsui. Niisha imiá kirit ámanun tuke pujustin áiniawai. ¹⁸ Niisha ti chichainiayat ántar chichainiawai. Yajauch túratniujaj tura ayash wákera nujajisha páchim túriarmia nuyá kanakiarua nú shuaran ataksha tunaanum ajuartajtsa wakeruiniawai. ¹⁹ “Iiya núnis túrakuma ankant átatrume” tu wénawai. Túrasa imia niñki ni tunaarjin emetamu áiniawai. Páantchakait. Shuar warí tunaajajim nupetnaka, nuna emetamurinti. ²⁰ Kame shuar, uunt Jesukristu uwentikiartin ana nuna chichamen nékainiak ju nunkanam yajauch ainia nuyá uwempra ainia nu, tunáa nupetkam atak yajauchiniam iniainiakka, nuik pujumia nujajinkia nankaamas yamá imiá yajauch pujuiniawai. ²¹ Yusa akupkamurjin imiá péñkera nuna Yus nú shuarnasha súsarimiayi. Túrasa nékainiayat tunaanum waketiariu ásar ti asutniáwartatui. Tuma asantai, nekas jintia nekaachuítikuñka maak árainti. ²² Tíchamukait, “yawá iyak ataksha yúawai,” tura, “kuchisha imiainiuitiat ataksha tsakusnum maajkimui.” Nu áishmansha núnisaj yajauchiniam ataksha wáketainiawai.

3

Uunta tátintri

¹ Aneamu yatsurtiram ju papin jimiara áatjarne. Mai papinium winia jintintiamurjaj atumí chamir enentáim enentáimtikratjarum tusan wakerajrume. ² Yúsnan etserin, péñker wekain armia nuna etserkamurj enentáimturatun. Tura ii Uuntri akupkamurjin ni akatramurijjaj ujatnakarmia nusha enentáimpratarum. Jesukristu uwentikrampramaj nuna chichamen tajai.

³ Jusha emka nekaatarum. Amuamu tsawantin Yúsnan wishikin wantinkiertatui. Tura niisha ni yajauch wakeramurjin túrusar wekasartatui. ⁴ Tura juna tiartatui. “¿Kístuka “wi atak tátatjai” timia nusha urukuit? Warí, ii uuntri yaunchu kajinikarmia nuyá yapaajáchmaiti. Yus yaunchu ju nunkan najanamia nuyá yamaisha tuke núniskete” tiartatui. ⁵ Túrasa nunkancha nayaimpincha Yus yaunchu najanamia nuna nekaatniun nakitiainiawai. Yusa chichamejaj nuñka entsaya jinikimiayi tura nuñkasha entsá nanatrawai, Yus timia nujaj métek. ⁶ Tura ukunam nu nunkan amaarkamujaj Yus emesramiayi. Ashí nuna nekaatniun nakitiainiawai. ⁷ Tura Yus tiniu asantai nayaimpisha nuñkasha yamáiya nuka

jijiaj emesnarat tusa ikiusma áiniawai. Yus áentsun nekapsattana nu tsawantaj yajauch aents emesnartatui; tura jisha nu tsawantaj nunkancha nayaimpincha áesattawai.

⁸ Tura jusha, aneamu yatsurtiram, enentáimsatarum. Uunt Krístujainkia chikichik tsawant mir uwiya núniskete; mir uwisha chikichik tsawanta núniskete. ⁹ Uunt Kristu, “atak tátatjai” tana nuna umitsuk menkakashtatui. Áyatik áentsti “wau taatsui” taji. ¿Urukantai wau taatsua? In áentstin nákarmaji. Shuar chikichikísha menkakajin tusa nakitiawai. Antsu ashí shuar enentáin yapajjáwarat tusa wakerawai. ¹⁰ Túrasha Uunta tsawantrj aya aneachma jeattawai. Kasa aya aneachma kiritniunam taana núnisanj tátatui. Nu tsawantin nayaimpisha ipiamta núnis charáa timiatai menkakattawai. Tura nuj ashí írrunna núurtiuk esaawartatui. Tura nunqasha tura ashí írrunna nusha esaawartatui.

¹¹ Ashí nu emesnartin neka asarum atumsha imiá nekas Yus tuke enentáimtusrum, takamtsuk umirkarum wekasatniuitrume. ¹² Yusa tsawantrj wárik tati tusar, jintiá ímprusar nákastiniatji. Nu tsawantaj nayaimpisha esáa emesnartatui, tura ashí írrunna núurtiuk ti tsuer ajas entsamnattawai. ¹³ Tura iikia yamaram nayaimpisha, yamaram nunqasha ati tusar nákaji. Nu átatui, túmiayi Yus. Tura nujsha aya péñkerak átatui.

¹⁴ Nu tuma asantai, aneamu yatsurtiram, ju túrunati tusarum nákarmena nuj, imiatkinchanum wekasam chamir enentáimjaj makuuchmin Yus wáitkiati tusarum wekasatarum. ¹⁵ Ju nekaatarum. In uwentikramprataj tusa Yus ti nákarmaji. Ii aneamu yachi Páprusha núnisanj Yus ni nekatairjin susamia túmiatrusanj áatramprarmame. ¹⁶ Ashí papí aarmia nuj Pápruka wí tajana nuna chichaawai. Kame ni áarmarj chikichka ishichik nekaachminiusha áiniawai. Nékachu ainia nú shuarsha, tura Yúsnum tariarcha ainia nusha Papru áarman yapajjáwar nusháa jintintiainiawai. Tura chikich chichamsha Yus-Chichamnumiá ana nuna núnisanj túruiniawai. Túmainiakka ninjki emesmamainiawai.

¹⁷ Wátsek, aneamu yatsurtiram, túruntsajin ujakjarmena nu neka asarum, yajauch shuar ananjramattsa wakerutmainiak awajimtikrurajin tusarum, tura Yusaj tariarurmena nuyá iniarajj tusarum anearum wekasatarum. ¹⁸ Tura ii Uuntrj Jesukristu in Uwentikkiartin ana nu, yamáí nékarmena nú nanqaamas nekaatarum. Tura enentáimin nú nanqaamas tariarum wetarum. Yamaisha tura tuke, ii Uuntrj Jesukristu náarjin uunt awájsartí. Nu atí.

JUAN Emka papin áarar akupkamu

Tuke iwaaku átinia nérentin Chicham ana nu

¹ Ashí nañkamamia nú yaunchu Yusa Uchiri tuke pujuuyayi. Nusha iisha anturkaitji. Nekas ii jijjijai wáinkiaitji. Wáinkiarsha ii uwejejaisha antiníkiuitji. Niisha Yúsan ti paant awajeak, Chicham tímíniati. Tura tuke iwiaaku átinia nérennui. Nuna áateajrume. ² Iwiaaku átinia nérenniusha paant nekanamiayi, nusha Jesukristuítu. Iisha Nii wáinkia asar nu étsereaji. Tura tuke iwiaaku átinia nérenniurí asa tuke Yus Apajajai pujuyayi. Tura yamaikia ini paant ajatramsakrin atumniasha ujaajrume. ³ Ii Yus Apajajisha ni Uchiri Jesukristujajisha tsaniñkiar nekas chikichik ajaji. Tura atumsha núnisrumek iijjijai chikichik ajasuk túsar wáinkiamajnia nuna anturkamajnia nunasha ujaajrume. ⁴ Ti shiir warastarum tusan juna áatjarne.

Yus tsáapniniati

⁵ Yus imiá tsáapnin asamtai kiritin Njinkia penké atsawai. Nu chichaman Jesukristu in unuítiamprakrin nuna atumniasha ujaajrume. ⁶ “Nijjijai tsaniñkia pujaji” táyatar kiritniunam pujustinia áintsar tunaanum pujakrikia wáitrají tura nekas péñker ana nu túratsji. ⁷ Yuska tuke tsáapniniun pujuwiti. Iisha núnisrik tuke tsáapniniun pujakrikia nuámtak nawamnaikiar pujuiniaji. Túrakrin Yus ni Uchiri Jesukristu numpéjají ashí ii tunaari japirtamji.

⁸ “Wí tunaan túrichuitjai” tákurkia ímia iik ananmamaji. Nekas ana nu nékatsji. ⁹ Antsu ii tunáari Yus paant ujakrinkia Yuska tsaníkurtamprattaji. Tura ii tunaarin asakátramprattaji. Yuska ti penker asa Nii tana nuna tímíatrusan umikmin asa túrattawai. ¹⁰ Kame “Tunaan túrichuitjai” tákurkia nujají “Yus wáitriiniati” taji. Ni chichamesha ii enentáin pujurtamtsuji.

2

Jesukristu in Yúsan áujturmají

¹ Yus-shuartiram, tunaanum iniaarajirum tusan ju papí áateajrume. Túrasha Yus-shuar tunáa túramtañkia Apa Yusan ii áujturmau awai. Nuka Jesukristuítu. Niisha ti penkeraiti. Niisha Yúsan áujturmakui Yusjají ataksha iwiaraar pujustatji. ² Jesukristu ii tunaarin asakártaj tusa jarutramkamajji. Túrasha aya íiniunkechu antsu ashí shuara tunaarin asakártaj tusa jarukmiayi.

³ Yus tana nu umirkurkia nuikia Yus nekas nékaitji. ⁴ Tura shuar “Yúsan nékaitjai” tayat Yus tana nuna umirchakka wáitrawai. Nekasa nuka ni enentáin atsawai. ⁵ Antsu shuar Yus tana nuna umireakka Yúsan ti shiir aneawai. Túrakur Nijjijají tsaniñkiar pujamu nékaji. ⁶ “Yusjají tsaniñkia wekaajai” tana nú shuar Jesukristu wekasamia núnisan wekasatniuiti.

Yamaram akupkamu

⁷ Yatsuru, yamaram akupkamun áattsujrume. Áyatik yámankamtaiknumiá antukmiarum nunak tájarne. Ashí atumin jintintiamu yaunchu akupkamuiti. ⁸ Túmaitiat nekas yamarma áitkiasnak áateajrume. Nu akupkamun Kristusha nekas iniakmasmai. Atumjíncha nu akupkamu nekas paant awajsamuiti. Nujají kiritin menkaatemka asamtai tura nekas tsaapniñkia paant tsaapnirtasa pujaku ni akupkamun ataksháa áateajrume.

⁹ Shuar “tsáapniniun pujajai” táyat chíkich Yus-shuaran nakítiakka tuke kiritniunam wekaawai. ¹⁰ Yus-shuaran aneana nu nekas tsáapniniun pujawai. Niisha iniaatsuk chikichnasha tunaanum ajuarhamniati. ¹¹ Tura shuar chíkich Yus-shuaran nakítiakka kiritniunam tuke wekaawai. Tura kiritniunam íimiu asa ituraani wea nuna nékatsui.

¹² Uchitirmincha, Jesukristu jakamujají atumí tunaari tsaníkurnaru asakrumin juna áateajrume. ¹³ Úntirmincha yámankamtaiknumiá tuke pujuuya nu nekáa asakrumin juna áateajrume. Únmarutirmincha uunt iwianch nupetka asakrumin juna áateajrume.

Uchitirmincha, Yus Apa nekáa asakrumin áateajrume. ¹⁴ Úntirmincha yámankamtaiknumiá tuke pujuuya nu nekáa asakrumin juna áatjarne. Únmarutirmincha atumí enentáijjijai Yus-Chicham umirkarum kakaram asarum íwianch nupetka asakrumin juna áatjarne.

¹⁵⁻¹⁷ Aya áentsnumiá ana nu yakiyanchuiti. Apa Yus súsachuiti. ¿Warimpiait nu? Júiti: ame ayashim wakerana nusha, ame ísam takustaj támena nusha, tura nañkaamantu ajastin. Nuka ju nunñkanmayá áiniawai. Shuar aya nunak wakerak Yúsnaka aneatsui. Kame ju nunñkasha amuukattawai. Ashí nu wakeruktincha ti nekas amuukattawai. Túrasha shuar

Yusa wakeramurin umiana nu tuke iwiaaku pujustatui Yusjaj. Nu asamtai atumsha ju nunkanam ana nu pachikiairap. Tura aya juyá ana nu aya tákustin enentáimsáip.

Nekas chicham tura wait chicham

¹⁸ Uchirú, amuukatin tsawant jeatemayi. Atumsha Kristu nemasrj tátin antukuitrume. Yamaikia untsurj Kristu nemasrj wantinkarmatai amuukatin tsawant jeatemayi. ¹⁹ Nusha ii weeak ármayi. Túmaitiat nekas Yus-shuar ácharmayi. Nekas Yus-shuar ániakka tuke iijjaj irunar pujuaráayi. Tura jíinkarmatai nekas Yus-shuarcha ainia nu paant nekanamniaiti.

²⁰ Antsu atumniaka Yusa Shiir Wakanin Kristu suramsamtai ashí paant nékarme. ²¹ Nékachuitrume tu enentáimkiun áattsujrume. Antsu nekas chicham ana nu neka asakrumin paant áatjarme. Wáit-chichamsha nekas-chichamsha penké nushaachuk ainia.

²² Wáitrin júiti: Jesusan “Yus anaikiamuka Kristuchuiti” tana núiti. Núiti nekas Kristu nemasrj. Yus Apancha ni Uchirincha nakitia asa Kristu nemasrinti. ²³ Yusa Uchirin nakitiainia nu Yus Apajajsha tsanin pujatsui. Tura Yusa Uchirin shiir awajea nu, Yus Apajajsha tsanin pujawai.

²⁴ Yámankamtaiknumia antukmiarum nu atumi enentáin pujurtamsati. Nu túrakrum atumsha Yusa Uchirijjajsha Yus Apajajsha tuke tsaninkrum pujustatrume. ²⁵ Jesukristusha Niijjaj tuke iwiaaku pujustinian tsankatramkaitji.

²⁶ Anankartin írunkui juna áatjarme. ²⁷ Atumniasha Jesukristu Yusa Shiir Wakanin suramsakrumin, nu Wakan tuke pujurtamkurin shuar jintinramatin atsumatrum. Antsu Yusa Wakan ashí jintinramprume. Ni jintinrammasha imiá nekas asa wáitchaiti. Tuma asamtai Nii jintinramna áintsarum Kristujaj tuke tsaninkrum pujustarum.

²⁸ Yamaikia, uchiru, Kristujaj tuke tsaninkrum wekasatarum. Nu túrakrikia Nii támatai natsamtsuk ti shiir inkiunaikatjaj. ²⁹ Atumsha Jesukristu ti penkera nu nékarme. Núnisan ashí shuar penkeran túruinia nuka Yusa uchirj ániawai. Nusha nekaatarum.

3

Yusa uchirj ániiana nu

¹ Maa, shiir enentáimpratarum. Yus Apa ti anenma asa “winia uchir” tu anaitiamkaitji. Kame nekas ni uchirintji. Tuma asakrin ju nunkanmaya Yus-shuarcha nekarmainiatsji. Kame Yushasha nékainiatsui. ² Aneamu yatsurtirmea, juna tájarme: nekas Yusa uchirj ajasuitji. Kame ukunam urukuk átajj nusha nékatsji. Túrasha ju paant nékaji: Jesukristu támatai imia Nii paant wáinkiar Niijjaj métek ajastatji. ³ Tura shuar shiir enentáijjaj nuna náakaka imia ninji shiir awajmamui Jesukristujaj métek shiir atajai tusa.

⁴ Shuar tunáa túrakka Yus akupkamu umirkachuiti. Kame núiti tunaaka Yus akupkamu umirkashtin. ⁵ Jesukristu ii tunaarj asakártaj tusa ju nunkanam támia nu nékarme. Tura Ninkia tunaan túrichuyayi. ⁶ Tuma asamtai shuar Niijjaj tsanin wekáa nuka tunaanum wekaatsui. Antsu shuar tunaanum wekaakka nu shuar Kristum wáinchaiti, núnisan nékachuiti. ⁷ Uchiru, shuar anankramawairap. Penker túrinkia Kristu ti penker asamtai niisha penkeraiti. ⁸ Antsu shuar tunaanum wekaana nu iwianchnaiti íwianch tuke tunaan túrin asamtai. Yusa Uchirj ju nunkanam táwiti ashí íwianch túramun emesrataj tusa.

⁹ Shuar nekas Yusjaj akiinia nu tunaanum wekaatsui. Yusa uchirj asa Yusa iwiaakmar-ijjaj wekaawai. Tuma asa tunaanum tuke wekaatsui. ¹⁰ Shuar penker túratsna nuka tura Yus-shuaran kajera nuka Yus-shuarchaiti. Nujaj Yusa uchirj ainia nusha tura iwianchi uchirj ainia nusha paant nekaamniaiti.

Mai anenai ajatin

¹¹ Atumsha yámankamtaiknumia chicham antukmiarum nu júiti: mai anenai ajartin. ¹² Iisha Kaínkia áanin áchatniuitji. Íwianch-shuar asa ni yachin máamiayi. Tura zurukamtai maamia? Enentaimprata. Nii yajauch asa tura ni yachi penker asamtai máamiayi.

¹³ Yatsurtiram, ju nunkanmaya shuar nakitramainiakui ti enentáimsairap. ¹⁴ Iikia jákatniummaya uwempra asar¹ nekas iwiaaku pujaji. Túmakur Yus-shuar ainia nu aneaji. Nujaj yamaram iwiaakma takakjinia nu imiá páantaiti. Shuar Yus-shuaran aneachkunka tuke jákatnium wekaawai. ¹⁵ Shuar Yus-shuaran nakitiaakka mankartinia núnisaiti. Tura mankartinkia tuke amuicha iwiaakmanum pujuiniatsui. Nuka nékaji. ¹⁶ Jesukristu in jarutramka asakrin nujaj nekas in anenmaj nu nékaji. Iisha núnisrik Yus-shuar ainia nu ti aneakar ni yaintai tusar jarukmin átiniaitji. ¹⁷ Túrasha shuar chíkich Yus-shuar atsumana nuna takakiat waitnetchkunka nekas ni enentáijjaj Yúsán aneawash. ¹⁸ Uchiru, aya chíchamjain anenain áchatniuitji antsu nekas aneniakur penker túrar yáiniaiktinaitji.

Yusai natsamtsuk jeamniaitji

¹⁹ Jujaj ii Yúsaj sapijmiatsuk jeatniusha tura nekas Yus-shuaraitji nu nekaatniusha nekapmampmarniaitji. ²⁰ Ii enentá yajauch túramun enentáimtikramkurnisha Yus iijjaj nankaamas ashí mash nékatsuk. ²¹ Tura, aneamu yatsurtiram, ii enentá yajauch túramun enentáimtikramchakrinkia Yúsaj sapijmiatsuk jeamniaitji. ²² Tura ni wakeramu túrakrikia tura ni chichamesha umiru asakrin ashí ii seaj nuna suramsattaji. ²³ Júiti Yus akupkamu: ni Uchirj Jesukristu nekas enentáimustin tura Kristu timia áintsarik shuartisha mai anenai ajartin. ²⁴ Shuar ni chichamen umía nuka Yusjaj tsanin wekaawai tura Yus niijjaj tsanin wekaawai. Mai chikichik ajasu ániawai. Tura Yusa Wakanj ii enentáin pujá asamtai nujaj Yus iijjaj tsanin wekaana nu nékaji.

4

Yusa Wakanisha tura Kristu nemasrj wakancha

¹ Aneamu yatsuru, untsurj shuar wáitruiniak “wi Yúsnan etserniuitjai” tuiniawai. Tuma asamtai ashí shuar “wi Yusa Wakanin takakkun chichaajai” tuinia nu péñker nekapsuk enentáimtusairap. Antsu ísrum nekas Yusa Wakanjpiashit tura chikich wakaniashit nu nekaatarum. ² Jujaj nekapsarum ya nekas Yusa Wakanin takaka nu nekaattarme: Shuar “Jesus Yusa Uchirj Kristuítai nekas aents ajas ayashimkiamiayi” tana nu Yusa Wakanin nekas takakui. ³ Tura Jesusan tu enentáimtatsna nuka Yusa Wakanin takaksui antsu Kristu nemasrj wakanin takakui. Kame Kristu nemasrj wakan tatin tama ántichukaitrum. Nu wakan yamaikia ju nunkanam táwiti.

⁴ Uchiru, átumka Yusna asarum Yus atumí enentáin pujawai. Tura ju nunkanmaya shuara enentáin íwianch pujawai. Atumjin pujana nuka niijjaj nankaamas kakaram asamtai wáitrin ainia nu nupetkairume. ⁵ Niisha ju nunkanmaya ásar aya ju nunkanmayan áujmatainiawai. Túmainiakui ju nunkanmaya shuar ti penker anturainiawai. ⁶ Antsu iikia Yúsnaitji. Tuma asakrin Yúsan nékainia nu anturtamainiaji. Tura Yúsnachu ainia nu anturtamainiajsi. Nujaj nekas Wakanin takakusha tura wáitrin wakanin takakusha nekaamniaiti.

Yus tuke anenkratniuiti

⁷ Aneamu yatsuru, anenaitin Yúsnumia asamtai mai anenai ajartai. Shuar anenkratniua nuka Yusa uchirj asa Yúsnancha nékawai. ⁸ Shuar anenkratcha nuka Yúsnanka nékatsui. Kame Yuska tuke anenkratniuiti. ⁹ Tuma asa ni Uchirj chikichkiniak ju nunkanam akupturmakmiaji. Iisha ni túrunamujaj nekas iwiaaku pujaji. Nujaj Yus in yáinmak ni anenkrattain paant iniakturmasmiaji. ¹⁰ Jujaj nekas anenkrattainkia paant nekanamniaiti: ii Yus aneaj núchaiti. Antsu ii ti tunáa árinin Nii aneachmaitiatan Yuska ti anenma asa ni Uchirj ii tunaarin asakarat tusa akupturmakmiaj nujaj nekas nekanamniaiti.

¹¹ Aneamu yatsuru, Yus núnis anenma asakrin iisha núnisrik mai anenai ajartai. ¹² Chikichikisha Yúsan wáinkiachuiti. Túmaitiat mai anenai ajakrikia Yus ii enentáin pujurtamkui Niijjaj métek anenkratin ajaji. ¹³ Yus ni Wakanin suramsa asakrin Yus iijjaj tsanin wekaana nusha tura ii Niijjaj tsaninkia wekaajnia nusha, nujaj nékaji. ¹⁴ Yus Apa ni Uchirj ashí shuaran uwemtikrarat tusa ju nunkanam akupkamia nu wáinkia asar' étsereaji. ¹⁵ “Jesus Yusa Uchirinti” tana nu shuarjaj Yus tsanin wekaawai tura niisha Yusjaj tsanin wekaawai. Mai chikichik ajasu ániawai.

¹⁶ Yus in anenmajnia nu ti nekas nékaji. Yus tuke anenkratniuiti. Tuma asamtai shuar anenkartakka Yusjaj tsanin wekaawai tura Yussa niijjaj tsanin wekaawai. Mai chikichik ajasu ániawai. ¹⁷ Núnisar ti penker anenkartin ajaji. Túrar' sümamtkiatin tsawantaj natsamtsuk wajastatji. Kame ju nunkanam pujayatrik Jesukristujaj méteketji. ¹⁸ Nekas anenaiyamunam sápij atsawai. Antsu nekas anenaiyamunam sápij menkaawai. Aya asutiátin akui sapijmiaktinaiti. Tuma asamtai ántar sapijmiana nu nekas anenkratchaiti.

¹⁹ Yus emka in anenma asakrin iisha Nii aneaji. ²⁰ Tura shuar “wi Yúsan aneajai” táyat chikich Yus-shuaran nakitiakka nuka wáitriniaiti. Kame Yus-shuaran tuke wainnia nuna aneachkunka jíturak Yusan wáinchasha aneat? ²¹ Yus incha juna turammiaji: Yúsan anea nu shuar chikich Yus-shuarnasha aneatniuiti.

5

Ju nunkanmaya írrunna nu núpeteajji

¹ Ashí “Jesus Yusa Uchirj Kristuítai” tu enentáimtana nú shuar Yusa uchirinti. Tura aparj aneakrikia ni uchirjsha aneattaji. ² Yus Apa aneakur tura Nii wakera nu umirkur Yusa uchirjsha ashí aneattaji. ³⁻⁴ Yus aneakur Nii tana nu umiktatji. Ashí Yusa uchirija nu Yúsan nekas enentáimta asa, ashí ju nunkanmaya írrunna nuna núpeteawai. Nu asamtai Yus tana nu umirkatin itiurchatchaiti. ⁵ Aya “Jesus Yusa Uchirinti” tu enentáimtana nú shuar ju nunkanmaya ana nuna awakkamniaiti.

Jesukristu "Yusa Uchirinti" tu etserainia nu

⁶ Jesukristu jú nuñkanam taa entsajai imiankui Yus nayaimpinmaya chichaak "Juka winia aneamu Uchiruiti" tímiayi. Tura nuyá Jesus jakamtai ni numpé puarmiayi. Entsajai imianin ni takatrin nankamamiayi túrasha in jarutramak ni takatrin amukmiayi jú nuñkanam. Chikichinkia túrutsuk mai metek túra asamtai Yusa Uchiríya nu paant nekanamniaiti. Yusa Wakanjsha tuke nekas tiniua nu métek tawai. ⁷⁻⁸ Nu asamtai menaint "Yusa Uchirinti" Jesusan tuiniawai: Nayaimpiniam Yus Apa tura Jesukristu, Chícham aa nu, tura Yus Wakancha; nuñkanmasha Yus Wakancha, entsasha tura numpasha. Mash métekrak tuiniawai. ⁹ Aents étserainiakui ántureaji. Nuna nankaamas Yus ni Uchirín tana nu nekas anturkatniuitji. ¹⁰ Yusa Uchirín enentáimtana nú shuar ni enentáincha nékawai. Antsu Yus ni Uchirín timian enentáimtatsna nú shuar Yúsán enentáimtachu asa Yúsán "wáitriniaiti" tawai. ¹¹ Yus ni Uchirín timia júiti: Tuke iwiaaku pujutai nérenniuiti tura nu iwiaakmancha in suramsaitji. ¹² Yusa Uchiríjjai tsanin wekaana nú shuar, nu iwiaakmajai iwiaaku pujuiniawai. Tura Yusa Uchiríjjai tsanin wekaatsna nú shuar, nu iwiaaku átinnium pujatsui.

Amuak Yus nekas enentáimtustinian áarmiania nu

¹³ Yusa Uchirí nekas enentáimtakrum tuke amuicha iwiaakmajai iwiaaku pujarme. Nu nekaatarum tusan júna áatjarne.

¹⁴⁻¹⁵ Yus wakeramujai métek seakrinkia anturtamji. Tura anturtamkurin ii seamaj nu nekas takusua nu enentáimpramniaitji. Nu neka asar Yus ti shiir enentáimtaji.

¹⁶ Tunáa awai jákatniunam júana nu. Shuar nu tunaan túramtañkia Yus áujtustin ántraiti. Tura shuar chikich tunaan túrakuñkia nuka nekas Yus áujtustiniaiti. Nekas jákatniunam júatsna nú tunaan túraitkiuñkia iwiaaku átinian Yus susattawai. ¹⁷ Ashí yajauch' ana nuka tunaiti. Tura jákatniunam júatsna nú tunaasha awai.

¹⁸ Nekas Yusjai akiinia nú shuar tunaanum tuke wekaatsui. Antsu Yusa Uchirí nin ti penker wainkiui íwianch antñkiachminiaiti.

¹⁹ Iikia nekas Yúsnaítji tura ashí jú nuñkanmaya shuar iwianchnia áiniawai. ²⁰ Yusa Uchirí jú nuñkanam taa nekas-Yus aa nuna paant jintinramji. Yusa Uchirí Jesukristujai tsaninñkia wekaakur nekas-Yusa nujajisha tsaninñkiar wekaaji. Nekas-Yus asa tuke iwiaaku átinia nuna nérenniuiti. ²¹ Uchirú, ántar-yus írunna nuñ pachiinkiairap. Antsu nujai aneatarum.

Nuke atí.

JUAN Ataksha papin aar akupkamu

Nekasa nunasha tura anenaitniuncha ujaawai

¹ Wi Juan Yus-shuara uuntri asan ii umai Yus achikma nuna tura ni uchirincha ju papin áateajai. Wisha nekas an atumin aneajrume. Tura aya wikichu antsu ashí Yus-shuar ainia nusha nekas chichaman nekaawaru ásar atumin anenmarme. ² Nekas-chicham tuke amuutsuk ii enentáin pujá asamtai aneajrume. ³ Yus ii Aparisha tura ii Uuntri Jesukristusha, Yus Apa Uchiri asa, atumin anenmak imiatkinchanum shiir pujustinian waitnentramak yainmakarti. Nujai nekas-chicham nekaarum anenaittiarme.

⁴ Ame uchiram Yus Apa akupkamujai métek umiiniakui nuna nekaan ti shiir enentáimprajai. Nekas-chichaman umin áiniawai. ⁵ Yamaikia, umaru, tájame: mai anenai ajartai. Yamaram akupkamun áattsujme antsu yamañkamtaik antukmiaj nunak tájame. ⁶ Nekas anenkartinia nú shuar Yus akupkamun uminiaiti. Tura Yus akupkamuka “anenkartin tuke atarum” tawai. Nusha yamañkamtaiknumia antukuitrume.

Anankartincha írunui

⁷ Ju nunkanam anankartincha ti írunui. Jesukristu nekas aents ajas akiiniamia nuna enentáimtuiniatsui. Nu shuar anankartin ásar Kristu nemasri áiniawai. ⁸ Nu shuarjai aneartarum. Yajauch shuar ántar yayakrumin Yus átum takasman métek akirmakchamniaiti. Antsu aneara takasakrumin Yus métek akirmakarmi.

⁹ Ashí shuar Kristu jintiamun iniais “nankaamas nekajai” tana nu, Yúsnachuiti. Antsu Kristu jintiamun umiana nu shuar Yus Apajajisha tura ni Uchirijjajisha mai tsaniñ pujawai. ¹⁰ Shuar Kristu chichamen jintiachu atumi jeen írmástaj tusa jeakui awayáwairap tura “shiir taume” tiirap. ¹¹ Kame nu shuar “shiir taume” tákumka nu shuar yajauch jintiamu jímiareame.

Umíamu chicham

¹² Ti nukap atumjai áujmatsatniun wakerajai. Túrasha ju papinium mashi áatrashtatjarne. Antsu imia wiki atumin iyakun jeátjai. Nuyá naka chichasar ti shiir warastatji.

¹³ Ame kaim Yus achikma nuna uchiri amikmaatmainiawai.

Nuke atí.

JUAN

Nuyá Ukunam papin aar akupkamu

Kayu ti penker shuaraiti

¹ Wi Juan Yus-shuara uuntrj asan winia amikrun Kayun ju papin áateajai. Wisha ti nekas aneajme. ² Aneamu yatsurú, Yusjaj penker wekaakum ame wakanim penker pujana núnisan ame ayashmisha penker atí tusan Yúsan áujtajme. ³ Ame nekas chicham umirman shuar juj taar ujatkmayai. Tura nuna antukan ti warasmajai. ⁴ Yus-shuar nekas chichaman uminiakui imiá shiir enentáimtuiniyajai.

⁵ Aneamu yatsurú, chíkich Yus-shuar ti penker yayame. Kame yajaya yujainia nusha nekas yayame. Nu péñkeraiti. ⁶ Nu shuar ame nekas anenamun juj taar Yus-shuar iruntramunam etserkarai. Ataksha irauwenakui atsumainiana nu súsam shiir akupkarta. Péñker wáinkiumka Yus shiir enentáimtikrattame. ⁷ Nu shuar Jesukristun takarsatai tusar wekainiawai. Túrawar Yus-shuarcha ainia nuna kuítrijjaj yurumátniun nakitrarmatai ⁸ ii Yus-shuartikia nii atsumainia nu ajamsatniuitji. Nekas chichaman etserainia nu, yainkiartai tusar túratniuitji.

Tiútrepes yajauch túriniaiti

⁹ Ashí Yus-shuar árumna nuna papin akuptukmajrume. Kame nékajai, Tiútrepes nankaamantu enentáimtumak ii tájinia nuna umiktinian nakitiawai. ¹⁰ Nu asantai nuj jean ni yajauch túramun etsertuktatjai. Nii ántar ti áujmatuk tsanumprutmaji. Tura nu arantcha Yúsnan takainia nu irainiakui awayáiniatsui. Tura chíkich awayátaj tákuisha suritiawai. Tura nuyá Yus-shuarjaj iruntratniun surimiawai.

¹¹ Aneamu yatsurú, nu yajauch túramu jumamkiirap antsu péñker túratarum. Péñker túrinia nuka Yúsnaiti. Antsu tunáa túrinia nuka Yúsan nékachuiti.

Timitriu penker túriniaiti

¹² Imiá nekas péñker shuar asantai ashí shuar Timitriun péñker áujmatainiawai. Iisha núnisrik péñker shuaraiti tákurin nekas tájinia nusha nékarme.

Umíamu chicham

¹³ Wi ti nukap títinian wakerajme. Túrasha ju papinium mashi áatrashtatjame ¹⁴ wárik ítin asan. Nuj jean chichasmi.

¹⁵ Shiir pujustá. Juyá amikrum amikmaatmainiawai. Ii amikrjsha chikichik chikichik amikmaatruata.

JÚTAS papin árar akuptukma

Jútas Yus-shuaran papin áateawai

¹ Wi Jútas Jakupu yachintjai. Jesukrístu takarin asan ashí Yus Apa ni shuarj átinian achikma ainia nuna ju papin áateajai. Jesukristujaj tsaninñiaru áfarmatai Yus nin waini-ainiawai niijjaj kanakchatniun. ² Yus ti waitnentrakmak imiatkinchanum tuke shiir pujustinian yainmakarti. Ti anenma asa túrati.

*Ti tunáa shuar írunui
(2 Pítuur 2.1-17)*

³⁻⁴ Aneamu yatsurú, iikia mai metek Yus-shuar asar ju uwempratin chichaman áatratniun wakerukjarme. Túrasha ti yajauch shuar ananñkramawar atumjín pachiinkiarmai. Niisha “Yus ti anenñkartin asamtai páchitsuk tunáa túramniaitji” tuiniawai. Nu arantcha Yus in Akuptamniuncha tura ii Uuntrj Jesukristuncha nakitin áiniawai. Nu asamtai nu shuaran “yaunchu sumamawaruiti” tímiayi Yus. Tuma asamtai tájarme “Tuke Yus-Chicham yajjáshtinian ashí Yus-shuar akasmatkarat tusar susamuiti. Wátsek, kakaram ajastarum” tájarme.

⁵ Yaunchu Uunt Yus Israer-shuaran túramia nu nékarme. Nuna atak enentáimtikratjarme. Ejiptu nunñkanmaya júkiar Nin umirkacharua nuna máawarmiayi. ⁶ Nayaimpinmaya sun-tarsha ni pujutairin ajapa ikiukiari Yus susamun umitsuk iniaisarmiayi. Túrawarmatai Yus kiritniunam jirujaj tuke jinñkia sepunam apujas pujurainiawai. Tura Uunt Tsawant jeamtai súmantikiawartatui. ⁷ Núnisañ Sutuma péprusha Kumura péprusha tura tíjuch péprusha áishmanñajisha nuwajñajisha ti yajauch nuamtak tsanirmanainiakui ti tunaan penñké túrachmin ana nunasha túrin árimiayi. Túmainiakui ashí shuar ashamkarat tusa Yus amuicha jinium asutiáwarmiayi.

⁸ Ayu. Atumjín yajauch shuar ainia nu, yaunchu túrunamun enentáimtsuk tuke yajauch enentáimiainiak ni ayashin yajauch awajmmainiawai, Yusnasha nakitiainiawai, tura ashí akupin ainia nunasha yajauch áujmatainiawai. ⁹ Antsu Mikiar, nayaimpinmaya suntara kapitántrintiat, iwianchñaj máaniak Muisaisa ayashin akasmatak “áaniumsha” tu chicharkachmiayi. Antsu áyatik “Yus írmastí” tímiayi. ¹⁰ Túrasha ju shuarka nékainiatsna nuna náñkamsar yajauch chicharainiawai. Tura nékainiana nuka yawá áinis enentáimtsuk áyatik nékainiawai. Tura nújñajsha imia niñki yajauch emesmamainiawai.

¹¹ Maa, aneartarti. Kaññ yajauchin túramia núnis tura ásar jákartatui. Tura Parama áinis kuftian ti wakeruiniak imia niñki tunaanum tsanñkamakaru áiniawai. Tura Kurea áinis ashí akupniun nakitin áiniak kajññkiartatui. ¹² Átum nuamtak anenaitiai-jisat nájankurmin nu shuar chikichan enentáimtusuk Yusnasha ashamsuk imia niñki enentáimtumainiawai. Penñké ántar áiniak yumi kiar tee ajasua núnin áiniawai. Tura nase umpuim yútutsuk nanñkamainiawai. Árak nerektin nantutin nerechua áanin áiniawai. Tuma ásar uwemu penñké jaka áanin áiniawai. ¹³ Entsa nujanñkrak saurñ ajekeawai. Nu shuarsha núnisar ni natsantrñ natsamtsuk ajekenawai. Tura yaa waakua áanin áiniawai. Tuma ásar nekas kiritniunam tuke menñkakatin áiniawai.

¹⁴ Atañka tiranñkiyayi Eruk. Ti penñker Yúsnan etserin asa juna tímiayi “Uunt Yus ti untsurj ni shuarññaj winittiwai. ¹⁵ Nuyá ashí shuar túrawarman nekaattawai. Tura ashí yajauch shuarnasha ti tunáa túrawarua nujaj tura Yúsán yajauch áujmatsarua nújñajsha súmantikiawartatui” tímiayi Eruk. ¹⁶ Nu shuarka penñkera nujaj waratsuk “yajauchñiti” tuiniawai. Aya ni ayashí wakeramunak wakeruiniawai. Nanñkaamantu enentáimtumainiak chichainiawai. Tura chikich shuaran shiir chicharainiaksha aya nii wakera nuna túrutati tusa penñker chichainiawai.

Yus-shuar enentáimtikratin

¹⁷ Tura atumsha, aneamu yatsurú, ii Uuntrj Jesukrístu akatramurj yáunchu “aneartarum” tiarmiania nusha enentáimtustarum. ¹⁸ “Amúamu tsawant ishichik ajatesmatai shuar Yúsán wishikrar nakitrartatui. Tura ni yajauch wakeramurñiak umí pujuartatui” tiarmiayi. ¹⁹ Nu yajauch shuar atumín akantamenawai. Ju nunñkanmayanñak páchiniak Yusa Wakanññ takainiatsui.

²⁰ Tura átumka, aneamu yatsurú, tuke Yus nekas enentáimtusum kakaram ajastarum. Yusa Wakanññ kakarmarññaj ashí Yus seatarum. ²¹ Yus ti anenmakui nii wakera nu wakeruktarum atumsha. Túrarum ni anenmamu shiir nekaattarme. Tsawant winiawai, ii

Uuntri Jesukrístu in waitnentrama asa tuke shiir Niijjai pujustinian amastatji. Nu tsawant naká pujutarum.

²² Mai yapaji ajá ainia nu naka enentáimtikratarum. ²³ Chíkich shuarsha jiniumia júsatniua áitkiasrum uwemtikratarum. Tura chíkichcha ti yajauch ásarmatai anearum waitnentratarum. Tura ni pushirjsha ni tunaarjjai maatra asamtai mujkiatniuiti.

Yúsan shiir awajeawai

²⁴⁻²⁵ Yus chíkichkiiti. Ti nekaiti. In uwemtikkiartin asa ni kakarmarijjai yainmakmini-aiti tunaanum iniarchatniun. Tuma asa tunaajai máatrachu awajtamas ni ti shíirmarjin ejetamtatrum. Túrutma ti wamtikramsattarme. Ii Uuntri Jesukrístu túrunamujai Yuska Niñki shiir awajsatniuiti tura nankaamantu enentáimtustiniaiti. Yáunchusha, yamaisha, tura tuke ashí akupin atí.

Núkete.

APUKARÍPSIS Jesukrístu Juánkan paant iniaktusma

Jesukristu paant awajsamu

¹ Jú áaram Jesukristu Yus ujakmiayi. Wárik túrunatta nuna ni shuarin ujakarat tusa ujakmiayi. Tuma asamtai Jesukristu ni suntarin akupak ashí winia paant awajtursamai. Wisha Juánkaitjai. ² Yus timia nunasha tura Jesukristu ujatkamia nunasha tura wi ísmaj nunasha ti paant aya nekasa nuna tájai. Penké wáitratsjai.

³ Jú papin áujea nu shuarsha tura núnisañ juna ántana nusha nekas enentáimtuiniakka shiir ártatui. Ukunam átatna nuna ujaawai tura jeatemayi.

Juan siati péprunam Yus-shuar írunun juna áteawai

⁴ Wi, Juan, Asia nunkanam siati (7) péprunam Yus-shuar írunun ju papin áteajai. Yus anenma asa imiatkinchanum shiir pujustinian yainmakarti. Nu Yus tuke yaunchu pujuyayi. Núnisañ yamaisha pujawai. Tura nuke winittiwai. Akupin pujutainium Yusa Wakanj siati naka pujurainia nusha shiir yainmakarti. ⁵ Núnisañ Jesukristu shiir yainmakarti. Nii tana nu imía nekasaiti. Niisha emka jakamunmaya yamaram iwiaakmajai nantakniuiti. Tura ju nunkanmaya akupniu Uuntriní. In anenma asa ni numpejai ii tunaarin nijiatramkaitji. ⁶ Túrutma akupin awajtamsaitji. Tura ni Aparj Yúsnañ pujursarat tusa anaitiamkaitji. Nii ti kakaram asa tuke shiir awajnsti. Núnisañ atí.

⁷ Wats, Kristuka yuranmijjai winittiwai. Tura íjuarmia nusha tura ashí shuarsha nuna wáinkiertatui. Túrawar ashí sapijmiainiak útiartatui. Maa, nekas nunis átatui.

⁸ Kristuka “yámankamtaiknumiá amúamunmasha ashí nérenniuitjai, tawai. Wisha A rétranmaya Y rétranam ashí retra áintsaitjai” tawai ti kakaram Uunt Kristu. Tuke yaunchu pujuyayi. Núnisañ yamaisha pujawai. Tura nuke ataksha winittiwai.

Kristu ti shiir wincha ajasun Juan wainkiamiania nu

⁹ Wi Juan atumjai métek waitia asan atumí yachintjai. Núnisañ nayaimpiniam, Yus akupeana nu, métek jeattaji. Tura katsuntrar nákastinian Jesukristu mái métek súramji. Yus-Chichamnasha tura Jesukristu timiancha étsereakun nayaantsa ajapén atentramunam Pátmus nunkanam sepunam apujsamua núnisañ pujumjai. ¹⁰ Tumai tumin tsawantaj Yusa Wakanj pujurtaku winia úkuruiní kakantar unsumman antukmajai. Kachu umpúamua núnis ti kakarmauyayi.

¹¹ Tura turutmiai “Wiitjai. Yámankamtaiknumiá amúamunam ashí nérenniuitjai. Wisha A rétranmaya Y rétranam ashí retra áintsaitjai, timiai. Tuma asamtai wáinmena ju, papinium áaram Asia nunkanam siati péprunam Yus-shuar írunna nu akuptukarta. Ju peprunam akupkarta: Ipiisusha, Ismirnasha, Pirkamusha, Tiatirasha, Sártissha, Piratirpiasha, tura Rautisêasha.” Tu turutmiai.

¹² Túrutkui yaki túruta tusan apajasan íkman siati shirikip ikiutain kurijjai najanamun wainkiamjai. ¹³ Tura nu ajapén Aents Ajasua núninan wajan wáinkiamjai. Tura pushirjsha nawea timiai nuntuaru entsaruyi. Emenmamkêsha kúrinia netsepnum emenmamauyi. ¹⁴ Tura ni muuke intiashísha murikiu uré nijiamua núnisañ tura micha núnisañ ti puju chjarauyi. Tura ni jishá jya núniskeyi. ¹⁵ Ni nawêsha ti wincha asa jiru yanikutaku jiamua áinis néwar ajarmiayi. Ni chichamêsha ti kakaram asa uunt entsa téter ajá áintsauyi. ¹⁶ Ni untsuurinj siati yaan takakuyi. Tura ni weneniásha puniá áinis tsakatskat mai ere awajsamu jínimiai. Ni yapisha etsa ti etsantuk íschammia núnisauyi.

¹⁷ Nuna wáinkian jaka áintsanak naween iniaarmajai. Túrasa ni untsuurí uwejen awaantrus turutmiai, “Ashamkaip. Wiitjai. Yámankamtaiknumiá amúamunmasha tuke pujuwitjai, timiai. ¹⁸ Wikia tuke iwiaakuitjai. Jakamijai tura nantakin jákashtinian tuke iwiaaku pujajai. Jákatniuncha tura jaka pujuinia nuna yawirin takakun nérenniuitjai, timiai. ¹⁹ Tuma asamtai wáinkiamia jusha, yamá wáinmena nusha, tura ukunam átatna nusha aartá, timiai. ²⁰ Wáinmena nu júnisaiti. Siati shirikip-ikiutai kúrik wainkiam nu, siati péprunam Yus-shuar írunun nakumeawai. Tura winia untsuurujinj siati yaa wainkiam nu, siati péprunmaya Yus-shuaran wáinnun nakumenawai, turutmiai.

2

Ipiisunam chícham áatramu

¹ Nuyá turutmiai ‘Ipiisunmaya Yus-shuaran wáinin ju áatratá: Siati yaan untsuurnun takakna nu tura núnisañ siati shirikip-ikiutai kúrinman ajapén atenta wekáa nu, tawai: ² “Ashí ame túram nuna nékajai. Ti kakaram takaakum katsunteamuncha nékajai. Yajauch

shuar nawamtsuk awemaitrume. Shuar “Yus akatramuitjai” ántar tuinia nu nekaamarne. Wáitrinia nusha nékaitme. ³ Ti wáitiatyatek katsuntram yawetsuk Winia ti takartusuitme. ⁴ Túrin áminij juna títiatjame. Yus aneakum yámankamtaik ti penker wekainiuyam núnisam túratsme. ⁵ Tuma asam íkiuknium nu enentáimpram yaunchu túrinuiyam núnismek ataksha túrata. Túrachakminkia ame shiripkirmin wari jurustatjame. ⁶ Tura ju péñker túriniaitme. Nikiurás shuar nakitniuitrume. Nu shuar “ayash wakeramu páchitsuk túramniaiti” tuiniakui Wisha núnisnak nakitijai. ⁷ Kuíshinia nu shuar Yusa Wakanj ashí Yus-shuaran timian antukti: Nupetmakunka tuke iwiaaku pujutai numi neren yúatniun tsan̄katkattajai. Nu numi Yus pujana nuj wajaawai.” Tu áartá’ turutmiai.

Ismirnam chícham áatramu

⁸ Nuyá turutmiai ‘Ismirnamaya’ Yus-shuaran wáinin ju áatratá: Yámankamtaiknumia amúamunam tuke pujuwa nu tura núnisañ jaka nantakmia nu, tawai: ⁹ “Ashí ame túram nuna nékajai. Ti wáitiam nunasha tura kuítrinchaitmena nunasha nékajai. Antsu Yusañkia ti kuítrinniuitme. Tura shuar uunt iwianch Satanás shuarj áiniyat “Israer-shuaraitjai” tuiniak yajauch áujmatramena nuna nékajai. ¹⁰ Ti wáitsattamna nu ashamkaip. Íwianch ashí nekapramsataj tusa atumiñian sepunam en̄keattawai. Nuñ tias tsawant wáitsattarme. Jáakmesha tuke Yus shiir enentáimtusakminkia tawaspan nakurin susatniua nútiksanak nekas iwiaakman tuke shiir pujustinian amastatjai. ¹¹ Kuíshinia nu shuar Yusa Wakanj ashí Yus-shuaran timian antukti: Nupetmakuka jimiará jákatniuka waitsashtatui.” Tu aartá’ turutmiai.

Pírkamunam chícham áatramu

¹² Nuyá turutmiai ‘Pírkamunaya’ Yus-shuaran wáinin ju áatratá: Puniá áinis tsakatskat mai ere awajsamun takakna nu, tawai: ¹³ “Ashí ame túram nuna nékajai. Uunt iwianch Satanás akupea nuñ pujayatmek tuke shiir enentáimturmena nuna nékajai. Winia shiir umirtinian Ántipanan máawarmataisha Winia enentáimursatin ishichkisha iniaituschamame. Nusha iwianch pujutainium pujakrumin túrunamai. ¹⁴ Túrin áminij juna títiatjame. Atumiñia shuar yaunchu Yúsnan etserin Param yajauch jintiamun tuke emetainiawai. Niisha Israer-shuaran tuná awajsat tusa kapitán Parakan unuiniamiaiy. Nuyá Parak Yus-sutai naman̄ken maar yúatniun Israer-shuaran jintintiamiyai. Núnisañ ti tsanirmatniun jintintiamiyai. ¹⁵ Atumiñia shuarsha Nikiurás jintiamuncha, Wi nakitijai nuna, iniaisatniun nakitianiawai. ¹⁶ Wats, enentáimpram iniaisata. Túrachakminkia Wi wari winin winia wenurujya punia jiniia nuñai máaniaktajai. ¹⁷ Kuíshinia nu shuar Yusa Wakanj ashí Yus-shuaran timian antukti: Nupetmakunka maná yurumkan uukma nuna ayurattajai. Nuyá kaya pújun susattajai. Nu kayanam yamaram naarj aarma átatui. Nunasha chíkich shuarka pen̄ké nékatsañ aya achia nuke nekaattawai.” Tu aartá’ turutmiai.

Tiatiranam chícham áatramu

¹⁸ Nuyá turutmiai ‘Tiatiranamaya’ Yus-shuaran wáinin ju áatratá: Yusa Uchirj jii jijiaí métek keena nu tura núnisañ nawe jiru yan̄kutaku jiamua núnis néwar ajawa nu, tawai: ¹⁹ “Ashí ame túram nuna nékajai. Yus shiir enentáimtakum aneam nuna nékajai. Tura katsuntram péñker takaamna nuna nékajai. Yáunchujai nan̄kaamas péñker túrame yamaikia. ²⁰ Túrin áminij juna títiatjame. Nu nuwá Jesapír awematsme. “Yúsnan unuiniajai” tinia Wí shuaran ti anan̄kenawai. Tura ti tsanirmatniuncha tura ántar-yus-sutai naman̄ken maar yúatniun jintintianiawai. ²¹ Niisha ni tunaarjñ enentáimiar iniaisat tusan nákasuitjai. Tura nakitiawai. ²² Wátsek, sun̄kurmatkiakan peaknum áepsattajai. Tura chíkichcha nijijai tsanirma ainia nunasha nijijai métek ti wáitkiastatjai. Ni tunaarjñ enentáimiar iniaisacharmatañkia túratatjai. ²³ Ni uchirñcha mantúattajai. Nuñai ashí Yus-shuar Wi nekas shuara enentáin nékaitjia nuna nekaawartatui. Atumniasha chíkichik chíkichik takasmajai métek akikatjarme. ²⁴ Tura chíkich shuar Tiatiranamayátram, nú chicham enentáimtuscharmena nu, “nekas iwianchnia uukma” tútajya nu nékachu asakrumin atakka túratniun patatkashtatjarme. ²⁵ Tura Wi jeatsañ takakrum nu emetatarum. ²⁶ Nupetmakunka Wi wakeraj nunak tuke initsuk túrana nuna untsurj nun̄kanam akupkatniun tsan̄katkattajai. ²⁷ Winia Apar tsan̄katrukma núnisnak akupkatniun tsan̄katkattajai. Tura nuwe najanam u jirujai awati ijjikratniua áinis ti kakarmajai akupkattawai. ²⁸ Yan̄kuam káshik jiniia nuna susattajai. ²⁹ Kuíshinia nu shuar Yusa Wakanj ashí Yus-shuaran timian antukti.” Tu aartá’ turutmiai.

3

Sártisnum chícham áatramu

¹ Nuyá turutmiai ‘Sártisnumia’ Yus-shuaran wáinin ju áatratá: Siati Yusa Wakanj takakna nu tura núnisañ siati yaan takakna nu, tawai: “Ashí ame túram nuna nékajai. Iwiaakua

áintsan wekajatemk Wíjiajn̄kia jákaitme. ² Shintiarta. Kajinia nu umpuim ekeemakta. Kame Yusjaj̄ ísam pēnker túrichuitme. ³ Yus-Chicham ti shiir enentájjaj̄ emka antukmam nu ataksha enentáimpram emetata. Tura tunaarumsha enentáimpram iniaisata. Tura iniajyachkumniñkia kasa núnisnak nékatsmin jeartiatjame. ⁴ Tura Sártisnum shuar ishichik pushirj̄ wapik máacharu pujuiniawai. Nusha ti penker ániak pushí pújun entsarar Wíjjaj̄ wekasartatui. ⁵ Nupetmakuka pushí pújun entsartatui. Tura iwiaaku átnia nu papiniumiá ni naarj̄ áarman japirashtatjai. Antsu winia Apar tura ashí nayaimpinmayá suntar ímmianum shiir áujmattsattajai. ⁶ Kuíshtinia nu shuar Yusa Wakanj̄ ashí Yus-shuaran timian antukti.” Tu aartá,” turutmiai.

Piratírpianam chícham áatramu

⁷ Nuyá turutmiai ‘Piratírpianmayá Yus-shuaran wáinin ju áatratá: Ti shiir túrin tuke nekasan tana nu, uunt akupin Tawitia yawirj̄ takaku asa uraimtai chíkich penké epenchamniaiti. Tura epenmiatai chíkich penké uraichminiaiti. Juna tawai: ⁸ “Ashí ame túram nuna nékajai. Kakarmachuitatmek winia chichamur shiir enentáimtakum Winia initiuschaitme. Tuma asakmin wáitin uratjame. Nuna chíkich penké epenchamniaiti. ⁹ Wátsek. Shuar wáitruiniak “Israer-shuaraitjai” tuñiyat uunt iwianch Satanás-shuar ániawai. Nu shuáran, nekas ámin aneajna nuna nekaawarat tusan amj̄ini tikishmatkiararattajai. ¹⁰ Katsunrata tímaj nu, shiir umirka asakmin Wisha ti wáitsatin ashí nunkanam áatna nuyá uwemtikrattajme. Nu wáitsatniujaj̄ ashí nunkanmayá shuar nekapanasartatui. ¹¹ Wárik winittitajai. Takakmena nu emetata. Akinkiatniuitmena nuna chíkich shuar atantramkiaraj̄in. ¹² Nupetmakunka winia Yusru jee tankirin awajsattajai. Tura nuyá penké j̄inichartatui. Tura nj̄in winia Yusru náarj̄in áatrattajai. Tura winia Yusru péprurj̄ náarj̄incha áatrattajai. Nu péruka nayaimpinmayá yamaram Jerusarēnka Yúsnumiá tara núiti. Núnisan winia yamaram náarun nj̄in áatrattajai. ¹³ Kuíshtinia nu shuar Yusa Wakanj̄ ashí Yus-shuaran timian antukti.” Tu aartá,” turutmiai.

Rautiséanam chícham áatramu

¹⁴ Nuyá turutmiai ‘Rautiséanamayá Yus-shuaran wáinin ju áatratá: Wáitruksuk nekasa nunak tiniua nu tura núnisan ashí Yus najanamun Úntrija nu, tawai: ¹⁵ “Ashí ame túram nuna nékajai. Tura michaash míchachuitme. Núnisan tsuersha tsuérchaitme. Míchaitkiumsha tura tsuéraitkiumsha maak. ¹⁶ Kame míchachu tsuercha antsu aya tsuésuetak asakmin imiutkattajme. ¹⁷ Iis, “Kuírinnititjai, ti irumpraitjai, warinkisha atsumatsjai” tame. Túrasa ashí yajauch, wáitnenmai, kuíríncha, kusuru, tura misú iyajme. ¹⁸ Tuma asam Winí ti shiir kuri sumakam nekas kuítrintin ajasta. Turam puju pushí Winí sumakam misú ajasma shiir entsarta. Pēnker ímprataj̄ tusam j̄iinium enketai enkeeta. ¹⁹ Aneajna nuna chichareajai. Nu asamtai kakaram ajasam tunaarum enentáimpram iniaisata. ²⁰ Enentáimprata. Shuar wáitniam wajas untsunna áintsanak Wi ámin untsúajme. Winia anturtukam ame enentáimin awaintiakminkia Wi wáintiuattajme. Tura wayan amíjjaj̄ yurumáttajai. Tura amesha Wíjjaj̄ yurumáttame. ²¹ Nupetmakuka akupin pujutainium Wíjjaj̄ pujustatui. Wisha núnisnak nupetmaku asan winia Aparjaj̄ akupin pujutainium pujusúitjai. ²² Kuíshtinia nu shuar Yusa Wakanj̄ ashí Yus-shuaran timian antukti.” Tu áartá,” turutmiai.

4

Nayaimpiniam Yúsan shiir awajenawai

¹ Nu nankaasmatai nayaimpiniam waiti uranniun wainkiamjai. Tura nuyá kakaram untsunman antukmajai. Nuik kachujaj̄ métek kakaram chichartukma nu turutmiai “Juí yaki wakatá. Ukunam áatna nuna iniaiktustatjame” turutmiai.

² Nu chichamaik Yusa Wakanj̄ akantukmiai. Túrutamtaí nayaimpiniam akupin pujutainium pujan wainkiamjai. ³ Niisha jaspí kayasha tura kurnarínia kayasha nujaj̄ métek ti wínchayui. Akupin pujutain tuntiak téntakuyi. Nusha ismirarta kayajaj̄ métekeyi. ⁴ Chíkich paintikuatru (24) akupin pujutain nu pujutain téntakarun wainkiamjai. Tura paintikuatru uunt púju entsarainian tura kurin etsenkrakinian, nuí pujuinian wainkiamjai. ⁵ Akuptainiumiá peemsha ipiamtasha untsunmasha j̄iniarmai. Tura nu pujutainium naka siati shirikip kearmai. Nusha siati Yusa Wakanj̄inti. ⁶ Núnisan nu pujutainium naka nayaantsa áanin ti saar amai.

Nu pujutainium wakenmaanisha niisháa tanqu kuaru téntakar ármiai. Ukurinj̄isha tura eemsha j̄ii irunmiai. ⁷ Emka tanqu úunt yawáa áanniuyi. Chíkichka turu uchichia áanniuyi. Tura chíkichecha shuara yapia áanniuyi. Tura chíkichka churuwia nanamua áanniuyi. ⁸ Nusha sais nanamtin áрмаi. Tura j̄iisha ti irunainiak ashí wainmarmai. Káshisha tsawaisha tuke iniaitsuk juna tiniu armai:

“Ti nekas péñkeraiti Uunt Yus. Ashí nan̄kaamas kakarmaiti. Tuke yaunchu pujuyayi.

Núnisan̄ yamaisha pujawai. Tura ataksha juke winittiwai” tiniu armai.

⁹ Tura uunt pujutainium pujana nu tuke iwiaaku pujú asamtai nu tanku ti shiir awajsar yúmin̄kiak pujuriarmai. ¹⁰ Túruiniakiu paintikuatru uunt tuke iwiaaku pujun tikishmatainiak ni etsen̄krutair̄in naka áepruiniak tuiniawai:

¹¹ “Úntá, ii Yúsr̄inme. Tuke shiir awajmainme. Ashí nankaamas kakarmaitme. Amek ashí ír̄unna nu najanaitme. Tura aya wakerakum najanamame. Ame wakerakmin ír̄unainiwai” tuiniawai.

5

Murikkia papin urakminiaiti

¹ Nuyá akupin pujutainium pujuya nuna untsuur̄in papí penuarma áanniuin wainki-amjai. Nu papisha initiaan̄isha tura páatkesha áarmauyi. Tura urakchamnia atí tusa siati anujtukmajai kaki peekmauyi. ² Tura nayaimpinmayá suntar ti kakarma nu, ti kakantar inintran wainkiamjai. Niisha tímiai “¿Ya akupniuk jú papin kaki anujkamun jaák urakminiait?” ³ Tura nayaimpinmayásha nun̄kanmayásha tura jakamunmayásha chikichkisha nu papin urakmin atsumiayi. Áujtsuk ístinniaasha tujinkiarmai. Tímanu akupin atsumai. ⁴ Nu papin uraktincha tura áusatniusha, kame ístinchá atsakui ti úutmiajai. ⁵ Nuyá chikichik uunt turutmiai “Ti úutíp. Israer-shuarnumiá Úunt-yawá, Jutá weeá awai. Niisha uunt akupin Tawit weeaiti. Nupetmaku asa nu papí siati anujtukman jaák urakminiaiti.”

⁶ Nuyá uunt pujutaiya nūj tura kuaru tan̄kunam ajapén tura úuntnum ajapén Murik wajan wainkiamjai. Maamua áintsan̄ketiat iwiaakuyi. Kachur̄isha siátiyi. Ni j̄iisha siátiyi. Nusha Yusa Wakan̄j siati ashí nun̄kanam akupruma nuuyi. ⁷ Nu Murik we nekas uunt Akupniu untsuur̄inian nu papin achikmiayi. ⁸ Tura papin achikmatai kuaru tan̄kusha tura paintikuatru uunt arma nusha Murikiun tikishmatarmiyai. Ashí uunt arpa tuntuítian takaku armai. Tura ashí kun̄kuin en̄ketain kuri najanamun takaku armai. Nu kun̄kuin Yus-shuar áúsamuiti. ⁹ Ju yamaram kantancha kantampriarmai:

“Amek imiá nan̄kaamas akupniuitme. Amek papí achikiam anujtukmar̄j jákminiaitme. Yus-sutai naman̄kea áinis mantamna asam túramniaitme. Ashí nun̄kanmayá shuarn-umiasha Yusna árat tusam ame numpem̄jai in sumakmiame.

¹⁰ Turam akupin awajkartusuitme tura núnisan̄ ii Yúsr̄iniun pujurin awajkartusuitme. Tuma asakmin akupin ajasar jú nun̄kanam akupkattaji.” Tu kantamainiwai.

¹¹ Tura untsur̄j nayaimpinmayá suntar uunt pujutaincha tan̄kuncha tura úuntnasha én̄kekawarun wainkiamjai. Nusha nekapmarchamnia ti untsur̄j armia nu ¹² kakantar tiarmai:

“Murik mantamnamia nu akupin ajas ashí kakarmancha, kuitniasha, nekaatniuncha Niñki achikminiaiti. Tura nupetmaku asamtai yum̄nsar Nin ti shiir awajsatin áiniawai.” Tu tiarmai.

¹³ Núnisan̄ ashí Yus najanamun, nayaimpiniam ír̄unna nusha, nun̄kanam ír̄unna nusha, nun̄ká in̄it ír̄unna nusha, nayaantsanam ír̄unna nusha, tuinian antukmajai:

“Muriksha tura akuptainium pujana nusha ti shiir tura ti kakaram ásar tuke iniaitsuk shiir awajnasarti.” Tu tuiniawai.

¹⁴ Tura kuaru tan̄kusha “Tuke núnisan̄ atí” tiarmai. Tura paintikuatru uuntka nekas tuke iwiaaku pujá nuna tikishmatar shiir awajsarmai.

6

Murikkia siati anujtukman jaákmai

¹ Wi iyakui Murikkia chikichik anujtukman jaákmai. Túramtai chikichik tan̄ku ipiamtajai métek kakantar untsun̄un antukmajai. “Winim iitiá” turutmiai. ² Túrutkui kaway p̄jun wainkiamjai. Nūj ekeemia nu t̄ishimkiun takakuyi. Akuptai tawaspasha susamuyi. Tura tuke nupetmaktinian j̄in̄kimiai.

³ Nuyá Murik anujtukma j̄imiaran jáákmatai tan̄ku j̄imiaru nu “Winim iitiá” turutmiai.

⁴ Túrutkui chikich kawai kap̄aḡkun wainkiamjai. Nūj ekeemia nuna puniá úuntan susamuyi. Nusha shiir pujuscharat tusa ashí jú nun̄kanmayá shuaran máanaimtikiatniun akupkamuyi.

⁵ Nuyá Murik anujtukma menaintiun jáákmatai tan̄ku menaintiua nu “Winim iitiá” turutmiai. Túrutkui kaway mukusan wainkiamjai. Nūj ekeemia nusha kijin nekapmatain takakuyi. ⁶ Tura kuaru tan̄ku ajapeniá chichaamun antukmajai. “Tsawant takamsuk takaakmesha apatkuka pen̄ké ishichik sumakmin áatme. Tura núnisan̄ machasha nijiam-chisha amuukacharat tusam péñker wainkiata.” Tu timiai.

⁷ Nuyá Murik anujtukma kuátrun jáákmatai tan̄ku kuatrua nu “Winim iitiá” turutmiai. ⁸ Túrutkui kaway yan̄kun wainkiamjai. Nūj ekeemia nusha jákatin náartiniuyi. Tura nuna

úkurĭn Jatai nemarak winimiai. Nusha ashí nunĕkanmaya shuar kuaru akankamunmaya chikichkin máatniun akupkarmauyi. Nusha mesetjajsha tsukajajsha sunĕkurjajsha tura yajasmajai máawarmai.

⁹ Nuyá Murik anujtukma sĕpĕkun jáakmatai Yus-sutai kunĕuin ekemtai wakenmaanjĭ fismajai. Túran Yus-Chichaman etserainiakui máawarma wakanĭn wainkiamjai.

¹⁰ Nusha kakantar unsumainiak tiarmai “Uuntá, ti peŕker asam támena nu umiatsmek. ¿Urutiak nunĕká pujuinia nú shuar ii mantamnamunam yapajmiátruktam?” tiarmai.

¹¹ Tuĭniakui pushĭ pújun susar tiarmai “Chikichcha Krĭstunun etserainiakui mantamnatin ániawai. Nu náakrum ishichik ayampratarum” tiarmai.

¹² Nuyásha Murik anujtukma sáisan jáakmatai ti úrurun wainkiamjai. Tsawai-nantusha itiruchat ajasua áintsan mukusa ajasmai. Kashĭ-nantusha numpá áintsan ajasmai. ¹³ Tura yaasha wampú nere nase umpuim ti majuwa áintsan kákekarmai. ¹⁴ Nayaimpisha papĭ penuara júamua áintsan menĕkakamai. Tura naintcha yajá apujnasarmai. Tura nunĕkasha nayaantsanam ajapĕn atentrainia nusha yajá apujnasarmai. ¹⁵ Tura jú nunĕkanam akupin ainia nusha náinnium wear kayá wáanam uumkarmai. Nijjajajsha ashí shuar, uuntcha, kufriniusha, suntara kapitíantriŕsha, ashí kakaram ainia nusha, tura takarniusha anĕant ainia nujaj náinnium wearmai. ¹⁶⁻¹⁷ Túrawar náinniasha kayancha tiarmai “Asutniátin tsawant jeayi. ¿Yaki aun katsuntrat? Nu asantai saanakim in yutukratata. Túrarum Murik ti asutiámataj nuyásha tura akupin pujana nuyásha uukratkatá” tiarmai.

7

Israer-shuarnumiá anujturma armia nu

¹ Nu nanĕkaasmatai kuaru nayaimpinmaya suntar, nunĕkaa kuaru yantamĕn wainkiamjai. Nusha kuaru nase kukarsha, nayaantsanmasha tura kampunniunmasha nasenĕkcharat tusar wajatiarmai. ² Kame kukarsha tura nayaantsanmasha yajauch awajsatniun akupkamu armai. Tura chĭkich suntarnasha nantu tátainmaaniá winian wainkiamjai. Tuke iwíaaaku Yusa anujtutairin takakauyi. Nusha kuaru suntaran kakantar untsuak tímai, ³ “Íi Yusrĭ takarĭn ainia nu nijjainium áarar anujtatsriniĭn kukarsha, nayaantsasha, tura kampunniusha nasejai yajauch awajŕairap” tímai.

⁴ Tura tímaiĭni untsurĭ aara anujtukman antukmajai. Ashí Israer-shuar tuse (12) shuar weeá ainia nuyá chikichik siaŕtu kuarenta kuaru mir (144.000) armai. ⁵ Jutá weeanmaya tuse mir (12.000) anujtukma armai. Rupin weeanmayasha tuse mir anujtukma armai. Kat weeanmayasha tuse mir anujtukma armai. ⁶ Aser weeanmayasha tuse mir anujtukma armai. Niptarĭ weeanmayasha tuse mir anujtukma armai. Manasĕs weeanmayasha tuse mir anujtukma armai. ⁷ Semeuĕn weeanmayasha tuse mir anujtukma armai. Riwĭ weeanmayasha tuse mir anujtukma armai. Ísakar weeanmayasha tuse mir anujtukma armai. ⁸ Sapurĭn weeanmayasha tuse mir anujtukma armai. Jusé weeanmayasha tuse mir anujtukma armai. Pinjamĭn weeanmayasha tuse mir anujtukma armai.

Ti untsurĭ shuar pújun entsararu

⁹ Nuyá ti untsurĭ shuaran wainkiamjai. Ashí nunĕkanmaya nusháa shuaraim iruntraru ásar neĕapmarchamnia armai. Tura nusha uunt akupin pujutainium tura Muriknium naka wajaarmai. Tintiuki nukĕa áaniun takaku armai. Tura ashí pújun entsaru armai.

¹⁰ Ashí kakantar unsumainiak tiarmai:

“Íi Yusrĭ uunt akupin pujutainium eketna au tura Muriksha imia Niŕki Uwemtikin ániawai” tiarmai.

¹¹ Tura nayaimpinmaya suntarsha uunt akupin pujutaincha, kuaru taŕkuncha, tura úntnasha téntatar armia nu piniakum nunĕká tepersar Yúsan shiir awajŕar ¹² tiarmai “Nekasaiti. Tuke iniaitsuk ii Yusrĭ ti shiir awajŕatniuiti. Niŕki ni neka, ti kakaram, ti akupin, tura ti peŕker asantai tuke yumiŕsatniuiti. Núnisan atí.”

¹³ Nuyá chikichik uunt inintsamai “Pújun entsaru ainia jusha ¿ya ainia tura tuyá ainia?”

¹⁴ Túrutkui “Uuntá, amek nékame” tímaiĭni.

Tutai ní túrutmai “Ju shuar ti waitŕaru ániawai. Túrawar Murikiu numpéjai ni pushirĭ nijjamwar puju awajŕaru ániawai. ¹⁵ Nuna túrawaru ásar yamaikia Yusaj naka pujusar tsawajsha káshisha Yúsnan ni Jeĕn takainiawai. Tura akupin pujutainium eketna au tuke wainkiartatui. ¹⁶ Yamaikia tsukajajsha kitiakjajsha wáitsachartatui. Tura etsasha sukuiniak yajauch awajŕachartatui. ¹⁷ Murik, akupin pujutainium naka wajana au, ni murikĭn wáiniuk áyureak ti peŕker púkunĭ entsa waana nú apujŕartatui. Tura Yus ni neajĕkincha ukujtiurartatui.” Tu túrutmai.

8

Anujtukma siatia nu jaakma tura kunĕuin ekeemataijjai túrunamu

¹ Nuyá Murik anujtukma siatin jaakmatai nayaimpiniam chikichik ura jestatuk ajapén mitia ajasmai. ² Nuyá siati suntar Yusaj naka wajainia nuna wainkiamjai. Nusha siati kachun susamu armai. ³ Nuyá chíkich suntar kunkuin enketain kurijjai najanamun itiamai. Tura Yus-sútainium ayamas wajasmatai núkap kunkuin sunasmai. Nu kunkuin ashí Yus-shuar áujsamujai métek kunkuin ekeematainuum ekeemaktiniuyi. Nu ekeematai kurijjai najanamuyi tura uunt akupin pujutainium naka pujumai. ⁴ Tura suntar ekeemakmatai kunkuinia mukuintiuri Yus-shuar áujsamujai métek Yúsan amainkiamai. ⁵ Nuyá nu kunkuin enketain suntar achik ekeematainmayá ji kapaan káirjin áimiak ju nunkanam ukaamai. Túramtai ipiamtasha unsummasha, peemsha, tura uusha armai.

Kachu umpuarma

⁶ Nuyá siati suntar kachun takakainia nu umpuarta tusar iwiarnararmai.

⁷ Emka suntar kachun umpuarmatai micha kákekamai. Nunasha ji numpajai pachimpramuncha nunkanam ajapawarmai. Túmakui menaintiu nakakma jeeán numincha tura ashí írruna nu j ekeemakmai. Tura ashí nunkanam chírichrin takamtsuk ekeemakmai.

⁸ Nuyá suntar jímiara nu kachun umpuarmatai uunt naintia áninin kean nayaantsanam ajunmai. Túramtai menaintiu nakakma jeeá nayaants numpa ajasmai. ⁹ Núnisan menaint jeeá nayaantsanam matsatania jákarmai. Tura menaint jeeá uunt kanua nu emesnarar-mai.

¹⁰ Nuyá suntar menaintiua nu kachun umpuarmatai ti uunt yaa nayaimpinmayá kapaá kákekamai. Tura entsasha tura púkuninmasha menaint nakakam jeeánum kákekamai. ¹¹ Nu yaasha Yapá-numi nártiniuyi. Tura menaintiu nakakam jeeá entsa yapá ajasarmai. Túrunamtai ti untsurj shuar nu entsa yapá ajasmájai jákarmai.

¹² Nuyá suntar kuatrua nu kachun umpuarmatai menaintiu nakakam jeeá tsawai-nantusha kashí-nantusha tura yaasha emesnarar ajapén tee ajasarmai. Túrunawar tsawajsha káshisha menaintiu nakakam jeeánum tsáapnircharmai.

¹³ Nuyá chíkich suntar nayaimpiniam nanamun wainkiamjai. Nusha kakantar unsumuk timiai “Maa, chíkich menaintiu suntar umpuiniakui nunkanam pujuinia nu ti wáirtsartatui.” Tu timiai.

9

¹ Nuyá suntar senkua nu, kachun umpuarmatai yaan nayaimpinmayá nunká kákeran wainkiamjai. Tura nu yaan tunáa shuar jákaru matsamtai yawirjin susamuyi. ² Tura uraimtai nu nápkatkachu wágnmayá ti mukuint jijnmiai uunt jiniumiá áintsan. Tura etsan-cha tee awajsamai, yuranmincha tee awajsamai. ³ Nuyá nu mukuintiummayá manchi jíintrar nunká ti yujaarmai. Tura ju nunkanmayá titinkia áinis najamin ajastinian susamu armai. ⁴ Chírichrincha ashí arakmancha ashí numincha yajauch awajsatin suritkiamuyi. Antsu áyatik shuar nijaijnium Yusa naari árar anujtukchamunak yajauch awajsatin armai. ⁵ Túrasha ajaktuk senku (5) nántutin wáitkiastin susamu armai. Kame titin, shuaran ijiú, najawea núnis najawéatin susamu armai. ⁶ Nu j shuar wari jakataj tuániayatan jákachartatui. Ti wakeruiniayatan jákatniun tujinkiartatui.

⁷ Manchisha íisam mesetnum weena nu kawaiya áinis armai. Kurí tawaspa áinis etsenkraku armai. Yapísha shuarna áinis armai. ⁸ Intiashísha nuwanua núnis armai. Najsha úunt yawá najya núnis armai. ⁹ Netsepén namaka saepea áinis jiru péeramu armai. Tura nanamenaksha kaway karu japiiniak mesetnum tsékeena núnisan téter ajarmai. ¹⁰ Ujukésha titinki ujukea áinis asa jan ki ajakin armai. Nujai tuke senku nantu yujarsar shuaran íjuar wáitkiastin armai. ¹¹ Ni uuntrísha nápkatkachu wáá uraimia nuyaiti. Nusha Israer-chíchamjai Apatú tutainti. Tura Kriaku-chíchamjai nki Apuriú tutainti. Nuka Yajauch Awajkartin tawai.

¹² Jujai emka wáitsatin nankaamasai. Túrasha tuke jímiar taasai.

¹³ Nuyá suntar saisa nu kachun umpuarmatai chichaman antukmajai. Yusaj naka kunkuin ekeemaka Yus-sutai kurimpramu amai. Tura ni kuatru yantame kachu jijnmiai. Tura nuyá chichaak ¹⁴ suntar kachu takakun saisa nuna timiai “Kuatru suntar Eupratis kanusá pujuinia nu atiram akupkarta.” ¹⁵ Túramtai nu kuatru suntar wear menaintiu nakakam untsurj shuaran maatai tusar weriarmiayi. Kame nuna túrawarat tusar ikiusma armai. Tura nu uwitin, nu nantutin, nu tsawantin, tura nu úratin atíatin ikiusma armai. ¹⁶ Tura suntarnasha kawainium eketainian wainkiamjai. Tura timiá untsurj nekapmar-chamnia asamtai aya núnirurin antukmajai. Nusha jímiará siañtu miyun (200.000.000) armai.

¹⁷ Tura íimiamunam suntarnasha kawaincha júnisan wainkiamjai: Eketainiaka netsep-num jirun entsaru armai. Nusha kapaáku winkia tura yanjú armai. Tura kawaisha úunt yawáa muuke áinin armai. Tura ni wenyasha jisha, mukuintiusha, asuprisha ti tsuér keá nu jíiniarmai. ¹⁸ Nu menaintiu ti yajauch wáitsamujai menaintiu nakakam shuar

untsurí jákarmai. Jijiaisha, mukuintuujaiasha, asupriijaiasha jákarmai. ¹⁹ Nujai nu kaway ni wenejai shuáran wáitkiasarmai. Tura ni ujuké napí múukeya áinin áрмаi. Nújaiasha shuáran wáitkiasarmai.

²⁰ Tura nujaiasha jákacharmia nú shuar tuke tunáa túratniun iniaisacharmai. Tura yajauch wakanniasha tura ántar-yusnasha tikishmatratniun iniaisacharmai. Nu ántar-yus kurijaiasha, kuitjaiasha, jiru yanikutakujaiasha, kayajaiasha, numijaiasha najanamu ásar wainmaktinniasha, antuktinniasha, tura wekasatniuncha tujintiainiawai. ²¹ Núnisañ mañkartuatniuncha, wawekratatniuncha, tsanirmatniuncha, tura kasamkatniuncha ini-aisacharmai.

10

Papichin suntar takusmia nu

¹ Nuyá chíkich kakaram suntar nayaimpinmaya táarun wainkiamjai. Nusha yurañkim amúámu tura múuknum tuntíak téntakmauyi. Yapísha etsajaj métek wínchaui. Tura kujapésha ji keá áintsankeyi. ² Nusha papin urak takakaui. Tura imiá uunt asamtai ni nawé untsuurnumanj nayaantsanam tura menaarinj kukar tarimias wajasmai. ³ Tura úunt yawá kakar shiniak chicháa áinis ti kakaram untsumkamai. Nujaj siati (7) ipiamtasha chichasarmai. ⁴ Nii chichasarmatai ni chichamen áartiniujai tura nayaimpinmaya chichartak “Áaráip, túrutmiai. Juka nekanashti” túrutmiai.

⁵ Tura nuyá, suntar nayaantsanmasha tura kukarsha tarimias wajama nu ni uweje untsuurinj nayaimpinmaanj takuimiai. ⁶⁻⁷ Tura timiai “Peñké ishichik ajasai. Suntar siatia nu umpúakuñkia Yus ashí yaunchu enentáimpramia nu uminkiatawai. Emka ujatsuk ukunam ni shuarin Yúsnan etserniua nuna ujakmiayi.” Tu timiai. Nuyá chichaak: “Yus tuke iwiaaku pujawai. Tura imiá kakaram asa nayaimpincha, nuñkancha, nayaantsancha, tura ashí nuj írumba nunasha najanaiti” timiai.

⁸ Nayaimpinmaya “áaráip” túrutmia nu ataksha chichartak turutmiai “Suntar nayaantsanam tura kukar tarimias wajana nu weritiá. Turam ni untsuurinj papin urak takakna nu achiktá” turutmiai. ⁹ Nuyá túrutkui werin papichin seamjai.

Tura surak turutmiai “Papá. Yuátá. Tura yúamka ti yumin átatui. Tura antsu wakemñkia yapamprattame” túrutmiai. ¹⁰ Nuyá papichin suntarnumiá jukin yuamjai. Tura nii turutmia núnisañ wenuruñkia ti yumin nekapramjai. Tura antsu yuan wakeruñkia yapampramjai.

¹¹ Tura nuyá turutiarmai “Waketkim ataksha ashí nuñkanmaya shuáran tura ni kapi-tiantríncha Yus tana nu ujakartiniaitme.” Tu túrutmiai.

11

Jimiará shuar Yusaiya akupkamu

¹ Nuyá karisun nekapmatia áaniun surus turutiarmai “Weme Yusa Uunt Jee nekapmartá. Túram namañ-maa-Yus-sutaisha nekapmartá. Tura nuj Yúsan shiir awajeena nusha nekapmartá. ² Antsu jea áarñkia yajaya shuar susamu asamtai nekapmatsuk ikiuktiá. Nu shuar ti shiir péprun Jerusarénchan kuarentitús (42) nantu nuj akupeñak mash yajauch awajsartatui. ³ Túruiniakui Wikia Wii-shuáran jimíaran akatran akupkattajai. Nusha chíkichik mir jimíará siañtu sesenta (1.260) tsawant pujasar Winian etserkartatui. Nuka menaintiu uwí nankaamasaiti. Úutkur-entsatai pushin entsaru ártatui.” Tu turutiarmai.

⁴ Nu jimíar shuarsha nayaimpiniam nakumkamu áiniawai. Uriwiu numisha jimíar tura shirikip ekeemataisha jimíar nayaimpiniam awai. Nusha ju nuñka Uuntrj Yusaj wajainiak, jimíar akatramua nú shuáran nakumainiawai. ⁵ Shuar nin yajauch awajsataj tutai ni wenená jinia jiki nemasrj ashí áesatniuiti. Núnisañ nin yajauch awajsatniun wakera nuka jákartatui. ⁶ Nu aentska Yúsnan áujmatiniak yumi yutukajp títinian kakaram takakainiawai. Núnisañ entsancha numpa awajsatniun kakarman takakainiawai. Tura ashí yajauchia nujaj aentsun wáitkiasinian takakainiawai. Nuna ashí ni wakeruinia nuj páchitsuk túramin áiniawai. ⁷ Tura ni takatrin umikarmatai Ti Kajen Yajasma náñkatkachu waanmaya jiniia nu mesetan najata nupetak máawartatui. ⁸ Tura iwiarnatsuk ni ayashj uunt pepuru jintiin ajapén tepeartatui. Nu péprunmasha ii Uuntrj Jesukristuncha máawarmiayi. Nu péprunmaya shuar tuke tunaan túrin ásar matai Ejiptu tuñiak tura núnisañ Sutuma tuñiak nu péprun páchiiniawai. ⁹ Tura menaintiu tsawant nuyá nankaamas ashí nuñkanmaya shuar jaka tepan ísar iwiarnascharti tíártatui. ¹⁰ Nu jákarmatai ashí nuñkanam pujuinia nú shuar ni jakamun ti wararainiak mai sunai ajartatui. Kame nu jimíará aents Yúsnan áujmatenak ashí shuáran wáitkiasaru ásar matai ti warasarmai. ¹¹ Nuyá menaintiu tsawant nuyá nankaamas jaka tepesarmatai Yus ataksha iwiaaku awajsarmai. Tura nantakiarmatai nuyá shuar nin wainkiar ti ashamkarmai.

¹² Nuyá nu nantakiaru nayaimpinmaya kakaram untsumman antukarmai: “Jui yaki wakatarum.” Tu untsummiai. Tutaí ashí ni nemasrj ímíainiajn yurañkim amuyan nayaimpiniam wákarmai. ¹³ Túmainiaj ti úurkamtai tias nakakam jeeá pepru saanakmiai. Tura siati mir (7.000) shuar jákarmai nu uujai. Chíkichkia sapijmiainiak Yus nayaimpiniam pujana nuna shiir awajсарmai.

¹⁴ Jímiar wáitsatin nankaamasai. Chikichik ajasua nu túrunatin ishichik ajasai.

Suntar siatia nu kachun umpuarmai

¹⁵ Nuyá suntar siatia nu, kachun umpuarmatai chícham kakaram chichainian nayaimpinmayan antunkamai. Juna tímiayi:

“Yamaikia ii Uuntrj Yus tura ni Anaikiamu Kristu ashí shuaran akupin ajasaraí. Niisha tuke amutsuk akupkartatui.”

¹⁶ Nuyá paintikuatru uuntka akupin pujutainium Yusaj naka pujuarmia nu piniakum tepersar Yúsan shiir awajenak tiarmai:

¹⁷ “Uunt Yúsá, ti kakaram asam Ámijjai tujinkiatin atsawai. Yáunchusha, yamaisha, tura tuke amuutsuk iwiaaku pujuwitme. Ame ti kakarmarmijjai nekas akupkatin juarme yamaikia. Tuma asakmin yuminsajme, tiarmai. ¹⁸ Ashí shuar kajertamkaru ajn yamaikia amesha kajerkatin tsawant jeayi. Jákarusha iniantkim ni túramurj ísaratatme. Turam amée shuarka shiir etserturmakua nusha, tura uchi uunt ajas ashí nunkanam nusha, tura Ámin shiir awajtamsarua nusha ashí mash ti shiira nuna súakum akiktatme. Antsu ju nunkan emesniuka ashí emesratniunam akupkattame.” Tu tiarmai.

¹⁹ Túniakui Yusa Uunt Jee nayaimpiniam ana nu uranmiatai wakenmaanj Chícham Aarma Chumpitiai paant amai. Túrunamtai peemsha, ipiamtasha, cháarpisha, uusha amai tura michasha ti kakekamai.

12

Nuwasha tura Ti Kajen Yajasmasha

¹ Nuyá nakumkamu ti enentáimprannia nayaimpiniam wantinkiamai. Nuwá etsajaj penuarma wantinkiamai. Nawesha nantunam ekeemai. Tura múuknum tuse yaan etsenkrakuyi. ² Nu nuwá ajamtin asa jurertaj tusa wáitai ti kakantar uutmiai.

³ Tumaj ataksha ti enentáimprannia nayaimpiniam wantinkiamai. Ti Kajen Yajasma kapaaku wantinkiamai. Muukeshá siati asa siati akuptai tawaspan etsenkraku áрмаi. Tura kachurisha tísaui. ⁴ Menaintiu nakakam jeeán yaan ni ujukéjai japiki akakermi. Tura nunká utsamai. Nu Ti Kajen Yajasma nu nuwá jatema nuj wajasmai. Júrermetaik yuruataj tusa wajattsamai. ⁵ Tura nuwasha áishmankan jurermai. Nu uchi uunt ajas ashí nunkanam ti kakaram akupkatin asa, nu uchi akupin pujutainium Yus pujana nuj junakmiai. ⁶ Tura núwaka atsamunam pisarmai. Nuj pujustinian Yus iwiarturmai. Tura chikichik mir jimiará siantj senta (1.260) tsawant ayurnat tusa akupkamai. Nuka menaintiu uwi nankaamasaiti.

⁷ Nuyá nayaimpiniam meset amai. Nayaimpinmaya suntara kapitiantri Mikiar ni suntarjjai Ti Kajen Yajasmajaj máanaikiarmai. Ti Kajen Yajasmasha ni suntarjjai ti máanaikiarsha ⁸ nupetmakcharmai. Túramtai nayaimpinmaya jiki akupkamuyi. ⁹ Núnisanj Ti Kajen Yajasma ashí ni suntarjjai nunká akupnakmai. Nu Yajasmasha iwianchi kapitiantri Satanás tutainti. Yáunchuya-napiiti niisha. Ashí nunkanmaya shuáran ananuiiti.

¹⁰ Nuyá nayaimpinmaya kakaram untsumman antukmajai. Tura timiai:

“Uunt iwianch ii yachin yajauch áujmatin jiki akupkamu asamtai yamaikia ii Yusrj uwemtikratniusha tura ni kakarmarin iniakmastincha tura akupkatniusha jeayi. Anaikiamu Kristusha ashí akupin ajastincha jeayi. Tura uunt iwianch ii yachin tsawajsha káshisha iniaitsuk Yusaj yajauch áujmatniua nuna ¹¹ íksan ii yachí nupetmakarai. Yus-susamu murikiu numpea áinis Jesukristu numpejai nupetmakarai. Ni-isha jákatniuitkiusha surimiatsuk nekas-chichaman páchitsuk etserkarmai. Nujajsha uunt iwianchin nupetkarmai. ¹² Tuma asamtai nayaimpiniam pujarmena nusha warastarum. Antsu nunká tura entsá pujarmena nusha uunt iwianch atumin tarutmarmatai, maa, waitnentajrume. Ni tsawantri ishichik ajatesman nekáa ti kajekuiti.” Tu timiai.

¹³ Nuyá Ti Kajen Yajasma nunká ajapna nuwá áishmankan jurerma nuna áintramai.

¹⁴ Turakui nuwan uunt nanapen churuwia nanapea áinis sunasmai. Nujaj nanamuk yáunchuya-napiya pisar atsamunam wemai. Tura ni ayuratrniunam menaintiu uwi nuyá sais nantu pujusmai. ¹⁵ Nuyá nu napi ni weneya entsá jiki nujanक्रमamai nuwan ajekrataj tusa. ¹⁶ Túrasha nunka nuwan yajak nakaak nu entsan mash ukuyámai.

17-18 Túrantai nuwān ti kajerak ni weeá chíkich írunna nujaj máaniaktaj tusa wemai. Nu shuarsha Yus akupkamun umirainiak Jesusan ti shiir áujmaténakui, níijaj máaniaktaj tawai.

13

Nuyá Yajasma jímíara nu

¹ Nuyá nayaantsa káanmatkarĭn wajasan nayaantsanmayá Yajasma jĭiniun wainkiamjai. Muukęsha siátitiat kachurĭ tias tura akuptai tawaspasha tias armai. Ashĭ muuķen Yúsan yajauch chicharin tu áarmauyi. ² Nuĭ wáinkiamaj nu Yajasma nekas uunt yawáa áinniuiat nawenka chaj nawęa áinniuyi. Wenęsha nekas kajen yawáa áinniuyi. Tura Ti Kajen Yajasma Entsaya Yajasma ni kakarmarĭncha tura ni akupkatniurĭncha susamai nuĭaj ti kakaram akupkati tusa. ³ Entsaya Yajasma muukę chikichkin jakamnia awatman wainkiamjai. Túrasha péńker awajnasmai. Túrantai ashĭ nuńkanmayá shuar nuna ísar ti enentáimturar nemarsarmai. ⁴ Túravar nin tikishmatrar shiir awajsar “¿Yaki jujajsha jeá. Imiá kakaram asantai yaki níijaj máanaikminiait?” tiarmai. Tura Ti Kajen Yajasma ni kakarmarĭn Entsaya Yajasma susa asantai ashĭ shuar nincha tikishmatrarmai.

⁵ Núnisaĭ nu Entsaya Yajasma waantu enentáimtumak Yúsan yajauch chicharkatniusha tsankatnakmai. Tura kuarentitús (42) nantutin kakaram akupkatniun sunasmai. ⁶ Núnisaĭ túrak Yúsan yajauch áujmatuk ni náarĭncha ni jeęncha tura ashĭ ni shuarĭ nayaimpiniam pujuinia nunasha katsekkarmai. ⁷ Tura Yusna ainia nuĭaj mesetan najana nupetkatniun tsankatnakmai. Tura ashĭ nuńkanmayá shuaran akupkatniun tsankatnakmai. ⁸ Túrantai ashĭ shuar tuke iwiaaku átinia nu papinium ni naarĭ yámankamtaiknumiá anujkamu atsuárma nuka nu Yajasma tikishmatrarmai. Nu papincha Murik jaka nantakmia nu takakui.

⁹ Shuar juna ántakka enentáimprati:

¹⁰ “Shuaran emetá juinia nusha emetnattawai.

Núnisaĭ shuaran nanĭijaj mainia nusha nanĭijaj mantamnattawai.”

Tuma asantai Yajasma mesetan najanamtai Yus-shuar Yus iisti tusar tuke enentáimtutar katsuntsar pujustin áiniawai.

¹¹ Nuyá chíkich Yajasma kukariá wáakun wainkiamjai. Nusha murikiu áanin jimiará kachurtiniuyi. Tura Ti Kajen Yajasma áinis kakaram chichaakuyi. ¹² Niisha Entsaya Yajasma kakarmarĭn súam akupniuyi. Tura ashĭ nuńkanmayá shuaran “Entsaya Yajasma penĭé jaa tsuarma nu, shiir awajnosti” tímiai. ¹³ Núnisaĭ shuarti túrachminian ti turin asa ashĭ shuar íimiainajĭ nayaimpinmayá jinia nuńká ajuarmai. ¹⁴ Tura Entsaya Yajasma sĭam aents túrachminian ti turak ashĭ nuńkanmayá shuaran anankawarmai. Túrak Entsaya Yajasma nakumkamurĭn najanawat tusa akupkamai. Túrantai puniaĭaj penĭé jakamnia awatmia péńker ajasma nuna nakumkamurĭn najanawarmai. ¹⁵ Kukariá Yajasma kakaram sunasmai. Nuĭaj Entsaya Yajasma najanamun iwiaaku awajsatniua áintsan ichachkiamai. Túram ashĭ níniak shiir awajeacham máatniun susamai. ¹⁶ Nu arantcha ashĭ shuar anujmaprarat tusa akupkamai. Uuntcha uchisha kuírinnisha kuírinchasha anĭkantcha anĭkantchasha ashĭ ni níijajĭncha tura wakerakka untsuurĭncha anujtktiniuyi. ¹⁷ Entsaya Yajasma náarĭn tura wakerakka ni náarĭ númerurĭn anujtktiniuyi. Túrachuka sumatnasha sumakchamniuyi, surutnasha surukchamniuyi. ¹⁸ Wats, wi tájana ju nekaatniuka ti nekas enentáimtustiniaiti: Entsaya Yajasma númerurĭ áishmaru númerurĭ asa sais sianĭtu seséntisáisaiti (666). Ashĭ ti neka ainia nú shuar Entsaya Yajasma númerurĭn nekapmar nin nekaati.

14

144.000 shuar Yúsan kantampruawarma

¹ Nuyá Murikiun Seuĭ náinnium wajan wainkiamjai. Níijajsha sianĭtu kuaréntikuátru mir (144.000) shuar wajaarmai. Nusha níijaj Murikiu náarĭncha tura ni Aparĭ náarĭncha anujtukma aarmai. ² Ti untsurĭ árpan nayaimpiniam túntuiniak teę awajenak kanusa uuntĭrĭ nuĭakkrak téter ajá núnisaĭ antukmajai. Ti kakaram ípíamta núnis amai. ³ Nu tuntuiyamujaj sianĭtu kuaréntikuátru mir shuar akupin pujutainium naka wajasar yamar kántan kantamáwarmai. Niisha kuaru tańkunmasha tura paintikuatru uuntnumsha naka wajasar kantamáwarmai. Nu kántanka chíkichka nekaachmin armai. Aya nu sianĭtu kuaréntikuátru mir shuarka ju nuńkanmayá shuarnumiá uwempraru ásar nu kántan kantamiarmai. ⁴ Nu shuarsha nuwajaj yajauch ajascharu ásar ti shiir áiniawai. Túravar Murik weana nuĭ nemarainiawai. Ju nuńkanmayá shuarnumiá uwempraru ásarmatai Yussha tura Muriksha ti shiir enentáimtiarmai. Niisha emka juukma ti shiira núnisaĭ armai. ⁵ Nu shuar penĭé wáitruachu ásar Yúsajsha ti shiir tuná máatrachu armai.

Menaintiu suntar chichaman etserainiawai

⁶ Nuyá nayaimpiniam suntar nanamun wainkiamjai. Nusha uwempratin chicham tuke amuukashitinia nuna ashí nunkanam pujuinia nú shuaran ujakartiniuyi. ⁷ Nusha ti kakantar untsukum timiai: “Yus ashankatarum. Niñki shiir awajsatarum. Yamaikia ashí shuaran súmamtikawartin tsawant jeayi. Nayaimpincha nunkancha nayaantsancha ashí entsancha najana asamtai shiir awajsatarum.”

⁸ Nuyá chíkich suntar, jímíara nu, taa timiai: “Pai, Uunt Papirúnia péruka penké meserai. Niisha tuke tsanirmaua núnisaj ashí shuaran anampratniua núnisaj utsuurmai. Tuma asa niisha nú shuarjaj nupetnak tuke emesnarai.”

⁹ Nuyá chíkich suntar, menaintiua nu, taa timiai: “Shuar Entsaya Yajasmancha tura ni nakumkamuríncha shiir awajeakuínkia tura nijiajniumsha uwejniumsha ni naarj anujtukmaítuínkia ¹⁰ Yus nin kajerak ti asutiáttawai. Yapá pachimprachman áartinia áintsaj ti kajerkattawai. Túramtai asupri ti tsúer keá nujaj jínium wáitsartatui. Yusa suntari tura Murik íimnianun apenáwar jínium wáitsartatui. ¹¹ Ni wáitsatniurj jí esaak kajintsuk tuke mukuintia nuniskete. Entsaya yajasman tura ni nakumkamurin shiir awajeanak ni naarj anujmamaínia nuka tsawajsha káshisha ayamtsuk wáitsartatui. ¹² Nu asamtai ni chichamen umirainiak Yusna ainia nuka Kristun ti shiir nemarainia ásar nu tsawantaj itiurchatnum pujuiniak katsuntratín áiniawai.”

¹³ Nuyá nayaimpinmaya chichaman antukmajai. Nusha turutmiai “Ju áatratá: “Uunt Jesusan umirainia nu yamá jakarusha tura ukunam jakarusha ti shiir pujusartatui.” Tu aartá” timiai.

“Núnisaj Yusa Wakanj tawai. “Eta, ti takasaru ásar jakar yawerman ayamprartatui. Tura ti penker túrawar akinkiertatui” tawai” turutmiai.

Jú nunkanam arakma juukma

¹⁴ Nuyá yurañkim pújun wainkiamjai. Tura yurañminiam Aents Ajasua nuna eketun wainkiamjai. Akuptai tawaspan kurijaj najanamu etsenkrakuyi. Tura machitian éren takakuyi.

¹⁵ Tura chíkich suntar Yusa Uunt Jeenia jínki yurañminiam eketun kakantar chicharuk tímiai “Árak júuktin tsawant jeayi. Machitrumjaj tsupiram juuktá.” ¹⁶ Tutai yurañminiam eketu ni machitrijaj nunká arakman tsupir juukmai.

¹⁷ Nuyá chíkich suntar Yusa Uunt Jeé nayaimpiniam ana nuyá jínkimiai. Niisha ni machitri éren takakuyi. ¹⁸ Tura chíkich suntar namañ maar Yus-sútainmaya jínkimiai. Niisha jinia wáiniuyi. Tura máchit ti éren takakun kakantar chicharuk tímiai “Machitrum ti érea nujaj uwa nunká arakma nu tsupiram juuktá. Mash tsamakarai.” ¹⁹ Tutai suntar ni machitrijaj ashí nunkanmaya uwa neren tsupir juukmai. Tura neketainiam chumpiamai. Nu neketai Yus ti kajerak shuáran ti asutiáttá nuna nakumeawai. ²⁰ Tura uunt péprunmaya arantach ijiurarmai. Tura neketainmaya numpa jínkimiai. Nu numpa tres siañtu (300) kirumitrua nu pajamar kawayu nujijaj métek ajasmai.

15

Nayaimpinmaya suntar amúamunam wáitkiastinia nuna piniñnumiñ ukainiawai

¹ Nuyá ashammian ti enentáimprannian nayaimpiniam wainkiamjai. Siati suntar amúamunam wáitkiastinia nuna takusarmai. Nujaj ju nunkanam yajauch shuáran ti wáitkiasar Yus kajeamun umirtatui.

² Nuyá antumianka áiv 20 Tura uunt péprunmaya aranntsaj ti saar jijaj pachimpramun wainkiamjai. Ni káanmatkaríncha Entsaya Yajasman tura ni nakumkamuríncha nupetkarma nu nuj wajaarmai. Tura nin arpa tuntuítaiin Yus súarmai. ³ Túramtai kantamáwarmai. Yusa yaintri Muisaisa kantaríncha tura Murikiu kantaríncha kantamainiak tiarmai:

“Uuntá, ashí tujinchaitme. Ti penker tura ti enentáimturmin ashí najanaitme. Ashí Uunt Akupin asam ashí nekasa nu túrasha péñkera nu túriniaitme. ⁴ Uuntá, ¿yaki ashampromkachat? Tura yaki ti shiir awajtamsachat? Aya Amek ti shiir tunaarinchaitme. Ashí nunkanmaya shuar ame ti shiir túramun wáinkiar Aminiak jeartamar ti shiir awajtamsartatui.”

Tu kantamáwarmai.

⁵ Nuyá atak Yusa Uunt Jeen íisan, Ti Shiir Tesaamun uranniun wainkiamjai. ⁶ Tura Ti Shiir Tesaamunmaya siati suntar siati wáitkiastinjaj jínkiarmai. Niisha ti shiir pújun entsaru armai. Netsepniumsha kurin emenmama armai. ⁷ Nuyá kuaru tañkunmaya chíkichik kurí piniñkian súarmai. Nu piniñ tuke iwiaaku Yusa kajetairrijaj piaku armai. ⁸ Tura Yusa kakarmarj ti ashammai Ti Shiir Tesaamunam mukuintia núnis piakmai. Túramtai nu siati suntar wáitkiastinian ukarar amuiniatsaj Yusa Jeen wayachminiuyi.

16

Wáitkiastin piniñ ukararma

¹ Nuyá Imiá Shiir Tesaamunmaya ti kakaram chichaamun antukmajai. Nusha siati suntaran tiarmai “Nuñká werum Yusa kajetairj siati piniñnum ana nu ashí ukartarum.”

² Tutai emka suntar we, piniñnumiã kukar ukarmai. Túramtai ashí shuar Entsaya Yajasma náarjñ anujmamprr ni nakumkamurjñ shiir awajiarma nuna ti najamin kuchap jñinturarmai.

³ Nuyá chíkich suntar jñiara nu, we Yusa kajetairjñ nayaantsanam ukarmai. Túramtai nayaants jakáa numpéa áinis ajasmai. Tura ashí nuj pujuinia nu kajñkiarmai.

⁴ Nuyá suntar menaintiua nu, entsanam tura púkuninmasha ukarmai. Túramtai ashí numpa ajasarmai. ⁵ Nuyá suntar entsá wáinniua nuna chíchamen antukmajai. “Uuntá, amek ti penker Yus asam jútikiame. Yáunchusha tuke pujú asam ti shíraitme. ⁶ Iis, nu shuar amée shuárumincha tura ame chichamin etserniuncha máawar ni numpen ukatraru ásarmatai Amesha núnismek numpa áarume. Maa, páchitsuk áitkianatin áiniawai.”

⁷ Tutai namañ-maa-Yus-sútainmaya chichaman antukmajai. “Eta, Uuntá. Nekas kakaram asam ashí ti tujinchaitme, Nekas túratniua nu ti penker túrin asam nu shuar túramujai métek akiruitme, timiai.”

⁸ Nuyá suntar kuatrua nu, tsawai nantunam ukarmai. Túramtai jijiã shuáran esaamujai wáitkiastin kakaram sunasmai. ⁹ Tura shuar ti sukuám wáitiamia nu, nu wáitkiastinian nérenniun Yusán yajauch chícharkarmai. Tura ni tunaarjñ enentáimtsuk Nin shiir awajsa-tñiuncha penké nakitarmai.

¹⁰ Nuyá suntar senkua nu, Entsaya Yajasma akupin pujutairjñ ukarmai. Túramtai ni nunkeñ ashí kashi ajasmai. Tura shuar ti najaimiainiak iniajñincha esamiarmai. ¹¹ Tura nújaisha yajauch túratniuncha iniaisacharmai. Antsu kuchapjijiã tura ti najaimiainiak wáitiamiak nayaimpinmaya Yúsán ti yajauch chícharkarmai.

¹² Nuyá suntar saisa nu, Eupratis entsanam ukarmai. Túramtai kuyuámai. Nujai nantu tátainmaaniã akupin taarti tusa jñintiamnamai.

¹³ Tura nuyá juna wainkiamjai. Ti Kajen Yajasma weneyasha, Entsaya Yajasma weneyasha tura núnisañ penké Kukariã Yajasma ántar yúsán etserniua nuna weneyasha puachia núnin yajauch wakan menaint jñiarmai. ¹⁴ Íwianch ániak aents tujintiamun túruiniak ashí nunkanmaya akupniun irurarmai. Ti Tujincha-Yusaj ni uunt tsawantrj jeamtai mesetan najanatai túsar weriarmai. ¹⁵ (Yamá Kristu “Aneara pujustarum, tawai. Nékachmanum kasa núnisnak jeattajai. Kánutsuk tuke iwiarnar pujak ni entsatairjñ penker wáinia nú shuar ti shiir átatui. Misuchu asa natsaarchattawai.” Tu tawai.) ¹⁶ Tura yajauch wakan uunt akupin ánian Armajetúñ nunkanam irurarmai. Israer-chichamnum nu nunka tu anaikiamuiti.

¹⁷ Nuyá suntar siatia nu, nasenam ukarmai. Túramtai nayaimpinmaya Yusa Uunt Jeeñia ti kakaram chicham Yus akupin pujutainmaya chíchaak “Mash uminkia” timiai.

¹⁸ Tura nuyanka peemsha, chírpisha, ipiamtasha ajamai. Tura nunkasha ti kakaram úrkamai. Maa, aents jú nunkanam yámankamtaik pujuarmia nuyá júnis úrkamuka atsuwiti. ¹⁹ Ti Uunt Péprusha menaint nakantramai. Ashí nunkanmaya péprusha saanakiarmai. Nujsa Yus ti kajerak Papirúnia pépruncha kajinmattsuk ni kajetairjñ yapá umutaia áintsañ aarmai. ²⁰ Entsó ajapén atentrasa tura murasha menkaramai. ²¹ Núnisañ nayaimpinmaya uunt kaya núnisañ micha kákeramai. Ti uunt ániak kintiarjai métek kijin armai. Shuarsha nujai ti wáitiamiatayañ áyatik Yúsán yajauch chícharkarmai.

17

Tsanirmatai nuwã asutiámu

¹ Nuyá siati suntarnumiã chíkichik taruti turutmiai “Winitia. Tsanirmatai nuwã ti asutiátniun iniaiktustajtame. Nu nuwã nayaantsanam uku eketui. ² Ashí ju nunkanmaya akupin niijiã tsanirmawaru áiniawai. Núnisañ ashí ju nunkanmaya shuar, nu nuwã tsanirmatniun tsankateam, nijiamanch umartinia áintsar niijiã ti yajauch túrawar nampekarmai.” Nuna taku Yusnumiã kanaktinian nakumkamai. ³ Nuyã mesekranam kampuntin atsamanam jurukmiai. Tura nuj Yajasma kapaágunam nuwã eketun wainkiamjai. Nu Yajasma nasha ashí Yúsán yajauch chíchareamu áatramuyi. Muuke siátitiat kachurj tiásauyi. ⁴ Nu nuwãsha tarachin yamakai kapaákujaisha ti shiir iwiarmamar entsaruyi. Kurijjaisha, shírmach kayajjaisha, ti shiir sháukjaisha iwiarmamprauyi. Kuri pinñkian mujmianinasha tura ashí ni tsanirmatairj imiã yajauch armia nunasha piakun ajaamak takakauyi. ⁵ Nijiañiumsha ni naarja áintsañ yúpichuch nekaachminia nu júnis áarmauyi: UUNT PAPIRÚNIA, Ashí Ju Nunkanam Mujmianian Túrnia

Nunasha Nukurinti. ⁶ Nu nuwasha Yus-shuar Kristunun etserkar máawarma ainia nuna numpen nampekuyi.

Nuna wáinkian ti enentáimturmajai. ⁷ Túrunamtai nayaimpinmaya suntar túrutmiai “¿Urukantai imiá enentáimtam? Wats, ashí nuwanun paant ujaktatjame. Núnisan yajasma ekenak júana nunasha paant ujaktatjame. Muukeshá siátichukait tura kachurjsha tiáschak áinia. ⁸ Nu yajasma wáinkiam nuka yaunchu pujuwiti tura yamaikia juí pujachiat amúamunam tuke játsuk náŋkatkachu wáanmaya jíinkittiwai. Shuar nuna wáinkiar ni naari tuke iwiaaku pujutai papinium yámankamtaiknumiá anujtukchamua nuka nu yajasma ahamkartatui. Nu yajasma yaunchu pujú yamaikia atsayat atak wantinkiattawai’ turutmiai.

⁹ ‘Nekas neka ainia nu júna enentáimturarti: Siat muukenka siati náintian nakumui. Nu nuwá nuí eketui. ¹⁰ Núnisan ni siati muuke siati akupniun nakumui. Kame senku akupniuka nankaamasaru ainiawai. Chikichik tuke akupniuiti tura chikichka tuke taatsui. Nii taasha núkap tsawant akupkashtatui. ¹¹ Nuyá ashí ukunmanka yaunchu amia nú yajasma wantiniak nujai uchu akupin ajastatui. Túmaitiat chikich siati akupniujai iruram métek enentáimpranniaiti. Tura nu yajasma yamaikia atsayat wantiniak akupak umik tuke emesartinnium wétatui’ turutmiai.

¹² ‘Tias kachurj wáinkiam nuka tias akupin tuke akupenatsna núiti. Niisha nu yajasmajai métek penké ishichik tsawant akupin ajastatui. ¹³ Ju tias akupniusha métekrak enentáimainiak ni kakarmarin yajasma sústataui nújajisha akupkat tusar. ¹⁴ Murikjajisha mesetan najanawartatui. Túrasha Murik nupetkartatui. Niisha uuntjai nankaamas Uunt asa tura núnisan akupniujai nankaamas Akupin asa nupetmaktatui. Tura Nijijai írutraa nu, Yus Winia atí tusa achikma ásar tura Nin tuke umirin ásar Nijijai nupetmakartatui.’

¹⁵ Suntar tuke chichartak turutmiai ‘Tsanirmatai nuwá nayaantsanam uku eketu wáinkiachumek. Nu nayaantsaka ashí nunkanmaya shuaran nakumeawai. ¹⁶ Tura tias káchuka yajasma nu wáinkiam nu, tsanirmatai nuwan nakitrar ajapawar misú ikiukiartatui. Ni ayashíncha yuawartatui tura áesawartatui. ¹⁷ Nu akupni enentáin Yuska ni wakeramurin apujsaiti. Nii timia nu umintsain akupniusha métekrak enentáimprar ni kakarmarin takamsuk yajasma sústaniun enentáimtkramai. ¹⁸ Nuwá wáinkiam nuka ashí nunkanmaya akupniun akupeana nu pépruiti.”

18

Papirúnia emesramuiti

¹ Nuyá nayaimpinmaya suntar táarun wainkiamjai. Ti kakaram akupin asa nunkancha tsáapin awajsamai. ² Tura ti kakantar chichaak timiai “Pai, Uunt Papirúnia penké meserai. Tura yamaikia íwianch matsamtaisha ashí yajauch wakanj pujutairisha ajasai. Mujimiai nanamtincha tura ashí yajauch nanamtin ainia nusha nuí pasunmainiwai. ³ Nu péprunmaya shuar tuke tsanirmaua núnisan ashí nunkanmaya shuaran anampratniua núnisan ni ti yajauch turamujai utsuurmai. Núnisan ashí jú nunkanmaya akupin Yúsan iniaisar nijijai tsanirmawarua áinis áiniawai. Tura shuarsha ni yajauch wararmajai ti kuítrintin ajasaruiti.” Tu timiai.

⁴ Nuyá nayaimpinmaya ti kakantar chichaman antukmajai. “Wíi shuaraitrumna nuka nú peprunmaya jíinkitiarum. Túrachkurmeka ni tunaari jumamkirum ni wáitsatniuríncha pachíinkiatarme. ⁵ Ni tunaarjsha ti piak nayaimpiniam jeastatuk ajasai. Tuma asamtai Yus ni tunaarjín kajinmatkichiuiti. ⁶ Ni tunáa túramujai métek akikiam ataksha nuna nankaamas métek patattsata. Ni yajauch túramu nijiamchin ashí áararma núnisan nuna nankaamas ti wáitsatin nijiamanch pachimpruram susata. ⁷ Waantu enentáimtumak yajauchin wararsama nujai métek ti wáitkiastá yamaikia. Tunán ti túriniaitiat ni enentáinkia enentáimias “Uunt Akupniuitjai. Wajechu asan penké wáitsashiniatjai” tu enentáimtumawai. ⁸ Tuma asamtai ti wárik chikichik tsawantaj ni wáitsatniuri tarittiwai. Jákatniusha ti wáitsatniusha tura tsukasha tarí ashí jijijai ekeemankattawai. Uunt Yus ashí Tujincha nu kajer kamu asa nujai asutniáttawai.” Tu timiai.

⁹ Ashí nunkanmaya akupin nijijai tsanirmawaru ainia nu ashí yajauchin nijijai wararsaru ásar nu pepru esaak múkuint ajakui eáararmai. ¹⁰ Ti esaak wáitakuí nuí pachíinkiar wáitsatniun ahamainiak arant wajasar tiartatui “Maa, Papirúnia ti uunt pépruitiat nekas wáitnenmai ajawai. Imiá wárik ni wáitsatniuri tarini.”

¹¹ Núnisan ashí nunkanam súrin ainia nusha nu péprun ti kuntuts enentáimturar eáartatui. Ni surutain itiamun zyaki sumarkat? ¹² Kame júna itiaru áiniawai: kurincha, kuítnasha, kaya shíirmachincha, ti shíir sháuknasha, ti pépker tarachniasha, akupin entsatai shíirmachin yamakaincha kapaániuncha, sétancha, itiaru áiniawai. Núnisan ashí kunquin numincha, ti shíir awara najanamuncha, ti shíiram numincha, yanjú jiruncha, penké

jiruncha, mármur kayancha itiaru áiniawai. ¹³Núnisañ ishpinñasha, nusháa kuñkuinniasha, mira kuñkuinniasha, umutaincha, asuítincha, trikiu nerencha, tura trikiu ti péñker nekenmancha itiaru áiniawai. Núnisañ áintstai tañkuncha, murikniasha, kawaincha ni kárujijai, tura nú arantka shuárnasha suruktinian itiaru áiniawai.

¹⁴Tura nu péprun tiarmai “Numí neren ti wakeruk súmauya nu yamaikia nu atsawai. Ashí ni kuñtrisha tura ashí ni péñkerisha tuke peñké amuukayi.” Tu tiarmai.

¹⁵Ashí nuna súrin armia nu, nuna surukar kuñtrintin ajasaru ásar, ti wáitsamun ashamkar arant wajasar eáratatui. ¹⁶Túrawar tiartatui “Maa, uunt pépruitiat ti wáitnenmai ajakai. Nuwa ti péñker iwiarmampra áinis nuyá shuar akuptai tarachin yamakaijijai kapaaku entsarmai. Kurijijaiasha kaya ti shírmachijijaiasha tura ti péñker sháukjajisha ti shiir iwiarmampraruyi. ¹⁷Ti wárik ashí ju kuit amukaiti.” Tu tiarmai.

Ashí uunt kanú kapitántrisha, ashí nayaantsanam katiinia nusha, ashí kanú wiánniusha, tura ashí kanú nérennurisha árantak wajasarmai. ¹⁸Tura pepru esaak múkuint ajan wáinkiar ti kakantar úutainiak tiarmai “Timiá shiir pepru atsuwiti.” ¹⁹Tiar ti kuntuts pujuiniak awatamamar kakantar úutainiak tiarmai “Maa, ti uunt pépruitiat ti wáitnenmai ajakai. Ashí uunt kanu nérentin nayaantsanam niijjai takasar kuñtrintin ajasarmai. Tura ti wárik mash emesnarai.” Tu tiarmai.

²⁰Antsu nayaimpiniam pujarumna nu, ashí Yus akatramutirmesha, ashí Yusna etserniutirmesha, tura ashí Yus-shuar árumna nu ni wáitsamujai warastarum. Nu wáitsamujai atumin yajauch awajtamsamarmena nuna yapajtiurmakurme.

²¹Nuyá ti kakaram nayaimpinmaya suntar ti uunt neketai kayan júki nayaantsanam ajun timiai “Júnisañ uunt pepru Papirúnia emesnar atakka wainniakchatin tuke menkakattawai. ²²Tura atakka jantsemma piñkiuisa tampursha shakapsha antunkashtatui. Nu arantcha nuñkia shuar peñké takakmaschartatui. Túramtai nekeamusha antunkashtatui. Ashí mitia átatui. ²³Shiripkincha ekeemakchartatui. Nuatma nampersha antunkashtatui. Nuikkia ni shuarj súrin arma nu ashí nuñkanam nankaamantu armai. Tura ashí nuñkanmaya shuaran waweatniua áintsan níya núnis ajasarat tusa anañkawarmai. Túrasha núnisañ ti kakarmaitiat ju mash túrunayi.” Tu timiai.

²⁴Kame ni akupkamujai péñker shuar ti mantamnawaru asamtai nu péprunam ashí yaunchu Yusna etserniu numpesha, ashí Yus-shuara numpesha tura péñker shuar ashí nuñkanam maamu ainia nuna numpesha nu paant wáinkiamniaiti.

19

¹Nuyá nayaimpinmaya ti untsurj aents kakantar untsumainian antukmajai.

“Ju ti shiir enentáimtumainti. Yuska uwempratniuncha, nekas shiir átinniasha, nankaamaku átinniasha, tura ashí kakarmancha nekas nérenniuiti. ²Niisha aya nekas péñker túratniua nuna túrin asa ti nukap tsanirmaun ashí shuaran tsanirijijai utsuun ti asutiáyi. Nin ti wáitkias ashí ni shuarj máawarman yapájmíátkaiti” tiarmai.

³Ataksha kakantar untsumainiak tiarmai:

“Ti shiiraiti. Nii wáitsatin ji esaak tuke kajintsuk múkuint ajawai.” Tu tiarmai.

⁴Tuñiakui paintikuatru uunta nu tura kuaru tañkusha nuñká piniakumawar akupin pujutainium Yus pujana nuna shiir awajsarmai. Túrawar “Imiá nekasaiti. Ti shiir túriniaitme” tiarmai. ⁵Akupin pujutainmaya chícham jíinkimiai.

“Yusna takarniutirmesha tura ni umirniutirmesha, úuntaitkiurmesha úchitkiurmesha kapi-tiánitkiurmesha péjchachitkiurmesha, ii Yusrj tuke shiir awajsatarum.” Tu timiai.

Murik nuatnaikiatin namperi

⁶Nuyá ti untsurí aents chíchainiak kanusa uuntri nujan Krak téter ajá núnisañ antukmajai. Ti kakaram ipiamta núnis amai.

“Tí shiiraiti, tiarmai. Ii Uuntri Yus ashí tujincha asa ashí akupkatniun nankaamayi.

⁷Tuma asamtai shiir enentáimsartai. Murikiu anajmarmarj shiir iwiarnarmatai ni nuatnaikiatin tsawantrj jeayi. Tuma asamtai ti shiir warasar nincha shiir awajsatai. ⁸Murikiu anajmarmarjñkia iwiarnarti tusa ti shiir pushí sunasmai. Nusha yamaram máatrachu asa ti pújuiti.” Tu tiarmai.

Nu pushí Yus-shuar péñker túramun nakumeawai.

⁹Nuyá nayaimpinmaya suntar turutmiai “Ju áatrarta: “Murik nuatma námpernam ipiaamu ainia nuka ti shiir warasarti.” Tu aartá, turutmiai. Juka Yus timia asa imiá nekasaiti.”

¹⁰Takui nu suntaran shiir awajsataj tusan tikishmatramjai. Túramtai turutmiai “Peñke áinkiaip. Wisha Yusa yáintriñtai áimijjai métek tura yatsumjai métek Kristu nekas chíchamen tuke umirin ainia nu. Yúsak shiir awajsatniuiti.” Tu turutmiai.

Kame Kristu imiá nekas timia nuna ashí Yúsnan etserainia nú shuar paant awajkartin ániawai.

Kaway pújunam eketna nu

¹¹ Nuyá nayaimp uranniun wainkiamjai. Nuj kaway puju wantinkiamai. Nu kawaynium ekeema nuna naari Ti Penker Umin tutajyi. Núnisan Ti Nekas Turin tutajyi. Ti penker Akupin asa aya nekas péñker túrak mesetan najanaiti. ¹²⁻¹³ Ni jjišha jijjaj métek keeáрмаi. Múuknumsha akuptai tawaspan untsurj etsenkrakuyi. Nuj ni naari Yus Chicham áarmauyi. Túrasha tana nuna Niñki takamtsuk nekaamai. Numpajaj enkerman entsaruyi. ¹⁴ Ti untsurj nayaimpinmaya suntar mesetnum weena áintsar kawainium ekemkar ti shiir pújun entsaru Nin nemariarmai. ¹⁵ Nu suntara Untrj weneeya, ashí nunkanmaya yajauch shuaran máatin, puniá mai ere tsakatskatin jjinmiai. Tura jirujaj asutiátnua áintsar ti kakaram akupkattawai. Túrak Ashí Tujincha Yusa kajetairi ti kakarma nujaj shuáran asutiáttawai. Uwa nekenkar ijiuratniua áitkiasar wáitkiasartatui. ¹⁶ Ni pushiríncha makujincha ni naari áarmauyi: Ashí Akupniun Akupin tura Ashí Uunta Untrj.

¹⁷ Nuyá tsawái-nantunam suntaran eketun wainkiamjai. Nusha nayaimpiniam nanamtin nanamainian kakantar untsuak timiai “Yusa uunt namperin yurumátiarum. ¹⁸ Akupniu namañkéshta yuítiarum. Suntara kapitántri namañkéshta, kakaram suntara namañkéshta, kaway namañkéshta tura eketainia nuna namañkéshta, kame ashí shuara namañkéshta nankaamantu ainia núnasha tura penké shuar ainia núnasha yuítiarum.” Tu untsukmai.

¹⁹ Tura nuyá Entsaya Yajasmancha tura jú nunkanam akupin ainia nunasha ashí ni suntarjijaj wainkiamjai. Niisha kawainium eketka nujaj tura nuna suntarjijaj mesetan najanatai tusar iruntrarmai. ²⁰ Tura nu mesetnum Yajasmasha tura Kukariá Yajasmasha, penké ántar yúsnan etserniua nu, mai achinkiarmai. Nuikkia Entsaya Yajasma ni kakarmarjin súam nu Kukariá Yajasmaka aents tujintiamun ti turak shuáran anañkawarmai. Túramtai nu shuar Entsaya Yajasma náarin apujmamsar ni nakumkamurjin shiir awajsarmai. Tuma asamtai Entsaya Yajasmacha tura Kukariá Yajasmacha íwiakuk asuprijjaj ti kea nu ji-antumianum apeáwarmai. ²¹ Chíkicha kawainium eketkanumia puniá tsakatskatin weneeya jjinmia nujaj mantamnewarmai. Túramtai nanamtin ni ayashin yuawar ejemakarmai.

20

Kristu mir uwi jú nunkanam akupkattawai

¹ Nuyá nayaimpinmaya suntar táarun wainkiamjai. Nusha náñkatkachu waja yawirjin tura jinikiatai jirun kumpurman takakuyi. ² Nu suntarsha Ti Kajen Yajasma jiru kumpurmajaj jinikiama. Nu Yajasma iwianchi kapitántri Satanas tutainti. Yáunchuya-napiti niisha. Tura nu iwianchin jinikiá mir uwi pujusat tusa ³ náñkatkachu waganam epenmiai. Tura waiti uraichminian anujtukmai. Mir uwi nankaamatsain ashí nunkanmaya shuaran anañkawarain tusa túramai. Antsu mir uwi nankaamasmatai ishichik tsawant ankant akupnaktiniaiti.

⁴⁻⁵ Nuyá akupin pujutainium pujuinian wainkiamjai. Tura shuara túramurjin írsarat tusa kakaram sunasarmai. Tura núnisan muuke tsupirka maamu wakanincha wainkiamjai. Nusha Yusa chichamen etserainiak tura Kristu chichamencha etserin ásar maamu armai. Niisha Entsaya Yajasmacha ni nakumkamurjincha tikishmatracharu armai. Núnisan náarincha nijajniunmsha tura uwejnnumsha anujmampracharu armai. Nu shuar ataksha nantakiar emka nantaktin tsawantnum pachiinkiarmai. Túmainiak Kristujaj métek mir uwi akupeamun wainkiamjai. Antsu chíkich jákaruka mir uwi nankaamatsain nantakcharmai. ⁶ Antsu emka nantaktin tsawantnum pachiinkiarua nú shuar, ti penker áimak, ti shiir warasmin ániawai. Nu shuarka jimiará jákatniunam pachiintsuk Yusna tuke takarin tura núnisan Kristunu tuke takarin ártatui. Tura Kristujaj métek mir uwi akupkartatui.

⁷ Tura mir uwi nankaamasmatai uunt iwianch urani akupnaktatui. ⁸ Túram ashí nunkanmaya shuáran anañkawartaj tusa jinikiatiawai. Kuk nunkanmasha tura Makuk nunkanmasha ashí pujuinia nuna anañkawartatui. Tura mesetan najanataj tusa ni suntarjin nekapmarchamnia ti untsurj irurtatui. ⁹ Tura ashí nunkan enetak Yus-shuar matsamtaincha tura Yus ti aneamu pépruncha mash éñkekarmai. Túramtai Yus nayaimpinmaya jinia akuptuk mash áesawarmai. ¹⁰ Tura iwianchi kapitántri, nin anañkawarmia nu, asuprijjaj keá ji-antumianum apenáwarmai. Nu yaunchusha Entsaya Yajasmasha tura Kukariá Yajasmasha, penké ántar yusnan etserniua nu, nuj apenáwarmai. Nujsa tsawajsha káshisha inianatsuk ti wáitsartatui.

Ashí amúamunam súmamtikiatin tsawant

¹¹ Nuyá akupin pujutain úntan tura ti pújun wainkiamjai. Tura nuj pujancha wainkiamjai. Niisha ti kakaram asamtai nunkasha nayaimpisha aya menkarar tuke atsúarmai.

12-13 Tura túrunatsaĩn nayaantsanam jákarua nusha jíinkiarmai. Núnisan iwiarsamunam jaka pujuinia nusha jíinkiarmai. Tura jákaruncha, nankaamantu arma nunasha tura penké shuar arma nunasha, ashí wainkiamjai. Tura Yusaj naka wajaarmai. Nuyá ashí shuar túramu aakma papí urantrarmai. Tura nu papinium aarma nujaj métek ashí ni turamurj paant nékaneakui súmamtiknawarmai. Tura chíkich papisha tuke iwiaaku pujustin papí urankamai. 14 Nuyá jákatin amuukati tusa ji-antumiannum apenámai. Nu ji-antumiannum wétin jimiará jákatin tútainti. 15 Tura ashí shuar ni naarj tuke iwiaaku pujustin papinium atsúarma nusha nuj apenáwarmai.

21

Nayaim yamaram tura yamá nunka

1 Nuyá nayaimpisha tura nunkasha menkaramtai nayaim yamarman tura yamá nunkancha wainkiamjai. Tura nayaantsasha atsumai. 2 Wi, Juan, ti shiir péprun, Yusnumiá yamaran Jerusaréńkan nayaimpinmaya táarun, wainkiamjai. Anajmarma ni áishrin inkiuntaj tusa ti shiir iwiarmampra áintsan ti penker iwiarmamuyi. 3 Nayaimpinmaya ti kakantar chichaamun antukmajai. “Iisiá, Yus yamaikia aentsjaj pujawai. Tuke niijjaj pujakuí ashí ni shuarj ártatui. Tura niijjaj tuke pujak nekas tuke ni Yusrj ártatui. 4 Yus ni neajkin ujujturartatui. Tura nuik amia nuka ashí amuukarmatai jákatniusha, úttincha, wáitsatniusha, tura najaimiatniusha atsuttawai.”

5 Tura akupin pujutainium ekema nu “Iistá, Wi ashí penké yamarman nájanjai” timiai. Nuyá nu arantcha turutmiái “Juka imiá nekas asamtai aartá. Nekas enentáimtustiniái.” 6 Ataksha turutmiái “Yamaikia mash uminkiyai. Wiitjai. Yámankamtaiknumiá amúanmasha tuke pujuwitjai. Wisha A rétranamaya Y rétranam ashí retra áintsaitjai. Ashí kitiama núnaka tuke iwiaaku pujutai entsan penké kuítchajaj ártatjai. 7 Nupetmakunka ashí yamarma juna mash susattajai. Wisha ni Yusrj ártatjai. Núnisan niisha winia uchir ártatui. 8 Antsu sápijika, Yúsan enentáimtichusha, yajauchin máatrasha, mankartincha, tsanirmatan pujurniusha, wawekratniusha, ántar-yusan tikishmatniusha, tura ashí wáitrincha asuprijjaj keá ji-antumiannum apenáwartatui. Nuka jimiará jákatin tútainti.”

Yamaram Jerusaréń

9 Nuyá siati suntar piniń amúamunam wáitkiasinjaj piakun takakua nuyá chíkichik taruti túrutmiái “Winiitá. Murikiu anajmarmarin iniaktustatjame.” 10 Taku mesekranam naint yakí juruki Yusnumiá ti shiir Jerusaréń pepru nayaimpinmaya táarun iniaktursamai. 11 Nu péprusha Yusa wincharjijaj tsáapniuiy. Nu tsáapnincha kaya ti shírmachia núnis jaspi kaya nuní saar asa ti tsáapniuiy. 12 Pepru yantamesha ti yakí péńkramuyi tura wáitirj tuse amai. Tura nu wáitinium suntar wajatiarmai. Nu wáitnimasha Israer-shuara uuntrj tuse armia nuna naarj áarmauyi. 13 Nantu tátainmaanj menaintiu waiti amai. Nantu akatainmaanjša menaintiu waiti amai. Nunkaanjša menaintiu waiti amai. Arakaanjša menaintiu waiti amai. 14 Ti uunt kaya tuse apujsamu armai. Tura nuj ekenir péńkramuyi. Nu tuse kayanam Murikiu akatramurj tuse armia nuna naarj áarmauyi.

15 Suntar wijjaj chichau nu, nekapmatain kurin takakuyi. Nujaj pépruncha, wáitirincha, tura péńkramurincha nekapmartiniuyi. 16 Pepru esantjša wançantjša yakirjša mash métekrak armai. Suntarsha péprun nekapmataijjaj nekapmaram esantjša wançantjša tura núnisan jeamkamuyi yakirjša jimiará mir jimiará siańtu (2.200) kirúmitru amai. 17 Nuyá péńkrincha nekapmaram. Suntar aents nekapmataijjaj nekapmaram sesentiku-atru (64) mitru amai. 18 Nu péńkramusha jaspi kayajaj najanamuyi. Péprusha aya kúrikiyi. Nu kuri ti penker sáarauyi. 19 Pen apujtukma kayasha ti shiir kaya ainia nujaj najanamu asa ti shiir iwiaramuyi. Emka nu jaspi káyauyi. Jimiara nusha sapiru káyauyi. Menaintiua nusha ákata káyauyi. Kuarua nusha ismirátauyi. 20 Senkua nusha únise káyauyi. Saisa nusha kurnarinia káyauyi. Siatia nusha krisuritiu káyauyi. Uchua nusha periru káyauyi. Nuiwia nusha tupasiu káyauyi. Tiasa nusha krisuprasa káyauyi. Áuntsea nusha jasentu káyauyi. Tusea nusha amatista káyauyi. Ti kayaim apujsamu asamtai ti shírmachiyyi. 21 Pepru wáitirj tuse ainia nu, ti shiir nayaantsanmaya shaukjaj chíkichik najanamu armai. Pepru jintjša aya kúrikiyi. Nu kuri ti penker sáarauyi.

22 Yusa Uunt Jeeńcha wainkiachmajai. Antsu nu peprunam Uunt Yus ashí tujincha nu tura núnisan Muriksha nu péprun pímiutkui takamtsuk Niiniuyi. 23 Nu péprunmasha tsawai-nantusha kashí-nantusha atsumchamai. Antsu Yusa wincharj tsáapin awajmiami. Núnisan Muriksha tsáapin awajmiami. 24 Nu tsáapnijjaj ashí nunkanmaya shuar wekasartatui. Tura ashí nunkanam akupin ainia nusha nuj yujainiak ni péńkerijjaj nuna shiir awajtu-iniawai. 25 Tura kashí atsá asamtai tuke tsawaiti. Tuma asamtai wáitirj tuke epenchamu ártatui. 26 Tura ashí nunkanam péńker ana nuna nuj itiaartatui. 27 Tura yajauchikia penké wayashatatui. Mujjiamińian túrincha tura anankartincha penké wayachartatui. Antsu

áyatik shuar tuke iwiaaku pujutai papinium naarj aarma ainia nuke wayawartatui. Nu papincha Murik takakui.

22

¹ Nuyá suntar tuke iwiaaku pujutai entsan ti sáaran iniaktursamai. Nusha uunt akupin pujutainmaya ti saawi jiiinmíai. Nu pujutaisha Yusna tura Muriknauyi. ² Pepru jintincha tura entsá mai paen tuke iwiaaku pujutai numi wajamai. Nusha ashí tuse nantutin neremai. Ni nukeshá ashí nunkanmaya shuar tsuámatainti. ³⁻⁴ Ashí yajauchia nuka atsuttawai. Uunt akupin pujutai, Yúsnasha Murikniasha, nuñ aa asamtai ni shuarj ti paant wainiainiak tikishmatrartatui. Tura nijiajncha ni naarj anujmankartatui. ⁵ Tura káshisha atsuttawai. Nuj pujuinia nuka shiripkincha etsancha atsumchartatui. Uunt Yúsak tuke tsáapin awajtiatui. Tura ni shuarj tuke iniannatsuk akupkartatui.

Jesukristu tátrinri penké nuntumsai

⁶ Nuyá suntar turutmíai “Ju chicham ti nekas asa nekas enentáimtusminíai. Uunt Yus yaunchu níiniun etserniun ni chichamén enentáimtikramia núnisañ yamaikia ni suntarin akuptuk wárik túrunatta nuna ashí ni shuarin ujakuíti.”

⁷ “Ti wárik winittíajai” tawai Murikkia.

Shuar ju papinium Yusa Chichame áarman umirna nuka shiir warasminíai.

⁸ Wi, Juan, juna mash ísan mash antukmajai. Tura mash ísan antukan nayaimpinmaya suntar iniaktursama nuna shiir awajsataj tusan tikishmatramjai. ⁹ Túram turutmíai “Penké áinkiaip. Wisha Yusa yáinrinjtai ámijíaj métek tura yatsumjijaj métek. Yúsnan etserin ásar tura ju papinium áarma nuna umirainiak Yusa yáinri áiniawai níisha. Yúsak shiir awajsatniúiti.”

¹⁰ Nuyá ataksha turutmíai “Ju papinium aarma Yusna asamtai úukam ikíusaip. Ashí túrunatin tsawant ishichik ajatesai. ¹¹ Nu jeatsáinkia yajauch shuarka tuke yajauch túruki wetí. Núnisañ mujmíainian túraka tuke túruki wetí. Antsu péñkeran túraka péñkeran túruki wetí. Núnisañ esetar enentáimniusha tuke esetar Yusjaj wekasati.”

¹² Muriksha tawai “Eta, ti wárik winittíajai. Túran ti shiirmachin ashí péñker túramujaj métek súsatniua nuna takukin winittíajai. ¹³ Wiitjai. Yámankamtaiknumíá amúanmasha tuke pujuwitjai. Wisha A rétranmaya Y rétranam ashí retra áintsaitjai.” Tu tawai.

¹⁴ Ni pushirj péñker nijiamatniua núnisañ péñker túrinia nú shuar shiir warasminíai. Nu shuar nu pepru wáitirincha wayamniái. Túrar tuke iwiaaku pujutai numinmaya yuamniái. ¹⁵ Tura antsu Yúsan enentáimtachuka, wawekratniuka, tsanirmatan pujurainia nuka, mankartinkia, ántar-yus tikishmatniuka, tura ashí shuar wáitian wararainiak tuke túrin ainia nuka ga matsatainiak penké wayachmin áiniawai.

¹⁶ “Wi, Jesus, ashí Yus-shuaran ujakarát tusan winia suntarun akupkajai. Wikia Tawit Weeaitjai. Túrasha Tawitia Úntrinjtai. Wikia ti tsáapin yaa, yáñkuamia áintsanketjai.” Tu tawai.

¹⁷ Yusa Shiir Wakanísha tura Murik anajmarmasha “Winitiarum” tuiniawai.

Tura juna ántana nusha “Winitiarum” títi. Tura ashí kitiama nuka winití. Wakerakka tuke iwiaaku pujutai entsan penké kuitchajaj umartí.

¹⁸ Ashí shuar ju papinium Yus-Chicham aarma nuna antukarun juna ujaajai: Shuar juí áarman chikichan pataakka Yus nin ti wáitsatin juí aarma nuna patattsattawai. ¹⁹ Núnisañ shuar juí aarman emeneakuinkia Yus ni naarin iwiaaku pujutai papiniumíá japorattawai. Tura ti shiir péprunam wayatniun suritkiattawai. Nu péprusha tura nu papisha juí paant ujakma áiniawai.

²⁰ Jú papi áantratniun ujakua nu tawai “Eta, ti wari winittíajai.”
Pai, núnisañ atí. Wari winití, Uunt Jesúsá.

²¹ Ii Uuntri Jesukristu atumniasha shiir yainmakarti.

Nuke atí.